


Diža' güen che  
ancho Jesucristo



New Testament in Zapotec, Zoogocho (MX:zpq:Zapotec,  
Zoogocho)

**Diža' güen che ancho Jesucristo**  
**New Testament in Zapotec, Zoogocho (MX:zpq:Zapotec,**  
**Zoogocho)**

copyright © 1987 Wycliffe Bible Translators, Inc.

Language: Zapotec, Zoogocho

Translation by: Wycliffe Bible Translators, Inc.

Zapoteco, Zoogocho [zpq], Mexico

### Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Zapotec, Zoogocho

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 25 Nov 2022 from source files dated 29 Jan 2022  
 de7d40fb-3909-53d8-8bea-744cf1ce0e41

## Contents

San Mateo . . . . .	1
San Marcos . . . . .	64
San Lucas . . . . .	101
San Juan . . . . .	164
Hechos . . . . .	210
Romanos . . . . .	268
1 Corintios . . . . .	294
2 Corintios . . . . .	319
Gálatas . . . . .	334
Efesios . . . . .	344
Filipenses . . . . .	353
Colosenses . . . . .	359
1 Tesalonicenses . . . . .	365
2 Tesalonicenses . . . . .	370
1 Timoteo . . . . .	373
2 Timoteo . . . . .	381
Tito . . . . .	386
Filemón . . . . .	390
Hebreos . . . . .	392
Santiago . . . . .	412
1 Pedro . . . . .	419
2 Pedro . . . . .	427
1 Juan . . . . .	432
2 Juan . . . . .	438
3 Juan . . . . .	439
Judas . . . . .	440
Apocalipsis . . . . .	443

## DIŽA' GÜEN DAN' BZOJ SAN MATEO

*Ẅozxtao' Jesucriston'*

*(Lc. 3:23-38)*

<sup>1</sup> Nga nyoj la beṇe' gosac Ẅozxtao' Jesucriston' chzolaon len da' Ẅozxta' ocho Abraham. Le Jesús en' goque' xi' in' diaža che da' David, na' da' Davin' goque' xi' in' diaža che da' Abrahanna'.

<sup>2</sup> Abrahanna' goque' Ẅa Isaac, na' Isaaquen' goque' Ẅa Jacob, na' Jacoben' goque' Ẅa Judá len yezica' chle beṇe' biše' ca'. <sup>3</sup> Judán' na' Tamar gosaque' Ẅaxna' Fares na' Zara. Na' Faresen' goque' Ẅa Esrom, na' Esronna' goque' Ẅa Aram. <sup>4</sup> Na' Aranña' goque' Ẅa Aminadab, na' Aminadaben' goque' Ẅa Naasón, na' Naasónna' goque' Ẅa Salmón. <sup>5</sup> Salmónna' na' Rahab gosaque' Ẅaxna' Booz. Na' Boozen' na' Rut gosaque' Ẅaxna' Obed. Na' Obeden' goque' Ẅa Isai. <sup>6</sup> Na' Isain' goque' Ẅa rey David, na' rey Davin' goque' Ẅa Salomón. Na' xna' Salomónna' goque' xo' ol da' Urías cate' za' yeca' a rey Davin' le' par gaque' xo' ole'.

<sup>7</sup> Na' Salomónna' goque' Ẅa Roboam, na' Roboanna' goque' Ẅa Abías, na' Abíasen' goque' Ẅa Asa. <sup>8</sup> Na' Asan' goque' Ẅa Josafat, na' Josafaten' goque' Ẅa Joram, na' Joranna' goque' Ẅa Uzías. <sup>9</sup> Uzíasen' goque' Ẅa Jotam, na' Jotanna' goque' Ẅa Acáz, na' Acázen' goque' Ẅa Ezequías. <sup>10</sup> Na' Ezequíasen' goque' Ẅa Manasés, na' Manasésen' goque' Ẅa Amón, na' Amónna' goque' Ẅa Josías. <sup>11</sup> Josíasen' goque' Ẅa Jeconías len yezica' chle biše' ca' gosenita' ca' tiemp caten' beṇe' Babilonia ca' gosezene' beṇe' Israel ca' na' goseche' Ẅoxje' legaque' Babilonian'.

<sup>12</sup> Gwde goc ca', golje Salatiel xi' in' Jeconíasen'. Na' Salatielen' goque' Ẅa Zorobabel. <sup>13</sup> Na' Zorobabelen' goque' Ẅa Abiud, na' Abiuden' goque' Ẅa Eliaquim. Na' Eliaquinna' goque' Ẅa Azor. <sup>14</sup> Na' Azoren' goque' Ẅa Sadoc, na' Sadoquen' goque' Ẅa Aquim. Aquinna' goque' Ẅa Eliud. <sup>15</sup> Na' Eliuden' goque' Ẅa Eleazar, na' Eleazaren' goque' Ẅa Matán. Na' Matánna' goque' Ẅa Jacob. <sup>16</sup> Nach Jacoben' goque' Ẅa José ben' goc beṇe' che María. Na' Marían' goque' xna' Jesús ben' nzi' Cristo, zeje diža' ben' gwlej Diosen' cont yedeṇabi'e.

<sup>17</sup> Na' gwzolaon tiemp che da' Abraham bžinte tiemp che da' David gosac žta' diaža chen', na' ca' tiemp che da' David bžinte ca' tiemp caten' gosezene' beṇe' Israel ca' goseche' Ẅoxje' legaque' Babilonia, lecze gosac yežta' diaža chen', na' ca' tiemp en' bžinten' ca' žan' golje Criston' ben' gwlej Diosen' cont yedeṇabi'e, gosac yežta' diaža chen'.

*Can' goc cate' golje Jesucriston'*

*(Lc. 2:1-7)*

<sup>18</sup> Na' quingan' goc cate' golje Jesucriston'. Ba naquen gwšagna' Marían' len José, na' za' ca' a Josén' le' par gaque' xo' ole' cate' goche' ede' ba noa' Marían' bdao'. Goc ca' dan' ben' Spiritw che Diosen' cont bchenda' bdao' na' lo' le'e. <sup>19</sup> Na' Joséna' ben' ba naquen si'e Marían' par gaque' xo' ole', goque' to beṇe' ben' da' güen lao Diosen'. Na' bene' xbab cuejyiche' Marían' šižize cont nono gacbe'e na' cont bi' gwsie le' zto'. <sup>20</sup> Šlac chone' xbab gone' ca' gwtase' na' to angl beṇe' gwsela' Ẅancho Diosen' blo' elagüe' le' lo' bišgal. Na' gože' le':

—José, le' goljo' lo diaža che da' rey David. Bitw žebo' si'o Marían' par gaque' xo'olo'. Spiritw che Diosen' benen cont no'e bdao'na'. <sup>21</sup> Na' sane' to bi' byo dao' na' gwsio labe' Jesús, le len' yeque'e xtoła' bene' gualaž che' ca' bene' yesejnlaže'ne'.

<sup>22</sup> Goc yogo' da' ca' cont goc can' gwna Diosen' dan' bzoj to ben' be'e xtižen' cani', gwne':

<sup>23</sup> To no'ol güego' no'ole ne' napši'ichgua cuine' güe'e to bi' byo dao' na' sane'be'.

Na' si' labe' Emanuel.

Na' Emanuel zeje diža': Diosen' zoacze' len chio'.

<sup>24</sup> Na' cate' beban Josén' beyož gwne'de' yelen', bene' can' gož angl che Xancho Diosen' le', jaxi'e Marían' liže' par goque' xo'ole'. <sup>25</sup> Perw bi gwzoalene' le' ca xo'ole' san gwzoacze' le' respetw bžinte ža gwxxane' to bi' byo dao', xi'ine' nechw. Na' gwxi' labe' Jesús.

## 2

### *Magos ca' jasene'e Jesúsen'*

<sup>1</sup> Ca tiempen' cate' gwnabia' rey Herodes, golje Jesúsén' Belén, to yež gan' mbane distritw Judea. Na' besežin to chope magos Jerusalén, za'aque' to nación zito' dan' chi' do ga chla' gwbiž. <sup>2</sup> Na' gosenabde' bene' lo ciudan' gose'ene':

—¿Gan' rey che bene' Israel, ben' ba golje? Nezeto' ba golje', le ba ble'eto' beljw čhen' cate' blan' lažto' dan' zoa gan' chla' gwbiž. Na' za'to' gonxento'ne'.

<sup>3</sup> Cate' gwneze rey Herodesen' can' gosenen', gocchgüe' tole, na' lecze ca' yogo'loł bene' lo ciuda Jerusalénna'. <sup>4</sup> Nach reyna' btobe' yogo'loł bxož gwnabia' che chio' bene' Israel na' lecze yogo' bene' ca' chososed chosolo'e dan' bzoj da' Moisésen'. Na' gwñabde' legaque' gan' naquen galje Criston' ben' gwlej Diosen' cont yedenabi'e. <sup>5</sup> Nach gose' bene' ca' Herodesen':

—Galje' Belén, gan' mbane distritw Judea, le can' ža dan' bzoj to bene' be' xtiža' Diosen' cani'. Quinga žan:

<sup>6</sup> Ca nac yež Belén gan' že' diaža che da' Judá, nacczen yež da' zaca'chgua lao yež gwnabia' ca' zjachi' Judean'.

Le to bene' Belén gaque' bene' gwnabia',

na' le' güia ne'e nación Israel čhian'.

<sup>7</sup> Nach Herodesen' goxe' magos ca' bagaše'ze cont ja'aque' lagüen' na' gwnabde' legaque' batyanen' besele'ede' bla' beljon'. <sup>8</sup> Nach gwsele' legaque' Belénna', gože' legaque':

—Le šja'ac na' le šjaydiljw bidao'na' tcho'a. Na' cate' yeželebe' le yeda yedyedixjue'ele neda' cont lecze ša'a šjexena'be'.

<sup>9</sup> Beyož bosozenag magos ca' can' gož reyna' legaque', nach gosa'aque'. Na' beljon' dan' besele'ede' do gan' chla' gwbižen' cate' biña' yesa'ac lažgaquen', zejen le'e yaban' žialaon laogaque' bžinten yo'o gan' zoa bidao'na', na' gwlezen. <sup>10</sup> Na' magos ca' besyebede' juisyw cate' besele'ede' beljon' da' yoble. <sup>11</sup> Nach cate' besežine' yo'o gan' zoa bidaon', goso'e lo' yo'ona' na' besele'ede' bidao'na' len xña'be' Marían'. Nach bosozoa xibgaque' gosonxene'be'. Na' gosesaljo caj čhegaquen' gosebeje' oro, yal na' to nechw da' chla' zix' da' nzi' mirra na' gosoen' chebe'. <sup>12</sup> Na' šlac ne' nita' magos ca' Belénna', Diosen' gwduxjue'ede' legaque' lo bišgal

bich yesyedia' gan' zoa rey Herodesen'. Da'nan' besyeque'e yeto nez yoble jaya'ac laže'.

*Bosoxonje' ja'aque' Egipto*

<sup>13</sup> Na' cate' ba besyeya'ac magos ca', to angl che Xancho Diosen' blo'elagüe' Josén' lo bišgal, na' gože'ne':

—Gwyas, gwche' bidaon' na' xna'ben' le šja'ac naciön Egipto na' soale na'ze, na' cate'ch nia' le'e, cana' guaque yeza'le, le Herodesen' ba nžie' bia' yeyiljue' bidaon'na' cont gote'be'.

<sup>14</sup> Nach ne' ze bxin gwyas Josén', gwche'e bida'ona' len xna'ben' zja'aque' Egipton'. <sup>15</sup> Nach gosenite' Egipto na'ze šlac bžin ža got Herodesen'. Na' dan' gosone' ca' goc can' gwna Diosen' dan' bzoj to beñe' be' xtiže'na' cani', gwne': "Chixjue'eda' Xi'inan' yeze'e Egipton'."

*Herodesen' gwsele' soldadw cont gosote' yogo' bi' byo dao'*

<sup>16</sup> Na' rey Herodesen', cate' goche'ede' gosonle magos ca' le' dan' bich besyedia' gan' zoe'na', leca bže'e. Na' bsaque' con can' gwyejni'ide' cate' gwñabde' legaque' batcan' bla' beljon', na' gwsele' soldadw che' ca' par jasete' yogo'loł bi' byo che'en dao' zelao bi' chop ize, bi' ca' gosalje Belénna' na' yezica'chle yež ca' zjanyechj zjambi'i Belénna'. <sup>17</sup> Na' lagüe dan' gosote' bi' byo dao' ca', goc can' bzoj da' Jeremías ben' be' xtiža' Diosen' cani', žan:

<sup>18</sup> Nente ši'i beñe' Ramá,  
chesebežchgüe' nita'chgüe' yela' güine'.

No'ole ca' zjanaque' xi'in diaža che da' Raquel chesyeyaše'  
chesyegüine'de' che xi'inda'ogaque' ca',  
na' bitw chesaclaže' no yeyoexenlaže' legaque', le ba gosatben'.

<sup>19</sup> Cate' got Herodesen', Josén' ne' zoe' Egipton'. Nach to angl che Xancho Diosen' blo'elagüe' Josén' lo bišgal, na' gože'ne':

<sup>20</sup> —Gwyas, beche' bidaon' len xna'be'na' na' le šjaya'ac Israel. Ba gosat beñe' ca' besyeyiljw bidaon'na' cont yesote'be'.

<sup>21</sup> Nach gwyas Josén' beche'e bidaon' len xna'ben' jaya'ac lažgaque' Israel. <sup>22</sup> Perw Josén', cate' bende' Arquelao bezoe' chnabi'e latje che da' xe' Herodesen', bžebe' yeyeje' gan' mbane distritw Judean'. Na' Diosen' gwdixjue'ede' le' lo bišgalen' bi cheyala' šjaya'aque' distritw Judean', san šjaya'aque' gan' mbane distritw Galilean'. <sup>23</sup> Da'nan' besyežine' ciuda Nazaret na' jasenite'. Na' dan' jasenite' Nazaretan' goc can' bosozoj da' beñe' goso'e xtiža' Diosen' cani', gosene': "Yososi'e Jesúsén' beñe' Nazaret."

### 3

*Juan ben' bzoa bene' nis gwdixjue'ede' diža' güen che Diosen'*

(Mr. 1:1-8; Lc. 3:1-9, 15-17; Jn. 1:19-28)

<sup>1</sup> Na' gwde zan iz, Juan ben' bzoa beñe' nis gwyeje' latje daš gan' mbane distritw Judean'. <sup>2</sup> Na' gwdixjue'ede' beñe', gože' legaque':

—Le yetinje xtoła'le ca', le ba bžin ža cate' Diosen' ben' zoa yaban' nabi'e yichjlaždao' beñe' yosozenague' che'.

<sup>3</sup> Che Juanna' bzoj da' Isaíasen' caten' bzoje' Xtiža' Diosen' cani', gwne': Bena' chne' ziže latje dašen', že':

"Le gonšagüe' yichjlažda'olen' cont soale lez gwzenagle che Xancho' cate' yide'.

Le cuejyichj da' malen' chonle cont yichjlažda' olen' gaquen ca to nez da' ba gosonšagüe'."

<sup>4</sup> Na' Juanna', xalane' goquen de yiša' xa camello. Na' da' bčejj lšinen' goquen de yid, na' gwdagüe' biše'zo len šina' beser yixe'. <sup>5</sup> Bene' že' ciuda Jerusalenna' na' bene' že' yogo' yež ca' gan' mbane distritw Judean', na' lecze bene' že' yež ca' nyechj mbi'i yegw Jordánna' gosa'aque' ja'aque' gan' zoa Juanna' cont bosozenague' xtiže'na'. <sup>6</sup> Na' cate' gosexoadole' bi da' xinj zjanone', Juanna' bzoe' legaque' nis lo yegw Jordánna'.

<sup>7</sup> Na' lecze ja'ac zan bene' Israel bene' ca' zjanzi' fariseo na' bene' ca' zjanzi' saduseo. Ja'aque' cont bzoa Juanna' legaque' nis. Nach Juanna' cate' ble'ede' legaque' gože'ne':

—|Le'e nacchguale bene' zgot na' bene' gwxiye'! ¿Cahaquele guac yelale lao castigw dan' sela' Diosen' caten' gone' yela' justis che benachen'? <sup>8</sup> Še da' li ba betinjele xtoła'len', cheyala' gonle da' nac güen cont yesacbe'e bene' ba boša' yichjlažda' olen'. <sup>9</sup> Na' bitw gonle xbab gaquele Diosen' bitw gone' le'e castigw che xtoła'len' lagüe dan' nacle xi'in diaža che da' Abrahanna'. Bitw nacho leca chyažje Diosen' le'e. Guac gone' cont yej quinga yesyeyaquen xi'in diaža che da' Abrahanna'. <sup>10</sup> Ca nac le'e, še bi chonle can' chazlaže' Diosen', zaca'leble ca to yag frut da' bibi chbia. Na' yogo'te yag frut da' bibi chbia, čhog xan yaga' len na' gwzeyen'. <sup>11</sup> Neda' da' li chzoa' le'e nis neche ba betinje xtoła'le, perw coža'na' za' yid ben' gon cont soa Spiritw che Diosen' lo' yichjlažda' olen' nabian' le'e. Na' bene' ca' bi yeson can' chazlaže' Diosen', sele' legaque' lo yi' gabilen'. Na' ben' za' za' coža'na' zaca'che' ca neda' na' da' nacchgüe' bene' zaca', bi zaca' gona' xmandadoe' lechja' no xele'. <sup>12</sup> Benan' gone' len benachen' can' choncho cate' chdecho trigon' lo' rner. Chotobcho trigon' chgo'ošagüe'chon na' chzeycho yix beben'. Na' bene' bi chesejnilaže' Diosen', sele' legaque' lo yi' gabilen' dan' cbi cheyol chenit.

*Cate' gwzoa Jesúsen' nis*  
(Mr. 1:9-11; Lc. 3:21-22)

<sup>13</sup> Na' gwza' Jesúsen' gan' mbane Galilea na' gwyeje' gan' zoa Juanna' cho'a yegw Jordánna' cont Juanna' bzoe' le' nis. <sup>14</sup> Na' Juanna' ben cho'alagüe' gague goclaže' gwzoe' Jesúsen' nis, gože'ne':

—Chyažjda' gwzo' neda' nisen' na' le' zedenabo' gwzoa' le' nis.

<sup>15</sup> Nach Jesúsen' gože' Juanna':

—Bzoa neda' nisen'. Cheyala' goncho ca' cont gac yogo'lol dan' non Diosen' mandadw gac.

Nach gwcheb Juanna' bzoe'ne' nis. <sup>16</sup> Na' cate' beyož gwzoa Jesúsen' nisen', bechoje' lo' nisen', na' la' byaljwte yaban' gan' zoa Diosen'. Na' ble'ede' Spiritw che Diosen' betjen ca to ngolbex na' bžinen gwzoan len le'. <sup>17</sup> Na' gosende' gwne' Dios ben' zoa yaban', gwne':

—Bengan' Xi'ina' bene' chacda' na' chebe chezaquelaže' chgüeda' che'.

## 4

*Goclaže' gwxiyen' co'oyelan' Jesúsen' gone' da' mal*  
(Mr. 1:12-13; Lc. 4:1-13)

<sup>1</sup> Na' Spiritw che Diosen' benen cont gwyej Jesúsen' latje dašen' gan' Satanás dan' chnabia' da' xigüe' ca' goclažen' co'oyelan' le' cont gone' da' mal.

<sup>2</sup> Na' bitwbi gwdagw Jesúsen' lao čhoa ža čhoa yel, na' cate' gwde da' čhoa žana' gwdone'. <sup>3</sup> Na' Satanásen' gwbigan' gan' zoa Jesúsen', gožen le': —Še le' naco' dogualje Xi'in Diosen', gož yej quinga yesyeyaquen yetextil.

<sup>4</sup> Nach gož Jesúsen' len:

—Nyojczé Xtiža' Diosen' žan: “Gague yela' guagw na'zen' chyažje chio' beňaç cont gac bancho, san lecze chyažjecho yogo'lol diža' dan' ža Diosen'.”

<sup>5</sup> Nach gwče' Satanásen' le' ciuda Jerusalén dan' nac ciuda čhe Dios. Na' bcuen le' yichjo' yodao' blao gan' nac la'zelagüe sibe, <sup>6</sup> na' gožen le':

—Še len' naco' dogualje Xi'in Diosen', nga boslažo' cuino', le nyojczén le'e Xtiža' Diosen', žan:

Sela' Diosen' beňe' ca' zjanac angl čhe' yesaclene' le', na' yesože' le' cont bi čhego' no yej.

<sup>7</sup> Na' gož Jesúsen' gwxiye'na':

—Lecze can' nyojen Xtiža' Diosen', žan: “Bitw goncho Xancho Diosen' prueba še lede' can' že'na'.”

<sup>8</sup> Da' yoble gwxiye'na' gozče'en le' to lo ya'a da' nacchgua sibe, na' blo'en le' yogo' nación dan' zjachi' doxen yežlion' len yela' zaca' yela' xdan čhegaquen. <sup>9</sup> Nach gožen le':

—Yogo' da' quinga chle'edo' nga gonan' lo nao' še gwzoa xibo' lagua' nga gonxeno' neda'.

<sup>10</sup> Nach gož Jesúsen' len:

—Beyej ca'ale Satanás. Nyojczén le'e Xtiža' Diosen' žan: “Cheyala' šejnilaže'cho Xancho Diosen' na' toze le' gonxencho.”

<sup>11</sup> Na' becuase Satanásen' cuite'na' beyejen ga yoble nach besežin to čhope angl čhe Diosen' jasadene' le'.

*Jesúsen' gwzologüe' chyixjue'ede' diža' güen čhe Diosen' distritw Galilea (Mr. 1:14-15; Lc. 4:14-15)*

<sup>12</sup> Na' Jesúsen' beze'e distritw Judean' na' beyeje' distritw Galilea cate' bende' ba de Juanna' ližya. <sup>13</sup> Na' gwze'e yež Nazareten' jasoe' ciuda Capernaum dan' chi' cho'a nisdaon' do gan' zjachi' distritw dan' zjanzi' Zabulón na' Neftalí. <sup>14</sup> Na' dan' jayzoe' ciudan' goc can' gwna da' Isaías ben' be' xtiža' Diosen' cani' caten' bzoje' dan' ža:

<sup>15</sup> Ca' nac distritw Galilea gan' že' zan beňe' chi' zjanaque' beňe' Israel, gan' nita' distritw Zabulón na' distritw Neftalí dan' zjambane yešla'ale nisdaon' na' yegw Jordán,

<sup>16</sup> nčhoł yichjlaždao' beňe' ca' že' na'.

Perw Diosen' gwsele' to beňe' gwlo'o to be'ni' xen lo' yichjlažda'ogaquen'. Gosaque' ca' beňe' guat len yichjlažda'ogüen' le' gosone' da' malen', perw bena' gwseła' Diosen' ba bocobe' yichjlažda'ogaquen'.

<sup>17</sup> Cana' gwzoloa Jesúsen' gwđixjue'ede' gwne':

—Le yetinje xtola'len', le ba bžin ža cate' Diosen' ben' zoa yaban' nabi'e yichjlaždao' beňe' yosozenague' čhe'.

*Jesúsen' gwleje' tap beňe' gwxen bel' cont gosaque' txen len le' (Mr. 1:16-20; Lc. 5:1-11)*

<sup>18</sup> Na' zej Jesúsen' cho'a nisdao' čhe Galilea cate' ble'ede' čhope beňe' gwxen bel', Simón Pedro na' beňe' biše' Andrés, na' zjanite' chosozale' yixjw dan' chesezende' belen' lo' nisa'. <sup>19</sup> Nach gože' legaque':



—Le šo' len neda'. Nacle beṇe' gwɣen beḷ, na' chbejle beḷ lo' nis, perw na'a gona' cont gaxle beṇe' yesyechoje' lo da' malen'.

<sup>20</sup> Na' la' gosebeyichjte' yixjw chen' nach ja'aclene' Jesúsen'.

<sup>21</sup> Na' Jesúsen' gwzwe'e yelate' na' ble'ede' Jacobon' xi'ṇ Zebedeo na' len beṇe' biše' Juan, zjajo'e to lo' barcw len xagaque', chesyeyonšagüe' yixjw čhegaquen'. Na' lecze gox Jesúsen' legaque' šja'aclene' le'. <sup>22</sup> Na' la' gosontie' barcon' lo na' xagaque' Zebedeon' na' ja'aclene' Jesúsen'.

*Jesúsen' bsd blo'ede' beṇe' zan*

*(Lc. 6:17-19)*

<sup>23</sup> Na' Jesúsen' gwyeje' yogo' yež ca' zjachi' gan' mbane Galilea, bsd blo'ede' beṇe' ca' zjaže' to to yodao' čhe chio' beṇe' Israel. Na' gwɣixjue'ede' diža' güen can' nabia' Diosen' yichjlaždao' beṇe' yosozenag čhe'. Na' Jesúsen' beyone' beṇe' ca' chese'e bite'teze yižgüe'. <sup>24</sup> Na' doxen nación Siria gwɣoxa diža' yogo' da' güen da' ben Jesúsen'. Nach beṇe' Siria ca' jasesane' yogo' beṇe' chesacšene lagüe'na', beṇe' chese'e zan yižgüe', beṇe' chesey chesela, beṇe' zjajo'o zjanyaz da' xigüe' yichjlažda'ogaque' len beṇe' chesaz šon na' beṇe' natsi' cuerp čhegaquen'. Na' beyone' legaque'. <sup>25</sup> Na' zan beṇe' gosao' le', beṇe' za'ac distritw Galilea na' distritw Decápolis, na' beṇe' za'ac ciuda Jerusalén, na' beṇe' za'ac yezica'chle yež da' zjachi' distritw Judea, na' beṇe' za'ac yešla'a yegw Jordán.

## 5

*Diža' dan' bsd blo'e Jesúsen' to lo ya'a*

*(Lc. 6:20-23)*

<sup>1</sup> Na' Jesúsen' cate' ble'ede' beṇe' zan zjanžag, na' gwlo'e gwchi'e to lo ya'a. Na' beṇe' ca' zjanaque' le' txen gosebigue' gan' chi'ena'. <sup>2</sup> Nach gwzolao bsd blo'ede' legaque', gwne':

<sup>3</sup> —Mbalaz zoa le'e chache'ele chyažjele gaclen Diosen' le'e, le ba chzenagle čhe Diosen' cont chnabi'e yichjlažda'olen'.

<sup>4</sup> 'Mbalaz soa le'e chacyaše'laže'le, le Diosen' yeyoe'xenlaže' le'e.

<sup>5</sup> 'Mbalaz zoa le'e chzexjwlaže'le len Diosen' na' len beṇachen', le gon Diosen' cont gac lo na'le doxen yežlion' can' gwne'.

<sup>6</sup> 'Mbalaz zoa le'e chzelaže'chguale gacle beṇe' güen len Diosen', le ba cheyon Diosen' le'e beṇe' güen lagüen'.

<sup>7</sup> 'Mbalaz zoa le'e cheyaše'le beṇe' yoble, le lecze ca' Diosen' yeyaše' yeži'ilaže'de' le'e.

<sup>8</sup> 'Mbalaz zoa le'e ba nacle beṇe' laždao' xilaže', le šjayzoale txen len Diosen'.

<sup>9</sup> 'Mbalaz zoa le'e chego'ole yela' chxenlaže' čhe beṇe' chesediḷe, le Diosen' ne' nacle xi'ine'.

<sup>10</sup> 'Mbalaz zoa le'e chosoči chososaca' beṇe' le'e lagüe dan' chonḷe dan' nac güen lao Diosen', le chzenagle čhe Diosen' cont chnabi'e yichjlažda'olen'.

<sup>11</sup> 'Na' mbalaz soale še dan' chejnilaže'le neda' chesezi'diža' beṇe' le'e na' chososaca'zi'e le'e na' chosoxie' diža' güenlaže' čhele. <sup>12</sup> Le yebechgüe na' le soa mbalaz, le Diosen' gone' cont gacchgua da' güen čhele cate' yežinḷe gan' zoe'na'. Can' chesonde' le'e, ca'czen' goson da' xozxta'ocho len da' beṇe' ca' goso'e xtiza' Diosen' cani'.

*Naccho ca zede' na' ca be'ni' len bene' že' yežlio nga*

*(Mr. 9:50; Lc. 14:34-35)*

<sup>13</sup>'Le'e nacle ca zede', le zede' chaclenen cont bi cuiayi' no yid bela', na' le'e chonle cont benachen' cbi chesontequē' da' mal. Perw še zeden' bich bi zxi' naquen, ħnaxe goncho cont yeyaquen zxi' da' yoble? Na' bich bi zacan', lete cho'onchon na' gwlej gwšošj bene' len. Na' le'e še cbich gonle can' chazlaže' Diosen', nacle ca zede' dan' bich bi zxi' naquen.

<sup>14</sup>'Na' le'e nacle ca be'ni' dan' chaclenle bene' cont chesenezde' nac chaclaže' Diosen' yesone'. Na' dan' chonle can', nacle ca to ciuda da' chi' to lo ya'a, le yogo'ze bene' chesele'eden'. <sup>15</sup>Notno gwguala' to yi' na' gw dosen' to caj, san chde'en le'e ze'e cont chšenin' len yogo' bene' že' lo' yo'ona'. <sup>16</sup>Na' ca nac le'e, cheyala' soateze soale gonle da' güenna' cont yesele'e bene' na' yesonxene' Xacho Dios ben' zoa yaban'.

*Jesúsen' bsd blo'ede' can' ža ley dan' bzoj da' Moisés*

<sup>17</sup>'Bitw gaquele še neda' za'a zedeyena' cont ley dan' bzoj da' Moisésen' na' dan' bosozoj yezica'chle bene' ca' goso'e xtiža' Diosen' cani' bich yesonen žin. Za'a cont gac can' ža yogo'lol Xtiža' Diosen' dan' bosozoj bene' ca'. <sup>18</sup>Da' li žia' le'e, te che yežlio nga len da' ca' chle'echo le'e yaban', perw ne to letr dao' ne to punt dao' dan' nyoj le'e leyna' bi gac yexin, san gac yogo'lol dan' nžia'bia' Diosen' gac. <sup>19</sup>Da'nan' note'tezle še bi gonle can' žanna', la'czla' še naquen la'zelagüe to da' dao', na' še lecze gwlo'ele bene' yoble bi yosozenague' chen, Dios ben' zoa yaba chnabi'e ne' bi nacle bene' blao len le'. Na' note'tezle še gonle can' žanna', na' še lecze gwlo'ele bene' yoble yesone' ca', Diosen' ben' zoa yaba chnabi'e ne' nacle bene' blao len le'. <sup>20</sup>Chnia' le'e, bene' fariseo ca' na' bene' ca' chososed chosolo'e dan' bzoj da' Moisés bitw zjanac yichjlažda'ogaquen' güen lao Diosen'. Na' še yichjlažda'olen' bi gacchen güen lao Diosen' clel ca' che bene' ca', bitw yežinle yaban' gan' zoa Diosen' chnabi'e.

*Da' malen' choncho še chža'a lježcho*

*(Lc. 12:57-59)*

<sup>21</sup>Na' lecze bsd blo'e Jesúsen' legaque' gože'ne':

—Ba nezele can' bzejni'i Moisésen' bene' ca' gosenita' cani', gwne': "Nono gotle. Na' še no got ljež benache', justis ca' yesechoglagüe' che' cheyala' gate'." <sup>22</sup>Na' neda' žia' le'e, note'tezle še chža'a ljež benachle, zacan' yesechoglagüe' gata' castigw chele. Na' note'tezle še chzi'diža' lježle, zacan' yeson bene' blao ca' chesenabia' nación Israel chechon' castigw chele. Na' note'tezle še chado'diža' lježle, zaca'czen' yesela' Diosen' le'e lo yi' gabil.

<sup>23</sup>'Cheyala' swoacho binlo len ljež benachcho. Na' la'czla' cate' ba zoale lo' yodao' cont gwnežjwle bi dan' gwnežjwle gonxenle Diosen', še šjasa'laže'le ba benle da' mal contr to bene' lježle, <sup>24</sup>na'ze cheyala' gwcu'a'anle šlož dan' noxe'len' na' šjenle cont yezoale binlo len bene' lježlen'. Yeyoža' guaque šjasanle dan' ba gwlejlē cont gonxenle Diosen'.

<sup>25</sup>'Cate' to bene' gagüe' xya chele na' che'e le'e lao justis, šlac ngo'ole nezen' le yeyiljwlaže' nac gonle cont yezoale binlo len le' cont bi che'e le'e lao justisen'. Še bitw gonle ca', cate' žinle lao justisen', nach gone' le'e lo na' bene' ca' yososeyjue' le'e ližya. <sup>26</sup>Da' li žia' le'e, bitw yebeje' le'e še biña' chixjwle doxen dan' čala'le.

*Da' malen' choncho še chzoa xtocho*

27 'Ba nezele ley dan' bzoj da' Moisésen' žan: "Bitw gata'lenle no'ole bi nac no'ol chele o bene' byo bi nac bene' chele." 28 Na' neda' žia' le'e, note'tezle še chn'a'le to no'ole na' chzelaže'lene', ba naple dola'. Le tozeczce ca malen' ba chonle lo' lažda'olen' len dan' chon bene' chzoa xtoe'.

29 'Na' še yejlaolen' chonen cont gonle da' xinj, cheyała' cuejyichjle da' malen' chonle. Yejni'a cuiayi' yejlaolen' clcl ca cuiayi'le lo yi' gabilen' neche len. 30 Na' še na'le chonen cont gonle da' xinj, cheyała' cuejyichjle da' malen' chonle. Yejni'a cuiayi' na'le clcl ca cuiayi'le lo yi' gabil neche len.

*Bene' ca' zjanšagna' bitw cheyała' yesyele'e*  
(Mt. 19:9; Mr. 10:11-12; Lc. 16:18)

31 'Lecze nezele ley dan' bzoj da' Moisésen' žan: "Note'teze bene' yele'e len no'ol che', cheyała' chas to yiš ga güen' diža' le besyele'ena'." 32 Na' neda' žia' le'e note'teze bene' chele'e len no'ol che', len neztede' no'ole chen' bitw naque' to no'ole chzoa xtoe', chone' cont gaque' ca to no'ole bene' chzoa xto. Na' note'teze yošagna'lene' to no'ole bene' bela'a len bene' che', lecze tozeczce ca da' xinj gone' len dan' chon bene' chata'lene' no'ol che bene' yoble.

*Jesúsen' bzejni'ide' cheyała' güe'cho diža' li*

33 'Na' lecze ba nezele can' bzejni'i da' Moisésen' da' xozxta'ocho ca': "Cate' gwzoale testigw Xancho Diosen', cheyała' gonle con can' ba gw-nalen'." 34 Perw neda' žia' le'e gwbat nale quinga che bite'teze: "Yabana' zoan testigw chia' cho'a diža' li". Bi nale ca' le yaba nan' zoa Diosen' chnabi'e. 35 Na' neca nale: "Yežlion' zoan testigw chia' cho'a diža' li", le yežlion' den xni'a Dios. Neca nale: "Ciuda Jerusalénna' zoan testigw chia' cho'a diža' li", le naqen ciuda che Dios ben' naque' la'zelagüe bene' chnabia'. 36 Na' neca nale: "Yichja' zoan testigw chia' cho'a diža' li", le bitw gac gonle cont yiša' yichjlen' yesyeyaquen da' šiš o yesyeyaquen da' gasj. 37 Še žale guaquen, gacczen; še žale bi gac, bi gacczen. Le bichle diža' da' nale cont yesejle'e chele, zan' che Satanás dan' chnabia' da' xigüe' ca'.

*Bitw co'olaže'cho bene' chesegue'ede' chio'*  
(Lc. 6:29-30)

38 'Nezele ley dan' bzoj da' Moisésen' žan: "Še to bene' gone' zi' yejlaolen', guac gonle zi' yejlagüen', na' še to bene' xope' to layle, guac xople to layen'." 39 Perw neda' žia' le'e, bitw gwžonle gwsaca'zi' bene' le'e. Še to bene' cape' šla'a xaga'le, le güe' dan' yešla'a. 40 Še to bene' chagüe' xya na' che'nde' que'e xcamisle, le güe' latje que'e len xadon chelen'. 41 Na' še to bene' blao gone' byen šejlenlene' gua'le yoa' chen' do gašj hor, le šejlene' le guan' chop ca'te'le. 42 Na' še bi dan' chnabe bene' le'e, le güen'. Na' le cuej še bi da' chnabe' cuejlene'.

*Cheyała' gaquecho bene' chgue'e chio'*  
(Lc. 6:27-28, 32-36)

43 'Na' lecze ba nezele ley chelen' žan: "Cheyała' gaquele bene' migw chele na' gue'ele bene' chgue'ede' le'e." 44 Perw neda' žia' le'e, cheyała' gaquele bene' chgue'ede' le'e, na' cheyała' nabele Diosen' gac güen' che bene' chesezi'diže' le'e. Le gon binlo len bene' chesegue'ede' le'e, na' le yol güiž Diosen' cont gac güen' che bene' ca' chososacazi'e le'e. 45 Še gonle ca', gwlo'ele nacle xi'in Diosen' ben' zoa yaban'. Len' chone' chla'

gwbižen' cont chsenin' che bene' zjanaque' bene' güen lente che bene' zjanaque' bene' mal. Na' lecze chone' yejw par bene' zjanaque' bene' güen len bene' zjanaque' bene' mal. <sup>46</sup> Še chaquele šinze bene' chacde' le'e na' bi chaquele bene' yoble žbixchen' chbezle gon' Diosen' da' güen chele? Can can' cheson bene' güechixjw ca' chonle, bene' ca' žale zjanaque' bene' xi'achgua. <sup>47</sup> Na' še con chguaple tiox bene' biše' lježle ca'ze žchaquele güenna' chonle da' chonle ca'? Bitw chonle güen, le ca'czen' cheson bene' ca' bi zjanombi'e Diosen'. <sup>48</sup> Cheyala' gacle bene' šagüe' bene' güen len note'teze bene' con can' nac Xacho Diosen' ben' zoa yaban' bene' šagüe' bene' güen.

## 6

*Jesúsen' blo'ede' naquen' cheyala' goncho da' chazlaže' Diosen'*

<sup>1</sup> 'Cate' gonle to da' güen, bitw gonlen cont yesele'e bene' can' chonlen' na' yesonxene' le'e, le še chonle ca', Xacho Dios ben' zoa yaba bitw gone' ga gac güen chele. <sup>2</sup> Da'nán' cate' gwnežjwle to bene' da' chyažjde', bitw gwnežjwlen par yeseneze bene' ca' dan' chonlen'. Bene' gwxiye' ca' chosonežjue' bi da' chosonežjue' do lo' yodao' na' do chanez par yeseneze bene' na' yesene' güen chegaque'. Da' li žia' le'e, ba gosaxencze' lagüe da' chesone' ca', perw Diosen' bitw gone' ga gac güen chegaque' še ca'. <sup>3</sup> San le'e, še bi da' gwnežjwle to bene', le gwnežjon šižize. <sup>4</sup> Gonlen ga cbi yesacbe'e bene' na' cbi yesonxene' le'e, nach Xacho Diosen' ben' chle'ede' yogo' dan' choncho gone' ga gac güen chele ga yesele'e yogo' bene'.

*Bsed blo'e Jesúsen' nac cheyala' yol' güižcho Dios*  
(Lc. 11:2-4)

<sup>5</sup> 'Cate' yol' güižle Diosen', bitw gonle can' cheson bene' gwxiye' ca'. Legaque' chesyebede' chesezeche' chosol' güiže'ne' lo' yodao' chegaque', na' do squin chanez. Chesone' ca' cont yesele'e bene' can' chesone'na'. Da' li žia' le'e, ba gosaxenczen' lagüe da' chesone' ca', perw Diosen' bitw gone' ga gac güen chegaque' še ca'. <sup>6</sup> Na' cate' yol' güižle Diosen', le yeyo'o lo' yo'o chele na' gwseyjwle puerten' na' güe'le diža' len Diosen' ben' cbi chle'echo la'czla' zoe' len chio'. Na' Xacho Diosen' ben' chle'ede' yogo' dan' chonle gone' ga gac güen chele.

<sup>7</sup> 'Na' cate' yol' güižle Diosen' bi güe'le diža' zan can' cheson bene' ca' bi zjanombia' Diosen'. Legaque' chesacde' lagüe' dan' cheso'e diža' zan Diosen' gwzenague' chegaque'. <sup>8</sup> Bitw gonle can' chesone'na'. Ca' nac Xacho Diosen', cate' za' nabelenen' ba nezczed'e' bi dan' chyažjele. <sup>9</sup> Quinga yol' güižlene':

Xato' bene' zoa yaba, chnabto' yogo'lol' bene' yesonxene' le'.

<sup>10</sup> Zelaže'to' nabi'o yichjlaždao' yogo' neto' beňach.  
Gacšca can' chazlažo' yežlio nga can' chac yabana'.

<sup>11</sup> Ca' nac dan' che'ej chagwto' tža tža, beňšcan' na'a.

<sup>12</sup> Na' bezi'xenšca cheto', le lencze neto' chezi'xento' che ljež beňachtot' bite'teze da' chesonde' neto'.

<sup>13</sup> Na' bitw go'o latje soa da' gwžigan' neto' gonto' da' mal, san bcuas bcue'ejšca neto' len da' mala'.

Le'na' chnabi'o na' napo' yela' guac na' naco' bene' zaca' juisyw toli' tocaňe. Ca'czen' gacšca.

<sup>14</sup> 'Na' še chezi'xenle' che ljež beňachlen' bite'teze da' chesonde' le'e, lecze Xacho Diosen' ben' zoa yaban' yezi'xene' xtoła'len'. <sup>15</sup> Perw na' še le'e

bi chezi'xenle che ljež benačhle, lecze ca' Xacho Diosen' bitw yezi'xene' chelen'.

*Jesúsen' bzejni'ide' nac goncho gwbas*

<sup>16</sup> 'Cate' le'e gonle gwbas cont gonxenle Diosen', bitw gon cho'alaolen' ca che bene' chegüine'chgüe', can' cheson bene' gwxiye' ca'. Legaque' chesone' ca' contze chesele'e bene' le chesone' gwbas na' yesonxene' legaque'. Da' li žia' le'e, ba gosacxencze' lagüe da' chesone' ca', perw Diosen' bitw gone' ga gac güen čhegaque' še ca'. <sup>17</sup> San le'e cate' gonle gwbas, le gwpa'a yichjle na' le chib cho'alaole. <sup>18</sup> Le gon ca' cont bi yesache'e bene' chonle gwbas, san gache'e toz Xacho Dios ben' zoa len chio' la'czla' bi chle'echone'. Na' Xacho Diosen' ben' chle'e yogo' da' choncho gone' cont gacxenle.

*Da' ca' zjazaca'chgua yaba gan' zoa Diosen'*

*(Lc. 12:33-34)*

<sup>19</sup> 'Bitw co'ošagüe'le da' zča'o da' zjanac da' zaca' da' zjade yežlio nga, le yesebiayin'. Bał da' zjade yežlio nga chesaljen be dao' chesagwban', na' yebałen chesezen xče'en, na' lecze chaš bene' gwban na' yeseque'en. <sup>20</sup> San le gaque Diosen' cont gone' da' šagüe' da' güen čhele da' bi te čen cate' yežinle yaban' gan' zoe'na', da' bi šo'ba', na' neca sen xče'en, na' neca gac šo' bene' gwban yeseque'en. <sup>21</sup> Le gan' de dan' chaquelen' na' zoa yichjlažda'olen'.

*Žia yejlaocho cont chle'echo*

*(Lc. 11:34-36)*

<sup>22</sup> 'Žia yejlaole cont chle'ele. Še bitw bi chaquen, chle'eczele binlo. <sup>23</sup> Perw še yejlaolen' bi naquen binlo, bitw chle'ele. Ca'czen' naquen len yichjlažda'olen'. Da' licze leca nchol yichjlažda'ole še bi chzenagle čhe Diosen'.

*Bitw gac gaquecho Diosen' na' gaquetecho mechw*

*(Lc. 16:13)*

<sup>24</sup> 'Notno gac gon žin len čope xane' to ši'ize, le še gone' ca', gue'ede' to xan žinna' na' gacde' yetoe'; o gone' žin čhe toe' do yichj do laže' na' čhe ben' yeto gonen' to chža'alaže'ze. Lecze ca' le'e bitw gac gonle xšin Diosen' do yichj do laže'le na' gonte xšinle cont gacle bene' gwñ'a.

*Diosen' chapši'e xi'ine' ca'*

*(Lc. 12:22-31)*

<sup>25</sup> 'Da'nan' žia' le'e, bi gacžejlaže'le bi da' ye'ej gagwle šlac mbanle, na' lecze ca' bi gacžejlaže'le čhe xałana'le. Zaca'ch yeł'a mban chelen' ca yeł'a guagw. Lecze ca' cuerp chelen', zaca'chen ca xałana'le. <sup>26</sup> Le gon xbab ca nac be ca' zjažia xil ben' chesaš lo be', bitw chesazba', bitw cheselapba', neca zoa da'a xoa' čhegacba', perw na' Xacho Diosen' ben' zoa yaba chguagwce'ba'. ĩNacchle zaca' le'e ca be ca' zjažia xilen'! <sup>27</sup> Na' ne tole bi gac yoston cuinle gašje metr še con cue' yichjle tonle.

<sup>28</sup> 'Na' žbixchen' chbec yichjle xałana'le? Le gon xbab ca nac yej ca' da' zjaze yixe' chesecha'oczen'. Bibi žin chesonen, neca chesaljen do. <sup>29</sup> Na' žia' le'e, da' rey Salomón gocue' lache' güen juisyw, perw bitw bežinlaže' xałane'na' ca yeł'a xdan čhe yej ca'. <sup>30</sup> Diosen' none' xdan da' ca' ze yixen' la'czla' to čop žaze nitan' na' chosozeyen'. Nacchxe gon Diosen' len le'e gwlecze yichje' gone' yogo' da' chyažjele, le'e late' lasze chejle'le

che'. <sup>31</sup> Da'nan' bitw cuec yichjle che bi dan' chyažjele, nale': "¿Bin' ye'ej gagwcho na' bin' gacwcho?" <sup>32</sup> Bene' ca' bi chesonxene' Diosen' con chesoe'laže' bi da' gata' yese'ej yesagüe' na' che xalana'gaque'. Perw Xacho Diosen' ben' zoa yaban' nezczedē' bi da' ca' chyažjele. <sup>33</sup> Cheyala' güe'laže'le gwzenagle che Diosen' cont nabi'e yichjlažda'olen' na' cont gacle bene' güen len le', lenna' naquen da' žialaoch, na' yogo' da' ca' chyažjele, goncze Diosen' len. <sup>34</sup> Bitw cuec yichjle che bi dan' gac gwxe güižj, le decze da' cuec yichjcho tža tža. Da'nan' to to ža con cuec yichjcho che dan' chac ca hora'.

## 7

*Bitw zaca'cho nacho zjanap bene' dola'*

*(Lc. 6:37-38, 41-42)*

<sup>1</sup> 'Bitw gonle xbab zaca'le nale bene' zjanape' dola'. Še nale che bene' zjanape' dola', ca'cze Diosen' ne' le'e naple dola'. <sup>2</sup> Can' chosbaga'le bene' žale zjanape' dola', lecze can' yosbaga' Diosen' le'e ne' naple dola'. Con can' chonle len bene', lecze can' gon Diosen' len le'e. <sup>3</sup> ¿Bixchen' chna'le beb dao' dan' yo'o lo' yejla bene' lježle na' bi chacbe'ele naquech beb xen dan' yo'o lo' yejlaolen'? <sup>4</sup> Na' še le'e yo'o to da' xench lo' yejlaolen' ¿nacxečen' che'le bene' lježlen': "Ben' yebeja' beb dao' dan' yo'o lo' yejlaogun'?" <sup>5</sup> Bene' güexoayag! Zgua'tec le yebej beb xen dan' yo'o lo' yejlaolen', nach le'ele binlo cont yebejle dan' yo'o lo' yejlaogun' lježle.

<sup>6</sup> Perw bitw güe'tezle xtiža' Diosen' len bene' ca' cheson yichjlaogüe' cbi chesaclaže' yosozenaguen', le xož yesonde' le'e znia ca cheson bal beco' še bi chazlaže'ba' bi da' chosonežjue'ba'. Na' še güe'tezle xtiža' Diosen' len bene' ca' cheson yichjlaogüe', xož yosolej yosošoše' diža' dan' güe'lenlene'. Ca' cheson coš len da' cbi chesaclaže'ba' yesagwba'.

*Le nabe Diosen' bi dan' nabelene', le gonczen'*

*(Lc. 11:9-13; 6:31)*

<sup>7</sup> Še žan bi da' chyažecho, chnabchon. Še žan to da' chaclaže'cho želecho, chyilwchon. Še žan chaclaže'cho saljw bene' puert che' na' necho cho'a puerta' cont saljue'. Na' ca'cze cheyala' ye'le Diosen' cate' bi da' chyažjele, o bi da' chaclaže'le gone'. <sup>8</sup> Na' note'tezle še bi da' chnabelene', gonczen'. Na' še bi dan' che'nele nezele, gwzejni'iczen' le'e. Na' še žan chaclaže'le gac to da' gac, yol güižle Diosen' can' chon to bene' chnie' cho'a puert, nach Diosen' gone' cont gacczen.

<sup>9</sup> Na' le'e xa bidao', še xi'inle nabebe' le'e yetextil ¿gwnežjwlebe' to yej? <sup>10</sup> Na' še nabbe' yid bel gagwbe', ¿gwnežjwlebe' to be xigüe'? <sup>11</sup> La' nacle bene' mal, nezele chnežjo xi'inle to da' güen. Nacchxe güen gon Xacho Diosen' ben' zoa yaban' len bene' chnab lagüe'na' bi dan' chyažjde'.

<sup>12</sup> Na' con yogo' da' güen da' chaclaže'le yeson benachen' len le'e, lecze ca' cheyala' gonle len legaque', le can' zejen da' nyoj le'e ley dan' bzoj da' Moisēsen' na' dan' bosozoj da' bene' ca' gosoe' xtiža' Diosen' cani'.

*Nez da' yežin yaban' zaca'leben ca to nez las*

*(Lc. 13:24)*

<sup>13-14</sup> Lao yela' mban checho chope nez de, to nez güen na' to nez mal. Nez malen' zaca'leben ca to nez yo to nez laga' dan' chaquele leca mba naquen cont talen, na' bene' zan cheseque'en. Perw cheyala' gonle byen šo'le nez güenna' la'czla' chaquele naquen ca to nez las, to nez zdebe, le nez

malen' chežinen gabil gan' saca'zi'le toli tocanē. Na' nez güenna' chežinen yaba ga banle toli tocanē.

*Dan' choncho chlo'en bin' yo'o lo' yichjlažda'ochō*

*(Lc. 6:43-44)*

<sup>15</sup>Cheyala' gwsaca'le cont bi šejle'le xtiža' bene' ca' chesonlaže' chesene' xtiža' Diosen' cheseyixjue'ede'. Xdanchgua cheso'e dižan', le chesaclačže' gonle xbab zjanaque' bene' güen. Perw zjanaque' bene' laždao' xi'a na' chesaclačže' yosožiaje'e le'e. <sup>16</sup>Con can' nac da' chbia to to yaguen nezecho bi yaga'. Ca nac yag yeše' bitw chbian uvas na' neca yag lay chbian yixgüigw. Ca'czen' cheyala' gacbe'ele bene' ca' yeseziye'e le'e cate' le'ele dan' chesone'na'. <sup>17</sup>Yag dan' nac yag güen, frut güencze chbian, na' yag da' bi nac güen, lecze frut da' bi nac güen chbian. <sup>18</sup>Bitw nacho to yag frut güen chbian frut da' bi nac güen, na' neca nacho dan' bi nac güen chbian da' nac güen. <sup>19</sup>Na' yogo'te yag frut da' bibi chbia, chog xan yaga' len na' gwzeyen'. <sup>20</sup>Na' can' nac dan' cheson to to bene', nezecho še zjanaque' bene' güen o bene' mal.

*Gague yogo' bene' yesyežine' gan' zoa Diosen' chnabi'e*

*(Lc. 13:25-27)*

<sup>21</sup>'Bene' zan chese'e neda': "Naco' Xana'", perw gague yogüe' yesyežine' yaban' gan' zoa Diosen' chnabi'e. Bene' ca' cheson can' chazlačže' Xa' Diosen' ben' zoa yaban', legaczen' yesyežine' yaban' gan' zoe'na'. <sup>22</sup>Cate' žin ža yosodie' cuent lao Diosen', bene' zan yesi'e neda': "Xana', goclen neto' na'a, le ba gw dixjue'eto' xtižo'na'. Na' lecze ca' bza' bzetjto' lao' bebejto' da' xigüe' ca' zjajo'o zjanyaz yichjlaždao' bene'. Na' lecze bza' bzetjto' lao'na' bento' da' zan yela' guac." <sup>23</sup>Perw na' yapa' leaque': "Bitw nombi'a le'e. Le šjaya'ac ca'ale le'e bene' güen da' xinj."

*Chope bene' na' yo'o da' chon to toe'*

*(Mr. 1:22; Lc. 6:47-49)*

<sup>24</sup>'Bene' chzenag xtiža'na' na' chone' can' žia'na' zaca'lebde' ca to bene' sina' bene' ben liže' na' gw dixjue' lenen len yej gual. <sup>25</sup>Na' goc yejw zil juisyw na' betj yegw gwyechjen liže'na' na' gwyechj be' bdono'. Perw bitw gosezoen yosochixen len dan' gw dixjue' lenen de yej. <sup>26</sup>Na' bene' chzenag xtiža'na' perw bitw chone' can' žia'na', zaca'lebde' ca to bene' tont bene' bzoa ližen' lo yox. <sup>27</sup>Na' goc yejw zil juisyw na' na' betj yegon' gwyechjen liže'na' na' gwyechj be' bdono'. Nach ližen' bebixen gwžiajin'.

<sup>28</sup>Na' cate' beyož be' Jesúsen' diža' ca', bene' ca' že' na' besyebande' can' bsd blo'eden'. <sup>29</sup>Le can' bzejni'ide' nachbia' nezde' cayanen' nac xbab che Diosen', gague bzejni'ide' can' chosozejni'i bene' ca' chososed chosolo'e ley dan' bzoj da' Moisésen'.

## 8

*Jesúsen' beyone' to bene' che'ede' yižgüe' dan' nzi' lepra*

*(Mr. 1:40-45; Lc. 5:12-16)*

<sup>1</sup>Bene' zan zesyenagüe' Jesúsen' cate' beyetje' ya'ana'. <sup>2</sup>Nach to bene' che'ede' yižgüe' dan' nzi' lepra gwbigue' lao Jesúsen' na' bzoa xibe' lagüe'na' gože'ne':

—Xana', še chaclažo' guac yeca'o yižgüe' dan' che'eda'.

<sup>3</sup>Nach Jesúsen' bli ne'e na' gw xoen' yichje' na' gože' le':

—Chaclaža' yeyacdo'. Beyaque.

Nach *la'* beyactie' ca nac yižgüe' dan' che'ede'. <sup>4</sup> Nach Jesúsén' gože' *le'*: —Notno yo'o can' ba beyona' *le'*. Con gwyey jana' bxoza' cont le'ede' bačh beyacdo'. Na' bnežjw da' cheyala' gwnežjo' dan' non Moisésén' mandaw cont yeyaco' xilaže' len ley che Diosén'. Ben ca' cont yogo' bene' yeseņezde' ba beyacdo'.

*Jesúsén' beyone' xmos to soldadw*  
(Lc. 7:1-10)

<sup>5</sup> Na' cate' bežin Jesúsén' Capernaum to xan soldadw bene' Roma *la'* bšagte' *le'*. Na' gota'yoede' Jesúsén', <sup>6</sup> gože'ne':

—Xana', xmosan' die' ližan' chacšenchgüede'. Natsi' cuerp chen' na' chžaglaochgüe'.

<sup>7</sup> Nach Jesúsén' gože' xan soldadoa':

—Sa'lena' *le'* na' yeyona'ne'.

<sup>8</sup> Perw na' xan soldadoa' gože'ne':

—Xana', bitw naca' bene' zaque' par sa'o liža'na'. Ngateze ben mandaw yeyac xmosan' na' yeyaccze'. <sup>9</sup> Neda' zoa bene' chnabi'e neda', perw lecze nita' soldadw chia' na' chnabia'gaca'ne'. Cate' chapa' toe': “Gwyey”, na' cheje', na' cate' chapa' yetoe': “Da”, na' chide', na' cate' chapa' xmosa': “Da' nga gono”, na' chonen'. Nan' nezdá' con nao' yeyac xmosan' na' yeyaccze'.

<sup>10</sup> Na' Jesúsén' cate' bende' xtiža' xan soldadoa' bebande' na' gože' bene' ca' zjanagüe' *le'*na':

—Da' licze žia' *le'*e, ne toze bene' Israel biña' šejnilaže'chgüe' neda' ca benga bi naque' bene' Israel. <sup>11</sup> Žia' *le'*e, bene' zan za'ac doxen yežlion' šjasenyite' txen len da' xozxta'ocho Abraham, Isaac na' Jacob yaban' gan' zoa Diosén' chnabi'e na' yesebi'e cho'a mes yesagüe'. <sup>12</sup> Na' ca nac bene' nación Israelen' ben' gwlej Diosén' cont yesenite' len *le'*, choj bene' zan bitw yesejnilaže' neda'. Da'nán' sele' legaue' lo' yi' gabil' gan' nac choł na' yesebežyaše' na' yesagwxejte laye' dan' yesežaglaochgüe'.

<sup>13</sup> Beyož gwna Jesúsén' ca' nach gože' xan soldadoa':

—Guac yeyejo'. Yeyaque xmoso'na', con can' chejli'o gac che'.

Na' xmos xan soldadoa' *la'* beyactede'.

*Jesúsén' beyone' taobi'in che Pedroa'*  
(Mr. 1:29-31; Lc. 4:38-39)

<sup>14</sup> Na' gwyey Jesúsén' liž Pedroa', na' ble'ede' taobi'in che Pedroa' die' yo'e da' *la'*. <sup>15</sup> Jesúsén' bexue' ne'e na' *la'* bechojtie' da' lan'. Nach *la'* gwyaste no'olen' bsini'e da' gose'ej gosagüe'.

*Jesúsén' beyone' bene' zan*  
(Mr. 1:32-34; Lc. 4:40-41)

<sup>16</sup> Na' cate' ba gwxin, besežin bene' gan' zoa Jesúsén' zjanči'e bene' zan zjajo'o zjanyaz da' xigüe' yichjlažda'ogaquen'. Jesúsén' con bene' mandaw na' besyechoj da' xigüe' ca'. Leczé beyone' yogo' bene' ca' chesacšene. <sup>17</sup> Bene' ca' cont goc can' ža Xtiža' Diosén' dan' bzoj da' Isaías che' cani', žan: “Le'na' yeque'e yela' chžaglaō checho na' yeque'e yogo' yižgüe' chechon.”

*Can' gož Jesúsén' bene' ca' gosaclaže' yesa'ogüe' le'*  
(Lc. 9:57-62)

<sup>18</sup> Gwde na' ble'e Jesúsén' ba besežin bene' zan zjanyechjde' *le'*, nach bene' mandaw len bene' ca' zjanaue' *le'* txen cont yesełague' yešla'a



nisdaon'. <sup>19</sup> Na' bchoj to bene' chsed chlo'ede' dan' bzoj da' Moisésen' nach gwbigue' lao Jesúsén' na' gože'ne':

—Maestrw, sa'lena' le' gate'tez šejo'.

<sup>20</sup> Nach gož Jesúsén' le':

—Nita' xišna' beza' na' lecz chesyěžin xišna' be dao' ca' zjazoa xil, be chaš le'e yaba, perw bibi xišna' neda' de ga yezi'laža', neda' naca' ben' gwsela' Diosen' golja' benač.

<sup>21</sup> Na' bchoj yeto ben' naque' Jesúsén' txen na' gože'ne':

—Xana', sa'lena' le' perw za' got xa'. Beņšca latje zgua'tec šjaycuaša'ne'.

<sup>22</sup> Jesúsén' gože'ne':

—Yo'o len neda'. Bene' ca' zjanac yichjlažda'ogüe' ca' che bene' guat, legaque' guacze yosocuaše' yezica'chle bene' guat.

*Jesúsén' bcueze' to be' bdono' lo nisdao'*

(Mr. 4:35-41; Lc. 8:22-25)

<sup>23</sup> Beyož be' Jesúsén' diža' ca', gwyo'e lo' barcon' len bene' ca' zjanaque' le' txen. <sup>24</sup> Na' šlac zej barcon' lo nisen' gwzolao gwyechj to be' bdono' na' nisdaon' leze chas chatan' na' gwzolao cheyož nis lo' barcon', perw ba chtas Jesúsén'. <sup>25</sup> Nach bosyosbane' le' gosi'ene':

—jXanto'! jBosla chio'! jBach chbiayi'cho!

<sup>26</sup> Nach Jesúsén' gože' legaque':

—¿Bixchen' chžebtecle ca'? ¿Nacxečen' bi chejle'le chia'?

Na' gwyase' na' gwdile' be' bdonon' len nisdaon', na' la' gosebe'žiten.

<sup>27</sup> Na' bene' ca' zjanaque' Jesúsén' txen besyebande' can' bene'na', nach gose' lježgaque':

—¿Noxe benga? lente be' bdono' na' len nisdaon' chosozenaguen che da' že'.

*Chope bene' Gadara zjajo'o zjanyaze' da' xigüe'*

(Mr. 5:1-20; Lc. 8:26-39)

<sup>28</sup> Na' besežine' yešla'a nisdaon' gan' chi' laž bene' Gadara ca'. Na' cate' bechoj Jesúsén' lo' barcoa' bosošag chope bene' le', bene' zjajo'o zjanyaz da' xigüe' yichjlažda'ogaque'. Bene' quinga ba nite' capsantw na' gosacchgüe' bene' znia juisyw len bene' chesyěžague' na' gague no chac ta tnez. <sup>29</sup> Na' bososye'e gose'e Jesúsén':

—¿Bixchen' chgoša' chlaže' chio' len neto', Jesús? Naco' dogualje Xi'in Dios. ¿Zao' gwsaco' neto' na'a cate' biņa' žin ža si'to' castigw?

<sup>30</sup> Na' gała'ze chesaš zan coš chesagwba'. <sup>31</sup> Nach da' xigüe' ca' gosata'yoen Jesúsén' gose'en le':

—Še yebejo' neto' yichjlaždao' bene' quinga, gwsela' neto' gan' nita' coš ca' na' beņ latje šjajo'oto' yichjlažda'oban'.

<sup>32</sup> Nach gož Jesúsén' legaquen:

—Le šjajo'o.

Nach besyechojen yichjlaždao' bene' ca' na' jaseyo'on yichjlaždao' coš ca'. Na' besyeyetjes coš ca' le'e ya'a gan' nita'ban', na' jaselažo'ba' lo' nisdaon' ga gosatba' gose'ejba' nis.

<sup>33</sup> Na' bene' ca' chosoyoe' cošen' besele'ede' dan' ba goquen na' bosy-oxonje' jasyeyeže' bene' lagüe' yež yogo' can' ba goquen' na' can' ba besyeyac bene' ca' goso'o gosaz da' xigüen' yichjlažda'ogaquen'. <sup>34</sup> Nach yogo' bene' ca' že' yeža' jasešague' Jesúsén' na' cate' besele'ede'ne' gosata'yoede' le' yeze'e lažgaquen'.

## 9

*Jesúsen' beyone' to bene' bi chda šla'a ni'a ne'e*  
(Mr. 2:1-12; Lc. 5:17-26)

<sup>1</sup> Nach Jesúsen' beyo'e lo' barcon' len bene' ca' zjanaque' le' txen besyelaque' yešla'a nisdaon' par besyežine' Capernaum gan' ba gwzoacze' sša. <sup>2</sup> Na' besežin xonj bene' zjanlene' to bene' xinj bene' bi chda šla'a ni'a ne'e, zjanxoe' le' to lo cam dao'. Cate' gocbe'e Jesúsen' le gosejnilaže'ne' nach gože' bene' güe'na':

—Bebe xi'ina'. Ba bezi'xena' xtolon'.

<sup>3</sup> Na' bał bene' ca' chososed chosolo'ede' dan' bzoj da' Moisésen' gosende' dan' gož Jesúsen' bene' güe'na' na' gosone' xbab lo' yichjlažda'ogaquen' gosene': “Benga chnie' diža' bya' che Dios chne' ca', le chon cuine' ca Dios.” <sup>4</sup> Jesúsen' gocbe'ede' ca nac da' cheseza'laže', na' gože' legaque':

—¿Bixchen' chza'laže'le ca' lo' yichjlažda'olen'? <sup>5</sup> Še yapa'ne': “Ba bezi'xena' xtolona',” bi nezele še napa' yela' gwnabia' cont yezi'xena' xtolen'. San še yapa'ne': “Gwyas na' gwda”, na' nacbia' še napa' yela' guac gac can' gwnian'. <sup>6</sup> Perw neda' naca' bene' gwseła' Dios golja' beṇaḥ gwlo'eda' le'e na'a zoa' yežlio nga napa' yela' gwnabia' cont yezi'xena' xtola' beṇaḥen'.

Nach gože' bene' xinja':

—Beyas, beyoa' xcamon' na' beyej ližo'.

<sup>7</sup> Na' beyas bena', beze'e zjayde' liže'. <sup>8</sup> Na' bene' ca' besele'ede' can' goquen' besežebchgüe'. Na' gosonxene' Diosen' dan' be'e yela' guac che Jesúsen'.

*Jesúsen' gwleje' Mateo cont goque' txen len le'*  
(Mr. 2:13-17; Lc. 5:27-32)

<sup>9</sup> Na' Jesúsen' gwdie' latje gan' chi' Mateo chḥixjue' impuesto. Na' cate' ble'ede' le' na' gože'ne':

—Da len neda'.

Na' gwzoža' Mateon' gwejlene' le'.

<sup>10</sup> Ca' goquen' ba chi' Jesúsen' liž Mateon' ba che'ej chagüe' txen len zan bene' güeḥixjw na' len yebałe bene' güen da' xinj na' len bene' ca' zjanaque' txen len le'. <sup>11</sup> Na' bene' fariseo ca' cate' besele'ede' chi' Jesúsen' txen len bene' ca', gose'e bene' ca' zjanaque' le' txen:

—¿Nacxeḥen' ben' chsed chlo'ede' le'e che'ej chagwlene' txen bene' güeḥixjw na' yebałe bene' güen da' xinj?

<sup>12</sup> Na' cate' Jesúsen' bende' xtiža'gaquen' na' gože' legaque':

—Bene' cbi chesacšene bitw cheseyažjde' bene' güen rmed. Bene' chesacšende', legaquen' cheseyažjde' bene' güen rmed. <sup>13</sup> Le šjased bi zeje Xtiža' Diosen' dan' nyojen žan: “Chaclaža' yeyaše' yeži'ilaže'le bene', gague con gotle beyixe' gonxenle neda'.” Gague bene' ba zjanaque' bene' güen len Diosen' zedeṇeyoeda' cont yesyetiṇjde' xtolen', san bene' güen da' xinjen'.

*Gosenabde' Jesúsen' bixchen' bene' ca' zjanaque' le' txen bi gosone' gwbas*  
(Mr. 2:18-22; Lc. 5:33-39)

<sup>14</sup> Nach bene' ca' chesone' txen len Juan ben' bzoe' bene' nis gosebigue' lao Jesúsen' na' gose'ene':

—Neto' na' len beṇe' fariseo ca' chonchguato' gwbas, perw beṇe' ca' zjanaque' le' txen bi chesone' gwbas. ¿Bixchen'?

<sup>15</sup> Nach gož Jesúsen' legaque':

—¿Guac yesezoa beṇe' yela' güine' beṇe' chesaxe' to ga chac yela' güešagna' šlac ben' bšagnan' zoalene' legaque'? Še zoa ben' bšagnan' bi gac yesegüine'de'. Perw žin ža cate' bich soe' len legaque', cana'ch yesone' gwbas. Na' ca'cze naquen len neda' na' len beṇe' ca' zjanaque' neda' txen.

<sup>16</sup> 'Nono zoa beṇe' chchine' lache' cobe cont yoda' xe' da' de'exo', le lache' coben' yeben' cate' chiben' na' chezan' lache'exon', na' gan' nchezan' gacchen da' xen. <sup>17</sup> Na' lecze neca zoa beṇe' chgue'e vino cobe lo' bzod yide'exo', le vino coben' chšon' yide'exon' na' lalje vino na' yesebiayi' chopen. San chesegue'e vino coben' lo' yid cobe cont bitw cuiayi' vinon' len yiden'.

*Jesúsen' beyone' xi'in Jairo na' beyone' yeto no'ole beṇe' gwdane' xe'*  
(Mr. 5:21-43; Lc. 8:40-56)

<sup>18</sup> Na' ne' choe'te Jesúsen' dižan', bžin to beṇe' gwnabia' bzoa xibe' lao Jesúsen' na' gože'ne':

—Za' gotte to xi'ina' no'ole. Yo'ošca xoa taco' yichjbe' cont yebambe'.

<sup>19</sup> Na' gwzoža' Jesúsen' na' gwche'e beṇe' ca' zjanaque' le' txen ja'aclene' beṇe' gwnabian'. <sup>20</sup> Na' šlac zja'aque' liž beṇe' gwnabian' zej to no'ole nagüe' legaque', beṇe' ba goc šižinw iz chzoe' gwbao', na' bene' byen gwbigue' cože' Jesúsen' gwdane' lox xen'. <sup>21</sup> Le bene' xbab lo' yichjlažda'ogüen', gwne': "Con še ba gwdana' xen' nach yeyacda'." <sup>22</sup> Na' gwyečj Jesúsen' ble'ede' no'olen', gože'ne':

—Bendiplažo' xi'ina'. Ba beyacdo' dan' chejnilažo' neda'.

Na' la' beyactede'.

<sup>23</sup> Cate' bžin Jesúsen' liž beṇe' gwnabian' na' ble'ede' beṇe' zan zjaže' chesone' ššag chesebežchgüe' na' ba nita' beṇe' chosocuež bžejo par yosocuaše'be'. <sup>24</sup> Na' gože' legaque':

—Le yechoj ngale. Bi' no'ole daon' bina' gatbe', san chtasben'.

Na' beṇe' ca' bosoxiže' gosonle' che'. <sup>25</sup> Na' beyož bešaše' yogo'lol beṇe' ca', nach gwyo'o Jesúsen', beṇe' taca' bi' no'ol guaten', na' beyasbe'. <sup>26</sup> Na' ca nac yela' guac dan' ben Jesúsen', gwxa diža' chen yogo' yež dan' zjachi' do na'.

*Jesúsen' beyone' čhope beṇe' lchol*

<sup>27</sup> Cate' beza' Jesúsen' len beṇe' ca' zjanaque' le' txen, ja'aclen čhope beṇe' lchol legaque' na' gosene' zižje:

—Le' naco' xi'in diaža che da' rey David, beyaše'laže'šca neto'.

<sup>28</sup> Na' cate' Jesúsen' len beṇe' ca' zjanaque' le' txen besežine' yo'o gan' zjanite' na' besyeyo'e, na' lecze goso'o beṇe' lchol ca'. Nach Jesúsen' gože' legaque':

—¿Chejle'le guac gona' cont yele'ele?

Nach gose'ene':

—Chejle'to' Xanto'.

<sup>29</sup> Nach Jesúsen' gwdane' yejlaogaquen', na' gože' legaque':

—Yele'ele, le chejnilaže'le neda'.

<sup>30</sup> Nach besyeyac yejlaogaquen' besyele'ede'. Na' Jesúsen' gože' legaque' bicze yeso'e diža' can' goc besyeyac yejlaogaquen'.

<sup>31</sup> Na' besyeya'aque' na' gate'tez ja'aque' doxen distritw Galilean' goso'e diža' ca nac dan' ben Jesúsen' len legaque'.

*Jesúsen' beyone' to bene' bi goc nie'*

<sup>32</sup> Na' cate' besyeya'ac bene' ca', la' besežinte bene' yoble zjanči'e to bene' bi goc nie', na' yo'o yaz da' xigüen' yichjlažda'ogüen'. <sup>33</sup> Jesúsen' bebeje' da' xigüen' na' la' benete bena'. Na' bene' zan besele'ede' can' goquen' besyebanchgüede', na' gosene':

—Chio' bene' Israel, da' nechon' za' ble'echo yela' guac dan' nac ca'.

<sup>34</sup> Perw na' bene' fariseo ca' gosene':

—Satanás dan' nac xan da' xigüe' ca' chaclenen le' cont chebeje' da' xigüen' zjajo'o zjanyaz yichjlaždao' bene'.

*Jesúsen' cheyaše' cheži'ilaže'de' benačhen'*

<sup>35</sup> Na' Jesúsen' len bene' ca' zjanaque' le' txen ja'aque' to to yež na' to to ciuda da' zjachi' do na' bzejni'ide' bene' Israel lo' yodao' čhegaque' ca', gwdixjue'ede' diža' güen can' nabia' Diosen' yichjlaždao' bene' yosozenag che'. Na' Jesúsen' beyone' bene' ca' chese'e bite'teze yižgüe' na' bite'teze da' chesac čhegaque'. <sup>36</sup> Na' ble'ede' ba besežag bene' zan na' beyaše' beži'ilaže'de' legaque', le gocbe'ede' chesacžejlaže' nac yesone' na' gague no zoa yesaclen legaque' len yogo' dan' chesežaglaogüe'. Nite' ca nita' no xila' be nono de gwyoe legacba'. <sup>37</sup> Nach gože' bene' ca' zjanaque' le' txen:

—Chyažje bene' zan yeseyixjue'ede' xtiža' Diosen', perw to čopga bene' nita' yeseyixjue'eden'. Na' bene' yosozenague' che Diosen' zjazaca'lebe' ca to coseš xen da' chyažjen yedoben. <sup>38</sup> Da'n'an' le nabe Xancho Diosen' sela'che' bene' yesaclene' chio' yotobcho coseš čhen'.

## 10

*Jesúsen' gwleje' bene' šižinw ca' gosaque' txen len le'*

(Mr. 3:13-19; Lc. 6:12-16)

<sup>1</sup> Jesúsen' botobe' bene' šižinw ca' zjanaque' le' txen na' bnežjue' legaque' yela' gwnabia' cont besyebje' da' xigüe' lo' yichjlaždao' bene', na' cont besyeyone' bene' bite'teze yižgüe' da' chese'ede' na' bite'teze da' chesac čhegaque'.

<sup>2</sup> Quinga zjale bene' šižinw ca': Simón ben' lecze le' Pedro ben' goque' bene' blao, na' Andrés bene' biše' Pedroa', na' xi'in Zebedeon' Jacobo len Juan, <sup>3</sup> na' Felipe, na' Bartolomé, na' Tomás, na' Mateo ben' goc bene' güečhixjw, na' Jacobo xi'in Alfeo, na' Lebeo ben' lecze le' Tadeo, <sup>4</sup> na' Simón ben' ben txen len partidw cananista, na' Judas Iscariote ben' bdie' Jesúsen' lo' na' ben' besegue'ede' le'.

*Jesúsen' gwsele' bene' šižinw ca' jasedixjue'ede' xtiža' Diosen'*

(Mr. 6:7-13; Lc. 9:1-6)

<sup>5</sup> Na' Jesúsen' gwsele' bene' šižinw ca' jasedixjue'ede' xtiža' Diosen', gože' legaque':

—Bitw šejle laž bene' cbi zjanaque' bene' Israel, na' neca šejle yež ca' zjachi' distritw Samaria. <sup>6</sup> Le šja'ac gan' že' bene' Israel bene' ba zjambiyi' dan' bitw na' yesombi'e Diosen'. <sup>7</sup> Le šja'ac le šjatixjue'ede' ba bžin ža Diosen' ben' zoa yaban' nabi'e yichjlaždao' bene' yosozenag che'. <sup>8</sup> Le yeyon bene' chesacšene, le yeyon bene' ca' chese'e yižgüe' dan' nzi' lepra, le yosban no bene' ba gosat, na' le yebej da' xigüe' ca' zjajo'o zjanyaz lo' yichjlaždao' bene'. Diosen' bibi bchixjue' le'e da' ba bene' le'e

yela' guac chen' cont gonle da' quinga, da'nan' le gaclen bene' na' bibi gwchixjwlene'.

<sup>9</sup> Bitw gua'le mechw de oro, de plata o de cobre šlac co'ole nez. <sup>10</sup> Na' neca gua'le bzod, o yeto xcamisle, neca gua'le yel, na' neca goxe'le xis da' gwchiše'le. Ca nac le'e chonle xšinan' zaca'le par gon bene' da' ye'ej da' gagwle gan' sela' le'ena'.

<sup>11</sup> Na' gate'tez ciuda o yež ga žinle, le nab še zoa to bene' güen bene' yebede' gwlebe' le'e ližen'. Na' še gwlebe' le'e, na'teze soale. Cate'ch žin ža šejle ga yoble, cana'ch yeza'le. <sup>12</sup> Na' cate' žinle liže'na', le gwguape' tiox, na' le nabraže' soa cueze' binlo len yichjlažda'ogüe'. <sup>13</sup> Na' še nita' bene' chesaclaže' yesezoa yesebeze' binlo len yichjlažda'ogaquen', na' gac can' gwnabraže'le par yesezoa yesebeze' binlo. Perw še nono zoa bene' chesaclaže' yesezoa yesebeze' binlo len yichjlažda'ogaque', bi gac dan' ba gwnabraže'len'. <sup>14</sup> Na' še zoa ga bi yosolebe' le'e neca yosozenague' chele, cate' yeza'le na', le cuibe ni'alen' yo bište cont nachia' bi checa'ale chegaque'. <sup>15</sup> Da' mal xen goson bene' ciuda Sodoma na' bene' ciuda Gomorra cani', perw da' li žia' le'e, cate' žin ža gac juisyw bene' ca' bi bosolebe' le'e ližen' yesale'chde' clel ca bene' Sodomān' na' bene' Gomorran'.

*Gac da' saca'zi'cho*

<sup>16</sup> Neda' sela' le'e šjatixjue'ele xtižan' len bene' ca' chesegue'ede' le'e. Zaca'leble ca xila' dao' ben' chja'ac gan' že' beco'yo. Da'nan' cheyała' gacle bene' yo'ochgua xbab na' bene' xenlaže' len legaue'. <sup>17</sup> Le gwsaca' len bene' ca' chesegue'ede' le'e. Nita' bene' yesone' le'e lo na' bene' gwnabia' ca' cont yesot yeseyine' le'e lo' yodao' chegaquen'. <sup>18</sup> Nach lecze dan' chejnilaže'le neda' nita' bene' yeseche'əxoxje' le'e do lao rey, do lao nochle bene' gwnabia'. Na' can' güe'lenle legaue' xtižan', lecze can' güe'lenle xtižan' len bene' bi zjanaque' bene' Israel. <sup>19</sup> Perw cate' yesezene' le'e na' yeseche'e le'e lao bene' ca', bi cuec yichjle nac yoži'ile xtiža'gaquen' o nacle nale. Lo hor na'teze Diosen' gwzejni'ide' le'e bin' cheyała' nale. <sup>20</sup> Le gague le'eczen' nele, san Spiritw che Xacho Diosen' gonen ga nale bin' cheyała' nale.

<sup>21</sup> 'Cana' bal' beňach yeseche' yesone' bene' biše' golje' lo na' bene' yesote' legaue', na' nita' bene' yesone' xi'ingaque' lo na' bene' yesot legacbe', na' nita' bene' yesone' xaxne'e lo na' bene' yesote' legaue'. <sup>22</sup> Yogo'ze bene' yesegue'ede' le'e dan' chejnilaže'le neda', perw note'tez le'e gwyo gwchejlaže'le cont bi cuejyichjle dan' chejnilaže'le neda' žinten gatle, nach šjayzoale len Diosen'. <sup>23</sup> Še bene' že' to yež yosyolague' le'e, le yeza'teze na' yeyejle ga yoble. Biňa' yeyož šjatixjue'ele xtižan' yogo' yež gan' že' bene' Israel ca' cate' yida' da' yoble, neda' naca' ben' gwseła' Diosen' golja' beňach.

<sup>24</sup> Ca nac cate' to bene' chsede' len to maestrw, bitw nacho naque' bene' blaoch ca maestroa'. Na' to mos bitw naque' blaoch ca xanen'. <sup>25</sup> Con cheyała' chazlaže' ben' chseda' še yežinlaže' gaque' ca maestrw che' na' cheyała' chazlaže' mosen' še yežinlaže' gaque' ca xanen'. Neda' naca' Xanle, na' bene' chesegue'ede' neda' chesene' chona' txen len Beelzebú dan' nac xan yogo' da' xigüe', na' naquechxe yesene' che le'e nacle neda' txen.

*Cheyała' žebcho castigw dan' gon Diosen' che bene' güen da' xinj  
(Lc. 12:2-9)*

<sup>26</sup> 'Bitw žeble bene' bite'teze da' yesonde' le'e, le bitwbi de da' ngaše' da' nacho cbi gwlo'elaon, nēca de da' nono na' neze da' nacho cbi yese'nezen'. <sup>27</sup> Da' zan dan' can' chsed chlo'eda' le'e dan' bi chsed chlo'eda' yezica'chle bene'. Na' le'e le gwsed le gwlo'en yogo'lol bene', na' le gon cont bene' zan yesejni'iden'. <sup>28</sup> Bitw cheyala' žeble bene' ca' yesot le'e. Legaque' bitw gac bi yesonde' yichjlažda'olen'. Cheyala' žeble Diosen', le len' nape' yela' gwnabia' cont gwžiaye'e cuerp chelen' len yichjlažda'olen' lo yi' gabilen'. <sup>29</sup> 'Nezecho byine dao' ca' bitw bi zjazaca'tecba', perw bitw nacho toba' gat sin cbi güe' Xacho Diosen' latje. <sup>30</sup> Na' ca' nac chio', chaquechgüe Diosen' chio' na' neztede' bal' yiša' yichj to tocho žia. <sup>31</sup> Da'nan', bitw žeble, le zaca'chle clēl ca' zan byin' dao' ca'.

*Cheyala' güe'cho diža' len bene' ye'cho legaque' nombia'czcho Jesucriston' (Lc. 12:8-9)*

<sup>32</sup> 'Na' note'teze bene' še cho'e diža' len benachen' che'ene' chejle'e chia', lecze ca' neda' gua' diža' len Xa' ben' zoa yaban' yapa'ne' bena' naque' neda' txen. <sup>33</sup> Na' note'teze bene' še cho'e diža' len benachen' che'ene' bitw chejle'e chia', lecze ca' neda' gua' diža' len Xa' ben' zoa yaban' yapa'ne' bena' bi naque' neda' txen.

*Yesedile bene' neche dan' bid Jesúsēn' (Lc. 12:51-53; 14:26-27)*

<sup>34</sup> 'Bitw gonle xbab bene' že' yežlio nga yesezoa yesebeze' binlo len lježgaque' na'a ba bida'. Bitw yesezoa yesebeze' binlo san yesedile'. <sup>35</sup> Lagüe dan' ba bida' yesedil bene' byo len xe' na' no'olen' len xne'e, na' yesedil xo'oliž no'ole len le'. <sup>36</sup> Bene' lo' yo'oze yesegue'e lježe'. <sup>37</sup> 'Note'tez bene' še chaquechde' xe' o xne'e clēl ca' chacde' neda', bitw zaque' gone' txen len neda'. Lecze ca' še chaquechde' xi'ine' clēl ca' neda' bitw zaque' gone' txen len neda'. <sup>38</sup> Na' note'teze' še bi chzenague' chia' lagüe' dan' chacde' yosoči yososaca' bene' le', bitw zaque' cont gaque' neda' txen še ca'. <sup>39</sup> Note'teze bene' chacde' gone' cont bi či saque' o cont nono yesot le', benan' cuiayi'. Na' note'teze bene' chzanlaže' cuine' saca'zi'e o gate' ne chia' neda, ba de yela' mban che' toli tocane.

*Bene' ca' yesenita' mbalaz cate' yesyežine' yaba (Mr. 9:41)*

<sup>40</sup> 'Note'teze bene' chosolebe' le'e chosolebe' neda', lecze chosolebe' Dios ben' gwsele' neda'. <sup>41</sup> Na' note'teze bene' yebede' gwlebe' bene' cheso'e xtiža' Diosen', mbalaz soe' cate' yežine' yaban' lecze ca' mbalaz soa ben' cheso'e xtiža' Diosen'. Na' mbalaz gac che bene' ca' cheson can' chazlaže' Diosen' caten' yesyežine' yaban'. Na' note'teze bene' yebede' gwlebe' legaque' da' chesone' can' chazlaže' Diosen', lecze mbalaz soe' caten' yežine' yaban'. <sup>42</sup> Note'teze bene' gwnežjue' la' to xiga'ze nis ye'ej bene' chejnižaže' neda', la' gwnežjuen' bene' bi naque' bene' blao, da' licze gona' cont soe' mbalaz caten' yežine' yaban'.

## 11

*Juanna' gwsele' chope bene' zjanaque' txen len le' gan' zoa Jesúsēn' (Lc. 7:18-35)*

<sup>1</sup> Cate' beyož ben Jesúsēn' mandadw can' yeson bene' šižinw ca' gwleje' cont gosaque' le' txen, beze'e latjen'. Na' gwyeje' yež ca' zjachi' do na' jased jalo'ede' xtiža' Diosen' len bene' ca' že'na'.

<sup>2</sup> Juanna' ben' bzoe' bene' nis, cana' ba die' ližya. Na' bende' diža' che yogo' dan' chon Criston' ben' gwsela' Diosen' cont yedenabi'e. Nach Juanna' gwsele' chope bene' zjanaque' txen len le' gan' zoa Jesúsen', <sup>3</sup>jaseže'ne':

—¿Len' naco' ben' chbezto' sela' Diosen', še cheyala' cuezchto' yid bene' yoble?

<sup>4</sup>Nach Jesúsen' gože' legaque':

—Le šjaya'ac na' le šjajež Juanna' doxen da' ca' ba ble'ele na' da' ca' ba benele. <sup>5</sup>Ba ble'ele chona' cont chesyete'e no bene' lchol, na' chesyeda no bene' zjanxinj ni'e. Na' lecze bene' gose'e yižgüe' dan' nzi' lepra besyeyacde', na' chesyeyene no bene' cuež. Ba ble'ele bosbana' no bene' guat, na' ba benele choa' diža' güen chia' len bene' yaše' ca'. <sup>6</sup>Mbalaz zoa bene' chejle'e chia' na' bi chdebde'.

<sup>7</sup>Na' cate' besyeya'ac bene' ca' zjanaque' txen len Juanna', nach Jesúsen' be'lene' bene' ca' zjandoben' xtiža' Juanna', gože' legaque':

—¿Nacxe nac ben' jale'ele latje dašen'? ¿Chaque' quil ca'ale? Bi naque' ca'. <sup>8</sup>¿Nac naque' caten' jale'elne'? ¿Nyaze' lache' šagüe'? ¿še bitw? le bene' zjanyaz lache' šagüe' nite' yo'o güenchgua ca no liž bene' gwnabia'. <sup>9</sup>¿Noxen' jale'ele? ¿to ben' choe' xtiža' Diosen'? Da' li cho'e xtiža' Dios, perw žia' le'e, zaca'che' ca note'teze bene' choe' xtiža' Diosen'. <sup>10</sup>Čhe benga nyojen le'e Xtiža' Diosen', žan:

Neda' Dios sela' to bene' cuialagüe' laguo' güe'e xtižon' cont cate' šejo' ba zjanita' bene' yosozenague' čhio'.

<sup>11</sup>Da' li žia' le'e notoch no benach na' soa bene' naquech bene' blao ca Juanna' ben' bzoe' bene' nis. Perw na' note'tez bene' chzenague' che Diosen' cont nabia' Diosen' yichjlažda'ogüen', la'czla' naque' bene' la'zelagüe' bene' bibi zaca', ba chejni'ichde' chia' clal ca Juanna'.

<sup>12</sup>'Gwzolaon caten' Juanna' gwduxjue'ede' xtiža' Diosen' na' bzoe' bene' nis na' chžinten na'a, bene' zan chesone' ga zelao chesezaquede' cont nabia' Diosen' yichjlažda'ogaque'. <sup>13</sup>Na' lecze gwzolaon cani'te bžinten cate' bla' Juanna' gwduxjue'ede' xtiža' Diosen', ley dan' bzoj da' Moisés na' dan' bosozoj yezica'chle bene' goso'e xtiža' Diosen' bzejni'in chio' che yela' gwnabia' che Diosen'. <sup>14</sup>Na' Xtiža' Diosen' dan' nyojen žan yid yeto bene' yedeyene' can' ben Elías ben' be' xtiža' Diosen' cani'. Čhe Juanna' žan ca', con še šejle'le. <sup>15</sup>Le'e žia nagle da' chene, le gwzenag xtiža'na'.

<sup>16</sup>¿No gwsaca'lebda' le'e zoale na'a? Gwsaca'lebda' le'e ca bidao' dan' bicze bi chlebele. Nacle ca bidaon' nita' gan' chac ya'a chese' lježbe':

<sup>17</sup>“Ba bcuežto' bžejo, neca bya'ale, na' ba bilyaše'to', neca gwchežle.”

<sup>18</sup>Juan ben' bzoe' bene' nis bide' laole nga, bitw güe'ej gwdagwšagüe' can' chese'ej chesagw bene' yoble, nach gwnale che': “Yo'o yaz da' xigüen' yichjlažda'ogüe'.” <sup>19</sup>Na' neda', Diosen' gwsele' neda' golja benach, na' chle'ele che'ej chagua' can' chese'ej chesagw bene' yoble, na' žale chia' naca' bene' lia na' bene' borrašw. Na' lecze žale chia' naca' xmigw bene' güechixjw ca' na' xmigw yezica'chle bene' güen da' xinj. Perw nachbia' yela' sina' che Diosen' dan' napto' naquen da' güen, le ba ble'eczele can' chon neto' napton'.

*Yež ca' gan' bitw bosozenague' che Jesúsen'  
(Lc. 10:13-15)*

20 Nach Jesúsen' be'e xtiža' beñe' ca' že' yež ca' gan' bene' da' zan da' zaca' yesyebande', na' gwdiłe' legaque' dan' bitw besyetiñjde' xtoła'gaquen'. Nach gwne':

21 —¡Nyaše' chguaze gac che le'e beñe' Corazín! ¡Nyaše' chguaze gac che le'e beñe' Betsaida! Beñe' ca' nita' Tiro na' Sidón ba besyetiñjde' xtoła'gaque' šaca' blo'egacda'ne' yela' guac chia' ca dan' ba blo'eda' le'e. Na' bosoše'e ca gosone' šaca' bena' ca', chesazlje' to lache' gasj da' naquen zeše' na' chosože'elja cuine' no de cont yesacbe'e beñe' ba boša' yichjlažda'ogaquen'.

22 Žia' le'e, saca'zi'chle clel ca beñe' že' Tiro na' Sidón cate' žin ža gac juisyw. 23 Na' le'e nita'le Capernaum chonle xbab šeca Diosen' gone' gacxenchgualle cate' yežinle yaba gan' zoe'na'. Bi gone' ca', san sele' le'e lo yi' gabił. Šeca' bena' da' zaca' yesyebane beñe' ca' gwnita' Sodomán' can' ba bena' laole nga, zesyetiñjde' xtoła'gaquen', na' ñe' chi' ciudan' šeca'. 24 Žia' le'e, gałe'chle clel ca beñe' Sodomán' cate' žin ža gac juisyw.

*Beñe' ca' yesejnilaže' Jesúsen' nite' mbalaz*

*(Lc. 10:21-22)*

25 Nach Jesúsen' bol güiže' Diosen', gwne':

—Xa', le' naco' Xan yežlio nga na' Xan yaba, chnabi'o doxen. Na' chona' yela' choxclen chio' ba bzejni'ido' bał beñe' diža' güen chio' quinga. Bzejni'ido' beñe' ca' gosacbe'e cheseyažjde' no gwsed gwlo'e legaque'. Na' bitw bzejni'ido' beñe' ca' cheson xbab zjanaque' beñe' sina' na' beñe' zjanejni'i. 26 Beno' ca' Xa', le can' gwnalažo'.

27 Na' gože' beñe' ca' že'na':

—Xan' ba bene' lo na' gona' cont chombia' beñe' le'. Le' nombia'yane' neda', na' neda' nombia'yana' le'. Na' beñe' ca' ba gwleja' ba zjanombi'e Xan'. Na' noch no zjanita' beñe' zjanombi'e Xan', ñe neda' ca' zjanombi'e. 28 Le'e chjaxaque'laže'le na' chacyaše'laže'le da' chaquele nac gonle cont soale binlo len Diosen', chata'yoeda' le'e, le šejnilaže' neda'. Neda' gona' ga soale mbalaz. 29 Le gwzenag chia' na' gwzejni'ichda' le'e. Neda' naca' beñe' xenlaže' na' bene' šagüe' na' gona' ca soale mbalaz lo' yichjlažda'olen'. 30 Dan' žia' cheyala' gonle bitw naquen zed, na' can' chsed chlo'eda' bitw naquen zdebe.

## 12

*Ža che Dios beñe' ca' zjanaque' Jesúsen' txen goselechje' trigon' da' gosagüe'*

*(Mr. 2:23-28; Lc. 6:1-5)*

1 Ca tiempen' gozac to ža che Diosa' cate' Jesúsen' gwdie' len beñe' ca' zjanaque' le' txen gan' nyaž trigw. Nach beñe' ca' gosedone', na' goselechje' dao che trigon' cont gosagüe' xsenna'. 2 Na' besele'e beñe' fariseon' can' gosone', na' gosi'e Jesúsen':

—Gwnašc žbixchen' beñe' ca' zjanaque' le' txen chesone' žin da' bi de lsens goncho ža che Dios?

3 Na' Jesúsen' gože' legaque':

—žBiña' gwlable can' ben da' rey Davin' to ža cate' le' na' beñe' lježe' ca' gosedone'? 4 Gwoyo'o Davin' ga nac liž Dios na' gwdagüe' yetextil da' nac che Dios da' bi chac gagw beñe' bi nac bxož, na' lecze bnežjue' che beñe' ža'ac len le'. 5 Na' žbiña' gwlable le'e ley dan' bzoj da' Moisés gan' žan bxož ca' chesoncze' mandadw che yodao' blaon' yogo' ža che Diosen'? Na'



bitw nacho zjanape' doła' dan' chesone' žin ža che Diosen'. <sup>6</sup> Žia' le'e, neda' zoa' nga zaca'cha' clél ca yodao' blaon'. <sup>7</sup> Xtiža' Diosen' dan' nyojen žan: "Čaclaža' yeyaše' yeži'ilaže' le bene', gague con gotle beyixe' par gonxenle neda'." Šaca' chejni'ile bi zejenna' žan ca', bilja nale bene' quinga zjanape' doła', le bibi da' mal chesone'. <sup>8</sup> Žia' le'e, naquen' lo na' nia' bi da' nac güen goncho cate' nac ža che Diosen', neda' naca' ben' gwseła' Diosen' golja' beňach.

*Beyac to bene' nxo'on šla'a taque'*

(Mr. 3:1-6; Lc. 6:6-11)

<sup>9</sup> Na' cate' Jesúsen' beze'e latjen', na' gwyo'e to lo' yodao' che chio' bene' Israel. <sup>10</sup> Na' lo' yodaon' zoa to bene' nxo'on šla'a taque', nach bene' fariseo ca' gose'e Jesúsen':

—¿De lsens yeyoncho bene' xinj ža che Diosen'?

Gose'ene' ca' cont de da' yosode'ede' yesagüe' xya.

<sup>11</sup> Nach Jesúsen' gože' legaque':

—Še nita' xila' dao' chele na' lažo' toba' to lo' yechw zitjw ža che Diosen' cate' bi de lsens goncho žin, ¿cbi la' yebejteleba' lo' yechon' lo žana'? <sup>12</sup> Da'na'na' žia' le'e de lsens gaclencho bene' ža che Diosen'. Le zaca'ch to bene' clél ca to xila' dao'.

<sup>13</sup> Nach Jesúsen' gože' ben' nxo'on taque'na':

—Bli naon'.

Na' blien' na' taquen' beyaquen binlo can' nac dan' yešla'a. <sup>14</sup> Nach bene' fariseo ca' besyežaše' yodaon' na' bosoxi'e nacle yesone' yesote' Jesúsen'.

*To dan' bzoj da' Isaías che Jesúsen'*

<sup>15</sup> Gocbe'e Jesúsen' can' bosoxi'a bene' fariseo ca' na' gwze'e gwyeje' ga yoble. Bene' zan ja'aclene' le', nach beyone' yogo' bene' ca' chesacšene. <sup>16</sup> Na' bene' mandadw nono yesoe'lene' diža' non' beyon legaque'. <sup>17</sup> Bene' ca' cont goc can' ža Xtiža' Diosen' dan' bzoj da' Isaíasen', žan:

<sup>18</sup> Bengan' naque' xmosa', ben' gwleja' cont gone' can' chazlaža'. Čacchgüeda' le', na' chbeda' che'.

Na' neda' seła' Spiritw čhian' soateze soan len le'.

Na' čixjue'ede' yogo'lol bene' can' chazlaža' yesone'.

<sup>19</sup> Bitw gacyože' len bene', neca yosye'e,

na' neca nie' zižjo lo nez cont yesene bene' bin' že'.

<sup>20</sup> Bi gwzoe' ca'ale bene' chesejnilaže' le' late' lasze.

Soe' gaclene' legaque'.

Nach žin ža gone' cont gac con da' zej to liča lo yežlion'.

<sup>21</sup> Na' bene' že' yogo' naciónna' yesebeze' gaclene' legaque'.

*Gosene' Jesúsen' bebeje' da' xigüe' len yela' guac che Beelzebú*

(Mr. 3:19-30; Lc. 11:14-23; 12:10)

<sup>22</sup> Na' zoa to bene' lchol' na' neca goc nie', na' yo'o nyaz da' xigüe' yichjlažda'ogüe' na' jasesane'ne' lao Jesúsen'. Na' Jesúsen' bebeje' da' xigüen' yo'o nyaz yichjlaždao' ben' na' la' bele'etede' na' gocte benie'.

<sup>23</sup> Na' yogo' bene' ca' besele'ede' can' goca' besyebanchgüede'. Nach gose'e lježe':

—¿Nac benga ben' chbezcho yide' lao diaža che da' rey David?

<sup>24</sup> Perw cate' bene' fariseo ca' gosende' diža' quinga gosene':

—Bitwbí yela' guac nap benga. Le Beelzebú dan' nac xan da' xigüe' ca' chaclenen le' cont chebeje' da' xigüe' zjajo'o zjanyaz yichjlaždao' bene'.

25 Gocbe'e Jesúsen' can' goson beṇe' fariseo ca' xbaben', nach gože' legaque':

—Note'teze gobiern še choje' chop šon cuen na' yeyoža' yesedile' legacze', cuiayi' gobierna'. Na' lecze še beṇe' že' bite'teze yež yesaque' chople na' yesedile' legacze', lecze bi sibia' yež chegaquen' še ca'. Na' še beṇe' lo' bite'teze yo'o yesechoje' chople na' yesedile' legacze', gague sša yesenite' txen. 26 Lecze ca' še Satanásen' yebejen yeto da' xigüe' yo'o nyaz yichjlaždao' beṇe', cuiayi' yela' chnabia' chen, le chdillen cuinen še ca'. 27 Le'e žale Beelzebún' chaclenen neda' cont chebeja' da' xigüe' ca'. Šaca' naquen can' žalen', lecze zejen Beelzebú dan' chnabia' da' xigüen' chaclenen beṇe' lježle chesyebeje' da' xigüe' zjajo'o zjanyaz yichjlaždao' beṇe'. Na' beṇe' lježle ca'ze chosolo'e cleden' chṇe. 28 Spiritw che Diosen' chonen neda' yela' guac cont chebeja' da' xigüe' ca', na' da' chona' ca' chlo'en ba bžin ža ṇabia' Diosen' yichjlaždao' beṇe' yosozenag che'.

29 '¿Nac gac šo' beṇe' gwban liž to beṇe' gual na' que'e bi da' de che' še bi zgua'tec gwcheje' beṇe' guala'? Lete gone' ca' nach gac que'e bi da' de che'.

30 Beṇe' bi chone' neda' txen, chone' contr neda'. Na' beṇe' bi chaclene' cont yosozenag beṇe' yoble chia', zeje diža' chone' par bi yosozenague' chia'.

31 'Da'nan' žia' le'e, yogo' da' xinj da' chon beṇač, na' yogo' diža' bya' dan' cheseṇe' che Diosen', Diosen' yezi'xene' chen, perw note'teze beṇe' chṇe' yela' ya' che Spiritw che Diosen', gwbat yezi'xen Diosen' che'. 32 Na' note'teze beṇe' še ne' yela' ya' chia' neda' naca' ben' gwsela' Diosen' golja' beṇač, Diosen' yezi'xene' che', perw note'teze beṇe' še ne' yela' ya' che Spiritw che Diosen', gwbat yezi'xen Diosen' che' ṇa'a na' bate'teze.

*Diža' da' güe'cho chlo'en bin' yo'o lo' yichjlažda'ochon'*  
(Lc. 6:43-45)

33 'Ca' nac yag frut ca', yag dan' nac yag güen, frut güencze chbian, na' yag da' bi nac yag güen, lecze frut da' bi nac güen chbian. Con can' nac da' chbia to to yaguen' nezecho bi yaga'. 34 Na' ca'czen' nac len le'e nacchgual beṇe' zgot na' beṇe' gwxiye'. Bitw gac güe'le diža' šagüe' dan' nacle beṇe' laždao' xi'a. Le yogo'te diža' da' chchoj cho'achon', lo' yichjlažda'ochon' nan' za'aquen. 35 To beṇe' laždao' xilaže' cho'e diža' šagüe', le can' nac lo' yichjlažda'ogüe' nan' cho'e dižan'. Na' to beṇe' laždao' xi'a cho'e diža' xi'a, le can' ža lo' yichjlažda'ogüen'. 36 Na' žia' le'e, cate' žin ža gon Diosen' yesežaglaog yogo' beṇe' cheson da' xinj toli tocaṇe, cana' yogo'lol beṇe' yosodie' cuent che yogo' diža' dan' ba goso'e da' bitwbi zjazacan'. 37 Na' con ca' diža' dan' choe'le, Diosen' choglagüen' chele še naple doła' o še bi naple doła'.

*Beṇe' bi bosozenag che Diosen' gosenaḇe' gon Jesúsen' to yela' guac*  
(Mr. 8:12; Lc. 11:29-32)

38 Nach baḷ beṇe' ca' chososed chosolo'e dan' bzoj da' Moisés, na' beṇe' fariseo ca' gose'e Jesúsen':

—Maestrw, chaclaže'to' gono' to yela' guac da' le'eto' cont nezeto' še da' licze Diosa' gwsele' le'.

39 Nach Jesúsen' gože' legaque':

—Le'e zoale ṇa'a nacchgual beṇe' laždao' xi'a na' ba gwlejyichjle Diosen'. Na' chṇable gona' yeto yela' guac da' le'ele cont nezele še Diosa'

gwsele' neda', perw bi gona' can' chnablana', le ba ble'ele da' ca' chona'. Dan' gon Diosen' len neda' cont nezele le'na' gwsele' neda' naquen ca da' bene' len da' Jonás ben' be' xtižen' cani'. <sup>40</sup> Cate' za' šej Jonásen' Nínive, Diosen' bene' cont to beł xen be yo'o lo' nisdaon' gwdebb'a' le' na' šone ža šone yel gwyo'e lo' le'eban'. Na' ca nac neda', gata' na' gaša', na' yeyoža' šo'a lo' ba šone ža šone yel. <sup>41</sup> Na' cate' žin ža gon Diosen' cont yogo' bene' cheson da' mal yesežaglagüe' toli tocañe, žana' bene' Nínive bene' ba gosat yedesećuiše' le'e mbanle na'a lao Diosen', le legaque' besyetiñjde' xtołen' cate' da' Jonásen' gwdixjue'ede' xtiža' Diosen' len legaque'. Na' neda' zoa' nga naccha' bene' blao clal ca da' Jonásen', na' bitw chzenagle chia'. <sup>42</sup> Na' lecze žana' cate' gon Diosen' cont yogo' bene' cheson da' mal yesežaglaogüe' toli tocañe, da' no'olen' gwnabia' bene' Seba ca' yedecuiše' le'e mbanle na'a. Le le'na' gwze'e Seba gan' nac zito'chgua na' bide' nga cont bzenague' diža' sina' dan' be' da' rey Salomón. Na' neda' zoa' nga naccha' bene' blao clal ca da' rey Solomónna', na' bitw chzenagle chia'.

*Da' xigüen' cheyo'on da' yoble lo' yichjlaždao' bene'*

*(Lc. 11:24-26)*

<sup>43</sup> Na' še to da' xigüe' da' yo'o nyaz lo' yichjlaždao' bene' yechojen, nach lažen nile nale yeyiljon ga soan mbalaz. Na' še bibi latje želen, nach nan: <sup>44</sup> "Da' yoble šjajo'a lo' yichjlaždao' ben' gan' ba gwyo'a." Nach yeyejen da' yoble gan' zoa ben'. Cate' le'en bačh beyacde', na' ba zoache' binlo, na' gague no yo'o nyazech yichjlažda'ogüe' da' gwžon yeyo'on da' yoble, <sup>45</sup> nach šjajytoben yegaže da' xigüe' da' zjanaquech mal ca len, na' txen yeso'on lo' yichjlažda'ogüen'. Na' še ba gosonen ca', na' gaquech mal che bena' clal ca goc che' cana'. Can' goc che bena', lecze ca' gac che le'e mbanle na'a dan' nactecle bene' laždao' mal.

*Xna' Jesúsen' len bene' biše' ca' besežine' ga zoe'*

*(Mr. 3:31-35; Lc. 8:19-21)*

<sup>46</sup> Ne' choe'te Jesúsen' diža' len bene' quinga, cate' bžin xne'e len biše' ca'. Gosaclaže' yeso'e yesoelene' le' diža' na' bene' zan nita' lagüe' na'ate. <sup>47</sup> Bene' ca' že' na', toe' gože' Jesúsen':  
—Xna'o len bene' bišo' ca' zjanite' chy'o'o na' chesaclaže' yesoelene' le' diža'.

<sup>48</sup> Nach Jesúsen' gože' le':

—¿Nezele no nac xna'a na' no zjanac biše' lježa'?

<sup>49</sup> Nach bli ne'e blo'e bene' ca' zjanaque' le' txen na' gože' bena':

—Bene' quinga zjanaque' xna'a na' zjanaque' biše' lježa'. <sup>50</sup> Le note'teze bene' chone' da' chnalaže' Xa' Diosen' ben' zoa yaban', bena' nac bene' biša', bene' zana', lecze naque' xna'a.

## 13

*Jempl che bene' goz trigon'*

*(Mr. 4:1-9; Lc. 8:4-8)*

<sup>1</sup> Na' lo žana' gwza' Jesúsen' yo'o gan' zoen' jači'e cho'a nisdaon'. <sup>2</sup> Nach catec bene' zan juisyw besedobe' gan' či'en' na' benten byen gwyo'e gwchi'e to lo' barcw. Na' yogo' bene' ca' besedoben' gosenite' cho'a nisdaon' ga nac yo biž. <sup>3</sup> Nach da' zan da' bsd blo'e Jesúsen' legaque' len jempl da' bi'e. Na' be'e to jempl, gwne':

—To bene' güen žin jeze' trigw, <sup>4</sup> na' šlac zej chose' trigon' late' biñ che trigw dan' chazen' jasechazen chanez, nach be ca' žia xil be chaš le'e yaba

gosagwban'. <sup>5</sup> Yelaten' jasechazen ga nac lo yej ga bibi yotec zoa, na' da' nga byob blan' le bi jasechazen ga nac sitjw. <sup>6</sup> Perw na' cate' bla' gwbiža' na' bzeyen len na' gosebizen, le gague zjayo'otec loenna' sitjw. <sup>7</sup> Yelaten' jasechazen ga nac lo yag yeše', na' yag yešen' gosecha'on na' bosololen len. <sup>8</sup> Perw na' yelaten' jasechazen ga nac yo šagüe' na' beselan'. Na' balen' gosebian to gayoa güeje to ton, na' yebalen gosebian gayon güeje, na' yebalen šichoa güeje. <sup>9</sup> Le'e žia nagle da' chene, le gwzenag xtižan'.

*Jesúsen' be'e diža' bixchen' bzejni'ide' bene' jempl*

(Mr. 4:10-12; Lc. 8:9-10)

<sup>10</sup> Nach bene' ca' zjanaque' Jesúsen' txen gosebigue' lagüen', na' gose'ene':

—¿Bixchen' chsed chlo'edo' bene' quinga len jempl?

<sup>11</sup> Na' gož Jesúsen' legaque':

—Nono na' neze can' nac yela' gwnabia' che Diosen', na' ba chone' cont le'e chejnilaže'lene' nezelen. Perw bi chon Diosen' ca' len bene' bi chesaclaže' yesejnilaže'ne'. <sup>12</sup> Note'teze bene' chosozenague' xtiža' Diosen', gwzejni'ich Diosen' legaque' cont šanch dan' yesejni'ide'. Perw na' note'teze bene' bi chosozenague', da' daon' ba zjanезде', yeca'a Diosen' len. <sup>13</sup> Da'n'an' chsed chlo'eda' bene' quinga len jemplen', le chesele'ede' dan' chona' perw bitw chesacbe'ede' bi zejen, na' chesende' xtižan' perw bitw chesejni'iden'. <sup>14</sup> Len bene' quinga ba chac can' bzoj da' Isaías, žan: Da' li yenele, perw bitw šejni'ile bi zeje dan' yenelen'.

Na' da' li le'ele, perw bi gacbe'ele bi zejen dan' le'elen'.

<sup>15</sup> Nacle bene' güedenag na' bačh natcze yichjlažda'olen'.

Bi chazlaže'le gwzenagle dan' chenele na' dan' chle'ele;

con nacle bene' güedenag.

Šaca' bi nacle bene' güedenag, šejni'ile bi zejen dan' chenele na' dan' chle'ele.

Nach yetinjele xtola'le cont yeca'an na' yocoba' yichjlažda'olen'.

<sup>16</sup> 'Perw le'e nacle neda' txen, leca mbalaz zoale dan' chle'ele da' ca' chona' na' chacbe'ele bi zejen, na' chzenagle xtižan' na' chejni'ilen.

<sup>17</sup> Da' li žia' le'e, zan da' bene' ca' gosoe' xtiža' Diosen' cani' na' zan da' bene' ca' yezica'chle bene' bosozenag che Diosen' cani', gosaclaže'chgüe' yesele'ede' dan' chle'ele na'a, perw bitw goła' yesele'eden'. Na' gosaclaže'chgüe' yesende' dan' chenele na'a, perw bitw goła' yesenden'.

*Jesúsen' bzejni'ide' bi zejen jempl che ben' goz trigon'*

(Mr. 4:13-20; Lc. 8:11-15)

<sup>18</sup> 'Na' le gwzenag, quinga zejen jempl che ben' goz trigon'. <sup>19</sup> Ca dan' byažen zejen xtiža' Dios da' chzejni'i che yela' gwnabia' che'. Na' biñ dan' beselažo' chanezen', zejen bene' ca' chesende' xtiža' Diosen' perw bi chesejni'iden'. Na' ca cheyoža' chžin gwxiyen' chebejen xtiža' Diosen' lo' yichjlažda'ogaquen'. <sup>20</sup> Na' biñ dan' beselažo' ga nac lo yej na' bi ben loen, zjanaquen ca bene' la' chesyebetede' xtiža' Diosen' cate' chesenden', <sup>21</sup> perw zjanaque' ca da' bibi loe chontec, šložga chesejle'e che xtiža' Diosen', na' cate' chac bi da' mal chegaquen' o cate' chesegue'e bene' legaque' dan' chosozenague' xtiža' Diosen', la' chesebejyichjte' xtižen'. <sup>22</sup> Na' biñ dan' beselažon' ga nac lo yag yeše', zejen ca bene' ca' na' zjanende' xtiža' Diosen', perw šlac zjambane' chesyelal chesyžejde' na' da' chesaclaže' yeseni'e chziye'en legaque'. Yogo' da' qui bi choen' latje

yega'an xtiža' Diosen' lo' yichjlažda'ogüen', na' da'nan' bi chesejnilaže' le' ca cheyała'. <sup>23</sup> Na' biñ dan' beselažo' lo' yo šagüe' zejen ca bene' chesende' xtiža' Diosen' na' chesejni'iden' na' chosozenaguen'. Balen gosebjan to gayoa güeje, na' yebałen gosebjan gayon güeje, na' yebałen šichoa güeje.

*Jempl che trigon' na' yixe'*

<sup>24</sup> Na' gozoe'len Jesúsen' bene' ca' yeto jempl, goze'e legaque':

—Yela' gwnabia' che Diosen' ben' zoa yaban' zaca'leben ca dan' goquen' cate' to bene' jeze' trigw lo' yežlio che'na'. <sup>25</sup> Na' do šeže'le gwyej to bene' chgue'e le' šlac chesetas bene' ca' yezica'chle na' jeze' xsa yixe' gan' ba naz xan yežlion' trigon', nach beze'e. <sup>26</sup> Na' to ši'ize trigon' len yixe' ca' beselan', na' trigon' gwzolao chbian. <sup>27</sup> Na' bene' güen žin che xan yežlion', cate' gosacbe'ede' nach jaya'aque' gan' zoa xangaque' jasyeyeže'ne': "Bene', žgague biñ trigon' goz yežlio chion? žBixchen' nchixen len yixe'?" <sup>28</sup> Nach xangaquen' gože' legaque': "To bene' chgue'e neda' jen ca'." Nach xmosen' gose'ene': "žChe'ndo' lažo'to' yixen'?" <sup>29</sup> Na' gože' legaque': "Bitw lažo'len. Le xož lažo'le lente trigon'. <sup>30</sup> Jaseyenna'. Guac yesecha'on txen. Na' cate' ba gole' yotoble cosešen', cana' gona' mandadw zgua'tec lažo'le yixen' na' gonlen manoj cont yeseyen. Nach šjajyotoble trigon' co'ošagüe'len."

*Yela' gwnabia' che Diosen' naquen ca biñ che xomdas*

(Mr. 4:30-32; Lc. 13:18-19)

<sup>31</sup> Nach gozo'e yeto jempl, gozne':

—Šanch bene' yosozenag che Diosen' cont nabi'e yichjlažda'ogaque'. Da'nan' yela' gwnabia' che Diosen' ben' zoa yaban' zaca'leben ca to biñ che xomdas dan' goz to bene' yežlio chen'. <sup>32</sup> Biñ che xomdasen' chnabia' nac da' dao' len biñ ca' chazcho. Perw na' cate' chlan' chcha'ochen ca bichle yixe' cuan na' chaquen ca to yag cha'o, nach byin dao' ca' chjasen ližda'ogacba' lo' xozenna'.

*Yela' gwnabia' che Diosen' naquen ca levadura*

(Lc. 13:20-21)

<sup>33</sup> Nach gozoe' Jesúsen' yeto jempl, gozne':

—Yela' gwnabia' che Diosen' ben' zoa yaban' zaca'leben ca levadura dan' gwlec no'olen' len to rob yezj cont gwcha'o doxenen.

*Jesúsen' bzejni'ide' bene' len jempl*

(Mr. 4:33-34)

<sup>34</sup> Yogo' da' quinga bsd blo'e Jesúsen' bene' ca' besežag gan' zoe'na'. Bsd blo'ede' legaque' be'e jempl, bitwbi bzejni'ide' legaque' sin ca be'e jempl. <sup>35</sup> Bene' ca' cont goc can' bzoj da' bene' be' xtiža' Diosen' cani', žan: Gwsed gwlo'egacda'ne' len jempl, na' yapegaca'ne' dan' nono na' neze da' ba ngaše' cate' gwxete yežlion'.

*Jesúsen' bzejni'ide' bi zeje jempl che trigon' na' yixe'*

<sup>36</sup> Nach beyož bsd blo'e Jesúsen' bene' ca' zjaže' na', beze'e txen len bene' ca' zjanaque' le' txen jaya'aque' yo'o gan' nite'na'. Na' cate' ba besyeyo'e lo' yo'on' bene' ca' zjanaque' le' txen gosebigue' cuite'na' gose'ene':

—Bzejni'išque neto' bi zejen jempl che trigon' na' yixen'.

<sup>37</sup> Nach Jesúsen' gože' legaque':

—Quinga zejen: Diosen' gwsele' neda' golja' beṇaḥ na' zaca'lebda' ca ben' goze' biṇ che trigon'. <sup>38</sup> Na' doxen yežlio nga zaca'leben ca pedas yežlio gan' goze' trigon'. Na' beṇe' ca' chosozenague' che Diosen' cont nabi'e yichjlažda'ogaque' zaca'lebde' ca biṇ che trigon'. Na' beṇe' ca' chosozenague' che Satanás dan' chnabia' da' xigüe' ca' zjazaca'lebde' ca xsa yixen'. <sup>39</sup> Satanásen' zaca'leben ca beṇe' chxi'a ben' goze' xsa yixen'. Na' žan' gac juisyw zaca'leben ca žan' yosyotobe' trigon'. Na' angl ca' zaca'lebegaque' ca beṇe' ca' yosyotobe' cosešen'. <sup>40</sup> Na' can' šey yixen' yosyotoben', can' gac che beṇe' ca' chosozenag che Satanásen' cate' žin ža gac juisyon'. <sup>41</sup> Diosen' gwsele' neda' golja' beṇaḥ na' cate' žin ža, neda' sela' angl chia' ca' cont yosyotobe' yogo' beṇe' ca' chesego'oyele' bene' yoble yesone' da' mal na' lecze yosyotobe' yezica'chle beṇe' cheson da' mal. Na' angl ca' yesyebeje' legaque' cont bich yesenite' txen len bene' ca' chosozenague' che Diosen' cont nabi'e yichjlažda'ogaquen'. <sup>42</sup> Nach yesesele' legaque' lo yi' gabil gan' yeseye' toli' tocane. Na' yesebežyaše' yesagwxetje laye' tantw yesežaglaochgüe'. <sup>43</sup> Cana'ch Xacho Diosen' gone' cont bene' ca' cheson da' güen nite' len le', le zjanaque' xi'ine' na' yesaque' ca be'ni' che gwbižen' cate' yesežine' yaban' gan' zoa Diosen' chnabi'e. Le'e žia nagle da' chene, le gwzenag xtiža'na'.

*Jempl che mechw xen dan' ngaše' lo' yo*

<sup>44</sup> 'Yela' gwnabia' che Diosen' ben' zoa yaban' naquen ca to mechw xen dan' ngaše' lo' yo. To beṇe' bželde' mechw xen da' ngaše' to lo' yežlio. Nach bocuašen' da' yoble lecze na'ze na' chebechgüede' beze'e jayete' yogo'lol bi da' de che' cont gwxi'e yežlion' gan' ngaše' mechua'.

*Jempl che to perla da' zaca'chgua*

<sup>45</sup> 'Na' yela' gwnabia' che Diosen' ben' zoa yaban', lecze zaca'leben ca da' nga goc. Zoa to comerciant beṇe' cha'o perla dan' zjanacchgua xdan. <sup>46</sup> Na' bželde' to perla da' leca zacan'. Na' beyote' yogo'lol bi da' de che' na' gwxi'e perlan'. Ca'czen' zaca'lebe beṇe' ca' chesacbe'e zaca'chguan yosozenague' che Diosen'.

*Jempl che yixjw bel*

<sup>47</sup> 'Na' yela' gwnabia' che Diosen' ben' zoa yaban' zaca'leben ca da' nga goc. Gwnita' bał beṇe' gwxcen bel na' bosozale' yixjw bel chegaquen' lo' nesdaon' na' gwxcenen zan cuen bel. <sup>48</sup> Nach cate' ba gwža' lo' yixjon', besyebegen' yo biž, na' gosebie' be ca' zjanac güen par yesagüe' na' gosegüe'eba' lo' žome. Na' be ca' bi zjanac güen, gosecho'one'ba'. <sup>49</sup> Ca'czen gac che yogo' beṇe' cate' žin ža te che yežlion'. Angl ca' yesebeje' beṇe' mal ca' ladjo beṇe' ca' zjanaque' beṇe' güen lao Diosen' <sup>50</sup> na' yosozale' legaque' lo yi' gabil gan' yesebežyaše' na' yesagwxetje laye' dan' leca yesežaglagüe'.

*Xtiža' Diosen' dan' byoj cani' len da' chsed chlo'e Jesúsen'*

<sup>51</sup> Nach Jesúsen' gože' beṇe' ca' zjanaque' le' txen:

—¿Zyejni'ile yogo' da' ca' ba blo'eda' le'e?

Nach gose'ene':

—Zyejni'iton'.

<sup>52</sup> Nach gož Jesúsen' legaque':

—Note'tezle še chac chsed chlo'ele Xtiža' Diosen' dan' byoj cani', še lecze chzenagle can' chsed chlo'eda' che yela' gwnabia' che Diosen',

nachen' zaca'leble ca to xan yo'o bene' nape' yogo'loł da' zaca' dan' chyažj chčhinde', balen zjanaquen da' cobe na' balen zjanquen da' gole.

*Bene' yež Narzaret bi gosejle'e che Jesúsen'*

(Mr. 6:1-6; Lc. 4:16-30)

<sup>53</sup> Nach cate' beyož be' Jesúsen' jempl ca', beze'e latjen' len bene' ca' zjanaque' le' txen <sup>54</sup> jaya'aque' laže'. Na' jaysed jaylo'ede' bene' gualaž che' ca' lo' yodao' čhegaquen'. Na' leca besyebande' len xtižen' na' gose' lježe':

—¿Ga jasede' yela' sina'? na' čnacxečen' chac chone' yela' guac ca'? <sup>55</sup> Nombia'chone', le naque' xi'in ben' chonšagüe' yag. Na' xne'ena' lie' María, na' Jacobo, José, Simón na' Judas zjanaque' bene' biše'. <sup>56</sup> Na' lecze bene' zane' ca' nite' lažcho nga. ¿Nacxe chaquen' cho'e diža' ca' na' chacte' chone' yela' guac?

<sup>57</sup> Na' dan' gosone' xbab nac Jesúsen' con to bene' gualaž čhegaque', bi gosaclaže' yesejle'e che'. Na' gož Jesúsen' legaque':

—Yogo'ze bene' chonla'ane' bene' choe' xtiža' Diosen', perw bene' gualaž che' na' bene' lo' yo'o che' bi chesonla'ane' le'.

<sup>58</sup> Na' to čhopze yela' guac ben Jesúsen' Nazareten' dan' bitw gosejle'e che'.

## 14

*Quingan' goc gosote' Juan ben' bzoa bene' nis*

(Mr. 6:14-29; Lc. 9:7-9)

<sup>1</sup> Na' ca tiempen' Herodes ben' naque' gobernador che distritw Galilean', bende' diža' ca nac yogo'loł dan' chon Jesúsen'. <sup>2</sup> Nach gože' xmose' ca':

—Bengan' da' Juanna', ben' bzoa bene' nis. Ba bebane' ladjo bene' guat ca', da'nan' chaque' chone' yela' guac.

<sup>3-4</sup> Herodesen' gwne' ca' dan' bene' mandadw gosote' da' Juanna'. Quingan' goc: Herodesen' beque'e Herodías ca xo'ole' la'czla' Herodías naque' xo'ole' bene' biše' Felipe. Na' Juanna' gože' Herodesen':

—Bi cheyala' soalen no'ol che bene' bišon'.

Na' dan' gož Juanna' Herodesen' ca', da'nan' Herodesen' bene' mandadw gosezne' Juanna' na' bosočheje' ni'a ne'e len gden lo' ližya gan' gosegüe'ene'.

<sup>5</sup> Herodesen' goclaže' gote' Juanna', perw bitwbi bende' le', le gwneзде' bene' zan chesejle'e Juanna' cho'e xtiža' Diosen', na' bžebe' bi yeson bene' ca'. <sup>6</sup> Perw na' cate' gosone' lnin' ža la Herodesen', bi' no'ol che Herodías bya'abe' lao bene' ca' ja'ac lnin'. Na' leca bebe Herodesen' can' bya'a no'ol güegon', <sup>7</sup> na' bzoe' Diosen' testigw che' gwnežjue'be' bite'teze nabebe' le'. <sup>8</sup> Na' gwlo'oyela' xna'ben' lebe' cont gožbe' Herodesen':

—Ben neda' to lo platw yichj Juan ben' chzoa bene' nis.

<sup>9</sup> Ne late'ze bi gwyazlaže' rey Herodesen' gone' can' gož no'ol güegon' le', perw bachle bzoe' Diosen' testigw che' lao bene' ca' jasa'ac lnin' gwnežjue'be' bite'teze nabebe' le', da'nan' benšaze' mandadw gac can' gwñabebe' le'. <sup>10</sup> Ca' goquen' bene' mandadw jasečogue' yen Juanna' lo' ližya gan' yo'ena'. <sup>11</sup> Na' bosožie' yichjen' to lo platw cont bosonežjuen' no'ol güegon' na' lebe' bnežjwben' xna'be'.

<sup>12</sup> Nach bene' ca' zjanaque' txen len da' Juanna' jasyexi'e cuerp čhen' na' jasecuašen'. Gwde na' ja'aque' gan' zoa Jesúsen' jaseže'ne' can' ba goquen'.

*Bguagw Jesúsen' gayo' mil bene'*

(Mr. 6:30-44; Lc. 9:10-17; Jn. 6:1-14)

<sup>13</sup> Na' cate' bene Jesúsen' can' goc che da' Juanna', beze'e latjen' len bene' ca' zjanaque' le' txen na' besyeyo'e to lo' barcw par ja'aque' to latje daš na' nono nochle ja'aclen legaque'. Perw bene' ca' že' yež ca' zjachi' cho'a nesdaon' cate' gosende' ba zjada Jesúsen', na' gosa'ac lažgaque' ja'aque' yo biž jasešague' Jesúsen'. <sup>14</sup> Na' cate' bžin Jesúsen' cho'a nesdaon', ble'ede' nita' bene' zan na' beyaše' beži'ilaže'de' legaque'. Na' beyone' yogo' bene' ca' chesacšene. <sup>15</sup> Na' cate' ba chxoa gwbiž gosebiga' bene' ca' zjanaque' le' txen lagüen', na' gose'ene':

—Zoacho to latje ga bibi de, na' ba nac bagwže' par gagwcho xgüe. Bze bene' quinga diža' cont šjaya'aque' yež dao' ca' dan' zjachi' gala'ze šjasediljue' da' yese'ej yesagüe'.

<sup>16</sup> Nach Jesúsen' gože' legaque':

—Bitw cheyała' šjaya'aque', san le'e güe'elne' da' yesagüe'.

<sup>17</sup> Nach gose'ene':

—Chopga bel' ya'a chechon' de na' gayo'ga yetextil dao'.

<sup>18</sup> Nach Jesúsen' gože' legaque':

—Le šjaxin' ni.

<sup>19</sup> Nach ben Jesúsen' mandadw gosebe' bene' zan ca' lo' yixyen'. Na' gwxi'e yetextil ca' gayo' na' bel' ya'a ca' chope, na' gwne'e yabale be'e yela' choxclen che Diosen', na' bzoxxen' be'en bene' ca' zjanaque' le' txen cont goseyisen' len to to bene' ca'. <sup>20</sup> Na' yogüe' gosagüen' na' goseljde'. Na' bososše'e šižinw žome len yetextil bixjw len late' güeje bel' dan' bega'anna'. <sup>21</sup> Na' bene' ca' gosagw da' ca' zjanaque' ca do gayo' mil bene' byo, bi cuent no'ol ca' len bidao'.

*Jesúsen' gwze'e lo nesdaon'*

(Mr. 6:45-52; Jn. 6:16-21)

<sup>22</sup> Gwde na' Jesúsen' bene' byen besyeyo'o bene' ca' zjanaque' le' txen lo' barcon' cont gosebialagüe' besyelaque' yešla'ale nesdaon' šlac bega'an le' besele' bene' ca' ližgaque'. <sup>23</sup> Na' beyož besele' bene' ca' ližgaque', gwloe' to lo' ya'a jal' güiže' Diosen' toze'. Na' cate' gol', toz Jesúsen' zoe' lo' ya'an. <sup>24</sup> Na' ca' nac barcon' gan' zeseyo'o bene' ca' zjanaque' Jesúsen' txen, ba zejen do gachol' nesdaon' nžiga'ses nisen' len dan' chas chata' nesdaon', le' ben' chechjen clele. <sup>25</sup> Na' do šbal beyetj Jesúsen' ya'ana' na' gwze'e lo' nesdaon' na' ba zejgale' gan' zja'aquen'. <sup>26</sup> Nach cate' besele'ede' le' zeje' lo' nesdaon' leca besežebe', na' bososye'e gosene':

—iše da' chda chelen' chle'echo!

<sup>27</sup> Na' la' bol' güižte Jesúsen' legaque', gože'ne':

—Le gonchach laže'le. Neda'na'. Bitw žeble.

<sup>28</sup> Nach Pedroa' gože'ne':

—Xanto', še da' li le'na', ben mandadw sa'a lo' nesdaon' yida' gan' zon'.

<sup>29</sup> Nach gož Jesúsen' le':

—Da, Pedro.

Na' la' bchojte Pedroa' lo' barcon' gwzolao gwze'e lo' nesdaon' zeje' gan' zoa Jesúsen'. <sup>30</sup> Perw na' cate' gocbe'ede' chechjchgua ben', bžebe' na' gwzolao chebe' lo' nisen'. Nach bosye'e, gože' Jesúsen':

—Xana', bosla neda'.

<sup>31</sup> Na' la' blite na' Jesúsen' bexae'ne', na' gože'ne':

—¿Bixchen' chac chopdo'? Gwyejle'ch chia'.



<sup>32</sup> Nach cate' beyo'o Jesúsen' len Pedroa' lo' barcon', la' gwlezte be'na'.  
<sup>33</sup> Na' bene' ca' že' lo' barcon' bosozoa xibe' lao Jesúsen' gosonxene'ne', gose'ene':

—Da' licze len' naco' doguale Xi'in Diosen'.

*Jesúsen' beyone' bene' chesacšene ben' nita' Genesaret*  
*(Mr. 6:53-56)*

<sup>34</sup> Na' goselague' nisaon' na' besežine' yežlio gan' nzi' Genesaret. <sup>35</sup> Na' cate' bene' Genesareten' besyeyombi'e Jesúsen', goseyise' diža' yogo' yež ca' dan' zjachi' gala'ze cont gosenēzde' ba bžin Jesúsen' lažgaque'. Na' bene' ca' že' yež ca' goseche'e yogo' bene' chesacšene lao Jesúsen'. <sup>36</sup> Na' goseneyoede' Jesúsen' gwnežjue' latje yesoxe' la'ch late'ze xni'a xen'. Na' yogo' bene' gosoxen' besyeyaquede'.

## 15

*Diža' mal dan' chchoj cho'achon' chonen cont lažda'ochon' bi naquen xilaže' len Diosen'*  
*(Mr. 7:1-23)*

<sup>1</sup> Na' bał bene' fariseo ca' na' bene' ca' chososed chosolo'e dan' bzoj da' Moisésen' gosa'aque' Jerusalénna' na' besežine' gan' zoa Jesúsen', na' gose'ene':

<sup>2</sup> —¿Bixčhen' bene' ca' zjanaque' le' txen bitw zjana'ogüe' da' cheson bene' gol ca'? ¿Bixčhen' cbi chosyone'e zan ni'a cate' za' yesagüe'?

<sup>3</sup> Nach Jesúsen' gože' legaque':

—Na' le'e ¿bixčhen' chbejyichjle cbi chonle can' ža Diosen' cheyala' goncho san chonxen costumbr chelen'? <sup>4</sup> Diosen' none' mandadw can' goncho, gwne': "Le gap bala'an xaxna'le", na' "Note'teze' še chnešaše' len xaxne'e cheyala' gate'." <sup>5</sup> Perw le'e žale guaquer ye' to bene' xaxne'e: "Bibi de goṇa' gaclena' le'e, le yogo' da' de chia' ba bnežjuan' lo' na' Dios." <sup>6</sup> Na' žale bich bi cheyala' gwnežjue' xaxne'en še ca'. Na' dan' žale ca', chzoale ca'ale dan' ža Diosen' na' con na'ole costumbr gole che da' xozxta'ole ca'. <sup>7</sup> Le'e nacle bene' gwxiye'. Chonle cayanen' bzoj da' Isaíasen' chele, gan' žan:

<sup>8</sup> Bene' qui chesonxene' neda' len diža' cho'a, perw bi chesonxene' neda' len lažda'ogaque'.

<sup>9</sup> Bibi zejen dan' chesonxene' neda', le dan' chososed chosolo'eden' naquen da' chnalaže' beṇačze.

<sup>10</sup> Nach Jesúsen' bozoł güiže' bene' ca' zjanžaguen' cont gosebigue' lagüen' na' gože' legaque':

—Le gwzenag da' nga nia' le'e na' le šejni'i. <sup>11</sup> Bitw nacho dan' che'ej chagw beṇačhen' chonen cont lažda'ogüen' bi naquen xilaže' len Diosen'. Perw diža' mal dan' chchoj cho'e, lenna' chonen cont lažda'ogüen' bi naquen xilaže'.

<sup>12</sup> Nach gosebiga' bene' ca' zjanaque' Jesúsen' txen lagüen' gose'ene':

—¿Bi gočbe'edo' bene' fariseo ca' beseže'e cate' gosende' xtižo'na'?

<sup>13</sup> Na' gož Jesúsen' legaque':

—Gwžin ža cate' Xa' Diosen' ben' zoa yaban' gwžiyae'e yogo'loł bene' bi chosozenag che'. Gwžiyae'e legaquer can' choncho cate' chlažo'cho yixe' ca' chesela'ac lo' yel. <sup>14</sup> Jasey bene' fariseo ca'. Zjanaque' ca' to bene' lchol bene' che'nde' cue'e nez yeto bene' lchol. Nezecho to bene' lchol bitw gac cue'e nez yeto bene' lchol, le txen šjasebixe' to lo' yechw.

15 Nach Pedroa' gože' Jesúsen':

—Bzejni'išque neto' bi zejen can' gwnaon'.

16 Nach gož Jesúsen' legaque':

—¿Lencze le'e bitw chejni'ile da' quinga ba gwnia'? <sup>17</sup> ¿Bi nezele yogo' dan' che'ej chagw beṇachen' cho'on lo' li'e na' chžin hor cheden? <sup>18</sup> Perw yogo' diža' dan' chesoe' beṇachen' chesechojen lo' yichjlažda'ogüen'. Na' še choe' bene' diža' mal, len chonen cont bi nac lažda'ogüen' xilaže' len Diosen'. <sup>19</sup> Le lo' yichjlaždao' beṇachen' nan' chchoj yogo' xbab mal cate' žan yesone' da' mal quinga: yesote' bene', yesata'lene' no'ol bi nac xo'olgaque' o bene' byo bi nac bene' chegaque', na' yesone' gwban, yeso'e diža' güenlaže' che lježgaque', na' yesene'eye'e che bene'. <sup>20</sup> Xbab mal ca' chesonen cont bi nac laždao' bene' xilaže' len Diosen', gague dan' bi chone'e zan ni'a cate' za' gagüe'.

*To no'ole bi naque' bene' Israel chejnilaže' Jesúsen'*

*(Mr. 7:24-30)*

<sup>21</sup> Beza' Jesúsen' latjen' len bene' ca' zjanaque' le' txen jaya'aque' distritw Galilea gala'ze gan' mbane ciuda Tiro na' ciuda Sidón. <sup>22</sup> Na' to no'ole zoa do na', ben' bi naque' bene' Israel, gwze'e laže' cont bžine' gan' zoa Jesúsen' na' jašague'ne'. Na' gwne' zižje, gože'ne':

—Xana', le' naco' xi'in diaža che da' rey David. Beyaše'šque neto'. To bi' no'ol chia' yo'o nyaz da' xigüe' yichjlažda'obe' na' leca chžaglaobe'.

<sup>23</sup> Perw Jesúsen' bitw boži'e xtiža' no'olen'. Nach bene' ca' zjanaque' Jesúsen' txen gosebigue' cuite'na' na' gosata'yoede' le' gose'ene':

—Boži'išca no'olen', le con nagüe' chio' chol güiže' le' zižje cont gacleno'ne'.

<sup>24</sup> Nach gož Jesúsen' legaque':

—Diosen' gwsele' neda' cont chaclena' bene' Israel gualaž checho na'ze, le legaque' zjazaca'lebe' ca xila' dao' be zjanacžeje.

<sup>25</sup> Nach no'olen' gwbigue' bzoa xibe' lao Jesúsen', na' gože'ne':

—Xana', goclenšca neda'.

<sup>26</sup> Nach gož Jesúsen' le':

—Bitw naquen güen yeca'acho yela' guagw che xi'incho na' gwnežjwchon gagw beco' ca'.

<sup>27</sup> Nach gože'ne':

—Leczdo' Xana'. Perw beco' ca' guac yesagwba' bla'a dao' da' cheselažo' lo yo.

<sup>28</sup> Nach Jesúsen' gože'ne':

—No'ole, leca chejnilažo' neda'. Guaclencza' le' can' chaclažon'.

Na' la' beyacte xi'in no'olen'.

*Jesúsen' beyone' bene' zan bene' chesacšene*

<sup>29</sup> Beza' Jesúsen' latjen' len bene' ca' zjanaque' le' txen goso'e nezen' dan' chde gala'ze cho'a nisdao' Galilean'. Nach gosepe' to lo ya'a jasechi'e lo ya'ana'. <sup>30</sup> Na' besežin bene' zan lo ya'a gan' zoa Jesúsen' len bene' ca' zjanaque' le' txen. Zjanche'e no bene' nxinj ni'e, bene' lchol, bene' bi chac ni'e, bene' bi zoa ni'a na'gaque', na' len bene' chese'e gwde gwdele yižgüe', na' bosonite' legaque' xni'a Jesúsen'. Na' Jesúsen' beyone' yogüe'.

<sup>31</sup> Na' leca besyebane bene' ca' cate' besele'ede' can' besyene bene' ca' bi gosac yesene, na' besyeyac bene' bi zjazoa ni'a na'gaque', na' besyeda

bene' nxinj ni'e, na' besele'e bene' l'cho| ca'. Nach gosonxene' Diosen' ben' chonxen chio' bene' Israel.

*Jesúsen' bguagüe' tap mil bene'*

*(Mr. 8:1-10)*

<sup>32</sup> Gwde na' Jesúsen' goxe' bene' ca' zjanaque' le' txen na' gože' legaque': —Cheyaše'da' bene' qui, le ba goc šone ža zjanite' nga len neda', na' bibi de da' yesagüe'. Na' bi chaclaža' yosa'ane' sin cbi yesagüe' cont bi yesecholde' chanez.

<sup>33</sup> Nach legaque' gose'ene':

—Gan' zoacho nga naquen to latje daš ga bibi de. ¿Gaxe želecho da' yesagw yogo' bene' quinga?

<sup>34</sup> Nach gož Jesúsen' legaque':

—¿Gaca' yetextilen' de chele?

Nach gose'ene':

—Gažga yetextil dao' zjade na' to chopga bel ya'a dao'.

<sup>35</sup> Nach Jesúsen' bene' mandadw yesebe' bene' zan ca' lo yon'. <sup>36</sup> Na' gwxi'e yetextil ca' gaže na' len bel ya'a dao' ca', nach be'e yela' choxcen che Diosen', nach bzojxen' bnežjuen' bene' ca' zjanaque' le' txen na' legaque' bosonežjue' che yogo' bene' nita' na'. <sup>37</sup> Na' yogüe' gosagüe' goseljde'. Gwdena' bososše'e yegaže žome len late' güeje yela' guagw dan' bega'anna'. <sup>38</sup> Na' bene' ca' gosagw yetextilen' len belen' nac tap mil bene' byo, na' bi cuent no'ole ca' len bidao' ca'. <sup>39</sup> Nach beyož besela' Jesúsen' bene' ca' ližgaque', na' beyo'e to lo' barcw len bene' ca' zjanaque' le' txen na' ja'aque' distritw gan' nzi' Magdala.

## 16

*Gosenabde' Jesúsen' gone' to da' yesele'ede' le'e yaba*

*(Mr. 8:11-13; Lc. 12:54-56)*

<sup>1</sup> Na' goquen' bal bene' fariseo ca' na' bene' saduceo ca' gosebigue' gan' zoa Jesúsen', na' cont yesagüe' xya che' gosenabe' gone' to yela' guac da' yesele'ede' le'e yaban' cont yesenezde' še da' licze Diosa' gwsele' le'. <sup>2</sup> Nach Jesúsen' gože' legaque':

—Cate' chle'ele chexna le'e yaban' šeže'le nach žale: “Yeža'a gwxe dan' chexna le'e yaban'.” <sup>3</sup> Na' cate' chle'ele zete bejw xna le'e yaban'.” Nacle bene' gwxiye', le nezele še guac yejw zag o še guac zeye' caten' chle'ele can' nac le'e yaban', perw bi chache'ele bi zejen da' ca' chon Diosen' tiemp nga zoacho na'a. <sup>4</sup> Le'e zoale na'a nacchgualde bene' laždao' xi'a na' ba gwlejyichje Diosen'. Da'nan' chnabile gona' yeto yela' guac da' le'ele cont nezele še Diosen' gwsele' neda'. Perw bitw gona' can' chnablen', le ba ble'ele da' chona'. Dan' gon Diosen' len neda' cont nezele le'na' gwsele' neda' naquen ca dan' bene' len da' Jonás ben' be' xtiža' Diosen' cani'.

Nach beyož gwna Jesúsen' ca', beze'e len bene' ca' zjanaque' le' txen gan' nita' bene' ca'.

*Dan' chsed chlo'e bene' fariseo ca' na' bene' saduceo ca' zaca'leben ca levadura*

*(Mr. 8:14-21)*

<sup>5</sup> Na' cate' besežine' yešla'a nisdao' Galilean', bene' ca' zjanaque' Jesúsen' txen gosache'ede' gosanjáže' yetextil da' yesagüe'. <sup>6</sup> Nach Jesúsen' gože' legaque':

—Le gon xbab, le gwsaca' len levadura che bene' fariseo ca' na' che bene' saduceo ca'.

<sup>7</sup> Nach gose' lježgaque':

—Gwne' ca' le gague bi yetextilen' noa'chon'.

<sup>8</sup> Na' Jesúsen' gocbe'ede' xbab dan' gosone', na' gože' legaque':

—¿Bixchen' chaczejlaže'le da' bibi yetextil de? ¿Bi chejle'le napa' yela' guac par gwguagua' le'e? <sup>9</sup> ¿Biña' šejni'ile? na' ¿ba gonlaže'le can' bguagua' gayo' mil bene' byo len gayo'ze yetextil dao'? na' lecze ¿bitw zalaže'le do yebal žome pedas yetextil botoble dan' becho'onen? <sup>10</sup> Na' ¿chixe tap mil bene' byo ca' bguagua' len gaže yetextil dao'? ¿Zalaže'le yebal žome pedas yetextil can' botoble dan' becho'onen? <sup>11</sup> ¿Bixchen' con benle xbab che yetextilen' cate' gwnia' le'e gwsaca'le len levadura che bene' fariseo ca' na' che bene' saduceo ca'?

<sup>12</sup> Nach bene' ca' zjanaque' Jesúsen' txen gosacbe'ede' gague be'e diža' che levadura dan' chosočhine' par chcha'o yetextilen' san be'e dižan' ca' cont bi yosozenague' che dan' chososed chosolo'e bene' fariseo ca' na' bene' saduceo ca'.

*Pedroa' gwne' Jesúsen' naque' bene' gwsela' Diosen' cont nabi'e*  
(Mr. 8:27-30; Lc. 9:18-21)

<sup>13</sup> Nach Jesúsen' len bene' ca' zjanaque' le' txen besežine' gala'ze to ciuda dan' nzi' Cesarea de Filipino. Nach Jesúsen' gože' bene' ca' gosa'aclene' le':

—Diosen' gwsele' neda' golja' benačh. Perw ¿bi chesena bene'? ¿non' naca' neda'? ¿Bi chesene'?

<sup>14</sup> Na' gose'ene':

—Bale' chesene' naco' da' Juan ben' bzoa bene' nis. Na' yebale' chesene' naco' Elías ben' be' xtiža' Diosen' cani'. Na' yebale' chesene' naco' da' Jeremías o yeto bene' be' xtiža' Diosen' cani'te.

<sup>15</sup> Nach gože' legaque':

—¿Chixe le'e? ¿No žale naca'?

<sup>16</sup> Nach Simón Pedroa' gože'ne':

—Len' naco' Cristo ben' gwlej Diosen' cont nabi'o, na' naco' dogualje Xi'in Dios, Dios ben' zoa toli tocaņe.

<sup>17</sup> Nach Jesúsen' gože'ne':

—Simón xi'in Jonás, mbalaz zo' dan' gwnao' ca'. Notno benačh bzejni'i le' nao' ca'. Toz Xa' Dios ben' zoa yaba, len' ba bzejni'iden' le'. <sup>18</sup> Na' neda' žia', len' lio' Pedro na' zeje dižan' yej. Na' ca to bene' güen yo'o chbeje' yej gual cont gonen žin cate' cueque' len yo'on, ca'cze chbeja' le' gono' xšina', gaco' bene' nechw yotobo' bene' yesonxene' neda'. Na' bitwbi gac yeson da' xigüe' ca' yosolej yosošožen bene' ca' yesonxene' neda'. <sup>19</sup> Na' gona' lo nao' zgua'tec le' go'o xtižan' len bene' zan cont yosozenague' che Dios ben' zoa yaban' na' nabi'e yichjlažda'ogaque'. Na' lecze naquen lo nao' yo'o bene' ca' yesonxene' neda' bica' da' ca' nac güen yesone' na' bica' da' ca' cbi nac güen yesone'. Na' Diosen' gwzejni'ide' le' naquen' ye'gaco'ne' cont yežaguen len dan' ža Diosen'.

<sup>20</sup> Nach Jesúsen' gože' legaque' nono yese'e še naque' Cristo ben' gwlej Diosen' cont nabi'e.

*Jesúsen' gwduxue'ede' gate'*  
(Mr. 8:31-9:1; Lc. 9:22-27)

<sup>21</sup> Na' žana' Jesúsen' gwzologüe' bzejni'ide' bene' ca' zjanaque' le' txen cheyala' šeje' Jerusalenna'. Na' gože' legaque' bene' gole blao ca' chesena'bie naciõ chechon', na' bxož gwnabia' ca' na' bene' ca' chososed chosole'ede' dan' bzoj da' Moisés yososaque' le' na' yesote' le'. Perw yeyõ ža yebane' ladjo bene' guat ca'. <sup>22</sup> Nach Pedroa' gwche'e Jesúsen' gan' nac lchojiže na' gwzologüe' be'lene' le' diža' gwdile' le', gože'ne':

—Xana', Diosen' gaclene' le'. Bitw gac chio' ca dan' žo' nga.

<sup>23</sup> Perw Jesúsen' gwyečhje' gwne'e Pedroa' gože'ne':

—iGwcuas ca'ale Satanás! Chgo'oyelo' neda' bi gona' can' nžia bia Diosen' gona'. Bi nsa'o xbab che Dios, san nsa'o xbab che beňach.

<sup>24</sup> Gwde na' Jesúsen' gože' bene' ca' zjanaque' le' txen:

—Note'teze bene' še chaclaže' gaque' neda' txen, cheyala' cuejyichj cuine' la'czla' žaglagüe' na' con gone' can' nia' neda'. <sup>25</sup> Note'teze bene' chacde' gone' cont bi žaglagüe' o cont nono yesot le', benan' cuiayi'. Na' note'teze bene' chzanlaže' cuine' žaglagüe' o gate' ne chia' neda', ba de yela' mban che' toli tocañe. <sup>26</sup> ¿Bixe zejenna' to bene' nabi'e doxen yežlion' na' cuiaye' bi gata' yela' mban che' toli tocañe? Le bi zoa nacle gon beňachen' chixjue' cont gata' yela' mban che' toli tocañe. <sup>27</sup> Diosen' gwsele' neda' golja' beňach na' cate' yida' yežlio nga da' yoble nsa'a yela' zaca' juisyw che Xa' Diosen' na' nchi'a angl chia' ca', cana'ch gona' cont to to beňachen' nite' mbalaz o yesezaca'zi'e neche da' goson to toe'. <sup>28</sup> Na' da' li žia' le'e, balle nita'le nga na'a bina' gatle cate' žin ža le'ele neda' yida' gwlo'a yela' gwnabia' chian', neda' naca' ben' gwseła' Diosen' golja' beňach.

## 17

### *Jesúsen' goque' ca to be'ni'*

(Mr. 9:2-13; Lc. 9:28-36)

<sup>1</sup> Gwde xop ža Jesúsen' gwčhi'e Pedroa' len Jacobo na' Juan bene' biše' Jacobo na' ja'aque' to lo ya'a sibe. Na' nono nochle ja'aclen legaque'.

<sup>2</sup> Na' lao legaque' bža' ca goc Jesúsen', cho'alagüen' goctiten ca gwbiž, na' xalanen' beyaquen šiš xila' ca be'ni'. <sup>3</sup> Na' concze besele'ede' da' Moísesen' len da' Elíasen' na' chosašalje' len Jesúsen'. <sup>4</sup> Nach Pedroa' gože' Jesúsen':

—iXanto', leca güenna' zoacho nga! Še chaclažo', gonto' šõñe ranšw, to chio', na' to che Moisés, na' yeto che Elías.

<sup>5</sup> Ne' choe'te Pedron' dižan' ca' cate' to bejw da' chactiten gwyečhjen legaque' na' ladjo bejon' gosende' gwna Diosen':

—Benga Xi'ina' ben' chacda'. Chbe chezaquelaže'chgüeda' che'. Le gwzenag che'.

<sup>6</sup> Na' cate' bene' ca' nche'e Jesúsen' gosende' diža' ca' besežebchgüe', con gosaze' cosčo'ale lo yon'. <sup>7</sup> Nach gwbiga' Jesúsen' gwxo'a ne'e yichjgaquen' na' gože'ne':

—Le yeyas. Bitw žeble.

<sup>8</sup> Na' cate' besyečhis lagüen', noch no besele'ede' san toze Jesúsen' zie'.

<sup>9</sup> Na' gwde na' šlac chesyeyetje' lo ya'an Jesúsen' gože' legaque':

—Nono ye'le can' nac dan' ba ble'ele nga. Cate'ch ba bebana' ladjo bene' guat ca', neda' naca' ben' gwseła' Diosen' golja' beňach, cana'ch güe'le diža' čhen.

<sup>10</sup> Nach bene' ca' zja'aclen Jesúsen' gose'ene':

—Beñe' ca' chososed chosolo'e dan' bzoj da' Moisésen' chososedde' neto' chesene' zgua'tec da' Elías ben' gwzoa cani' cheyała' yide' da' yoble cate' za' yedenabia' ben' seła' Diosen'. ¿Bixchen' chesene' ca'?

<sup>11</sup> Nach Jesúsen' gože' legaque':

—Da' licze zgua'tec yid da' Eliásen' na' yeyonšagüe' yogo'lol. <sup>12</sup> Perw žia' le'e, Elías ba bide' na' bi gosache'e beñe' še nac le'. Na' gosonde' le' con ca gosacłaže'. Na' ca'czen' yosoči yososaque' neda' naca' ben' gwsela' Diosen' golja' beñach.

<sup>13</sup> Nach beñe' ca' zja'aque' len Jesúsen' gosache'ede' cho'e diža' che da' Juan ben' bzo'e beñe' nis.

*Beyon Jesúsen' to bi' chazbe' šon*

*(Mr. 9:14-29; Lc. 9:37-43)*

<sup>14</sup> Na' cate' besežine' gan' zjanžag beñe' zan, to beñe' bšague' Jesúsen' na' bzoa xibe' lagüe'na' gože'ne':

<sup>15</sup> —Xana', beyaše'laže'sca xi'ina' nga. Chazbe' šon na' leca chžaglaobe' len len. Na' zan ni'a ba jačhazbe' lo yi' na' lecze zan ni'a ba blažo'be' lo nis.

<sup>16</sup> Ba bedesana'be' lao beñe' ca' zjanaque' le' txen, perw bitw gosaque' yesyeyone'be'.

<sup>17</sup> Nach Jesúsen' gože' beñe' ca' že'na':

—jLe'e beñe' bi chejnilaže', chonchgual clele! ¿Batca' zelao na'lagua' le'e? Bedesan bidaon' ni.

<sup>18</sup> Nach Jesúsen' bene' mandadw yechoj da' xigüen' yo'o nyazen yichjlaždao' bidaon' na' la' bechojten. Na' la' beyaquetebe'.

<sup>19</sup> Na' gwde goc ca', beñe' ca' zjanaque' Jesúsen' txen gosebigue' lagüen' cate' zoe' toze', na' gose'ene':

—¿Bixchen' bi goc neto' yebejto' da' xigüen'?

<sup>20</sup> Jesúsen' gože' legaque':

—Bitw goc yebejlen dan' bitw gweyle'le Diosen' gone' yechojen. Xsa xomdasen' naquen da' dao' riz. Na' da' li žia' le'e, la'czła' dan' chejnilaže'le Diosen' naquen ca to xsa xomdas lagüe dan' bi chejnilaže'teclene', še šejnilaže'lné', guaque ye'le ya'a nga: “Gwcuas nga, na' jayzoa na'ate”, na' gac can' nalen'. Bitw bi de dan' bi gac gonle con še chejle'le Diosen' gone' gaquen. <sup>21</sup> Na' cont yebejle da' xigüe' ca' dan' zjanac ca dan' bebeja' yichjlaždao' bidao'na', cheyała' gwyo gwčhejle gonle gwbas na' zoatezle yol güižle Diosen'.

*Da' yoble Jesúsen' gwdixjue'ede' gate'*

*(Mr. 9:30-32; Lc. 9:43-45)*

<sup>22</sup> Na' šlac zjayda Jesúsen' len beñe' ca' zjanaque' le' txen do gan' mbane distritw Galilea, Jesúsen' gože' legaque':

—Diosen' gwsele' neda' golja' beñach, na' yosodie' neda' lo na' beñe' chesegue'ede'nda', <sup>23</sup> na' yesote'nda'. Perw na' yeyon ža yosban Diosen' neda' ladjo beñe' guat ca'.

Nach beñe' ca' zjanaque' Jesúsen' txen cate' gosende' xtiže'na' gosacyaše'chgüede'.

*Jesúsen' gwdixjue' da' chosochixjue' che yodao'*

<sup>24</sup> Na' cate' besyežine' Capernaum, beñe' ca' chosochixjue' che gastw che yodao' blao che chio' beñe' Israel ja'aque' lao Pedroa'. Na' gose'ene':

—¿Bi chyixjw maestrw chelen' da' cheyała' chixjue' che yodaon'?

<sup>25</sup> Nach gož Pedroa' legaque':

—Chyixjuen'.

Gwde gwna Pedroa' ca' gwyo'e lo' yo'ona'. Nach Jesúsen' la' gožtie' le':

—¿Bi xbab chono', Simón? Ca nac bene' gwnabia' ca' nita' yežlio nga, ¿non' chacdo' chosočixjue'? ¿bene' gualaž che' o še bene' zito'?

<sup>26</sup> Nach Pedroa' gože'ne':

—Chosočixjue' bene' zito'.

Nach Jesúsen' gože' le':

—Bene' zjanaque' biše' lježe' bitwbi cheseyixjue'. Na' chio' naccho xi'in Dios ben' zoa yaba chnabi'e, bitw cheyala' chixjwcho che yodaon'.

<sup>27</sup> Perw cont nono yeson xbab chgue'echo yodao' blaon', na' chixjwcho. Gwyej cho'a nesdaon', na' bzala' yixjw chion' na' bel nechw be seno', lo cho'aba'na' želdo' to mechw. Na' yeyoxon' šjadixjo' chechon'. Guaqueczen par šjadixjo' che chopcho.

## 18

*Gosacyož bene' ca' zjanaque' Jesúsen' txen noe' nacch blao*

(Mr. 9:33-37; Lc. 9:46-48)

<sup>1</sup> Nachen' bene' ca' zjanaque' Jesúsen' txen gosebigue' cuite'na', na' gose'ene':

—¿No neto' gachto' blao cate' Diosen' ben' zoa yaban' gone' cont nabi'o?

<sup>2</sup> Na' Jesúsen' goxe' to bidao' na' bzeche'be' gachol'legaque'. <sup>3</sup> Na' gože'ne':

—Da' li žia' le'e, note'tezle še bi gwša' xbab chelen' cont gwzenagle che Diosen' ca chon to bidao' cate' chzenagbe' che xaxna'be', gwhat nabia' Diosen' ben' zoa yaban' yichjlažda'ole. <sup>4</sup> Na' note'teze bene' še yeyaque' ca bidao' nga na' gwzexjwlaže' lao Diosen', nach gague' bene' blao len neda' cate' Diosen' ben' zoa yaba gone' cont solao nabi'a. <sup>5</sup> Note'teze bene' chone' güen len to bidao' ca bi' nga neche da' chejnilaže' neda', choncze' güen len neda'.

*Bitw cheyala' goncho cont gon bene' da' xinj*

(Mr. 9:42-48; Lc. 17:1-2)

<sup>6</sup> 'Note'teze bene' chon cont lažo' to bene' za' gwzologüe' chejnilaže' neda' gone' da' xinj, yejni'acle yosocheje' yene' to yiše xen na' yosozale'ne' lo' nesdaon' clél ca da' gone' cont lažo' bene' yoble gone' da' xinjen'.

<sup>7</sup> Nyaše'chguaze gac che benachen' da' zjade da' zan yežlio nga da' chesonen cont yesone' da' xinj. Bia'cze gata' dan' yeson cont lažo' bene' yesone' da' xinj, perw nyaše'chguaze gac che bene' chon cont lažo' bene' yoble gone' da' xinjen'.

<sup>8</sup> 'Na' da' li žia' le'e, še ni'a na'len' chonen cont gonle da' xinj, cheyala' cuejyichjle da' malen' chonle. Yejni'a bibi ni'a na'len' soa clél ca gonle da' xinjen' len len. Na' yejni'a šjayzoale len Diosen' toli tocané bi zoa šla'a taca'len' o nchog šla'a ni'alen' clél ca yeyejle lo' yi' gabil nya' cuerp chelen'.

<sup>9</sup> Na' še yejlaolen' chonen cont gonle da' xinjen', cheyala' cuejyichjle da' malen' chonle. Yejni'a bibi yejlaolen' cuia clél ca gonle da' xinjen' len len. Na' yejni'a šjayzoale len Diosen' toli tocané zoa šla'aze yejlaole clél ca yežinle lo' yi' gabil žia chop la'a yejlaolen'.

*Jempl che xila' be gocžeje*

(Lc. 15:3-7)

<sup>10</sup> 'Bi gonle note'teze bene' chejnilaže' neda' ca bene' bibi zaca'tec, la'czla' bitec zaque' len benach. Žia' le'e, angl ca' chesape' legaque' lecce

nite' lao Xa' Diosen' yaban' gan' zoe'na'. <sup>11</sup> Na' ca naca' neda', Diosen' gwsele' neda' golja' benach cont gwnežjua' yela' mban toli tocanē che bene' ba zjambiayi'.

<sup>12</sup> '¿Bixe chonle xbab? Še nita' to gayoa xila' chele na' yexjw toba' ĵbi yocua'anle be ca' yetaplalj togalj do lo ya'a na'ze na' šjajdiljwle ben' bexjua'? <sup>13</sup> Na' da' li žia' le'e, cate' yeželeleba' yebechle dan' beželban' clēl ca can' chebele che be ca' taplalj togalj ben' bi gosacžeje. <sup>14</sup> Ca'czen' naquen len bene' ca' chesejnilaže' neda' bene' ca' bitec bi zjazaque' len benachen'. Xacho Diosen' ben' zoa yaban' bitw che'nde' cuiayi' ne toe'.

*Cheyalā' yezi'xencho che bene' lježcho bene' chesejnilaže' Diosen' (Lc. 17:3)*

<sup>15</sup> Še to bene' lježle gone' mal contr to le'e, šejle šje'elenlene' diža' chopzle can' nac dan' chonen' cont yetinjden'. Na' še gwzenague' diža' dan' šje'elenlenen', yezoe' binlo len Diosen' da' yoble. <sup>16</sup> Perw še bi gwzenague' diža' dan' šje'elenlenen', güench che'ele yeto o yechope bene' lježle cont yesaque' testigw ba gota'yoēle ben' yoša' xbab chen'. <sup>17</sup> Na' še bitwcze gwzenague' chele, le güe' diža' can' chonen' lao yogo'le gan' chdop chžagle chonxenle Diosen'. Na' še neca gwzenagcze' che yogo'le, cbich gonle' cuent len le'e chdop chžagle chonxenle Diosen'. Perw le gon cuent naque' txe len bene' ca' bi chesejnilaže' Diosen', ca no bene' güe'chixjw bene' chesonchgüa' da' xinj.

<sup>18</sup> 'Da' li žia' le'e, naquen lo na'le ye'le bene' ca' yesonxene' neda' bica' da' nac güen yesone' na' bica' da' ca' bi nac güen yesone'. Na' Diosen' gwzejni'ide' le'e naquen' ye'gaclene' cont yežaguen len dan' ža Diosen'.

<sup>19</sup> 'Na' da' yoble žia' le'e, še chople nita'le yežlio nga gwxi'ale bin' nabele Diosen', Xa' Diosen' ben' zoa yaban' goncze' dan' nabelenen'. <sup>20</sup> Na' gan' nžag chope šonle chonxenle neda', zoacza' txe len le'e.

<sup>21</sup> Nach Pedroa' gwbigue' gože' Jesúsena':

—Xana', še bene' lježa' chone' da' mal contr neda', ĵbal ni'a cheyalā' yezi'xena' che'? ĵzelao do gaž ni'a?

<sup>22</sup> Nach Jesúsena' gože'ne':

—Žia' le', gague cheyalā' yezi'xen che lježle zelao do gaž ni'a, san yogo'te ni'a cheyalā' yezi'xen che lježle.

*Jempl che ben' bi bezi'xene' che dan' čala' bene' lježe'*

<sup>23</sup> 'Na' yela' gwnabia' che Diosen' ben' zoa yaban' zaca'leben ca da' nga goc. Zoa to bene' gwnabia' ben' chesala' xmose' ca' xmechue'. Na' goclaže' yebeje' cuent len legaque'. <sup>24</sup> Na' cate' gwzolagüe' bezi'e cuent che to toe', da' nechw bžin to xmose' ben' čala' zan millón. <sup>25</sup> Na' mosen' bitwbi xmechue' gota' par yonežjuen'. Da'nan' bene' gwnabian' bene' mandadw ta'ogaque' len xo'ole', len xi'ine' ca' na' len doxen da' zjade che' cont yeyaxjw dan' čale' chen'. <sup>26</sup> Nach mosen' bzoa xibe' lao bene' gwnabian' gota'yoede' le' gože'ne': "Xana', gwdapešca yela' chxenlaže' len neda', na' yeyona' doxen dan' čala' chion'." <sup>27</sup> Nach bene' gwnabian' beyaše'de' le' na' bezi'xene' che doxen dan' čale' na' bsane' le'. <sup>28</sup> Perw na' cate' bechoj mosen' liž xanen', la' bežagtie' yeto mos lježe' bene' čala' late' xmechue'. Nach la' gwnizte' yene' gože'ne': "Yeyono' dan' čalo' čhian' netec na'a." <sup>29</sup> Nach mos lježen' la' bzoate' xibe' lagüen', gože'ne': "Gwdapešca yela' chxenlaže' čhia' na' yeyona' doxen dan' čala' chion'." <sup>30</sup> Perw na' mos nechon' bitw bzenague' che mos lježen'. La' gwyejte' jene' mandadw



goseyixjue'ne' ližya na' bi yechoje' še biṇa' yonežjue' dan' chale' chen'.  
<sup>31</sup> Na' mos ca' yezica'chle cate' besele'ede' can' ben' mos nechon', leca gosacde' zi'. Na' ja'aque' lao bene' gwnabian' jaseže'ne' yogo'loḷ can' goca'.  
<sup>32</sup> Nach bene' gwnabian' goxe' mos nechua' da' yoble lagüe'na', gože'ne': "Le' naco' to bene' xi'achgua. Neda' bezi'xena' chio' doxen dan' chalo' chian' dan' gota'yoedo' neda' yezi'xena' chion'.<sup>33</sup> ¿Bixchen' bi beyaše'do' mos lježo' ben' chale' chion' can' beyaše'da' le'?"<sup>34</sup> Na' bža'achgua bene' gwnabian' na' bdie' le' lo na' bene' goseyixjue'ne' ližya ga žaglaogüe', na' bi yechoje' še biṇa' yeyixjue' doxen dan' chale' chen'.

<sup>35</sup> Nach Jesúsen' gože' bene' ca' zjanaque' le' txen:

—Can' gon Xa' Diosen' ben' zoa yaban' len note'tezle še bi chezi'xenle che lježle do yičj do laže'le bite'teze dan' chesonde' le'e.

## 19

*Bi cheyala'yela'acho len no'ol chechon' cont soalencho no'ole yoble*  
 (Mr. 10:1-12; Lc. 16:18)

<sup>1</sup> Na' Jesúsen' cate' beyož gwne' da' ca' beze'e distritw Galilean' na' gwłague' yegw Jordánna' beyeje' gan' mbane distritw Judean'.<sup>2</sup> Na' bene' zan ja'aclen le', na' beyone' bene' ca' chesacšene.

<sup>3</sup> Na' baḷ bene' fariseo ja'aque' gan' zoe'na', le gosaclaže' yesebeje'ne' diža' da' yosočhine' cont gosozie'ne' xya choḷ, nach gose'ene':

—¿Guac to bene' nšagna' yele'e len xo'ole' še bite'teze dan' chone' cbi cholaže' bene' chen'?

<sup>4</sup> Nach gože' legaque':

—¿Biṇa' gwłable can' nyoj Xtiža' Diosen'? Žan cate' gwxe yežlion' Diosen' bene' bene' nechw ca' to bene' byo na' to no'ole.<sup>5</sup> Na' gwna Diosen': "Da'nán' bene' byon' gwsane' xaxne'e cont soalene' no'ole chen' na' chope' yesaque' ca toz bene'." <sup>6</sup> Na' ca' bich yesac chope' san toze'. Da'nán' bi cheyala' yesyele'e, le Diosen' ba bcode' legaque'.

<sup>7</sup> Nach gose'ene':

—Še naquen ca' ¿bixchen' ben da' Moisésen' mandadw cate' to bene' yele'e len no'ol chen' cheyala' chas to yiš da' gwnežjue' no'ol chen' ga güen' diža' besyele'ena'?

<sup>8</sup> Jesúsen' gože' legaque':

—Da' Moisésen' be'e latje yela'ale len no'ol chele lagüe dan' nacle bene' güedenag len Diosen'. Perw cate' Diosen' bene' bene' nechw ca' bitw nacho goclaze' yesyele'e.<sup>9</sup> Žia' le'e, note'teze bene' chele'e len no'ol che' na' cheque'e no'ole yoble, len neztede' no'ol chen' bitw naque' to no'ole chzoa xtoe', toz ca da' xinjen' chone' ca nac dan' chon ben' chata'lene' no'ol che bene' yoble. Na' note'teze bene' yošagna'lene' to no'ole bene' bela'a len bene' che', lecze tozcze ca da' xinj gone' ca nac da' chon bene' chata'lene' no'ol che bene' yoble.

<sup>10</sup> Nach bene' ca' zjanaque' Jesúsen' txen gose'ene':

—Še can' naquen che bene' byo na' no'ole, güench nono gwšagna'.

<sup>11</sup> Jesúsen' gože' legaque':

—Gague yogo' bene' yesejni'ide' da' nga, šinze bene' ca' ba bzejni'i Diosen' legaque' bi zejen.<sup>12</sup> Nita' bene' bi žan yosošagne'e dan' gosalj'e bi zjanya' cuerp che', na' lecze nita' bene' bi chosošagne'e lagüe dan' gosone bene' legaque' cont bi zjanya' cuerp chegaque'. Na' lecze ca' nita' bene'

cbi chosošagne'e lagüe dan' chesazlaže'che' yesone' xšin Diosen' ben' zoa yaban' chnabi'e. Le gwzenag che dan' ba gwnian' še ba ben Diosen' cont chejni'ilen.

*Jasesane' bidao' lao Jesúsén'*

*(Mr. 10:13-16; Lc. 18:15-17)*

<sup>13</sup> Na' ja'ac bene' jasesane' bidao' lao Jesúsén' cont xoa ne'e yichjgacbe' na' nabe' lao Diosen' gaclene' legacbe'. Perw bene' ca' zjanaque' le' txen gosodile' bene' ca' zjanche'ebe'. <sup>14</sup> Nach Jesúsén' gože'ne':

—Le güe' latje yesid bidao' ca' lagua' nga, na' bi gwžonle, le bene' ca' zjanac ca bidao' quinga, legaque' chosozenague' che Diosen' ben' zoa yaba cont chnabi'e yichjlažda'ogaque'.

<sup>15</sup> Na' beyož gwxoā na' Jesúsén' yichjgacbe' gwñabe' lao Diosen' gac-lene'be', nach gwyeje' ga yoble.

*Bene' güego' bene' goc bene' gwñi'a*

*(Mr. 10:17-31; Lc. 18:18-30)*

<sup>16</sup> Na' goquen', to bene' güego' bžine' gan' zoa Jesúsén', na' gože'ne':

—Maestrw, le' naco' bene' güen. ¿Bi da' güen cheyalā' gona' cont gata' yelā' mban chia' toli' tocanē?

<sup>17</sup> Nach Jesúsén' gože'ne':

—¿Bixchen' žo' naca' bene' güen? Toz bene' güen zoa, na' len' naque' Dios. Perw na' še chaclažo' gata' yelā' mban chio' toli' tocanē, cheyalā' gono' can' non Diosen' mandadw goncho.

<sup>18</sup> Nach gože' Jesúsén':

—¿Bica' da' ca'?

Nach Jesúsén' gože' le':

—Nono gotle, bi gata'lenle no'ol bi nac no'ol chele o bene' byo bene' bi nac bene' chele, bi cuanle, bitw güe'le diža' güenlaže' che bene' lježle. <sup>19</sup> Le gap bala'an xaxna'le, na' le gaque lježle can' chaque cuinle.

<sup>20</sup> Nach bene' güegon' gože' Jesúsén':

—Yogo'lol da' quinga gwzolagua' chonczan' cate' ne' nactia' bidao'. ¿Bixe dan' chyažjeh gona'?

<sup>21</sup> Jesúsén' gože'ne':

—Še chaclažo' gaco' cayanen' chazlaže' Diosen', jayete' yogo' da' de chio', na' da' le'edo' chen bnežjon bene' yaše'. Nach še gono' ca', cate' yežino' yaba gan' zoa Diosen', da' zaca'ch gata' chio'. Na' še ba beyož beno' can' žia' le', nach sao' gaco' neda' txen.

<sup>22</sup> Perw na' bene' güegon' cate' beyož bende' diža' can' gož Jesúsén' le', beza'yaše', le bene' gwñi'achgua goque'.

<sup>23</sup> Gwde na' Jesúsén' gože' bene' ca' zjanaque' le' txen:

—Da' li žia' le'e, leca zdebe naquen to bene' gwñi'a gwzenague' che Dios ben' zoa yaba cont Diosen' nabi'e yichjlažda'ogüe'. <sup>24</sup> Da' yoble žia' le'e, bedao'ch te to be xen be nzi' camello to lo' nag yeše' clcl ca to bene' gwñi'a gwzenague' che Dios cont Diosen' nabi'e yichjlažda'ogüe'.

<sup>25</sup> Na' bene' ca' zjanaque' Jesúsén' txen leca besyebande' cate' gosende' xtižen', nach gosene':

—¿Noxen' šjayzoa len Diosen' še ca'?

<sup>26</sup> Jesúsén' gwne'e legaque', nach gože'ne':

—Bibi de da' gac yeson benachen' cont šjasyenite' len Diosen', perw bi zoa da' nacho da' bi gac gon Dios.

27 Nach Pedroa' gože' Jesúsen':

—Neto' ba gwlejičhjtó' yogo' da' de čheto' cont nacto' le' txen. ¿Bi da' güen gata' čheto' dan' ba gwlejičhjtó' da' ca'?

28 Jesúsen' gože' legaque':

—Da' li žia' le'e, Diosen' gwsele' neda' golja' benach na' cate' yocobe' yežlion', neda' cui'a nabi'a güen juisyw can' chnabia' Dios ben' zoa yaba. Na' le'e šižinwle cue'le cuita'na' nabi'a'le šižinw cuen bene' ca' zjanaque' xi'in diaža che da' Israel. 29 Na' note'teze bene' ba gwlejičhje' liže', biše', zane', xaxne'e, xo'ole', xi'ine' o yežlio che', dan' chzenague' chia', Diosen' gwnežjue' le' da' zaca'ch da' xench ca' yogo' da' ca'. Na' lecze gata' yela' mban che' toli tocanē. 30 Perw zan bene' zjanaque' bene' žialao na'a, gwžin ža cate' yesaque' bene' bzebe. Na' bene' zjanaque' bene' bzebe na'a, gwžin ža cate' yesaque' bene' žialao.

## 20

*Jempl che bene' güen žin ca'*

1 Nach Jesúsen' gože' legaque': —Yela' gwnabia' che Diosen' ben' zoa yaban' zaca'leben ca' da' nga goc. To bene' nape' to yežlio gan' že'chgua yag uvas. Na' gwze'e ližen' to zil do cheni' gwyeje' gan' chac ya'a jatiljue' bene' güen žin cont yesone' žin yežlio čhen' žana'. 2 Na' gosexenlaže' bene' güen žin ca' to denario čhixue' to toe' con ca' chac mosen' tža žin. Nach gwsele' legaque' gan' jasene' žinna'. 3 Na' do cheda ga gozeje' gan' chac ya'an, na' ble'ede' nita'ch bene' bibi žin de yesone'. 4 Na' gože' legaque': “Lencze le'e le šja'ac gan' že' yag uvas čhian' le šjen žin na' čhixjwca' le'e ca' cheyala'.” Nach ja'ac bene' ca'. 5 Na' da' yoble gwyeje' do guagwbiž na' do cheda šone. Bezle'ede' nita'ch bene' bibi žin chesone' nach gwsele' legaque' cont yesone' žin gan' že' yag uvas čhen'. 6 Na' ca' do cheda gayo' šeže'le gozeje' da' yoble ble'eczde' nita'ch bene' bibi žin chesone'. Na' gože' legaque': “¿Bixčhen' bi gwyejle žin?” 7 Nach gose'ene': “Notno gwne' neto' šjento' xšine'.” Nach goze'e legaque': “Lencze le'e le šja'ac le šjen žin gan' že' yag uvas čhian'. Na' čhixjwca' le'e ca' cheyala'.” Nach ja'ac bene' ca'. 8 Na' cate' bžin hor bosa' xan yag uvasen' bene' güen žin ca', nach gože' mos blao čhen': “Beyax bene' güen žin ca' cont čhixjo'ne', solao čhixjo' bene' ca' besela'ac bzebe, na' yeyože' len bene' ca' besela'ac da' nechw.” 9 Nach mos blaon' zgua'tec gwdixjue' bene' ca' gosezolagüe' gosone' žin cheda gayo' šeže'le tgüeje' denario to toe'. 10 Na' cate' gwdixjue' bene' ca' gosezolagüe' gosone' žin šezildao', gosacde' čhixjoche' legaque' da' zča'och dan' gosezolagüe' gosone' žin šezildao'. Perw tozcze can' gwdixjue' yogo'lołte'. 11 Na' cate' beyož gozezi' laxjw bene' ca' gosezolao žinna' šezildao', gosadoe' diža' xan žinna'. 12 Gose'ene': “Do ža bžaglaochguato' lo da' zeye' bento' žin čhion'. Na' tozcze can' gwdixjo' neto' len bene' ca' besela' bzebe, len to hor güejgan' gosone' žin.” 13 Perw na' xan žinna' gože' toe': “Migw chia', bitwbi da' mal chona' len le'. ¿Gague gwxenlažo' to denario čhixjua' to tole? 14 Laxjon' ba gwxi'o, guac yeyejo'. Čaclaža' gwnežjua' bene' ca' to denario güeje' con can' beña' le'e la'czla' besela'aque' bzebe. 15 ¿Bixčhen' chxi'o neda' neche' dan' naca' bene' šagüe'? Naquen lo na' gona' con ca' čaclaža' len da' de čhia'.”

16 Nach Jesúsen' gože' bene' ca' bosozenag jemplen':

—Na' naquen, nita' bene' zjanaque' bene' bzebe na'a, perw lecze gwžin ža cate' legaque' yesaque' bene' žialao. Na' nita' bene' zjanaque' bene' žialao

na'a, perw gwžin ža yesaque' bene' bzebe. Diosen' chaxe' yogo'lo' bene' cont yesejle'e che', perw ba' guen' chosozenague' che', na' legacze' chbeje' cont chesaque' xi'ine'.

*Da' yoble chyixjue'e Jesúsen' gate'*

*(Mr. 10:32-34; Lc. 18:31-34)*

<sup>17</sup> Jesúsen' len yezan bene' zja'aque' Jerusalenna'. Na' šlac zjangüe'e nezen' gwlejiže' bene' šižinw ca' gwleje' cont zjanaque' txen len le' na' gože' legaue':

<sup>18</sup>—Na'a ba zejcho Jerusalenna' gan' yesone' neda' lo na' b'xoz gwnabia' ca' na' lo na' bene' ca' chososed chosolo'ede' dan' bzoj da' Moisés, na' yesechoglagüen' chia' yesote' neda', neda' naca' ben' gwsela' Dios golja' beňach. <sup>19</sup> Na' yesone'nda' lo na' bene' bi zjanaque' bene' Israel cont yesonle' chia', na' yesot yesejine' neda', na' yesote'nda' yosode'e neda' le'e yag cruz, perw yeyon ža yebana' ladjo bene' guat ca'.

*Xna' Jacobo na' Juanna' gwnabe' yesebe' xi'ine' ca' cuit Jesúsen' gan' nabi'ena'*

*(Mr. 10:35-45)*

<sup>20</sup> Na' ja'ac xi'in Zebedeo, Jacobo len Juan, na' len xna'gaue' lao Jesúsen'. Na' xna'gaquen' bzoa xibe' lao Jesúsen' gože'ne':

—Chnabda' le' to goclen.

<sup>21</sup> Nach Jesúsen' gože'ne':

—¿Bi goclen chaclažo' gona'?

Nach xna'gaquen' gože'ne':

—Chaclaža' gono' cont xi'ina' quinga yesebi'e šla'a güeje cuito'na' cate' žin ža nabi'o.

<sup>22</sup> Jesúsen' gože' Jacobo na' Juanna':

—Le'e cabi nezele bi dan' chnable. ¿Gwchejlaže'le tele yela' zi' yela' ya' ca dan' tia' neda' na' gac chele can' gac chia'?

Nach bosyoži'e xtižen' gose'ene':

—Gwchejlaže'to'.

<sup>23</sup> Nach Jesúsen' gože' legaue':

—Da' licze tele yela' zi' yela' ya' ca dan' tia' neda' na' gac chele can' gac chian', perw bi naquen lo na' nia' non' cue' cuitan' cate' žin ža nabi'a, san yesebe' bene' ba mbej Xa' Diosen' gaquen che'.

<sup>24</sup> Nach cate' yeši bene' ca' zjanaque' le' txen gosende' can' gosena bene' ca' chope, beseloque' legaue'. <sup>25</sup> Nach Jesúsen' goxe' yogüe' cont gosebigue' lagüen' na' gože' legaue':

—Nezeczle bene' gwnabia' che to to nación na' bene' blao ca' chesone' byen chosozenag bene' chegaue'. <sup>26</sup> Perw bi naquen ca' len le'e. San note'tezle chaclaže'le gacle bene' blao, cheyala' gwzejwlaže'le gaclen bene' lježle. <sup>27</sup> Na' še note'tezle chaclaže'le gacle bene' žialao, cheyala' gon cuinle ca xmos bene' lježle. <sup>28</sup> Ca'cze naquen len neda' naca' ben' gwsela' Diosen' golja' beňach. Gague za'a cont yesaclen bene' neda' san za'a cont gaclena' bene', na' chzanlaže' cuina' yesote' neda' neče xto'la' beňachen'.

*Jesúsen' bene' cont chope bene' lchol besyele'ede'*

*(Mr. 10:46-52; Lc. 18:35-43)*

<sup>29</sup> Nach cate' besyeya'aque' ciuda Jericó, bene' zan zjasenagüe' Jesúsen' len bene' ca' zjanaque' le' txen. <sup>30</sup> Na' chope bene' lchol zjachi' chanez gan'

zjayda Jesúsen'. Na' cate' gosache'ede' Jesúsen' zej gan' zjachi'ena' nach chososya'adie' gose'e le':

—Xanto', len' naco' xi'in diaža che da' rey Davin'. Beyaše'laže'sca neto'.

<sup>31</sup> Nach beṇe' ca' chesyede gan' zjachi'ena' gosedile' legaque' cont yesenite' šize. Perw na' gosene' zižjech gose'ene':

—iXanto', len' naco' xi'in diaža che da' rey Davin', beyaše'laže'sca neto'!

<sup>32</sup> Jesúsen' gwleze' gan' nite'na', nach goxe' legaque' gosebigue' lagüen'. Nach gože'ne':

—¿Bin' chaclaže'le gonda' le'e?

<sup>33</sup> Nach gose'ene':

—Xanto', chaclaže'to' yele'eto'.

<sup>34</sup> Jesúsen' beyaše'laže'de' legaque' na' gwdane' yejlaogaquen', nach la' besyele'etede', na' gosa'ogüe' le'.

## 21

*Gosonxene' Jesúsen' cate' beyo'e Jerusalén*

(Mr. 11:1-11; Lc. 19:28-40; Jn. 12:12-19)

<sup>1</sup> Na' cate' ba zoa yesežine' Jerusalénna' besežine' gan' chi' yež Betfagé, gan' zoa ya'a dan' nzi' Ya'a Olivos. Na' Jesúsen' gwsele' mandadw čhope beṇe' ca' zjanaque' le' txen, <sup>2</sup> gožgaque'ne':

—Le šja'ac yež dan' chi' gała'ze, na' cate' žinlen' na' yeželele to burr be no'ole da'ba' yag na' nche'te to xi'inda'oba'. Le sežgacba' na' le che'gacba' nga. <sup>3</sup> Na' še bi ye' beṇe' le'e na' ye'lne': “Xanto'na' chyažjde' legacba'.” Na' la' yedyesantecze'ba' len le'e.

<sup>4</sup> Goc yogo' da' qui cont goc can' bzoj to ben' bzoj Xtiža' Diosen' cani', gwne':

<sup>5</sup> Gož beṇe' ca' nita' Jerusalénna':

“Le na'šc, ba za' rey čhelen',

žie' cože' to burr dao', xi'in beyixe' be choa' yoa'.

Ze'e ca to beṇe' bi naque' beṇe' blao.

<sup>6</sup> Na' ja'ac beṇe' ca' yež dao' dan' gož Jesúsen' legaque' ca', na' gosone' can' ben' Jesúsen' mandadw. <sup>7</sup> Na' besyeče'e burroa' len xi'inba' lao Jesúsen' na' gosexoa no xagaque' cože'ban' na' gwžia Jesúsen' be daon' cont gwyeje' Jerusalénna'. <sup>8</sup> Na' beṇe' zan gosonxene' Jesúsen' goseyixjw no xagaque' lo nez cont blej burron' len na' yebale' gosečogue' xoze' yag na' goseyixjuen' lo neza'. <sup>9</sup> Na' beṇe' zjažialao na' lecze beṇe' za'ac cože' bososye'e gosene':

—iLeca beṇe' zaca' benga nac xi'in diaža che da' rey David! iMbalaz ben' za' nga gwseła' Xancho Diosen' le' cont nabi'e! iLeca beṇe' zaca' ben' zoa yaban'!

<sup>10</sup> Na' cate' bžin Jesúsen' Jerusalénna' yogo' beṇe' ca' že' ciudan' besyebande', na' gosene':

—¿No benga bla' nga?

<sup>11</sup> Na' beṇe' ca' nžag Jesúsen' bosyoži'e xtiža'gaque' gosene':

—Bengan' Jesús beṇe' za' yež Nazaret gan' mbane distritw Galilea na' cho'e xtiža' Dios.

*Jesúsen' bebeje' beṇe' ca' cheson ya'a yodao' blaon'*

(Mr. 11:15-19; Lc. 19:45-48; Jn. 2:13-22)

<sup>12</sup> Na' Jesúsen' gwyo'e chy'o yodao' blaon' na' bešaše' yogo' beṇe' ca' chesote' na' beṇe' chesa'o na'. Nach bchixe' xmes beṇe' ca' chosoša'

mechw, na' yag ga chesebe' bene' ca' chesote' ngolbex. <sup>13</sup> Na' gože' legaque':

—Nyojzce Xtiža' Diosen' žan: “Yesene' ližan' naquen to latje gan' yesol güiž bene' neda'”, perw le'e chonlen ca to latje ga že' bene' gwban.

<sup>14</sup> Na' bene' lchol ca' na' len bene' ca' nxiñj ni'e gosebigue' lao Jesúsén' šlac zoe' chyo'o yodaon'. Nach beyone' legaque'. <sup>15</sup> Perw na' bxož gwnabia' ca' na' bene' ca' chososed chosolo'e dan' bzoj da' Moisésén' leca beseže'e cate' besele'ede' yela' guac ca' dan' ben Jesúsén'. Na' lecze beseže'e cate' gosende' can' bososya'a bi' bixjw ca' chyo'o yodao' blaon', gosenabe': “Leca bene' zaca' benga nac xi'in diaža che da' rey David.” <sup>16</sup> Nach gose'e Jesúsén':

—¿Zendo' bin' gosena bidao' ca'?

Jesúsén' boži'en gože' legaque':

—Zenda'. ¿Biña' gwlable can' nyoj Xtiža' Diosen'?, žan:

Ba beno' cont bi' bixjw ca' na' len bi' ne' chesaže' chesonxembe' le'.

<sup>17</sup> Na' bechoje' gan' nita' bene' ca' na' beze'e ciudan'. Na' že'na' jayga'añe' Betania.

*Ben Jesúsén' cont gwbiž yag yixgüigw*

*(Mr. 11:12-14, 20-26)*

<sup>18</sup> Na' zil beteyo besyeya'aque' Betanian' jaseya'aque' Jerusalénna' da' yoble. Na' šlac zjangüe'e nezen' gwdon Jesúsén'. <sup>19</sup> Na' ble'ede' to yag yixgüigw zoan cho'a nezen' na' jañe'e še žia yaguen' yixgüigw. Perw bibi bželde', con xlaguen' na'ze žia. Nach gožen':

—Bich bi yixgüigon' cuio'.

Na' la' gwbižte yaguen'. <sup>20</sup> Nach bene' ca' zjanaque' le' txen besyebande' cate' besele'ede' can' goquen', nach gose'ene':

—¿Nac goquen' la' gwbižte yaguen'?

<sup>21</sup> Na' Jesúsén' gože' legaque':

—Da' li žia' le'e, še chejnilaže'le Diosen' na' bitw gacžejlaže'le, guaque gonle can' ba benan' cont gwbiž yaguen'. Na' lecze ca' guac ye'le ya'a nga: “Gwcuase nga na' jaso'a lo' nisdaon'”, na' gac can' nalen'. <sup>22</sup> Na' še chejnilaže'le Diosen', bite'teze dan' nabelene' cate' yol güižlene', gonczen' le'e.

*Yela' chnabia' che Jesúsén'*

*(Mr. 11:27-33; Lc. 20:1-8)*

<sup>23</sup> Nach Jesúsén' gozeje' yodao' blaon' da' yoble. Na' šlac chsed chlo'ede' bene' ca' že' na', bxož gwnabia' ca' na' bene' gole blao ca' chesenabi'e nación chechon' gosebigue' cuit Jesúsén'. Nach gosenabde' le':

—¿Bi yela' gwnabia' napo' chono' da' qui? ¿No ben yela' gwnabian' cont chono' da' qui?

<sup>24</sup> Nach Jesúsén' boži'e xtiža'gaquen', gwne':

—Lecze de to da' nabda' le'e. Še yoži'ile xtižan' nach ni'a le'e bi yela' gwnabia' chonlendán'. <sup>25</sup> Le našč neda': ¿non' gwseła' da' Juanna' bzoe' bene' nis? ¿Dios nan' gwsele'ne', še benachen'?

Nach legacze' gose' lježe':

—Še ye'chone' Dios gwseła' le', na' ye'e chio': “¿Bixchen' ca gwyejle'le che'?” <sup>26</sup> Na' bi gac ye'chone' benach gwseła' le', le yogo'te bene' že' nga chesejle'e Diosen' gwsele' da' Juanna' be'e xtiže'na', na' xož bi yesonde' chio'.

<sup>27</sup> Nach gose'e Jesúsén':

—Bi nezeto'.

Nach gože' legaque':

—Lecze neda' bi yapa' le'e bi yela' gwnabian' chonlenda' da' ca'.

*Jempl che chope xi'in bene'*

<sup>28</sup> Na' Jesúsen' gože' legaque':

—Le gon xbab bi zeje jempl nga: Gwzoa to bene' gwnita' chope xi'ine'. Na' gože' tobe': "Xi'ina', chaclaža' šejo' güen žin na'aža gan' že' yag uvas chia' ca'." <sup>29</sup> Nach xi'inen' gožbe' le': "Bitw ša'a." Perw gwdele beyombe' xbab nach gwyejbe'. <sup>30</sup> Nach gozeje' gan' zoa xi'inen' yeto, na' ježe'be' can' gože' bi' biše'ben'. Na' la' gožte bin' le': "Guaccze, na' ša'a." Perw bitw gwyejbe'. <sup>31</sup> Gwnašč neda', čno bi' ca' chope ben can' gwnalaže' xabe'?

Nach gose'ene':

—Bi' nechoa'.

Nach Jesúsen' gože' legaque':

—Ca'cze naquen. Na' da' li žia' le'e, bene' güechixjw ca' na' no'ole ca' chja'aclen note'teze bene' byo yobech yosozenague' che Diosen' cont nabi'e yichjlažda'ogaque' clcl ca le'e. <sup>32</sup> Ca nac Juanna' ben' bzoe' bene' nis, bide' laolen' na' gwduxjue'ede' le'e naquen' cheyala' gonle cont yebe Diosen' le'e. Perw bitw gwyejle'le che'. Na' bene' güechixjw ca' na' no'ole zle' ca' gosejle'e che'. Na' cate' gocbe'ele bene' ca' ba gosejle'e che', bitw betinjele xtolala' le ca' cont šejle'le che dan' bsede da' Juanna'.

*Jempl che mos mal ca'*

(Mr. 12:1-12: Lc. 20:9-19)

<sup>33</sup> Le gwzenag yeto jempl nga. Gwzoa to bene' na' goze' to cue' xen yag uvas lo yežlio che' na' gwlo'en le'ej. Na' na'teze bene' to ga yesesie' uvasen' cont choj xisen'. Na' lecze bene' to da' sibe ca to campanaryw ga yesecua' bene' yosogüia yesene'e yag ca'.

'Na' bcua'ane' yežlion' lo na' bene' yesonši'e yag uvasen' na' gwze'e gwyeje' zito'. <sup>34</sup> Cate' bžin ža nosyotobe' cosešen', gwsele' to chope xmosen' gan' že' bene' ca' nac lo na'gaque' yag uvasen' cont šjasyexi'e to tlaw cosešen' dan' cheyala' si'e. <sup>35</sup> Perw na' bene' ca' nac lo na'gaque' yag uvasen' gosezene' mos che' ca'. Goseyine' toe', na' yetoe' bosozie'ne' yej, nach yetoe' gosote'ne'. <sup>36</sup> Nach gossela' xan yag uvasen' mos zanch clcl ca bene' ca' gwsele' da' nechw, perw lecze can' gosonde' bene' nechw ca', lecze ca' gosonde' legaque'.

<sup>37</sup> Nach gwdena' xan yežlion' gwsele' cuincze xi'inen', gocde' yesezi'e xtižen'. <sup>38</sup> Perw na' bene' ca' nac lo na'gaque' yag uvasen' cate' besele'ede' xi'ine'na', nach gose' lježe': "Bengan' yega'anlene' yežlio nga cate' gat xen'. Le šo'o gotchone' cont yega'anlenchon." <sup>39</sup> Nach gosezene'ne', besyebeje'ne' gan' že' yag ca' na' gosote'ne'.

<sup>40</sup> Beyož be' Jesúsen' jempl nga, gozne':

—čNacxe chaquele gon xan yežlion' len bene' ca' bocua'anlene' yag uvas chen' cate' yežin cuine'?

<sup>41</sup> Nach bosyoži'e xtižen' gosene':

—Šeje' šjetoe' bene' mal ca', na' yodie' yežlion' lo na' bene' yoble bene' yeson güen yosyonežjue'ne' to tlaw cosešen' cate' žin ža yosyotoben'.

<sup>42</sup> Jesúsen' gože' legaque':

—Ca'czen'. čBiņa' gwlable ga nyoj Xtiža' Diosen', žan quinga?: Yej dan' bi gosaclaže' bene' güen yo'o ca' yosochine',

len ba naquen yej squin.

Da' nga ben Xancho Diosen',  
na' naquen to da' yežejecho.

<sup>43</sup> Da' nan' žia' le'e, da' bi chzenagle che Diosen', cuejyichje' le'e na' cueje' bene' yoble bene' yosozenag che' cont nabi'e yichjlažda'ogaque'. <sup>44</sup> Na' ca nac yejen', note'teze bene' lažo' lo yeja' na' cue'žošje', na' note'teze bene' chiže' yeja' cate' lažon' na' gwšošjen le'.

<sup>45</sup> Na' b̄xoz gwnabia' ca' na' bene' fariseo ca', cate' gosende' jempl ca' dan' be' Jesúsen', gosache'ede' be'e diža' che legaque' dan' bi chesejnilaže' le'. <sup>46</sup> Nach gosaclaže' yesezene' le', perw besežebe' bi yesone bene' ca' nžague' legaque', le yogüe' gosejle'e gwseła' Diosen' Jesúsen' cont cho'e xtiže'na'.

## 22

*Jempl che ben' bene' l̄ni cate' bšagna' xi'ine'*

<sup>1</sup> Na' da' yoble bsd blo'e Jesúsen' bene' ca' len jempl, gozne':

<sup>2</sup>—Yeła' gwnabia' che Diosen' zaca'leben ca da' nga goc. Gwzoa to bene' gwnabia' na' bene' gastw cate' bšagna' xi'ine'. <sup>3</sup> Na' cate' bžin hor solao l̄nin' gwsele' xmore' ca' cont jasexi'e bene' ca' ba bol güiže' šja'ac l̄nina', perw notno goclaže' šja'ac l̄ni čen'. <sup>4</sup> Nach gože' yeto xonj xmore' ca': “Le šjež bene' ca' ba bol güižan' ye'ln'e' ba bsini'a dan' gagwchona'. Ba betua' be dao' be chesane' na' ba bsini'a dan' gagwcho lo l̄nin'. Na' ye'ln'e' yeside' gagwcho dan' ba bsini'an'.” <sup>5</sup> Perw bene' ca' ba gosata'yoede' cont šja'aque', bitw gosone' cuent dan' gose' mos ca' legaque'. Toe' gwyeje' jane'e yežlio che', na' yetoe' gwyeje' jene' negosyw. <sup>6</sup> Na' yebałe' gosenize' mos ca' gwseła' bene' gwnabian' na' gosonde' legaque' zi' na' gosote' legaque'. <sup>7</sup> Na' leca bža'a bene' gwnabian'. Na' gwsele' soldadw che' ca' jasete' bene' ca' gosot xmosen' na' bosozeye' lažgaquen'. <sup>8</sup> Nach bene' gwnabian' gože' xmosen': “Ba bsini'a dan' gagwcho lo l̄nin', perw bene' ca' ba bol güiža' nacbia' bitw zjazaque' yeside'. <sup>9</sup> Le šja'ac le šjata yogo' nez na' ye'le yogo' bene' yežagle yeside' l̄nin'.” <sup>10</sup> Na' mos ca' ja'aque' yogo' nez na' jasetobe' con yogo' bene' besežague', no bene' naque' bene' güen na' no bene' naque' bene' mal, cont beža' yo'o gan' chac l̄nin'.

<sup>11</sup> Perw cate' gwyo'o bene' gwnabian' jane'e bene' ca' že'na' na' ble'ede' to bene' bi nyaze' lache' da' bnežjue' yesaze' lo l̄nin'. <sup>12</sup> Nach gože' le': “Migw čhia', žnac goquen' gwyo'o nga bitw nyazo' lache' dan' beña' čhazo'?” Nach bena' bitw beželde' bi ye'ene'. <sup>13</sup> Nach bene' gwnabian' bene' mandadw yosočej xmore' ca' ni'a na' bena' cont yesyebeje'ne' na' yesebeque'ne' gan' nac chol, ga cuežyaše' na' gan' gagwxejte laye' tantw žaglagüe'. <sup>14</sup> Can' naquen, Diosen' chaxe' yogo' bene' cont yesejle'e che', perw bał guen' chosozenague' che' na' legacze' chbeje' cont yesaque' xi'ine'.

*Ca nac dan' cheyała' gaxjw*

*(Mr. 12:13-17; Lc. 20:20-26)*

<sup>15</sup> Nach bene' fariseo ca' besežague' na' bosoxi'e naclen' yesone' cont yesebeje' Jesúsen' diža' da' yosode'ede' cont yesagüe' xya che'. <sup>16</sup> Na' bene' fariseo ca' gosesele' bał bene' zjanaque' txen len legaque' na' yebał bene' chesone' txen len Herodesen' cont jaseže' Jesúsen':

—Maestrw, nezeto' chazaze' cho'o diža' li. Na' nezeto' diža' li cho'o chsed chlo'edo' bene' can' chazlaže' Diosen' goncho. Na' bi chono' cuent bi ža



bene', le toz can' chono' len note'teze bene'. <sup>17</sup> Da'n'an' zedenabeto' le' cont nao' neto' can' chacdo' cheyala' gonto'. ¿Naquen binlo no chixjw da' cheyala' chixjwcho lao ben' nac la'zelagüe bene' gwnabia' ben' chi' Roma, še bi?

<sup>18</sup> Jesúsen' gocbe'ede' yela' xi'a chegaquen', nach gože' legaque':

—iNacle bene' gwxiye'! ¿Bixchen' chaclaže'le yoslažo'le neda' len xtižan'?

<sup>19</sup> Le gwlo'e neda' to mechw dan' chyixjwle che gobiernen'.

Nach goso'ene' to mechw dan' nzi' denario. <sup>20</sup> Nach Jesúsen' gože' legaque':

—¿No lao dan' da' le'e mechw nga? na' ¿no la da' nyoj le'en ni?

<sup>21</sup> Nach gose'ene':

—Che César ben' nac la'zelagüe bene' gwnabia' ben' chi' ciuda Roman'.

Nach Jesúsen' gože' legaque':

—Le gwnežjo bene' gwnabian' da' nac che bene' gwnabia', na' le gwnežjo Dios da' nac che Dios.

<sup>22</sup> Nach cate' gosende' xtiža' Jesúsen' besyebande'. Nach besyeya'aque' gan' zoe'na'.

*Cate' yesyeban bene' guat ca'*

(Mr. 12:18-27; Lc. 20:27-40)

<sup>23</sup> Na' lo ža na'teze besežin bal bene' saduceo gan' zoa Jesúsen'. Bene' ca' chesene' bene' guaten' bi yesyebane'. Nach gosenabde' le', gose'ene':

<sup>24</sup> —Maestrw, da' Moisésen' gwne': “Še to bene' byo nšagne'e na' gate' sin nono xi'ine' zoa, bene' biše' ben' ba goten' cheyala' yošagna'lene' no'ol güezeba' cont yesenita' xi'in diaža che da' bišen'. <sup>25</sup> Na' len neto' gosenita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'. Na' bene' gwchopen' bošagna'lene' no'ol güezeba'. <sup>26</sup> Na' lecze gote' nono xi'ine' gwnita'. Lecze ca' goc len bene' gwyona', bžinten bene' gaža' yogo'lole' gosac che' ca'. <sup>27</sup> Na' gwde gosat yogo'lol bene' ca', nach got len no'ola'. <sup>28</sup> Na' cate' yesyebane' ladjo bene' guat ca', ¿nox bene' ca' soalene' no'ola' ca' xo'ole'?, le yoguen' bosyošagna'lene' le'.

<sup>29</sup> Na' gož Jesúsen' legaque':

—Celen' chonle xbab dan' žale ca', le bi nezele can' ža Xtiža' Dios dan' nyojen, neca nombia'le yela' guac chen'. <sup>30</sup> Caten' yesyeban bene' guat ca', bich yosošagne'e, neca yosonežjo xi'ine' no'ol gwšagne'e, le yesaque' ca' angl bene' zjzooa yaba. <sup>31</sup> Na' ca' nac dan' yesyeban bene' guat ca', ¿bina' gwlable da' nga can' nyoj Xtiža' Diosen'? žan: <sup>32</sup> “Neda' naca' Dios ben' chonxen Abraham, ben' chonxen Isaac na' ben' chonxen Jacob”. Bene' guat ca' bi chesonxene' Diosen', san bene' zjamban.

<sup>33</sup> Na' bene' ca' zjanžaguen' besyebande' cate' gosende' diža' dan' bsd blo'ede' legaque'.

*Dan' nac da' blaoch dan' ža Diosen' cheyala' goncho*

(Mr. 12:28-34)

<sup>34</sup> Na' cate' gosene bene' fariseo ca' can' bzoaži Jesúsen' bene' saduceo ca', nach besedobe' jasa'aque' lagüen'. <sup>35</sup> Na' to ben' nsedchgüe' ley dan' bzoj da' Moisés lecze goclaže' cueje' Jesúsen' diža' da' gwchine' contr le', gože'ne':

<sup>36</sup> —Maestrw, lo ley che Diosen', ¿non' nacch da' žialao da' zjanyojen da' ža Diosen' cheyala' goncho?

<sup>37</sup> Nach gož Jesúsen' le':

—“Cheyała' gaquecho Xancho Diosen' con ca zelao chejni'icho do yichj do laže'cho.” <sup>38</sup> Len̄na' naquen da' žialaoch na' da' blaoch lagüe da' ca' ža Diosen' cheyała' goncho. <sup>39</sup> Na' da' gwchopen' zejgalan' ca', žan: “Cheyała' gaque lježcho ca' chaque cuincho.” <sup>40</sup> Čhope da' ca' ža Diosen' cheyała' goncho chejni'in chio' can' zeje doxen dan' bzoj da' Moisésen' na' dan' bosozoj bene' ca' goso'e xtiža' Diosen' cani'.

*Criston' naque' xi'in diaža che da' rey David*

*(Mr. 12:35-37; Lc. 20:41-44)*

<sup>41</sup> Na' šlac ne' zjanžag bene' fariseo ca', <sup>42</sup> Jesúsen' gože' legaque':  
—¿Bixe xbab chonle che Criston' ben' gwlej Diosen' cont yedenabi'e? ¿No xi'in diaža che naque'?

Na' gose'ene':

—Xi'in diaža che da' rey Davin'.

<sup>43</sup> Nach Jesúsen' gože' legaque':

—Še ca' naquen, ¿bixčen' cate' da' David bzoje' can' blo'e Spiritw che Diosen' le', gwne' Criston' naque' Xane'? Quinga bzoje':

<sup>44</sup> Xancho Dios gože' Xanan':

“Gwche'edo' cuita' nga n̄abia'cho txen, na' gona' cont yogo' no chesegue'e le' yosozexjw yichje' yosozenague' chio'.”

<sup>45</sup> ¿Nacxe gac n̄acho Criston' xi'in diaža che da' rey David? le' cuin Davin' gože' le': “Xana”.

<sup>46</sup> Na' notoch no goc yosyoži'e xtižen'. Na' gwzolao žana' notoch no besyeyaxje bi yesenabde' Jesúsen'.

## 23

*Xtola' bene' fariseo ca' na' bene' ca' chososed chosolo'e leyna'*

*(Mr. 12:38-40; Lc. 11:37-54; 20:45-47)*

<sup>1</sup> Nach Jesúsen' gwzolao be'e diža' len bene' ca' zjanaque' le' txen na' len bene' ca' zjanžague' gan' zoe'na', gwne':

<sup>2</sup> —Bene' ca' chososed chosolo'e ley na' bene' fariseo ca' ba zjanlane' xlatje da' Moisésen' cont chosozejni'ide' bene' ley che Diosen'. <sup>3</sup> Na' da'n̄an' cheyała' gwzenagle čhegaque' cate' chosozende' le'e can' ža leyna', na' cheyała' gonle can' chosozejni'ide' le'e. Perw bitw gonle can' cheson' legaque', le' legaque' bitw chesone' dan' chesene' cheyała' gac. <sup>4</sup> Legaque' chosozanche' dan' ža leyna'. Chesonen' ca' to yoa' da' nono soe' gua' na' chesaclaže' gua' bene' yoble len na' bitw chesaclaže' yeso'en' legaque'. <sup>5</sup> Ca' nac bene' ca', yogo' dan' chesonen', chesonen' ga yesele'e bene' can' chesonen' contze yesonxene' legaque'. Chio' bene' Israel n̄chejcho caj dao' de yid do na'cho na' do loxgacho na' lo' caj dao'na' chgo'ošagüe'cho to pedas yiš gan' nyoj late' güeje Xtiža' Diosen'. Perw ca' nac bene' ca' chososed chosolo'e ley che Diosen' na' bene' fariseo ca', zjanonche' caj dao' čhegaque' da' xench ca' yezica'chle bene'. Na' lecze chesone' lox xagaque' da' toñech cl̄el ca' che bene' yezica'chle. <sup>6</sup> Chesyebede' chesebi'e gan' chesebe' bene' blaoc cate' chja'aque' gan' chac no l̄ni na' cate' chja'aque' yodao' čhegaque'. <sup>7</sup> Chesyebede' chesap bene' legaque' bala'an̄ cate' chesyežague' lagüe ya'a. Na' chesyebede' yese' bene' legaque' maestrw.

<sup>8</sup> Perw žia' le'e, bi gonle byen ye' bene' le'e maestrw, le' toz neda' Cristo naca' Maestrw chele. Na' yogo' le'e chejnilaže'le neda' nac biše' lježle tole

yetole. <sup>9</sup> Na' lecze bitw gonxenle note'teze bene' blao ye'lnē: "Xato". Toze Diosen' ben' zoa yaba naque' Xacho. <sup>10</sup> Na' bitw güe'le latje ye' bene' le'e: "Xana", le toz neda' Cristo naca' Xanle. <sup>11</sup> Še no le'e nacle bene' blaoch, cheyala' gwzexjw yichjle gaclen lježle. <sup>12</sup> Le note'teze bene' chonxen cuine', Diosen' gone' cont si'e zto' lagüen'. Na' note'teze bene' chzexjwlaže' lagüen', Diosen' gone' cont gacxene'.

<sup>13</sup> 'iNyaše'chguaze gac che le'e chsed chlo'ele ley dan' bzoj da' Moisésen' na' le'e bene' fariseo! Chziye'le bene' cont bi yosozenague' che Diosen', le bi chaclaže'le nabia' Diosen' yichjlažda'ogaque', na' lecze le'e bi chzenagle che Diosen' cont nabi'e yichjlažda'olen'.

<sup>14</sup> 'iNyaše'chguaze gac che le'e chsed chlo'ele ley dan' bzoj da' Moisésen' na' le'e bene' fariseo! Chziye'le no no'ole güezebe cont checa'ale yo'o chegaque'. Na' cate' choj güižle Diosen', šša choe'le diža' cont yesaque bene' leca chonxenle'. Gacchle castigw clev ca yezica'chle bene' güen da' xinj.

<sup>15</sup> 'iNyaše'chguaze gac che le'e chsed chlo'ele ley dan' bzoj da' Moisésen' na' le'e bene' fariseo! iNacle bene' gwxiye! Chejtez chejle chjatiljwle bene' zito' bene' yeson txen len dan' chsed chlo'elen'. Na' cate' chželelene' chzejni'ilne' cont yesaque' bene' xi'ach clev ca le'e.

<sup>16</sup> 'iNyaše'chguaze gac che le'e! iNacle ca bene' lchoj bene' chesacde' guac yesegüe'e nez bene' yoble! Žale note'teze bene' še ne': "Yodao' blaon' zoan testigw chia' gona' can' ba gwnia", bitwbi zejen dan' chnen'. Perw še že': "Oro dan' de lo' yodaon' zoan testigw chia' gona' can' ba gwnia", nach cheyala' gone' can' gwnen'. <sup>17</sup> iLe'e nacle ca to bene' lchoj na' bitw chejni'ile! Oron' bitec bi zacan'. Yodao'na' gan' yo'o oron' lenna' zaca'chen, le dan' yo'o oron' lo'ennan', da'nan' oron' naquen che Dios. <sup>18</sup> Na' lecze žale še to bene' že': "Mes gan' chosozeye' beyixe' ca chesonxene' Diosen', zoan testigw chia' gona' can' ba gwnia", bitwbi zejen xtižen'. Perw na' še že': "Dan' xoa lo' mes lo' yodaon' zoan testigw chia' gona' can' ba gwnia", nachen' cheyala' gone' can' gwnen'. <sup>19</sup> iLe'e nacle ca bene' lchoj na' bitw chejni'ile! Dan' chosozeye' chesonxene' Diosen' bitec bi zacan'. Mes gan' chesexoe' dan' chosonežjue' Diosen', lenna' zaca'chen, le naquen che Dios. <sup>20</sup> Še bene' že': "Mes dan' zoa lo' yodaon' zoan testigw chia' gona' can' ba gwnia", lencze dan' xoa lo' mesen' zoan testigw che'. <sup>21</sup> Na' še bene' že': "Yodaon' zoan testigw chia' gona' can' ba gwnia", lecze zejen Diosen' naque' testigw che', le yodaon' naquen che Dios na' nan' zoe'. <sup>22</sup> Na' še bene' že': "Yaban' zoan testigw chia' gona' can' ba gwnian", zejen Diosen' naque' testigw che', le nan' zoa Diosen' chnabi'e.

<sup>23</sup> 'iNyaše'chguaze gac che le'e chsed chlo'ele ley dan' bzoj da' Moisésen' na' le'e bene' fariseo! iNacle bene' gwxiye! La'czla' chnežjwle Diosen' to part lao ši part che yixegüe, che oreg, che comin, na' che bichle cuan chele, bibi zejen dan' bitw chzenagle che da' ca' zjanac da' žialaoch dan' ža leyna'. Leyna' žan cheyala' gonle da' nac güen lao Diosen', na' cheyala' yeyaše'laže' ljež benachle na' cheyala' gonle can' ba gwlo'o cho'ale gonle. Da' ca' zjanaquen da' zejehen gonle, perw lecze bitw cheyala' cuejyichjle bi gwnežjwle da' ca' chnežjwle Diosen'. <sup>24</sup> iNacle ca to bene' lchoj bene' chesacde' guac yesegüe'e nez bene' yoble! Zaca'lebele ca to bene' chebej yog'o' beb dao' riz da' nchixe da' che'eje' perw bitw chache'ede' še yo'o to

da' xen juisyw da' zaca' yebeje'. Le chi' yichjle che da' ca' bitec bi zaca' da' za ley chechon' cheyala' goncho, na' bi chonle da' ca' zjazaca'chguan.

<sup>25</sup> 'iNyaše' chguaze gac che le'e chsed chlo'ele ley dan' bzoj da' Moisés na' le'e bene' fariseo! iNacle bene' gwxiye'! Zaca'leble ca ye'en dan' chchin bene' na' chyibe' cožen' perw bi chyibe' lo'en. Chonle cont chesaque bene' nacle bene' güen, perw leca chzelaže'le bi da' de che bene' na' chbechgüele chca'alén. <sup>26</sup> iLe'e bene' fariseo, nchol' yichjlažda'olen'! Le yetinje xtoła'le cont da' licze gacle bene' güen can' chaclaže'le yeson bene' xbab nacle. Nach gacle ca to ye'en dan' nyibe' cožen' na' lo'en.

<sup>27</sup> 'iNyaše' chguaze gac che le'e chsed chlo'ele ley dan' bzoj da' Moisés na' le'e bene' fariseo! iNacle bene' gwxiye'! Zaca'leble ca to ba dan' zjanone' xdanchgua lagüen perw lo'en že' žit che bene' guat na' chi'chgua da' zban. <sup>28</sup> Chonle cont chesaque bene' nacle bene' güen, perw len yichjlažda'olen' nacle bene' gwxiye' na' bene' malchgua.

<sup>29</sup> 'iNyaše' chguaze gac che le'e chsed chlo'ele ley da' bzoj da' Moisés na' le'e bene' fariseo! iNacle bene' gwxiye'! Chonšagüe'le cho'a ba che da' bene' goso'e xtiža' Diosen' cani', na' chonšagüe'le cho'a ba che yezica'chle bene' goson da' güen. <sup>30</sup> Na' žale: "Šaca' chio' ba zoacho ca tiemp che da' xoxzta'ocho ca', bitw bencho txen len legaque' cate' gosote' bene' ca' goso'e xtiža' Diosen' cani'." <sup>31</sup> Perw na' yogo'lolte dan' chonle chlo'en tozce can' nacle len da' xoxzta'ole ca' bene' gosot da' bene' ca' goso'e xtiža' Diosen' cani'. <sup>32</sup> Le gwza'laošaze le gon bica'ch da' zgot dan' bitw gola' yeson da' xoxzta'ole ca'.

<sup>33</sup> 'Le'e nachguale bene' zgot na' bene' gwxiye'. Bitw gac yelale lao castigw dan' gon Diosen' le'e, le sele' le'e lo yi' gabilen'. <sup>34</sup> Na' da' gona', neda' sela' no bene' yeso'e xtiža'na' len le'e na' no bene' sina' na' nochle bene' yososedde' le'e xtižan'. Na' gotle bale' gwda'gaclene' to le'e yag cruz, na' yebale' chinle do lo' yodao' chelen', na' yebale' gwlaglene' gate'teze yež šja'aque'. <sup>35</sup> Na' dan' gonle ca' gaple doła' che yela' got che yogo' bene' ca' goson da' güen, ben' gosot da' xoxzta'ole ca' gwzolaozen len da' Abel ben' naque' bene' güen lao Diosen' na' beyožen len da' Zacarías xi'in da' Berequías. Zacaríasen' gosote'ne' do gan' zoa yodao' blaon' na' do gan' ze mes gan' chosozeye' beyixe' chesonxene' Diosen'. <sup>36</sup> Na' da' li žia' le'e, le'e mbanle na'a si'le castigw che yela' got che yogo' bene' ca' gosot da' xoxzta'ole ca'.

*Begüine' Jesúsén che xtoła' bene' Jerusalén*  
(Lc. 13:34-35)

<sup>37</sup> 'Le'e bene' Jerusalén, chotle bene' ca' chsela' Diosen' cont chesoe'lene' le'e xtižen' chchellene' yej. Zan ni'a ba goclaža' yotoba' le'e ca to jed xcaca' ben' nche' xi'in na' chyežba' legacba', perw bitw goclaže'le. <sup>38</sup> Na' na'a ba gwlejiyichj Diosen' le'e. <sup>39</sup> Na' žia' le'e, bich le'ele neda' na'a, perw cate'ch žin ža le'ele neda' yeto nach nale: "Mbalaz ben' za' nga nselá' Xancho Diosen' le' nabi'e".

## 24

*Gwžin ža yosyočinje' yodao' blaon'*  
(Mr. 13:1-2; Lc. 21:5-6)

<sup>1</sup> Na' ba cheza' Jesúsén' yodao' blaon' šeje' ga yoble cate' bene' ca' zjanaque' le' txen gosebigue' gan' zoe'na' na' gosezolagüe' goso'e diža'

catec xdan nac yodaon' na' lecze ca' yo'o ca' zjanyechjen. <sup>2</sup> Nach Jesúsen' boži'e xtiža'gaque' gwne':

—Ca nac yogo' da' quinga chle'ele, da' li žia' le'e, ne to yej da' zjancua' nga ca yega'an zjancua' cože' lježen. Yogon' yosyočinje'.

*Dan' gac cate' ba za' bagwze yeyož yežlio nga*

*(Mr. 13:3-23; Lc. 21:7-24; 17:22-24)*

<sup>3</sup> Na' ja'aque' Ya'a Olivos. Na' cate' Jesúsen' ba chi'e lo ya'an, bene' ca' zjanaque' le' txen gosebigue' lagüen' gose'ene' šižize:

—Che'neto' nao' neto' batcan' gac da' ca'. Na' žnac gac nezeto' cate' ba zoa bagwze yido' na' ba zoa yeyož yežlion'?

<sup>4</sup> Nach Jesúsen' boži'e xtiža'gaquen' gwne':

—Le gwsaca' cont notno siye' le'e. <sup>5</sup> Le zan bene' yesaš yežlio nga bene' yesaclaže' yosolane' xlatja' nga. Na' yesene': “Nedan' Cristo ben' gwlej Diosen' cont nabi'e.” Na' yeseziye'e bene' zan. <sup>6</sup> Na' yenele chac gwdile nile nale, na' yenele guac gwdile, perw bi žeble, le can' cheyała' gac. Perw gague lenna' nacho ba bžin ža yeyož yežlion'. <sup>7</sup> Le yesedil to yež len yeto yež yoble na' to naciön len yeto naciön yoble. Na' cue' yižgüe', na' gata' gwbin na' zan cuen ga xo'chgua lo yežlion'. <sup>8</sup> Perw na' yogo' da' qui gac cate' za' solao gata' yela' zi'.

<sup>9</sup> 'Nach bene' ca' že' yogo' naciön yesegue'ede' le'e dan' chejnilaže'le neda' na' yesone' le'e lo na' bene' ca' chesegue'e le'e na' yososaca'zi'e le'e nach yesote' le'e. <sup>10</sup> Cana' bene' zan bene' ba chesejnilaže' neda' yesebejyichje' bich yesejnilaže' neda'. Na' legacteze' yesechje' yeson lježgaque' lo na' bene' da' chesegue'ede' legaque'. <sup>11</sup> Na' bene' zan yesonlaže' yesene' xtiža' Diosen' cheseyixjue'ede' na' yeseziye'e bene' zan. <sup>12</sup> Na' lagüe dan' šanch bene' ca' yeson da' malen', bene' zan juisyw bene' ba chesejnilaže' neda' bich yesacde' lježe'. <sup>13</sup> Perw na' note'tezle gwyo gwčhejlaže'le cont bi cuejyichje' dan' chejnilaže'le neda' žinten gatle, nach šjayzoale len Diosen'. <sup>14</sup> Na' šja'ac bene' doxen lo yežlion' yeseyixjue'ede' diža' güen cont yeseneze benachen' cheyała' yosozenague' che Diosen' nach nabi'e yichjlažda'ogaque'. Na' cate' bene' že' yogo' naciön ba zjanезде' da'na', cana'ch yeyož yežlion'.

<sup>15-16</sup> 'Da' Daniel ben' gwdixjue'ede' xtiža' Dios cani' bzoje' che da' zbanchgua da' gwxinjen latje gan' chonxenko Diosen'. Na' cate' le'e le'ele ba zoa dan' gan' zoa yodao' blao, cana' bene' yesenita' distritw Judea cheyała' yosoxonje' šja'aque' do ya'adao'. (Bene' gwlaben' cheyała' šejni'iden'.) <sup>17</sup> Na' bene' chda do yichjo'o che ližen', bi yeyetje' yotobe' xšinlaze' že' ližen', con yoxonje'. <sup>18</sup> Na' bene' chda yixe' bi yeyejliže' šjayxi'e xalane'. <sup>19</sup> iNyaše'chguaze zjanac no'ol ca' zjanao' xi'in na' no'ol ca' ne' chosoguaže' bidao' lo ža ca'! <sup>20</sup> Na' le nab lao Dios bi yažjen gwxonje' cate' chac zag o lo ža che Dios. <sup>21</sup> Le yesaquen ža da' leca yesale' bene'. Cate' gwxete yežlion' na' ža na'aža nono na' gale' ca', neca žinlažen' yesale'de' ca' da' yoble. <sup>22</sup> Na' šaca' Xancho Diosen' bi yozaše' žan' yesac ca', notno yela, perw yozašen' neche chacde' bene' ca' chesejnilaže' le', bene' ba gwleje' zjanaque' xi'ine'.

<sup>23</sup> 'Cana' še no ye' le'e: “Le na'šc, nga zoa Criston' ben' gwlej Diosen' cont nabi'e”, o “Le na'šc, na' zoe”, ne ca'cze bi šejle'le. <sup>24</sup> Yesaš bene' gwxiye' bene' yesaclaže' yosolane' xlatja' nga, na' yeson cuine' ca' bene' chesoe' xtiža' Dios. Na' yesone' yela' guac da' yesele'e bene' na' bichle

da' zaca' yesyebande' cont yeseziye'e legaque'. Na' len bene' ca' ba gwlej Diosen' zjanaque' xi'ine' yesaclaže' bene' gwxiye' ca' yeseziye'e šaca' gac yeseziye'e legaque'. <sup>25</sup> Ba nezele can' gac, le ba gwduxjue'eda' le'e yogo' can' gac. <sup>26</sup> Na' še yese'e le'e: "Zoa Criston' latje dašen'", bitw gwzenagle čhegaque', bitw šejle. Na' še yese'e le'e: "Zoa Criston' lo' yo'ona'", bitw šejle'le čhegaque'. <sup>27</sup> Can' chac cate' chep yes chšenin' doxen le'e yaban' zejzenez, lecze can' gac cate' žin ža yida' da' yoble, Diosen' gwsele' neda' golja' beñač. Yida' zejzenez na' yogo'lol bene' yesele'ede' neda'. <sup>28</sup> Nga chonen che ben' že': "Gan' de be guat nan' chesežag šod ca'."

*Can' gac caten' yid Jesucriston' da' yoble*  
(Mr. 13:24-37; Lc. 21:25-33; 17:26-30, 34-36)

<sup>29</sup> 'Na' cate' la' yeyošte saca'zi' beñačen', gwbižen' yeyaquen čhol, na' bion' bich gwšenin'. Nach beljw ca' yeselažon' le'e yaban', na' yogo' da' chle'echo le'e yaban' yesaquen ca' chac yežlion' cate' chxo'. <sup>30</sup> Na' cana'ch bene' že' yežlion' yesele'ede' neda' naca' ben' gwseła' Diosen' golja' beñač za'a ladjo bejon' len yela' guac xen na' yela' bene' zaca' juisyw čhia'. Na' bene' že' yogo' naciön che yežlion' yesebežyaše', bene' bi gosejnilaže' neda'. <sup>31</sup> Na' caten' yida', to trompeta' cuežen zižje, na' sela' angl čhia' ca' doxen yežlion' yosyotobe' bene' ca' ba gwleja' cont zjanaque' neda' txen gate'teze nite' doxen lo' yežlio ga zelao nac zito'.

<sup>32</sup> 'Le gwzenag che jempl nga che yag yixgüigw: Cate' ba chzolao chebešjw yaguen' na' chelan' laga' che'en dao', chacbe'ele bač zoa yela' tiemp yejon'. <sup>33</sup> Na' lecze cate' le'ele ba chac da' mal ca' ba gwnian', cana'ch nezele ba za' juisyw, ba zoa gala'. <sup>34</sup> Da' li žia' le'e, biña' yenit diaža che le'e nita'le na'a cate' ba goc yogo'lol da' ca'. <sup>35</sup> Le'e yaba na' yežlion' yesele' čhen, perw ca' nac xtižan', gague da' te cbi gac can' žanna'.

<sup>36</sup> 'Perw nono neze bi ža bi horen' gac ca', ne angl ca' nita' yaba, neca neda' naca' Xi'in Diosen' bi nežda'. Toz Xa' Dios neze.

<sup>37</sup> 'Diosen' gwsele' neda' golja' beñač, na' can' goc tiemp che da' Noé, lecze can' gac caten' neda' yida' da' yoble. <sup>38</sup> Bene' ca' gosenita' tiemp che da' Noén' gosenite' chese'ej chesagüe' na' chosošagne'e na' chosošague' na' no xi'ingaque'. Ne' chesonte' ca' caten' bžin ža gwyo'o Noén' lo' barcon'. <sup>39</sup> Bitw gosacbe'ede' bin' gac. Cate'ch goc yejw sio' juisyw na' bia' nisen' yogo'lol'le cana'ch gosacbe'ede'. Lecz can' gac, con cate'ch yida' da' yoble cana'chen' yesacbe'e bene' bin' gac. <sup>40</sup> Quingan' gac caten' yida' da' yoble: Čhope bene' nite' do yixe', toe' yezi' yeca'a, na' yetoe' yocua'ana'. <sup>41</sup> Na' čhope no'ole nite' chesote', toe' yezi' yeca'a na' yetoe' yocua'ana'.

<sup>42</sup> 'Da'nana' le soa le cueze, le bi nezele bi ža bi horen' yida' da' yoble, neda' naca' Xanle. <sup>43</sup> Le gon xbab che da' nga, šaca' neze xan yo'on' do bi hor lo yelen' žin bene' gwbanña' ližen', na'ze' cont bitw güe'e latje šo' ben' ližen' cuane' xšinlazen'. <sup>44</sup> Da'nana' le soa le cueze batcan' yida' da' yoble, le cate' bi chonle xbab yida', cana' yida', neda' naca' ben' gwseła' Diosen' golja' beñač.

*Mos ben' chon güen, na' mos ben' bi chon güen*  
(Lc. 12:41-48)

<sup>45</sup> 'Note'tezle še zoale lez bate'teze, zaca'leble ca' to mos bene' naque' bene' sina' na' bene' chon da' cheyala' gone'. Na' še to bene' mos chonchgüe' güen, nach xanen' cue'e lo' ne'e ližen' cate' se'e cont mosen' gwnežjue' da' yesagw yogo' mos ca' cate' ba gole' yesagüe' tža tža. <sup>46</sup> Še to

beñe' mosen' chonteze' can' gož xanen' le', mbalaz soe' cate' yežin xanen'.  
 47 Da' li žia le'e, xanen' cue' lo na' mosen' yogo'lol da' de che'. 48 Perw še  
 mosen' naque' beñe' zgot na' gone' xbab ñe': "Ba gwže xanan'". 49 Nach  
 solagüe' tile' mos ca' yezica'chle na' ye'ej gagwxate' len no beñe' borrašw,  
 50 nach xane'na' yežine' to ža senyale' le' to hor bi nache'ede'. 51 Na'  
 dan' bi chon mosen' ca cheyala' gone', xane'na' chinchgüe' le' ca gatte'.  
 Gac che' can' chac che note'teze beñe' gwxiye', chjaya'aque' gabilen' gan'  
 chesebežyaše' na' chesagwxetje laye' dan' leca chesežaglagüe'.

## 25

*Jempl che ši no'ole güego' ja'aque' to yela' güešagna'*

<sup>1</sup> Nach Jesúsen' goze'e beñe' ca' zjanaque' le' txen:

—Cheyala' soale lez batcan' yedenabi'a, can' gwnita' no'ole chesejni'i  
 no'ol ca' za' gua'a diža' chen'. Goc to yela' güešagna', na' nita' ši no'ol  
 güego' zjanaque' migw che beñe' ca' chosošagnan'. Na' zjanxobe' lintern  
 čegaque' ja'aque' jaseleze' yesyechoj beñe' ca' liž no'olen' par šja'aque'  
 liž beñe' byon' txen. <sup>2</sup> Na' gayo' no'ol ca' gosaque' beñe' chejni'i na'  
 yegayoe' bibi xbab gosone'. <sup>3</sup> Cate' no'ol ca' bibi xbab goson gosa'ac liže',  
 zjanxobe' lintern čegaquen', perw bitw gosoxe' botey gan' yože set dan'  
 yosočhine' cate' yebiž dan' yože lo' lintern čegaquen'. <sup>4</sup> Na' no'ol ca'  
 chesejni'i, zjanxobe' lintern čegaque' lente botey seten' dan' yosočhine'  
 cate' yebiž dan' yože lo' lintern čegaquen'. <sup>5</sup> Na' beñe' güešagna' ca'  
 gosežede' na' no'ole ca' gosebeze' legaque' gosetase' šlac chesebeze'ne'.  
<sup>6</sup> Na' do chel, to beñe' gwñe' zižje, gože' legaque': "Ba chesyechoj beñe'  
 güešagnan'. Le šo'o šjašagchone'." <sup>7</sup> Na' cate' gože' legaque' ca', yogo'  
 no'ol ca' gosezeche' na' gosečogue' mešw dan' gwyey che lintern'a' na'  
 bosyogualen' da' yoble. <sup>8</sup> Na' no'ol ca' bibi xbab cheson gose'e no'ol  
 ca' yegayo': "ŽBi gonle late' dan' yože botey chelen' neto'? le ba chebiž  
 četon'." <sup>9</sup> Nach no'ol ca' gose'e legaque': "Bitw gac gon'to' late' chele, le  
 dan' de četon' bitw gaquen par yogo'cho. San le šja'ac le šjaxl' chelen'  
 ga choten'." <sup>10</sup> Nach no'ol ca' bi goson xbab ja'aque' jasexi'e seta'. Na'  
 šlac zja'aque' besyežin beñe' ca' chosošagna' liž beñe' byon'. Na' no'ol ca'  
 gosaque' beñe' chejni'i, goso'e txen len beñe' ca' chosošagnan' lo' yo'o gan'  
 chesone' lñin'. Nach mos ca' bososeyjue' puerten'. <sup>11</sup> Na' cate' besyežin  
 no'ol ca' bi goson xbab, gosone' cho'a puerten', gose'e ben' zoa lo' yo'on:  
 "Beñe', gwsaljwšca puerta' cont šo'to'." <sup>12</sup> Perw na' gože' legaque': "Da' li  
 žia' le'e, bitw saljua' šo'le le bitw nombi'a le'e."

<sup>13</sup> Nach gož Jesúsen' beñe' ca' zjanaque' le' txen:

—Ca'czen' cheyala' soale lez batcan' yedenabi'a, le bitw nezele bi ža bi  
 hor yida' yežlio nga da' yoble, neda' naca' ben' gwseļa' Diosen' golja'  
 beñach.

*Jempl che ben' bocua'anlene' xmose' ca' mechon'*

<sup>14</sup> 'Na' dan' yida' yežlio nga da' yoble yedenabi'a zaca'leben ca da' nga  
 goc. To beñe' gwyeje' nación zito'. Na' za' se'e goxe' mos che' ca' na'  
 gwlo'e lo' na'gaque' xmechue' cont gosone' delgens. <sup>15</sup> Toe' bocua'anlene'  
 gayo' mil. Na' yetoe' bocua'anlene' čhop mil. Na' yetoe' bocua'anlene' to  
 mil. Bnežjuen' legaque' con ca' ble'ede' da' chac yeson to toe'. Beyož bene'  
 ca' na' gwze'e. <sup>16</sup> Na' ben' bocua'anlene' gayo' mil la' gwzolaote chone'  
 delgens len mechon' na' bene' gan' lecze gayo' mil. <sup>17</sup> Lecze ca' ben' ben'

bocua'anlene' chope mil, na' bene' gan yechope mil. <sup>18</sup> Na' ben' bnežjue' to mil gwyeye' jacuaše' xmechw xanen' to lo' yechw da' gwche'ene' lo' yo.

<sup>19</sup> 'Goc šsa gwza' xan mos ca' cate' bežine', nach bene' mandadw ja'ac xmose' ca' lagüen' cont bosyodie' cuent. <sup>20</sup> Mosen' ben' bocua'anlene' gayo' mil bžine' lagüen' na' gože'ne': "Xana', ni de da' gayo' mil dan' beno' neda'. Na' ba bena' gan yegayo' mil." <sup>21</sup> Na' xane'na' gože'ne': "Ba beno' da' güen. Naco' mos güen na' ba beno' ca' cheyała' gono'. Na' dan' beno' can' cheyała' gonon' len da' daon' bocua'anlena' len', da'nan' gona' lo' nao' da' xench. Gwyo'o cont so' mbalaz len neda'." <sup>22</sup> Nach cate' bžin ben' bocua'anlene' chope mil, bena' gože'ne': "Xana', ni de da' chope mil dan' bocua'anleno' neda', na' ba bena' gan yechope mil." <sup>23</sup> Nach gož xanen' le': "Ba beno' da' güen. Naco' mos güen na' ba beno' ca' cheyała' gono'. Na' dan' beno' can' cheyała' gonon' len da' daon' bocua'anlena' le', da'nan' gona' lo' nao' da' xench. Gwyo'o cont so' mbalaz len neda'." <sup>24</sup> Nach cate' bezžin ben' bocua'anlene' to mil, nach gože' xane'na': "Nga de xmecho' dan' bocua'anleno' neda'. Nežda' naco' to beņe' znia. Chelapo' da' gosaz beņe' yoble, na' chotobo' coseš ga goson beņe' yoble žin. <sup>25</sup> Da'nan' gwya'a jače'ena' to yechw na' bcuaša' xmechon', le' bžeba' še gwñitan'. Na' na'a beži'šcan'." <sup>26</sup> Nach xanen' gože' le': "iNaco' mos mal, na' naco' xagüed! Neždo' chelapa' ga gosaz beņe' yoble, na' chotoba' coseš ga goson beņe' yoble žin. <sup>27</sup> Na' lagüe da' neždo' chona' ca' žbixchen' bi gwlejo' xmechuan' beņe' yoble cont yezi'an len yichjen na'a ba bela'a?" <sup>28</sup> Nach gože' xmose' ca' yezica'chle: "Yeca'ale mechon' dan' bocua'anlena' benga na' gwnežjwlen ben' ba noxe' ši mil. <sup>29</sup> Can' naquen, note'teze beņe' chon güen len dan' chnežjo xanen' le', xanen' gwnežjochcze' che', cont gata' da' zcha'och che'. Perw na' note'teze beņe' bi chgone' žin dan' chnežjo xanen' le', yeca'a xanen' da' daon' noxe'na'. <sup>30</sup> Na' ca' nac mos xagüed nga, le yebeje' le che'exoxje' gan' nac chol na' cuežyaše' na' gagwxeye' laye' dan' leca žaglagüe'."

*Can' gac cate' Jesúsen' gone' yela' justis che yogo' nación*

<sup>31</sup> 'Diosen' gwsele' neda' golja' beņach, na' cate' yida' da' yoble nsa'a yela' zaca' juisyw chia' na' nchi'a yogo' angl chia' ca', cana'ch cui'a nabi'a güen juisyw can' chnabia' Dios ben' zoa yaba. <sup>32</sup> Na' yapa' yogo' beņe' che yogo' nación ca' yeside' laguan'. Na' cate' ba nita' yogüe' na' la'ane' can' chon to beņe' güeye xila' cate' chebeje' partle xila' ca' na' partle šib ca'. <sup>33</sup> Na' beņe' ca' zjanac beņe' güen lao Diosen' dan' ba gosejnilaže' neda', gwnita' legaque' cuitan' šla'a liča. Perw beņe' mal ca', gwnita' legaque' cuitan' šla'a robes. <sup>34</sup> Na' neda' naca' rey yapa' beņe' ca' nita' šla'a ličan': "Ba ben Xa' Diosen' cont le'e soale mbalaz. Le da' nga cont gona' nabi'a'le txen len neda' can' ba nžia' bia' Diosen' cate' gwxcete yežlio. <sup>35</sup> Gona' cont nabi'a'cho txen, le cate' gw dona' le'e beņle dan' gw dagua'. Na' cate' gwbiłda' nis, le'e beņle da' güe'aja'. Na' cate' goca' ca' beņe' zito' le'e bleble neda' ližlen'. <sup>36</sup> Na' cate' bi gota' da' chaza', le'e beņle da' gwyaza'. Na' cate' gocšenda', le'e bedetiple laža'. Na' cate' gota' ližya, le'e bedena'le neda'." <sup>37</sup> Na' beņe' güen ca' yese'e neda': "Xanto', žbaten' ble'eto' le' gw dono' na' beņto' da' gw dago'? Na' žbaten' gwbiłdo' na' beņto' da' güe'ejo'? <sup>38</sup> Na' žbaten' goco' ca' beņe' zito' na' blebto' le'? Na' žbaten' ble'eto' le' bi de da' chazo' na' beņto' da' gw yazo'? <sup>39</sup> Na' žbaten' gocšendo' o goto' ližya na' bedena'to' le'?" <sup>40</sup> Na' neda' naca' rey yape'gaca'ne': "Da' li žia' le'e,



beṇe' ca' chesejnilaže' neda' zjanaque' ca biša' na' ca zana'. Na' yogo' ni'a cate' beyaše'laže'le legaque', la'czla' bitec bi zjazaque' len beṇaḇen', lencze nedan' beyaše'laže'le.”

<sup>41</sup> 'Nach beṇe' ca' nita' šla'a robesle, beṇe' mal ca', yape'gaca'ne': “Le cuas ca'ale. Ba žia bia' čele cuiayi'le yela' güen da' mal čelen'. Le šja'ac lo yi' gabil dan' bi cheyol, yi' dan' bxen Diosen' cont saca'zi' Satanás toli tocaṇe len da' xigüe' ca' cheson xšinen. <sup>42</sup> Le šja'ac lo yi' gabilen', le cate' gwdona' bitw beṇle dan' gagua'. Cate' gwbiłda' bitw beṇle da' ye'eja'. <sup>43</sup> Cate' goca' ca beṇe' zito' bitw bleble neda' ližle. Cate' bi gota' da' čhaza' bitw beṇle da' čhaza'. Cate' gocšenda' na' cate' gota' ližya, bitw bedena'le neda'.” <sup>44</sup> Nach legaque' lecze yosyoži'e xtižan' yesene': “Xanto', čbaten' bi beyaše'to' le' cate' gwdono' o gwbiłdo', o goco' beṇe' zito', o bi gota' da' čhazo', o gocšendo', o goto' ližyan'?” <sup>45</sup> Na' yeyož yes'e neda' ca' nach yape'gaca'ne': “Lagüe' dan' bi beyaše'laže'le beṇe' ca' chesejnilaže' neda', la'cze bibi zjazaque' len beṇaḇen', da'nan' lencze nedan' bi beyaše'laže'le.” <sup>46</sup> Nach beṇe' mal ca' yesezaca'zi'e toli tocaṇe. Perw beṇe' ca' chesone' güen lao Diosen' yesezoe' mbalaz toli tocaṇe.

## 26

*Bosoxi'e nac yesone' yesezene' Jesúsen'*

(Mr. 14:1-2; Lc. 22:1-2; Jn. 11:45-53)

<sup>1</sup> Cate' beyož be' Jesúsen' diža' ca', gože' beṇe' ca' gwleje' cont zjanaque' txen len le':

<sup>2</sup> —Ba nezele yechope žazen' gala' lni pascw čechon'. Na' cana' gaca' lo na' beṇe' ca' chesegue'ede' neda' na' yesote' neda' yosode'e neda' to le'e yag cruz, neda' naca' ben' gwsela' Diosen' golja' beṇaḇ.

<sup>3</sup> Nach bxož gwnabia' ca' na' beṇe' ca' chososed chosolo'e dan' bzoj da' Moisésen' na' beṇe' gole blao ca' chesenabi'e nación Israel čechon' besedobe' chyo'o liž bxož blao ben' le Caifás. <sup>4</sup> Na' cheseyiljwlaže' naclen' yesone' yeseziye'e Jesúsen' cont yesezene'ne' yesote'ne'. <sup>5</sup> Na' gosene':

—Bi senchone' lo lnin' cont ca yesebec beṇe' žaš.

*To no'ole bzoe' set zix yichj Jesúsen'*

(Mr. 14:3-9; Jn. 12:1-8)

<sup>6</sup> Nach goquen' Jesúsen' len beṇe' ca' gwleje' cont zjanaque' txen len le' nite' Betania liž Simón ben' güe'e yižgüe' da' nzi' lepra. <sup>7</sup> Na' šlac chi' Jesúsen' cho'a mesen', bžin to no'ole noxe' to de yejese ga chož set da' chl'a' zix da' leca chzaca' la'ay. Na' no'olen' bzoačochje' seten' yichj Jesúsen'. <sup>8</sup> Na' beṇe' ca' zjanaque' txen len Jesúsen' cate' besele'ede' can' ben no'olen' beseže'e na' gosene':

—čBixčhen' con benditjde' set zix nga? <sup>9</sup> Ša no bete' len, yesonen' mechwen na' yosonežjuen' gaclenen beṇe' yaše'.

<sup>10</sup> Jesúsen' gočbe'ede' bin' gosene' nach gože' legaque':

—čBixčhen' čhnele če no'olen'? Dan' bene' len neda' nga naquen güen.

<sup>11</sup> Le beṇe' yaše' ca' bate'teze nita'cze' len le'e, san nedan' bich soa' yesša len le'e. <sup>12</sup> Dan' bguazje'nda' set zixen' bene' dan' cheyala' yesone' len neda' cate' gaša'. <sup>13</sup> Da' li žia' le'e, doxen yežlio gate'teze šjasedixjue'e beṇe' diža' güen dan' chzejni'in čhia', decze de yesene' can' ben no'ol nga, cont šjasyeze'ede'ne'.

*Judas Iscariote bene' Jesúsen' lo na' bene' chesegue'ede' le'*

(Mr. 14:10-11; Lc. 22:3-6)

<sup>14</sup> Gwde da' quinga, Judas Iscariote ben' goque' txen len bene' šižinw ca' ben' gwlej Jesúsen' cont zjanaque' txen len le', gwyeye' jañe'e b̄oxoz gwnabia' ca'. <sup>15</sup> Na' ježe' legaque':

—¿Gaca'te' gonle neda' cont gwdia' Jesúsen' lo na'le'?

Nach bosoxi'a bene' ca' yosonežjue'ne' šichoa mechw plata na' bosonežjue'nen'. <sup>16</sup> Nach cana' Judasen' gwzologüe' gwdiljwlaže' nac gone' gwdie' Jesúsen' lo na'gaquen'.

*Jesúsen' blo'ede' legaque' can' yesone' šjasyeza'laže' yela' got chen'*

(Mr. 14:12-25; Lc. 22:7-23; Jn. 13:21-30; I Co. 11:23-26)

<sup>17</sup> Na' bžin ža čala' l̄ni caten' chesagüe' yetextil dan' bibi levadura yo'o, na' ža nechw čhe l̄nin' bene' ca' zjanaque' Jesúsen' txen ja'aque' gan' zoe' na' gose'ene':

—¿Gan' che'ndo' šjasini'ato' cont gagwcho xše' čhe pascon'?

<sup>18</sup> Nach Jesúsen' gože' legaque':

—Le'e šja'ac ciudan' gan' zoa to bene' byo ben' nombia'cho na' ye'lnē': “Maestron' žē' ba zoa žin ža gac da' čheyla' gac čhe', na' ližo' nga che'nde' gagwleno'ne' xše' l̄ni pascon'.”

<sup>19</sup> Nach bene' ca' gosone' can' gož Jesúsen' legaque', jasesini'e xše' žē' l̄nina'.

<sup>20</sup> Na' cate' beyož gwxa gwbiž, Jesúsen' len bene' šižinw ca' gwleje' cont zjanaque' le' txen gosebi'e cho'a mesen' gosagüe'. <sup>21</sup> Na' šlac chesagüen' gož Jesúsen' legaque':

—Da' li žia' le'e, to le'e gwdele neda' lo na' bene' ca' chesegue'e neda'.

<sup>22</sup> Nach legaque' besyeyaše'laže'de', nach gosezologüe' tgüjeje' tgüjeje' gosenabde' le' gose'ene':

—Xana', ¿nedan' gona' ca'?

<sup>23</sup> Nach gože' legaque':

—To ben' chagw len neda' txen toz lo' ye'en, le' gwdie' neda' lo na' bene' ca'. <sup>24</sup> Na' gac čhia' can' nyoj le'e Xtiža' Diosen', neda' naca' ben' gwseła' Diosen' golja' beñač, perw nyaše'chguaze nac ben' gwdie' neda' lo na' bene' ca'. Yejn̄i'acle ša bi golje'.

<sup>25</sup> Nach Judasen' ben' za' gwdie' Jesúsen' lo na' bene' ca' gože'ne':

—Maestrw, ¿nedan' gwdia' le' lo na' bene' ca'?

Jesúsen' gože'ne':

—Le len'.

<sup>26</sup> Na' šlac chesagüen', Jesúsen' gwxi'e to yetextilen' na' beyož be'e yela' choxclen čhe Dios, bzojxen' na' bnežjuen' bene' ca' zjanaque' le' txen, gože' legaque':

—Le gagon'. Len̄na' cuerp čhian'.

<sup>27</sup> Nach bexue' to vas gan' yože nis uvasen', na' beyož be'e yela' choxclen čhe Dios boznežjuen' legaque', goze'ene':

—Yogo'le, le ye'ej late' güjeje dan' yože lo' vas nga. <sup>28</sup> Da' nga xčhena' na' chzanlažan' laljen neche xtoła' yogo'lol beñač. Na' laljen cont solao gac da' cob dan' gwna Diosen' gone' gaclene' beñačen'. <sup>29</sup> Čhnia' le'e, bich ye'eja' nis uvas na'a. Cate'ch žin ža ba zoacho txen gan' zoa Xa' Diosen' čhnabi'e, cana' ye'ejan' da' yoble.

*Jesúsen' gwne' Pedroa' bi chebe' še nombi'e le'*

*(Mr. 14:26-31; Lc. 22:31-34; Jn. 13:36-38)*

<sup>30</sup> Na' beyož gosonxene' Diosen' len to da' gosole', nach gosa'aque' ja'aque' Ya'a Olivos. <sup>31</sup> Na' šlac zjangüe'e nezen' Jesúsen' gože' legaque':

—Na'aže' yogo'le cuejyichje neda' neche dan' gac chian'. Le nyojczen le'e Xtiža' Diosen' žan: "Gota' beņe' güeye' xilan' na' xila' ca' yesaslasba'."

<sup>32</sup> Perw na' cate' yosban Diosen' neda' ladjo beņe' guat ca', yobch yeya'a Galilea ca' le'e.

<sup>33</sup> Nach Pedroa' gože' Jesúsen':

—La' yogo' beņe' quinga yesebejyichje' le', neda' gwbat gona' ca'.

<sup>34</sup> Jesúsen' gože' le':

—Da' li žia' le', biņa' cuež jean' na'aže' cate' gac šon ni'a bi chchebo' še nombi'o neda'.

<sup>35</sup> Nach Pedroa' gwne':

—La'czla' še chonen byen guatlencza' le', gwbat nia' bi nombi'a le'.

Na' lecze ca' yogo' beņe' šižinw ca' zjanaque' Jesúsen' txen gosene' ca'.

*Jesúsen' bol' güiže' Diosen' to latje dan' nzi' Getsemaní*

*(Mr. 14:32-42; Lc. 22:39-46)*

<sup>36</sup> Nach besežine' latje gan' nzi' Getsemaní, na' Jesúsen' gože' beņe' ca' zjanaque' le' txen:

—Ngaze le cue' šlac ša'a na'le šjal güiža' Diosen'.

<sup>37</sup> Na' gwche'e Pedroa' len chop xi'in Zebedeo, Jacobon' len Juanna'. Na' Jesúsen' gwzolao gocyaše'chgüede', na' benchgüe' xbab. <sup>38</sup> Nach gože' legaque':

—Lo' yichjlažda'oguan' chacyaše'chgüeda', chacda' con gatcza' catequen' chžaglagua'. Nga le yega'an bi tasle, le na' txen len neda'.

<sup>39</sup> Nach Jesúsen' gwžialagüe' yelate' na' jačhaze' lo yon' cosčo'ale nach bol' güiže' Diosen', gwne':

—Xa', še guac ten ca'ale, beňšca cont bi saca'zi'a na' bi yesote'nda' can' ba zoa gaca'. Perw bi chnaba' gac da' nia' neda', san gac can' nao' le'.

<sup>40</sup> Nach beyeje' gan' nita' beņe' ca' šone na' ble'ede' zjanite' chesetase'. Na' gože' Pedroa':

—¿Ne šlož dao' ca' goc cuejle bišgal len neda'? <sup>41</sup> Bi tasle na' le yol güiž Dios cont bi gon gwxiyen' le'e gan'. Nežda' che'nele na'zle len neda' perw bi chzoele.

<sup>42</sup> Na' gosze'e gan' nite' na' da' yoble jal' güiže' Diosen', gwne':

—Xa', še gac ten ca'ale, beňšca cont bi saca'zi'a na' bi yesote'nda', perw gac con can' che'ndo' le'.

<sup>43</sup> Na' bezyeje' gan' niten' na' da' yoble ble'ede' chesetase' le ba chesežode' yejlagüen' bišgal. <sup>44</sup> Na' gwze'e da' yoble gan' nite'na' jal' güiže' Diosen' da' gwyone ni'a, na' goznacze' da' yoble can' ba gwnen'. <sup>45</sup> Na' bezžine' gan' nita' beņe' ca' šone nach gože' legaque':

—Na'ach guaque tasle na' yezi'laže'le. Ba gole gwde to beņe' neda' lo na' beņe' güen da' xinj ca', neda' naca' ben' gwsela' Diosen' golja' beňach. <sup>46</sup> Le čhas. Le yeyo'o. Ba za' ben' gon neda' lo na'gaque'.

*Judasen' bdie' Jesúsen' lo na' beņe' chesegue'ede' le'*

*(Mr. 14:43-50; Lc. 22:47-53; Jn. 18:2-11)*

<sup>47</sup> Ne' choe'te Jesúsen' dižan' ca' cate' bžin Judas ben' goque' txen len beņe' šižinw ca' gwlej Jesúsen' cont zjanaque' le' txen. Na' zan beņe' zja'ac len le' zjanoxe' no yag, no spada, beņe' gosesela' bžoz gwnabia' ca'

na' bene' gole blao ca' chesenabi'e nación Israel chechon'. <sup>48</sup> Na' Judas ben' bdie' le' lo na' bene' ca', gože' legaque' nac yesenezde' non' yesezene', gwne':

—Ben' gwnopa' xague', le' na' Jesús. Le sene'.

<sup>49</sup> Nach la' gwbiga'te' cuit Jesús'en', gože'ne':

—Patiox, Maestrw.

Na' bnopene'. <sup>50</sup> Jesús'en' gože'ne':

—Migw chia', ¿bixchen' zao' nga?

Nach la' gosebiga'te' bene' ca' gosezene' Jesús'en' na' goseche'ene'.

<sup>51</sup> Na' to ben' nac txen len Jesús'en' gwleje' spada chen' na' gw dinen' mos che bxoz blaon' gwchogte' šla'a nagen'. <sup>52</sup> Nach Jesús'en' gože'ne':

—Bego'o spada chion' lo' ližen̄a', le' yogo' bene' chesote' bene' len spada, lecze len chesatlene'. <sup>53</sup> ¿Bi neždo' guac nabda' Xan' cont la' seła'te' angl zan juisyw bene' yesaclene' neda'? <sup>54</sup> Perw še gona' ca' ¿nacxe gac dan' cheyala' gac dan' nyoj Xtiža' Diosen' žan quinga gaquen'?

<sup>55</sup> Nach Jesús'en' gože' bene' ca' zjasezen le':

—¿Bixchen' nonle' neda' ca to bene' gwban za'acle zedexi'le neda' len spada len yag? Yogo' ža gwchi'a chyo'o yodao' blaon' bsd blo'eda' bene' že'na' na' bi gwzenle' neda'. <sup>56</sup> Perw chac da' qui cont chac can' ža Xtiža' Diosen' dan' bosozoj da' bene' gosoe xtižen' cani'.

Nach yogo' bene' ca' zjanaque' Jesús'en' txen bosoxonje' gosebejychje'ne'.

*Goseche'e Jesús'en' lao bene' ca' chesenabia' nación Israelen'*

*(Mr. 14:53-65; Lc. 22:54-55, 63-71; Jn. 18:12-14, 19-24)*

<sup>57</sup> Na' bene' ca' gosezen Jesús'en' goseche'ene' lao Caifás ben' nac bxoz blao, gan' ba zjanžag bene' ca' chososed chosolo'e dan' bzoj da' Moisés'en' na' len bene' gole blao ca' chesenabi'e nación chechon'. <sup>58</sup> Nach Pedroa' na'ogüe' Jesús'en' zito' zito'le bžinte' liž bxoz blaon', na' gwyo'e chyo'ona' gwchi'e len bene' ca' chesape' yodao' blaon', le' goclaže' le'ede' naquen' zelao gac che Jesús'en'.

<sup>59</sup> Nach yogo' bxoz gwnabia' ca' na' yezica'chle bene' gole blao ca' chesenabi'e nación chechon' cheseyiljwlaže' bi diža' güenlaže' yeso'e che Jesús'en' cont yesote'ne'. <sup>60</sup> Perw goc šša bitw besyeželde' bi diža' güenlaže' yosode'ede' le' cont gosozie'ne' xya la'czla' bene' zan gosenite' gosene' diža' güenlažen' contr le'. Gwde na' besechoj yečhope bene' na' bedilen can' gosenen'. <sup>61</sup> Quinga gosene':

—Benga gwne': "Neda' guac yočinja' yodao' blao gan' chonxencho Diosen', na' šone žaze yeyonan'."

<sup>62</sup> Nach gwzoža' bxoz blaon' gože' Jesús'en':

—¿Bibi de bi nao' ca nac da' naga chosocuiš bene' quinga le'?

<sup>63</sup> Bitwbi gwna Jesús'en'. Nach gož bxoz blaon' le':

—Chnia' le' gwna neto' še le len' Cristo ben' nac dogualje Xi'in Diosen', ben' gwleje' cont yedenabi'e. Na' Diosen' ben' zoa toli tocanē cue'e da' bali še ledo' can' žon'.

<sup>64</sup> Jesús'en' gože'ne':

—Le can' žale nan' naca'. Diosen' gwsele' neda' golja' benach. Na' chnia' le'e, gwžin ža le'ele neda' chi'a cuit Diosen' ben' nape la'zelagüe yela' guac xen, na' nabi'a txen len le', na' le'ele yetja' yaban' to lo' bejw.

<sup>65</sup> Cate' bene bxoz blaon' xtiža' Jesús'en', gwšo' gwčeza'te xen', le par le' da' mal juisyon' gwna Jesús'en' cui'e cuit Diosen' nabi'e. Nach gwne':

—Ba benecho *na*'a ba gw<sub>ne</sub>' che Diosen' dan' gwne' ca'. Noch no chyažje no gagw xya *che*'.<sup>66</sup> *¿*Nac žale *che*'?

Nach be<sub>ne</sub>' ca' bosyož<sub>i</sub>'en gose'ene':

—Cheya<sub>la</sub>' gate' dan' chon cuine' ca Dios.

<sup>67</sup> Nach bosož<sub>i</sub>'e xene' cho' alao Jesúsen', na' gosebaže'ne', na' ba<sub>le</sub>' gosegape' x<sub>a</sub>g<sub>ue</sub>'na'.<sup>68</sup> Nach gose'ene':

—Še len' naco' Criston', gw<sub>ne</sub>ya'ašc, gwna neto', *¿*non' chgapa' le'?

*Pedroa' bi gwchebe' še nombi'e Jesúsen'*

(Mr. 14:66-72; Lc. 22:56-62; Jn. 18:15-18, 25-27)

<sup>69</sup> Na' šlac chac da' quinga, chi' Pedroa' chyo'ona', cate' bžin to no'ole güen žin *che* Caifásen', gože'ne':

—Lencze le' naco' txen len Jesús be<sub>ne</sub>' Galilean'.

<sup>70</sup> Na' lao yogo' be<sub>ne</sub>' ca' že' na', Pedroa' bitw gw<sub>che</sub>be' še naque' txen len Jesúsen', na' gože' no'olen':

—Bi *ne*zda' bi dižan' cho'o.

<sup>71</sup> Gwde beyož gože' no'olen' ca' beyeje' cho'a puert na'le, na' bezle'e yeto no'ole güen žin<sub>na</sub>' le', na' goze'e be<sub>ne</sub>' ca' že'na':

—Lecze len benga naque' txen len Jesús be<sub>ne</sub>' Nazareten'.

<sup>72</sup> Da' yoble bitw gw<sub>che</sub>be' še naque' txen len Jesúsen', nach gwne':

—Na' zoa Diosen' cue'e da' ba<sub>li</sub> bitw nombi'a bena' žo' ca'.

<sup>73</sup> Na' goczze šlož, gosebiga' be<sub>ne</sub>' ca' že'na' goseze'e Pedroa':

—Da' licze, naco' txen len lega<sub>que</sub>'<sub>1</sub>, *le* nacia' ch<sub>ni</sub>o' can' chesene be<sub>ne</sub>' Galilea ca'.

<sup>74</sup> Nach Pedroa' *chop* šone *ni*'a gwne':

—Diosen' go<sub>ne</sub>' ga saca'zi'a še chon<sub>la</sub>ža' dan' žia' bi nombi'a bena'.

Na' *la*' gwchežte to jea. <sup>75</sup> Nach jayze'e Pedroa' can' gož Jesúsen' *le*': "Bi<sub>na</sub>' cuež jean' cate' gac šone *ni*'a bi ch<sub>che</sub>bo' še nombi'o neda'." Nach beze'e *le*ca gwchežyaše'.

## 27

*Goseche'e Jesúsen' lao Pilaton'*

(Mr. 15:1; Lc. 23:1-2; Jn. 18:28-32)

<sup>1</sup> Na' cate' gwyeni', yogo' b<sub>x</sub>oz gwnabia' ca' na' be<sub>ne</sub>' gole blao ca' chesenabia' nación *che*chon' besyedobe' na' gosechoglagüen' yesote' Jesúsen'. <sup>2</sup> Nach bosoch<sub>e</sub>je'ne' na' goseche'ene' jasesane'ne' *lo* na' gobernador Poncio Pilato.

*Judasen' beyot cuine'*

<sup>3</sup> Na' Judasen' ben' b<sub>d</sub>ie' Jesúsen' *lo* na' be<sub>ne</sub>' ca', cate' gocbe'ede' ba gosechoglagüen' yesote' Jesúsen', betinj<sub>d</sub>e' dan' b<sub>d</sub>ie' *le*' *lo* na' b<sub>x</sub>oz gwnabia' ca' na' be<sub>ne</sub>' gole blao ca'. Nach gwyeje' laogaquen' par bonežjue' lega<sub>que</sub>' šichoa mechw platan'. <sup>4</sup> Nach gože' lega<sub>que</sub>':

—Malen' bena' b<sub>d</sub>ia' *lo* na' len' to be<sub>ne</sub>' bi nape' do<sub>la</sub>'.

Na' gose'ene':

—Bitwbi do<sub>la</sub>' nap neto' dan' beno' ca'.

<sup>5</sup> Nach Judasen' boza<sub>le</sub>' mechw ca' *lo*' yodao' blaon', nach beze'e na' jaylo'o do yene' beyot cuine'.

<sup>6</sup> Beyož beza' Judasen', b<sub>x</sub>oz gwnabia' ca' bosyotobe' mechon'. Na' gose' lježe':

—Bitw gac co'ochon lo' caj gan' yo'o mechw che yodaon', le naquen mechw dan' gwdixjwcho cont yega'a yela' mban che to bene'.

<sup>7</sup> Na' bosoxi'e yesezi'e len mechon' to yežlio dan' de che to bene' güen yeso'. Na' gosezi'en par to capsantw ga yosocuaše' bene' zito'. <sup>8</sup> Na' yežlion' ne' nzin' Yežlio Chen ža na'aža, le gosezi'en len mechw dan' goseyixjue' cont gosote' Jesúsen'. <sup>9</sup> Can' goc cont goc can' bzoj da' Jeremías ben' be' xtiža' Diosen' cani', gan' žan: “Besyezi'e šichoa mechw platan', dan' gosena bene' Israel zaca' bena'. <sup>10</sup> Na' gosezi'e yežlio che to bene' güen yeso', can' gwna Xancho Diosen' neda'.”

*Bosocuiše' Jesúsen' lao Pilaton'*

*(Mr. 15:2-5; Lc. 23:3-5; Jn. 18:33-38)*

<sup>11</sup> Na' goseche'e Jesúsen' lao gobernadore' na' šlac zeche' lagüen', gobernadore' gože'ne':

—¿Len' naco' rey che bene' Israel?

Nach Jesúsen' boži'e xtižen', gwne':

—Can' gwnao'na', can' naquen.

<sup>12</sup> Na' cate' bxož gwnabia' ca' na' bene' gole blao ca' chesenabia' nación chechon' bosocuiše' Jesúsen', bitw bi gwne'. <sup>13</sup> Nach Pilaton' gože'ne':

—¿Bi chendo' catec da' zan xya nga chesagüe' chio'?

<sup>14</sup> Perw Jesúsen' ne' to xtiže'na' bitw boži'e, na' bebanechgüe gobernadoren'.

*Gosechoglagüen' yesote' Jesúsen'*

*(Mr. 15:6-20; Lc. 23:13-25; Jn. 18:38-19:16)*

<sup>15</sup> Na' gota' costumbr, gobernadore' gwsane' to bene' de ližya cate' čala' lni pascw čecho, con bene' yesenab bene' gualaž chechon'. <sup>16</sup> Na' ližya na' de to bene' čzechgua che' naque' bene' güen da' xinj, na' le' Barrabás. <sup>17</sup> Nach Pilaton' gože' bene' ca' zjanžaguen':

—¿Noe' bene' quinga chaclaže'le gwsana'? ¿Gwsana' Barrabás še Jesús nga ben' chesene' naque' Cristo ben' gwlej Diosen' cont yedenabi'e?

<sup>18</sup> Gocbe'e Pilaton' dan' chesacxi'a bxož gwnabia' ca' Jesúsen', da'nan' bosodie' le' lo'ne'en.

<sup>19</sup> Ca' čhi' Pilaton' gan' chone' yela' justisen', cate' bžin to rson da' gwsela' no'ol čhen', gože'ne': “Bitw bi gondo' bena', le bibi doła' nape'. Nže'e gwñeda'ne' yel na' bžaglaochgua' neche dan' chac che bena'.”

<sup>20</sup> Na' bxož gwnabia' ca' na' bene' gole blao ca' chesenabi'e nación chechon' gosego'oyele' bene' ca' že'na' cont yesenabe' gwsane' Barrabásen' na' yesenabe' yesote' Jesúsen'. <sup>21</sup> Nach gobernadore' gože' legaque' da' yoble:

—¿No bene' quinga chope chaclaže'le gwsana'?

Nach gose'ene':

—Barrabásna'.

<sup>22</sup> Pilaton' gože' legaque':

—¿Bixe gona' len Jesús nga ben' chesene' naque' Cristo ben' gwlej Diosen' cont yedenabi'e?

Na' yogüe' gose'ene':

—jBde'e le'e yag cruz!

<sup>23</sup> Nach gož gobernadore' legaque':

—¿Bixe da' xinj nonen'?

Na' legaque' da' yoble bososya'achgüe' gose'ene':

—jBde'e le'e yag cruz!

24 Gocbe'e Pilaton' bicze bi gac gone'. Ba chyała'ch chesone' žaš juisyw. Nach gwsele' to bene' jaxi'e nis cont bone'e lao bene' ca' že'na' na' gože' legaque':

—Bibi da' xinj non benga. Bitw naquen xbaga' dan' gotlene', xbaga' le'e naquen še ba betwlene'.

25 Nach yogo' bene' ca' gose'ene':

—Xbaga' neto' na' xbaga' xi'into' naquen che yela' got che benga.

26 Nach bsan Pilaton' Barrabásen' can' gosenaben'. Perw na' bene' mandadw gosot goseyin soldadw che' ca' Jesúsen', nach bene' le' lo na'gaque' cont yosode'ene' le'e yag cruzen'.

27 Nach soldadw che gobernadoren' goseche'e Jesúsen' lo' yo'o che gobernadoren', nach bosyotobe' yogo' soldadw ca'. 28 Na' goseyine' xalana' Jesúsen' na' bosoguacue'ne' to lache' xna ca dan' chesaz rey ca'. 29 Na' gosone' to corona de xis yeše' bosozoen' yichjen', na' ne'e licha bosogoxe'ne' to xis. Na' bosozoa xibe' lagüen' par gosonle' che', nach gose'ene':

—¡Viva rey che bene' Israel!

30 Nach bosoži'ene' xene', na' besyeque'e xis dan' noxen' na' bosozeten' yichje'. 31 Na' beyož gosonle' che', besyeque'e lache' xnan' dan' bosoguacue'nen' na' bosyoguacue'ne' xacze'. Nach goseche'ene' cont jasede'ene' le'e yag cruzen'.

*Bosode'e Jesúsen' le'e yag cruzen'*

*(Mr. 15:21-32; Lc. 23:26-43; Jn. 19:17-27)*

32 Nach besechoje' ciudan' na' besyežague' to bene' Cirene le Simón na' gosone' byen bosogüe'ene' yag cruz che Jesúsen'.

33 Na' besežine' to latje gan' nzi' Gólgota, zeje diža' latje che žit yichj bene' guat. 34 Na' bosonežjue' Jesúsen' vino da' nchixe to da' zla' par ye'ejen', perw le' con bnixen', bitw güe'ejen'.

35 Na' cate' beyož bosode'ene' le'e yag cruzen', soldadw ca' gosone' rifa cate' besyele'e xalane' cont gota'bia' noe' yechelen'. Na' dan' gosone' ca' goc can' bzoj da' ben' be' xtiža' Diosen' cani', gwne': "Yesyele'e xalanan' na' yesezi' che che', yesonen' rifa." 36 Nach gosebi'e gosape'ne'. 37 Na' yichj yag cruzen' gan' de'ena' bosozoje' dan' bcuiš le', na' žan: "Benga Jesús rey che bene' Israel ca'."

38 Na' lecze cana' bosode'e chope bene' gwban le'e yechope yag cruz. Toe' gwda' cuit Jesúsen' licha na' yetoe' cuite' robes. 39 Na' bene' ca' gosede gan' da' Jesúsen' goson yichjlagüe' dan' leca besegue'ede' le', na' gosezi'diže' le', 40 gose'ene':

—Len' gwnao' yochinjo' yodao' blaon' na' šone žaze yeyonon', bosla cuino'. Še len' naco' doguale Xi'in Diosen', beyetj le'e yag cruzen'.

41 Na' len bxož gwnabia' ca' na' len bene' ca' chososed chosolo'e dan' bzoj da' Moisésen' na' len bene' fariseo ca', na' len bene' gole blao ca' chesenabi'e nación chechon', yogüe' gosezi'diže'ne' na' gosone':

42 —¡Yezica'chle bene' bosle' na' bi chac yosla cuine'! Še naque' rey che chio' bene' Israel, yeletj cuine' le'e yag cruzen' na'a na' šejle'cho che'. 43 Le' chejnilaže' Diosen', le gwne': "Dogualje Xi'in Dios neda'." ¡Na' le'echo yosla Diosen' le' na'a še chacde' le'!

44 Na' bene' gwban ca' zjada' le'e yag cruzen' chop la'a cuiten', lecze gosezi'diže' le'.

*Can' goc cate' got Jesúsen'*

(*Mr. 15:33-41; Lc. 23:44-49; Jn. 19:28-30*)

<sup>45</sup> Na' do guagwbiz doxen yežlion' goc čol bžinte cheda šone. <sup>46</sup> Na' do cheda šone Jesúsen' bosye'e zižje gwne':

—Elí, Elí, ¿lama sabactani? (Zeje diža': Dios čhia, Dios čhia, ¿bixčen' ba gwlejšičho' neda'?)

<sup>47</sup> Na' bał bene' ca' zjanita' na' gosende' na' gosene':

—Le gwzenag, benga chol güiže' da' Elías ben' be' xtiža' Diosen' cani'.

<sup>48</sup> Nach la' bchojte to bene' gwyejsese' jaxi'e to esponja na' bzažeden' vino zichj na' bzoen' to lao xis tone nach jažiguen' cho'a Jesúsen' cont xopen'. <sup>49</sup> Na' yebale' gose'e bena':

—Cuezcho, yešč še güide Elíasen' yosle'ne'.

<sup>50</sup> Nach da' yoble Jesúsen' bosye'e zižje na' gote'. <sup>51</sup> Na' ca hora' lache' da' ze lo' yodao' blaon' bcheza' gacholen gwza'te yichjen bžinte che'e. Na' gwxo'chgua gosoxjte yej ca'. <sup>52</sup> Na' ľecze beseyaljo ba che bene' ba gosat. Na' zan da' bene' ca' gosejnilaže' Diosen' besyebane' ladjo bene' guat ca'. <sup>53</sup> Nach caten' ba beban Jesúsen' ladjo bene' guat ca', besyechoje' lo' ba čhegaquen' na' jaya'aque' jaselo'elagüe' ciuda Jerusalén. Na' zan bene' beše'ede' legaue'.

<sup>54</sup> Na' ca nac xan soldadw ca' na' bene' ca' nche'e, bene' nita' chesape' Jesúsen', cate' beše'ede' can' gwxo' na' bichle da' ca' goc, bešežebchgüe', na' gosene':

—Da' li le benga goc dogualje Xi'in Dios.

<sup>55</sup> Na' ľecze nita' zan no'ole ladjo bene' ca' na' goseze' zito' chesene'e can' chaquen'. No'ol ca' gosa'ogüe' Jesúsen' cate' beze'e distritw Galilean' par chesaclene' le' len bi da' chyažjde'. <sup>56</sup> Na' len no'ol ca' María bene' Magdala, na' ľecze María ben' nac xna' Jacobo na' José, na' ľecze ca' xna' Jacobo na' Juan, xi'in Zebedeo.

*Bosocuaše' Jesúsen'*

(*Mr. 15:42-47; Lc. 23:50-56; Jn. 19:38-42*)

<sup>57</sup> Na' gwzoa to bene' gwni'a bene' ciuda Arimatea le' José na' ba gwzola' chzenague' che Jesúsen'. Na' cate' ba chxo' gwbiž <sup>58</sup> Josén' gwyeje' lao Pilaton' jaynabe' cuerp che Jesúsen'. Na' Pilaton' bene' mandadw bosyonežjue'ne' cuerp čhen'. <sup>59</sup> Nach Josén' bego'o lo' ne'e cuerp che Jesúsen' na' blaže'ne' to lache' xen da' nyach. <sup>60</sup> Na' gwlo'e cuerp čhen' to lo' bloj cobe che' da' gwche'ene' le'e yej. Na' blöle' to yej xen cho'a blojen' cont bseyjon len. Nach beze'e. <sup>61</sup> Na' María bene' yež Magdalan' na' yeto María yoble jasechi'e cho'a blojen'.

*Bosozoe' bene' chesape' gan' jasecuaše' Jesúsen'*

<sup>62</sup> Na' beteyo, gwde žan' caten' chososini'e par ža che Diosen', besedobe bxoz gwnabia' ca' na' bene' fariseo ca' na' ja'aque' gan' zoa Pilaton'. <sup>63</sup> Na' gose'ene':

—Bene', ba jaysalaže'to' can' gwna da' bene' gwxiyen' cate' ne' mbane', gwne': “Yeyon ža yebana' ladjo bene' guat ca'.” <sup>64</sup> Da'n'an' gwseła'šca bene' šjasedape' cho'a blojen' gan' jasecuaše'nen' cont bi šja'ac bene' ca' gosaque' Jesúsen' txen šeže'le šjasyeleje' cuerp čhen' na' yese'e bene' le' bebane' ladjo bene' guat ca'. Le še yesaque bene' ba bebane' ladjo bene' guat ca', gonchen malech clel ca' len diža' dan' gwdis'e gwne' Diosen' gwsele' le'.



65 Nach Pilaton' gože' bene' ca':

—Gona' le'e soldadw ca'. Le che'e cont yesape' ga zelao yesezoede'.

66 Nach ja'aque' len soldadw ca' na' bosochiše' sey le'e yej dan' da' cho'a blojen', na' bosonite' soldadw ca' gosapen'.

## 28

*Jesúsen' bebane' ladjo bene' guat ca'*

(Mr. 16:1-8; Lc. 24:1-12; Jn. 20:1-10)

<sup>1</sup> Na' cate' beyechj ža che Dios, bał dmigw María bene' Magdala len María ben' yeto ja'aque' jasene'e gan' bosocuaše' Jesúsen'. <sup>2</sup> Na' leca gwxo', le angl che Xanchon' betje' yaban', na' bžine' gwque'e yej dan' nseyjw cho'a blojen', na' gwchi'e lo yeja'. <sup>3</sup> Na' anglen' leca chactit cho'alagüen' cacze ga chep yes na' xalanen' naquen šiš xila' juisyw ca' nac beye'. <sup>4</sup> Na' cate' besele'e bene' gop ca' le', leca gosexize' besežebe' na' gosebixe' gosatte' šlat. <sup>5</sup> Perw na' anglen' gože' no'ol ca':

—Bitw žeble. Neda' nezda' Jesúsen' ben' bosode'e le'e yag cruz nan' cheyljwle. <sup>6</sup> Nono de nga. Ba bebane' ladjo bene' guat ca', can' gwnacze'. Na' le da, le na' latje nga gan' gosegüe'e cuerp chen'. <sup>7</sup> Bedao' le šjaya'ac le šjaydixjue'e bene' ca' zjanaque' Jesúsen' txen ye'gaclene' ba bebane' ladjo bene' guat ca'. Na' ye'gaclene' gwyobech Jesúsen' yežine' Galilean' cłel ca' legaque', na' Galilean' na' yesele'ede'ne'. Can' gwna Diosen' zedetixjue'eda' le'e.

<sup>8</sup> Nach no'ol ca' la' besyeya'actie' cho'a blojen' do chesežebze' perw leca chesyebede', zjaya'acseše' zjasyedixjue'ede' bene' ca' zjanaque' Jesúsen' txen can' goca'. <sup>9</sup> Na' šlac zjaya'aque' besyežague' Jesúsen' chanez. Nach bguape' legaque' tiox.

Na' no'ol ca' gosebigue' gan' zoa Jesúsen' bosozoa xibe' lagüen', na' goseyele' ni'e tantw besyebede', na' gosonxene' le'. <sup>10</sup> Jesúsen' gože' legaque':

—Bitw žeble. Le šjaydixjue'e bene' lježcho ca', cheyała' šjaya'aque' Galilean' cont yesele'ede' neda'.

*Bene' gop ca' jasyedixjue'ede' bħoz ca' can' ba goca'*

<sup>11</sup> Na' šlac zjaya'ac no'ol ca' ciudan', bał soldadw ca' bene' ca' gosape' gan' bosocuaše' Jesúsen' jaya'aque' ciudan' jasyedixjue'ede' bħoz gwnabia' ca' doxen can' ba goquen'. <sup>12</sup> Nach besedobe bħoz gwnabia' ca' len bene' gole blao ca' chesenabia' nación chechon' na' bosoxi'e nac yesone' ca' nac dan' gose' soldadw ca' legaque'. Na' bosonežjue' soldadw ca' da' zcha'o mechw. <sup>13</sup> Gose'e legaque':

—Še no nabe le'e bin' goquen', na' ye'gaclene' šeže'le šlac chtasle bene' ca' gosaque' le' txen besyebetje' cuerp chen' lo' blojen' na' besyeyo'en ga yoble. <sup>14</sup> Na' še gubernadoren' yende' diža' quinga, neto' šjašaljento'ne' cont bi že'e le'e na' cont bi gote' le'e.

<sup>15</sup> Na' soldadw ca' gosezi'e mechon' dan' bosonežjue' legaquen', nach gosone' con can' gose'e legaque'. Na' ža na'aža yogo' can' gosena soldadw ca' ne' chesene' doxen gan' nita' bene' Israel gualaž chechon'.

*Jesúsen' gože' legaque' yeso'e xtiže'na' yogo' nación*

(Mr. 16:14-18; Lc. 24:36-49; Jn. 20:19-23)

<sup>16</sup> Nach bene' ca' zjanaque' Jesúsen' txen, bene' ca' šnej, jaya'aque' Galilean' cont jasyešague' Jesúsen' to lo ya'a gan' gože' legaque' yesyežague'.

17 Na' cate' besele'ede' Jesúsen' gosonxene'ne'. Perw bia'cze to c̄hope' gosac̄žejlaže' še le'na'. 18 Nach gwbiga' Jesúsen' gan' nite'na' na' gože' legaque':

—Ba ben Diosen' lo na' doxen yela' chnabian' dan' de yaban' na' yežlion'. 19 Da'nan' le šja'ac le šjased le šjalo'e bene' ca' že' yogo'lol nación cont yesejnilaže' neda'. Na' le gwzoe' nis cont yosolo'e le chesejnilaže' Xacho Diosen', na' chesejnilaže' neda' naca' dogualje Xi'ine', na' lencze Spiritw che'na'. 20 Na' gwsed gwlo'elne' cont yesone' yogo'lol dan' ba bena' mandadw gonle. Neda' zoacza' len le'e yogo' ža, na' ca'cze ne' soa' len le'e cate'ch te che yežlion'. Da' na'zen' chzoja' ņa'a.

## DIŽA' GÜEN DAN' BZOJ SAN MARCOS

*Juan ben' bzoa bene' nis gwdixjue'ede' diža' güen che Diosen' latje daš  
(Mt. 3:1-12; Lc. 3:1-9, 15-17; Jn. 1:19-28)*

<sup>1</sup> Qui goc cate' gwxe xtiža' Jesucristo ben' nac dogualje Xi'in Dios.

<sup>2</sup> Da' Isaías ben' be' xtiža' Diosen' cani' bzoje' da' nga, žan:

Chsela' to bene' cuialagüe' laoguoñ' güe'e xtižon',  
cont ba zjanita' bene' yosozenague' chio' cate' šejo'.

<sup>3</sup> Beña' chñe' zižje latje dašen' že':

“Le gonšagüe' yichjlažda' olen' cont gwzenagle che Xanchon' cate' yide';  
le cuejyichj da' malen' chonle cont yichjlažda' olen' gaquen ca to nez da' ba  
gosoñšagüe'.”

<sup>4</sup> Ca' goquen', Juan ben' chzoa bene' nis bžine' latje dašen' na' gože' bene'  
ca' besežag na' cheyala' yesyetinjde' xtoła'gaque' na' yesezoe' nis cont  
nitlao xtoła'gaque'. <sup>5</sup> Zan bene' za' ac do distritw Judea na' ciuda Jerusalén  
bosozenague' che diža' dan' chyixjue'ede'. Na' cate' gosexoadole' bi da'  
xinj zjanone', Juanna' bzoe' legaque' nis lo' yegw Jordán.

<sup>6</sup> Xalana' Juanna' goquen de yiša' xa camello na' da' bchej lsine' goquen  
de yid, na' gwdagüe' biše'zo len šina' beser yixe'. <sup>7</sup> Na' gwdixjue'ede' bene'  
xtiža' Diosen', gwne':

—Coža' na' za' za' to bene' zaca'che' ca neda', na' da' nacchgüe' bene'  
zaca', bi zaca' gona' xmandadoe' lechja' no xele'. <sup>8</sup> Neda' ba bzoa' le'e nis,  
perw ben' za' zan' gone' cont soa Spiritw che Diosen' lo' yichjlažda' olen'  
nabian' xbab chele.

*Jesúsen' gwzoe' nis*

*(Mt. 3:13-17; Lc. 3:21-22)*

<sup>9</sup> Ca tiempa' Jesúsen' gwze'e lagüe yež Nazaret da' chi' ga mbane dis-  
tritw Galilea, na' Juanna' bzoe' le' nis lo' yegw Jordán. <sup>10</sup> Na' šlac chechoj  
Jesúsen' lo' nisen', Jesúsen' ble'ede' byaljw yaban' gan' zoa Diosen', na'  
Spiritw che Diosen' betjen jasoan len le', na' ca hora' Spiriton' naquen  
ca nac ngolbex. <sup>11</sup> Na' gosende' gwñe Dios ben' zoa yaba gwne':

—Len' naco' Xi'ina' bene' chacchgüeda', na' chebe  
chezaque'laže'chgüeda' chio'.

*Satanásen' goclažen' co'oyelan' Jesúsen' cont gone' da' mal*

*(Mt. 4:1-11; Lc. 4:1-13)*

<sup>12</sup> Nach Spiritw che Diosen' benen cont la' gwyejte Jesúsen' latje daš.  
<sup>13</sup> Na' gwzoe' latje dašen' čhoa ža ladjo be znia ca'. Na' Satanás dan'  
chnabia' da' xigüe' ca' goclažen' co'oyelan' le' cont gone' da' mal. Nach  
beyoža' jasaclen angl che Diosen' le'.

*Jesúsen' gwzoloa chyixjue'ede' xtiža' Diosen' distritw gan' nzi' Galilea*

*(Mt. 4:12-17; Lc. 4:14-15)*

<sup>14</sup> Beyož gosegüe'e Juanna' ližya, Jesúsen' beze'e beyeje' Galilea gan'  
jatixjue'ede' diža' güen, gwne' Diosen' nabi'e yichjlaždao' bene' ca'  
yosozenag che'. <sup>15</sup> Jesúsen' gwne':

—Ba bžin ža cate' Diosen' nabi'e yichjlaždao' bene' yosozenagüe' che'. Le  
yetinje xtoła'len' na' le šejle' diža' güen che Diosen' da' chyixjue'eda'.

*Jesúsen' goxe' tap bene' gwxen bel šja'aclene' le' txen*

*(Mt. 4:18-22; Lc. 5:1-11)*

<sup>16</sup>Jesúsen' chde' do cho'a nisdao' che Galilean' cate' ble'ede' chope bene' gwxen bel, Simón na' bene' biše' Andrés. Na' zjanite' chosozale' yixjw dan' chesezende' belen' lo' nisa'. <sup>17</sup>Na' gož Jesúsen' legaque':

—Le šo'o len neda'. Nacle bene' gwxen bel na' chbejle belen' lo' nisen', perw na'a gona' cont gaxle bene' yesyechoje' lo da' malen'.

<sup>18</sup>Nach la' bosocua' ante yixjw chen' na' jasa'aclene' le'.

<sup>19</sup>Na' Jesúsen' gwze'e yelate' na' ble'ede' Jacobon' xi'in Zebedeo na' len bene' biše' Juan, zjajo'e lo' barcw chesyeyonšagüe' yixjw chegaquen'.

<sup>20</sup>Na' Jesúsen' lecze goxe' legaque' šja'aclene' le' na' bosocua'ane' Zebedeon' ben' nac xagaque' lo' barcon' len bene' ca' chesaclen le', nach ja'aque' len Jesúsen'.

*To bene' gwyo'o gwyaze' da' xigüen'*

*(Lc. 4:31-37)*

<sup>21</sup>Besežine' yež da' nzi' Capernaum, na' ža che Dios Jesúsen' gwyo'e lo' yodao' da' zoa na' na' gwzolagüe' bsed blo'ede'. <sup>22</sup>Bene' ca' že' na' besyebande' can' bsed blo'ede', le can' bzejni'iden' nachbia' nezde' cayanen' nac xbab che Diosen', gague bzejni'ide' can' chosozejni'i ben' chosolo'e ley dan' bzoj da' Moisés. <sup>23</sup>Na' lo' yodaon' zoa to bene' yo'o nyaze' da' xigüen', na' bosye'e gwne':

<sup>24</sup>—¿Bixchen' chgoša' chlaže' chio' len neto', Jesús bene' Nazaret? ¿Zedežiyao'o neto'? Neda' nombi'a le' na' nezda' naco' bene' laždao' xilaže' juisyw bene' gwsela' Dios.

<sup>25</sup>Nach Jesúsen' gože' da' xigüen':

—iŠšago', bechoj lo' yichjlaždao' benga!

<sup>26</sup>Na' da' xigüen' benen cont gwchole' bena', nach chosya'adiachguan bechojen lo' yichjlažda'ogüen'. <sup>27</sup>Yogo' bene' ca' že' na' besyebande' na' gose' lježe':

—¿Bixen' chac? ¿Bixe da' coben' chlo'e benga? ¡Nacbia' nape' yela' chnabia' na' yela' guac, le da' xigüe' ca' chesonen da' že'!

<sup>28</sup>Na' ca' nac dan' ben Jesúsen' bedao'nez gos gwlalje dižan' doxen lagüe yež ca' gan' mbane Galilea.

*Jesúsen' beyone' taobi'in che Simón Pedro*

*(Mt. 8:14-15; Lc. 4:38-39)*

<sup>29</sup>Cate' besyechoje' lo' yodaon', Jesúsen' len Jacobo na' len Juan ja'aque' liž Simón na' Andrés. <sup>30</sup>Na' taobi'in che Simónna' die' che'ede' xla; na' gose'e Jesúsen':

—Benga die' che'ede'.

<sup>31</sup>Nach jabiga' Jesúsen' na' bexae' taquen' gwliše'ne'. Na' la' beyactede', nach bsiñi'e da' gose'ej gosagüe'.

*Jesúsen' beyone' zan bene' chese'ede'*

*(Mt. 8:16-17; Lc. 4:40-41)*

<sup>32</sup>Cate' ba gwxa gwbižen' na' ba gwxin, jasesane' lao Jesúsen' zan bene' chese'ede' na' bene' zjajo'o zjanyaze' da' xigüen'. <sup>33</sup>Na' do yež bene' besedop besežague' cho'a yo'o gan' zoa Jesúsen'. <sup>34</sup>Na' Jesúsen' beyone' bene' chese'ede' gwde gwdele yižgüe' na' bebeje' zan da' xigüe' da' zjajo'o zjanyaz bene', perw bitw bi'e latje bi yesenan, le legaquen zjanezen non' nac le'.

*Jesúsen' chyixjue'ede' xtiža' Diosen' Galilea*

*(Lc. 4:42-44)*

<sup>35</sup> Šbał cate' ne' nac čholjesúsen' gwyase' na' gwze'e gwyeje' ga nono nła' na' boł güiže' Diosen'. <sup>36</sup> Simón na' bene' lježe' ca' ja'aque' jasyediljue'ne'.

<sup>37</sup> Na' cate' besyeželde'ne' gose'ene':

—Yogo'ze bene' chesyeyiljue' le'.

<sup>38</sup> Perw Jesúsen' gože'ne':

—Le šo'o ga yoble ga nac gała'ze cont lecze šjatixjue'eda' xtiža' Diosen' na', le da'nan' ba gwza'a.

<sup>39</sup> Can' goc, Jesúsen' gwde' doxen gan' mbane Galilea gwdixjue'ede' xtiža' Diosen' to to yodao' čhe neto' bene' Israel, na' bebeje' da' xigüe' da' yo'o nyaz bene'.

*Jesúsen' beyone' to bene' che'ede' lepra*

*(Mt. 8:1-4; Lc. 5:12-16)*

<sup>40</sup> To bene' che'ede' yižgüe' dan' nzi' lepra jabigue' gan' zoa Jesúsen' na' bzoa xibe' gože'ne':

—Še chaclažo', guac yeca'o yižgüe' dan' che'edan'.

<sup>41</sup> Na' Jesúsen' beži'ilaže'de' le' na' beḡue'ne' gwne':

—Chaclaža' yeyacdo'. Beyaque.

<sup>42</sup> Cate' gwne' ca' la' bega'ate yižgüen' na' beyacde'. <sup>43</sup> Nach Jesúsen' besele'ne' liže', bene' mandadw, gože'ne':

<sup>44</sup> —Notno yo'o can' ba beyona' le', con gwyej jaña' bḡoza' cont le'ede' bačh beyacdo', na' bnežjw da' cheyała' gwnežjo' dan' non Moisésen' mandadw cont yeyaco' xilaže' len ley čhe Diosen'. Ben ca' cont yogo' bene' yesenezde' ba beyacdo'.

<sup>45</sup> Perw ben' bi bchejde', yogo'ze bene' gože' can' goca'. Da'nan' Jesús'a' bich goc šeje' con ca nła'ze gate'teze yež, san con gwde' do yiḡe', na' bia'cze bene' za'ac yogo'ze yež jasene'e le'.

## 2

*Jesúsen' beyone' to bene' bi chda šla'a ni'a ne'e*

*(Mt. 9:1-8; Lc. 5:17-26)*

<sup>1</sup> Gwde to chop ža, Jesúsen' beyeje' da' yoble yež dan' nzi' Capernaum, na' bene' Capernaum ca' gosenezde' bežine' to yo'o ga ba gwzoacze'.

<sup>2</sup> Na' bedao'nez besežag bene' zan, necach gosezaque' yesenite' lo' yo'ona' ne cho'a yo'on, nach Jesúsen' gwdixjue'ede' xtiža' Diosen' len legaque'.

<sup>3</sup> Nach besežin xonj bene' cont jasesane' lao Jesúsen' to bene' xinj bene' bi chda šla'a ni'a ne'e; tap bene' zjano'ene'. <sup>4</sup> Perw bi chac yesežine' gan' zoa Jesúsen' catec chyi. Nach goseque'e tej dan' ncu'a' yičj yo'on na' beseletje' le' na'le to lo cam dao'. <sup>5</sup> Na' cate' Jesúsen' gocbe'ede' can' chesejniłaže'nen', gože' bene' güe'na':

—Xi'ina', ba bezi'xena' xtołon'.

<sup>6</sup> Bał bene' chososed chosolo'e ley dan' bzoj da' Moisésen' zjachi'e na', na' gosone' xbab: <sup>7</sup> “¿Bixčhen' chna benga ca'? le chon cuine' ca Dios. Nono zoa bene' gac yezi'xene' xtoła' beḡačh. Toz Diosen' gac yezi'xenen'.” <sup>8</sup> Perw Jesúsen' chacbe'eczede' can' nac xbab čhegaquen', na' gože' legaque':

—¿Bixčhen' chza'laže'le ca'? <sup>9</sup> Še yapa'ne': “Ba bezi'xena' xtoło'na'”, bi nezele še napa' yela' gwnabia' cont yezi'xena' xtole'na', san še yapa'ne':

“Gwyas, beyoa' xcamon'”, na' nachbia' še napa' yela' guac gac can' gwnian'.  
 10 Perw neda' naca' ben' gwseła' Dios golja' beñach, gwlo'eda' le'e ña'a zoa'  
 yežlio nga napa' yela' gwnabia' cont yezi'xena' xtola' beñach.

Nach gože' beñe' xinja':

11 —Chapa' le', beyas, beyoa' xcamon' na' beyej ližo'.

12 La' beyaste beñe' xinja' cheseña'te beñe' ca' nita'na' na' beyoa' xcamen'.  
 Da'nan' yogo' beñe' ca' besyebande' na' goso'e yela' choxc̄clen c̄he  
 Diosen', gosene':

—Bina' le'echo yela' guac dan' nac ca'.

*Jesúsen' goxe' Leví cont gwyejlene'ne'*

(Mt. 9:9-13; Lc. 5:27-32)

13 Da' yoble gwyej Jesúsen' cho'a nisdao' na' beñe' zan besedobe' gan'  
 zeje' na' bsd blo'ede' legaque' xtiža' Diosen'. 14 Na' Jesúsen' gwdie' latje  
 gan' chi' Leví xi'in Alfeo chchixjue' impuesto, na' cate' ble'ede' le' na'  
 gože'ne':

—Da len neda'.

Nach gwzoža' Levín' na' gwyejlene'ne'.

15 Na' gwdena' goquen' chi' Jesúsen' liž Levín' na' güe'ej gwdagwlene'ne'  
 txen len zan beñe' güechixjw na' len yebał beñe' güen da' xinj, na' len  
 beñe' ca' zjanaque' Jesúsen' txen, le zan beñe' zja'ac zjanao' le'. 16 Perw  
 na' beñe' ca' chososed chosolo'e ley dan' bzoj da' Moisés na' beñe' fariseo  
 ca' cate' besele'ede' che'ej chagüe' txen len beñe' ca', gose'e beñe' ca'  
 zjanaque' Jesúsen' txen:

—¿Nacxečen' ben' chsd chlo'e le'e che'ej chagwlene' txen beñe'  
 güechixjw na' yebał beñe' güen da' xinj ca'?

17 Cate' Jesúsen' bende' can' gosene' na' gože' legaque':

—Beñe' bi chesacšene bi cheseyažjde' beñe' güen rmed. Beñe'  
 chesacšende', legaquen' cheseyažjde' beñe' güen rmed. Gague beñe' ba  
 zjanaque' beñe' güen len Diosen' zedeneyoeda' cont yesyetiñjde' xtolen',  
 san beñe' güen da' xinj. Legaquen' zjazaca'lebe' ca beñe' cheseyažje beñe'  
 güen rmed.

*Gosenabde' Jesúsen' bixchen' beñe' zjanaque' le' txen bi chesone' gwbas*

(Mt. 9:14-17; Lc. 5:33-39)

18 To ža cate' beñe' ca' zjanaque' txen len Juanna' na' beñe' zjanaque'  
 txen len beñe' fariseo ca' gosezoe' gwbas, bał beñe' jasa'aque' jasenabde'  
 Jesúsen':

—Beñe' ca' zjanaque' txen len Juanna' na' beñe' ca' zjanaque' txen len  
 beñe' fariseo ca' chesone' gwbas, na' beñe' ca' zjanaque' txen len le' bi  
 chesone' gwbas. ¿Bixchen'?

19 Na' Jesúsen' gože' legaque':

—¿Guaque yesezoa gwbas beñe' chaxe' to ga chac yela' güešagna' šlac  
 ben' bšagnan' zualene' legaque'? Še zoa ben' bšagnan', bi gac yesone' gwbas.

20 Perw žin ža cate' bich zoe' len legaque', cana'ch yesone' gwbas. Na'  
 ca'czen' naquen len neda' na' len beñe' ca' zjanaque' neda' txen.

21 'Nono zoa beñe' yode'e to lache'exo' na' yezoen' to lache' cobe, le  
 lache' coben' yeben' cate' chiben' na' šon' lache' golen', na' gan' žon'na'  
 gacchen da' xen. 22 Neca zoa beñe' chgue'e vino cobe lo' bzod yide'exo', le  
 vino coben' chšon' yide'exon' na' chbiayi' vinon' len yida'. San chesegue'e  
 vino coben' lo' yid cobe cont bibi gaquen.

*Beñe' ca' zjanaque' Jesúsen' txen chesalje' dao ža che Dios*

*(Mt. 12:1-8; Lc. 6:1-5)*

<sup>23</sup> To ža che Dios Jesúsen' gwdie' to ga nyaž trigw, na' bene' ca' zjanaque' le' txen gosezolagüe' chesalje' dao che trigon' šlac gosedie' gan' nyaženna'.

<sup>24</sup> Nach bene' fariseon' gose'e le':

—Gwna'šc ¿bixchen' cheson bene' ca' zjanaque' le' txen žin da' bi cheyała' yesone' ža che Dios?

<sup>25</sup> Na' Jesúsen' gože' legaue':

—¿Biña' gwlable can' ben da' rey David to ža cate' le' na' bene' lježe' ca' gosedone'? <sup>26</sup> Gwyo'o Davin' ga nac liž Dios cate' da' Abiatar goque' bꝑoz blao, na' gwdagüe' yetextil da' nac che Dios da' bi chac gagw bene' bi nac bꝑoz, na' lecze bnežjue' che bene' zja'ac len le'.

<sup>27</sup> Lecze gož Jesúsen' legaue':

—Diosen' gwleje' to ža cate' bi yeson beñachen' žin cont gaclenen beñach, gague gwleje' beñachen' cont yesonxene' ža chen'. <sup>28</sup> Da'nan' naquen lo na' ñia' bi da' nac güen goncho lente cate' nac ža che Dios, neda' naca' ben' gwsela' Diosen' golja' beñach.

### 3

*Jesúsen' beyone' to bene' nꝑo'on šla'a taque'*

*(Mt. 12:9-14; Lc. 6:6-11)*

<sup>1</sup> Yeto ža che Dios Jesúsen' gwyo'e da' yoble to lo' yodao' che neto' bene' Israel na' ca hora' ba chi' to bene' nꝑo'on šla'a taque'. <sup>2</sup> Na' bene' ca' že' lo' yodao'na' chosogüia chesene'e Jesúsen' še yeyone' bena' žan' nac ža che Dios cont de da' yosode'ede' yesagüe' xya che'. <sup>3</sup> Nach Jesúsen' gože' ben' nꝑo'on taquen':

—Gwzoža' na' gwzecha nga.

<sup>4</sup> Nach gwñabde' bene' ca' yezica'chle:

—¿Bi da' cheyała' goncho ža che Dios? ¿Goncho da' güen, še goncho da' mal? ¿Cheyała' yoslacho bene', še cheyała' gotchone'?

Perw na' legaue' gosenite' šižize. <sup>5</sup> Nach Jesúsen' gwñe'e legaue', bže'e can' gosone' xbab, na' lecze gocyasē'laže'de' dan' bi gosejle'e che', nach gože' ben':

—Bli naon'.

Na' blien', na' taquen' beyaquen binlo. <sup>6</sup> Nach besyežaš bene' fariseo ca' na' gosezolagüe' chosoxi'e len bene' ca' zjada' Herodes naquen' yesone' yesote' Jesúsen'.

*Zan bene' nita' cho'a nisdaon'*

<sup>7</sup> Nach Jesúsen' gwyeje' cho'a nisdaon' len bene' ca' zjanaque' le' txen, na' zan bene' Galilea ja'ac len le'. <sup>8</sup> Na' zan bene' za'aque' Judea, na' Jerusalén, na' Idumea, na' yešla'a yegw Jordán, na' gan' mbane Tiro na' Sidón goside' bedeseñe'e le' cate' gosenezde' yela' guac da' chonen'. <sup>9</sup> Da'nan' Jesúsen' gože' bene' ca' zjanaque' le' txen yeseyiljue' to barcw dao' gan' cuie' cont bi yosochi bene' ca' zjanžaga' le', <sup>10</sup> le' bene' zan ba beyone', na' bene' ca' ñe' chese'ede' chosožiga' lježe' nac gac yesoxe'ne'. <sup>11</sup> Na' bene' ca' zjajo'o zjanyaz da' xigüen' cate' chesele'ede' Jesúsen' chosoza xibe' lagüen' na' da' xigüe' ca' chososya'an chese'en le':

—Len' naco' dogualje Xi'ñ Dios.

<sup>12</sup> Perw Jesúsen' gwdile' legaquen na' bene' mandadw bi yesenan no nac le'.

*Jesúsen' gwčhie' bene' šižinw ca' gosaque' txen len le'*

*(Mt. 10:1-4; Lc. 6:12-16)*

<sup>13</sup> Beyoža' Jesúsen' gwloe' to lo ya'a na' goxe' bał bene' goclaže' šja'aclene' le', nach gosa'aque' ja'aque' gan' zoen'. <sup>14</sup> Nach gwleje' šižinw bene' yesenita' len le', cont sele' legaque' šjasedixjue'ede' xtižen'. <sup>15</sup> Na' bnežjue' legaque' yela' guac cont yesyeyone' bene' güe' na' yela' gwnabia' cont yesyebje' da' xigüe' da' yo'o nyaz bene'. <sup>16</sup> Šižinw bene' quin' gosac: Simón ben' lecze gože'ne' Pedro; <sup>17</sup> Jacobo len bene' biše' Juan bene' ca' zjanac xi'in Zebedeo, na' bsi'e legaque' Boanerges, zeje diža' bene' zjanac ca' yi' gwzio' cate' chašjw chtinen; <sup>18</sup> nach Andrés, na' Felipe, na' Bartolomé, na' Mateo, na' Tomás, na' Jacobo xi'in Alfeo, na' Tadeo, na' Simón ben' gwde'e bene' ca' zjanzi' cananista, <sup>19</sup> na' Judas Iscariote ben' gwdechle bdie' Jesúsen' lo na' bene' ca' chesegue'ede' le'.

*Gosene' Jesúsen' bebeje' da' xigüe' len yela' guac che Beelzebú*

*(Mt. 12:22-32; Lc. 11:14-23; 12:10)*

Beyoža' Jesúsen' len bene' ca' zjanaque' le' txen goso'e lo' yo'o gan' zoe' ca hora', <sup>20</sup> na' da' yoble besežagchgua bene', neca goc yese'ej yesagw Jesúsen' len bene' ca' zjanaque' le' txen. <sup>21</sup> Na' cate' goseneze biše' ljež Jesúsen', ja'aque' cont yesyeche'ene', le gosene' chactonte'.

<sup>22</sup> Nach bene' ca' bososed bosolo'ede' ley dan' bzoj da' Moisés gosa'aque' Jerusalén na' ja'aque' distritw Galilea gan' chsed chlo'e Jesúsen' na' gose'e bene' ca' že'na':

—Benga yo'o nyaze' Beelzebú dan' chnabia' da' xigüe' ca', na' Beelzebún' chaclenen le' cont chebeje' da' xigüe' zjajo'o zjanyaz bene'.

<sup>23</sup> Nach Jesúsen' goxe' bene' ca' na' bsd blo'ede'ne' gwne':

—¿Nac gon Satanás dan' chnabia' da' xigüe' ca' yebejen lecze da' xigüe'? <sup>24</sup> Še to gobiern choje' chop šon cuenle na' yeyoža' yesedile legacze', gobiernna' bi sibi'e. <sup>25</sup> Na' še bene' že' toz yo'o yesechoje' chople na' yesedile legacze', gague sša yesenite' txen. <sup>26</sup> Na' še Satanásen' len da' xigüe' chen yesechojen chople na' yesedilen, lecze bi sibian', san na' yeyož yedon.

<sup>27</sup> Nono gac šo'e lo' yo'o che to bene' gual na' que'e bi da' de che' še chi zgua'tec gwčheje' bene' gual na', lete gone' ca' nach gac que'e bi da' de che'.

<sup>28</sup> 'Da' li žia' le'e, yogo' da' xinj da' chon beñach na' yogo' diža' bya' da' yesene', Diosen' yezi'xene' chen še yesyetinjde'. <sup>29</sup> Perw note'teze bene' ne' yela' ya' che Spiritw che Dios, gwbat yezi'xen Diosen' che', san de doła' che' toli tocanē.

<sup>30</sup> Gwne' ca' dan' gosene' che' yo'o nyaze' da' xigüe'.

*Xña' Jesúsen' na' bene' biše' gosaxe'ne'*

*(Mt. 12:46-50; Lc. 8:19-21)*

<sup>31</sup> Na' bžin xña' Jesúsen' len bene' biše', na' gosenite' chy'ole gosaxe' le'.

<sup>32</sup> Na' bene' ca' zjanita' cuít Jesúsen' gose'ene':

—Xña'o len bene' bišo' ca' zjanite' chy'o' na' chesyeyiljue' le'.

<sup>33</sup> Nach Jesúsen' gože' legaque':

—¿Nezele non' nac xña'a na' no zjanac biše' lježa'?

<sup>34</sup> Nach gwne'e bene' ca' zjachi' cuíte'na', na' gwne':

—Bene' quin' zjanac xña'a na' zjanaque' biše' lježa'. <sup>35</sup> Le note'teze bene' chone' da' chna'laže' Dios, bena' nac bene' biša', bene' zana', lecze naque' xña'a.



## 4

*Jempl che bene' goz trigo**(Mt. 13:1-9; Lc. 8:4-8)*

<sup>1</sup> Yeto ža yoble gwzolaŋ Jesúsen' chsed chlo'ede' cho'a nesdaon', na' besežagchgua bene' zan juisyw gan' chi'ena'. Na' da' besežagchgua bene' zan, benten byen gwyo'o Jesúsen' to lo' barcw dao' da' chda' lo' nesdaon' cho'a yo bižen' na' gwchi'e lo'enna', na' yogo' bene' ca' gosenite' cho'a nesdaon' ga nac yo biž. <sup>2</sup> Nach da' zan da' bsd blo'ede' legaque' len jempl da' bi'e. Na' bzejni'ide' legaque', gwne':

<sup>3</sup> —Le gwzenag da' nga: To bene' güen žin jeze' trigw. <sup>4</sup> Na' šlac zeje' chose' trigon', late' bin' che trigw dan' chazen' jasechazen chanez nach be ca' žia xil be chaš le'e yaba gosagwban'. <sup>5</sup> Yelaten' jasechazen ga nac lo' yej, ga bibi yotec zoa, na' da' nga byob blan' le' bi jasechazen ga nac sitjw. <sup>6</sup> Perw cate' bla' gwbiža' na' bzeyen len na' gwbižen, le' gague yo'otec loenna' sitjon'. <sup>7</sup> Yelaten' jasechazen ga nac lo' yag yeše', na' yag yešen' gosecha'on na' bosololen' len, na' bibi gosebjan. <sup>8</sup> Perw na' yelaten' jasechazen ga nac yo šagüe'. Da' nga beselan' na' gosecha'on na' leca güen gosebjan, bažen gosebjan do šichoa güeje to ton, bažen gayon, na' yebažen do to gayo.

<sup>9</sup> Na' gože' legaque':

—Le'e žia nagle da' chene, le' gwzenag xtiža'na'.

*Bichen' bzejni'ide' bene' len jempl**(Mt. 13:10-17; Lc. 8:9-10)*

<sup>10</sup> Gwdena' cate' ba besyeya'ac bene' zan ca', bene' ca' zjanita' gala'ze len le' na' len bene' šižinw ca' zjanaque' le' txen, gosenabde' le' bi zejen jempl dan' bi'en. <sup>11</sup> Na' gože' legaque':

—Nono na' neze can' nac yela' gwnabia' che Diosen', perw ba chone' cont le'e chejnilaže'lene' nezen. Na' bene' bi chesaclaže' yesejnilaže' Diosen', choe'lengaca'ne' xtižen' len jempl. <sup>12</sup> Chona' ca' cont yesele'ede' can' chonan' na' bitw yesache'ede' bi zejen, na' cont yesende' xtižan' na' bi yesejni'iden', na' neca yesyetiñjde', neca yezi'xen Diosen' xtolen'.

*Jesúsen' bzejni'ide' bi zejen jempl che ben' ben goza'**(Mt. 13:18-23; Lc. 8:11-15)*

<sup>13</sup> Nach gože' legaque':

—¿Bi chejni'ile jempl nga? ¿Nacxe gac šejni'ile jempl yoble da' güe'lena' le'e? <sup>14</sup> Ben' ben goza' naque' ca' ben' choe' xtiža' Diosa'. <sup>15</sup> Na' bał bene' zjanaque' ca' bin' dan' beselažo' chanez, le' chosozenague' cate' chas chlalje xtiža' Diosen', na' ca' cheyoža' la' chžinte Satanásen' dan' chnabia' da' xigüe' ca' na' chebejen xtiža' Diosen' dan' ba yo'o yichjlažda'ogüen'. <sup>16</sup> Yebał bene' zjanaque' ca' bin' dan' beselažo' ga nac lo' yej na' bi ben loen. Legaque' chesyebede' chosozenague' xtiža' Diosen', <sup>17</sup> perw šložga chesezibi'e, na' cate' chesac bi da' mal chegaque' o bichle chesone bene' legaque' neche da' chosozenague' xtiža' Diozen', la' chesebejyichjten'. <sup>18</sup> Na' yebałe' zjanaque' ca' bin' dan' besego'onen ga nac lo' yag yeše'. Chosozenague' xtiža' Diosen', <sup>19</sup> na' šlac zjambane' chesyelał chesyžejde', na' da' chesaclaže' yeseni'e chziye'en legaque' na' chesezelaže' yogo'ze da' de yesata' che'. Yogo' da' qui bi choen' latje yega'an xtiža' Diosen' lo' yichjlažda'ogüen' na' da'nan' bi chesejnilaže' le' ca' cheyał'. <sup>20</sup> Perw na' nita' bał bene' chosozenague' xtiža' Diosa' na' chesejnilaže' le' do yichj

do laže', bene' qui zjazaca'lebde' ca biñ dan' beselažo' lo yo šagüe'. Baļe' zjanaque' ca biñ dan' gosebjan šichoa güeje to ton, na' yebaļe' ca da' ca' bexoen' gayon, o ca no da' ca' bexoen' to gayoa güeje to ton.

*Jempl che yi' dan' chguala'cho*

(Lc. 8:16-18)

<sup>21</sup> Lecze gože' legaque':

—Cate' chguala'cho to yi' ġgw dosa'chon to caj o gwzoachon xan cam? Bi choncho ca', san chguala'cho yin' na' chzoachon sibe cont gwsenin'. <sup>22</sup> Na' da' ngaše' chia' neda' na'a, lenna' gwlo'elaon, na' da' nono na' neze chia', žin ža yeseņezden'. <sup>23</sup> Le'e žia nagle da' chene, le gwzenag xtižan'.

<sup>24</sup> Lecze gože' legaque':

—Le gwzenag da' quingan' da' chzejni'ida' le'e. Le con can' chonle len len, can' gon Diosen' len le'e. Na' gonchcze' cont soachle mbalaz da' chzenagle che'. <sup>25</sup> Le še chzenagle xtižen' gwzejni'ichde' le'e, perw na' še bi chzenaglen, da' daon' ba nezele yeyanlaže'len.

*Jempl che biñ dan' chlan' na' chcha'on*

<sup>26</sup> Lecze gwna Jesúsen':

—Yeļa' gwnabia' che Diosen' zaca'leben ca dan' chac cate' to bene' chaze' bite'teze biñ lo yo. <sup>27</sup> Chjaytase' na' chebane' cheyase', chde ža yel, na' chla' dan' gozen' na' chcha'on, perw le' bi neže' naquen' chac. <sup>28</sup> Le to gualazze yežlio nan' chonen len, zgua'tec chla' lbe'edagüen', nach chlan' dao, na' cheyoža' chbian da' cheyaļa' cuian. <sup>29</sup> Na' cate' ba goļ dan' chbianņa' na' chja'aque' chjasyexi'en, le ba bžin cho'a gwlap.

*Jempl che biñ che xomdas*

(Mr. 13:31-32; Lc. 13:18-19)

<sup>30</sup> Nach lecze gwna Jesúsen':

—Gonchcho xbab bi ca da' zaca'lebe yeļa' gwnabia' che Diosen' na' güe'cha' jempl cont nezele šanch bene' yosozenag che' cont nabi'e yichjlažda'ogaque'. <sup>31</sup> Naquen ca to biñ che xomdas da' chyaž lo yo. Len chnabia' nac da' dao' len biñ ca' chazcho lo yežlion'. <sup>32</sup> Perw cate' bač nyažen, chcha'on na' chaquen da' xench lao yiže' cuan ca', na' da' xenchgua chac xol che xozenna', na' lente byiñ dao' ca' chesyezi'laže'ba' lo xozenna'.

*Jesúsen bgone' žin jempl*

(Mt. 13:34-35)

<sup>33</sup> Can' blo'e Jesúsen' xtiža' Diosen' yogo' ni'a, bi'e zan jempl ca che ben' goza' na' che biñ ca', con ga zelao goc gosejni'ide'. <sup>34</sup> Bitwbi bzejni'ide' legaque' sin ca be'e jempl, nach cate' bich nita' bene' zan ca', bzejni'ide' bene' ca' zjanaque' le' txen bi zejen yogo' da' ca'.

*Jesúsen' bebecžie' be' bdono' len nisdao'*

(Mt. 8:23-27; Lc. 8:22-25)

<sup>35</sup> Leze lo žana' cate' gwxin, Jesúsen' gože' bene' ca' zjanaque' le' txen:

—Le šo'o lağa'cho yešļa'a nisdaon'.

<sup>36</sup> Nach bosyocua'aņe' yezica'chle bene' ca' že' gan' ba bsd blo'ede' na' gosa'aque' lo' barcw daon' gan' ba yo'ocze Jesúsen'. Na' yebaļ bene' lecze ja'aclene' legaque' len yeto chop barcw dao'. <sup>37</sup> Na' gwzolao gwyechjhgua to be' bdono' na' nisdaon' leze chas chatan', na' gwzolao cheyož nis lo'

barcon'. <sup>38</sup> Jesúsen' ba chtase' xante barcon' to lo xcogue' caten' goc ca'. Na' bosyosbane' le' gose'ene':

—¡Maestro! ¿Bibi de chza'lažon' še ba gwdebe nesdaon' chio'?

<sup>39</sup> Nach gwyas Jesúsen' na' gwdile' be' bdonon' na' gože' nesdaon':

—¡Šižize! ¡Šižize!

Na' bebe'ži be' bdonon' na' beyata'ži nesdaon'. <sup>40</sup> Nach Jesúsen' gože' bene' ca' zjanaque' le' txen:

—¿Bixchen' chžebtecle? ¿Nacxečen' bi chejle'le chia'?

<sup>41</sup> Legaque' besežebchgüe' na' gose' lježe':

—¿Noxe benga? lente be' bdonon' na' len nesdaon' chosozenaguen che da' že'.

## 5

*Bene' Gadara yo'o nyaze' da' xigüe'*

(Mt. 8:28-34; Lc. 8:26-39)

<sup>1</sup> Besežine' šla'a nesdaon' gan' mbane Gadara, <sup>2</sup> na' cate' bechoj Jesúsen' lo' barcon' to bene' yo'o nyaz da' xigüen' bchoje' lo' capsantw na' jašague' le'. <sup>3</sup> Bena' ba zoacze' capsantw na'le na' nono chzoe goxe' le', ne len gden ca goseozede' le'. <sup>4</sup> Da' zan ni'a bosocheje' ni'a ne'e gden, perw bia'cze gwchoguen', con bzojx btinen', na' nono gwzoe le'. <sup>5</sup> Yogo' ža yogo' yel gwde' bosya'adie' do lo ya'a na' do ladjo ba ca' na' tža tža chone' zi' cuine' len yej. <sup>6</sup> Na' cate' ble'ede' Jesúsen' zito' gwyejsese' jazoa xibe' lagüen', <sup>7</sup> na' da' xigüen' benen cont bosya'adie' gože' le':

—¿Bixchen' chgoša' chlaže' chio' len neda', Jesús? Naco' dogualje Xi'in Dios bene' nape la'zelagüe yela' chnabia' xen. Neche Dios chneyoeda' le' bi gwsaco' neda'.

<sup>8</sup> Da' xigüen' benen cont gwna ben' ca' dan' gož Jesúsen' len:

—Da' xigüe', bsan benga.

<sup>9</sup> Na' gwnabe Jesúsen' len:

—¿Bi lio'?

Na' boži'in xtižen':

—Legión lia', le nac zanto'.

<sup>10</sup> Na' goseneyoen Jesúsa' bi yeselen' zito' cate' yesyežašen' yichjlaždao' ben'. <sup>11</sup> Na' gala'ze lo ya'ana' chesaš zan coš chesagwba'. <sup>12</sup> Nach da' xigüen' goseneyoen le':

—Gwseła' neto' gan' nita' coš ca' na' ben' latje šjajo'oto' lo' yichjlažda'oban'.

<sup>13</sup> Nach Jesúsen' bnežjue' latje, na' besyechoj da' xigüen' lo' yichjlaždao' bena' na' jasyeyo'on yichjlaždao' coš ca'. Nac ca do chop mil cošen'. Na' besyeyetjses coš ca' le'e ya'a gan' nita'ban' na' jaselažo'ba' lo' nisdao' ga gosatba' gose'ejba' nis.

<sup>14</sup> Nach bene' ca' chosoyoe' cošen' bosyoxonje' jasyeyeže' bene' lagüe yež len bene' chaš yixe' can' goca'. Na' ja'ac bene' jasene'e bixen' goc. <sup>15</sup> Cate' besežine' gan' zoa Jesúsen' besele'ede' ben' ba gwyo'o gwyaz da' xigüen', na' na'a ba chi'e nyaz xalane' na' ba bezoa yichjlažda'ogüen' binlo. Na' besežebe'. <sup>16</sup> Na' bene' ca' besele'ede' can' goquen' goso'e diža' che dan' goc len ben' gwyo'o gwyaz da' xigüen', lez ca' dan' goc len coš ca'. <sup>17</sup> Nach gosezologüe' gosata'yoede' Jesúsen' yeze'e lažgaquen'.

<sup>18</sup> Na' cate' beyo'o Jesúsen' lo' barcon' ben' ba gwyo'o gwyaz da' xigüen' gota'yoede' Jesúsen' šejlene' le'. <sup>19</sup> Perw Jesúsen' bi be'e latje, san gože' le':

—Beyej ližo' na' jayež beṇe' lo' yo'o chio' na' no beṇe' migw chio' yogo' da' güen da' ba ben Xancho Diosen' len le' na' catec ba beyaše' beži'ilaže'de' le'.

<sup>20</sup> Na' beza' ben' na' gwzologüe' cho'e diža' yež ca' gan' mbane distritw Decápolis yogo' can' ben Jesúsén' len le', na' yogo' beṇe' gosene xtižen' besyebande'.

*Bi' no'ol che Jairo, na' no'ol ben' gwdane' xa Jesúsén'*

*(Mt. 9:18-26; Lc. 8:40-56)*

<sup>21</sup> Cate' bežin Jesúsén' cho'a nesdaon' zeze'e lo' barcw daon' dan' zeza' šla'a nesdaon', beṇe' zan ja'aque' gan' bežinen', na' Jesúsén' bega'ane' cho'a nisdao' na'ze. <sup>22</sup> Nach bžin to ben' nac beṇe' gwnabia' che yodao' che yežna', lie' Jairo. Cate' ble'ede' Jesúsén' bzoa xibe' lagüen' <sup>23</sup> na' gota'yoechgüede'ne' gože'ne':

—Xi'ina' no'ole ba chatbe'. Benšca goclen yo'o xoa taco' yichjbe' cont yeyaquebe' na' bi gatbe'.

<sup>24</sup> Nach Jesúsén' gwyejlene' le'. Na' beṇe' zan ja'acch, na' bosochichgüe' le'. <sup>25</sup> Ladjo beṇe' ca' len to no'ol che'ede', ba goc šižinw iz chzoe' gwbaao'.

<sup>26</sup> Ba bžaglaochgüe' jen cuine' rmed len zan beṇe' güen rmed ca', na' ba benditje' yogo' xmechue' da' de, perw bitwbi gwxi'czen, san chyalal'en.

<sup>27</sup> Cate' bende' cheso'e xtiža' Jesúsén', no'olna' gwdie' ladjo beṇe' ca' na' bžine' cože'le Jesúsén' na' gwdane' xen'. <sup>28</sup> Le bene' xbab, gwne': "Con še ba gwdana' xen' nach yeyactecza'." <sup>29</sup> Na' da' li cate' gwdane' xen' la' gwlezte gwbaao' dan' zoen', na' no'olen' gocbe'ede' ba bega'a yižgüe' chen'. <sup>30</sup> Na' Jesúsén' la' gocbe'etede' to beṇe' ba beyacde' len yela' guac chen', nach gwyechje' gwne'e beṇe' ca' nita' cože'le, na' gwṇabde' legaque':

—¿Non' gwdan xan'?

<sup>31</sup> Nach beṇe' ca' zjanaque' Jesúsén' txen gose'ene':

—Ba ble'eczede' ca chosochie' le', ¿bixchen' chṇabo' non' gwdan xaon'?

<sup>32</sup> Perw Jesúsén' chne'e nile na'le cont le'ede' non' gwdan xen'. <sup>33</sup> Nach no'olen' nezde' can' ba goc che' na' do chaž chžebe' gwyeje' jazoa xibe' lagüen' na' gože'ne' yogo' da' li. <sup>34</sup> Na' Jesúsén' gože'ne':

—Xi'ina', ba beyacdo' dan' chejnilažo' neda'. Beyej binlo, na' bich bi gacdo' len yižgüe' chion'.

<sup>35</sup> Ne' choe'te Jesúsén' dižan' ca' cate' besežin beṇe' gosa'ac liž xan yodaon', na' gosi'e xa bi' no'ol daon':

—Ba got bi' chion', ¿bixchen' choncho' zed Maestro nga?

<sup>36</sup> Perw Jesúsén' bi bene' cuent dan' chesena beṇe' ca', na' gože' xan yodaon':

—Bitw žebo', con gwyejle' chia'.

<sup>37</sup> Na' bi bi'e latje šja'aclen beṇe' zan le' gan' xoa bi' no'olen', san Pedro, Jacobo na' Juan beṇe' biše' Jacobo, beṇe' ca'ze ja'aclen le'. <sup>38</sup> Na' cate' besežine' liž xan yodaon', ble'ede' ba chi' žaš chesosye'e chesebeže'.

<sup>39</sup> Nach gwyo'e na' gože'legaque':

—¿Bixchen' mbecle žaš chbežle? Bi no'ol daon' biṇa' gatbe', san chtasben'.

<sup>40</sup> Perw bosoxiže' gosonle' che'. Nach Jesúsén' bešaše' yogo'lole', na' gwche'e xaxṇa'be' na' beṇe' ca' zja'aclen le' na'ze na' goso'e len le' gan' de bi' no'ol daon'. <sup>41</sup> Na' beṇue' taca'ben' na' gože'be':

—Talita, cumi —zeje diža': Bi' no'ole, chapa' le' beban na' beyas.

42 Nach bi' no'ol daon' la' beyastebe' na' goc beza'be', le šižinw izeguben'. Na' beñe' ca' besele'e leca besyežejde' can' goca'. 43 Perw Jesúsen' gože' legaque' nono yes'e ca', na' gože' legaque' yeso'e bi' no'ol daon' da' gagwbe'.

## 6

*Jesúsen' bežine' distritw gan' chi' yež Nazaret*

*(Mt. 13:53-58; Lc. 4:16-30)*

1 Na' beza' Jesúsen' na' bežine' laže', na' beñe' ca' zjanaque' le' txen ja'aclene' le'. 2 Na' cate' bžin ža che Dios, Jesúsen' gwzologüe' bsd blo'ede' lo' yodaon'. Na' beñe' zan beñe' gosende' xtižen' besyebande' na' gosene': —¿Nacxe chaquen' cho'e diža' ca'? ¿Bi yela' sinan' ñezde'? na' ¿nacxečen' chac chone' yela' guac ca'? 3 Benga chonšagüe' yag na' naque' xi'in María. Nombia'chwn'e' na' beñe' biše' Jacobo, José, Judas na' Simón, na' lecze beñe' zane' ca' nite' lažcho nga.

Na' da' zjanombi'ene' nan' bi gosaclačže' yesejle'e che'. 4 Nach Jesúsen' gože' legaque':

—Yogo'ze beñe' chesonxene' beñe' choe' xtiža' Diosen', perw beñe' gualaž che', beñe' biše' lježe' na' beñe' lo' yo'o che' bi chosozenague' che'.

5 Na' ñe to yela' guac ca' goc gone' na', lete gwxo'a taquen' yichj to čop beñe' güe' na' beyone' legaque'. 6 Na' bebande' dan' bi gosejle' beñe' che'. Na' gwdechle gwda Jesúsen' bsd blo'ede' to to yež dao' ca' nita' gala'ze.

*Jesúsen' gwsele' bene' ca' zjanaque' le' txen jasedixjue'ede' xtiža' Diosen'*

*(Mt. 10:5-15; Lc. 9:1-6)*

7 Na' goxe' beñe' šižinw ca' na' gwsele' čop güeje' to to yež, na' bnežjue'ne' yela' gwnabia' cont goc besyebeje' da' xigüe' lo' yichjlaždao' beñe'. 8 Na' cate' za' yesa'aque' gože' legaque' bibi yesoxe' chanez, ñe bzod, ñe yetextil, ñe mechw, con yesoxe' to xis da' yosočiše'. 9 Na' yosoleje' yel perw bi yesoe' yeto xcamise'. 10 Na' lecze gože' legaque':

—Cate' žinle to liž beñe', na'ze yega'anle šlac zoale lagüe yeža', cate'ch yeza'le yeža' cana'ch yeza'le latja'. 11 Na' še zoa ga bi yosolebe' le'e ñeca yosozenague' chele, cate' yeza'le na' le cuibe ni'al'en' yo bište cont nacbia' malen' chesone' bi chosozenague' xtiža' Diosen'. Da' li žia' le'e cate' žin ža gac juisyw beñe' ca' bi yosolebe' le'e yesacche' castigw cl'el ca' beñe' Sodoma na' beñe' Gomorra.

12 Nach gosa'aque', na' goseyixjue'ede' cheya'la' yesyetiñje xtol'a' benachen'. 13 Leze besyebeje' da' xigüe' da' yo'o nyaz beñe', na' zan beñe' güe' goseyebe'ne' set na' besyeyacde'.

*Gosote' Juan ben' bzoe' beñe' nis*

*(Mt. 14:1-12; Lc. 9:7-9)*

14 Na' ca' nac rey Herodes, gwñezde' can' chesone', le yogo'ze beñe' gosende' can' ben Jesúsen'. Na' Herodesen' gwne':

—Juan ben' bzoe' beñe' nisen' ba beban ladjo beñe' guat ca'. Da'n'an' chaque' chone' yela' guac.

15 Yeba'le beñe' gosene':

—Naque' ben' be' xtiža' Diosen' cani', ben' le Elías.

Na' yeba'le' gosene':

—Naque' con to beñe' choe' xtiža' Dios ca' beñe' ca' gosoe' xtiža' Diosen' cani'te.

16 Cate' Herodesen' bende' dižan' nac ca' na' gwne':

—Bengan' Juan ben' gwčhogbi'an gosečogue' yene', na' na'a ba be-bane' ladjo beṇe' guaten'.

17-18 Le Herodesen' beque'e Herodías na' gwzoalene' le' goque' xo'ole' la'czla' Herodíasna' naque' xo'ole Felipe biše'na'. Na' Juanna' gože' Herodesen':

—Bi cheyała' soalen no'ol che beṇe' bišon'.

Da'nan' Herodesen' gwčhogbi'en gosezene' Juanna' na' bosočeje'ne' len gden lo' yo'o ližya gan' gosegüe'ene'.

19 Can' goc Herodíasna' bgue'ede' Juanna' na' goclaže' gote'ne', perw bi goc. 20 Le Herodesen' gwneзде' Juanna' naque' to beṇe' chon da' zej to licha na' to beṇe' yo'o lo na' Dios, nachen' Herodesen' bžebe' Juanna' na' bi be'e latje bi gone Herodíasen' le'. Na' la'czla' bi gwejni'iteque Herodesen' dan' bšalj Juanna', con bebede' bzenague' che'. 21 Perw Herodíasen' beyiljwlaže' nac bene' cate' ben Herodesen' lni gola' ža le', bsini'e xše' da' gwdagüe' len beṇe' gwnabia' che' ca' na' no xan soldaw ca' na' nochle beṇe' blao že' distritw Galilean'. 22 Bi' no'ol che Herodíasen' gwyo'obe' bya'abe' gan' gosagüe' xšen' na' beca'a Herodesen' can' bya'aben', lez ca' ben' gosagw len le' xšen'. Na' reyna' gože' bi' no'ola':

—Gwnabe neda' con da' žan čhio' na' goṇan'.

23 Na' lecze gože'be':

—Diosen' naque' testigw chia' goṇa' le' con da' nabdo'nda', la' gašjo yež ca' gan' mbanda' chnabi'a.

24 Na' bechojbe' na' gožbe' xṇa'ben':

—¿Bi nabda'ne'?

Na' le' gože'be':

—Gwnab yichj Juan ben' chzoe' beṇe' nis.

25 Na' la' beyo'otebe' gan' chi' reyna' na' gožbe'ne':

—Che'nda' netecṇa'a goṇo' neda' to lo' platw yichj Juan ben' chzoa beṇe' nis.

26 Na' ne late'ze bi gwyazlaže' reyna' gone' can' gož no'ol güegon' le', perw bachle gwne' lao beṇe' ca' jasa'ac lṇin' Diosen' naque' testigw che' gwnežjue'be' bite'teze nabebe' le', da'nan' bi bžone' gac dan' gwnabebe' le'.

27 Nach la' gwsela'te reyna' to soldaw na' gože'ne' šjaxi'e yichj Juanna'.

28 Na' gwey soldadon' lo' yo'o ližyan' na' jačogue' yen Juanna', na' bžie' yichje' to lo' platw jasanen' bnežjuen' bi' no'ola', na' bi' nga bnežjwben' xṇa'be'.

29 Cate' gosenēze beṇe' ca' zjanaque' txen len Juanna', jasexi'e cuerp chen' cont bosocuaše'ne'.

*Jesúsen' bguagüe' gayo' mil beṇe'*

*(Mt. 14:13-21; Lc. 9:10-17; Jn. 6:1-14)*

30 Beyoža' postlw ca' besyežague' len Jesúsen' na' gose'ene' bica' da' ba gosone' na' da' ba bosolo'ede'. 31 Na' Jesúsen' gože'ne':

—Le da, le šo'o ga nac lchojiže' yezi'laže'cho late'.

Gwne' ca' le chep chetj chac beṇe', neca chac latje yesagüe'. 32 Nach Jesúsen' len postlw che' ca' gosa'aque' ja'aque' legacze' to lo' barcw, ja'aque' ga nac lchojiže'. 33 Perw zan beṇe' besele'ede' gosa'aque' na' besyeyombi'e Jesúsen', na' zan yež beṇe' ca' bosoxonjsese' na' byobch besežine' ca' Jesúsen'. 34 Na' cate' Jesúsen' bchoje' lo' barcon' ble'ede' ba besežag beṇe' zan na' beyaše' beži'ilaže'de' legaque', le nite' ca nita' no xila'

be nono de gwyoeba'. Nach gwzolaogüe' bsed blo'ede' legaque'. <sup>35</sup> Cate' ba zoa xin, bene' ca' zjanaque' le' txen gose'ene':

—Ba zoa xin, na' latj gan' zoacho nga naquen latj daš. <sup>36</sup> Na' besela' bene' quinga cont šja'aque' ga že' bene' do ranšw na' do yež dao' ca' dan' nyečj mbi'i šjasexi'e da' yesagüe', le bibi de yesagüe'.

<sup>37</sup> Na' Jesúsen' gože'ne':

—Le'e le güe'e da' yesagüe'.

Na' legaque' gose'ene':

—Bi de laxjwto' che čop gayoa ža žin cont šjaxi'to' da' güe'to' legaque' yesagüe'.

<sup>38</sup> Jesúsen' gože'ne':

—¿Gaca' yetextilen' de čele? Le šja'ac le šjana'.

Cate' gosenezde' na' gose'ene':

—De gayo' yetextil na' yečhop bel ya'a.

<sup>39</sup> Nach gože' bene' ca' yesebi'e to xonj güeje' lo yixyen'. <sup>40</sup> Na' gosebe' to gayoa güeje' na' yebale' šiyon güeje'. <sup>41</sup> Nach Jesúsen' gwxi'e yetextil ca' gayo' na' bel ya'an čope, na' gwne'e le'e yaba bi'e yela' choxclen che Dios na' bzoxje' yetextilen' bi'en bene' ca' zjanaque' le' txen cont goseyisen' len bene' ca'. Leze gwdisse' bel ya'a ca' čop lao yogo'lol bene' ca'. <sup>42</sup> Na' yogüe' gosagüen' na' goseljde'. <sup>43</sup> Beyoža' bososse'e yešižinw žome yetextil bixjw na' len late' güeje' bel da' bega'an. <sup>44</sup> Na' bene' ca' gosagw yetextilen' gosaque' gayo' mil bene' byo, bi cuent no'ol ca' len bidao'.

*Jesúsen' gwze'e lo nisa*

*(Mt. 14:22-27; Jn. 6:16-21)*

<sup>45</sup> Gwdena' Jesúsen' bene' byen besyeyo'o bene' ca' zjanaque' le' txen lo' barcon' cont yesyela'aga'zegue' nisdaon' na' yesežine' Betsaida, šlac le' za' chesele' bene' ca' žena' ližgaque'. <sup>46</sup> Na' cate' beyož bzedo' bene' ca' diža', gwyeje' lo ya'an bol güiže' Dios. <sup>47</sup> Na' ca' nac barcon', cate' goc čol ba zejen gachol nisdaon', na' toze Jesúsen' ne' zie' ga nac yo biž. <sup>48</sup> Na' ble'ede' bi chac yosyose'en binlo, le ben' chečjen clele na' bi choen' latje sa' barcon'. Na' šbał beyetj Jesúsen' ya'ana' na' gwze'e lo nisen' ba zej gale' gan' zja'aquen', na' ba zoa teze' gan' zjaya'aquen' <sup>49</sup> cate' besele'ede' le' chze'e lo nisen'. Na' gosacde' še da' chda chelen'. Na' bososye'e. <sup>50</sup> Le yogüe' besele'ede'ne' na' besežebe'. Perw le' la' bol güižte' legaque', gože'ne':

—Le gončach laže'le; nedan', bitw žeble.

<sup>51</sup> Nach gwyo'e lo' barcw gan' zjaya'ac bene' ca', nach gwche'ži ben'. Na' legaque' leca besyebande' na' besyežejde', <sup>52</sup> le bi gosejni'ide' dan' bene' yela' guac len yetextil ca', na' bina' yesejnilaže' le'.

*Jesúsen' beyone' bene' güe' ca' že' Genesaret*

*(Mt. 14:34-36)*

<sup>53</sup> Na' goselague' nisdaon' na' besežine' yežlio gan' nzi' Genesaret, na' bosocheje' barcon' cho'a nisdaon'. <sup>54</sup> Na' cate' beyož besyechoje' lo' barcon' bene' ca' la' besyeyombia'te' Jesúsen'. <sup>55</sup> Na' ja'acsese' doxen gan' mbane Genesaret, na' do lo cam dao' zjanxoe' bene' güe' ca' jasesane'ne' gan' zjañezde' zoa Jesúsen'. <sup>56</sup> Na' gate'teze gwyej Jesúsen', do yixe', do yež, cont goseyixjue' bene' güe' ca' do chanež na' goseneyoede' Jesúsen' gwnežjue' latje yesoxe' la'ch late'ze xni'a xen', na' yogo' bene' gosoxen' besyeyacde'.

## 7

*Dan' chchoj lo' laždao' beṇachen' chonen cont laždaqüen' bi naquen xilaže' len Diosen'*

*(Mt. 15:1-20)*

<sup>1</sup> Nach beṇe' fariseo ca' na' len beṇe' ca' bososed bosolo'e dan' bzoj da' Moisés gosa'aque' Jerusalénna' na' ja'aque' gan' zoa Jesúsén'. <sup>2</sup> Na' be-sele'ede' baḷ beṇe' ca' zjanaque' Jesúsén' txen con gosagüe' neca bosyone'e zan ṇi'a can' chesacde' cheyaḷa' yesone', na' da'nán' gosezi'diže' legaque'. <sup>3</sup> (Le beṇe' fariseo ca' na' yogo' beṇe' Israel gualaž cheto' ca' chesonxene' costumbr ca' da' bosyocua'anlen da' xozxta'oto' ca' neto' bi yesagüe' še biṇa' yosyone'e zan ṇi'a. <sup>4</sup> Na' cate' yesyežine' lagüe ya'a, bi yesagüe' še biṇa' yosyone'e, na' da' zanch costumbr da' zjana'ogüe', ca no yeseyibe' xiga' ga chese'eje' nis, no yeso' xguague, no yeso' ya na' no xcame'.) <sup>5</sup> Nach beṇe' fariseo ca' na' beṇe' ca' bososed bosolo'ede' dan' bzoj da' Moisésén' gosenabde' le':

—¿Bixchen' bi cheson beṇe' ca' zjanaque' le' txen can' goson beṇe' gol ca'? san con chesagüe' sin cbi chosyone'e zan ṇi'a.

<sup>6</sup> Jesúsén' gože' legaque':

—Chonle cayanen' bzoj da' Isaíasén' che le'e nacle beṇe' gwxiye' gan' bzoje', žan':

Beṇe' qui chesonxene' neda' len diža' cho'a, perw bi chesonxene' neda' len lažda'ogaque'.

<sup>7</sup> Bibi zejen dan' chesonxene' neda',

le dan' chososed chosolo'eden' naquen da' chnalaže' beṇachze.

<sup>8</sup> Bi chonle ca chnalaže' Dios, san na'ole can' ža beṇachen' cheyaḷa' gonle, chyible no yeso' xguague, no xiga' ga che'eje' nis, na' da' zanch da' chonle.

<sup>9</sup> Qui gožch Jesúsén' legaque':

—Chbejyichjle da' non Diosen' mandadw gonle cont na'ole costumbr che beṇach. <sup>10</sup> Da' Moisésén' gwne': “Le gap bala'an xaxna'le”, na' “Note'teže' še chžia chnité' xaxne'e, cheyaḷa' gate'.” <sup>11</sup> Perw le'e žale to beṇe' guac ye'e xaxne'e: “Bibi de goṇa' gaclena' le'e, le yogo' da' de chia' naquen Corbán” (zeje diža', ba bnežjuen' lo na' Dios). <sup>12</sup> Na' žale cate' to beṇe' že' ba naquen lo na' Diosen' nach bich cheyaḷa' gaclen xaxne'e. <sup>13</sup> Dan' žale ca' chzoale ca'ale dan' ža Diosen' na' con chonxenle costumbr gole che da' xozxta'ole ca'. Na' da' zanch dan' nac ca' chonle.

<sup>14</sup> Da' yoble gox Jesúsén' beṇe' ca', na' gože' legaque':

—Yogo'le le gwzenag chia', na' le šejni'i. <sup>15</sup> Bite'teže da' ye'ej gagw beṇachen', bi nacho len chonen cont lažda'ogüe' bi naquen xilaže' len Diosen'. Dan' chchoj lo' lažda'ogüen', lenna' chonen cont lažda'ogüe' bi naquen xilaže' len Diosen'. <sup>16</sup> Le'e žia nagle da' chene, le gwzenag xtiža'na'.

<sup>17</sup> Cate' bsan Jesúsén' bich bšaljlene' beṇe' ca' na' beyo'e lo' yo'o, nach beṇe' ca' zjanaque' le' txen gosenabde' le' bi zejen dan' gože' legaque'. <sup>18</sup> Na' Jesúsén' gože' legaque':

—¿Lecze len le'e bi chejni'ile? ¿Bi chejni'ile gague da' ye'ej gagw beṇachen' chonen cont lažda'ogüe' bi naquen xilaže' len Diosen'? <sup>19</sup> Le da' che'ej chagw beṇachen' gague cho'on lo' lažda'ogüen', san lo' li'en cho'on, na' chžin hor cheden.

Na' da' gwne' ca' zeje diža' bite'teže yela' guagw nacczen xilaže'. <sup>20</sup> Na' lecze gwne':



—Xbab da' yo'o lo' yichjlaždao' beṇachen', lenṇa' chonen cont lažda'ogaque' bi zjanaquen xilaže' len Diosen'. <sup>21</sup> Le lo' yichjlaždao' beṇachen' chchoj xbab mal ca da' žan yesone' da' quinga: yesata'lene' no'ole bi nac xo'olgaque' o beṇe' byo bi nac beṇe' chegaque', gwzoa xtogaque', yesote' beṇe', <sup>22</sup> yesone' gwban, yesezelaže' gata' chegaque' da' de che beṇe' yoble, yesone' da' mal, yeseziye'e beṇe', yesone' bichle da' nac da' yela' zto', yesacxi'ede' beṇe', yeseṇeye'e che beṇe', yesaque' beṇe' ya'laže', yesone' xbab da' bi zaca'. <sup>23</sup> Yogo' da' mal qui chesechojen lo' laždao' beṇač na' chonen cont bi nac lažda'ogaque' xilaže' len Diosen'.

*To no'ol zito' gwyejnilaže' Jesúsen'*  
(Mt. 15:21-28)

<sup>24</sup> Na' beza' Jesúsen' na' gwyeje' distritw gan' mbane ciuda Tiro na' ciuda Sidón. Na' gwyo'e to lo' yo'o na' goclaže' nono ṇeze, perw bi goc gone' cont bi gosenezde'. <sup>25</sup> Cate la' gwṇezete xṇa' to bi' no'ole bi' yo'o nyazbe' da' xigüen', na' gwyeje' na' bzoa xibe' xni'a Jesúsen'. <sup>26</sup> No'olen' goque' beṇe' zito', no'ole Sirofenicia. Gwyeje' gwṇabde' Jesúsen' yebeje' da' xigüe' yo'o nyaz bi' no'ol čhen'. <sup>27</sup> Na' Jesúsen' gože'ne':

—Yogo'ze beṇe' zgua'tec chnežjue' da' chagw xi'ine'. Bi naquen güen yeque'e yela' guagw che xi'ine' na' gwnežjuen' yesagw beco' ca'.

<sup>28</sup> Na' no'olen' gože'ne':

—Leczedo' can' gwnaon' Xana', perw lecze guaque gagw beco' be chi' xan mes bla'a da' chlažo' lo' yo.

<sup>29</sup> Nach Jesúsen' gože'ne':

—Nacczen can' gwnaon', guac yeyejo', ba bechoj da' xigüen' yo'o nyaz bi' no'ol čhion'.

<sup>30</sup> Cate' bežin ližen' ble'ede' de bi' no'ol daon' to lo' cam, na' ba bechoj da' xigüen' yo'o nyazbe'.

*Jesúsen' beyone' to beṇe' cuež, beṇe' lecze bi goc nie'*

<sup>31</sup> Jesúsen' bezse'e gan' mbane Tiro na' gwdie' gan' nzi' Sidón na' yež ca' gan' mbane Decápolis, na' bežine' cho'a nisdao' che Galilea. <sup>32</sup> Na' jasesane' to beṇe' byo beṇe' cuež na' bi goc nie', na' gosenabe' xoa na' Jesúsen' yichje'. <sup>33</sup> Nach Jesúsen' gwche'ene' late' lchojiže' ga nono beṇe' nita', na' bde xbene' lo' nague' na' bži'en xene' na' gwdane' ložen'. <sup>34</sup> Nach gwṇe'e le'e yaba, bebande', na' gwne':

—¡Efata! —zeje diža': ¡Byaljo!

<sup>35</sup> Nach nag bena' besyeyaljon na' goc bende', na' lecze beyac ložen' na' goc gwṇie' binlo. <sup>36</sup> Na' Jesúsen' gože' beṇe' ca' nono yese'e ca', perw la'czla' gože' legaque' ca', nachle goso'e diža' can' goca'. <sup>37</sup> Na' leca besyebande', na' gosene':

—Yogon' chone' binlo; chacte chone' cont chesyeyene beṇe' cuež ca' na' beṇe' ca' bi chac yesene' chesyenie'.

## 8

*Jesúsen' cho'e da' chagw tap mil beṇe'*  
(Mt. 15:32-39)

<sup>1</sup> Ca tiempa' besežagchua beṇe' zan na' bibi de yesagüe'. Nach Jesúsen' goxe' beṇe' ca' gwleje' cont zjanaque' txen len le' na' gože' legaque':

2 —Cheyaše'da' beṇe' qui, le ba goc šone ža zjanite' nga len neda' na' bibi de yesagüe'. 3 Še yesela'ne' ližgaque' na' bina' yesagüe', chanez yesego'one' yesechold'e, le bale' za'aque' zito'.

4 Nach beṇe' ca' zjanaque' le' txen gose'ene':

—¿Nacxe goncho güe'chone' da' yesagüe' latje nga ga nono beṇe' nita'?

5 Na' Jesúsen' gwnabde' legaue':

—¿Gaca' yetextilen' de chele?

Na' legaue' gose'ene':

—Gažen.

6 Nach bene' mandaw yesebe' yogo'loł ben' nitan' lo yo, na' gwxi'e da' gaž yetextil ca' na' be'e yela' choxclen che Dios, nach bzojjen' bnezjuen' beṇe' ca' zjanaque' le' txen na' legaue' goseyisen' che yogo'loł bene' nita' na'. 7 Leze zjano'e to chop bel ya'a, na' Jesúsen' be'e yela' choxclen che Diosen' che bel ya'a ca' na' leze goseyisen' che yogo'loł bene'. 8 Na' yogüe' gosagüe' na' goseljde'. Gwdena' bososše'e yegaže žome len late' güeje yela' guagw da' bega'an. 9 Beṇe' ca' gosagon' zjanaque' ca do tap mil beṇe'. Cate' ba besyedagüe', Jesúsen' gože' legaue': —“Nayežagcho”, 10 na' gwyo'e lo' barcon' len beṇe' ca' zjanaque' le' txen na' gwyeye' do gan' mbane yež da' nzi' Dalmanuta.

*Beṇe' fariseo ca' gosaclaže' gon Jesúsen' to yela' guac da' yesele'ede' le'e yaba*

(Mt. 16:1-4; Lc. 12:54-56)

11 Na' beṇe' fariseo ca' gosezolagüe' chesediłdiže' len Jesúsen'. Na' da' gosaclaže' yesagüe' xya che' nach gosnabde'ne' gone' to yela' guac da' yesele'ede' le'e yaba cont yesenežde' še da' licze Diosa' gwsele' le'. 12 Jesúsen' bebanchgüede' na' gwne':

—Ba ble'ele chona' yela' guac. ¿Bixchen' chñable to yela' guac da' le'ele cont nezele še Diosen' gwsele' neda'? Da' li žia' le'e, bitwbi gona' da' le'ele.

13 Nach bcua'aṇe' legaue' na' beyo'e lo' barcon' beze'e beyeje' yešla'a nisaon'.

*Levadura che beṇe' fariseo ca'*

(Mt. 16:5-12)

14 Beṇe' ca' zjanaque' Jesúsen' txen gosnlaže' yeso'e da' yesagüe', na' totec yetextil zjano'e lo' barcon'. 15 Na' Jesúsen' gože' legaue':

—Le gon xbab, le gwsaca' len levadura che beṇe' fariseo ca' na' len levadura che Herodes.

16 Nach gosnabe lježe' bixchen' gwne' ca', na' gose' lježe':

—Gwne' ca' le gague bi yetextil checho den'.

17 Jesúsen' gocbe'ede' xbab dan' chesone' na' gože'ne':

—¿Bixchen' chacžejlaže'le da' bibi yetextil de? ¿Bina' šejni'ile, neca chacbe'ele? ¿Nac chač lažda'olen' bi chejle'le? 18 ¿Bi chle'ele len yejlaole, neca chenele len nagle? ¿Bi chjayze'ele? 19 Gwdisa' gayo' yetextil na' goquen che gayo' mil beṇe', na' ¿bi chjayze'ele yebale žome goc da' becho'onen da' botoble?

Na' legaue' gosene':

—Šižinw žome becho'onen da' botobto'.

20 —¿Chixe caten' gwdisa' gaže yetextilen' lao tap mil beṇe'? ¿Yebale žome gwža'te dan' botoblen'?

Na' gosene':

—Gaže žomen'.

21 Nach gože' legaque':

—¿Biña' šejni' iczele na'a cho'a diža' che dan' chososed chosolo'e bene' fariseo ca'?

*Jesúsen' beyone' to bene' lchol bene' Betsaida*

22 Gwdechle besežine' Betsaida na' jasesane' to bene' lchol lao Jesúsen', na' gosata'yoede' le' yeyone' le'. 23 Na' beꝑue' taca' bene' lcholā' na' gwleje'ne' yež. Nach gwdebe' xene' yejlagüen' na' gwꝑoa taquen' yichje' na' gwꝑabde'ne' še chle'ede' late'. 24 Bene' lcholā' gwꝑe'na' na' gwne':

—Chle'eda' bene', na' chle'eda'ne' ca yag, perw chesa'aque'.

25 Nach Jesúsen' beꝑoa taque' yejlagüen' da' yoble, na' gwꝑa'yane' ben' na' beyaque', bele'etede' yogo' binlo. 26 Nach Jesúsen' besele' le' liže', gože'ne':

—Bi yeyo'o lagüe yežen', neca no yo'o da' nga.

*Pedron' gwne' Jesúsen' naque' Cristo ben' gwlej Diosen' cont nabie' (Mt. 16:13-20; Lc. 9:18-21)*

27 Gwdena' gwey Jesúsen' len bene' ca' zjanaque' le' txen yež dao' ca' zjachi' do ga mbane ciuda da' nzi' Cesarea de Filipino. Na' chanez gwꝑabde' bene' ca' zja'aclen le':

—¿Bi chesena bene'? ¿Non' naca' neda'?

28 Legaque' gose'ene':

—Baļe' chesene' naco' Juan ben' bzoa bene' nis, yebaļe' chesene' naco' Elías, na' yebaļe' chesene' naco' yeto bene' be' xtiža' Dios cani'.

29 Na' gwꝑabde' legaque':

—¿Chixe le'e'? ¿no žale naca'?

Pedron' gože' le':

—Len' naco' Cristo ben' gwlej Diosen' cont nabio.

30 Nach Jesúsen' gože' legaque' nono yese'e ca'.

*Jesúsen' gwꝑixjue'ede' gate'*

*(Mt. 16:21-28; Lc. 9:22-27)*

31 Na' gwꝑolao Jesúsen' bzejni'ide' legaque' can' gac chen', gože'ne':

—Da' zan da' saca'zi'a neda' naca' ben' gwseļa' Diosen' golja' benach. Na' bene' blaoc ca' chesenabia' nación chechon' na' bꝑoz gwꝑabia' ca' na' bene' ca' chososed chosolo'e dan' bzoj da' Moisés bi yesele'ede' neda' güen da' bi chesejle'e chia', na' yesote' neda', perw gacch šone ža yebana' ladjo bene' guat ca'.

32 Da' nga gwnen' zaca'laon. Na' Pedron' gwche'e Jesúsen' ga nac lchojiže' na' gwꝑolagüe' chdile' le' dan' gwne' ca'. 33 Perw Jesúsen' gwyeꝑhje' na' gwꝑe'na' bene' ca' zjanaque' le' txen, na' gwꝑdile' Pedron', gože'ne':

—jGwcuase ca'ale Satanás! Bi nsa'o xbab che Diosen' san nsa'o xbab che benach.

34 Nach Jesúsen' goxe' bene' ca' zjanaque' le' txen na' yezica'chle bene' na' gože'ne':

—Note'teze bene' še chaclaže' gaque' neda' txen, cheyaļa' chojyichj cuine', la'czļa' saca'zi'e, na' gone' can' nia' neda'. 35 Note'teze bene' chacde' gone' cont bi saca'zi'e o cont nono yesot le', benan' cuiayi', na' note'teze bene' chzanļaže' cuine' saca'zi'e o gate' ne chia' neda' o neche xtiža' Diosen', ba de yela' mban che' toļi tocaņe. 36 ¿Bixe zejenna' to bene' nabie' doxen yežlion' na' cuiaye'e bi gata' yela' mban che' toļi tocaņe? 37 Le bi zoa nacle gon benachen' chixjue' cont gata' yela' mban che' toļi tocaņe.

38 Bene' ca' že' na'a bi chesejnilaže' Diosen' na' chesonchgüe' da' xinj. Na' note'teže bene' še cheto'ede' par ye'e lježe' chejnilaže' neda', na' še cheto'ede' par gwzenague' xtižan', lecze ca' neda' yeto'eda' che' par nia' naque' neda' txen, neda' naca' ben' gwseła' Dios golja' benač. Yeto'eda' che' cate' yida' da' yoble nsa'a yeła' zaca' juisyw che Xa' Diosen' na' nchia' bene' ca' zjanac angl che'.

## 9

<sup>1</sup> Lecze gož Jesúsen' legaque'.

—Da' li žia' le'e, balle nita'le nga na'a bina' gatle cate' žin ža le'ele Diosen' gwlo'e yeła' guac xen čhen' can' chnabi'en'.

*Bša' Jesúsen' ca goque'*

*(Mt. 17:1-13; Lc. 9:28-36)*

<sup>2</sup> Gwde xop ža, Jesúsen' gwche'e Pedro, Jacobo na' Juan na' ja'aque' to lo ya'a sibe, na' nono nochle ja'ac len legaque'. Na' nite' besele'ede' bža' ca goc Jesúsen'. <sup>3</sup> Xalane' goquen da' šiš xila', gocten ca da' chactite; la' čhibcho lache' yežlio nga bi yechojen gaquen šiš xila' catequen' goc xalanen'. <sup>4</sup> Na' concze besele'ede' da' Elías na' da' Moisés chosošalje' len Jesúsen'. <sup>5</sup> Nach Pedron' gože' Jesúsen':

—Maestro, įleca güenna' zoacho nga! Gonto' šone ranšw, to čchio', to che Moisés, na' yeto che Elías.

<sup>6</sup> Le bene' ca' zja'aclen Jesúsen' besežebchgüe', na' Pedroa' bi chacbe'ede' bin' že'. <sup>7</sup> Nach gwche' to bejw gan' niten' gwyečhen' legaque', na' lo' bejon' gosende' gwna Diosen':

—Bengan' Xi'ina' bene' chacda'; le gwzenag che'.

<sup>8</sup> Na' cate' gosen'e cue'ej cuiten' notno besele'ede', san toze Jesúsen' zie'.

<sup>9</sup> Na' šlac chesyeyetje' lo ya'an, Jesúsen' gože' legaque' notno yesi'e ca nac dan' besele'eden'. Gože'ne':

—Cate'ch ba bebana' ladjo bene' guat ca', nedan' naca' ben' gwseła' Dios golja' benač, cana' güe'le diža' čhen.

<sup>10</sup> Da'n'an' gosezoe' šize, nono gose'e ca', perw na' gosenabe lježe' bi zejen dan' gwne' yebane' ladjo bene' guat ca'. <sup>11</sup> Nach gose'e Jesúsen':

—Bene' ca' chososed chosolo'e dan' bzoj da' Moisés chososedde' neto' chesene' zgua'tec da' Elías ben' gwzoa cani' cheyała' yide' da' yoble cate' za' yedenabia' ben' seła' Diosen'. ¿Bixčhen' chesene' ca'?

<sup>12</sup> Na' boži'e xtižen':

—Da' liczen' zgua'tec Elíasna' yide' na' yeyo'e xneze yogo'loł da' de yežlio nga. ¿Nezele bin' ža gan' nyoj Xtiža' Diosen' chia' neda' naca' ben' gwseła' Dios golja' benač? Žan saca'zi'a na' bene' zan bi yesejnilaže' neda'. <sup>13</sup> Na' žia' le'e, Elías ba bide' na' gosonde' le' con ca' gosaclaže', can' nyoj le'e Xtiža' Diosen' žan can' cheyała' gac che'.

*Jesúsen' beyone' to bi' yo'o nyazbe' da' xigüe'*

*(Mt. 17:14-21; Lc. 9:37-43)*

<sup>14</sup> Gwdena' besyežine' gan' nita' yezica'chle bene' ca' zjanaque' Jesúsen' txen, na' besele'ede' bene' zan zjanita' zjanyechjde' legaque', na' len bene' ca' chososed chosolo'ede' dan' bzoj da' Moisés chesedildiže' len legaque'.

<sup>15</sup> Na' cate' bene' ca' besele'ede' Jesúsen', yogüe' besyežejde' na' ja'acsese' bosoguape' le' tiox. <sup>16</sup> Nach gwñabde' legaque':

—¿Bin' chdildiža'le len bene' ca'?

17 Na' to bene' nchixe bene' ca' boži'e xtižen', gwne':

—Maestro, zedesana' bi' chia' nga, yo'o nyazbe' da' xigüe' na' benen cont bi' chac nebe'. 18 Gate'teze chdabe' chzenen lebe' na' chcho'onen lebe' lo yo, na' chbia bžina' cho'abe' na' chagwxej laybe'. Na' ca' zej chedo fuerz çebe'. Na' ba gwñaba' lao bene' qui zjanaque' le' txen yesyebeje' da' xigüe' yo'o nyazbe', perw bitw gosaque'.

19 Na' Jesúsen' gože' bene' ca' že'na':

—¡Le'e bene' bi' chejnilaže'! ¿šna chyažjen soalena' le'e cont šejnilaže'le? ¿Batca' zelao na'lagua' le'e? Le yedesambe' nga.

20 Na' jasesane'be', na' cate' da' xigüen' ble'en Jesúsen', benen gwyazbe' šon, na' gwbičbe' lo yo, chbič chtolbe' na' chbia bžina' cho'abe'. 21 Nach Jesúsen' gwñabde' xaben':

—¿Bal iz ba goc chache' ca'?

Na' xaben' gwne':

—Cate' nache' bida'ote gwzolao chache' ca'. 22 Na' zan ni'a da' xigüen' chžalan' lebe' lo yi' na' lo nis cont goten lebe'. Da'nan' še guac yeyono'be', beyaše'sque neto' na' beyombe'.

23 Jesúsen' gože'ne':

—Cheyała' šejnilažo' neda', le yogo' da' chzelaže' bene' chesejnilaže' neda' chaquen.

24 Nach xaben' gwne' zižje:

—¡Chejnilaža' le', goclen neda' šejnilaže'cha'!

25 Na' cate' Jesúsen' ble'ede' chesežagchgua bene', gwdile' da' xigüen' gožen':

—Da' xigüe', le' chono' cont bi' nga bi' chenebe' na' bi' chac nebe', neda' žia' yechojo'. Bsan bi' nga, na' bich yeyo'o yichjlažda'oben'.

26 Na' da' xigüen' benen ga bosya'abe' na' benen ga gwyazbe' ca' yeto šon, nach bechojen. Na' bin' bega'anbe' ca' bi' guat, na' zan bene' gosene' gotben'. 27 Perw Jesúsen' bečue' taca'ben' cont beyasbe', nach gwzechabe'.

28 Nach cate' Jesúsen' gwyo'e to lo' yo'o, bene' ca' zjanaque' le' txen gosebeje' le' ca' to lchojiže' na' gosenabde' le':

—¿Bixchen' bi' goc neto' yebejto' da' xigüen'?

29 Na' gože'ne':

—Cont yechoj da' xigüen' nac ca' cheyała' gonle gwbas na' soatezle yol güižle Dios.

*Da' yoble Jesúsen' gwne' gate'*

*(Mt. 17:22-23; Lc. 9:43-45)*

30 Cate' besyeya'aque' na', besyedie' distritw Galilea. Na' Jesúsen' goclaze' nono yeseneze, 31 le chzejni'ide' bene' ca' zjanaque' le' txen, che'e legaque':

—Nedan' naca' ben' gwsela' Dios golja' beñach, yosodie' neda' lo na' bene' yesote'nda', perw yeyon ža yebana' ladjo bene' guat ca'.

32 Perw bi' gosejni'ide' bin' gože' legaque', na' besežebe' yesenabde'ne'.

*Gosedilžiže' gosene' noen' nac bene' blaoch*

*(Mt. 18:1-5; Lc. 9:46-48)*

33 Na' besežine' ciuda' da' nzi' Capernaum, na' cate' besežine' yo'o gan' zoa Jesúsen' gwñabde' legaque':

—¿Bixchen' chdilžiža'le chanez?

<sup>34</sup> Perw con gosenite' šižize, le chanezan' gosediłdiže' gosene' noen' nac bene' blaoch. <sup>35</sup> Nach Jesúsen' gwchi'e na' goxe' bene' šižiñw ca' zjanaque' le' txen, na' gože' legaque':

—Še no le'e chaclaže'le gacle bene' žialao, cheyała' gonle xbab bibi zaca'tecl, na' cheyała' gon cuinle ca xmos yogo' bene' lježle.

<sup>36</sup> Nach beñue' to bidao' na' bzeche'be' gachol'legaque', na' gwlene'be' na' gože' legaque':

<sup>37</sup> —Note'teze bene' chone' güen len to bidao' ca bi' nga neche da' chejnilaže' neda', choncze' güen len neda'; na' noteze' chon güen len neda', choncze' güen len Dios ben' gwsela' neda'.

*Bene' bi chon chio' contr, txencza' chone' chio'*

*(Mt. 10:42; Lc. 9:49-50)*

<sup>38</sup> Nach Juanna' gože'ne':

—Maestro, bežagto' to bene' cho'e lao' na' chebeje' da' xigüe' da' yo'o nyaz bene', na' bžonto' gone' ca', le bi chone' chio' txen.

<sup>39</sup> Na' Jesúsen' gwne':

—Bi gwžonle gone' ca', le gague zoa to bene' gone' yela' guac cho'e lan', yeyoža' ne' yela' ya' chia'. <sup>40</sup> Le bene' bi chone' chio' contr, txencza' chone' chio'. <sup>41</sup> Chnia' le'e to da' zejen, note'teze bene' gone' le'e la' to xiga'ze nis da' ye'ejle neche chejnilaže' neda' na' neche nezde' le'e nacle txen len neda', Diosen' gone' cont soacze' mbalaz da' ba goclene' le'e.

*Bitw co'yela'cho bene' gone' da' xinj*

*(Mt. 18:6-9; Lc. 17:1-2)*

<sup>42</sup> 'Note'teze bene' chon cont lažo' to bene' za' gwzologüe' chejnilaže' neda' gone' da' xinj, yejni'acle yosocheje' yene' to yiše xen na' yosozale'ne' lo' nisdaon' clcl ca da' gone' cont lažo' bene' yoble gone' da' xinjen'. <sup>43</sup> Na' še yena'len' chonen cont gonle da' xinj, cheyała' cuejyichjle da' malen' chonle. Yejni'a bibi na'le zoa clcl ca gonle da' xinjen' len len. Na' yejni'a šjayzoale len Diosen' toli tocane bi zoa šla'a taca'le clcl ca yeyejle lo yi' gabil' dan' bi cheyol chenit nya' cuerp chelen'. <sup>44</sup> Na' gabilen' neca chesat bzogan', neca cheyol yin'. <sup>45</sup> Na' še ni'alen' chonen ga gonle da' xinj, lecze cheyała' cuejyichjle da' malen' chonle. Yejni'a bibi ni'alen' zoa clcl ca gonle da' xinjen' len len. Na' yejni'a šjayzoale len Diosen' toli tocane bi zoa šla'a ni'alen', clcl ca yeyejle lo' yi' gabil' dan' bi' cheyol chenit nya' cuerp chelen'. <sup>46</sup> Na' gabilen' bzoga' ca' bi chesatba', neca cheyol yin'. <sup>47</sup> Na' še yejlaolen' chonen cont gonle da' xinj, cheyała' cuejyichle da' malen' chonlen'. Yejni'a bibi yejlaolen' žia clcl ca gonle da' xinjen' len len. Na' yejni'a šjayzoale len Diosen' toli tocane zoa šla'aze yejlaole clcl ca yežinle lo yi' gabilen' žia chop la'a yejlaolen'. <sup>48</sup> Ca nac gabilen', bi chesat bzogan', neca cheyol yin'.

<sup>49</sup> 'Le dan' chyi chzaca'le yežlio nga chzejni'in le'e cont bi yeyejle lo yi' gabil'. Na' da' chyi chzaca'le zaca'leben ca zede' da' cheyała' chixe' yezj yogo' ni'a cate' chjasesane' yezj lao Diosen'. <sup>50</sup> Na' zeden' naquen güen, perw še bich bi zxi' naquen, žnacxe goncho cont yeyaquen zxi' da' yoble? Na' le'e cheyała' gwyo gwchejlaže'le dan' chyi chzaca'le na' cheyała' soale binlo tole yetole, na' še soale ca', zaca'leble ca to yela' guagw da' yo'o zede'.

## 10

*Jesúsen' bzejni'ide' bi cheyała' yela'acho len no'ol checho*

*(Mt. 19:1-12; Lc. 16:18)*

<sup>1</sup> Jesúsen' beze'e Capernaum na' gwyejche' gan' mbane distritw Judean' na' yešla'a yegw Jordánna'. Na' da' yoble besežag bene' zan gan' zoen' na' lecze da' yoble bsed blo'ede' legaue' con can' choncze'. <sup>2</sup> Nach bał bene' fariseo ca' ja'aque' gan' zoa Jesúsen' gosaclaže' yesebeje'ne' diža' da' yosočhine' cont yosožie'ne' xya choł, na' gosenabde'ne' še guac to bene' yele'e len no'ol che'. <sup>3</sup> Na' Jesúsen' boži'e xtižen', gwne':

—Ca nac dan' bzoj da' Moisésen', ¿nac bene' mandadw gonle?

<sup>4</sup> Legaue' gosene':

—Moisésen' gwne' cate' to bene' yele'e len no'ol chen' cheyała' chas to yiš da' gwnežjue' no'ol che' ga güe'en diža' besyele'ena'.

<sup>5</sup> Nach Jesúsen' gože' legaue':

—Moisésen' gwne' gac gonle ca' lagüe dan' nacle bene' güedenag len Diosen'. <sup>6</sup> Perw cate' gwxe yežlion', cate' bxe Diosen' yogo' da' de, bi goquen ca'. Le nyojen žan: “Bene' legaue', to bene' byo na' to no'ole.” <sup>7</sup> “Da'n'an' bene' byon' gwsane' xaxne'e cont soalene' no'ol chen', <sup>8</sup> na' chope' yesaque' ca' toz bene'.” Na' ca' bich yesac chope' san toze'. <sup>9</sup> Da'n'an' bi cheyała' yesyele'e, le Diosen' ba bcode' legaue'.

<sup>10</sup> Cate' besyežine' yo'o, bene' ca' zjanaue' le' txen da' yoble gosenabde'ne' bi zejen dan' ba gwne'. <sup>11</sup> Na' Jesúsen' gože' legaue':

—Note'teze bene' chele'e len no'ol che' na' cheque'e no'ol yoble, chone' da' xinj, le toz ca' naquen šaca' gata'lene' no'ol che bene' yoble. <sup>12</sup> Na' še no'olen' chsane' bene' chen' na' cheque'e bene' yoble, lecze toz can' nac da' xinj da' chonen'.

*Jesúsen' gwnabde' Diosen' gac güen che bidao' ca' besežag*

*(Mt. 19:13-15; Lc. 18:15-17)*

<sup>13</sup> Nach jasesane' bi' bixjw lao Jesúsen' cont xoa ne'e yichjgacbe', perw bene' ca' zjanaue' le' txen gosediłe' bene' ca' zjanche'ebe'. <sup>14</sup> Na' cate' ble'e Jesúsen' can' gosonen' na' bže'e legaue' na' gože'ne':

—Le güe' latje yesid bidao' ca' lagua' nga na' bi gwžonle, le bene' ca' zjanac ca' bidao' quinga, legaue' chosozenague' che Diosen' cont chnabi'e yichjlažda'ogaue'. <sup>15</sup> Da' li žia' le'e, note'teze bene' cheyała' yosozenague' che Diosen' ca' cheson bidao' cate' chosozenagbe' che xaxna'be', le bene' bi yosozenague' ca', gwbat nabia' Diosen' yichjlažda'ogaue'.

<sup>16</sup> Nach gwłene' to to bidao' ca' na' gwnabde' Diosen' gac güen chebe', gwxoā taquen yichjbe'.

*To bene' güego' bšaljlene' Jesúsen'*

*(Mt. 19:16-30; Lc. 18:18-30)*

<sup>17</sup> Cate' Jesúsen' gwze'e ngüe'e nez, chxonjses to bene' jazoa xibe' lagüen' na' gwnabde'ne':

—Maestro, le' naco' bene' güen. ¿Bi cheyała' gona' cont gata' yela' mban chia' toli tocañe'?

<sup>18</sup> Jesúsen' gože'ne':

—¿Bixchen' žo' naca' bene' güen? Toze bene' güen zoa, na' len' Dios. <sup>19</sup> Le' neždo' da' none' mandadw goncho: “Bi gata'lenle' no'ol bi nac no'ol chele o bene' byo bene' bi nac bene' chele; nono gotle; bi cuanle; bi güe'le diža' güenlaže' che bene' lježle; bi siye'le bene'; le gap bala'an' xaxna'le.”

<sup>20</sup> Na' boži'e xtižen':

—Maestro, yogo' da' quinga chzenaga', gwzolagua' chonczan' cate' ne' nactia' bidao'.

<sup>21</sup> Jesúsen' gwne'e bene' güegon' na' chacde' le', na' gože'ne':

—Zoa to da' ñe' chyažjen gono': šjayeto' yogo' da' de chio' na' da' le'edo' chen bnežjon bene' yaše'. Nach še gono' ca', cate' yežino' yaba gan' zoa Diosen' da' zaca'ch gata' chio'. Na' še ba beyož beno' can' žia' le', nach yo'o gaco' neda' txen la' saca'zi'o.

<sup>22</sup> Na' cate' bene ben' dan' gwna Jesúsen', gocde' leca zdebe naquen gone' can' gože'ne', na' beza'yaše', le bene' gwñi'achgua goque'.

<sup>23</sup> Nach Jesúsen' gwñe'e do cue'ej cuite' na' gože' bene' ca' zjanaque' le' txen:

—Leca zdeb naquen to bene' gwñi'a gwzenague' che Diosen' cont Diosen' ñabi'e yichjlažda'ogüe'.

<sup>24</sup> Na' bene' ca' zjanaque' le' txen besyebande' can' gwñen', perw Jesúsen' gože'e legaque':

—Xi'ina', bene' chesacde' zaca'chgua yela' gwñi'a chegaquen', leca zdebe naquen yosozenague' che Diosen' cont ñabi'e yichjlažda'ogaquen'.

<sup>25</sup> Bedao'ch te to be xen be nzi' camello to lo' nag yeše' clel ca to bene' gwñi'a gwzenague' che Dios cont Diosen' ñabi'e yichjlažda'ogüe'.

<sup>26</sup> Cate' gosende' dan' gwne', leca besyebande' na' gose' lježe':

—¿Noxen' šjayzoa len Diosen' še ca'?

<sup>27</sup> Jesúsen' gwñe'e legaque' na' gože'ne':

—Bibi de da' gac yeson benačhen' cont šjasyenite' len Diosen', perw Diosen' guac gonen'; le bi zoa da' ñacho da' bi gac gon Dios.

<sup>28</sup> Nach Pedron' gože'ne':

—Neto' ba gwlejjichjto' yogo' da' de cheto' cont nacto' le' txen.

<sup>29</sup> Jesúsen' boži'e xtižen':

—Da' li žia' le', note'teze bene' ba gwlejjichje' liže', bene' biše', zane', xe', xne'e, no'ol che', xi'ine', o yežlio che' ñe chia' neda' na' neče chzenague' xtižan', <sup>30</sup> yežlio nga yonežjo Diosen' le' to gayoa ca'te'le, yo'o, biše', zane', xne'e, xi'ine' na' yežlio, la'czla' yesebe'na'ogüe' le'. Na' cate' yežine' yaban' gata' yela' mban' che' toli tocañe. <sup>31</sup> Perw zan bene' zjanaque' bene' žialao ña'a, gwžin ža cate' yesaque' bene' bzebe; na' bene' zjanaque' bene' bzebe ña'a, gwžin ža cate' yesaque' bene' žialao.

*Da' yoble Jesúsen' gwne' yesote'ne'*

*(Mt. 20:17-19; Lc. 18:31-34)*

<sup>32</sup> Zjangüe'e nez zja'aque' bso dan' zoa gała'ze Jerusalénna' na' Jesúsen' žialagüe' lao bene' ca' zjanaque' le' txen. Legaque' chesyebande' na' do chesežebze' zjana'ogüe' le'. Nach da' yoble Jesúsen' goxe' bene' šižinw ca' ca'ale ga nac lchojiže' na' gože' legaque' can' gac chen'. <sup>33</sup> Gože'ne':

—Na'a ba zejcho Jerusalén gan' yesone' neda' lo na' bxoz gwnabia' ca' na' lo na' bene' ca' chososed chosolo'ede' dan' bzoj da' Moisés, na' yesechoglagüen' chia' yesote' neda' na' yesone'nda' lo na' bene' bi zjanaque' bene' Israel, nedan' naca' ben' gwseła' Dios golja' benač. <sup>34</sup> Yesezi'diže' neda', yesot yeseyine' neda', gosoži'enda' xene', na' yesote' neda', perw yeyon ža yebana' ladjo bene' guat ca'.

*Jacobo na' Juan gosenabe' to goclen lao Jesúsen'*

*(Mt. 20:20-28)*

<sup>35</sup> Nach Jacobo len Juan, bene' ca' zjanac xi'in Zebedeo, gosebigue' cuit Jesúsen' na' gose'ene':

—Maestro, chaclaže'to' gono' to goclen da' ñabto'.

<sup>36</sup> Na' gwñabe Jesúsen' legaque':

—¿Bi che'nele gona'?



<sup>37</sup> Na' gose'ene':

—Ben cont cue'to' šla'a güeje cuito'na' cate' solao nabi'o.

<sup>38</sup> Nach Jesúsen' gože'ne':

—Le'e cabi nezele bi dan' chñable. ¿Gwchejlaže'le tele yela' zi' yela' ya' ca dan' tia' neda' na' gac chele can' gac chia'?

<sup>39</sup> Legaque' gose'ene':

—Gwchejlaže'to'.

Na' Jesúsen' gože' legaque':

—Da' licze tele yela' zi' yela' ya' ca dan' tia' neda' na' gac chele can' gac chian'. <sup>40</sup> Perw bi naquen lo na' nia' non' cue' cuitan' cate' žin ža nabi'a, san yesebe' bene' ba mbej Diosen' gaquen che'.

<sup>41</sup> Cate' yeši bene' ca' zjanaque' le' txen gosende' xtiža'gaquen', beseloque' Jacobon' na' Juanna'. <sup>42</sup> Perw Jesúsen' goxe' yogüe' cont gosebigue' laogüen' na' gože' legaque':

—Nezeczele bene' zjambeje' cont chesenabi'e to to nación na' bene' blao ca' chesone' byen chosozenag bene' chegaque'. <sup>43</sup> Perw bi naquen ca' len le'e. San note'tezle chaclaže'le gacle bene' blao, cheyała' gwzexjwlaže'le gaclenle bene' lježle. <sup>44</sup> Na' note'tezle chaclaže'le gacle bene' žialao, cheyała' gon cuinle ca xmos yogo' bene' lježle. <sup>45</sup> Le lencze neda', gwseła' Diosen' neda' golja' beñach, gague za'a cont yesaclen bene' neda', san za'a cont gaclena' bene', na' gwnežjw cuina' yesote' neda' neche xtoła' beñachen'.

*Jesúsen' beyone' to bene' lchoł ben' gože' Bartimeo*

(Mt. 20:29-34; Lc. 18:35-43)

<sup>46</sup> Nach besežine' Jericó. Na' cate' Jesúsen' ba beze'e ciudan' len bene' ca' zjanaque' le' txen na' len yezanch bene', do cho'a ciudan' chi' to bene' lchoł chanez chñabe' yosonežjo bene' le' con gaca' da' chesezande'. Bena' le' Bartimeo na' naque' xi'in to bene' le' Timeo. <sup>47</sup> Na' bene' lchoła' cate' gocbe'ede' gwde Jesús bene' Nazaret gan' chi'ena', gwzologüe' gwne' zižje gwne':

—Jesús, xi'in diaža che da' rey David, beyaše'laže'sca neda'!

<sup>48</sup> Bene' zan gosediłe' le' cont bich yosye'e, perw bosya'adiache' gwne':

—Xi'in diaža che da' rey David, beyaše'laže'sca neda'!

<sup>49</sup> Nach Jesúsen' gwleze' na' gwne':

—Le gaxe'.

Nach gosaxe' bene' lchoła' na' gose'ene':

—Benchachlažo', gwzoža', le chaxe' le'.

<sup>50</sup> Nach gwcho'one' lache' da' nřoa cože' na' bxite' jabigue' lao Jesúsen'.

<sup>51</sup> Nach Jesúsen' gwñabde' le':

—¿Bi chaclažo' gonda' le'?

Bene' lchoła' boži'e xtižen':

—Maestro, che'nda' yele'eda'.

<sup>52</sup> Nach Jesúsen' gože'ne':

—Guac yeyejo'. Dan' chejnilažo' neda' ba beyac yejlaguon'.

Na' la' bele'ete bene' lchoła', na' gwda'ogüe' Jesúsen'.

## 11

*Jesúsen' gwyo'e ciuda Jerusalén*

(Mt. 21:1-11; Lc. 19:28-40; Jn. 12:12-19)

<sup>1</sup> Cate' ba zoa yesežine' Jerusalén, besežine' gan' zjachi' yež dan' zjanzi' Betfagé na' Betania na' gan' zoa ya'a da' nzi' Ya'a Olivos. Na' Jesúsen' gwsele' chop bene' ca' zjanaque' le' txen mandadw, <sup>2</sup> gožgaque'ne':

—Le šja'ac yež dan' chi' gala'ze, na' cate' žinlen' na' yeželele to burr dao' da'ba' yag be nono na' cuia. Le sežba' na' le che'ba' nga. <sup>3</sup> Na' še no chnab bichen' chonle ca', le ye'e: “Xanto' chyažjde'ba'”, na' la' gwzantecze'ba'.

<sup>4</sup> Nach gosa'aque', na' besele'ede' burron' da'ba' yag to cho'a yo'o cuit ga xoa to nez, na' goseseže'ba'.

<sup>5</sup> Na' bal bene' ca' nita' na' gose'ene':

—¿Bixen' chonle? ¿Bixchen' chsežle burron'?

<sup>6</sup> Nach bosyoži'e xtižen' can' gož Jesúsen' legaque', na' goso'e latje goseseže'ba' cont goseče'eba'. <sup>7</sup> Nach goseče'e burron' lao Jesúsen' na' gosexoa xagaque' cože'ban' na' gwžia Jesúsen' leba'. <sup>8</sup> Na' bene' zan gosonxene' Jesúsen' goseyixjw no xagaque' lo nez cont blej burron' len na' yebale' gosechogue' xoze' yag na' goseyixjuen' lo neza'.

<sup>9</sup> Bene' zjažialao na' lecze bene' za'ac cože' gosezolagüe' bososye'e, gosene':

—¡Leca zaca'chgua benga! ¡Mbalaz ben' za' nga nseła' Xancho Diosen' le' cont nabi'e! <sup>10</sup> ¡Mbalaz yela' gwnabia' che' da' nse'e, le' nabi'e ca da' xoxxta' ocho David! ¡Leca zaca'chgua Dios ben' zoa yaban'!

<sup>11</sup> Can' goc, Jesúsen' gwyo'e Jerusalén, na' lecze gwyo'e chyo'o che yodao' blaon'. Na' beyož gwne'e yogo'lol da' de na', beyeje' Betania len bene' šižinw ca' ba gwleje' cont zjanaque' le' txen, le ba zoa gal.

*Jesúsen' gwne' gacxi'a yag yixgüigw da' bibi žia  
(Mt. 21:18-19)*

<sup>12</sup> Beyechj ža cate' besyeya'aque' Betania, Jesúsen' gwdone'. <sup>13</sup> Na' zito' ble'ede' to yag yixgüigw da' žia laga', na' jane'e še žia yaguen' yixgüigw, na' bibi bželde', san laga'ze ca' da' žian, le gague canan' chesebia yixgüigon'.

<sup>14</sup> Nach Jesúsen' bol güiže' yag yixgüigon', gožen':

—Noch no gagw da' chbio' le'.

Na' bene' ca' zjanaque' le' txen gosende' can' gwnen'.

*Jesúsen bešaše' bene' ca' cheson ya'a chyo'o yodaon'  
(Mt. 21:12-17; Lc. 19:45-48; Jn. 2:13-22)*

<sup>15</sup> Gwdena' besežine' Jerusalén. Na' cate' gwyo'o Jesúsen' chyo'o yodao' blaon', gwzolagüe' bešaše' bene' ca' chesote' na' bene' chesa'o na'. Na' bchixe' xmes bene' ca' chosoša' mechw na' yag ga chesebe' bene' ca' chesote' ngolbex. <sup>16</sup> Na' bi be'e latje yesexoa xnez bene' zjanaoa' yoa' chyo'o yodaon'. <sup>17</sup> Na' bsd blo'ede' bene' ca' že' na', gože'ne':

—Nyojcze Xtiža' Diosen' žan: “Yesene' ližan' naquen latje gan' šja'ac bene' yogo' nación yosol güiže'nda'”, perw le'e ba benlen ca to latje ga že' bene' gwban.

<sup>18</sup> Na' bxož gwnabia' ca' na' bene' ca' chososed chosolo'e dan' bzoj da' Moisés gosende' can' gwnen', na' goseyiljwlaže' nacle yesone' yesote'ne'. Ba chesežebe' Jesúsen', le yogo' bene' besyēžejde' can' bsd blo'eden'.

<sup>19</sup> Perw na' cate' gol, Jesúsen beze'e ciudan'.

*Gwbiž yag yixgüigon'  
(Mt. 21:20-22)*

<sup>20</sup> Beyechj ža šezil, gosodie' na' besele'ede' yag yixgüigon' ba gwbižen lente loen. <sup>21</sup> Nach Pedron' jayze'ede' na' gože' Jesúsen':

—Maestro, gwna' yag yixgüigw dan' gwnao' gacxi'an, ba gwbižen.

<sup>22</sup> Jesúsen' boži'e xtižen':

—Le šejnilaže' Dios. <sup>23</sup> Da' li žia' le'e, note'teze bene' ye'e ya'a nga: “Gwcuase nga na' jayzoa lo' nisdao’”, še bi chacžejlaže' lo' yichjlažda'ogüe', san chejnlaže' Diosen', guacczen. <sup>24</sup> Da'n'an' žia' le'e, yogo'te da' nable cate' chol güižle Dios, le šejle' guaqueczen, na' le gacczen. <sup>25</sup> Na' cate' chol güižle Dios, še zoa da' chac chele len bene' yoble, le yezi'xen che', cont lecze ca' Xacho Dios ben' zoa yaba yezi'xene' che xtoła'le. <sup>26</sup> Perw še le'e bi yezi'xenle che bene', Xacho Dios bene' zoa yaba bi yezi'xene' che xtoła'le.

*Yela' gwnabia' che Jesúsen'*

*(Mt. 21:23-27; Lc. 20:1-8)*

<sup>27</sup> Nach ja'aque' Jerusalén da' yoble, na' šlac chda Jesúsen' chyo'o yodao' blaon' jasebiga' b̄xoz gwnabia' ca' na' bene' ca' chososed chosolo'e dan' bzoj da' Moisés na' len bene' gole blao' ca' chesenabi'e nacióñna'. <sup>28</sup> Na' gosenabde' le':

—¿Bi yela' gwnabia' napo' chono' da' qui? ¿No beñ yela' gwnabian' cont chonon'?

<sup>29</sup> Jesúsen' boži'e xtižen', gwne':

—Leze de to da' nabda' le'e na' še yoži'ile xtižan', nach ñia' le'e bi yela' gwnabia' chonlendan'. <sup>30</sup> ¿No gwseła' da' Juanna' bzoe' bene' nis? ¿Dios nan' gwsele'ne' še benachen'? Le yoži'i xtižan'.

<sup>31</sup> Nach legacze' gose' lježe':

—Še ye'chone' Dios gwsele' le', na' ye'e chio': “¿Bixchen' ca gwyejle'le che'?” <sup>32</sup> Bi gac ye'chone' benach gwseła' le'.

Gosene' ca' da' besežebe', le yogo'te bene' že' na' gosejle'e Diosen' gwsele' da' Juanna' be'e xtiže'na'.

<sup>33</sup> Nach gose'e Jesúsen':

—Bi nezeto'.

Nach Jesúsen' gože' legaque':

—Lecze neda' bi yapa' le'e bi yela' gwnabian' chonlenda' da' ca'.

## 12

*Jempl che bene' güen žin ben' gosaque' bene' mal*

*(Mt. 21:33-46; Lc. 20:9-19)*

<sup>1</sup> Nach Jesúsen' gwzola güe' choelene' legaque' diža' chzoe' jempl, na' gože' legaque':

—Gwzoa to bene' goze' to cue' xen yag uvas na' gwlo'en le'ej. Na' bene' to ga yesesie' uvasen' cont choj xisen', na' bene' yeto da' sibe ca to campanario ga yesecua' bene' yosogüia yesene'e yag ca'.

'Nach bcua'ane' yežlion' lo na' bene' yesonši'e yag uvasen', na' gwze'e gwyeje' zito'. <sup>2</sup> Na' cate' bžin ža yosyotobe' cosešen', gwsele' to xmose' lao bene' ca' nac lo na'gaque' yag uvasen' cont yosonežjue'ne' to tlaw coseš dan' yesyezi'en. <sup>3</sup> Perw na' bene' ca gosezene' mosen' gosot goseyine'ne', na' to ga'alze' bosyose'ene' bibi goso'ene'. <sup>4</sup> Nach xan yežlion' da' yoble gwsele' yeto xmose'; perw benga bosožie'ne' yej, gosone' güe' yichje' na' gosonde' le' zgot. <sup>5</sup> Nach xan yežlion' gwseła'che' yetoe', na' benga gosottecze'ne'. Gwdena' gwseła'che' bene' zan, na' bale' gosot goseyine' le' na' yebale' gosottecze'ne'.

<sup>6</sup> 'Ne' zoa yeto bene' biña' sele', bena' xi'ine' bene' chacchgüede', na' bzebte gwsele' le', le bene' xbab: “Yesezi'e xtižen'.” <sup>7</sup> Perw bene' ca' gose'

lježe': "Bengan' yega'anlene' yežlio nga cate' gat xən'. Le da gotchone' cont yega'anlenchon." <sup>8</sup> Na' gosezene'ne', gosote'ne', na' besyebje' cuerp chen' gan' že' yag ca', bosozalen' ga yoble.

<sup>9</sup> Nach Jesúsen' gwñabe':

—¿Bi chaquele? ¿Nacxe gon xan yežlion' len bene' ca' bocua'anlene' yag uvas chen'? Šeje' šjetoe' legaque', na' yodie' yežlion' lo na' bene' yoble.

<sup>10</sup> ¿Bina' gwlable ga nyoj Xtiza' Diosen'? žan quinga:

Yej dan' bi gosaclačže' bene' güen yo'o ca' yosočhine',  
len ba naquen yej squin.

<sup>11</sup> Da' nga ben Xancho Dios, na' naquen to da' yežejecho.

<sup>12</sup> Nach gosaclačže' yesezene' Jesúsen', le gosacbe'ede' be'e jemplna' neče dan' bi chesejnilaže' le'. Perw besežebe' še bi yesone bene' ca' nžaguen' legaque', da'nan' bosocua'ane'ne' na' besyeya'aque'.

*Ca nac che dan' cheyala' gaxjw*

(Mt. 22:15-22; Lc. 20:20-26)

<sup>13</sup> Gwdena' gosesele' bal bene' fariseo na' bal bene' ca' goseda' Herodes cont yesebeje' Jesúsen' diža' da' yosode'ede' cont yesagüe' xya che'.

<sup>14</sup> Bene' ca' ja'aque' na' gose'ene':

—Maestro, nezeto' zoatezo' cho'o diža' li na' bi chono' cuent bi ža bene', le toze can' chon' len note'teze bene'. Na' nezeto' diža' li cho'o chsed chlo'edo' bene' can' chazlačže' Diosen' goncho. Da'nan' zedenabeto' le' žnaquen binlo no chixjo da' cheyala' chixjo che ben' nac la'zelagüe bene' gwnabia' ben' chi' Roma? ¿Gwdixjwton', še bi chixjwton'?

<sup>15</sup> Jesúsen' gocbe'ede' gague do lažen' chese'ene' ca', san chesaclačže' yesonlede' le' len xtiža'gaquen', nach gože'ne':

—¿Bixchen' chacláže'le yoslažo'le neda' len xtižan'? Le gon neda' to mechw cont na'an.

<sup>16</sup> Na' goso'enen', na' cate' ble'eden' na' Jesúsen' gwñabde' legaque':

—¿No lao dan' da' le'e mechw nga? na' žno la dan' nyoj le'en ni?

Nach bosoyoži'en gose'ene':

—Che César ben' nac la'zelagüe bene' gwnabian' ben' chi' ciuda Roman'.

<sup>17</sup> Nach Jesúsen' gože'ne':

—Le gwnežjo bene' gwnabian' da' nac che bene' gwnabia', na' le gwnežjo Dios da' nac che Dios.

Na' besyebande' can' boži'e xtižen'.

*Gosenabde' le' bi zejen dan' yesyeban bene' guat ca'*

(Mt. 22:23-33; Lc. 20:27-40)

<sup>18</sup> Nach besežin bal bene' saduceos gan' zoa Jesúsen'. Bene' ca' chesene' bene' guaten' bich yesyebane'. Nach gosenabde' le', gose'ene':

<sup>19</sup> —Maestro, da' Moisésen' bzoje' can' cheyala' goncho, gwne' še to bene' byo gate' na' chzeb no'ol chen' perw na' nono bi' güezeb chga'an, na' bene' biše' ben' ba got cheyala' yošagna'lene' no'ol güezeba' cont yesenita' xi'in diaža che da' bišen'. <sup>20</sup> Gosenita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'. <sup>21</sup> Na' bene' gwchopa' bošagna'lene' no'ol güezeba', na' lecze gote' nono xi'ine' gwnita'. Lecze ca' goc len bene' gwyona'. <sup>22</sup> Na' ca' goc gosedaš bene' gaža' bosošagna'lene' no'ola', na' ne toe' ca' gosezoa xi'ine' len le'. Gwde gosat yogo'lol bene' ca', ca' beyožen got len no'ola'. <sup>23</sup> Gož neto', cate' yesyebane' ladjo bene'

guat ca' ĩnox bene' ca' soalene' no'ola' ca xo'ole'? le yogo' bene' gaža' bosošagna'lene' le'.

<sup>24</sup> Nach Jesúsen' boži'e xtižen', gwne':

—Clelen' chonle xbab dan' žale ca', le bi nezele can' ža Xtiža' Dios da' nyojen, neca nombia'le yela' guac chen'. <sup>25</sup> Cate' yesyeban bene' guat ca' bich yosošagna' bene', neca yosonežjo xi'ine' no'ol gwšagne'e, le yesaque' ca angl bene' zjazoa yaba. <sup>26</sup> Na' ca nac dan' yesyeban bene' guat ca', ĩbina' gwlable gan' bzoj da' Moisés, can' gož Diosen' le' caten' boļ güiže'ne' to lo yag yeše' dao' da' chey? Gože'ne': “Neda' naca' Dios ben' chonxen Abraham, ben' chonxen Isaac, na' ben' chonxen Jacob.” <sup>27</sup> Bene' guat ca' bi chesonxene' Diosen', san bene' zjamban. Na' ca nac le'e, leca clelen' chonle xbab.

*Da' nac da' žialao da' cheyala' goncho*

(Mt. 22:34-40)

<sup>28</sup> Leze bžin to bene' bsd blo'ede' ley dan' bzoj da' Moisés, bene' bende' caten' chesežeše' len Jesúsen', na' nezde' boži'icze Jesúsen' xtiža'gaquen' binlo. Na' bena' gwñabde'ne':

—ĭNon' nacch da' žialao da' zjanyojen da' ža Diosen' cheyala' goncho?

<sup>29</sup> Jesúsen' boži'e xtižen' gože'ne':

—Da' nga nacch da' žialao lao yogo'loen, žan: “Le gwzenag bene' Israel gualaž chia', toze Xancho Dios naque' bene' zaca' gonxencho. <sup>30</sup> Da'n'an' cheyala' gaguecho Xancho Diosen' con ca zelao chejni'icho, do yichj do laže'cho, do fuerz valor checho.” Lenña' naquen da' žialao lagüe da' ca' ža Diosen' cheyala' goncho. <sup>31</sup> Na' da' gwchopen' zejgalan' ca', gan' žan': “Cheyala' gague lježcho ca chaque cuincho.” Bich bi de da' že' cheyala' goncho da' zaca'ch ca da' qui.

<sup>32</sup> Nach ben' chsed chlo'e dan' bzoj da' Moísesen' gwne':

—Ca'yañen' naquen, Maestro. Da' licze can' gwñaon'. Toze Xancho Dios zaque' gonxenchone', na' noch no zoa bene' zaca'ch ca le'. <sup>33</sup> Na' še gaguecho Dios, con ca zelao chejni'icho, do yichj do laže'cho, do fuerz valor checho, na' gague lježcho ca chaque cuincho, lenña' zaca'chen ca yogo' da' choncho chotcho no beyixe' na' chzeychoba' chonxencho Diosen'.

<sup>34</sup> Nach cate' goche'e Jesúsen' boži'icze' xtižen' to licha, gože'ne':

—Gague da' xen chyažjen cont ñabdo' Diosen' ñabi'e yichjlažda'oguoñ'.

Na' ñe yetoe' bich beseyaxjde' bichle yesenabde' Jesúsen'.

*Criston' naque' xi'in diaža che da' rey David*

(Mt. 22:41-46; Lc. 20:41-44)

<sup>35</sup> Jesúsen' bsd blo'ede' chyo'o yodaon', gwne':

—ĭNacxechen' bene' ca' chososed chosolo'e dan' bzoj da' Moisés chesene' Criston' ben' gwlej Diosen' cont yedenabi'e naque xi'in diaža che da' rey David? <sup>36</sup> Cuin Daviden' gwne' can' blo'e Spiritw che Diosen' le': Xancho Dios gože' Xanan': “Gwche'edo' cuita' nga ñabi'acho txen, na' gona' cont yogo' no chesegue'e le' yosozexjw yichje' yosozenague' chio'.”

<sup>37</sup> ĩNacxe gac ñacho Criston' naque' xi'in diaža che da' David? le cuin Davin' gože' le': “Xana’”.

Na' zjanyanchgua bene' ca' chosozenag xtižen', na' besyebede' xtižen'.

*Jesúsen' bcuiše' beṇe' ca' chososed chosolo'e ley dan' bzoj Moisés*

(Mt. 23:1-36; Lc. 11:37-54; 20:45-47)

<sup>38</sup> Jesúsen' caten' chsed chlo'ede' legaue' gwne':

—Le gwsaca' cont bi gonle can' cheson beṇe' ca' chososed chosolo'e dan' bzoj da' Moisés, le chesyebede' chesaše' zjanyaze' lache' ton, na' chesyebede' chesap beṇe' legaue' bala'an cate' chesyěžague' lagüe ya'a. <sup>39</sup> Chesyebede' chesebi'e gan' chesebe' beṇe' blao cate' chja'aque' yodao' na' cate' chac lni. <sup>40</sup> Legaue' chesegue'e yo'o che no'ol güezeb ca', na' cate' chosol güiže' Dios, sša cheso'e diža' cont yesaque beṇe' leca chesonxene' Diosen'. Beṇe' can' yesacche' castigw clél ca yezica'chle beṇe' güen da' xinj.

*To no'ol güezebe be'e Diosen' xmechue'*

(Lc. 21:1-4)

<sup>41</sup> Na' šlac zoa Jesúsen' chyo'o yodaon', gwchi'e gala'ze gan' xoa caj gan' chesegüe'e mechw che yodaon', na' chne'e can' chesego'o beṇe' mechw. Na' zan beṇe' gwni'a ca' chesegüe'e da' zcha'o mechw. <sup>42</sup> Ca' chac, cate' bžin to no'ol güezebe beṇe' yaše', gwlo'e chop mechw dao' da' bibi zaca'tec. <sup>43</sup> Nach Jesúsen' goxe' beṇe' ca' zjanaque' le' txen na' gože'ne':

—Da' li žia' le'e, no'ol güezebe yaše' nga ba gwlo'oche' mechw da' zaca'ch len Diosen' clél ca yogo' beṇe' ca' chesego'o mechw lo' cajen', <sup>44</sup> le yogo' legaue' chesegüe'e da' checho'onen lo yela' gwni'a chegaquen', perw no'ol nga, lo yela' yaše' yela' zi' che' gwlo'e yogo' da' de che' da' chacbanlende'.

## 13

*Jesúsen' gwne' gwžin ža yosyočinje' yodao' blaon'*

(Mt. 24:1-2; Lc. 21:5-6)

<sup>1</sup> Cate' cheza' Jesúsen' yodao' blaon' to beṇe' ca' zjanaque' le' txen gože'ne':

—iMaestro, gwṇa'šc catec xdan zjanac yej qui na' yo'o qui!

<sup>2</sup> Na' Jesúsen' boži'e xtižen', gože'ne':

—Ca nac yo'o xen qui chle'echo, žin ža cate' ne to yej da' zjancua' nga ca yega'an zjancua' cože' lježen. Yogon' yosyočinje'.

*Can' gac cate' ba zoa yeyož yežlion'*

(Mt. 24:3-28; Lc. 21:7-24; 17:22-24)

<sup>3</sup> Nach ja'aque' Ya'a Olivos gan' nla' yodao' blaon'. Na' cate' ba chi' Jesúsen' lo ya'an len Pedro na' Jacobo, na' Juan na' Andrés, beṇe' ca' zjanaque' le' txen, legaue' gose'ene' šižize:

<sup>4</sup> —Che'neto' nao' neto' batcan' gac da' ca'. ¿Nac gac nezeto' cate' ba zoa gac yogo' da' ca'?

<sup>5</sup> Jesúsen' boži'e xtižen', gwne':

—Le gwsaca' cont nono siye' le'e. <sup>6</sup> Le beṇe' zan yesaš yežlio nga yesaclaže' yosolane' xlatja' nga, yesene': “Nedan' naca' Cristo ben' gwlej Diosen' cont nabi'e.” Na' yeseziye'e beṇe' zan.

<sup>7</sup> Na' cate' yenele chac gwdile nile nale, o yenele guac gwdile, bi žeble, le can' cheyala' gac. Perw gague lenna' nacho ba bžin ža yeyož yežlion'. <sup>8</sup> Le yesedil to yež len yeto yež yoble na' to nación len yeto nación yoble, na' zan cuen ga xo'chgua lo yežlion', na' gata' gwbin na' yesebec beṇe' žaš. Na' da' qui gac cate' za' solao gata' yela' zi'.

9 'Na' le gwsaca' can' gonle, le yesone' le'e lo na' bene' gwnabia' ca' cont yesot yeseyine' le'e lo' yodao' chegaquen', na' dan' chejnilaže'le neda' nita' bene' yesече'exoje' le'e no lao rey no lao nochle bene' gwnabia', na' can' güe'lenle legaquen' xtižan'. 10 Le za' te che yežlion', xtiža' Diosen' cheyala' gas laljen doxen yežlion'. 11 Na' cate' yesezene' le'e na' yesече'e le'e lao bene' gwnabia' ca', bi cuec yichjle nac yoži'ile xtiža'gaquen', neca gonlen xbab. San le na con da' ye' Diosen' le'e nale lo hor na'teze, le gague le'eczen' nele, san Spiritw che Diosen' gonen ga nale bin' cheyala' nale. 12 Cana' bal benach yesechje' yesone' bene' biše' golje' lo na' bene' yesot legaque', na' nita' bene' yesone' xi'ingaque' lo na' bene' yesot legacbe', na' nita' bene' yesone' xaxne'e lo na' bene' yesot legaque'. 13 Yogo'ze bene' yesegue'ede' le'e dan' chejnilaže'le neda', perw note'tez le'e gwyo gwchejlaže'le cont bi cuejyichjle dan' chejnilaže'le neda' žin žate gatle, nach šjayzoale len Diosen'.

14 'Da' Daniel ben' gwdixjue'ede' xtiža' Dios bzoje' che da' zbranchgua da' gwxiñjen latje gan' chonxencho Diosen'. Na' cate' le'e le'ele ba zoa dan' gan' bi cheyala' soan, cana' bene' yesenita' distritw Judea cheyala' yosoxonje' šja'aque' do ya'adao'. (Bene' gwlaben' cheyala' šejni'iden'.) 15 Na' bene' chda do yichjo' che liže' žana', bi yeyetje' yotobe' xšinlaže' ca' že' ližen', con yoxonje'. 16 Na' bene' chda yixe' bi yeyej liže' šjayxi' xalane'. 17 iNyaše'chguaze zjanac no'ol ca' zjanoa' xi'in, na' no'ol ca' ne' chosoguaže' bidao' lo ža ca'! 18 Le nab lao Dios bi yažjen gwxonjle caten' chac zag, 19 le yesaquen ža da' leca yesale' bene'. Cate' bxete Diosen' yežlio na' ža na'aža nono na' gale' ca', neca žinlažen' yesale'de' ca' da' yoble. 20 Na' šaca' Xancho Diosen' bi yozaše' žan' yesac ca', notno yela, perw yozašen' neche chacde' bene' ca' chesejnilaže' le', bene' ba gwleje' zjanaque' xi'ine'.

21 'Cana' še no ye' le'e: "Le na'šč, nga zoa Cristo ben' gwlej Diosen' cont nabi'e", o "Le na'šč, na' zoe", bi šejle'le. 22 Le yesaš bene' gwxiye' bene' yesaclaže' yosolane' xlatja' nga, na' yeson cuine' ca' bene' chesoe' xtiža' Dios. Na' yesone' yela' guac da' yesele'e bene' na' bichle da' zaca' yesyebande' cont yeseziye'e legaque', na' len bene' ca' ba gwlej Diosen' zjanaque' xi'ine' yesaclaže' bene' gwxiye' ca' yeseziye'e šaca' gac yeseziye'e legaque'. 23 Perw ca' nac le'e, le gwzenag, le ba gwdixjue'eda' le'e yogo' can' gac.

*Can' gac cate' ben' gwsela' Diosen' golje' benachyide' da' yoble  
(Mt. 24:29-35, 42-44; Lc. 21:25-36)*

24 'Perw ca' nac ža ca' cate' yeyož gale'le can' gwnia', gwbižen' yeyaquen choł na' bion' bich gwseñin'. 25 Na' beljw ca' yeselažon' le'e yaban', na' yogo' da' chle'echo le'e yaban' yesaquen ca' chac yežlion' cate' chxo'. 26 Nach bene' že' yežlion' yesele'ede' neda' naca' ben' gwsela' Diosen' golja' benach za'a ladjo bejon' len yela' guac xen na' yela' bene' zaca' juisyw chian'. 27 Nach sela' angl chian' yosyotobe' yogo' bene' ca' ba gwleja' cont zjanaque' neda' txen gate'teze nite' doxen lo yežlion', ga zelao nac zito'.

28 'Le gwzenag che jempl nga che yag yixgüigon': Cate' ba chzolao chebešjw yaguen' na' chelan' laga' che'en dao', nezele ba za' lagüe ba. 29 Na' lecze cate' le'ele ba chac da' mal ca' ba gwnia', cana'ch nezele ba za' juisyw, ba zoa gala'. 30 Da' li žia' le'e, biña' yenit diaža che le'e nita'le na'a cate' yeyož gac yogo'loł da' ca'. 31 Le'e yaban' na' yežlion' yesede chen, perw ca' nac xtižan', gague da' te cbi gac can' žanna'.

<sup>32</sup> Perw nono neze bi ža bi horen' gac ca', ne angl ca' nita' yaba, nēca neda' naca' Xi'in Diosen' bi nežda'. Toze Xa' Dios neze.

<sup>33</sup> Da'nān', le soa le cueze, le güia le na', na' le soateze yol güižle Dios, le nono neze batcan' žin ža. <sup>34</sup> Naquen ca nac che to bene' šeje' zito', na' cate' za' se'e choñ liž xlatje' lo na' bene' güen žin che', cho'e žin da' yeson to toe', na' chzoe' bene' chape' cho'a yo'ona'. <sup>35</sup> Le soa le cueze ca bene' chesape' liže'na', le bi zjanežde' batcan' yela' xan yo'on, še cate' ba zoa gaļ, še chel, še cate' chbež jea, še cate' ba gwyeni'. <sup>36</sup> Le xož yele'e zejzenez na' yedoļe'de' legaque' chesetase'. <sup>37</sup> Da' nga žia' le'e leze žiczān' par yogo'loļ bene'. Le soa le cuez batcan' žin ža.

## 14

*Bosoxi'e yesezene' Jesúsen'*

(Mt. 26:1-5; Lc. 22:1-2; Jn. 11:45-53)

<sup>1</sup> Yečhop ža za' gaļa' pascw na' lni dan' chesone' caten' chesagüe' yetextil dan' bibi levadura yo'on. Na' bħoz gwnabia' ca' na' bene' ca' chososed chosolo'e dan' bzoj da' Moisés cheseyiljwlaže' nac yesone' yeseziye'e Jesúsen' cont yesezene'ne' yesote'ne'.

<sup>2</sup> Perw gosene':  
—Bi senchone' lo lnin' cont ca yesebec bene' žaš.

*To no'ole bzoe' set zix yichj Jesúsen'*

(Mt. 26:6-13; Jn. 12:1-8)

<sup>3</sup> Na' goquen' Jesúsen' zoe' Betania liž Simón ben' güe'e yižgüe' da' nzi' lepra. Na' šlac chi' Jesúsen' cho'a mes, bžin to no'ole noxe' to de yejese ga chož set da' chlā' zix, naquen dogualje da' bchoj lo yag yej da' nzi' nardo, na' zaca'chguan la'ay. Na' bzoxje' gan' yož seta' na' bzoačhočje' seta' yichj Jesúsen'. <sup>4</sup> Na' baļ bene' ca' zjanita' na' beseže'e, na' gose' lježe':

—¿Bixchen' benditjde' set zix nga? <sup>5</sup> Ša no bete' len güesonen ca no laxjw mos da' gone' gan tgüiz, na' gwnežjuen' gaclenen bene' yaše'.

Na' beseloque' no'ola'.

<sup>6</sup> Perw Jesúsen' gwne':

—Jayen'. ¿Bixchen' chnele che no'olen'? Dan' bene' len neda' nga naquen güen. <sup>7</sup> Le bene' yaše' ca' bate'teze nita'cze' len le'e, na' guaque gonle len legaque' da' güen cate' žan chele, san neda' bich soacza' yesša len le'e. <sup>8</sup> No'ole nga bene' da' zelao gwzaque'de'. Ba bguazje' neda' set zix can' cheyaļa' yesone' len neda' cate' gaša'. <sup>9</sup> Da' li žia' le'e, doxen yežlio gate'teze šjasedixjue'e bene' diža' güen dan' chzejni'in chia', decze de šjasyeze'ede' can' ben no'ol nga.

*Judas gwchoglaže' gwdie' Jesúsen' lo na' bene' ca' chesegue'e le'*

(Mt. 26:14-16; Lc. 22:3-6)

<sup>10</sup> Nach Judas Iscariote, ben' goque' txen len bene' ca' šižinw ben' gwlej Jesúsen' cont zjanaque' le' txen, gwyeje' jañe'e bħoz gwnabia' ca' cont yosoxi'e nac gone' gwdie' Jesúsen' lo na'gaque'. <sup>11</sup> Cate' gosende' xtiža' Judasen', besyebede' na' gose'ene' yeso'ene' mechw. Nach Judasen' gwzologüe' gwdiljwlaže' nac gone' gwdie' Jesúsen' lo na'gaque'.

*Xše' dan' gosagüe' len Xanchon'*

(Mt. 26:17-29; Lc. 22:7-23; Jn. 13:21-30; 1 Co. 11:23-26)

<sup>12</sup> Na' bžin ža čala' lni caten' neto' bene' Israel chagwto' yetextil dan' bibi levadura yo'o. Naquen ža nechw che lni pascw cate' chotto' xila' dao',



cont šjayza'laže'to' can' bosla Diosen' da' xozxta'oto' ca' lo na' bene' Egipto ca'. Na' bene' ca' zjanaque' Jesúsen' txen gosenabde' le':

—¿Ga che'ndo' šjasini'ato' cont gagwcho xše' che pascon'?

<sup>13</sup> Nach gwsele' chop bene' ca' na' gože'ne':

—Le šja'ac ciudan', na' yežagle to bene' byo no'e to che'e nis. Le šjlene',  
<sup>14</sup> na' gan' yežinen', le ye' xan yo'on: “Maestrona' že': Gonšco' to yo'o gan' gagwto' xše' ža lni nga len bene' ca' zjanaque' neda' txen.” <sup>15</sup> Nach gwlo'ede' le'e to quart xen dan' zoa yichjen na'ale gan' de yogo' da' chyažjecho. Na' le gwsini'a cont gagwcho na'.

<sup>16</sup> Na' gosa'ac bene' ca' chope, na' besežine' ciudan', na' yogo' can' gož Jesúsen' legaque' goc, na' bososini'e xše' že' lnin'.

<sup>17</sup> Cate' beyož gwxa gwbiž, bžin Jesúsen' len bene' šižinw ca' gwleje' cont zjanaque' le' txen. <sup>18</sup> Na' gosebi'e gosagüe' xše'. Na' šlac chesagüen', Jesúsen' gože' legaque':

—Da' li' žia' le'e, to le'e chagwle len neda' txen, gwdele neda' lo' na' bene' ca' chesegue'e neda'.

<sup>19</sup> Nach legaque' besyeyaše'laže'de' na' gosezolagüe' tgüeje tgüeje' gosenabde' le' gosene':

—¿Nedan' gona' ca'?

Na' yetoe' leze gwne':

—¿Nedan' gona' ca'?

<sup>20</sup> Na' Jesúsen' gože'ne':

—Ladjo le'e bene' šižinw, to bene' chagw len neda' txen toze lo' ye'en gon ca'. <sup>21</sup> Na' gac chia' can' nyoj le'e Xtiža' Diosen', neda' naca' ben' gwsela' Diosen' golja' benač. Perw jnyaše'chguaze nac ben' gwdie' neda' lo' na' bene' ca'! Yejni'acle ša bi goljen'.

<sup>22</sup> Na' šlac chesagüe', Jesúsen' gwxi'e to yetextilen', na' beyož be'e yela' choxclen che Dios, bzojxen', na' bnežjuen' legaque', gwne':

—Le gagon'. Lenna' cuerp chia'.

<sup>23</sup> Nach bešue' to vas gan' yože nis uvasen' na' beyož be'e yela' choxclen che Dios, be'en legaque', na' yogüe' gose'eje' late' güej dan' yože lo' vassen'.

<sup>24</sup> Na' gože' legaque':

—Da' ngan' xčhena' na' chzanlažan' laljen neche yogo'lol' benač. Na' laljen cont solao gac da' coben' da' gwna Diosen' gone' gaclene' benač.

<sup>25</sup> Da' li' žia' le'e, bich ye'eja' xis uvas na'a. Cate'ch žin ža ba zoacho txen gan' chnabia' Diosen', canan' ye'ejan' da' yoble.

*Jesúsen' gwne' Pedroa' bi chebe' naque' le' txen*

*(Mt. 26:30-35; Lc. 22:31-34; Jn. 13:36-38)*

<sup>26</sup> Beyož gosole' gosonxene' Diosen' nach gosa'aque' ja'aque' Ya'a Olivos. <sup>27</sup> Nach Jesúsen' gože'ne':

—Na'aže' yogo'le cuejyichje neda' neche dan' gac chian'. Le nyojzen le'e Xtiža' Diosen', žan: “Gota' bene' güeyoe xilan' na' xila' ca' yesaslasba'.”

<sup>28</sup> Perw cate' yosban Diosen' neda' ladjo bene' guat ca', yobch yeya'a Galilea ca' le'e.

<sup>29</sup> Nach Pedron' gože'ne':

—La' yogo' bene' quinga yesebejyichje le', neda' bi gona' ca'.

<sup>30</sup> Perw Jesúsen' gože'ne':

—Da' li' žia' le', bina' cuež jean' chop ni'a na'aže' cate' gac šon ni'a bi chčebo' še nombi'o neda'.

<sup>31</sup> Perw Pedroa' do laže' gwne':

—La'czla' še chonen byen guatlencza' le', gwbat ñia' bi nombia' le'.  
Na' lecze ca' gosena' yogüe'.

*Jesúsen' boł güiže' Xe' Dios Getsemaní*  
(Mt. 26:36-46; Lc. 22:39-46)

<sup>32</sup> Nach besežine' latje gan' nzi' Getsemaní, na' Jesúsen' gože' beñe' ca' zjanaque' le' txen, gože'ne':

—Ngaze le cue'edo' šlac neda' šjel güiža' Dios.

<sup>33</sup> Na' gwche'e Pedro, Jacobo na' Juan, na' gwzolaon da' juisyw da' gocde' lo' yichjlažda'ogüen' na' benchgüe' xbab. <sup>34</sup> Na' gože' legaque':

—Lo' yichjlažda'ogua' nga chacyaše'chgüeda', chacda' gatcza' catequen' chžaglagua'. Nga le yega'an na' le soa le na' txen len neda'.

<sup>35</sup> Nach Jesúsen' gwžialagüe' yelate' na' jačhaze' cosčo'ale lo' yon' gwñabde' Dios še guac ten ca'ale bi gac can' ba zoa gac che'. <sup>36</sup> Gože' Diosen':

—Xa', bibi de da' nacho da' bi chac gono'. Benšca cont bi saca'zi'a na' bi yesote'nda', perw bi chñaba' gac da' žia' neda', san gac da' ñao' le'.

<sup>37</sup> Nach beyeje' gan' nita' beñe' ca' šone, na' ble'ede' zjanite' chesetase'. Na' gože' Pedron':

—Simón ¿chtason'? ¿Ne šlož da'oze ca' goc cuejo' bišgal len neda'?

<sup>38</sup> Bi tasle, san le yol' güiž Dios cont bi gon gwxiyen' le'e gan. Da' li lo' yichjlažda'olen' chña'laže'le gonle da' nac binlo, perw cuerp chelen' bi chzoeczen.

<sup>39</sup> Nach gwyeje' da' yoble na' boł güiže' Dios na' da' yoble gože'ne' dan' ba gožcze'ne' tñi'a. <sup>40</sup> Nach bezyeje' gan' niten', na' da' yoble ble'ede' chesetase', le yejlagüen' chesexa' chesežoden' bišgal. Na' bi besyežellaže' nac yosyoži'e xtižen'. <sup>41</sup> Na' da' gwyoñe ni'a gwyeje' na' bežžine' gan' nita' beñe' ca' šone na' gože' legaque':

—¿Ne' chtasle? ¿Ne' cheži'laže'le? Ba goc. Ba gole' gon to beñe' neda' lo' na' beñe' güen da' xinj ca', neda' naca' ben' gwseła' Diosen' golja' benach. <sup>42</sup> Le chas, le yeyo'o. Ba za' ben' gon neda' lo' na'gaque'.

*Gosezene' Jesúsen' cont yeseče'ene' lao beñe' gwnabia' ca'*  
(Mt. 26:47-56; Lc. 22:47-53; Jn. 18:2-11)

<sup>43</sup> Jesúsen' ñe' choe'te' dižan' ca' cate' bžin Judas, na' zan beñe' zja'aque' len le' zjanoxe' no yag, no spada, beñe' gosesela' bžoz gwnabia' ca' na' beñe' gole' blao ca' chesenabia' nación Israel cheton'. (Judasen' goque' to beñe' šižinw ca' gwlej Jesúsen' cont zjanaque' le' txen.) <sup>44</sup> Na' Judasen' ba gože' legaque' nac yesenezde' non' yesezene', gwne':

—Ben' gwnopa' xague', le'na'; le sene' na' le che'e.

<sup>45</sup> Na' cate' bžin Judasen' na' jabigue' gan' zoa Jesúsen' na' gože'ne':

—Maestro, Maestro.

Na' bnope'ne'. <sup>46</sup> Nach gosezene' Jesúsen' cont yeseče'ene'.

<sup>47</sup> Perw to ben' zecha cuit Jesúsen' gwlej spada chen' na' gwдынen' mos che bžoz blaon' gwchogte' šla'a nagen'. <sup>48</sup> Nach Jesúsen' gože' beñe' ca':

—¿Nonle neda' ca' to beñe' gwban za'acle zedexi'le neda' len spada na' len yag? <sup>49</sup> Yogo' žaze gwzoo' len le'e bsd blo'eda' beñe' chyo'o yodao' blaon', na' bi gwzenle neda'. Perw chac da' qui cont chac can' nyoj Xtiža' Diosen'.

<sup>50</sup> Nach yogu' beñe' ca' zjanaque' Jesúsen' txen bosoxoñje' gosebe-  
jyichje'ne'.

*Bi' güego' bin' boxonj*

<sup>51</sup> Na' to bi' güego' na'obe' Jesúsen', na' n̄xōa cože'be' toze sábara. Na' bene' ca' ba gosezene' Jesúsen' lecze gosenize'be'. <sup>52</sup> Perw gwlejšyichjbe' sábaran' na' boxonjbe' ga'alyidbe'.

*Goseche'e Jesúsen' lao bene ca' chesenabia' nación Israelen'*

(Mt. 26:57-68; Lc. 22:54-55, 63-71; Jn. 18:12-14, 19-24)

<sup>53</sup> Nach goseche'e Jesúsen' lao b̄xoz blaon', na' besežag yogo' bene' ca' zjanac b̄xoz gwnabia', na' bene' gole blao ca' chesenabi'e nación četon' na' bene' ca' bososed bosolo'ede' dan' bzoj da' Moisés. <sup>54</sup> Na' Pedron' na'ogü'e Jesúsen' zito' zito'le bžintie' liž b̄xoz blaon' na' gwyo'e chyo'ona' gwchi'e txen len bene' ca' chesape' yodao' blaon' boše'e cuine' cho'a yi'.

<sup>55</sup> Na' ca' nac b̄xoz blaon' na' yogo' bene' ca' chesenabia' nación četon', besyeyiljwlaže' bi' da' yesagü'e xya čhe Jesúsen' cont yesote'ne', perw bi' besyeželden'. <sup>56</sup> Na' zan bene' gosone' diža' güenlaže' čhe Jesúsen', perw bi' gosene' toz ca' yesene'. <sup>57</sup> Bałe' gosezože'e na' bososbague'ne' xya čhol, gosene':

<sup>58</sup> —Neto' beneto' gwne': "Neda' yochinja' yodao' nga da' ben beňach, na' šone žaze yeyona' yeto yodao' da' bi gon beňach."

<sup>59</sup> Perw ne ca' ca' gosene' toz ca' yesene'.

<sup>60</sup> Nach b̄xoz blaon' gwzože'e ladjo yogo'lole' na' gwñabde' Jesúsen':

—¿Bi choži'o xtižen'? ¿Bi dan' chosožie' le' xya?

<sup>61</sup> Perw Jesúsen' bitw bi gwne', bitw boži'e xtižen'. Na' b̄xoz blaon' da' yoble gwñabde' le', gwne':

—¿Naco' le' Cristo ben' gwlej Diosen' cont nabi'e, na' Xi'in Dios ben' chonxencho?

<sup>62</sup> Jesúsen' gože'ne':

—Le can' naca'. Na' le'ele neda' cate' ba chi'a šla'a liča čhe Dios ben' nac la'zelagü'e bene' gwnabia', neda' naca' ben' gwsele' golja' beňach. Na' le'ele yetja' ladjo bejw dan' ze le'e yaban'.

<sup>63</sup> Nach b̄xoz blaon' gwčeza' xalane' cont nachbia' bi beque'e can' gwna Jesúsen', na' gwne':

—Noch no chyažje bene' co' da' bałi. <sup>64</sup> Le'e ba benele chne' čhe Dios dan' že' ca', chon cuine' ca' Dios. ¿Nacxe ža le'e?

Na' yogü'e gosene' nape' doła' na' cheyała' gate'.

<sup>65</sup> Nach bałe' gosezolagü'e' chosoži'ene' xene' na' bososeyjue' lagüen' len to lache' na' gosot goseyine' le', na' gosonle' čhe' gose'ene':

—jGwnašč non' chot le'!

Na' bene' ca' chesape' yodao' blaon' gosot goseyine' le'.

*Pedron' bi gwchebe' še nombi'e Jesúsen'*

(Mt. 26:69-75; Lc. 22:56-62; Jn. 18:15-18, 25-29)

<sup>66</sup> Pedron' chi'e chyo'o che'elele, cate' bžin to no'ole güen žin čhe b̄xoz blaon'. <sup>67</sup> Na' cate' no'olen' ble'ede' le' chi'e choše'e cuine' cho'a yin', gwne'e le' na' gože'ne':

—Lencze le' naco' txen len Jesús bene' Nazaret.

<sup>68</sup> Perw Pedron' bi gwchebe', gwne':

—Bi nombi'ane', neca nežda' bin' žo'.

Na' beyej Pedron' jayzie' cho'a puert na'le. Nach gwchež to jea. <sup>69</sup> Na' no'ol güen žinna' gwne'e le' da' yoble na' gože' bene' ca' nita' na':

—Benga naque' legaque' txen.

70 Perw le' da' yoble bi gwchebe' še naque' txen len Jesúsen'. Na' gocze štít da' yoble bene' ca' nita' na' gose'e Pedron':

—Da' licze, le' naco' txen len legaque', le naco' bene' Galilea, nachbia' chñio' can' chesene bene' Galilea ca'.

71 Nach Pedron' chóp šone ni'a gwne':

—Diosen' gone' neda' castigw še chonlaža' žia' bi nombi'a bena'.

72 Na' cate la' gwchezte jean' da' gwchope. Nach jayze'e Pedron' can' gož Jesúsen' le': "Bina' cuež jean' chóp ni'a cate' gac šon ni'a bi chebo' še nombi'o neda'." Na' cate' jayze'ede' can' gož Jesúsen' le', na' gwcheže'.

## 15

### *Goseche'e Jesúsen' lao Pilato*

(Mt. 27:1-2, 11-14; Lc. 23:1-5; Jn. 18:28-38)

1 Ca gwyeni', bχoz gwnabia' ca' besežague' len bene' gole blao ca' chesenabi'e nación cheton' na' len bene' ca' chososed chosolo'e dan' bzoj da' Moisés na' len yezica'chle bene' gwnabia' ca'. Na' bosocheje' Jesúsen' na' goseche'ene' jasesane'ne' lo na' Pilato ben' nac gobernador. 2 Pilaton' gwñabde'ne', gože'ne':

—¿Len' naco' rey che bene' Israel?

Jesúsen' boži'e xtižen', gwne':

—Can' gwnao'na', can' naquen.

3 Na' bχoz gwnabia' ca' da' zan da' bosocuiše'ne'. 4 Nach Pilaton' da' yoble gwñabde'ne', gože'ne':

—¿Bi choži'o xtiža'gaquen'? le da' zan da' chosocuiše' le'.

5 Perw Jesúsen' bitw bi gwne'. Na' Pilaton' bebande' che'.

### *Gosechogbi'en gat Jesúsen'*

(Mt. 27:15-31; Lc. 23:13-25; Jn. 18:38-19:16)

6 Na' gota' costumbr, Pilaton' gwsane' to bene' de ližya caten' čala' lni pascw che neto' bene' Israel, con to bene' yeseñab bene' gualaž cheton'. 7 To bene' lie' Barrabás na' len yexonj bene' gosot bene' cate' besyedabague' gobiernna' zjayo'e lo' ližya len nochle bene' güen da' mal. 8 Nach besežag bene' na' gosenabde' Pilaton' gwsane' to bene' con can' nac costumbr čegaquen'. 9 Na' Pilaton' boži'e xtiža'gaquen' gwne':

—¿Chaclaže'le gwsana' rey che le'e nacle bene' Israel?

10 Gwne' ca' le goche'ede' dan' chesacxi'a bχoz gwnabi'a ca' Jesúsen', da'nan' bosodie' le' lo ne'e. 11 Perw bχoz gwnabia' ca' bosota bosone' bene' ca' že' na' cont gosenabe' gwsane' Barrabás ben' de ližyan'. 12 Nach Pilaton' gwñabde' legaque':

—¿Bixe gona' len ben' žale nac rey che le'e nacle bene' Israel?

13 Legaque' bososya'adie' bosyoži'e xtižen':

—jBde'e le'e yag cruz!

14 Pilaton' gože' legaque':

—¿Bixe da' xinj nonen'?

Nach legaque' da' yoble bososya'achgüe' gosene':

—jBde'e le'e yag cruz!

15 Nach Pilaton', cont bega'ane' güen len bene' ca', bsane' Barrabásen' can' gosenabe'. Na' bene' mandadw gosot goseyin soldadw che' ca' Jesúsen', nach bene' le' lo na'gaque' cont yosode'ene' le'e yag cruz.

16 Nach soldadw ca' goseče'ene' yeto latje dan' zoa chy'o c̄he liž beṇe' gwnabian', na' bosotobe' yogo' soldadw ca', zjanac zane'. 17 Gosečhize' Jesúsen' to lache' moradw, na' gosone' to corona de xis yeše' bosozoen' yichjen'. 18 Na' gosezologüe' chesonle' c̄he', chesosye'e:

—¡Viva, rey c̄he beṇe' Israel!

19 Na' bosozete' yichjen' xis, bosozhi'ene' xene', na' bosozoa xibe' gosone' ca beṇe' chesonxen le'. 20 Beyož gosonle' c̄he', besyeyiṇe' lache' moradon' na' bosyoguacue'ne' xacze'. Nach goseče'ene' cont jasede'ene' le'e yag cruz.

*Bosode'ene' le'e yag cruz*

(Mt. 27:32-44; Lc. 23:26-43; Jn. 19:17-27)

21 Na' šlac zjanče'ene' gan' yesote'ne' besyežague' to beṇe' yež Cirene le' Simón, xa Alejandro na' Rufo, za' zeze'e yiṇe', na' bosogüe'ene' yag cruz c̄he Jesúsen'.

22 Goseče'e Jesúsen' latje ga nzi' Gólgota, zeje dižan' Latje c̄he Žit Yichj Beṇe' Guat. 23 Na' goso'ene' vino da' nchixe to nechw da' nzi' mirra, perw Jesúsen' bi goclaže' ye'ejen'. 24 Nach bosode'ene' le'e yag cruzen'. Na' soldadw ca' gosone' rifa cate' besyele'e xalana' Jesúsen' cont bla' bi besyechel' to toe'.

25 Cheda ga šezille caten' bosode'ene' le'e yag cruz. 26 Na' yichj yag cruzen' bosozoe' dan' bosozoje' choen' diža' bixchen' gosote'ne'. Qui nyojen, žan: "Rey c̄he Beṇe' Israel." 27 Txen len Jesúsen' lecze bosode'e le'e yag cruz yečhope beṇe' gwban, toe' šla'a licha, na' yetoe' šla'a robes. 28 Na' da' gosone' ca', goc ca' nyoj Xtiza' Diosen', žan: "Gosone'ne' ca beṇe' güen da' xinj."

29 Na' beṇe' gosede gala'ze gosezi'diže'ne', con chosota yichje' gosene':

—Le' gwnao' yochinjo' yodaon' na' šone žaze yeyontion'. 30 Bosla cuino' na' beyetj le'e yag cruzu'.

31 Lecze ca' b̄xoz gwnabia' ca' na' beṇe' ca' bososed bosolo'e dan' bzoj da' Moisés gosezi'diže'ne', na' gose' lježe':

—Bosle' beṇe' yoble, perw bi chac yosla cuine'. 32 Le'echone' yeyetje' na'a le'e yag cruzen', nach šejle'cho naque' Cristo ben' gwlej Diosen' cont nabi'e chio' beṇe' Israel.

Na' lente beṇe' ca' bosoda'lene' le' le'e yag cruz ca' gosezi'diže'ne'.

*Can' goc caten' got Jesúsen'*

(Mt. 27:45-56; Lc. 23:44-49; Jn. 19:28-30)

33 Cate' bžin guagwbiž, doxen yežlion' goc chol, bžinte cheda šone. 34 Na' ca hora' Jesúsen' gwne' zižje gwne':

—Eloi, Eloi ĩlama sabactani? —zeje diža': Dios chia', Dios chia', ĩbixchen' ba gwlejiyichjo' neda'?

35 Na' bal beṇe' ca' zjanita' na' gosende' na' gosene':

—Le gwzenag, chol güiže' da' Elías, ben' be' xtiža' Dios cani'.

36 Nach to beṇe' ca' gwyejsese' na' bzažede' to esponja vino zichj na' bzoen' to lao xis tone nach jažiguen' cho'a Jesúsen' cont xopen', na' gwne':

—Cuezcho, yešque güid Elíasen' yeletje' le'.

37 Nach Jesúsen' bosye'e zižje, na' gote'. 38 Na' lache' da' ze lo' yodao' blaon' bcheza' gacholen, gwza'te yichjen bžinte che'eje. 39 Na' xan soldadw ca' zie' lao Jesúsen', na' cate' bende' can' bosye'en na' ble'ede' can' gotten', gwne':

—Da' li le bengan' goc dogualje Xi'in Dios.

<sup>40</sup> Lecze bal no'ole zjanite' zito'le chesene'e. Na' len legaque' zjanita' María no'ole Magdala, na' Salomé, na' María xna' Jacobo bene' naše'te, na' lecze goque' xna' José. <sup>41</sup> No'ol qui gosa'ogüe' Jesúsén' na' gosaclene' le' cate' chsed chlo'ede' bene' ca' že' distritw Galilea. Na' yezanch no'ol zjanita' na', bene' ja'aclene' le' txen Jerusalén.

*Bosocuaše' Jesúsén'*

(Mt. 27:57-61; Lc. 23:50-56; Jn. 19:38-42)

<sup>42</sup> Žana' goquen žan' bososi'ne' par ža che Dios cate' bi de lsens yesone' žin. Na' cate' ba chxoa gwbiž, <sup>43</sup> to bene' le' José, bene' ciuda Arimatea, beyaxjde' gwyeje' lao Pilaton' na' jaynabe' cuerp che Jesúsén'. José goque' to bene' zaque' lao bene' ca' gosenabi'e nación Israel cheton', na' ba zoe' chbeze' batcan' solao nabia' ben' sela' Diosen'. <sup>44</sup> Pilaton' bebande' dan' ba gote', na' goxe' xan soldadw ca' cont gwñabde' le' še da' li ba gote'. <sup>45</sup> Na' cate' xan soldadw ca' gože' le' le can' ba goc, Pilaton' bnežjue' latje beyoa' Josén' cuerp che' Jesúsén'. <sup>46</sup> Nach Josén' gwzi'e to lache' xen, beletje' cuerp che Jesúsén' na' bolažen' len. Na' la' jase'lo'ote' le' to lo' bloj da' nche'ene' le'e yej xen, na' blole' to yej cho'a blojen' cont bseyjon len. <sup>47</sup> Na' María no'ole Magdalan' len María xna' Josén' besele'ede' gan' bosocuaše'nen'.

## 16

*Beban Jesúsén' ladjo bene' guat ca'*

(Mt. 28:1-10; Lc. 24:1-12; Jn. 20:1-10)

<sup>1</sup> Cate' gwde ža che Diosen', María no'ole Magdalan', María xna' Jacobo, na' Salomé gosezi'e da' chla' zix cont šjaselo'en cuerp che Jesúsén'. <sup>2</sup> Na' šezildao' ža dmigw besežine' cho'a ban', cate' za' chla' gwbiž. <sup>3</sup> Na' za' yesežine' gose' lježe':

—¿Noxe ca'a yej xen dan' da' cho'a blojen'?

<sup>4</sup> Perw cate' besežine' na' gosen'e, besele'ede' yej xen dan' da' cho'a blojen' ba hga'an. <sup>5</sup> Nach goso'e lo' blojen', na' besele'ede' chi' to bene' xcuide' šla'a licha, nyaze' to lache' ton da' šiš. Na' besežebe'. <sup>6</sup> Na' bena' gože'ne':

—Bitw žeble. Cheyiljwle Jesús bene' Nazaret ben' bosode'e le'e yag cruz. Perw ba bebane'; notoch no nla' nga. Le na' gan' gosexoe'ne'. <sup>7</sup> Le šjaya'ac na' le ye' bene' ca' gosaque' le' txen, na' len Pedron', gwyobech Jesúsén' yežine' Galilea clcl ca' legaque'. Na' Galilean' na' yesele'ede'ne' can' gwnacze'.

<sup>8</sup> Nach no'ol ca' chosyoxonjsese' besyeya'aque' cho'a blojen', le chesex-iztite' besežebe'. Na' notno gose'e ca', le besexožde'.

*Jesúsén' blo'elagüe' María no'ole Magdala*

(Jn. 20:11-18)

<sup>9</sup> Beyož beban Jesúsén' ladjo bene' guat ca' šezildao' ža dmigw, Jesúsén' blo'elagüe' da' nechw len María no'ole Magdalan', ben' bebeje' gaž da' xigüe' yo'o nyaze'. <sup>10</sup> Na' María nga jatixjue'ede' bene' ca' ba gosenita' len le'. Zjanita'yaše' na' chesebeže' cate' bžine'. <sup>11</sup> Na' cate' gosende' be'e diža' mban Jesúsén' na' gosende' be'e dižan' can' ba ble'ede'ne', bi gosejle'e.

*Jesúsén' blo'elagüe' len chop bene' ca' gosaque' le' txen*

(Lc. 24:13-35)

<sup>12</sup> Beyož goc ca', čhop beṇe' ca' gosaque' Jesúsen' txen zjangüe'e nez yixe' cate' Jesúsen' blo'elagüe' legaque', na' nža'le besele'ede'ne'. <sup>13</sup> Lecze legaque' ja'aque' jasedixjue'ede' beṇe' yezica'chle, perw neca gosejle'e čhegaque'.

*Da' bgon Jesúsen' yeson beṇe' ca' chsejnilaže'ne'*  
(Mt. 28:16-20; Lc. 24:36-49; Jn. 20:19-23)

<sup>14</sup> Gwdena' beṇe' šnej ca' gwlej Jesúsen' cont zjanaque' le' txen zjachi'e cho'a mes chesagüe' cate' blo'elagüe' len legaque'. Na' gwdile' legaque' da' bi chesejnilaže' le' do yichj do laže' na' zjanaque' laždao' chačh, le bi gosejle'e čhe beṇe' ca' besele'ede'ne' ba bebane' ladjo beṇe' guat ca'. <sup>15</sup> Na' gože' legaque':

—Le šja'ac doxen yežlio, na' le šjatixjue'e diža' güen chia' len yogo'lol beṇe'. <sup>16</sup> Beṇe' ca' yesejnilaže' neda' na' yesezoe' nis, gata' yela' mban čhegaque' toli tocaṇe. Perw beṇe' bi chesejnilaže' neda', yesebiaye'e. <sup>17</sup> Na' beṇe' ca' chesejnilaže' neda', yesyega'anlene' da' qui: Yeso'e la' na' yesyebeje' da' xigüe' yo'o nyaz beṇe'; yesenie' diža' cobe da' bi zjansede'; <sup>18</sup> na' še yesoxe' no beḷ znia, o še yese'eje' da' nac venen, bibi yesacde'; na' lecze yesexoa taque' yichj beṇe' chese'e na' yesyeyacde'.

*Begüe Jesúsen' yaba*  
(Lc. 24:50-53)

<sup>19</sup> Beyož bšaljlene' legaque', Xancho Jesúsen' begüe' yaba, na' gwchi'e cuit Diosen' šla'a licha. <sup>20</sup> Na' beṇe' ca' zjanaque' le' txen besežaše' na' jasedixjue'ede' diža' güen čhe' doxen. Na' cuin Xancho Jesúsen' goclene' legaque' gosone' yela' guac cont gosejle' beṇe' le nac da' li dižan' goso'en. Da' na'zen' chzoja'.

## DIŽA' GÜEN DAN' BZOJ SAN LUCAS

*Da' nga bzoj Lucasen' par Teófilo*

<sup>1-4</sup> Teófilo, naco' bene' zaca' na' chzoja' le' diža' quinga cont nezdó' da' li ca nac da' ba bosozejni'ide' le' che da' ca' ba gosac. Bene' zan bačh bosozoje' che Jesúsen', goso'e diža' che da' ca' bene', con can' bosozejni'i bene' ca' neto', bene' ca' besele'ede' can' gwzolaon cate' goljte Jesúsen'. Na' bene' ca' gosende' na' besele'ede' can' goquen' bososed bosolo'ede' bene' yoble diža' güen che'. Na' neda' cate' beyož gwnabyoža' can' goquen' na' gwyazlaža' gwzobjan' tcho'a cont nezdó', Teófilo.

*To angl gwdixjue'ede' galje Juan*

<sup>5</sup> Ca tiemp caten' gwnabia' rey Herodes distritw gana' nzi' Judea, na' gwzóa to b̄xoz che bene' Israel ca' bene' le Zacarías. Bene' žin len to xonj b̄xoz bene' zjale Abías. Na' no'ol che Zacarías le Elisabet, na' naque' diaža che da' b̄xoz Aarón. <sup>6</sup> Na' Zacarías len Elisabeten' zja'accze to licha len Diosen' na' gosonyane' yogo'loj da' non Xancho Diosen' mandadw da'na' nyoj le'e ley che'na'. <sup>7</sup> Na' nono xi'ingaque' nita' neche Elisabeten' naque' no'ol güiž. Na' chopte' ba zjanaque' bene' gole.

<sup>8</sup> Na' goquen' beyala' Zacaríasen' len bene' lježe' ca' bene' ca' zjanaque' b̄xoz cont yesone' da'na' besyeyale' yesone' yesonxene' Dios. <sup>9</sup> Na' b̄xoz ca' yogo' ni'a chesone' rifa cont chata'bia' noe' choj gwzeye' yal lo' yodao' blao čhegaque' gan' chesonxene' Xancho Diosen'. Na' bchoj Zacaríasen' caten' gosone' rifan' bzeye' yala' lo' yodao'na'. <sup>10</sup> Na' šlac bzeye' yala' gosenita' yogo'loj bene' zan ca' chy'ole bosol güiže' Diosen'. <sup>11</sup> Na' to angl bene' gwseła' Xancho Dios blo'elagüe' Zacaríasen', na' gwzecha angla' cuit mesa' lichale gan' chosozeye' yala'. <sup>12</sup> Na' cate' ble'e Zacaríasen' anglen', benit bechol lo' yichjlažda'ogüe' na' bžebchgüe'. <sup>13</sup> Perw anglen' gože' le':

—Bitw žebo' Zacarías. Diosa' ba bzenague' che dan' gwnabdo'ne', na' no'ol čhio' Elisabeten' sane' to xi'ino', na' gwsio'obe' Juan. <sup>14</sup> Na' so' mbalaz na' yebedo' na' leczze bene' zan yesyebede' še ba goljbe'. <sup>15</sup> Gache' to bene' blao lao Diosen'. Bitw ye'ejbe' vino ne bichle da' chzože bene'. Na' cate' za' galjtebe' ba yo'o Spiritw che Diosa' lo' yichjlažda'obe' nabi'an lebe'. <sup>16</sup> Na' gombe' cont zan bene' Israel ca' yosoša' yichjlažda'ogüe' na' yesonxene' Xancho Diosen' can' cheyala' yesonxene' le'. <sup>17</sup> Na' cuialaobe' lao Xančhon', na' soa Spiritw che Diosen' len lebe' can' gwzoan len da' Elíasen', na' lecz ca' yeła' guac che Diosen'. Na' bene' ca' bi nita' binlo len xi'ine' ca', gombe' ga yesenite' binlo len legache', na' bene' güedenag ca' gombe' yosozenague' che Diosen'. Gombe' cont yesenita' bene' yesonxene' Xančhon' cate' yide'.

<sup>18</sup> Nach Zacaríasen' gože' anglen':

—¿Nac gac nezdá' da' nga? Neda' naca' bene' gole na' lecz ca' no'ol čhian' ba naque' bene' gole.

<sup>19</sup> Nach anglen' gože' le':

—Neda' naca' angl Gabriel bene' za' yaba. Zoa' len Diosen' na' chonxena'ne', na' gwsele' neda' zedetixjue'eda' le' diža' güen qui. <sup>20</sup> Le' bi gac nio' na'a, le bi chejli'o xtiža' nga. Cate' žin ža gac da' nga, cana' gac yeňio' da' yoble. Na' da' li gwžin ža gac can' gwnia'.



<sup>21</sup> Na' bene' ca' že' chyo'ole chesebeze' Zacariásen' besyebande' da' gwžede' lo' yodao' blaona'. <sup>22</sup> Na' cate' bechoj Zacariásen', bene' seńw len ne'e da' bi goc nie'. Nach gosache'e bene' ca' ble'ebande' lo' yodao'na'.

<sup>23</sup> Na' cate' beyož bdelaze' dan' bene' žin lo' yodao'na', beyej liže'. <sup>24</sup> Gwde na' no'ol che' Elisabeten' gwchendao' bidaon' lo' le'e. Na' gayo' bio' gwzoaze'. <sup>25</sup> Na' gwne':

—Güenchguan' ba ben Xancho Diosen' len neda'. Ba bžin ža beži'ilaže'de' neda', cont bich yeson beňacha' xbab bibi zaca'.

*To angl gwđixjue'ede' galje Jesucriston'*

<sup>26</sup> Goc xop bio' noa' Elisabeten' bidaon', Diosen' besele' anglen' ben' le Gabriel, gweyje' to yež da'na' nzi' Nazaret gan' mbane distritw Galilea.

<sup>27</sup> Gwsele' le' gan' zoa to no'ol güego' le' María. Na' Marían' napši'ichgua cuine'. Na' to bene' le' José bač naquen gwšagna'lene' le' cont gaque' xo'ole'. Na' Joséna' naque' diaža che rey David ben' gwzoa cani'. <sup>28</sup> Na' bžin to angl bene' za' yaban' gwyo'e gan' zoa María na' gože'ne':

—Patiox. Xancho Diosen' nži'ide' le' na' zoe' len le'. Na' gone' cont so mbalazch ca yogo'lol' no'ole yezica'chle.

<sup>29</sup> Cate' ble'e Marían' anglen', bebanchgüede' ca nac dižan' dan' gože' le'. Na' bene' xbab bi zejen dan' gwne' caten' bguape'ne' tiox. <sup>30</sup> Na' anglen' gože'ne':

—Bitw žebo' María, Diosen' nži'ide' le'. <sup>31</sup> Na'a gua' xi'ino' to bi' byo dao', na' sano'be', na' go'o labe' Jesús. <sup>32</sup> Na' Jesúsen' gaque' to bene' blao na' beňachen' yososi'ene' Xi'in Dios, Dios ben' naque' la'zelagüe bene' blao. Na' Xancho Diosen' gone' cont nabi'e nación Israel chele ca gwnabia' da' xozxta'ogüe' rey David. <sup>33</sup> Na' le' nabi'e nación Israelen' toli' tocaņe, na' gwbat te yela' gwnabia' chen'.

<sup>34</sup> Nach gož Marían' angla':

—¿Nacxe gac sana' bdaon'? Bitw nžaga' bene' byo.

<sup>35</sup> Nach gož angla' le':

—Spiritw che Diosen' yiden gana' zo'na', na' yela' guac che Diosa' soan len le', Dios ben' naque' la'zelagüe bene' blao. Da'nán' bidaon' za' galje gacbe' laždao' xilaže' na' yososi'ebe' Xi'in Dios. <sup>36</sup> Na' bene' xna'o Elisabeten' lecze bač gwchendao' bidao' lo' le'e la'czla' ba naque' bene' gole. Ba goc xop bio' no'e to bi' byo dao', len gosene' naque' no'ole güiž.

<sup>37</sup> Bibi de da' nacho da' cbi gac gon Dios.

<sup>38</sup> Nach gož Marían' anglen':

—Ni zoa' naca' xmos Xana' Diosen'. Gacšca chia' con can' ba gwnao'.

Nach beza' anglen' gan' zoa Marían'.

*Marían' jaņe'e Elisabeten'*

<sup>39</sup> Gwde na' la' gweyje' Marían' to yež da' žia to lo' ya'a gan' mbane distritw Judean', <sup>40</sup> na' bžine' liž Zacariásen'. Na' gwyo'e bguape' Elisabeten' tiox. <sup>41</sup> Na' cate' Elisabeten' bende' choj güiž Marían' le', nach gocbe'ede' chxite' chžia bidaon' lo' le'e. Na' Spiritw che Diosen' gwnabian' yichjlaždao' Elisabeten' <sup>42</sup> na' gwne' zižje da' bebecgüede', gože' Marían':

—Zo' mbalazch ca yogo'lol' no'ole yezica'chle. Na' lecze bidaon' no'ona' soabe' mbalaz. <sup>43</sup> Chebanda' le' naco' xna' Xana' zedena'o neda'. <sup>44</sup> Con cate' benda' chguapo' neda' tiox, bidao' chian' lecze bebebe', bxite' bžiabe' lo' lian'. <sup>45</sup> Zo' mbalaz da' gwyejli'o gac can' gwna xtiža' Diosen' dan' gož anglen' le'.

46 Nach Marían' gwne':

Chonxena' Xancho Diosen' do yichj do laža'.

47 Na' do yichj do laža' chebechgüeda' Dios ben' bebeje' neda' lo da' malen'.

48 Ba beyaše'de' neda' naca' xmoše' la'czla' bibi zaca'.

Na' na'a bene' yesenita' toli tocanē yesene' neda' zoa' mbalaz.

49 Dios ben' chac chon da' nono gac gon ba bene' da' güen juisyw len neda'.

Toz len' naque' bene' laždao' xilaže' juisyw.

50 Na' note'teze bene' chesape' le' bala'an do yichj do laže', Diosen' cheži'ilaže'de' legaque'.

Cheži'ilaže'de' bene' že' na'a na' yeži'ilaže'de' xi'in diaža chegaque' ca'.

51 Bač blo'e Diosen' beñachen' yela' guac che'.

Na' ba bolague' bene' ya'laže' ca'.

52 Ba bene' cont bene' gwnabia' ca' bich yesenabi'e.

Na' bene' bi naque' bene' blao, Diosen' ba bnežjue' latje yesaque' bene' blao.

53 Na' bene' chesodon, Diosen' ba bnežjue' legaque' da' zan da' güen.

Na' bene' gwni'a ca', ba boše'legaque', bibi bonežjue' legaque'.

54 Nach ba goclene' chio' bene' Israel naccho ca' xmoše'.

Ba blo'ede' bitw ganlaže' chio', san ba cheyaše' cheži'ilaže'de' chio'.

55 Ba bene' can' gože' da' Abraham len yezica'chle da' xozxta'ocho.

Na' soacze' yeyaše' yeži'ilaže'de' xi'in diaža che da' Abrahanna' toli tocanē.

56 Na' cate' ba goc šone bio' zoa Marían' len Elisabeten', nach Marían' beyej liže'.

#### *Golje Juan bene' bzoje' bene' nis*

57 Na' cate' bžin ža san Elisabeten', gwzane' bi' byo dao'. 58 Na' cate' goseneze bene' gualiz chegaquen' na' diaža chegaquen' Xancho Diosen' ba beyaše' beži'ilaže'de' Elisabeten', nach besyebchgüede' len le'. 59 Na' goc xono' ža goljbe' na' jasezoe'be' señw dan' že' circuncisión can' gosone' len yogo' bi' byo dao' bi' gosaljbe' lo diaža che da' Abraham. Na' gosaclačže' si' labe' Zacarías can' le' xaben', 60 perw xna'be' gwne':

—Bi gac. Cheyala' si'be' Juan.

61 Na' legaque' gose'ene':

—Notno diaža chele nita' bene' zjale ca', neca xozxta'ole.

62 Na' gosone' señw gosenabde' xaben' nac che'nde' si' labe'. 63 Nach bene' señw gwnabe' to yagla' dao' da' bzoje': "Si' labe' Juan." Na' yogüe' besyebande'. 64 Beyož bzoje' da'na', la' gocte benie', nach la' gwzolaote be'e diža' benxene' Diosen'. 65 Na' besyebane bene' gualiz chegaquen'. Na' xtiža'gaquen' gos gwłaljen doxen yež ca' zjachi' lo ya'ana' gan' mbane distritw Judean'. 66 Na' yogo'lol bene' gosende' dižan' gosone' xbab lo' yichjlažda'ogüe' che da' ca', na' gosene':

—¿Bixe gon bdao'na'?

Gosene' ca' le' gosenezde' zoacze Xancho Diosen' len lebe'.

#### *Diža' da' be' Zacarías*

67 Nach gwnabia' Spiritw che Diosen' yichjlaždao' Zacaríasen', nach be'e xtiža' Diosen', gwne':

68 Chonxena' Xancho Dios ben' chonxen chio' bene' Israel.

Cheyaše' cheži'ilaže'de' chio' naccho nación che' na' ba chsele' bene' yebej chio' lo da' malen'.

69 Na' bena' bač za' cont yebej chio' lo da' malen', naque' bene' gwnabia' gual,

na' naque' xi'in diaža che da' rey David ben' goc xmos Diosen'.

<sup>70</sup> Chac can' gwna Diosen' len cho'a da' bene' ca' gwsele' cani', bene' gosac lo ne'e gosoe xtižen'.

<sup>71</sup> Ba za' ben' gwne' yosle' chio' lo na' yogo' bene' chesegue'e chio'.

<sup>72</sup> Chac can' gože' da' xozxta' ocho ca' yeyaše' yeži'ilaže'de' legaque'.

Bi chanlaže', san chone' yogo' da' ba gwne' gone' gaclene' chio'.

<sup>73</sup> Diosen' chone' can' gwlo'e da' balı lao da' xozxta' ocho da' Abraham gože'ne' gaccze can' gwne'.

<sup>74-75</sup> Gwne' yosle' chio' lo na' bene' chesegue'ede' chio'.

Nach gac lažda'ochon' xilaže' lao le' na' gonxenchone' sin cbi žebocho, na' šejcho licha gonxenchone' šlac de yela' mban checho.

<sup>76</sup> Nach Zacariäsen' gože' bdao' chen':

Bdao' chia', beñač yesene' chio' naco' bene' choe' xtiža' Dios, Dios ben' naque' la'zelagüe bene' blao.

Yesene' ca' da' cuialaguo' lao Xančon' na' go'o xtižen' cont nita' bene' yosozenague' che' cate' yide'.

<sup>77</sup> Gwsed gwlo'edo' neto' can' chaclaže' Diosa' yebeje' chio' naccho nación che' lo da' mala' na' yezi'xene' xtoła'chon'.

<sup>78</sup> Diosen' cheyaše' cheži'ilaže'de' chio',

le len' gwlo'e be'ni' che' lo' laždao' chio' beñač.

<sup>79</sup> Cue'e be'ni' che' lo' yičhlaždao' chio' naccho ca bene' chaš ga nac čol, chio' chžebocho gatcho.

Na' gwzejni'ide' chio' beñač naquen' soa cuzcho yežlio nga.

Can' be' Zacariäsen' xtiža' Diosen'.

<sup>80</sup> Na' Juanna' zej chča'obe' zejte chac yičhlažda'oben' can' chazlaže' Diosen'. Na' jasoe' latje daš. Na'ate zoe' cate' gwzologüe' gwduxjue'ede' xtiža' Diosen' len bene' Israel ca'.

## 2

### *Caten' golje Jesúsen'*

(Mt. 1:18-25)

<sup>1</sup> Na' lecz šlac gwnabia' rey César Augusto, bene' mandadw gwyas to censo cont neзде' bal bene' že' to to yež da' zjachi' doxen yežlio gan' chnabi'e. <sup>2</sup> Na' lecz cana' Cirenio naque' gobernador gan' nzi' Siria. Na' naquen da' nechw bchele' bal bene' že' to to yež. <sup>3</sup> Na' yogo'lol bene' jaya'aque' lažgaque' jasyede cuent cuine' cont bosochele' le'. <sup>4</sup> Na' José naque' diaža che da' rey David. Da'nan' beze'e Nazaret gan' mbane distritw Galilea, beyeje' yež Belén dan' nac laž da' rey David. Na' chi' yež Belén gan' mbane distritw Judea. <sup>5</sup> Beyeje' jayde cuine' cuent na' zenche'e no'ol che' Marían' perw biņa' yeseca'a lježe'. Na' Marían' ba no'e bdao'. <sup>6</sup> Na' šlac nite' Belén bžin ža sane'. <sup>7</sup> Na' gwxxane' bi' nechw, to bi' byo dao', na' btobe'be' lache' na' gwlo'ebe' ga chesagw beyixe', da' bich bi latje yo'o mesonna' par legaque'.

*Angl ca' bosozende' bene' güeyoe xila' ba golje Jesúsen'*

<sup>8</sup> Na' že'na' yixe' che yež Belén na'ate že' bene' güeyoe xila' chesape' xila' chen'. <sup>9</sup> Na' to angl bene' gwseła' Xancho Diosen' bžine' gan' nita' bene' güeyoe xila' ca', na' be'ni' che Xancho Diosa' gwyečhjen bsenin' gan' nite'na'. Na' besežebchgüe'. <sup>10</sup> Na' gož angla' legaque':

—Bitw žeble. Na'a chixjue'eda' le'e to diža' güen da' yesebechgüe yogo'lol bene'. <sup>11</sup> Na'aža lo yež che rey David ba golje bena' gac yebeje' beñačhen'

lo da' mal. Naque' Cristo, na' zeje diža' naque' ben' gwsela' Dios cont nabi'e, na' lecze naque' Xancho. <sup>12</sup> Cont yezelele bdao'na', quinga naquen: bdao'na' ba ntobe'be' lache' na' debe' gan' chesagw beyixe' ca'.

<sup>13</sup> Beyož gwna angla' ca' la' besežinte bene' zan angl gan' zoa angl nechua', za'aque' gan' zoa Diosen'. Na' chesonxene' Diosen' chesene':

<sup>14</sup> ¡Chonxencho Dios! ben' zoa yaba,

na' lo yežlio yesezoa yesebez beñachen' binlo, con bena' cheson can' chazlaže' Diosen'.

<sup>15</sup> Na' cate' besyeya'ac angl ca' zjaya'aque' yaba, na' bene' güeyoe xila' ca' gose' lježe':

—Yeyejcho Belén šjajna'cho dan' ba goc can' nac dan' gwsela' Xancho' angl quinga bedesedixjue'ede' chio'.

<sup>16</sup> Na' beseya'aces bene' güeyoe xila' ca' jaya'aque' Belén. Na' besyeželde' Marían' len Josén' na' len bdao'na'. Na' bdao'na' debe' gan' chesagw beyixe' ca'. <sup>17</sup> Beyož besele'ede' can' ba goquen, na' goso'e diža' che bdao'na' len bene' ca' yezica'chle ca' nac dan' gož anglen' legaue'. <sup>18</sup> Na' yogo'lol bene' ca' gosende' diža' dan' gosoe' bene' güeyoe xila' ca' besyebande'. <sup>19</sup> Na' lecze Marían' gwlo'o yichje' yogo'lol diža' dan' gosoe' bene' güeyoe xila' ca' na' bene' xbab lo' yichjlažda'ogüe' bi zejen. <sup>20</sup> Nach besyeya'ac bene' güeyoe xila' ca' chesonxene' Diosen'. Na' cheso'e diža' nacchgua Diosen' bene' güen da' ba goc yogo'lol da' ba gosende' na' besele'ede' dan' gož anglen' legaue'.

*Diaža che Jesúsen' jasesane'be' lo' yodao' blaona'*

<sup>21</sup> Cate' goc xono' ža golje bdao'na' jasezoe'be' señw da'na' nzi' circuncisión, na' bososi'e labe' Jesús, can' ben anglen' mandadw cate' za' gua' Marían' lebe'.

<sup>22</sup> Na' cate' gwde ba beyac Marían' xilaže' len bdao'na' con can' bzoj da' Moisésen', nach ja'aque' ciuda Jerusalén goselene'be' jasesane'be' lao Xancho Diosen'. <sup>23</sup> Gosone' can' nyoj ley che' dan' ža: “Yogo' bi' byo dao' bi' nechw cheyala' gache' lo na' Dios.” <sup>24</sup> Nach gosonxene' Diosen', gosone' can' ža ley che Xancho Dios dan' žan: “Cheyala' gotle chop ngolbex o chope plomxtil.”

<sup>25</sup> Na' Jerusalénna' gwzoa to bene' le' Simeón. Benan' gwyejcz'e bene' da' güen lao Diosen' na' benxene' le', na' gwleze' batcan' yid Cristo ben' sela' Xancho Diosen' cont yebeje' bene' Israel ca' lo da' mal. Na' Spiritw che Diosen' gwyo'on lo' yichjlaždao' Simeón, <sup>26</sup> na' bzejni'in le' bi gate' še biña' le'ede' Criston'. <sup>27</sup> Na' Spiriton' benen cont gwyeje' yodao' blaona', na' zoe' yodao'na' cate' besežin xaxna' Jesúsen' zjano'ebe' cont yesone' len lebe' can' non ley chegaquen' mandadw. <sup>28</sup> Nach Simeónna' gwlene'be' nach benxene' Diosen', gože'ne':

<sup>29</sup> Xana' Dios, bačh goc can' gwnaon'.

Beñ latje yeyeda' binlo gana' zo'na', neda' naca' xmoso'.

<sup>30</sup> Ba ble'eda' bena' zedyelej neto' lo da' mal.

<sup>31</sup> Naque' bene' gwnalažo' gwselo' neche yogo'lol beñach.

<sup>32</sup> Na' cue'e be'ni' che' lo' yichjlaždao' bene' cbi zjanaque' bene' Israel.

Na' gaque' la'zelagüe bene' zaca' len neto' bene' Israel.

<sup>33</sup> Nach xaben' len xna'ben' besyebande' ca' diža' chebe' dan' be' Simeónna'. <sup>34</sup> Na' Simeónna' gwñabde' Diosen' cont gac güen chegaque'. Na' gože' Marían':

—Beṇe' Israel ca' yesejnilaže' xi'ino' nga yesenite' mbalaz, na' beṇe' Israel ca' cbi yesejnilaže'ne' bi yesenite' mbalaz. Zedelo'ede' beṇachen' ca' chaclaže' Diosen' goncho, perw zane' bi yesejle'e che'. <sup>35</sup> Nach Diosen' gwlo'e non' chzenag che' na' non' cbi chzenag. Na' cacze chac ga chaz cwšiyw gac lo' yichjlažda'oguo' catequen' žaglaguo' len da' gac che'.

<sup>36</sup> Na' lecze yodao' blaona' gwzoa to no'ole le Ana, na' cho'e xtiža' Diosen'. Naque' xi'in da' ben' le' Fanuel na' naque' diaža che da' Aser. Bšagne'e cate' naque' no'ol güego', perw na' gaž izga gwzoalene' beṇe' che' na' gote', na' bga'ane' güezebe. Na' Anan' ba naque' to beṇe' gole, <sup>37</sup> taplalj tap izde'. Bicze chechoje' yodao' blaona'. Leca chonxene' Xancho Diosen' do ža do yel, gwzoatie' tgüejje bene' gwbas na' con gwzoachgüe' bol güiže' Diosen'. <sup>38</sup> Na' goquen' gwbiga' Anan' gan' zoa Josén' len Marian' lo' yodao'na' na' be'e yela' choxclen che Diosen' bach gwsele' Jesúsén'. Na' be'e diža' che Jesúsén' len yogo' beṇe' ca' že' Jerusalén ben' chesebeze' batca' sela' Diosen' ben' yebeje' legaque' lo da' malen'.

### *Jaya'aque' Nazaret*

<sup>39</sup> Nach Josén' len Marían' cate' beyož gosone' yogo'lol dan' non ley che Xancho Diosen' mandadw yesone', jaya'ac lažgaque' Nazaret gan' mbane distritw Galilea. <sup>40</sup> Na' Jesúsén' zej chcha'ogüe' na' zej chchachlaže'. Na' ca zej chcha'ogüe' na' zej chejni'ichde', na' Diosen' nži'iláže'de'ne'.

### *Can'ben Jesúsén' chašil yodao' blaona'*

<sup>41-42</sup> Na' xaxne'e ca' yogüiz chja'aque' lni da' čala' Jerusalén ch-jaseze'ede' can' goc cate' Diosen' betue' bi' nechw che yogo' beṇe' Egipto na' bosle' beṇe' Israel. Šižinw ize Jesúsén' cate' goseche' xaxne'en le' ja'aque' lnin' Jerusalén. <sup>43</sup> Na' cate' gwde l'nina' besyeya'aque', perw Jesúsén' bega'ane' ciuda Jerusalén. Na' xne'ena' len Joséna' bi gosache'ede'. <sup>44</sup> Con gosacde' ba zjayde' txen len beṇe' ca' nžaggaque'. Na' tža nez ba gosa'aque' cate' gwzolao chesyeyiljue'ne' ladjo diaža čegaque' na' no beṇe' xmigüe', <sup>45</sup> perw bitw besyeželde' le'. Nach besyebi'e jaya'aque' Jerusalénna' da' yoble cont šjasyediljue' le'.

<sup>46</sup> Na' beyon žach besyeželde' Jesúsén' chašil yodao' blaona', chi'e gachol beṇe' ca' chososed chosolo'ede' dan' bzoj da' Moisés. Jesúsén' chzenague' xtiža'gaquen' na' zanen chṇabde' legaque'. <sup>47</sup> Na' yogo'lol beṇe' ca' chosozenague' xtiža' Diosen' da' cho'e chesyebande' can' chejni'ide' na' can' choži'e xtiža' beṇe' ca' zjansed dan' bzoj da' Moisés. <sup>48</sup> Na' cate' besele'e xaxne'en le', besyebande', na' xne'en gože' le':

—Xi'indagua', čixichen' chondo' neto' ca'? Xao' nga na' neda' ba gwdato' beyiljwto' le', na' da' juisyw ba ble'eto'.

<sup>49</sup> Jesúsén' gože' legaque':

—čBičen' beyiljwle neda'? čBi nezele liž Xa' ngan' cheyala' soa'?

<sup>50</sup> Perw xaxne'e bitw gosejni'ide' bi zejen dan' gože' legaque'.

<sup>51</sup> Na' beyeje' yež Nazaret len xaxne'e bzenague' čegaque'. Na' gwlec yichj xne'ena' yogo'lol dan' goca'. <sup>52</sup> Na' ca' chac zej chejni'iche Jesúsén' na' zej gwcha'oche', na' Diosen' len beṇača' zej chesazlaže'che' le'.

## 3

*Juan gwduxjue'ede' diža' güen che Diosa'*  
(Mt. 3:1-12; Mr. 1:1-8; Jn. 1:19-28)

<sup>1</sup> Cate' lo iz šino' dan' chnabia' César Tiberio doxen ga mbane nación Roma, izna' goc Poncio Pilato gobernador che distritw Judea, na' goc Herodes gobernador che distritw Galilea. Na' bene' biše' Herodesen', ben' le Felipe, goque' gobernador che distritw Itorea na' che distritw Traconite. Na' goc Lisaniás gobernador che distritw Abilinia. <sup>2</sup> Nach lecze izna' Anás na' Caifás gosacche' bꝑoz blao che bene' Israel. Izna' Juan ben' naque' xi'ĩn Zacarías gwzoe' to latje daš. Nach Diosen' be'lene' Juanna' diža'. <sup>3</sup> Na' Juanna' gwyeje' yogo'lol yež dan' nita' gała'ze yegw Jordán, jatixjue'ede' yogo'lol bene' cheyała' yesyeteĩnje' xtoła'gaque' na' yesezoe' nis cont nitlao xtoła'gaquen'. <sup>4</sup> Juanna' bene' dan' bzoj da' Isaiás ben' be' xtiža' Diosen' cani'te, gana' žan:

Bena' chne' zižje latje dašen', že':

“Le gonšagüe' yichjlažda'olen' cont soale gwzenagle che Xanchon' cate' yide',

le cuejyichj da' malen' chonle cont yichjlažda'olen' gaquen ca to nez da' ba gosonšagüe'.

<sup>5</sup> Gwžin ža cate' yogo' ya'a yegw ca' yesyeyaquen laše',

na' no nez da' nacchua bꝑoca' yesyeyaquen licha,

na' no nez da' nžaš nche'ene yesyeyaquen ba'a.

<sup>6</sup> Na' yogo'lol bene' yesache'ede' can' chaclaže' Diosen' yebeje' benachen' lo da' mal.”

<sup>7</sup> Na' bene' zan ja'aque' gan' gwzoa Juanna' cont gwzoe'ne' nis. Na' Juanna' gože' legaque':

—Le'e nacchgualé bene' zgot na' bene' gwxiye'. ¿Cadaquele guac yelale lao castigw dan' sela' Diosen' caten' gone' yela' justis che benachen'?

<sup>8</sup> Še da' li ba betinjele xtoła'le, cheyała' gonle da' nac güen cont yesacbe'e bene' ba boša' yichjlažda'olen'. Na' bitw gonle xbab gaquele Diosen' bitw gone' le'e castigw che xtoła'len' lagüe da' nacle xi'ĩn diaža che da' Abrahanna'. Bitw nacho leca chyažje Diosen' le'e. Guac gone' cont yej quinga yesyeyaquen xi'ĩn diaža che da' Abrahanna'. <sup>9</sup> Ca nac le'e, še bi chonle can' chazlaže' Diosen', zaca'leble ca to yag frut da' bibi chbia. Na' yogo'te yag frut da' bibi chbia, chog xan yaga' len na' gwzeyen'.

<sup>10</sup> Nach bene' ca' chosozenag xtiže'na' gosenabde' Juanna', gose'ene':

—¿Bica' da' cheyała' gonto'?

<sup>11</sup> Na' gože' legaque':

—Ben' nape' chope camis cheyała' gwnežjue' ton che bene' bi de che'. Na' lecze ca' che ben' de da' gagüe', cheyała' gwnežjue' che ben' bi de gagüe'.

<sup>12</sup> Na' cate' to chope bene' güechixjw ca' jasebigue' cont gwzoa Juanna' legaque' nis, na' gose'ene':

—Maestrw, ¿bica' da' cheyała' gonto'?

<sup>13</sup> Na' gože' legaque':

—Bitw gwchixjwchle ca da' cheyała' yeseyixjue'.

<sup>14</sup> Na' to chope bene' ca' zjanac soldadw lecze gosenabde' le', gose'ene':

—¿Chix neto'? ¿Bica'ch da' cheyała' gonto'?

Na' Juanna' gože' legaque':

—Bitw ca'ale da' de che bene', na' neca gonlaže'le len da' yosbague'le bene' cont ca'ale xmechwgaque'. Le gon banez len laxjwle.

<sup>15</sup> Na' bene' ca' gosezo' lez yid Cristo ben' naquen sela' Diosen' yedenabi'e, na' gosacde' še Juanna' naque' Cristo. <sup>16</sup> Na' Juanna' goche'ede' xbab chegaquen' na' gože' yogo'lolle':

—Neda' da' li chzoa' le'e nis, perw za' yid bena' gon cont soa Spiritw che Diosen' lo' yichjlažda'olen' n̄abian' le'e. Na' Spiriton' naquen ca yi', na' gwxi gwloan yichjlažda'ole. Bena' za' za' zaca'che' ca neda', na' da' nacchgüe' beñe zaca' bitw zaca' gona' xmandadoe' lechja' no xelex. <sup>17</sup> Benan' gone' len benachen' can' choncho cate' chdecho trigon' lo' rner. Chtobcho trigon' chgo'ošagüe'chon na' chzeycho yix beben'. Na' beñe' chesejnilaže' Diosen', yotobe' legaque' cont šjasyenite' txen len le', na' beñe' bi chesejnilaže' le', selex' legaque' lo' yi' gabilen' dan' cbi cheyol chemit.

<sup>18</sup> Da' zanch da' gwna Juanna' gwdixjue'ede' legaque' diža' güen, na' gwñeyoede' legaque' yesejle'en. <sup>19</sup> Nach Juanna' gwdile' gobernador Herodes ca nac da' mal da' bene' beque'e Herodías ca xo'ole', le Herodiasna' naque' xo'ole Felipe beñe' biše' Herodesen'. Na' Juanna' lecze be'e diža' yogo'lol da' mal dan' ba ben Herodes. <sup>20</sup> Na' Herodesen', gualaz da' gwzenague' che Juanna', benche' yeto da' mal, gwlo'e Juanna' ližya.

*Can' goc caten' gwzoa Jesúsen' nis*

(Mt. 3:13-17; Mr. 1:9-11)

<sup>21</sup> Nach šlac chzoa Juanna' beñe' nis, beñe' zan ja'ac cont bzoe' legaque' nis. Na' len Jesúsen' gwzoe' nis. Na' lo' hora' Jesúsen' bol güiže' Diosen' na' la' byaljwte yaba gan' zoa Diosen'. <sup>22</sup> Na' betj Spiritw che Diosen' bžinen gwzoan len le', na' ca hora' Spiriton' naquen ca to ngolbex. Na' gosende' gwñe Dios ben' zoa yaban', gwne':

—Le' naco' Xi'ina' beñe' chacchgüeda', na' chebe chezaquelaže' chgüeda' chio'.

*Diaža che Jesúsen'*

(Mt. 1:1-17)

<sup>23</sup> Na' ca do šichoa ize Jesúsen' cate' gwzolao bene' yogo'lol da' zedeyene'. Na' beñe' ca' gwnita' na' gosone' xbab še naque' xi'in Joséna'. Josén' naque' xi'in Elí, <sup>24</sup> na' Elí naque' xi'in Matat, na' Matata' naque' xi'in Leví, na' Levína' naque' xi'in Melqui, na' Melquin' naque' xi'in Jana, na' Janan' naque' xi'in yeto ben' le' José. <sup>25</sup> Na' Joséna' naque' xi'in Matatías, na' Matatiasen' naque' xi'in Amós, na' Amósen' naque' xi'in Nahum, na' Nahunna' naque' xi'in Esli. Na' Eslin' naque' xi'in Nagai, <sup>26</sup> na' Nagain' naque' xi'in Maat, na' Maata' naque' xi'in Matatías, na' Matatiasen' naque' xi'in Semei, na' Semein' naque' xi'in José, na' Josén' naque' xi'in Judá. <sup>27</sup> Na' Judán' naque' xi'in Joana, na' Joanan' naque' xi'in Resa, na' Resan' naque' xi'in Zorobabel, na' Zorobabelen' naque' xi'in Salatiel, na' Salatielen' naque' xi'in Neri, <sup>28</sup> na' Nerin' naque' xi'in Melqui, na' Melquin' naque' xi'in Adi, na' Adin' naque' xi'in Cosám, na' Cosanna' naque' xi'in Elmodam, na' Elmodanna' naque' xi'in Er. <sup>29</sup> Na' Era' naque' xi'in Josué, na' Josuén' naque' xi'in Eliezer, na' Eliezeren' naque' xi'in Jorim, na' Jorinna' naque' xi'in Matat. <sup>30</sup> Na' Mataten' naque' xi'in Leví, na' Levín' naque' xi'in Simeón, na' Simeóna' naque' xi'in Judá, na' Judán' naque' xi'in José, na' Josén' naque' xi'in Jonán, na' Jonánna' naque' xi'in Eliaquim. <sup>31</sup> Na' Eliaquinna' naque' xi'in Melea, na' Melean' naque' xi'in Mainán, na' Mainánna' naque' xi'in Matata, na' Matatan' naque' xi'in Natán. <sup>32</sup> Na' Natánna' naque' xi'in David, na' Davida' naque' xi'in Isai, na' Isain' naque' xi'in Obed, na' Obeda' naque' xi'in Booz, na' Boozen' naque' xi'in Salmón, na' Salmónna' naque' xi'in Naasón. <sup>33</sup> Na' Naasónna' naque' xi'in Aminadab, na' Aminadaba' naque' xi'in Aram, na' Aranna' naque'

xi'in Esrom, na' Esronna' naque' xi'in Fares. Na' Faresen' naque' xi'in Judá, <sup>34</sup> na' Judán' naque' xi'in Jacob, na' Jacoben' naque' xi'in Isaac, na' Isaaquen' naque' xi'in Abraham, na' Abrahanna' naque' xi'in Taré, na' Tarén' naque' xi'in Nacor. <sup>35</sup> Na' Nacoren' naque' xi'in Serug, na' Seruga' naque' xi'in Ragau, na' Ragaun' naque' xi'in Peleg, na' Peleguen' naque' xi'in Heber. Na' Heberen' naque' xi'in Sala, <sup>36</sup> na' Salan' naque' xi'in Cainán, na' Cainánna' naque' xi'in Arfaxad, na' Arfaxaden' naque' xi'in Sem, na' Senna' naque' xi'in Noé, na' Noén' naque' xi'in Lamec. <sup>37</sup> Na' Lamequen' naque' xi'in Musalén, na' Musalénna' naque' xi'in Enoc, na' Enoca' naque' xi'in Jared, na' Jareden' naque' xi'in Mahalaleel. Na' Mahalaleela' naque' xi'in Cainán, <sup>38</sup> na' Cainánna' naque' xi'in Enós, na' Enósen' naque' xi'in Set, na' Seta' naque' xi'in Adán, na' Adánna' naque' xi'in Dios.

## 4

*Satanásen' goclažen' co'oyelan' Jesúsen' cont gone' da' mal*  
(Mt. 4:1-11; Mr. 1:12-13)

<sup>1</sup> Na' Spiritw che Diosen' gwnabian' yichjlaždao' Jesúsen'. Na' Jesúsen' beze'e cho'a yegw Jordán, na' Spiritua' benen cont gwyeje' latje daš. <sup>2</sup> Čho a ža gwzoe' latje dašen' na' lao čho a žan' bicze bi gwdagüe'. Na' cate' gwde čho a žan' gwdone'. Na' Satanás dan' chnabia' da' xigüe' ca' goclažen' co'oyelan' le' cont gone' da' mal. <sup>3</sup> Nach gož Satanásen' le':

—Še le' naco' Xi'in Dios, gož yej nga yeyaquen yetextil.

<sup>4</sup> Na' gož Jesúsen' len:

—Nyojcz Xtiža' Diosa' žan: “Gague yela' guagw na'zen' chyažje chio' beňach cont gac bancho, san lecze chyažjecho yogo'lol diža' dan' ža Diosen'.”

<sup>5</sup> Na' gwče' Satanásen' le' to lo ya'a sibe na' bedao'nez blo'en le' yogo'lol nación da' zjachi' yežlio. <sup>6-7</sup> Nach gožen le':

—Doxen yela' gwnabia' da' de yežlio nga naquen lo na' cont gwnežžuan' con no che'nda'. Še le' gwzoe xibo' gonxeno' neda', nach gona' le' yela' gwnabia' che nación ca' zjachi' yežlio nga na' len yela' zaca' yela' xdan che nación ca'.

<sup>8</sup> Nach Jesúsen' gože' Satanásen':

—Becuas ca'ale Satanás. Nyojcz Xtiža' Diosen' žan: “Cheyala' šejnilaže' cho Xancho Diosen' na' toz le' gonxencho.”

<sup>9</sup> Nach Satanásen' gozče'en le' ciuda Jerusalén. Na' bcuen le' yichjo' yodao' blao gan' nac la'zelagüe sibe, na' gožen le':

—Še len' naco' dogualje Xi'in Dios, nga boslažo' cuino', <sup>10</sup> le' nyojcz Xtiža' Diosen', žan:

Sela' Diosen' beňe' ca' zjanac angl che' yesaclene' le' na' yesape' le',

<sup>11</sup> yesoxe' le' cont bi čego' no yej.

<sup>12</sup> Nach Jesúsen' gožen':

—Lecz ca' nyoj Xtiža' Diosen' žan: “Bitw goncho Xancho Diosen' prueba še lede' can' žen'.”

<sup>13</sup> Beyož gota'bia' bi gwzoe Satanásen' co'oyelan' Jesúsen' gone' da' mal, nach becuasen šlož len le'.

*Jesúsen' gwzologüe' chyxjue'ede' diža' güen che Diosen' distritw Galilea*  
(Mt. 4:12-17; Mr. 1:14-15)



14 Nach Jesúsen' beyeje' distritw Galilea, na' yela' guac che Spiritw che Diosen' gwzoan len le'. Na' yogo'lol bene' že' yež ca' zjachi' doxen Galilea gosenezde' che Jesúsen'. 15 Na' Jesúsen' bsed blo'ede' legaque' lo' yodao' chegaquen', na' yogo'lol bene' ca' gosonxene' le'.

*Bežin Jesúsen' Nazaret  
(Mt. 13:53-58; Mr. 6:1-6)*

16 Na' bežin Jesúsen' yež Nazaret gan' gwcha'ogüe', na' gwyo'e yodao' ža che Dios can' ba yolagüe' chone', na' gwzechede' cont gwlabē'. 17 Na' ben' yo'o lo ne'e yodao'na' bnežjue'ne' yiš da' ndobe gan' nyoj dan' bzoj da' Isaías ben' be' Xtiža' Diosen' cani'te. Na' Jesúsen' bzaše' yišen' na' beželde' ga nyojen žan:

18 Zoa Spiritw che Diosa' len neda',  
na' Diosen' gwleje' neda' zedeya' diža' güen len bene' yaše'.  
Na' gwsele' neda' zedeyena' cont yesyeyaclaže' bene' ca' chesacyaše'de'.  
Na' za'a cont gwsana' bene' ca' zjade ližya.  
Na' zedeyena' cont yesyele'e bene' lchol.  
Na' bene' chyi chzaca', zedeyena' cont noch no yosoči yososaque'  
legaque'.

19 Na' zedetixjue'eda' ba bžin ža gaclen Diosen' benachen'.

20 Jesúsen' botobe' yišen' na' bonežjuen' ben' yo'o lo ne'e yodaon' na' gwchi'e. Na' yogo' bene' ca' nita' yodaon' la' gosena'tie' le'. 21 Nach gwzolao be'e diža' gwne':

—Ža na'aža ba chac can' ža Xtiža' Diosen' dan' ba benele nga.

22 Na' yogo' bene' ca' gosende' diža' dan' be'e besyebande' catec mba nac xtiža' Jesúsen'. Na' gosenie' güen che' na' gose' lježe':

—¿Gague benga xi'in Josén'?

23 Nach gož Jesúsen' legaque':

—Ye'ljale neda' can' ža diža' dan' de: “Bene' güen rmed le', beyon cuino'.”  
Na' lecze ye'ljale neda': “Dan' chesene' beno' yež Capernaum da' bebane bene', lecz can' cheyala' gono' lažcho nga.”

24 Nach goze'e legaque':

—Da' li chnia' le'e, bene' gualaž che note'teze bene' choe' xtiža' Diosen' bitw chesezi'e che'. 25 Ca tiemp che da' Elías ben' be' xtiža' Diosen' cani', bibi yejw goc šon iz yo gašje na' goc gwbin juisyw chegaque' doxen gan' zelao mbane Israel. Naquen da' li gwnita' zan no'ol güezebe yež ca' gan' mbane Israel ca tiempa', 26 perw Diosen' bi gwsele' Elíasen' cont gaclene' ne to bene' güezeb ca'. Gwsele' le' yeto yež yoble gan' nzi' Sarepta gan' mbane ciuda Sidón cont goclene' to no'ol güezebe. 27 Na' lecza ca' tiemp che da' Eliseo ben' be' xtiža' Diosen' cani', gwnita' zan bene' Israel bene' gosacšene len yižgüe' da' nzi' lepra. Ne to legaque' bi beyon Eliseon'. Toz bene' zito' bene' Siria, ben' le' Naamán, beyon Eliseon'.

28 Na' yogo' bene' ca' že' yodao'na' cate' gosende' dan' gwna Jesúsen' beseža'achgüe'. 29 Na' la' besyezoža'te' na' besyebaje' Jesúsen' yežen', na' goseche'ene' to lo ya'a da' zoa gala'ze, gosaclaže' yososlažoe'ne' lo ya'a na'ate, 30 perw bibi goc yesonde' le'. Con beza' Jesúsen' bedie' gachol gaque'.

*Jesúsen' bebeje' da' xigüe' dan' yo'o yichjlaždao' bene'  
(Mr. 1:21-28)*

<sup>31</sup> Na' jasoe' yež Capernaum gan' mbane Galilean', na' ža che Dios bsd blo'ede' beņe' ca' že' lo' yodao'na'. <sup>32</sup> Na' beņe' ca' besyebande' ca' nac dan' bsd blo'eden', le bzejni'ide' cacze to beņe' nezdē' cayanen' nac xbab che Diosen'.

<sup>33</sup> Lo' yodao'na' gwzoa to beņe' yo'o nyaze' da' xigüen'. Na' bosye'e gwne':

<sup>34</sup> —¿Bixchen' chgoša' chlaže' chio' len neto', Jesús beņe' Nazaret? ¿Zedežiayo'o neto'? Neda' nombi'a le' na' nezdā' naco' beņe' laždao' xilaže' juisyw ben' gwsela' Diosen'.

<sup>35</sup> Nach Jesúsēn' gwdile' da' xigüen' na' gožen':

—¡Sšago'! Bechoj yichjlaždao' benga.

Na' bchix da' xigüen' bēna' gachol beņe' ca' že'na' nach bechojen. Perw bitw benen le' zi'. <sup>36</sup> Na' leca besyebane yogo' beņe' ca', nach gose' lježe':

—¿Bixen' chac? ¿Bixe da' coben' chlo'e benga? Nacbia' nape' yela' chnabia' na' yela' guac, le chone' mandadw na' la' chechojte da' xigüe' da' yo'o nyaz beņe'.

<sup>37</sup> Na' ca' nac dan' ben Jesúsēn' gos gwłalje dižan' doxen lagüe yež ca' zjachi' do na'.

*Jesúsēn' beyone' taobi'in che Simónna'*

(Mt. 8:14-15; Mr. 1:29-31)

<sup>38</sup> Na' cate' beze'e yodao'na', na' gwyeje' liž Simón. Na' taobi'in che Simónna' chacšende', yo'e da' la. Na' bosol güiže' Jesúsēn' cont yeyone' le'.

<sup>39</sup> Na' Jesúsēn' gwzeche' cuite' gan' die', na' bcheque' gwdile' da' lan' cont bechojen. Nach taobi'in che Simónna' la' gwyastie' na' bsini'e da' gose'ej gosagüe'.

*Jesúsēn' beyone' beņe' zan*

(Mt. 8:16-17; Mr. 1:32-34)

<sup>40</sup> Na' cate' ba chxoa gwbižen' goseche'e con yogo' beņe' chese'e yižgüe' jasesane' legaque' lao Jesúsna'. Na' Jesúsēn' gwxoā ne'e yichj to toe' na' beyone' legaque'. <sup>41</sup> Na' lecz ca' bebej Jesúsēn' da' xigüe' da' yo'o yichjlaždao' beņe' zan. Na' besyechojen gosenen zižje, gosenan:

—Le' naco' Xi'in Dios.

Na' Jesúsēn' gwdile' legaquen na' bitw be'e latje bi yesenan, le gosenēzen naque' Cristo ben' gwlej Diosen' cont yedenabi'e.

*Jesúsna' gwde' doxen Galilean' bsd blo'ede'*

(Mr. 1:35-39)

<sup>42</sup> Na' beteyo cate' gwye'ni', beze'e na' beyeje' to latje ga nono nla'. Na' beņe' ca' besyeyiljue'ne' na' ja'aque' gan' zoen'. Na' gosaclaže' yosozague' Jesúsēn' cont bi yeze'e. <sup>43</sup> Na' Jesúsēn' gože' legaque':

—Lecz ca' beņe' ca' nita' yež yoble cheyala' šjalo'eda'ne' cont yosozenague' che Diosen' na' nabi'e yichjlažda'ogaque'. Diosen' gwsele' neda' cont šjatixjue'eda' legaque' xtižen'.

<sup>44</sup> Ca' goquen', Jesúsēn' gwde' to to yež che distritw Galilea na' bsd blo'ede' beņe' ca' lo' yodao' chegaquen'.

## 5

*Gosezene' be zan belja'a*

(Mt. 4:18-22; Mr. 1:16-20)

<sup>1</sup> Na' šlac zecha Jesúsen' cho'a nisdao' da'na' nzi' Genesaret, besežag beñe' zan na' bosochite' Jesúsen' da' gosaclačže' yosozenague' xtiža' Diosen' dan' bi'e cho'a nisdao'. <sup>2</sup> Na' Jesúsen' ble'ede' chope barcw dao' cho'a nisdao'. Na' beñe' gwxcn bel' ca' ba besyežaše' lo' barcon' ba chesyeyibe' yixjw bel' chegaquen'. <sup>3</sup> Na' Jesúsen' gwyo'e lo' barcw che Simónna' na' gwñabde' le' bosožigue' barcon' yelate' lo' nisen'. Na' Jesúsen' gwchi'e lo' barcon' blo'ede' beñe' ca' že'na'. <sup>4</sup> Cate' beyož bi'e dižan' na' gože' Simónna':

—Le gwžiga'ch barcon' yelate' gan' nac sitjw, na' le gwzala' yixjw chelen' na' senle belen'.

<sup>5</sup> Nach Simónna' gože' Jesúsen':

—Maestrw, ba bento' žin do yel na' ne to nono bdola'. Perw le' ba gwnao' yezolaoto', na' gwzala'to' yixjw ca' da' yoble.

<sup>6</sup> Na' beyož bosozala' yixjw chegaquen' zjanyicoco'ten belen', yezeze ca' yesyecheza'ten. <sup>7</sup> Na' beñe' ca' zjanita' lo' barcw che Simónna' gosone' señw gosaxe' beñe' lježen' že' yeto lo' barcw yoble cont yesaclene' legaque' yesyebeje' yixjon'. Yeze ca' gwdebe nisen' chopte barcw ca' dan' gosegüe' bel' zan lo'enna'. <sup>8</sup> Nach Simónna', ben' lecz le' Pedro, cate' ble'ede' da'na' goquen' na' bzoa xibe' lao Jesúsen' gože' le':

—Xana', neda' naca' to beñe' mal, bibi zaca' par so' nga len neda'.

<sup>9</sup> Gwne' ca' le' le' txen len beñe' lježe' ca' že' lo' barcon' besyebanchgüede' da' gosezene' bel' zanna'. <sup>10</sup> Lecz ca' besyebane xi'in ben' le Zebedeo, zjanac chop biše'tie', Jacobo len Juan. Beñe' ca' chesone' žin len Simónna'. Nach Jesúsen' gože' Simónna':

—Bitw žebo'. Le' naco' beñe' gwxcn bel', na' chebejo' belen' lo' nisen'; perw na'a gona' cont gaxle beñe' yesyechoje' lo' da' malen'.

<sup>11</sup> Na' cate' besyežinlene' barcon' yo biž, nach gosebejyichje' barcon' len yogo' xšinlaže' ca' na' ja'aclene' Jesúsen'.

*Jesúsen' beyone' to beñe' che'ede' yižgüe' dan' nzi' lepra*  
(Mt. 8:1-4; Mr. 1:40-45)

<sup>12</sup> Na' šlac Jesúsen' zoe' to yež na' bžin to beñe' che'ede' to yižgüe' dan' nzi' lepra. Na' bena' cate' ble'ede' Jesúsen', bzoa xibe' lagüe' na' bol' güiže'ne' gože'ne':

—Xana', še chaclažo', guac yeca'o yižgüe' dan' che'eda' nga.

<sup>13</sup> Nach Jesúsen' bli' ne'e na' gwxoen' yichje' na' gože' le':

—Chaclaža' yeyacdo'. Beyaque.

Nach la' bega'ate yižgüe' dan' che'eden'. <sup>14</sup> Nach Jesúsen' bene' mandadw gože' le' notno ye'e can' ba beyone' le'. Na' gože' le':

—Con gwyej jaña' bžoza' cont le'ede' bačh beyacdo'. Na' bnežjo' da' cheyala' gwnežjo' dan' non Moisésen' mandadw cont yeyaco' xilaže' len ley che Diosen'. Ben' ca' cont yogo' beñe' yesenezde' ba beyacdo'.

<sup>15</sup> Na' tža tža gos gwlalje diža' ca' nac yela' guac dan' ben' Jesúsen'. Na' besedob beñe' zan cont bosozenague' xtiža' Jesúsen' na' cont beyone' legaque' len bite'teze yižgüe' da' chese'ede'. <sup>16</sup> Nach Jesúsen' bchoje' to ši'i güeje jal' güiže' Diosen' to latje daš.

*Jesúsen' beyone' to beñe' bi chda šla'a ni'a ne'e*  
(Mt. 9:1-8; Mr. 2:1-12)

<sup>17</sup> Nach to ža zoa Jesúsen' to yo'o gan' chsed chlo'ede' beñe'. Na' gala'ze zjanita' zan beñe' Israel beñe' zjanzi' fariseo. Na' lecze zjachi' yeto cuen

beñe' ca' chososed chosolo'ede' dan' bzoj da' Moisés. Beñe' ca' že'na' za'aque' yogo'loł yež ca' gan' mbane distritw Galilea len distritw Judea, na' ľecze baľe' za'aque' ciuda Jerusalén. Na' bosoznague' diža' da' be' Jesúsen'. Na' yeľa' guac che Xancho Diosen' zoan len Jesúsa' na' beyone' beñe' güe' ca'. <sup>18</sup> Na' besežin xonj beñe' zjanľene' to beñe' xinj, beñe' bi chda šľa'a ņi'a ne'e, zjanxoe' ľe' to lo cam dao'. Na' gosacľaže' yesedie' šjasesane' ľe' lao Jesúsa'. <sup>19</sup> Na' da' že'chgua beñe' zan bi goc latje yesedie' šjasesane' beñe' güen' lao Jesúsen'. Nach beñe' ca' gosepe' yichjo'ole gososaljue' goseque'e tej na' beseľetje'ne' len xcame'na' gachoľ beñe' ca' že' lo' yo'ona' cont bžine' lao Jesúsen'. <sup>20</sup> Cate' gocbe'e Jesúsen' gosejnilaže' ľe' na' gože' beñe' güe'na':

—Xi'ina', ba bezi'xena' xtoloñ.

<sup>21</sup> Na' beñe' ca' chososed chosolo'e dan' bzoj Moisésa' na' beñe' fariseo ca' gosene':

—¿Non' chaque benga naque' chñe' ca'? Chon cuine' ca' Dios. Ľe nono zoa beñe' gac yezi'xene' xtola' beñachen'. Toz Diosen' gac yezi'xenen'.

<sup>22</sup> Jesúsen' gocbe'ede' ca' nac da' cheseza'laže' na' gože' legaque':

—¿Bičhena' chza'laže'le ca' lo' yichjlažda'ole? <sup>23</sup> Še yapa'ne': “Ba bezi'xena' xtolo'na'”, bi nezele še napa' yeľa' gwnabia' cont yezi'xena' xtola'na'. San še yapa'ne': “Gwyas na' gwda”, na' nachbia' še napa' yeľa' guac gac can' gwnian'. <sup>24</sup> Na'ach gona' cont gacbe'ele napa' yeľa' gwnabia' cont yezi'xena' xtola' beñach, neda' naca' bena' gwseľa' Diosen' golja' beñach.

Nach gože' beñe' xinja':

—Chapa' ľe' beyas, beyoa' xcamon', na' beyej ližo'.

<sup>25</sup> Nach ľa' beyaste beñe' xinja', cheseña'te beñe' ca' nita'na'. Nach beyoa' xcamen' na' beze'e zjayda liže' chonxene' Diosen'. <sup>26</sup> Na' yogo'loł beñe' ca' že'na' besyebande' yeľa' guac che Jesúsen' dan' bene'na'. Nach gosonxene' Diosen', na' do chesežebe' gose' ľježe':

—Da' yebanecho da' ca' ba ble'echo ņa'aža.

*Jesúsen' gwleje' Leví cont goque' ľe' txen*

(Mt. 9:9-13; Mr. 2:13-17)

<sup>27</sup> Gwdena' beza' Jesúsen' na' ble'ede' to beñe' güečhixjw beñe' ľe' Leví, chi'e latje gan' chčhixjue'. Na' Jesúsen' gože' ľe':

—Da len neda'.

<sup>28</sup> Nach gwzoža' Levín' gwlejjyichje' yogo' xšinľaze' na' gwyejlene' Jesúsen'.

<sup>29</sup> Nach Levína' bene' to ľni xen ližen' par Jesúsen', na' ja'ac beñe' zan beñe' güečhixjw ca' na' beñe' yezica'chle na' gosebe'lene' ľe' cho'a mesen' gosagüe'. <sup>30</sup> Na' beñe' ca' chososed chosolo'ede' dan' bzoj Moisésen' na' len beñe' fariseo ca' gosacyožlene' beñe' ca' zjanaque' Jesúsen' txen, gose'e legaque':

—¿Nacxečhen' che'ej chagwle txen len beñe' güečhixjw na' yebaľe beñe' güen da' xinj ca'?

<sup>31</sup> Jesúsen' gože' legaque':

—Beñe' cbi chesacšene bitw cheseyažjde' beñe' güen rmed. Beñe' ca' chesacšene, legaquen' cheseyažjde' beñe' güen rmed. <sup>32</sup> Gague beñe' ba zjanaque' beñe' güen len Diosen' zedenyoeda' cont yesyetiñjde' xtolen', san beñe' güen da' xinj. Legaque' zjanaque' ca' beñe' cheseyažjde' beñe' güen rmed.

*Gosenabde' Jesúsen' bixchen' cbi gwleje' tgüeje ža gwbas*

*(Mt. 9:14-17; Mr. 2:18-22)*

<sup>33</sup> Nach bal bene' gose'e le':

—Bene' ca' zjanaque' t xen len Juan na' bene' zjanaque' t xen len bene' fariseo ca' chesonchgüe' gwbas chosol güiže' Diosen'. Perw na' bene' ca' zjanaque' le' t xen chese'ej chesagüe'. ¿Bixchen'?

<sup>34</sup> Nach gož Jesúsen' legaque':

—¿Guac yesezoa gwbas bene' chaxe' to ga chac yela' güešagna' šlac ben' bšagnan' zoalene' legaque'? Bi gac. <sup>35</sup> Perw žin ža cate' bich soe' len legaque', cana'ch yesone' gwbas. Na' ca'cze naquen len neda' na' len bene' ca' zjanaque' neda' t xen.

<sup>36</sup> Na' Jesúsen' be'e jempl nga bzejni'ide' legaque':

—Notno zoa bene' čheza' xe' da' cobe na' yode'en de'exo'. Še gone' ca' gwžiaje'e xe' da' coben' na' xe' de'exon' bitw gac leben len lache' coben'. <sup>37</sup> Na' neca zoa bene' chgue'e vino cobe lo' bzod yide'exo', le vino coben' chšon' yide'exon' na' lalje vino na' yesebiayi' chopen. <sup>38</sup> Cheyalā' yesegue'e vino coben' lo' yid cobe cont bibi gaquen. <sup>39</sup> Na' ca' nac bene' bach yolagüe' che'eje' vino golen', bitw ye'nde' ye'eje' vino coben', san že': "Vino golen' nacchen güen."

## 6

*Bene' ca' zjanaque' Jesúsen' t xen goselechje' trigon' gosagüen' ža čhe Dios*

*(Mt. 12:1-8; Mr. 2:23-28)*

<sup>1</sup> Na' to ža nac ža čhe Dios, Jesúsen' gwdie' gan' nyaž trigw len bene' ca' zjanaque' le' t xen. Nach bene' ca' zjanaque' le' t xen goselechje' trigon' na' gosexoben' gosagüen'. <sup>2</sup> Na' besele'e bal bene' fariseon' can' gosone' na' gose'e legaque':

—¿Bičhen' chonle da' bi de lsens goncho ža čhe Dios?

<sup>3</sup> Na' Jesúsen' gože' legaque':

—¿Biña' gwlable can' ben da' rey David to ža cate' le' na' bene' lježe' ca' gosedone'? <sup>4</sup> Gwyo'o Davin' liž Dios na' jaxi'e yetextil da' nac čhe Dios da' bi chac gagw bene' bi nac bχoz, na' gwdagüen', na' lecze bnežjue' čhe bene' zja'ac len le'.

<sup>5</sup> Na' lecz ca' gwna Jesúsen':

—Naquen lo' na' nia' bi da' nac güen goncho cate' nac ža čhe Dios, neda' naca' ben' gwsela' Diosen' golja' benach.

*Beyac to bene' nχo'oŋ šla'a taque'*

*(Mt. 12:9-14; Mr. 3:1-6)*

<sup>6</sup> Na' yeto ža čhe Dios gozeje' lo' yodaon' na' bsed blo'ede' bene' ca' že'na'. Na' ladjo bene' ca' zjaže'na' yo'o to bene' nχo'oŋ taque' licha. <sup>7</sup> Na' bene' ca' chososed chosolo'e dan' bzoj da' Moisés na' bene' fariseo ca' chosogüia chesene'e Jesúsen' še yeyone' bena' ža čhe Dios cont de da' yosode'ede' yesagüe' xya čhe'. <sup>8</sup> Na' gocbe'e Jesúsen' can' chesone' xbaben', na' gože' ben' nχo'oŋ taque':

—Gwzoža' na' gwzecha nga gachol.

Nach bena' bžine' gwzeche' lagüen'. <sup>9</sup> Na' Jesúsen' gože' bene' ca' že'na':

—¿Bi da' cheyalā' goncho ža čhe Dios? ¿Goncho da' güen, še goncho da' mal? ¿Cheyalā' yoslacho bene', še gwžiayi'chone'?

<sup>10</sup> Jesúsen' gwne'e yogo'te ben' že'na', nach gože' ben' nχo'oŋ taque':

—Bli naon'.

Nach blien' na' taquen' beyaquen binlo. <sup>11</sup> Na' bene' ca' chososed chosolo'e leyna' na' len bene' fariseon' leca beseže'e na' gwzolaos bosoxi'e nacle yesone' len Jesúsen'.

*Jesúsen' gwleje' šižinw postlw*

(Mt. 10:1-4; Mr. 3:13-19)

<sup>12</sup> Na' to ža gwyej Jesúsen' to lo ya'a jel güiže' Diosen'. Na' do yel be'lene' Diosen' diža'. <sup>13</sup> Na' cate' gwye'ni', goxe' bene' ca' zjanaque' le' txen, nach gwleje' šižinue' na' bsi'e legaque' postlw. <sup>14</sup> Bene' qui gwleje': Simón ben' bsi'e Pedro, na' bene' biše' Andrés, na' Jacobo, na' Juan, na' Felipe, na' Bartolomé, <sup>15</sup> na' Mateo, na' Tomás, na' Jacobo xi'in Alfeo, na' Simón ben' nac cananista, <sup>16</sup> na' Judas bene' biše' Jacobo, nach Judas Iscariote ben' bdie' Jesúsen' lo na' bene' chesegue'ede' le'.

*Jesúsen' bzejni'ide' bene' zan*

(Mt. 4:23-25)

<sup>17</sup> Na' beyetje' lo ya'an len legaque' na' gwzeche' ga nac to laše' len bene' ca' zjanaque' le' txen. Na' lecze nita' bene' zan bene' za'ac doxen Judean', do ciuda Jerusalénna' na' do gan' mbane yež ca' zjanzi' Tiro na' Sidón. Na' Tiro len Sidón zjachin' cho'a nisdao'. Na' len bene' ca' nita' chosozenague' xtiža' Jesúsen' zjančixe bal bene' chese'e yižgüe'. Na' Jesúsen' beyone' legaque'. <sup>18</sup> Na' bene' ca' zjajo'o zjanyaz da' xigüen' yichjlažda'ogaque', Jesúsen' bebejen'. <sup>19</sup> Na' yogo' bene' goseyiljue' nacle yesone' cont yeselapa' na'gaquen' le', le gosenezde' nape' yela' guac cont yega'a yižgüe' čhegaquen' še yesechele'ne'.

*Non' zoa mbalaz na' non' cbi zoa mbalaz*

(Mt. 5:1-12)

<sup>20</sup> Na' Jesúsen' gwłis lagüe' gwne'e bene' ca' zjanaque' le' txen na' gože' legaque':

—Mbalaz zoa le'e bene' yaše', le'e chzenagle che Diosen' cont chnabi'e yichjlažda'olen'.

<sup>21</sup> 'Mbalaz zoa le'e chdonle na'a, gwžin ža cate' bich tonle.

'Na' mbalaz zoa le'e chbežle na'a, gwžin ža cate' gwxižle.

<sup>22</sup> 'Neda' naca' ben' gwseła' Diosen' golja' benačh. Na' mbalaz soale še dan' chejnilaže'le neda' chesegue'e bene' le'e, na' chesyebetje' le'e lo' yodao' čhegaque', na' cheseneye'e chele, na' chesene' nacle bene' mal. <sup>23</sup> Le yebechgüe cate' chac da' quinga, na' le soa mbalaz, le Diosen' gone' cont gacchgua da' güen chele cate' yežinle gan' zoe'na'. Can' chesonde' le'e, ca'czen' goson da' xozxta'ogaque' len da' bene' ca' goso'e xtiža' Diosen' cani'.

<sup>24</sup> 'Na' nyaše'chguaze nac le'e bene' gwni'a. Chac güen chele na'a, perw gague toli tocañen' gac chele ca'.

<sup>25</sup> 'Nyaše'chguaze nac le'e dechgua da' chagwle na'a. Gwžin ža cate' bich bi gata' chele.

'Nyaše'chguaze nac le'e chxižle na'a. Gwžin ža cate' yegüine'le na' cuežyaše'le.

<sup>26</sup> 'Nyaše'chguaze nac le'e chesonxen yogo'loł bene' le'e. Ca'czen' goson da' xozxta'ogaque', gosonxene' bene' ca' goseziye'e gosene' cheso'e xtiža' Diosen' cani'.

*Cheyała' gaquecho bene' chesegue'ede' chio'*

*(Mt. 5:38-48; 7:12)*

<sup>27</sup> 'Le'e chzenagle chia', cheyała' gaquele bene' chesegue'ede' le'e. Cheyała' gonle da' güen len bene' ca' chesegue'ede' le'e. <sup>28</sup> Le nab cont bene' chesegue'ede' le'e nite' mbalaz. Le soa le nabe Diosen' gaclene' bene' chososaca'zi' le'e. <sup>29</sup> Še to bene' chaze' šla'a xaga'le, le güe' dan' yešla'a. Še to bene' que'e xadon chele, le güe' latje lechje' len xcamisle. <sup>30</sup> Note'teze bene' bi dan' nabde' le'e, le gwnežjon. Še to bene' que'e bite'teze da' de chele, bitw yenablen. <sup>31</sup> Con yogo' da' güen da' chaclaže'le yeson benachen' len le'e, lecze ca' cheyała' gonle len legaque'.

<sup>32</sup> 'Še chaquele šinze bene' chacde' le'e na' bi chaquele bene' yoble, žbixchen' chaquele chebe Diosen' can' chonle? Ca'cze cheson bene' güen da' mal ca'. <sup>33</sup> Lecze še chonle da' güen len bene' ca' cheson da' güen len le'e na' bi chonle güen len bene' yoble, žbixchen' chaquele chebe Diosen' can' chonle? Ca'cze cheson bene' güen da' mal ca'. <sup>34</sup> Še chbejle bi da' chbejle len bene' chaquele yesyeyonen' le'e, žbixchen' chaquele chebe Diosen' can' chonle? Ca'cze cheson bene' güen da' mal ca', chesebeje' bi dan' chesebej lježgaque', na' nite' lez yosyonežjuen'. <sup>35</sup> Perw na' le'e, le soa le gaque bene' chesegue'ede' le'e, na' le soa le gon da' güen. Na' le soa le cuej bi dan' cuejle, perw bitw soale lez yesyeyonen'. Še gonle ca dan' ba gwnia' le'e, gwlo'ele nacle xi'in Dios ben' nac la'zelagüe bene' blaο, na' Diosen' güebi'icze' güen len le'e. Le'na' naque' bene' šagüe' len bene' ca' bi cheso'e yela' choxcen che' na' len yezica'chle bene' güen da' mal ca'. <sup>36</sup> Na' ca Xacho Diosen' ben' zoa yaba cheyaše' cheži'ilaže'de' yogo' benachen', ca'cze cheyała' yeyaše' yeži'ilaže'le ljež benachen'.

*Bitw zaca'cho nacho bene' zjanape' dola'*

*(Mt. 7:1-5)*

<sup>37</sup> 'Bitw gonle xbab zaca'le nale bene' zjanape' dola'. Še nale che bene' zjanape' dola', ca'cze Diosen' ne' le'e nape dola'. Na' bibi yosbaga'le bene' cont Diosen' bibi yosbague'de' le'e. Le soa le yezi'xen che bene' cont Diosen' yezi'xene' chele. <sup>38</sup> Le soa le gwnežjo bi da' gwnežjwle bene' na' Diosen' güeyoncz'e' chele. Bał bene' leca nala' chosochixe' bi dan' chesote', chosochiše' lao yagarm chegaquen' na' chesebiben' na' chosoaya'aten'. Ca'czen' cheyała' gonle gwnežjwle bi dan' cheseyažje bene' na' lecz ca' gon Diosen' len le'e.

<sup>39</sup> Nach Jesúsen' be'lene' bene' že'na' to jempl, gwne':

—žGuaque to bene' lchol cue'e nez yeto bene' lchol? Bi gac. Le nezecho chopte' šjasebixe' to lo' yechw. <sup>40</sup> Ca nac cate' to bene' chsede' len to maestrw, bi nacho naque' bene' blaοch ca maestroa'. Na' la'czla' še ben' chseda' gwda' yichje' yogo'loł dan' blo'e maestron' le', bitw naque' bene' sina'ch ca maestroa'.

<sup>41</sup> 'žBixchen' chna'le beb dao' dan' yo'o lo' yejlaο bene' lježle, na' bi chache'ele naquech beb xen dan' yo'o lo' yejlaolen'? <sup>42</sup> Na' še le'e yo'o to da' xen lo' yejlaolen' žnacxechen' che'le bene' lježlen': "Ben yebeja' beb dao' dan' yo'o lo' yejlaguon'?" ;Bene' güexoayag! Zgua'tec le yebej beb xen dan' yo'o lo' yejlaolen', nach le'ele binlo cont yebejle dan' yo'o lo' yejlaο bene' lježle.

*Dan' choncho chlo'en bin'yo'o lo' yichjlažda'ochon'*

*(Mt. 7:17-20; 12:34-35)*

43 'Bitw n̄acho to yag frut güen chbian frut da' bi nac güen, na' n̄eca n̄acho dan' bi nac güen chbian da' nac güen. 44 Con can' nac da' chbia to to yaguen' n̄ezecho bi yaga'. Yag yeše' bitw chbian da'na' nzi' yixgüigw. Lecz ca' yag bisga'a bi chbian uvas. 45 To bene' laždao' ži'ilaže' chone' da' güen, le ca ža lo' yichjlažda'ogüe' nan' chone'. Na' ben' chon da' mal, chone' ca' lagüe dan' chzenague' che laždao' xi'a che'na'. Na' yogo'te diža' dan' chchoj cho'achon', lo' yichjlažda'ocho nan' za'aquen.

*Chope bene' na' yo'o da' chon to toe'*

*(Mt. 7:24-27)*

46 '¿Bičen' che'le neda': "Xana", na' bi chonle can' nona' mandadw? 47 Na'a n̄ia' nac zaca'lebe bene' nao' neda' na' chzenague' xtiža' na' chone' can' nona' mandadw. 48 Naque' ca to bene' ben yo'o na' gwche'ene' sitjw gwleque' lene yo'on da' nac da' gual. Cate' betjchgua yegw gwyechjen liže'na', na' bitw bebixen cuiayin', le gwzoačhachchguan. 49 Na' yogo' bene' chende' xtiža'na' na' bi chone' can' žia'na' naque' ca yeto bene' ben yo'o, con benen' lo' yo na'ze na' bibi lenen gwleque'. Na' cate' betjchgua yegw gwyechjen liže'na', na' bebixen gwžiyi'te yo'on.

## 7

*Jesúsen' beyone' xmos to x̄an soldadw*

*(Mt. 8:5-13)*

1 Na' cate' beyož be' Jesúsen' diža' len bene' ca', beyeje' yež Capernaum. 2 Na' zoa to x̄an soldadw bene' bitw naque' bene' Israel. Na' zoa to xmore' chacšenchgüede', na' yelez ba de' par gate'. Na' x̄an soldadon' chacchgüede' le'. 3 Na' cate' x̄an soldadon' bende' diža' che' Jesúsen', gwsele' bal' bene' gole blao che' bene' Israel cont jasenabde' Jesúsen' šeje' liže' yeyone' xmore'. 4 Nach cate' besežine' gan' zoa Jesúsen', gosenabde' le' gaclene' x̄an soldadon'. Na' gose'e Jesúsen':

—X̄an soldadon' naque' to bene' zaque' gacleno', 5 le' chacde' chio' bene' Israel, na' le' bene' yodao' četo' nga len xmechue'.

6 Nach gwyej Jesúsen' len legaque', perw za' yesežine' liže'na' cate' gwsele' x̄an soldadon' bal' bene' migw che' lao Jesúsen' na' gose'ene':

—X̄an soldadon' že' bitw gwša'a yichjo' yido' liže'na', le' n̄ezde' bitw zaque' cont šo' liže'na'. 7 Da'n̄an' bitw beyaxjde' yide' n̄abde' le' gacleno'ne'. Con che'nde' gonšco' mandadw yeyaque' xmore'na'. 8 X̄an soldadon' že' zoa bene' chnabia' le' perw lecze nita' soldadw che' na' chnabi'e legaque'. Na' cate' che'e toe': "Gwyej", na' cheje', na' cate' che'e yetoe': "Da", na' chide', na' cate' che'e xmosen': "Da' nga gono", na' chonen'. Na' n̄ezde' con nao' yeyac xmore'na' na' yeyacde'.

9 Na' Jesúsen' cate' bende' diža' dan' gose' bene' migw che' x̄an soldadon' le', bebande' na' beyechje' gože' bene' zan ca' zjanao' le':

—Žia' le'e n̄e toze bene' Israel bīna' šejnilaže' neda' ca chejnilaže' benga bi naque' bene' Israel.

10 Nach jaya'ac bene' ca' gwsele' x̄an soldadon'. Cate' besyežine' liže'na' ba beyaque' xmosen'.

*Jesúsen' bosbane' xi'in to no'ole güezebe*

11 Jesúsen' gwyeje' to yež dan' nzi' Naín len bene' ca' zjanaque' le' txen na' zan bene' yoble. 12 Ba zja'aque' gala'ze par yesežine' cho'a puert che' yežna' cate' besele'ede' chesechoj x̄onj bene' cho'a puerten' zjanlene' to



beñe' guat. Na' ben' goten' naque' beñe' tliša', na' xñe'en naque' no'ole güezebe. Na' beñe' zan beñe' lo yeža' zja'aclene' xña' beñe' guaten'. <sup>13</sup> Na' cate' ble'e Xanchon' no'olen', beyaše'de' le' na' gože'ne':

—Bitw cuežo'.

<sup>14</sup> Nach gwyeje' jažoa ne'en lo yagla' gan' xoa beñe' guata'. Nach beñe' ca' zjanlen le' gosebeze'. Na' gože' beñe' guata':

—Beñe' güego', neda' žia', beyas.

<sup>15</sup> Nach beñe' guaten' gwchi'e na' gwzologüe' beñie'. Na' Jesúsen' beyone' le' lo na' xñe'e. <sup>16</sup> Na' yogo'lol beñe' ca' besežebe' dan' beban beñe' guata' nach gosonxene' Diosen' gosene':

—Ba bla' to beñe' blao ga zoacho, beñe' choe' xtiža' Diosen', na' Diosen' ba gwsele'ne' cont gaclene' chio' naccho nación che'.

<sup>17</sup> Ca nac dan' ben' Jesúsen' gos gwłalj diža' čhen' doxen Judea na' yogo'lol yež ca' dan' zjanita' gała'ze.

*Juanna' gwsele' čhope ben' gosaque' le' txen gan' zoa Jesúsen'*

*(Mt. 11:2-19)*

<sup>18</sup> Nach beñe' ca' zjanaque' txen len Juanna' jaseye'lene' le' diža' yogo'lol ca nac dan' chon' Jesúsen'. Nach gox Juanna' čhope beñe' ca' <sup>19</sup> nach gože' legaque':

—Le šja'ac gan' zoa Jesúsen' na' ye'lne': “čLen' naco' ben' chbezto' seła' Diosen' o še cheyała' cuezchto' yid beñe' yoble?”

<sup>20</sup> Nach beñe' ca' čhope cate' besežine' gan' zoa Jesúsen' gose'ene':

—Juan ben' chzoa beñe' nis gwsele' neto' laguo' nga nabeto' le' še len' naco' ben' chbezto' seła' Diosen' o še cuezchto' yid beñe' yoble.

<sup>21</sup> Šlacte ne' nita' čhope beñe' ca', Jesúsen' beyone' beñe' zan beñe' ca' chesacšene na' beñe' chese'ede' yižgüe' gual. Lecze bebeje' da' xigüe' da' zjayo'o zjanyaz yichjlaždao' beñe' zan. Na' bene' cont besyele'e zan beñe' lčhol. <sup>22</sup> Nach Jesúsen' boži'e xtiža' beñe' ca' gwseła' Juanna' lagüe'na', gože' legaque':

—Le šjaya'ac na' le šjayež Juanna' doxen da' ca' ba ble'ele na' da' ca' ba benele. Ba ble'ele chona' cont chesyel'e no beñe' lčhol, na' chesyeda no beñe' zjanxiñj ni'e. Na' lecze beñe' gose'e yižgüe' dan' nzi' lepra besyeyacde', na' chesyeyene no beñe' cuež. Ba ble'ele bosbana' no beñe' guat, na' ba benele choa' diža' güen len beñe' yaše' ca'. <sup>23</sup> Mbalaz zoa beñe' chejle'e čhia' na' bi chdebde'.

<sup>24</sup> Na' cate' besyeya'ac beñe' ca' gwseła' Juanna', nach Jesúsen' be'lene' beñe' ca' zjandoben' xtiža' Juanna', gože' legaque':

—čNacxe nac ben' jale'ele latje dašen'? čŠayičj šayen chaque'? Bi naque' ca'. <sup>25</sup> čNac naque' caten' jale'elne'? čNyaze' lache' šagüe'? čše bitw? le beñe' ca' zjanyaz lache' šagüe' na' chesenite' chese'ej chesagwšagüe' na' chesone' legr, bena' nita' yo'o güenchgua, ca no liž beñe' gwnabia'.

<sup>26</sup> čNoxen' jale'ele? čNaque' to beñe' choe' xtiža' Diosen'? Da' li naque' to beñe' choe' xtiža' Dios, perw čhnia' le'e, zaca'che' ca note'teze beñe' choe' xtiža' Dios. <sup>27</sup> Čhe benga nyojen le'e Xtiža' Diosen' žan:

Neda' Dios seła' to beñe' cuialogüe' laguo' güe'e xtižon'

cont cate' yido' ba nita' beñe' yesonxene' le'.

<sup>28</sup> Čhnia' le'e, notech no beñach na' soa beñe' naquech beñe' blaoch ca Juanna'. Perw na' note'teze beñe' gwzenague' čhe Diosen' cont Diosen' nabi'e yichjlažda'ogüe', la'czła' bi naque' beñe' blao, gwžin ža cate' šejni'ichde' čhia' clcl ca Juanna'.

29 Ba bzoa Juanna' bene' zan nis na' len bał bene' güechixjw. Na' yogo' bene' ca' gosache'ede' Diosen' zejcze' to licha dan' gwsele' Juanna' jatixjue'ede' legaque' yesyetenjde' xtoła'gaque'. 30 Perw na' bene' fariseo ca' na' bene' ca' chososed chosolo'e dan' bzoj da' Moisés, goson yichjlaogaquen' cbi besyetenjde' xtoła'gaquen' can' goclaže' Diosen'. Bi gosacłaže' gwzoo Juanna' legaque' nis. 31 Nach Jesúsen' gože' legaque':

—¿No gwsacalebda' le'e zoale na'a? ¿No chon can' chonlen'? 32 Nacle ca bidao' neche bicze bi de chlebele. Can' zjanac bidao' ca', cate' nita'be' gan' chac ya'a chese' lježbe': “Ba bcuežto' bžejo, neca bya'ale, na' ba bilyaše'to', neca gwchežle.” 33 Juan ben' chzoa bene' nis bide' laole nga, bitw güe'ej gwdagwšagüe' can' chese'ej chesagw bene' yoble, na' neca güe'ej vino, nach gwnale che': “Yo'o nyaz da' xigüen' yichjlažda'ogüe'.” 34 Na' neda', chle'ele che'ej chagua' can' chese'ej chesagw bene' yoble, na' žale chia' naca' bene' lia na' bene' borrašw, neda' naca' ben' gwseła' Diosen' golja' benach. Na' lecze žale naca' migw che bene' güechixjw ca' na' migw che nochle bene' güen da' xinj. 35 Perw na' bene' chosozenag che Diosen' zjanape' to yela' sina' na' chesone' cont nachbia' Diosa' naque' la'zelagüe' bene' sina'.

*Jesúsen' gwyeye' liž Simón bene' fariseo*

36 To bene' fariseo goxe' Jesúsen' šeje' liže' cont yesagüe'. Na' bžin Jesúsen' liž bena' na' gwchi'e cho'a mesen'. 37 Na' to no'ole lo ciudan', no'ole zle', gwnezde' bžin Jesúsen' liž bena'. Na' Jesúsen' len bene' ca' yezica'chle ba nite' cho'a mesen' cont yesagüe', cate' bžin no'olen'. Na' no'olen' noxe' to da' nac de yejese da' yože set da' la'zelaoze chla' zix. 38 Na' jabigue' gala'ze xni'a Jesúsen' na' gwcheže' na' nis xchež chen' bžonen ni'a Jesúsen' gwbišen. Na' bxie' ni'ena' len yiša' yichje' na' bnopen' na' gwdeben' set zixen'. 39 Na' ben' goxe' Jesúsen' ližen', cate' ble'ede' can' chon no'ola' na' godde': “Šaca' benga naque' to bene' choe' xtiza' Dios, guache'ede' no'olen' chgan ni'ena' naque' no'ole zle'”. 40 Nach Jesúsen' gože'ne':

—Simón, de to da' che'nda' yapa' le'.

Nach Simónna' gože' Jesúsen':

—Gwnan Maestrw.

41 Jesúsen' gože'ne':

—Gwzoo to bene' na' nita' chope bene' chesale' xmechue'. Toe' chale' gayo' gayoa mechw da' nzi' denario, na' ben' yeto chale' šiyon mechw lecze denario. 42 Na' chopte bene' ca' ne toe' ca de chegaque' cont yesyeyixjue' xyan'. Na' ben' gwlej mechon' gwlejiychje' dan' chesale' chen'. Gwnašc neda', ¿noe' bene' ca' chope' gosacchde' che'?

43 Nach Simónna' gože'ne':

—Šeca ben' goc xya chen' da' xench na' gwlejiychjen'.

Jesúsen' gože'ne':

—Da' li can' ba gwnao'na' naquen.

44 Nach Jesúsen' gwyechje' gwne'e no'ola' na' gože' Simónna':

—¿Chle'edo' no'ole nga? Neda' ba gwyo'a ližo' nga na' bi beno' nis chib ni'a, perw no'ole nga ba gwdbie' ni'an' len nis xchež chen' bxien' len yiša' yichje'. 45 Bi bnopo' neda', perw na' no'ole nga cate' bla'atia' gwzologüe' chnope' ni'a nga. 46 Bi gwdebo' set yichja', perw no'ole nga ba gwdebe' set zix ni'a nga. 47 Na' žia' le', xtole'na' gosaquen da' zan, perw ba bezi'xena'

che'. Da'nan' chacchgüede' neda'. Beñe' bi žinlaže' xtolen' ca xtoła' no'ole nga, cate' yezi'xena' che' bitw gactecde' neda'.

<sup>48</sup> Nach gože' no'olen':

—Ba bezi'xena' xtoło'na'.

<sup>49</sup> Nach beñe' ca' chesagw len Jesúsen' txen lo mesen' gwzolao chese' lježe':

—¿Nox benga chacde' le'na' chezi'xene' xtoła' beñachen'?

<sup>50</sup> Nach gož Jesúsen' no'ola':

—Dan' chejnilažo' neda' da'nan' ba de yela' mban chio' toli tocañe. Beyej to šagüe' to güen.

## 8

### *No'ol ca' gosaclene' Jesúsen'*

<sup>1</sup> Na' gwdechle gwyej Jesúsa' zan ciuda na' zan yež jatixjue'ede' diža' güen, gwne' Diosen' nabi'e yichjlaždao' bene' yosozenague' che'. Na' zja'aclen beñe' šižinw ca' le', beñe' ca' zjanzi' postlw. <sup>2</sup> Nach to xonj no'ole lecze zja'aclene' Jesúsen' beñe' ca' ba beyone'. Bałe' ba bebeje' da' xigüe' da' zjajo'o zjanyaz lo' yichjlažda'ogaque' na' yebałe' ba beyone'ne' cate' gosacšende'. Na' toe' lie' María beñe' Magdala, bebej Jesúsen' gaže da' xigüe' gwyo'o gwyaz yichjlažda'ogüe'na'. <sup>3</sup> Nach lecze len ben' le Juana, xo'ole ben' le Chuzza, na' Chuzan', gwyo'o lo ne'e liž rey Herodes na' yežlio che' ca'. Na' lecze len ben' le Susana gwyejlene' Jesúsen', na' yezan beñe' yezica'chle. Na' no'ol ca' bosochine' bite'teze da' gota' chegaque' cont bosonežjue' dan' byažje Jesúsen' len beñe' ca' zjanaque' le' txen.

### *Jempl che beñe' goz trigon'*

(Mt. 13:1-9; Mr. 4:1-9)

<sup>4</sup> Na' beñe' zan besežag gan' zoa Jesúsen' beñe' za'ac to to yež ca'. Na' be'e to jempl, gwne':

<sup>5</sup> —To beñe' güen žin jeze' trigw na' šlac zeje' chose' trigon' late' biñ jasechazen do cho'a nezen', na' bosolej bosošošj beñe' len, na' be žia xil be chaš le'e yaba gosagwban'. <sup>6</sup> Yelaten' jasechazen ga nac lo yej, na' cate' beselan' na' gosebizen, le gague bi gopa' den'. <sup>7</sup> Yelaten' jasechazen ga nac lo yag yeše', na' gosecha'on txen, na' bosolołe' yag yeše' ca' len. <sup>8</sup> Perw na' yelaten' jasechazen ga nac yo šagüe' na' beselan', na' bałen gosebian to gayoa güeje.

Na' beyož be'e diža' quinga gwne' žižje gože' legaque':

—Le'e žia nagle da' chene, le gwzenag xtiža'na'.

### *Jesúsen' gwne' bixchen' bi'e jempl cate' bzejni'ide' beñe'*

(Mt. 13:10-17; Mr. 4:10-12)

<sup>9</sup> Nach beñe' ca' zjanaque' Jesúsen' txen gosenabde' le' bi zejen jempl da' ba bi'e. <sup>10</sup> Na' gož Jesúsen' legaque':

—Nono na' neze can' nac yela' gwnabia' che Diosen'. Perw ba chone' cont le'e chejnilaže'lene' nezelen. Perw beñe' bi chesaclaže' yesejnilaže'ne', chzejni'igacda'ne' len jempl. Chona' ca' cont yesele'ede' can' chonan' na' bitw yesache'ede' bi zejen, na' cont yesende' xtižan' na' bi yesejni'iden'.

### *Jesúsen' bzejni'ide' bi zejen jempl che beñe' goz trigon'*

(Mt. 13:18-23; Mr. 4:13-20)

<sup>11</sup> Na' ca nac jempl nga zejen quinga: Ca dan' byažen zejen xtiža' Dios. <sup>12</sup> Na' biñ dan' besego'onen chanezen', zejen beñe' ca' chesende' xtiža'

Diosen', perw na' chžin Satanás dan' chnabia' da' xigüe' ca' chebejen xtiža' Diosen' lo' yichjlažda'ogaque' cont bi yesejnilaže' le' na' bi gata' yela' mban chegaque' toli tocañe. <sup>13</sup> Na' biñ dan' besego'on ga nac lo' yej zjanaque' ca' beñe' chesyebede' xtiža' Diosen', perw zjanaque' ca' to da' bibi loe chon, šložga chesejle'e che xtiža' Diosen', na' cate' chac bi da' mal chegaque' la' chesebejyichjte' xtižen'. <sup>14</sup> Na' biñ dan' besego'onen ga nac lo' yag yeše', zejen ca' beñe' ca' ba gosende' xtiža' Diosen', perw šlac zjambane' chesyela' chesyěžejde' na' chese'nde' yeseñi'e, na' chesede' chesonteze' con da' žazen chegaque'. Na' da' qui bi choen' latje yega'an xtiža' Diosen' lo' yichjlažda'ogaque' na' da'n'an' bi chesejnilaže' le' ca' cheyala'. <sup>15</sup> Na' da' ca' besego'onen lo' yo šagüen', zejen ca' beñe' cate' chesende' xtiža' Diosen' chesezi'en chesonen' chegaque', na' chesejni-laže' le' do yichj do laže', na' chesechejde' bite'tez dan' chac chegaque' cont chesone' can' che'ne Diosa'.

*Jempl che yi' dan' chguala'cho*

*(Mr. 4:21-25)*

<sup>16</sup> Na' Jesúsen' gwne':

—Notno gwguala' to yi' na' gw dosen' to yeso', na' neca gwcuša'e yin' xcame'. San chde'en le'e ze'e cont gwsen'in' len yogo'lol beñe' yeso' lo' yo'o. <sup>17</sup> Le yogo'lol da' ngaše' chia' neda', lenna' gwlo'elaon, na' yogo'lol da' nono na' neze chia', žin ža yeseñezden' na' yesejni'iden'.

<sup>18</sup> 'Le gwzenag da' quinga da' chzejni'ida' le'e, le note'teze beñe' chzenague' xtiža' Diosen' gwzejni'ich Diosen' le', perw na' note'teze beñe' bi chzenague', da' daon' chacde' ba nežde', yeca'a Diosen' len.

*Xna' Jesúsen' len beñe' biše' ca' besežine' gan' zoe'*

*(Mt. 12:46-50; Mr. 3:31-35)*

<sup>19</sup> Na' xna' Jesúsen' len beñe' biše' ca' besežine' gan' zoa Jesúsen', gosaclaže' yeso'e, perw catec beñe' zan že' gague goc latje yesežine' lagüe' na'ate. <sup>20</sup> Na' to ben' ze na' gože' Jesúsen':

—Xna'o len beñe' bišo' ca' zjanite' chyo'o na' chesaclaže' yedesene'e le'e.

<sup>21</sup> Na' Jesúsen' gože' legaque':

—Beñe' ca' chosozenag xtiža' Diosen' na' chesezi'e cho'alao xtižen', beñe' can' zjanaque' xna'a na' biša'.

*Jesúsen' bcueze' be' bdono' lo' nisdao'*

*(Mt. 8:23-27; Mr. 4:35-41)*

<sup>22</sup> Na' goc to ža Jesúsen' gwyo'e to lo' barcw len beñe' ca' zjanaque' le' txen. Na' gože' legaque':

—Laga'cho yešja'ale nisdaon'.

Nach bosose'e barcon'. <sup>23</sup> Šlac zejen lo' nisen' gwtas Jesúsen'. Nach gwzola' gwyečj to be' bdono' lo' nisdaon', na' gwzola' cheyož nis lo' barcon'. Na' besexožde' yesebiaye'e. <sup>24</sup> Nach bosyosbane' Jesúsen' gose'e le':

—jMaestrw! jMaestrw! Bač chbiayi'cho.

Nach gwyase' na' gwdi'e be' bdono' len nisdaon', na' la' gosebe'žiten.

<sup>25</sup> Na' gože' legaque':

—¿Nacxečen' bi chejle'le' chia'?

Nach legaque' besežebe' len besyebande'. Nach gose' lježe':

—¿Noxe benga? lente be' bdono' na' len nisdaon' chosozenagen če da' že'.

*To bene' Gadara yo'o nyaze' da' xigüe'*

*(Mt. 8:28-34; Mr. 5:1-20)*

<sup>26</sup> Na' besežine' laž bene' Gadara ca', to yež da' chi' šla'a distritw Galilean', laga'cho nisdao'. <sup>27</sup> Na' cate' bechoj Jesúsen' lo' barcoa', to bene' lo yežna' jašague' le'. Ba gwža yo'o nyaz da' xigüen' yichjlaždao' bena'. Na' ba chde' con gague bi xe' chazche', na' bich zoe' liže', con ba zoe' do capsantwle. <sup>28-29</sup> Na' bene' gualaž che' ca' bosocheje' ni'a ne'e len gden na' gosape' le'. Na' da' xigüe' ca' gosonen cont bzojx btine' gdenña' zan ni'a. Na' gosonen cont gwyeje' ga nono bene' zjanla'. Na' bena' cate' ble'ede' Jesúsen' na' bzoa xibe' lagüen'. Na' bosye'e zižje gwne':

—¿Bixchen' chgoša' chlaže' chio' len neda', Jesús? Le' naco' dogualje Xi'in Dios ben' nape' la'zelagüe' yela' gwnabia' xen. Chneyoeda' le' bi gwsaco' neda'.

Gwne' ca' dan' ben Jesúsen' mandadw yechoj da' xigüen' yichjlažda'ogüen'. <sup>30</sup> Nach Jesúsen' gože' da' xigüen' yo'o nyaz yichjlaždao' bena':

—¿Bi lio'?

Nach da' xigüen' gwnan:

—Legión lia'.

Gwnan ca' le' zjanaquen da' zan zjajo'on yichjlažda'ogüen'. <sup>31</sup> Nach da' xigüe' ca' gosata'yoen Jesús'a bi yeselen' lo yi' gabil'. <sup>32</sup> Na' to ya'a da' zoa gala'ze chesaš zan coš chesagwba'. Nach da' xigüe' ca' gosata'yoen Jesúsen' gwnežjue' latje šjaseyo'on yichjlaždao' coš ca'. Na' Jesúsen' bnežjue' latje. <sup>33</sup> Nach besyechojen yichjlaždao' bena' na' jaseyo'on yichjlaždao' coš ca'. Na' besyeyetjes coš ca' le'e ya'a gan' nita'ba' na' jaselažo'ba' lo' nisdao' ga gosatba' gose'ejba' nis.

<sup>34</sup> Na' bene' ca' chosoyoe' cošen' besele'ede' dan' ba goquen' bosyoxonje' jasyeyeže' bene' lagüe yež len bene' chaš yiže', gose'e legaue' can' ba goquen. <sup>35</sup> Nach ja'ac bene' jasene'e bixen' goc. Na' cate' besežine' gan' zoa Jesúsen' besele'ede' bena' ba gwyo'o gwyaz da' xigüen', na'a ba chi'e gala'ze cuit Jesúsen' nyaz xalane', na' ba bezoa yichjlažda'ogüe' binlo. Na' besežebe'. <sup>36</sup> Na' bene' ca' besele'ede' can' goquen' goso'e diža' che dan' goc che bena' gwyo'o gwyaz yichjlažda'ogüe' da' xigüen' na' can' ba beyaque'. <sup>37</sup> Nach yogo'lol bene' ca' že' gan' mbane yež Gadaran' jasetayoede' Jesúsen' yeze'e lažgaquen', le besežebchgüe'. Nach Jesúsen' beyo'e lo' barcon' cont yeze'e. <sup>38</sup> Na' bena' beyaque cate' Jesúsen' bebeje' da' xigüe' ca' goso'o gosazen yichjlažda'ogüe', gota'yoede' le' gwnežjue' latje šejlene'ne'. Perw Jesúsen' bi be'e latje, san gože'ne':

<sup>39</sup> —Beyej ližo' na' jayež bene' lo' yo'o chio' yogo' da' güen da' ba ben Diosen' len le'.

Nach beza' ben' na' gwzologüe' cho'e diža' doxen yežen' yogo' can' ba ben Jesúsen' len le'.

*Jesúsen' beyone' xi'in Jairo na' beyone' yeto no'ole bene' gwdane' xe'*

*(Mt. 9:18-26; Mr. 5:21-43)*

<sup>40</sup> Na' cate' Jesúsen' belague' nisdao'n, bene' zan ba nita' chesebeze' le'. Chesyebechgüede' da' bežine' na'. <sup>41</sup> Na' bžin to bene' le' Jairo, ben' nac to bene' gwnabia' che yodao' che yežna'. Na' bzoa xibe' lao Jesúsen' gota'yoede' le' šejlene' le' liže', <sup>42</sup> le ba zoa gat bi' no'ol che'. Nacbe' bi' tliša', na' šižinw izgüebe'. Na' šlac zej Jesúsen' len le', bene' zan gosebiadi'e le' na' bosochichgüe' le'.

43 Na' len to no'ole ba goc šižinw iz chzoe' gwbao' na' ba benditje doxen xmechue' len bene' güen rmed ca'. Na' notno goc gon le' rmed. 44 Na' gwbiga' no'olen' cože' Jesúsen' na' gwdane' lox xen', nach la' gwlezte gwbao' dan' zoen'.

45 Na' gwna Jesúsen':

—¿Non' gwdan neda'?

Na' ne toe' ca gosechebe' še ba gosegane' le'. Nach Pedron' len bene' ca' zja'aclen Jesúsen' gose'e le':

—Maestrw, bene' zan bene' za'ac nga chosočhie' le' na' chosožigue' le' nile na'le. ¿Bixchen' chnabo' no gwdan xaon'?

46 Nach Jesúsen' gože' legaque':

—To bene' ba gwdane' neda'. Chacbe'eda' ba beyacde' len yela' guac chia'na'.

47 Nach no'olen' cate' gocbe'ede' cbi bgaše' dan' benen', nach gwbigue' lao Jesúsen' do chaž chžebe' na' bzoa xibe' lagüe'na', be'e diža' lao yogo' bene' ca' že'na' bixchen' gwdane' le' na' can' goc la' beyactede'. 48 Nach gož Jesúsa' no'ola':

—Xi'ina', ba beyacdo' dan' chejnilažo' neda'. Beyej binlo.

49 Ne' choe'te Jesúsa' dižan' ca' cate' bžin to bene' gwza' liž Jairo ježe' le':

—Ba got bi' no'ol dao' chion'. Bich gondo' Maestroa' zed.

50 Perw cate' bene' Jesúsen', na' gože' Jairo:

—Bitw žebo', con gwejnilaže' neda' na' yeyaquebe'.

51 Na' cate' besežine' liž Jairona', Jesúsen' bi be'e latje yeso'o zan bene' ca' zja'aclen le', san Pedro, len Juan, len Jacobo, na' len xaxna' bi' guat na'ze goso'o. 52 Na' ba chi'chgua žaš na' yogo' bene' ca' že'na' chesebežchgüe'. Na' Jesúsen' gože' legaque':

—Bitw cuežle. Biņa' gatbe', san chtasbe'.

53 Na' bosoxiže' gosonle' che' da' zjanežde' ba gotbe'. 54 Perw Jesúsen' beḡue' taca' bi' no'ol guaten' na' boļ güiže'be' gože'be':

—No'ol dao', beyas.

55 Nach bebambe', la' beyastebe'. Na' Jesúsen' bene' mandadw yeso'ebe' da' gagwbe'. 56 Na' xaxna'be' besyebanchgüede'. Perw Jesúsen' bene' mandadw bi yeso'e diža' can' goca'.

## 9

*Jesúsa' gwsele' bene' šižinw ca' jasedixjue'ede' xtižen'*

*(Mt. 10:5-15; Mr. 6:7-13)*

1 Jesúsen' botobe' bene' šižinw ca' gwleje' cont zjanaque' le' txen na' bnežjue' legaque' yela' gwnabia' na' yela' guac cont goc besyebeje' da' xigüe' lo' yichjlaždao' bene', na' lecze ca' besyeyone' bene' ca' chesacšene.

2 Na' lecze bene' mandadw šjasedixjue'ede' Diosa' nabi'e yichjlaždao' bene' yosozenag che'. Na' bene' mandadw yesyeyone' no bene' güe'. 3 Na' gože' legaque':

—Bibi goxe'le tnez. Bitw goxe'le xis da' gwchiše'le, neca gua'le bzod, ne yet, ne mechw, na' bitw gua'le yeto xcamisle. 4 Cate' žinle to liž bene', na'ze yega'anle šlac zoale lagüe'yeža'; cate'ch yeza'le yeža', cana'ch yeza'le latja.

5 Na' še zoa ga bi yosolebe' le'e, cate' yeza'le na', le cuibe ni'alen' yo bište cont nachia' malen' chesone' bi chosozenague' xtiža' Diosen'.

6 Nach bene' šižinw ca' ja'aque' to to yež, na' gate'teze ja'aque' jasedixjue'ede' diža' güen che Jesúsen' na' besyeyone' no bene' güe'.

*Ba gosote' Juan ben' bzoa bene' nis*

*(Mt. 14:1-12; Mr. 6:14-29)*

<sup>7</sup> Na' gobernador Herodes goque' tole bende' yogo'lol da' güen da' chon Jesúsén'. Gocžejlaže', le bal bene' gose'e le' ba beban da' Juan ladjo bene' guat ca'. <sup>8</sup> Na' yebale' gosene' šeca da' Elías ben' be' xtiža' Diosen' cani' ba bela' yežlio nga da' yoble. Yebale' chesene' yeto bene' be' xtiža' Diosen' cani'te ba bebane' ladjo bene' guat ca'. <sup>9</sup> Na' Herodesen' gwne':

—Neda' bena' mandadw gosechogue' yen Juanna', perw čnoxen' chon da' güen ca dan' chesoe' bene' diža'?

Na' gwldiljwlaže' nacle gone' cont le'ede' Jesúsén'.

*Bguagw Jesúsén' gayo' mil bene'*

*(Mt. 14:13-21; Mr. 6:30-44; Jn. 6:1-14)*

<sup>10</sup> Na' cate' besyežin postlw ca' gan' zoa Jesúsén' nach gose'e le' can' ba gosonen'. Na' gwčhi'e legacze' na' ja'aque' to latje gan' mbane yež Bet-saida. <sup>11</sup> Cate' gosache'e bene' ca' nita' gan' zoa Jesúsén' ba gosa'aque' len bene' ca' zjanaque' le' txen, nach zja'aque' zjana'ogüe' legaque'. Jesúsén' blebe' legaque' na' bsd blo'ede' legaque' Diosen' nabi'e yichjlaždao' bene' yosozenag che', na' beyone' bene' ca' chesacšene.

<sup>12</sup> Cate' gwzolao gwxa gwbižen', nach bene' šižinw ca' zjanaque' Jesúsén' txen gose'ene':

—Besela' bene' quinga cont šjaya'aque' ga že' bene' do ranšw na' do yež ca' dan' nyechj mbi'i cont yeseyljue' ga yesetase' na' yeseyljue' da' yese'ej yesagüe', le ca nac latje gan' zoacho nga, naquen to latje daš.

<sup>13</sup> Perw na' gož Jesúsén' legaque':

—Le'e le güe'e da' yesagüe'.

Na' gose'e le':

—Gayo'ga yetextil na' yęchopga bel ya'a de čhecho, lete še si'chon cont gaquen yesagw yogo'lol bene' quinga.

<sup>14</sup> Gosene' ca' le že' ca gayo' mil bene' byo, bi cuent no'ol ca' len bidao'. Nach Jesúsén' gože' bene' ca' zjanaque' le' txen:

—Le gon mandadw yesebe' šiyon güej bene' ca'.

<sup>15</sup> Nach gosone' mandadw gosebe' yogo' bene' ca', <sup>16</sup> na' Jesúsén' gwxi'e gayo' yetextilen' na' čhope bel ya'ana', na' gwne'e yabale, be'e yeļa' choxclen che Diosen' na' bzoxjen' na' be'en bene' šižinw ca' cont goso'e che to to bene' ca'. <sup>17</sup> Na' gosagüen' ca' goseljde'. Nach bososše'e šižinw žome len yetextil bixjw na' len late' güeje bel da' bega'an.

*Pedron' gwne' Jesúsén' naque' bene' gwsela' Dios*

*(Mt. 16:13-19; Mr. 8:27-29)*

<sup>18</sup> Na' gozac yeto, bene' ca' zjanaque' Jesúsén' txen zjanite' len le' lchojiže, na' Jesúsén' chol güiže' Diosen'. Nach gože' legaque':

—čBi chesena bene'? čNon' naca' neda'?

<sup>19</sup> Na' gose'e le':

—Bale' chesene' naco' da' Juan ben' bzoe' bene' nis. Na' yebale' chesene' naco' Elías ben' be' xtiža' Diosen' cani'. Na' yebale' chesene' naco' yeto bene' be' xtiža' Diosen' cani' ben' ba beban ladjo bene' guat ca'.

<sup>20</sup> Nach gože' legaque':

—čChixe le'e? čNo žale naca'?

Na' gož Pedron' le':

—Len' naco' Cristo ben' gwlej Diosen' cont yedenabi'o.

*Jesúsen' gwdixjue'ede' gate'*

*(Mt. 16:20-28; Mr. 8:30-9:1)*

21 Nach Jesúsen' gože' legaque' nono yese'e naque' ben' gwlej Diosen' cont yedenabi'e. 22 Na' gože' legaque':

—Da' zan da' saca'zi'a, neda' naca' ben' gwsela' Dios golja' benach. Na' bene' gole blao ca' chesenabia' naciön chechon' na' b'xoz gwnabia' ca', na' bene' ca' chososed chosolo'e ley dan' bzoj da' Moisés, bi yesele'ede' neda' güen dan' bi gosejle'e chia', na' yesote'nda', perw yeyon ža yebana' ladjo bene' guat ca'.

23 Nach gože' yogo' bene' ca' zjanaque' le' txen:

—Note'tez bene' še chaclaže' gaque' neda' txen, cheyala' cuejyichj cuine' yogo' ža, la'czla' saca'zi'e, na' gone' can' nia' neda'. 24 Note'tez bene' chacde' gone' cont bi saca'zi'e o cont nono yesot le', benan' cuiayil'. Na' note'teze bene' chzanlaže' cuine' saca'zi'e o gate' ne' chia' neda', ba de yela' mban che' toli tocanē. 25 ¿Bixe zejenna' to bene' nabi'e doxen yežlion' še cuiaye'e na' bi gata' yela' mban che' toli tocanē? 26 Na' note'tez bene' še cheto'ede' par ye'e lježe' chejnlaže' neda' na' še cheto'ede' par gwzenague' xtižan', lecca ca' neda' yeto'eda' che' par nia' naque' neda' txen, neda' naca' ben' gwsela' Diosen' golja' benach. Yeto'eda' che' cate' yida' da' yoble nsa'a yela' zaca' juisyw chia' na' yela' zaca' juisyw che Xa' Diosen' na' che ben' zjanac angl che'. 27 Da' li žia' le'e, balle nita'le nga na'a biña' gatle cate' žin ža le'ele gwlo'e Diosen' yela' gwnabia' chen'.

*Jesúsen' goque' ca to be'ni'*

*(Mt. 17:1-8; Mr. 9:2-8)*

28 Nag goc to xman gwna Jesúsen' ca', gwyeje' to lo ya'a jel güiže' Diosen' na' gwče'e Pedro len Juan len Jacobo. 29 Na' šlac choj güiže' Diosen' goc cho'alagüen' ca da' bža'. Na' xalanen' beyaquen šiš xila' na' goctiten. 30 Na' lo hora' besežin chop bene' gan' zoa Jesúsen', toe' da' Moisés na' yetoe' da' Elías bosošaljlene' le'. 31 Goso'e diža' gosene' ba zoa gat Jesús'a Jerusalén. Na' be'ni' che Diosen' gwyechjen bsenin' legaque'. 32 Na' Pedron' len bene' ca' yehope leca gosac ša tase' perw bi gosetase' na' besele'ede' Jesúsen' chactit cho'alagüen' na' zeche' choelene' da' Moisésen' len da' Elíasen' diža'. 33 Na' cate' ba cheza' da' Moisésen' len da' Elíasen', Pedroa' gože' Jesúsen':

—iMaestrw, leca güenna' zoacho nga! Gonto' šone ranšw, to chio', to che Moisés, na' yeto che Elías.

Con gwne' ca' sin ca bene' xbab. 34 Ne' choe'te Pedron' diža' cate' to bejw gwyechjen legaque' na' besežebe' lagüe dan' goc ca'. 35 Na' lo' bejon' gosende' gwne' Diosen', gwne':

—Benga Xi'ina' ben chacda'. Le gwzenag che'.

36 Na' cate' beyož gwna Diosen' ca', besele'ede' yetoze Jesúsen'. Na' ca' beyoža' bibi diža' gosoe'lene' bene' ca' yezica'chle can' nac dan' ba gosende' na' dan' ba besele'ede'. Con gosenita'teze' šižize.

*Beyon Jesúsen' to bi' gwyo'o gwyaz da' xigüe'*

*(Mt. 17:14-21; Mr. 9:14-29)*

37 Na' beteyo cate' ba besyeyetje' ya'ana' bene' zan jasešague' legaque' gan' nite'na'. 38 Na' toe' gwne' žižje, gože' Jesúsen':

—Maestrw, chata'yoeda' le' gaclenšco' xi'ina' nga. Nacbe' xi'ina' tliša'. 39 Chniz da' xigüen' lebe' na' la' chgosya'aten lebe', chonen cont chazbe' šon



na' cont chzia bžina' cho'abe' na' chonen lebe' zi', na' cañe chsanen lebe'.  
 40 Ba gota'yoeda' beñe' ca' zjanaque' le' txen cont yesyebeje' da' xigüen'  
 yo'o nyazbe', perw bitw gosezaque'de'.

41 Nach Jesúsen' gože' beñe' ca' že' na':

—¡Le'e beñe' bi chejnilaže', chonchguale clele! ¿Šna chyažjen soalena'  
 le'e cont šejnilaže'le? ¿Batca' zelao ña'lagua' le'e?

Nach gože' xa bidao'na':

—Beñ bidao' chion' nile.

42 Na' šlac zjasane'be' lao Jesúsen', da' xigüen' benen cont gwyazbe'  
 šon, na' bchix btoleñ lebe' lo yo. Na' Jesúsen' gwdile' da' xigüen' cont  
 bechojen lo' yichjlažda'obe'. Nach beyaquebe'. Gwdena' beyoñe'be' lo na'  
 xabe'. 43 Na' yogo' ben' že'na' besyebande' cate' besele'ede' yela' guac che  
 Diosen'.

*Da' yoble Jesúsen' gwdixjue'ede' gate'*

*(Mt. 17:22-23; Mr. 9:30-32)*

Na' besyebande' che yogo'lo' dan' chon Jesúsen', na' šlac nite' ca',  
 Jesúsen' gože' beñe' ca' zjanaque' le' txen:

44 —Le gon cont diža' nga šo'on yichjlažda'ole, na' bi ganlaže'len. Neda'  
 gaca' lo na' ben' chesegue'enda', neda' naca' ben' gwseļa' Diosen' golja'  
 benach.

45 Perw legaque' bitw gosejni'ide' diža' dan' be' Jesúsen', le naquen ca  
 to da' ngaše' len legaque'. Na' besežebe' yesenabde'ne' bi zejen dan' gože'  
 legaquen'.

*Gosacyože' noe' nacch blao*

*(Mt. 18:1-5; Mr. 9:33-37)*

46 Na' beñe' ca' zjanaque' Jesúsen' txen gosacyože' noe' nacch blao.  
 47 Jesúsen' gočbe'ede' xbab dan' chesonen', na' beñe' to bidao' na'  
 bzeche'be' cuite'na' 48 na' gože' legaque':

—Note'teze beñe' chone' güen len to bidao' ca' bi' nga neche' da' chejni-  
 laže' neda', choncze' güen len neda'. Na' note'teze chon güen len neda'  
 choncze' güen len Dios ben' gwseļa' neda'. Na' note'tez le'e cate' chonle  
 xbab che cuinle bibi zaca'tecle, canan' ba nacle beñe' blao.

*Bene' bi chon contr chio' txenczen' chone' len chio'*

*(Mr. 9:38-40)*

49 Nach Juanna' gože'ne':

—Maestrw, bežagto' to beñe' cho'e lao' na' chebeje' da' xigüe' da' yo'o  
 nyaz beñe'. Na' bžonto' gone' ca', le bi chone' chio' txen.

50 Nach Jesúsen' gože'ne':

—Bitw gwžonle gone' ca', le še to beñe' bi chone' contr chio', txenczen'  
 chone' len chio'.

*Jesúsen' gwdile' Jacobo len Juan*

51 Na' lagüe' ba zoa bagwze yezi' yeca'a Diosen' le', bechoglaže' šeje'  
 Jerusalén. 52 Na' gwseļa' to chope beñe' gosebialao lagüe'na'. Na' ja'aque'  
 to yež gan' mbane distritw Samaria cont šjasesini'e gan' soa Jesúsen'  
 len beñe' ca' zjanaque' le' txen. 53 Perw beñe' Samaria ca' bi bosolebe'  
 Jesúsen' len beñe' ca' nžague', le gosache'ede' zja'aque' Jerusalén. 54 Na'  
 chope beñe' ca' zjanaque' Jesúsen' txen, Jacobon' len Juanna', cate' be-  
 sele'ede' can' goson beñe' Samaria ca', nach gosnabde' Jesúsen':

—Maestrw, *¿che'ndo' gonto' can' ben da' Elías ben' be' xtiža' Diosen' cani', nabeto' Diosen' sele' yi' gwzeyen bene' qui?*

<sup>55</sup> Nach Jesúsen' gwye<sup>h</sup>je' gwdile' lega<sup>h</sup>que' gwne':

—Le'e bitw *nezele non' chnabia' yichjlažda'ole.* <sup>56</sup> Neda' bitw za'a cont gwžia<sup>h</sup>ya'a be<sup>h</sup>nach, san za'a cont gwnež<sup>h</sup>jua'ne' yela' mban toli toca<sup>h</sup>ne, neda' naca' ben' gwse<sup>h</sup>la' Diosen' golja' be<sup>h</sup>nach.

Nach ja'aque' yež yoble.

*Can' gož Jesúsen' bene' ca' gosac<sup>h</sup>laže' yesaque' le' txen*  
(Mt. 8:19-22)

<sup>57</sup> Šlac zja'aque' na', to bene' gože' le':

—Sa'l<sup>h</sup>ena' le' gate'teze šejo'.

<sup>58</sup> Nach gož Jesúsen' le':

—Nita' xišna' beza' na' lecz chesyežin xišna' be dao' ca' zjazoa xil be chaš le'e yaba, perw bibi xišna' neda' de ga yezi'laža', neda' naca' ben' gwse<sup>h</sup>la' Diosen' golja' be<sup>h</sup>nach.

<sup>59</sup> Nach Jesúsen' gože' yeto bene':

—Yo'o len neda'.

Perw bena' gože' le':

—Xana', za' got xa'. Be<sup>h</sup>šca latje zgua'tec šjaycuaša'ne'.

<sup>60</sup> Na' gož Jesúsen' le':

—Bene' ca' zjanac yichjlažda'ogüe' ca che bene' guat, lega<sup>h</sup>que' guac<sup>h</sup>ce yosocuaše' yezica'chle bene' guat. Perw le', jatixjue'e bene' Diosa' nabi'e yichjlaždao' bene' yosozenague' che'.

<sup>61</sup> Nach lecze yetoe' gože' Jesúsen':

—Sa'l<sup>h</sup>ena' le' Xana', perw zgua'tec šjayzenda' xaxna'a len diaža chia'.

<sup>62</sup> Jesúsen' gože' le':

—Bene' ba gwzolao nagüe' neda', še bi ze'e do yichj do laže', o še yo'o yichje' da' ba gwdele, bi zaque' gone' xšin Diosen'. Naque' ca to bene' ch<sup>h</sup>ne'e coscože'le šlac chgua'ane' go'n.

## 10

*Jesúsen' gwsele' gayonši bene' šjasedixjue'ede' xtiže'*

<sup>1</sup> Na' gwdechle Xancho Jesúsen' gwleje' yegayonši bene' na' bene' mandaw yesebialagüe' šja'ac chope güeje' to to yež ga za' šej le'. <sup>2</sup> Na' cate' za' yesa'aque' gože' lega<sup>h</sup>que':

—Chyažje bene' zan yeseyixjue'ede' xtiža' Diosen', perw to chopga bene' nita' yeseyixjue'eden'. Na' bene' yosozenag che Diosen' zjazaca'lebe' ca to coseš xen da' chyažje yedobe. Da'n<sup>h</sup>an' le nabe Xancho Diosen' se<sup>h</sup>la'che' bene' yesac<sup>h</sup>lene' chio' yotobcho coseš chen'. <sup>3</sup> Le šja'ac, le neda' chse<sup>h</sup>la' le'e šjatixjue'ele xtižen' len bene' ca' chesegue'ede' le'e. Zaca'leble ca xila' dao' ben' chja'ac gan' že' beco'yo. <sup>4</sup> Bitw gua'le bzod, ne mechw, ne yel, na' bi šele guaple bene' tiox bene' yežagle chanez. <sup>5</sup> Note'tez liž šo'le zgua'tec nale: “Ch<sup>h</sup>nablaže'šca' soa cuezle binlo len xbab dan' yo'o lo' yichjlažda'ole, le'e nita'le nga.” <sup>6</sup> Na' še zoa to bene' chaclaže' soa cueze' binlo len yichjlažda'ogüe'na', nach gac can' gwnablaže'le cont soa cueze' binlo; perw še nono zoa bene' chaclaže' soa cueze' binlo len yichjlažda'ogüe', bi gac dan' ba gwnablaže'len'. <sup>7</sup> Na' lo' yo'o na'teze yega'anle. Bitw tale to to yo'o. Le ye'ej le gagw bite'teze da' chesone' ye'ej gawgle. Ca to bene' güen žin cheya<sup>h</sup>la' si' laxjue', lecz ca' le'e zaca'le yesone'

da' ye'ej gagwle. <sup>8</sup> Na' cate' žinle to yež ga chesonxene' le'e, le ye'ej le gagwteze da' yesoñe' le'e. <sup>9</sup> Le yeyon bene' güe' bene' nita' yež gan' žinle, na' le' ye'e: "Ba bžin ža gwzenagle che Diosen' cont nabi'e yichjlažda'ole." <sup>10</sup> Perw na' cate' žinle to yež ga bi yosolebe' le'e, le šja'ac la cay na' le ye'e: <sup>11</sup> "Bište che laže nga da' žia ni'ato', cuibton' cont gwlo'eto' le'e malen' chonle bi chzenagle xtiža' Diosen' dan' choe'to'. Perw chyixjue'eto' le'e Diosen' chazlaže' gwzenagle che' cont nabi'e yichjlažda'olen'." <sup>12</sup> Da' mal xen goson bene' ciuda Sodoma cani', perw žia' le'e, žan' gac juisyw bene' ca' bi bosolebe' le'e ližen', yesale'chde' clcl ca bene' Sodomani'.

*Bene' ca' bi chosozenag xtiža' Jesúsen'*  
(Mt. 11:20-24)

<sup>13</sup> Nach gozna Jesúsen':

—iNyaše'chguaze gac che le'e bene' Corazín! iNyaše'chguaze gac che le'e bene' Betsaida! Bene' ca' nita' Tiro na' Sidón ba' besyetiñjde' xtoła'gaque' šaca' blo'egacda'ne' yela' guac chia' ca da' ba blo'eda' le'e. Na' bosoš'e ca gosone' šaca' bena' ca', chesazlje' to lache' gasj da' naquen zeše' na' chosože'elja cuine' no de cont yesacbe'e bene' ba boša' yichjlažda'ogüen'. <sup>14</sup> Saca'zi'chle clcl ca bene' že' Tiro na' Sidón cate' žin ža gac juisyw. <sup>15</sup> Le'e nita'le yež Capernaum chonle xbab šeca Diosen' gonchgüe' le'e yela' bala'an. Bi gone' le'e yela' bala'an san gone' le'e castigw toli tocañe dan' bi chejle'le chia'.

<sup>16</sup> Nach Jesúsen' goze'e bene' gayonši ca':

—Bene' gwzenag xtiža'len' lecze gwzenague' xtiža'na', na' bene' goncze yichjlagüe' bi gwzenague' xtiža'len', lecze bi gwzenague' chia' neda'. Na' bene' goncze yichjlagüe' bi gwzenague' xtiža'na', lecze bi gwzenague' xtiža' Diosen' ben' gwseła' neda'.

*Besyěžin bene' gayonši ca'*

<sup>17</sup> Bene' gayonši ca' cate' beyož jasedixjue'ede' xtiža' Jesúsen', besyěžine' gan' zoen' na' besyebchgüede'. Nach gose'e Jesúsen':

—Xanto', chebechgüeto' can' goquen', le da' xigüe' ca' chosozenaguen cheto' cate' chonto' mandaw yesyechojen lo' yichjlaždao' bene' choe'to' lao'.

<sup>18</sup> Na' gože' legaue':

—Ble'eda' bedao'nez gwnit yela' gwnabia' che Satanásen' dan' chnabia' da' xigüe' ca'. <sup>19</sup> Ba beña' le'e yela' guac cont gwlej gwšoşjle no bel' znia na' no bexjoni' na' cont soele Satanásen' bi gonen le'e gan. Na' bibi de da' gonen le'e zi'. <sup>20</sup> Perw bi yebele neche da' xigüen' chosozenaguen chele, san le yebe da' ba bzoj Diosen' lala le'e libr gan' nyoj la yogo'lol xi'ine' ca'.

*Bebechgüe Jesúsen'*

(Mt. 11:25-27; 13:16-17)

<sup>21</sup> Za' beyožte gwna Jesúsen' ca' nach ben Spiritw che Diosen' cont bebechgüede' na' bol' güiže' Diosen', gwne':

—Xa', le' chnabi'o bene' ca' že' yaba na' yežlion'. Na' chona' yela' choxclen chio' ba bzejni'ido' bal' bene'. Ba bzejni'ido' bene' ca' gosacbe'ede' chesyěžjde' no gwsed gwlo'e legaue'. Na' bitw bzejni'ido' bene' ca' cheson xbab zjanaque' bene' sina' na' bene' zjanejni'i. Beno' ca' Xa', le can' gwyazlažo'.

<sup>22</sup> Nach gože' bene' ca' že'na':

—Xan' ba bene' lo na' chona' cont chombia' bene' le'. Le' nombia'yañe' neda', na' neda' nombia'yaña' le'. Na' bene' ca' ba gwleja' ba zjanombi'e Xan'. Na' nono nochle zjanombia' Xa' ñe neda'.

23 Na' gwyechj Jesús'en' gwñe'e bene' ca' zjanaque' le' txen na' gože' legaue':

—Mbachgua zoale chle'ele neda' na' chle'etele da' ca' chona'. 24 Na' chnia' le'e zan bene' ca' goso'e xtiža' Diosen' cani' len bene' zan rey gosacłaže' yesele'ede' dan' chle'ele na'a, perw bitw goła' yesele'eden', na' gosacłaže' yesende' dan' chenelen', perw bitw goła' yesenden'.

*Jempl che to bene' güen, bene' Samaria*

25 Na' gwzoža' to bene' nsedchgüe' ley dan' bzoj da' Moisés, gocłaže' cueje' Jesús'en' diža' da' gwchine' contr le' na' gože'ne':

—Maestrw, ¿bi da' cheyała' gona' cont gata' yela' mban chia' toli tocanē?

26 Na' gož Jesús'en' le':

—¿Bi nyoj le'e leyna'? ¿Nac žan?

27 Na' ben' chejni'ichgüe' leyna' boži'e xtiža' Jesús'en', gože' le':

—Ley che Dios'a žan: “Cheyała' gaquecho Xancho Diosen' con ca zelao chejni'icho, do yichj do laže'cho, do fuers valor checho, na' gaque lježcho ca chaque cuincho.”

28 Nach gož Jesús'en' le':

—Da' licze can' ba gwnao'na'. Can' cheyała' gono' cont bano' toli tocanē.

29 Na' bena' gocłaže' gwlo'ede' choncze' can' ža leyna', na' gože' Jesús'en':

—¿Non' nac bene' lježa' ben' cheyała' gacda'?

30 Na' Jesús'en' gože' le':

—To bene' beza' Jerusalén par yežine' yež Jericó, jasyexen bene' gwban le'. Na' goseyine' xalane' na' gosot goseyine' le'. Nach besyeya'aque' bosocua'añe' le' cacze to bene' guat. 31 Na' to bxož che bene' Israel ca' gwdie' lo neza', na' cate' ble'ede' bena' dena', nach gwcuae' to šla'ale neza' na' con gwdeze'. 32 Lecz ca' ben to diaža che da' bene' Leví ca'. (Xi'in diaža che da' Leví yo'o lo na'gaque' chesone' mandadw lo' yodao' blao.) Bena' zeje' tnez na' cate' ble'ede' ben' dena', na' gwcuae' to šla'ale neza' na' con gwdeze'. 33 Nach to bene' Samaria ngüe'e neza' nlague' xpurrue' na' bžine' gan' de bena', perw na' le' cate' ble'ede' ben' beyaše'laže'. 34 Na' gwbigue' gan' de' na' bene' le' rmed, bšone' set len vino lao güe' che'na' na' bchejen' lache'. Na' božie' le' cože' xpurrue' na' beče'e le' ga zoa to mesón ga gwñe'e le'. 35 Na' beteyo cate' beza' bene' Samaria, gwleje' mechw da' zaca' ca chop ža žin na' bnežjuen' xan mesónna' ca laxjue', na' gože' le': “Gwña' benga na' še žan bichle da' gono' gastw na' chixjuan' cate' zeza'a.”

36 Beyož be' Jesús'en' diža' can' goc che ben' jasyexen bene' gwban ca', nach gože' bena' chsed chlo'e leyna':

—¿Nac chono' xbab? ¿No bene' ca' šone' gocde'ne' ca' bene' lježe'?

37 Nach bena' chsed chlo'e leyna' gože' Jesús'en':

—Bena' beyaše' beži'ilaže'de' bena' jasyexen gwban ca'.

Nach gož Jesús'en' le':

—Lecze ca' cheyała' gono' le', yeyaše' yeži'ilaže'do' yogo'lol bene'.

*Jesúsa' jañe'e Marta na' María*

38 Na' gosego'och'e nez na' besyežine' to yež ga zoa to no'ole lie' Marta, na' Jesús'en' gwyeye' liže'na'. 39 Na' zoa to bile' le' María. Na' Marían' gwchi'e

cuit Jesúsen' bzenague' xtiže' na'. <sup>40</sup> Perw na' Martan' belajchgüede' bsiní' le' da' yesagüe'. Na' gwyeye' lao Jesúsen' na' gože' le':

—Xana', ¿bi chacdo' median can' bcua'an bene' bilan' neda' toza' len mandadua'? Benšca mandadw gaclene' neda'.

<sup>41</sup> Xancho Jesúsen' gože' le':

—Marta, chi'chgua yichjo' mandadua' na' chacžejlažo' dan' nyanchguan. <sup>42</sup> María nga ba gwleje' da' naquech da' güen. Chi'e chzenague' chia', na' notno gwžon gone' ca', le len da' nacch da' žialao da' cheyala' gonle.

## 11

*Jesúsen' blo'ede' can' yosol güiže' Diosen'*

(Mt. 6:9-15; 7:7-11)

<sup>1</sup> Na' gwzoa Jesúsa' to latje chol güiže' Diosen'. Cate' beyož bol güiže' ne' to bene' ca' zjanaque' le' txen gože' le':

—Xanto', bzejni'i neto' nac cheyala' yol güižto' Diosen', can' bzejni'i da' Juanna' bene' ca' gosaque' txen len le'.

<sup>2</sup> Na' Jesúsen' gože' le'gaque':

—Cate' yol güižle Diosen', quinga nale:

Xato' bene' zoa yaba,  
chnabto' yogo'lol bene' yesonxene' le'.

Zelaže'to' nabi'o yichjlaždao' yogo' neto' benačh.

Gacšca can' chazlažo' yežlio nga can' chac yabana'.

<sup>3</sup> Ca nac dan' che'ej chagwto' tža tža, benšca čheto' na'a.

<sup>4</sup> Na' bezi'xenšca čheto', le lencze neto' chezi'xento' che ljež benačto' bite'tez da' chesonde' neto'.

Na' bitw go'o latje soa da' gwžigan' neto' gonto' da' mal,  
san bcuase bcue'ejšca neto' len da' mala'.

<sup>5</sup> Nach gož Jesúsen' le'gaque':

—Le gon xbab še šejle liž bene' migw čhele do chel na' ye'ln'e: "Migw chia', benšca neda' šone yetextil. <sup>6</sup> Ba bla' to bene' migw chia' bene' za' zito', na' bibi de chia' da' gua'ane' gagüe'." <sup>7</sup> Na' chixe še migw chelen' yo'e lo' yo'ote yoži'e xtiža'len': "Bitw gondo' neda' zed, le ba nyeyjw cho'a yo'o na' ba deto' chtasto' len bi' čheto' ca'. Bi gac čhasa' gona' dan' chyažjdo'."

<sup>8</sup> Chnia' le'e, la'czla' naque' migw čhele, bitw ye'nde' chase' gone' dan' chyažjele, perw še gata'yoelne' šša na' čhasšaze' gone' bite'tez da' chyažjele. <sup>9</sup> Na' chnia' le'e, še žan bi da' chyažjecho, chnabchon. Še žan to da' chaclaže'cho želecho, chyiljwchon. Še žan chaclaže'cho saljw bene' cho'a yo'o čhe', na' necho cho'a yo'on cont saljue'. Na' ca'cze cheyala' ye'le Diosen' cate' bi da' chyažjele o bi da' chaclaže'le gone'.

<sup>10</sup> Na' note'tezle še bi da' nabelene', gonczen'. Na' še bi dan' che'nele gwzejni'ide' le'e, gwzejni'iczen'. Na' note'tezle še žan chaclaže'le gac to da' gac, yol güižle Diosen' can' chon to bene' chnie' cho'a yo'o, nach Diosen' gone' cont gacczen.

<sup>11</sup> Na' le'e nacle xa bidao', še xi'inle nabebe' le'e yetextil, ¿gwnežjwlebe' to yej? Na' še nabebe' le'e yid bel gagwbe' ¿gwnežjwlebe' to be xigüe'? <sup>12</sup> Na' še nabebe' le'e to žit gagwbe' ¿gwnežjwlebe' to bexjoni'? Cabi gonle ca'. <sup>13</sup> La' nacle bene' mal, nezczele gwnežjo xi'inle to da' güen. Nacchxe güen gon Xacho Diosen' ben' zoa yaba gwnežjue' Spiritw čhen' soan lo' yichjlaždao' bene' chnab len.

*Gosene' Jesúsen' bebeje' da' xigüe' len yela' guac che Beelzebú*

*(Mt. 12:22-30; Mr. 3:19-27)*

<sup>14</sup> Gwzoa to bene' gwyo'o gwyaz da' xigüe' yichjlažda'ogüe' na' benen cont bi goc nie'. Na' Jesúsen' bebeje' da' xigüe' lo' yichjlažda'ogüe'na'. Na' cate' bechoj da' xigüen', na' goc bene'. Na' bene' ca' že'na' besyebanchgüede'. <sup>15</sup> Perw bałe' gosene':

—Beelzebú dan' chnabia' da' xigüe' ca' chaclenen le' cont chebeje' da' xigüe' zjayo'o zjanyaz yichjlaždao' bene'.

<sup>16</sup> Na' yebale' cont gosagüe' xya che' gosenabde'ne' gone' to yela' guac da' yesele'ede' le'e yaban' cont yesenezde' še da' licze Diosa' gwsele' le'. <sup>17</sup> Perw Jesúsen' goche'ede' xbab dan' gosone', na' gože' legaque':

—Ša to gobiern choje' chop šon cuen na' yeyoža' yesedile' legacze', gobiernna' bi sibi'e. Na' še bene' to lo' yo' yesechoje' chople na' yesedile' legacze', gague sša yesenite' txen. <sup>18</sup> Na' še Satanásen' dan' chnabia' da' xigüen' len da' xigüe' chen ca' yesechojen chople na' yesedilen, lecze bi sibian', san na' yeyož yedon. Le'e chnale Beelzebún' dan' chnabia' da' xigüe' ca' chaclenen neda' cont chebeja' da' xigüe' zjayo'o zjanyaz yichjlaždao' bene'. <sup>19</sup> Šaca' naquen can' žalen', lecze zejen dan' chnabia' da' xigüe' ca' chaclenen bene' lježle ca' chesybeje' da' xigüe' zjayo'o zjanyaz yichjlaždao' bene'. Bene' lježle ca' yese'e le'e clen' žale. <sup>20</sup> Neda' chebeja' da' xigüe' len yela' guac che Dios, na' dan' chona' ca' chlo'en ba bžin ža Diosen' nabi'e yichjlaždao' bene' yosozenag che'.

<sup>21</sup> Satanásen' naquen ca to bene' gual, na' neda' naccha' bene' gualch. Na' nezele cate' to bene' gual chape' ližen' len spada, bibi gac che da' de che'. <sup>22</sup> Perw cate' žin to bene' gualch ca le' na' tillene' le', nach ben' nac bene' gualch gon gan. Na' que'e spada che ben' da'na' zoe' lez gaclen le' na' ca'atie' bichle da' de che' na' chisen' len bene' migw che' ca'.

<sup>23</sup> Bene' bi chone' neda' txen, chone' contr neda'. Na' bene' bi chaclene' cont yosozenag bene' yoble chia', zeje diža' chone' par bi yosozenague' chia'.

*Da' xigüe'na' yeyo'on da' yoble lo' yichjlaždao' bene'*

*(Mt. 12:43-45)*

<sup>24</sup> Na' še to da' xigüe' da' gwyo'o gwyaz lo' yichjlaždao' bene' yechojen, nach lažen nile na'le yeyiljon ga soan mbalaz. Na' še bibi latje želen, nach nan: “Da' yoblecze šjajo'a lo' yichjlaždao' ben' gan' ba gwyo'a.” <sup>25</sup> Nach yeyejen da' yoble gan' zoa ben'. Cate' le'en bačh cheyone' güen, na' ba zoache' binlo, <sup>26</sup> nach šjaytoben yegaže da' xigüe' ca' da' zjanacch malech ca len, na' txen yeso'on lo' yichjlažda'ogüe'na'. Na' še bačh goc ca', gacch mal che bena' clal ca dan' ba goc che' da' nechw.

*Mbalaz nita' bene' ca' chosozenag xtiža' Diosen'*

<sup>27</sup> Šlac be' Jesúsen' diža' quinga, gwzoa to no'ole gachoł bene' ca' že' gan' bsd blo'ede', na' no'ola' gwne' zižje, gože'ne':

—Mbalaz zoa no'ola' gwxañ le' na' bguaže' le'.

<sup>28</sup> Perw na' Jesúsen' gože'ne':

—Nacchxe mbalaz nita' bene' ca' chosozenag xtiža' Diosen' na' chesone' can' žanna'.

*Bene' bi chosozenag che Diosen' chesenabe' gon Jesúsen' to yela' guac*

*(Mt. 12:38-42; Mr. 8:12)*

<sup>29</sup> Na' bene' zan gosebigue' gosechjde' Jesúsen', nach Jesúsen' gwne':

—Le'e zoale na'a nacchguale bene' laždao' xi'a. Chn̄able gona' yeto yeļa' guac da' le'ele cont nezele še Dios̄a' gwsele' neda', perw bi gona' ca dan' chn̄abl̄ena', le ba ble'ele da' ca' chona'. Lete gac chia' can' goc che da' Jonás ben' be' xtiža' Diosen' cani'. <sup>30</sup> Na' ca dan' goc che Jonásen' blo'en bene' Níveve ca' Diosen' gwsele' le', ca'cze dan' gac chia' gwlo'en le'e zoale na'a Diosen' gwsele' neda' golja' ben̄ach. <sup>31</sup> Cate' žin ža gon Diosen' castigw che yogo'loļ bene' cheson da' mal, da' no'olen' gwnabi'e bene' Seba ca' yedecuiše' le'e mbanle na'a. Le' gwze'e gan' nac zito'chgua na' bide' nga cont bedezenague' diža' sina' dan' be' da' rey Salomón len le', na' neda' zoa' nga naccha' bene' blaoch ca da' Salomón na' bitw chzenagle chia'. <sup>32</sup> Na' cate' žin ža gon Diosen' castigw che yogo'loļ bene' cheson da' mal, lecze žana' yesyeban bene' Nínive ca' na' yosocuiše' le'e nita'le ža na'aža. Le legaque' besyetinjde' xtoļa'gaque' cate' da' Jonásen' gwdixjue'ede'ne' can' gwna Diosen'. Na' neda' zoa' nga naccha' bene' blaoch ca da' Jonása' na' bi chzenagle chia'.

*Dan' b̄sed blo'e Jesúsen' naquen ca to yi'  
(Mt. 5:15; 6:22-23)*

<sup>33</sup> Notno gwgual̄a' to yi' na' gw̄dosen' caj, na' n̄eca gw̄cuašen' ga yoble ga nono le'e len, san ch̄de'en le'e ze'e cont gw̄senin' len yogo'loļ bene' yeso'o lo' yo'ona'. <sup>34</sup> Žia yeļaocho cont le'echo. Con še bibi chaquen chle'eczecho binlo. Perw še n̄cholcho, bi chle'echo. Ca'czen' naquen len yichjlažda'ochon'. Še naccho bene' laždao' güen, yo'o be'ni' che Diosen' lo' yichjlažda'ochon'. Perw še naccho bene' mal, chol̄ nac yichjlažda'ochon'. <sup>35</sup> Da'n̄an' le gon cont gacle bene' laždao' güen, na' šo' be'ni' che Diosen' yichjlažda'ole. <sup>36</sup> Še nyeni' yichjlažda'olen' na' bibi da' mal yo'on, gw̄seni'czen x̄nezle can' ch̄seni' to yi' ga nac chol̄.

*Jesúsen' gože' bene' fariseo ca' zjanape' dol̄a' na' len bene' ca' chososed chosolo'e ley*

*(Mt. 23:1-36; Mr. 12:38-40; Lc. 20:45-47)*

<sup>37</sup> Cate' beyož be' Jesúsen' diža' quinga, to bene' fariseo gw̄che'e le' liže' cont yesagüe'. Na' gwyo'o Jesúsen' liž bene' fariseon' na' gw̄chi'e cho'a mesen'. <sup>38</sup> Na' bene' fariseon' bebande' ble'ede' bitw bona' Jesúsen' cate' za' gagüe' can' cheson legaque' chesacde' chebe Diosen' legaque' dan' chesone' ca'. <sup>39</sup> Na' X̄ancho Jesúsen' gože' le':

—Le'e bene' fariseo nacle ca xiga' ye'en da' ch̄chin bene' na' chyibe' cožen' binlo perw bi chyibe' do lo'en. Chonle cont chesaque bene' nacle bene' güen, perw chebele chca'ale bi da' de che bene' na' nacle bene' mal juisyw. <sup>40</sup> Bicze bi chejni'ile. Chi' yichjle gacle xilaže' len cuerp chelen'. Lecz ca' cheyaļa' cue' yichjle gacle xilaže' len yichjlažda'ole, le Diosen' ben' bene' cuerp chechon' lecze bene' yichjlažda'ochon'. <sup>41</sup> Le yeyaše' bene' na' le gw̄nežjo bi da' cheseyažjde'. Še gonle ca', nacb̄ia' nacle bene' laždao' xilaže'.

<sup>42</sup> 'iNyaše'chguaze gac che le'e bene' fariseo! La'czļa' chnežjwle Diosen' to part lao ši part che yixe'güej, che yej Santa María, na' che bichle cuan chele, bibi zejen dan' bi chonle bichle da' nac da' güen, na' da' bi chaquele Diosen'. Da' nac da' žialao gonle, gonle da' nac güen na' gaquele Diosen'. Perw bi cauejyichjle gw̄nežjwle da' ca' chnežjwle Diosen'.

43 'iNyaše' chguaze gac che le'e bene' fariseo! Chzelaže'le cue'le lo' yodao' txen len bene' blao ca', na' cate' chejle do gan' chac ya'a chaclaže'le yesonxen bene' le'e.

44 'iNyaše' chguaze gac che le'e chsed chlo'ele da' bzoj da' Moisés na' len le'e bene' fariseo! Chonle cont nachbia' gan' xoa ba che bene' guaten', le ley chechon' žan zjanaquen zban na' bi cheyała' gwlejchon. Perw le'e nacle ca ba da' bi zjanacbia'. Chosozenag bene' chele na' bi chesacbe'ede' nacle bene' laždao' zban.

45 To bene' chsed chlo'e ley boži'e xtiža' Jesúsen', gože'ne':

—Maestrw, lagüe da' žo' da' quinga, chaqueton' zi'.

46 Na' gož Jesúsen' legaque':

—Lecze ca' le'e chsed chlo'ele ley da' bzoj da' Moisés, i'nyaše' chguaze gac chele! Da' žale da' zan da' cheyała' yeson bene', chonle leyna' ca to yoa' da' nocze no do'e, to yoa' da' chaclaže'le yesoa' bene' yoble, perw le'e ne late'ze bi chaclaže'le gua'len.

47-48 'iNyaše' chguaze gac che le'e chonšagüe'le cho'a ba che da' bene' ca' gosoe' xtiža' Diosen' cani'! Chacle toze len da' xoxxta'ole ca' ben' gosote' legaque'. Na' dan' chonle ca', zejen chazlaže'le dan' gosote' legaquen'.

49 'Da'n'an' Diosen' lao yela' sina' che' gwne' sele' bene' yesoe'lene' le'e xtižen' na' sele' postlw che' ca' len le'e. Na' gwne' gotle bałe' na' gwchi gwsaca'le yebałe'. 50 Na' da' li ba chonle can' gwnen'. Da'n'an' si'le castigw che yela' got che yogo' bene' ca' gosoe' xtižen' gwzolaon caten' gwmete yežlion' chžinten ža na'aža. 51 Zan bene' gosot bene' yoble legaque' gwzolaozen len da' Abel ben' beyot da' biše' Cain le', na' beyožen len da' Zacarías ben' gosote' ladjo yodao' blaona' na' ladjo mes de yej dan' zoa chy'o yodao' gan' chesote' beyixe' cont chesonxene' Diosen'. Na' le'e mbanle na'a si'le castigw che yela' got che yogo' bene' ca'.

52 'iNyaše' chguaze nac le'e chsed chlo'ele ley che Diosen'! Bitw chzejni'ile bene' leyna' to licha can' naquen, neca chzenagle chen. Na' bene' chesaclaže' yosozenaguen', neca choe'le latje yosozenaguen'.

53 Na' cate' beyož be' Jesúsen' diža' quinga, nach bene' fariseo ca' na' bene' ca' chososed chosolo'e ley gosacyožchgüe' len le'. Na' gosaclaže' yesebeje' le' diža' 54 le gosaclaže' choj dižan' cho'e da' yosode'ede' yesagüe' xya che'.

## 12

### *Yela' güexoayag che bene' fariseo*

1 Na' goc zan mil bene' besežague' gan' zoa Jesúsen', catec bene' zan besežag bosolej bosošošjte ni'a lježe'. Na' Jesúsen' zgua'tec gwzolağüe' be'e diža' len bene' ca' zjanaque' le' txen, gože' legaque':

—Le gwsaca' len levadura che bene' fariseo ca'. Dan' cheseziye'e bene' cont yesacde' zjanaque' bene' güen zaca'leben ca levadura dan' chchixede' yetextil. Bitw gonle can' chesonen'. 2 Le bitwbi de da' ngaše' da' nacho cbi gwlo'elaon, neca de da' nono na' neze da' nacho cbi yesenežden'. 3 Da'n'an' bite'teze da' gwnale багаše'ze, bene' zan yesenden'. Na' dan' ba gwnale šižize lo' yo'o chelen', yogo'ze bene' yesenežden'.

### *Non' cheyała' žebcho*

#### *(Mt. 10:28-31)*

4 'Bene' migw chia', chyixjue'eda' le'e bitw žeble bene' ca' yesot le'e, le cate' ba gotle bich bi gac yesonde' le'e. 5 San zoa ben' cheyała' žeble,



cheyala' žeble Diosen', le cate' bačh beque'e yela' mban chele, lecze nape' yela' chnabia' cont yesele' le'e gabil. Da' yoble chnia' le'e, cheyala' žeble Diosen'.

<sup>6</sup> Nezecho byin dao' ca' bibi zjazaca'techa', perw na' Diosen' ne toba' bi chanlaže'. <sup>7</sup> Na' ca nac chio', da' leca chaque Diosen' chio' neztede' bal yiša' yichj to tocho žia. Da'n'an' bitw žeble, le zaca'ch le'e clal ca yogo' byin dao' ca'.

*Cheyala' ye'cho bene' nombia'czcho Jesucriston'*

(Mt. 10:32-33; 12:32; 10:19-20)

<sup>8</sup> Na' chnia' le'e, note'tez bene' še cho'e diža' len benachen' che'ene' chejle'e chia', lecze ca' neda' gua'a diža' len angl che Diosen' bene' že' yaba yapegaca'ne' bena' naque' neda' txen, neda' naca' ben' gwsela' Diosen' golja' benačh. <sup>9</sup> Na' note'teze bene' še cho'e diža' len benachen' che'ene' bitw chejle'e chia', lecze ca' neda' gua'a diža' len angl che Diosen' bene' že' yaba yapegaca'ne' bena' bitw naque neda' txen.

<sup>10</sup> Na' note'teze bene' še ne' yela' ya' chia' neda' naca' ben' gwsela' Diosen' golja' benačh, Diosen' yezi'xene' che' še yetinje'. Perw note'teze bene' še ne' yela' ya' che Spiritw che Diosen', gwbat yezi'xen Diosen' che'.

<sup>11</sup> Na' cate' yeseche'exoxje' le'e lao bene' gwnabia' che yodaon' o lao justis o še lao nochle bene' gwnabia', bi cuec yichjle nac yoži'ile xtiža'gaquen' o še nacle nale. <sup>12</sup> Lo hor na'teze gwzejni'i Spiritw che Diosen' le'e bin' cheyala' nalen'.

*Bitw cheyala' cuec yichjcho tlaoze bi da' de checho*

<sup>13</sup> To bene' bchoje' ladjo bene' zan juisyw ben' zjanžag na', na' gože' Jesúsen':

—Maestrw, gonšco' mandadw cont bene' bišan' gone' neda' bien che da' xaxna'to' da' cheyala' si'a.

<sup>14</sup> Na' Jesúsen' gože' le':

—Bitw naca' neda' juez chele. Bi cheyala' gua' neda' laze da' de chele.

<sup>15</sup> Nach gože' yogo'lol bene' ca' že'na':

—Le gwsaca' cont bi selaže'le bi da' gata' chele yežlio nga, la' de bi de checho o la' bibi de checho bi da' chyažj chchinecho, gague da' can' nac yela' mban checho.

<sup>16</sup> Na' be'lene' legaque' to jempl, gwne':

—To bene' gwni'a gocchgua coseš che', <sup>17</sup> na' bene' xbab lo' yichjlažda'ogüe' gwne': “¿Nacxe gona'? Bich bi latje de ga gwže'šagua' coseš chian'.” <sup>18</sup> Nach gozne': “Quinga gona', yochinja' yo'o gan' že' coseš chia' quinga na' gona' yo'o xench. Na' gwže'šagua' cosešen' na' bichle da' de chia'. <sup>19</sup> Na' lagüe ba de da' yažjda' da' zan iz, bich gona' žin. Ye'ej gagwteza' con da' chaclaža' na' gona' legr.” <sup>20</sup> Perw Diosen' gože' bena': “Chono' xbab da' bibi zaca'. Na'aže' bžin hor gato', na' žnola lo na' gac yogo' da' de chio'?” <sup>21</sup> Can' gac che note'tez bene' še con chbec yichje' tlaoze da' de che' šlac mbane' na' bi chone' da' chazlaže' Dios.

*Diosen' chapši'e xi'ine' ca'*

(Mt. 6:25-34)

<sup>22</sup> Na' gož Jesúsen' bene' ca' zjanaque' le' txen:

—Da'n'an' žia' le'e, bi gacžejlaže'le bi da' gagwle šlac mbanle, na' lecz ca' bi gacžejlaže'le che xalana'le. <sup>23</sup> Zaca'ch yela' mban chelen' ca yela' guagw. Lecze ca' cuerp chelen', zaca'chen ca xalana'le. <sup>24</sup> Le gon xbab che bechj

ca', bitw chesazba', bitw chesyelapba', neca zoa da'a xoa' c̄hegacba', neca zoa ga ncu'a' no goš c̄hegacba' ga že' da' yesagwba', perw na' Diosen' chguagwcze'ba'. ¡Nacchle zaca' le'e ca be ca' zjažia xil! <sup>25</sup> Na' ne tole bi gac yoston cuinle gašje metr še con cue' yichjle tonle. <sup>26</sup> Nezele bitw gac yoston cuinle, na' neca naquen da' zaca'. Da'n'an' bi gacžejlaže'le che bica'chle da' chyažjele.

<sup>27</sup> Le gon xbab ca nac yej ca' da' zjaze yixe'. Chesecha'oczen, bibi žin chesonen, neca chesaljen do. Na' chnia' le'e, da' rey Salomón gocue' lache' güen juisyw, perw bitw bžinlaže' xalane'na' ca yela' xdan che yej ca'. <sup>28</sup> Diosen' none' xdan da' ca' ze yixen' la'czla' to chop žaze nitan' na' chosozeyen'. ¡Nacchxe gon Diosen' len le'e gwleccze yichje' gone' yogo' da' chyažjele, le'e late' lasze chejle'le che'! <sup>29</sup> Da'n'an' bitw güe'laže'le cont gata' da' ye'ej da' gagwle. Bitw gacžejlaže'le chen. <sup>30</sup> Bene' ca' bi chesonxene' Diosen' con chesoe'laže' che bi da' gata' yese'ej yesagüe' na' che xalana'gaque'. Perw Xacho Diosen' nezczede' bi da' ca' chyažjele. <sup>31</sup> Cheyala' güe'laže'le gwzenagle che Diosen' cont nabi'e yichjlažda'olen', na' yogo' da' ca' chyažjele, goncze Diosen' len.

*Da' zaca'ch gata' checho yežincho yaba*

*(Mt. 6:19-21)*

<sup>32</sup> Bitw žeble la'czla' nac to chople. Diosen' chbede' chnabi'e yichjlaždao' le'e chzenagle che' na' chaclene' le'e. <sup>33</sup> Le yeyote' da' de chele cont gata' da' gwnežjwle bene' ca' cheseyažje. Še gonle ca', Diosen' gone' le'e da' zaca'ch na' da' cbi te chen cate' yežinle yaba gan' zoe'na'. Na' bitw gac šo' bene' gwban que'en, na' neca gac šo' be dao' gwžiai' len. <sup>34</sup> Gan' de dan' chaquele nan' zoa yichjlažda'olen'.

*Cheyala' soa cuezcho batcan' yide Criston' yeto*

<sup>35-36</sup> Le soa le cuezze batcan' yida' yeto. Le soa can' nita' bene' chesape' liž xangaquen' šlac zeje' to yela' güešagna'. Zjanyaz xalana'gaque' na' chala' yi'. Nach cate' yežine' na' nie' cho'a yo'on, na' la' yesesaljwte' cont yeyo'e. <sup>37</sup> Mba gac che bene' ca' chesebeze' batcan' yežin xangaquen'. Še nite' chesebeze' le' caten' yežinen', nach gwsini'e da' yesagüe' na' cuine' gwnežjue' legaque' dan' yese'ej yesagüe'. <sup>38</sup> Mba gac c̄hegaque' še chesebeze' batcan' yežine' la'czla' yežine' do chel o do šbal. <sup>39</sup> Le gon xbab che da' nga. Šaca' neze xan yo'on baten' žin bene' gwban liže'na', le gwna'ze' cont bi güe'e latje šo' bena' liže'na' cuane' xšinlazen'. <sup>40</sup> Le soa le cuezze batcan' yida' da' yoble, le cate' bi chonle xbab yida', canan' yida', neda' naca' bena' gwseła' Diosen' golja' benach.

*Mos ben' chon güen, na' mos ben' bi chon güen*

*(Mt. 24:45-51)*

<sup>41</sup> Pedroa' gože' Jesús'en':

—Xanto', ¿cho'o jempl nga par neto'ze o še par yogo'lol benach?

<sup>42</sup> Nach gož Xanchon' Pedroa':

—Naquen par note'tez bene' še chone' can' chon mos blao ben' chejni'i, ben' chon ca' cheyala' gone'. Ben' chon ca', co' xane' lo ne'e ližen' cont ne'e mos ca' yezica'chle. Na' gone' da' yesagw to toe' cate' žin hor yesagüe'. <sup>43</sup> Še to bene' mos chonteze' can' ben xanen' mandadw gone', mba soe' cate' yežin xanen'. <sup>44</sup> Da' li chnia' le'e, xanen' cue'e lo na' mosen' yogo'lol da' de che'. <sup>45</sup> Perw na' še mosen' gone' xbab na' ne': “Ba gwže xanan'”, na'

solagüe' got chine' mosa' yezica'chle na' ye'ej gagw̄xate' na' sožde', <sup>46</sup> nach x̄ane'na' yežine' to ža senyale' le' cate' bi gacbe'ede'. Na' da' bi chon mosen' can' cheyała' gone', x̄ane'na' got chinchgüe' le' na' gone' cont si'e castigw̄ txen len yezica'chle bene' bi cheson can' cheyała' yesone'.

<sup>47</sup> Na' mos ben' nac bene' güedenag, la'czla' ba nezde' can' che'ne x̄anen' gone', bi chone' ca'. Bi zoe' chbeze' batcan' yežin x̄anen', na' da'nan' x̄anen' got chinchgüe'ne'. <sup>48</sup> Na' bene' bi nezde' bin' non x̄anen' mandadw̄ gone' na' da'nan' chone' da' zaca' chine' le', na' x̄anen' bi chinteque' le' zi'. Note'teze bene' zjanye'chgua xbab, chesego'o bene' lo na'gaque' da' zan da' yesone', na' chonen byen yesone' yogo' da' ca' zjayo'o lo na'gaque' yesone'.

*Yesedił bene' neche da' bid Jesúsen'*

*(Mt. 10:34-36)*

<sup>49</sup> Nach gw̄na Jesúsen':

—Dan' zedeyena' yežlio nga naquen ca to yi' da' cuec bene'. Na' yebeda' šaca' ba chi' yi'na'. <sup>50</sup> Za'a cont saca'zi'a na' gata'. Na' chžaglagua' šlac chbeza' žin ža yeyož gaquen. <sup>51</sup> ¿Chonle xbab bene' že' yežlio yesezoa yesebeze' binlo len lježgaque' na'a dan' ba bidan'? Chnia' le'e, bi yesezoa yesebeze' binlo len lježgaque' na'a ba bida', san yesediłe' na' yosošaše'. <sup>52</sup> Quinga solao gac na'a, še žan nita' gayo' bene' to lo' yo'o, yesedił legacze', čhope' contr šone' na' šone' contr čhope'. <sup>53</sup> Yesedił bene' byo len xi'ine' na' xi'ine' len le'. Na' yesedił no'olen' len xi'ine' no'ole, na' xi'ine' no'olen' len le'. Na' yesedił no'olen' len xo'oliže' na' xo'oliže' len le'.

*Bitw gosacbe'ede' bi zeje da' ca' chon Diosen'*

*(Mt. 16:1-4; Mr. 8:11-13)*

<sup>54</sup> Nach lecze gož Jesúsen' bene' ca' nita' na':

—Cate' chle'ele chi' bejw gan' chxoa gwbiža' na' žale: “Gac yejw”, na' chac ca'. <sup>55</sup> Na' cate' chečhj be' da' za' ži'le na' žale: “Guac zeye”, na' chac zeye'. <sup>56</sup> Bene' gwxiye' le'e. Cate' chle'ele nac chac le'e yaban' na' lo yežlion' nezele še gac yejw o še gac zeye'. ¿Bixchen' bi chache'ele bi zejen da' ca' chon Diosen' tiemp nga zoacho na'a?

*Cheyała' goncho cont yezoacho binlo len bene' che'e chio' lao justis*

*(Mt. 5:25-26)*

<sup>57</sup> ¿Bixchen' bi chonle xbab cont nezele can' cheyała' gonle? <sup>58</sup> Cate' to bene' gonle xya che' na' che'e le'e lao justis, šlac ngo'ole nezen' le yeyiljwlaže' nac gonle yezoale binlo len le' cont bi che'e le'e lao justisen'. Še bitw gonle ca', cate' žinle lao justisen' nach gone' le'e lo na' bene' ca' yososeyjue' le'e ližya. <sup>59</sup> Chnia' le'e bitw yebeje' le'e še biña' čhixjwle doxen da' chala'le.

## 13

*Cuiayi'cho še bitw yetinjecho xtoła'chon'*

<sup>1</sup> Na' len bene' ca' že'na' gwnita' bał bene' gosoe'lene' Jesúsen' diža', gose'ene' Pilaton' gwsele' soldadw̄ che' ca' jasetue' to xonj bene' Galilea ca' na' bchixde' xchengaquen' len che beyixe' ca' ba gosote' cont yesonxene' Diosen'. <sup>2</sup> Nach goži'i Jesúsen' xtiza'gaquen' gože' legaque':

—¿Chonle xbaba' gosac čhegaque' ca' lagüe dan' gasonche' da' malech clal ca' bene' Galilea ca' yezica'chle? <sup>3</sup> Chnia' le'e, bi naquen ca'. Še bitw yetinjele xtoła'le ca', lecze gwžin ža cate' cuiayi'le. <sup>4</sup> Nezele che bene'

šino'šone ca', šlac zjanite' yež Siloé gwbiḡe to campanaryw na' gwdenen legaque' na' gosate'. ¿Lecze chonle xbab goc ca' dan' zjanacche' bene' mal clel ca' bene' ca' zjaže' Jerusalén? <sup>5</sup> Chnia' le'e, gague can'. Še le'e bi yetinjele xtoła'le, lecze gwžin ža cate' cuiayi'le.

*Jempl che yag yixgüigw da' bibi chbia*

<sup>6</sup> Na' be'lene' legaque' jempl nga, bzejni'ide'ne' cheyala' yesyetingde' xtoła'gaque', na' gože' legaque':

—To bene' zoa to yag yixgüigw che' gan' že' yag uvas che' ca'. Na' gwyeje' lo' yaguen' jaḡe'e še de toga yixgüigw gagüe', perw bitw bi bželde'. <sup>7</sup> Na' gože' ben' chape' yag che' ca': “Ba chac šon iz chedena'a yag nga še chbian yixgüigw, perw bitw bi chbian. Gwchoguen, lažjw con zoaḡ nlanen, na' neca bi chbian.” <sup>8</sup> Na' gož ben' le': “Xana', jayenna', za' zoašazen yetgüiz, che'ena' xanenna' na' cuecan' yo beb. <sup>9</sup> Na' še cuian yixgüigw do yetgüiz, bitec da' güen, perw še bicze bi cuian, nach chogchon.”

*Jesúsen' beyone' to no'ole ža che Dios*

<sup>10</sup> Na' to ža che Dios bsed blo'e Jesúsen' bene' že' to lo' yodao'. <sup>11</sup> Na' zoa to no'ole bene' ba goc šino'šone iz yo'o nyaz da' xigüen' yichjlažda'ogüe'na'. Na' ben da' xigüen' cont bdoḡe cuerp che'na', na' gague gocch se' to liča. <sup>12</sup> Na' cate' ble'e Jesúsen' le', goxe'ne' na' gože'ne':

—No'ole, na'a yeyacdo' yizgüe' chio' nga.

<sup>13</sup> Na' gwḡoa ne'e cuerp che no'ola', na' la' bezete' to liča. Na' no'ola' benxene' Diosen'. <sup>14</sup> Perw na' bene' gwnabia' che yodao'na' bloque' da' beyon Jesúsen' no'ole güen' ža che Dios. Na' gože' bene' ca' nita' lo' yodaon':

—De xop ža cont gonle žin. Le da lo ža ca' cont yeyone' yizgüe' chelen' perw bitw yidle ža che Dios cont yeyacle.

<sup>15</sup> Nach Xancho Jesúsen' gože'ne':

—Bene' gwxiye' le' len bene' lježo'. ¿Gague lo ža che Dios bia'cze chsežle goḡ chele o burr chele ga zjada'ba' chjasanlba' güe'ej nis? <sup>16</sup> No'ole nga naque' xi'in diaža che da' Abraham, na' Satanásen' dan' chnabia' da' xigüe' ca' benen cont ba bdoḡe cuerp chen' šino'šone iz. Da'nan' nacczen liča ba beyona'ne' ža che Dios.

<sup>17</sup> Cate' gwne' ca', bene' ca' chesegue'e le' gosacde' zto', perw yogo'lol bene' ca' yezica'chle nita'na' besyebanchgüede' len yogo' dan' ben Jesúsen', le leca güen zjanac dan' benen'.

*Yela' gwnabia' che Diosen' naquen ca' bin che xomdas*

(Mt. 13:31-32; Mr. 4:30-32)

<sup>18</sup> Nach gwna Jesúsen':

—Na'a gwlo'eda' le'e cont nezele šanch bene' yosozenag che Diosen' cont nabi'e yichjlažda'ogaque'. <sup>19</sup> Da'nan' yela' gwnabia' che Diosen' naquen ca' bin che xomdas. To bene' gozen' na' cate' blan' gwcha'on goquen yag cha'o na' be ca' zjazoa xil goson ližgacba' lo zoze' yaga'.

*Yela' gwnabia' che Diosen' naquen ca' levadura*

(Mt. 13:33)

<sup>20</sup> Nach da' yoble gozne':

—Na'a nia' le'e yelate' nac nac yela' gwnabia' che Diosen'. <sup>21</sup> Naquen ca' levadura dan' gwlec no'olen' len to rob yezj cont gwcha'o doxenen.

*Cheyala' chiljwlaže'cho nac goncho cont soacho binlo len Diosen'*

(Mt. 7:13-14, 21-23)

<sup>22</sup> Na' gwda Jesúsen' bsd blo'ede' beñe' ca' že' ciuda ca' na' yež ca' gan' bedie' cont bežine' Jerusalénna'. <sup>23</sup> Na' to beñe' gože' Jesúsen':

—Xanto', ¿con to chopze beñe' šjasyenite' len Diosen'?

Nach Jesúsen' gože' legaque':

<sup>24</sup> —Chnia' le'e, beñe' zan chese'nde' yeseñite' binlo len Diosen', perw gwžin ža cate' bich gac yesone' cont yeseñite' binlo len le'. Da' nac žialao gonle, čiljwlaže'le nac gonle cont soale binlo len Diosen' <sup>25</sup> cont bi gone' len le'e ca ben to xan yo'o cate' bžin hor gwseyjuen'. Gwžože'e bseyjue', na' gwdechle besežin beñe' bososiže' le'e puert che'na' na' bich gwsaljue' cont yeso'e. Na' gose'ene': "Gwsaljwšca cont šo'to'." Na' gože' legaque': "Bitw nombi'a le'e, neca nezda' ga za'acle." <sup>26</sup> Can' gac che balle. Nach solaole ye'ln'e': "Güe'ej gwdagwto' len le' na' bsd blo'edo' neto' la cay lažto'." <sup>27</sup> Perw na' da' yoble ye'e le'e: "Bitw nezda' ga beñe' le'e. Le šjaya'ac yogo' le'e beñe' güen da' mal." Can' ye'e le'e. <sup>28</sup> Na' le'ele Abraham na' Isaac na' Jacob na' yogo'lo' beñe' ca' gosoe' xtiža' Diosen' cani' nite' yaba gan' zoa Diosen' chnabi'e. Na' le'e bitw gac šo'lena'. Nach cuežyaše'le na' gagwxejte layle dan' leca žaglaole cate' gacbe'ele bich gac šo'le. <sup>29</sup> Beñe' zan beñe' za'ac doxen yežlio yesyežine' yaba gan' zoa Diosen' chnabi'e na' yesebi'e cho'a mes yesagüe'. <sup>30</sup> Nita' beñe' zjanaque' beñe' bzebe na'a perw gwžin ža cate' yesaque' beñe' žialao. Na' nita' beñe' zjanaque' beñe' žialao na'a, perw gwžin ža cate' yesaque' beñe' bzebe.

*Begüine' Jesúsen' neče xto'la' beñe' Jerusalén ca'*

*(Mt. 23:37-39)*

<sup>31</sup> Lo ža na'teze bal beñe' fariseo ca' besežine' gan' zoa Jesúsen' gose'ene': —Cheya'la' yoxonjo' nga gan' chnabia' rey Herodes, le chaclaže' gote' le'.

<sup>32</sup> Jesúsen' gože' legaque':

—Herodesen' naque' ca to beza' yela' gwxiye' chen'. Le šja'ac na' ye'ln'e' yeto čhope žazen' soa' yebejcha' da' xigüe' ca' zjajo'o zjanyaz yichjlaždao' beñe' na' yeyoncha' beñe' chesacšene. Ba zoa yeyož gona' dan' cheya'la' gonan'. <sup>33</sup> Perw ca nac dan' chona' na'a gonchczan' gwxe güižj. Gague ngan' chesote' beñe' ca' chesoe' xtiža' Diosen', san Jerusalén chesote' beñe' ca'.

<sup>34</sup> Le'e beñe' Jerusalén, chotle beñe' ca' chesoe' xtiža' Diosen' na' ca nac nochle beñe' ca' chsel'a' Diosen' len le'e, chčhellene' yej. Zan ni'a goclaža' yotoba' le'e ca to jed xcaca' be nche' xi'in na' chyežba' legacba', perw bitw goclaže'le. <sup>35</sup> Na' na'a ba gwlejyichj Diosen' le'e. Na' chnia' le'e, bich le'ele neda' na'a. Cate'ch žin žana' nale: "Mbalaz ben' za' nga nsel'a' Xancho Diosen' le' cont nabi'e", cana'ch le'ele neda' da' yoble.

## 14

*Jesúsen' beyone' to beñe' de yi*

<sup>1</sup> Na' to ža che Dios Jesúsen' gwyeje' jatagüe' liž to beñe' fariseo ben' nac beñe' blao. Na' yezica'chle beñe' fariseo ca' chosogüia chesene'e bixen' goncze' cont gata' da' yosode'ede' yesagüe' xya che'. <sup>2</sup> Na' lagüe'na' zecha to beñe' chacšene, de cuerp chen' yi. <sup>3</sup> Na' gož Jesúsen' beñe' fariseo ca' na' beñe' ca' chososed chosolo'e ley dan' bzoj da' Moisés:

—¿De šsens len ley chechon' yeyoncho to beñe' güe' ža che Dios o še bitw bi šsens de?

<sup>4</sup> Perw notno boži'i xtiže'na'. Nach Jesúsen' bexue' na' bena' na' beyone' le', na' gože'ne':

—Guac yeyejo'.

<sup>5</sup> Nach gož Jesúsen' bene' ca' že' liž bene' fariseon':

—Le'e še zoa to burr o to go'n chele na' lažo'ba' to lo' yechw sitjw, ¿cabi la' yebejteleba' la'saze nac ža che Dios?

<sup>6</sup> Na' nono goc yoži'i xtiža' Jesúsen'.

*Bene' ca' gosaxe' gan' chac güešagna'*

<sup>7</sup> Na' ble'e Jesúsen' can' cheson bene' ca' gosaxe' liž bene' fariseon', gosebeje' gan' zjachi' bene' blao ca' cont gosebi'ena'. Na' Jesúsen' be'e to jempl, gože' legaque':

<sup>8</sup>—Cate' to bene' gaxe' le'e gan' chac güešagna', bitw cue'le gan' cheyala' cue' bene' blao ca', le še cue'le na', guacte yid bene' nacch bene' blao <sup>9</sup> na' xan yo'ona' ye'e le'e: “Le soža' cont cue' benga.” Nach do chaquele zto' soža'le cue'le ga yoble len bene' bitec bi zjazaca'. <sup>10</sup> Na' cate' gan' gaxe' le'e cue'le len bene' bitec bi zjazaca', na' cate' yid xan yo'ona' na' ye'e to tole: “Bene' migw chia', da cui'o len bene' blao ca'.” Nach gacxenle lao bene' ca' zjachi' len le'e cho'a mesen'. <sup>11</sup> Le note'teze bene' chonxen cuine', Diosen' gone' cont si'e zto' lagüen'. Na' note'teze bene' chzexjwlaže' lagüen', Diosen' gone' cont gacxene'.

<sup>12</sup> Na' ľecze gož Jesúsen' ben' goxe' le' ližen':

—Cate' gono' to ľni na' gaxo' bene' yesagüe' len le', bitw gaxo' bene' biše' ľježo', bene' migw chio' o bene' zjanaque' bene' gwñi'a. Legaque' ľecze yesaxe' le' ližgaquen', na' yesyegüe'e gwzon lagüe dan' ba goxgaco'ne' ližo'na'. <sup>13</sup> Cate' gono' to ľni gox bene' yaše' na' bene' nchog no ľni'a na'gaque', bene' nxinj ni'e, na' bene' ľchol. <sup>14</sup> Še gaxo' legaque', Diosen' gone' so' mbalaz, le bene' ca' bi gac yesyegüe'e gwzon chio'. So' mbalaz cate' Diosen' yosbane' le' ladjo bene' guat ca' txen len yezica'chle ben' ja'ac to ľicha cate' gosebane'.

*Jempl che to bene' ben ľni xen*

<sup>15</sup> Na' to bene' chi' cho'a mesen' txen len Jesúsen' bende' xtiže'na' na' gože'ne':

—Mbalaz soacho gagwcho lo ľni da' gac caten' ba chnabia' ben' seľa' Diosen'.

<sup>16</sup> Nach Jesúsen' gwne':

—To bene' bene' to ľni xen, na' goxe' bene' zan šja'ac ližen' cont yesagüe'. <sup>17</sup> Na' cate' bžin hor yesagüe', na' xan yo'ona' gwsele' xmosen' cont šjatobe' legaque' yesagüe'. Na' cate' jane'e to toe', gože' legaque': “Le šo'o, ba bsini'e dan' gagwchon’.” <sup>18</sup> Na' yogo'ľole' gose'e ben' bi zjazoe' latje šja'aque' gan' chone' ľnin'. Bene' nechon' gwne': “Za' gwxia' to yežlio, na' cheyala' šjana'an. Na' ye'šco' xanon' bitw gac yida'.” <sup>19</sup> Na' yetoe' gwne': “Za' gwxia' gayo' cue' go'n na' na'a šjengaca'ba' prueba. Ye'šco' xanon' si'xene' chia', bitw gac yida'.” <sup>20</sup> Na' yetoe' gože'ne': “Za' bšagna'. Da'nan' bitw gac yida'.” <sup>21</sup> Na' mosen' beyeje' na' jayeže' xanen' can' gose' bene' ca' ľe'. Nach xan yo'ona' ben' chon ľnin' bže'e. Nach gože' xmosen': “Gwey jata to to cay na' to to nez lo ciudad', na' gwtobo' bene' yaše' na' bene' nchog ni'a na'gaque' na' bene' nxinj ni'e, na' bene' ľchol cont yeside' yesagüe'.” <sup>22</sup> Gwde bene' ca' nach gože' ľe': “Xana', ba jatoba' bene' ca' ba gwnaon', na' ne' dechcze latje par bene' yoble.” <sup>23</sup> Nach xane'na' gože' ľe': “Bchoj lo' ciudad' na' gono' byen yesid ben' nita' chanez. Na' šjaxi'o bene' ca' zjaže' yixe'. Gono' byen yeside' liža' nga yesagüe' cont yežan' bich bi latje šo'.

24 Na' ca nac bene' ca' goxa' da' nechw, bich gua' latje yesagw legaque' dan' ba bsiñi'ana'."

*Dan' cheyala' goncho cont gaccho txen len Jesucriston'*

25 Na' bene' zan juisyw zjana'ogüe' Jesúsén', na' gwyechje' gože' legaque':

26 —Note'teze bene' še chaclaže' šejnilaže' neda' na' gwzenague' chia', še bi gacchde' neda' clél ca xaxne'e, no'ol che', xi'ine', biše', zane', na' lente cuine', bi gac gone' neda' txen. 27 Na' note'teze bene' bi chzanlaže' cuine' saca'zi'e o gate' ne chia' neda', lecze bitw gac gone' neda' txen. 28 Še tole che'nele gonle to campanaryw, zgua'tec cue'le na' gonle xbab gwsaca'le ca do gaca' da' chyažjele cont gonlen, še gaque xmechwle cont yeyož campanaryon'. 29 Še bi gwchix gwtolē xbab chelna' gaca'te' dan' chyažjele, cate' ba gwlecle lenenna' na' gache'ele bich bi mechw de cont yeyožen, na' yogo' bene' yesele'ede' lenenna' yesezi'diže' le'e, 30 yesene': "Benga gwzolao chone' to campanaryw perw bitw beyož xšinen'." 31 Na' še to rey chone' xbab tilē' len yeto rey, lecze zgua'tec gwsaque' še gwzoede' len ši mil soldadw che' gone' gan yeto rey bene' nche' galje mil soldadw. 32 Na' še chache'ede' bi gone' gan, šlac ne' zoa ben' yeto, zito', se'le' ben' šjasedie' xtižen' lao rey ben' yeto yesenabe' yesyenite' binlo. 33 Ca' naquen len le'e, note'tezle še bi cuejyichjele yogo'lol bi da' de chele, bitw gac gonle neda' txen.

*Cate' zeden' bich naquen zxi'*

*(Mt. 5:13; Mr. 9:50)*

34 'Zeden' naquen güen, perw na' še bich naquen zxi', ¿nacxe goncho cont yeyaquen zxi' da' yoble? 35 Bibi zacan', neca gaclenen yežlio, neca gaquen par beb, lete cho'onchon. Le'e žia nagle da' chene, le gwzenag xtiža'na'.

## 15

*Jempl che xila' ben' gocžeje*

*(Mt. 18:10-14)*

1 Na' bene' güechixjw ca' na' yebale bene' güen da' xinj, yogüe' gosebigue' gan' zoa Jesúsén' cont gosende' xtiže'na'. 2 Na' bene' fariseo ca' na' bene' ca' chososed chosolo'e ley dan' bzoj da' Moisés gosezi'diže' le', gosene':

—Benga chlebe' bene' güen da' xinj ca' na' chagwlene' legaque'.

3 Nach Jesúsén' be'e to jempl, gože' legaque':

4 —Še nita' to gayoa xila' chele na' gacžeje toba', ¿bi yocua'anle be ca' taplalj togalj gan' že'ba' latje daša' na' šjaydiljwle ben' ba gocžejena' cont yeželba'? 5 Na' cate' yeželban' yebechgüele na' yexoalba' ya'axichjele yeyoa'lba'. 6 Na' cate' yežin ližle, gwtoble bene' migw chele na' bene' gualiz chele na' ye'ine': "Le yebe len neda'. Ba bežel xila' chia' ben' gocžeje." 7 Chnia' le'e, gwbeche Diosen' txen len angl che' ca' cate' to bene' chon da' mal yetinjde' xtolē' clél ca yesyebede' che taplalj togalj bene' zjanaque' bene' güen bene' bitw de xtola'gaque' da' yesyetinjde'.

*Jempl che mechw dan' gwnit*

8 Na' le'e no'ole še de ši mechw plata chele na' še nit ton, la' gwguala'tele to yi' na' gwloale lo' yo'o chele na' yeyiljwyožlen cont yeželen. 9 Na' cate' yeželen'na', na' yotoble no'ole migw chele ca' na' bene' gualiz chele na' ye'le legaque': "Le yebe len neda', le ba beželda' mechw chia' dan' gwnit."

<sup>10</sup> Chnia' le'e lecze chesybe chesyzaque' angl che Diosen' bene' zoa yaba cate' to bene' chon da' xinj chetinjde' xtole'na'.

*Jempl che ben' benditje xi'inen' xmechue'*

<sup>11</sup> Na' lecze gože' legaque':

—Gwzoa to bene' na' gwnita' chop xi'ine' bene' byo. <sup>12</sup> Na' bžin ža bene' xcuiden' gože' xen': "Xa', ben neda' dan' cheyalā' sia' da' de chio'." Nach xen' bnežjue' dan' cheyalā' si'en. <sup>13</sup> Goc to chop ža nach bene' xcuiden' btobe' yogo'lol bi da' de che' na' gwze'e gwyeje' nación zito' na' zlez da' bi zaca' jene'. Na' benditjde' xmechue'na' zejlene' da' malen'. <sup>14</sup> Na' cate' beya xmechuen', goc to gwbin juisyw doxen naciónna', na' bich bi gota' xmechue' cont si'e da' ye'ej gagüe'. <sup>15</sup> Da'nān' gwyeje' gan' zoa to bene' naciónna' gwñabe' žin, na' bena' gwsele' le' yixe' ga že' be zan xcoše' na' jayoe'ba'. <sup>16</sup> Na' catec gwdone' goclaže' gagüe' dan' chosonežjue' chesagw coš ca', perw ne len ca bosonežjue' le' gagüe'. <sup>17</sup> Na' beyone' to xbab šagüe', gwne': "Nita' mos zan che xan' na' dechgua da' chesagüe', na' neda' gatda' yela' chdon. <sup>18</sup> Yeza' nga na' yeya'a gan' zoa xa' na' yapa'ne' bena' da' mal lao Diosen' na' lao le', <sup>19</sup> na' bich zaca' gone' neda' cuent ca xi'ine', con še gone' latje gaca' ca to xnose'." <sup>20</sup> Nach beze'e beyeje' gan' zoa xen'. Na' zito'le za' yežine' cate' ble'e xen' le' na' beyaše'de' le' na' gwza'sese' jašague'ne'. Na' gwdele'ne' bnope'ne'. <sup>21</sup> Nach gož xi'ine'na' le': "Xa', ba bena' da' mal lao Diosen' na' laguo' le'. Bich zaca' gono' neda' cuent ca xi'ino'." <sup>22</sup> Na' xe'na' gože' xnose' ca': "Le šjälēj tgot lache' šagüe', le guacwben', na' le šjaxi' to niy na' le co'on xbembe', na' le šjaxi' šcue' yel na' gwdelen ni'abe'. <sup>23</sup> Na' le šjaxi' go'n dao' ben' chane' na' le gotba' cont gagwchoba', le goncho lni. <sup>24</sup> Xi'ina' nga ba bena'be' cuent ca to bi' guat, perw ne' zoabe' mbambe' na'a. Gwlejičhbe' chio', perw na'a ba bela'be'." Na' gosezolaogüe' chesone' lni.

<sup>25</sup> Na' xi'ine' bene' nechon' zeje' yixe' cate' bežin xi'inen' yeto ben' benditje xmechuen', na' cate' zeza' ben' gwyej yixen', ba zoa yežine' liž xen' cate' bende' chosocueže' na' chosoye'e. <sup>26</sup> Na' goxe' to mosen' na' gwñabde' le' bixchen' chesone' lni. <sup>27</sup> Na' mosen' gože'ne': "Bi' bišo'na' ba bela' na' xaon' ba betue' go'n daon' ben' chane'chgua da' bela'be' to šagüe' to güen." <sup>28</sup> Nach xi'ine' nechua' bže'e na' bi goclaže' yeyo'e liž xen'. Na' bchoj xen' na' gota'yoede' le' yeyo'e yo'o. <sup>29</sup> Perw xi'ine' bene' nechua' gože' xen': "Zan iz ba chac zoa' nga chonteza' žin con can' žo' le', na' biña' gaca' bene' güedenag. Na' ne to šib dao' cana' goño' neda' cont gota'ba' gona' lni len bene' migw chia' ca'. <sup>30</sup> Na' na'a ba bela' xi'ino' nga benditjbe' yogo'lol da' bnežjo'be' gwdalembe' no'ole zle', na' beto' par lebe' go'n dao' ben' chane'." <sup>31</sup> Na' xe'na' gože'ne': "Xi'indagua', le' zoatezo' len neda', na' yogo'lol da' de naquen chio'. <sup>32</sup> Perw cheyalā' goncho lni nga na'a da' chbehgüecho ba bela' bi' bišon', le ba bena'be' cuent ca to bi' guat, perw na'a zoabe' mbambe'; gwlejičhbe' chio', perw ba bela'be'."

## 16

*Jempl che to mos blao ben' benditjde' da' de che xane'*

<sup>1</sup> Nach gož Jesúsen' bene' ca' zjanaque' le' txen:

—Gwzoa to bene' gwñi'a na' gwzoa to mos blao che' ben' gwyo'o lo ne'e yogo'lol da' de che'. Na' bene' gwñi'ana' bende' rson xnose' blaon' ba benditjde' bi da' de che'. <sup>2</sup> Na' xanen' goxe' le' na' gože'ne': "Ba benda'



diža' can' chonon'. Cheyała' yodio' cuent yogo'loł da' ba benditjedo' chia'. Bich gac gono' xšinan' na'a." <sup>3</sup> Nach mosen' bene' xbaben': "¿Bixe gona' na'a? Xanan' ba cholague' neda'. Bich gac gona' xšinen', na' neca gac goncha' žin gual, na' gacda' zto' še naba' carida. <sup>4</sup> Nezda' bi gona' cont nita' bene' yesene'e neda' cate' bich chona' žin che xanan'." <sup>5</sup> Nach goxe' yogo'loł bene' ca' chesala' xmechw xane'na' tgüej tgüejje' na' gože' bene' nechw: "¿Gaca' chaló' che xana'?" <sup>6</sup> Na' bena' gože'ne': "Chala' che tap mil litrw set." Nach gož mos blaona' le': "Bedao'nez gwche'edo' na' bzoj lo cuenten' bzoan chaló' che chop mil litrwze seten'." <sup>7</sup> Gwde na' gože' bene' gwchopen': "¿Gacan' chaló' che xanan'?" Nach bena' gože'ne': "Chala' che to mil rob trigw." Nach mosen' gože' bena': "Gwche'edo' na' bzoj lo cuent chio'na' bzoan chaló' che xono' gayoa robze trigon'." <sup>8</sup> Na' xan mos gwxiyen' gocbe'ede' xmosen' leca nye'e xbab da' beyiljwlaže' nacle gone' soe' binlo len lježe' bene' ca' chesala' che xanen'. Le bene' ca' zjachi' yichje' to zleze dan' chac lo yežlion' chesonchgüe' xbab nacle yesone' len dan' zjade chegaque', perw zan bene' ba zjajo'o be'ni' che Diosen' lo' yichjlažda'ogaque' bitw chesone' xbab naclen' yosočhine' dan' de chegaque'.

<sup>9</sup> Na' chnia' le'e, dan' de chele yežlio nga da' te čen', perw le gwčhinen cont nita' migw chele. Na' cate' ba beya bi dan' de chele yežlio nga, nach nita' bene' yosolebe' le'e cate' yežinle yaba gan' soale toli tocañe.

<sup>10</sup> Še to bene' chone' can' cheyała' gone' len da' bibi zaca'tec, lecz ca' gone' len da' zaca'chgua. Na' bene' bi chone' can' cheyała' gone' len da' bibi zaca'tec, lecz bitw gone' can' cheyała' gone' len da' zaca'chgua. <sup>11</sup> Še le'e bi chonle can' cheyała' gonle len dan' de chele yežlio nga da' te čen', bitw gon Diosen' le'e da' zaca'ch da' bi te che. <sup>12</sup> Dan' de chele yežlio nga, che Diosen' gague chelen'. Na' še bitw chonle can' cheyała' gonle len da' nac che', bitw gone' le'e da' zaca'ch da' bi te čen'.

<sup>13</sup> Nono mos gac gone' žin len chop xane' to ši'ize, le še gone' ca', gue'ede' to xan žinna' na' gacde' yetoe'; o gone' žin che toe' do yichj do laže' na' che ben' yeto gonen' do chža'alaže'ze'. Lecze ca' le'e, bitw gac gonle xšin Diosen' do yichj do laže'le na' gonte xšinle cont gacle bene' gwñi'a.

<sup>14</sup> Na' lecze nita' bene' fariseo ca' chesende' xtiža' Jesúsen', na' gosezi'diže' le', le gosaclaže' yesaque' bene' gwñi'a. <sup>15</sup> Na' gož Jesúsen' legaque':

—Le'e chonle cont beñachen' chesacde' chdaczle licha, perw Diosen' neze nle'ede' yichjlažda'ole, na' Diosen' chgue'ede' bal da' chesaque beñachen' zjanaquen da' žialao xen.

*Ley che Diosen' na' bene' ca' chnabia' Diosen' yichjlažda'ogaque'*

<sup>16</sup> Na' gozna' Jesúsen':

—Gwzolaon cani'te bžinten cate' bla' Juanna' bedetixjue'ede' xtiža' Diosen', ley dan' bzoj da' Moisés len dan' bosozoj yezica'chle bene' gosoe' xtiža' Diosen' bzejni'in chio' che Diosen'. Na' na'a gwzolaon len Juanna', ne' nita'cze bene' cheseyixjue'ede' Diosen' nabi'e yichjlaždao' bene' yosoznague' che'. Na' bene' zan cheseyiljue' nacle yesone' cont nabia' Diosen' yichjlažda'ogaque'.

<sup>17</sup> La'czla' še yežlion' len da' ca' zjažia le'e yaban' yesede chegaquen, ca nac Xtiža' Diosen' dan' nyojen, ne late' daon' cbi te čen'.

*Bi cheyala' yela'acho len no'ol chechon' cont soalencho no'ole yoble*  
(Mt. 19:1-12; Mr. 10:1-12)

<sup>18</sup> 'Note'teze bene' chele'e len no'ol che' na' cheque'e no'ole yoble chone' da' xinj, tozce ca naquen šaca' gata'lene' no'ol che bene' yoble. Na' note'teze bene' yošagna'lene' to no'ole bene' bela'a len bene' che', lecze tozce ca da' xinj gone' len dan' chon bene' chata'lene' no'ol che bene' yoble.

*Bene' gwni'a na' Lázaro*

<sup>19</sup> Nach gozna' Jesúsen':

—Gwzoa to bene' gwni'a na' xdanchgua goc xalane'na', na' leca gwdagwšagüe' yogo' ža. <sup>20</sup> Na' to bene' yaše' le' Lázaro, yogo' ža jasedixjue' le' cho'a puert zaguan che bene' gwni'ana' cont gwnabe' yosonežjue'ne' con gaca' da' chesezande'. Na' Lázaron' leca gwžia yežo' doxen cuerp chen'. <sup>21</sup> Na' catec gwdone' goclaže' gagüe' bla'a dao' yela' guagw da' beselažo' cho'a mes che bene' gwni'an'. Na' beco' ca' ja'acba' jasele'eba' yežo' dan' gwžia cuerp che'na'. <sup>22</sup> Na' got bene' proben' nach angl bene' že' gan' zoa Diosen' besyezi' besyeque'e le' yaban' gan' zoe' na'a len da' xoxxta'ocho Abraham. Na' lecze got bene' gwni'ana' na' bosocuaše'ne' <sup>23</sup> na' beyeje' lo yi' gabil. Na' šlac chžaglagüe' na' gwliš lagüen' na' ble'ede' zito'le nita' da' Abraham len Lázaron' yabana'. <sup>24</sup> Nach bene' gwni'an' gwne' zižje gwne': “Xa' Abraham, beyaše'laže'šca neda' na' gwseła' Lázaron' cont yosbise' loža' nga len late' nis da' gwlapa' xbene'na', le leca chžaglagua' lo yi' nga.” <sup>25</sup> Perw na' Abrahanna' gože' le': “Xi'ina', bosalaže' cate' gwban'o' yežlio zleze da' šagüe' da' güen gota' chio', na' Lázaro nga to zleze da' mal goc che'. Na' ba zoe' mbalaz nga na'a na' le' chžaglaguo'. <sup>26</sup> Bi gac gona' can' chaclažon', le Diosen' bačh nze' to bdiñj xen ga nono gac te, cont nono gac sa' nga šeje' gan' zon', neca nono gac sa' gan' zon' na' yide' nga.” <sup>27</sup> Nach bene' gwni'ana' gože' Abrahanna': “Bene' gol dao', chata'yoeda' le' gwseła'šca Lázaron' liž xan'. <sup>28</sup> Nita' gayo' bene' biša' na' che'nda' šjatixjue'ede' legaque' nac yesone' cont Diosen' bi yesele' legaque' latje nga gan' yesežaglagüe'.” <sup>29</sup> Na' Abrahanna' gože' le': “Decze dan' bzoj da' Moisésen' na' dan' bosozoj yezica'chle bene' ca' goso'e xtiža' Diosen' cani'. Cheyala' yosozenague' che da' ca' zjanyojen.” <sup>30</sup> Na' gože' Abrahanna': “Bitw, bene' gol dao'. Še to bene' yebane' ladjo bene' guat na' güe'lene' legaque' diža', nach yesyetinjde' xtoła'gaquen'.” <sup>31</sup> Nach gož Abrahanna' le': “Še bitw chosozenague' che dan' bzoj da' Moisésen' na' dan' bosozoj yezica'chle bene' ca' goso'e xtiža' Diosen', la'czla' še yeban to bene' ladjo bene' guat ca', bi yesejle'cze' che Diosen'.”

## 17

*Bitw cheyala' goncho cont gon bene' da' xinj*  
(Mt. 18:6-7, 21-22; Mr. 9:42)

<sup>1</sup> Na' gož Jesúsen' bene' ca' zjanaque' le' txen:

—Decze da' gonen cont lažo' bene' yesone' da' xinj, perw nyaše'chguaze gac che bene' chone' cont bene' yoble yesone' da' xinj. <sup>2</sup> Yejni'a šaca' yosocheje' yene' to yiše na' šjasezale' le' lo' nisdao' clel ca soe' gone' cont to bene' za' gwzologüe' chejnilaže' neda' lažoe' gone' da' xinj. <sup>3</sup> Da'nan' le' gwsaca' cont bi gonle ga lažo' bene' gone' da' xinj.

'Na' še to bene' lježle gonde' le'e mal, le tile' na' še gwš'e' xbab na' ne' bich gone' ca', le yezi'xen che'. <sup>4</sup>La'czla' gaž ni'a lao tža gone' da' mal contr bene' lježen', še gaž ni'ate ne': "Ba betinjda' che dan' benan', bezi'xen chia'", na' cheyala' yezi'xene' che'.

*Gosaclaže' yesejle'che' che Diosen'*

<sup>5</sup>Na' gose' postlw ca' Xancho Jesúsen':

—Gaclenšco' neto' cont šejle'chto' che Diosen'.

<sup>6</sup>Nach gož Xanchon' legaue':

—Xsa yag xomdas naquen da' dao' riz, na' la'czla' dan' chejnilaže'le Diosen' naquen ca' to xsa xomdas lagüe dan' bi chejnilaže'teclne', še šejnilaže'lné', guaque ye'le yag nga: "Gwcuase nga na' jayzoa lo' nisdaon'", na' guacze can' nalna'.

*Dan' cheyala' yeson mos ca'*

<sup>7</sup>'Le'e še mos chelen' chgua'ane' go'ñ, o še chyo'e' xila', cate' chele'e güeyeban' bitw che'lné': "Beyo'o ngale, gwche'edo' gaguo' xše'." <sup>8</sup>San che'lné': "Bsi'ni'a da' ye'ej gagua' na' gonon'. Te yedaguan' nach gago'." <sup>9</sup>Na' bitw cho'elne' yela' choxcen cate' ba bene' dan' gožlene'. <sup>10</sup>Na' lec ca' le'e, cate' ba benle yogo'lol dan' ža Diosen' gonle, cheyala' nale: "Bitw zaca'to' no gon yela' choxcen cheto' ca' dan' ba bento', le bento' con da' cheyala'cze gonton'."

*Jesúsen' beyone' ši bene' chese'ede' yizgüe' da' nzi' lepra*

<sup>11</sup>Na' zej Jesúsen' Jerusalenna' len bene' ca' zjanaque' le' txen na' gwdie' gan' ndil' distritw Samaria len distritw Galilean'. <sup>12</sup>Na' besežine' to cho'a yež dao' na' besechoj ši bene' chese'e yizgüe' da' nzi' lepra jasešague' Jesúsen'. Na' gosezie' zito' <sup>13</sup>na' gosené' zižje gosene':

—Maestrw Jesús, beyaše'laže' neto'.

<sup>14</sup>Na' Jesúsen' cate' ble'ede' legaue' na' gože'ne':

—Le šjaya'ac lao bxo'z ca' cont yesene'e le'e še ba beyacle.

Na' goquen' lo' neza' besyeyacde'. <sup>15</sup>Nach toe' cate' gocbe'ede' bach beyaque', na' bebi'e na' gwñie' zižje benxene' Diosen', <sup>16</sup>na' bzoa xibe' lao Jesúsen' bi'e le' yela' choxcen. Ben' ben ca' naque' to bene' Samaria. <sup>17</sup>Nach gwna Jesúsen':

—Beyona' ši bene'. ¿Ganxe bene' ca' yega? <sup>18</sup>¿Toz bene' zito' nga bebi'e chonxene' Diosen'?

<sup>19</sup>Nach gož Jesúsen' bena':

—Bezoža' beyej to šagüe' to güen. Ba beyacdo' da' chejnilažo' neda'.

*Yela' chnabia' che Diosen'*

(Mt. 24:23-28, 36-41)

<sup>20</sup>Na' bene' fariseo ca' gosenabde' le' batxen' yid ben' sela' Diosen' nabi'e nación Israelen'. Nach boži'i Jesúsen' xtiža'gaquen' gwne':

—Ca' nac yela' gwnabia' che Diosen', bi naquen da' le'echo. <sup>21</sup>Nono cheyala' güe' diža' ne': "Gwna' nga chnabi'e", o "Gwna' na' chnabi'e." Le ba zoe' len le'e na'a chnabi'e.

<sup>22</sup>Nach gože' bene' ca' zjanaque' le' txen:

—Gwžin ža cate' nale: "Šaca' na'a ba chnabia' ben' gwseła' Diosen'", perw bitw gac can' nablaze'len'. <sup>23</sup>Yesenita' bene' yesi'e le'e: "Gwna'šc nga zoa ben' gwseła' Diosen'", o "Gwna'šc na' zoa ben' gwseła' Diosen'." Perw bitw ga'ole ben' yesi'e le'e ca'. <sup>24</sup>Can' chac cate' chep yes, chseñin'

doxen le'e yaban' zejzenez, lecze can' gac cate' žin ža yida' da' yoble, neda' naca' ben' gwsela' Diosen' golja' benach. Yida' zejzenez na' yogo'lol bene' yesele'ede' neda'. <sup>25</sup> Zgua'tec de da' zan da' cheyala' saca'zi'a na' bene' ca' ze' na'a bitw yesejle'e chia'. <sup>26</sup> Lecz ca' goc ca' tiemp che da' Noé, lecze ca' gac cate' ba zoa žin ža yida' da' yoble, neda' naca' ben' gwsela' Diosen' golja' benach. <sup>27</sup> Bene' gwnita' ca' tiemp che da' Noén' gosaše' gose'ej gosagüe' goso'elaže' bosošagne'e na' bosošague' na' no xi'in che' cate' bžin ža gwyo'o Noén' lo' barcon'. Nach goc to yejwsio' juisyw. Na' gosebiayi' yogo' bene' ca' bi goso'o lo' barcon'. <sup>28</sup> Lecz ca' goc ca' tiemp che da' Lot, bene' Sodomán' gose'ej gosagüe' gosote' bi da' de chegaque', na' gosezi'e bi da' beseyazjde', na' gosaz gosa'ane', na' goson liže'. <sup>29</sup> Perw na' žan' beza' Loten' Sodomán', Diosen' bene' cont byinj yi' na' azufre yaba na' gosebiayi' yogo'lolé'. <sup>30</sup> Can' gac cate' yida' da' yoble, neda' naca' ben' gwsela' Diosen' golja' benach, na' yogo'lol bene' yesele'ede' neda'.

<sup>31</sup> Na' ža caten' yida' še chda to bene' do yichjo'o che liže', na' xšinlaze' žen' lo' yo'o che', bi yeyetje' cont yotoben', con yoxonje'. Na' lecze ca' bene' chda do yixe', bitw gacde' yeyej liže'. <sup>32</sup> Le šjayza'laže' can' goc che no'ol che Loten'. <sup>33</sup> Note'tez bene' chacde' gone' cont cbi saca'zie' o cont nono yesot le', bena' cuiayi'. Na' note'tez bene' chzanlaže' cuine' saca'zie' o gate' ne chia' neda', ba de yela' mban che' toli tocané.

<sup>34</sup> Chnia' le'e, quinga gac caten' yida' da' yoble. Chope bene' zjadie' chesetase' toz cam. Toe' yeca'a Diosen' na' yetoe' yega'an. <sup>35</sup> Na' chop no'ole nite' txen chesote', toe' yeca'a Diosen' na' yetoe' yega'an. <sup>36</sup> Na' chope bene' nite' do yixe', toe' yeca'a Diosen' na' lecze yega'an yetoe'.

<sup>37</sup> Cate' gosende' diža' nga gose'e le':

—¿Gan' gac da' qui, Xanto'?

Nach Jesúsen' gože' legaque':

—Nga chonen che ben' že': "Gan' de be guat nan' chesežag šod ca'."

## 18

### *Jempl che to no'ol güezeb len to juez mal*

<sup>1</sup> Na' be'len Jesúsen' legaque' to jempl bsd blo'ede' legaque' cheyala' nita'teze' yesonchachlaže' yosol güiže' Diosen'. <sup>2</sup> Na' gože' legaque':

—Gwche' to ciuda ga gwzoa to juez na' juezen' bi gwdape' Diosen' bala'an na' neca gwche'yichje' še chesazlaže' benachen' can' chonen'. <sup>3</sup> Na' ciudan' gwzoa to no'ol güezeb, na' goxje cheje' lao juezen' na' che'e le': "Ben yela' justis chia' len bene' chgue'ede' neda'." <sup>4</sup> Ba goc sša bi chzenague' che', perw gwdechle bene' xbab, gwne': "Bitw chapa' Diosen' bala'an na' neca chi'yichja' še chesazlaže' benachen' can' chonan'. <sup>5</sup> Perw na' no'ol güezeb nga chone' neda' zed, na' na'a gaclena'ne' cont bich yide' yostoe' yela' chxenlaže' chia'."

<sup>6</sup> Nach gož Xanchon' legaque':

—Le gon xbab che dan' gwna juezen' ben' bi zej to licha. <sup>7</sup> Nacchxe gon Diosen' gwzenagche' che bene' ca' ba gwleje' cont zjanaque' xi'ine', bene' ca' chosol güiže' le' do ža do yel. ¿Gwleze' sša cont yosle' legaque' lo na' bene' ca' chesegue'ede' legaque'? <sup>8</sup> Chnia' le'e, Diosen' bedao'nez yosle' legaque' lo na' bene' ca'. Perw cate' neda' yida' yežlio nga yeto, neda' naca' ben' gwsela' Diosen' golja' benach, čne' nita'ch bene' chesejnlaže' neda'?

### *Jempl che to bene' fariseo len to bene' güechixjw*

<sup>9</sup> Gwnita' bał bene' gosacde' zjanaque' bene' güen lao Diosen' neche da' chesone'. Bene' ca' chesacde' bene' ca' yezica'chle bibi zjazaque' len Diosen'. Na' Jesúsen' bi'e jempl nga da' bcuißen bene' ca', gwne':

<sup>10</sup>—Chope bene' ja'ac yodao' blao jasel güiže' Diosen', toe' bene' fariseo na' yeton' bene' güechixjw. <sup>11</sup> Bene' fariseon' gwzeze' boł güiže' Diosen' na' con chonxen cuine', gwne': “Dios, neda' chona' yela' choxclen chio' bitw chona' cana' cheson yezica'chle bene'. Bitw chca'a bi da' de che bene' yoble, na' bitw chona' bichle da' mal. Bitw chata'lena' no'ol bi nac no'ol chia', na' neca naca' bene' mal can' nac bene' güechixjw ni. <sup>12</sup> Chope ni'a to xman chona' gwbas, na' yogo'loł da' chona' gan, chbecan' ši cuen na' chnežjua' to cuen che yodao'.” <sup>13</sup> Na' bene' güechixjon' gwzeteze' zito'le, neca cheyaxjde' lis lagüe' yabale. Nach chbaže' lcho'e gwne': “Dios, beyaše'laže' neda' naca' bene' güen da' xinj.” Da'na'z da' gwna bene' güechixjon'. <sup>14</sup> Na' chnia' le'e, Diosen' bezi'xene' che bene' güechixjon' na' beyej liže' bibi xtole' gota'. Perw bi goc ca' len bene' fariseon'. Le note'tez bene' chonxen cuine', Diosa' gone' cont si'e zto', na' note'tez bene' chxexjwlaže' lagüen', Diosen' gone' cont gaxene'.

*Jasesane' bidao' lao Jesúsen'*

(Mt. 19:13-15; Mr. 10:13-16)

<sup>15</sup> Na' jasesane' bidao' lao Jesúsen' cont xoa ne'e yichjgacbe'. Na' cate' bene' ca' zjanaque' le' txen besele'ede' can' chesonen', gosedile' legaque'. <sup>16</sup> Perw na' Jesúsen' goxe' bene' ca' cont yeside' len bidao' chegaquen', na' gože' bene' ca' zjanaque' le' txen:

—Le güe' latje yesid bidao' ca' lagua' nga, bi gwžonle, le bene' ca' zjanac ca' bidao' quinga, legaque' chosozenague' che Diosen' cont chnabi'e yichjlažda'ogüe'. <sup>17</sup> Na' da' li žia' le'e, note'teze bene' bi yosozenague' che Diosen' ca' cheson bidao' quinga cate' chosozenagbe' che xaxna'be', gwbat nabia' Diosen' yichjlažda'ogaque'.

*To bene' gwni'a be'lene' Jesúsen' diža'*

(Mt. 19:16-30; Mr. 10:17-31)

<sup>18</sup> To bene' gwnabia' gože' Jesúsen':

—Maestrw, le' naco' bene' güen. ¿Bi cheyala' gona' cont gata' yela' mban chia' toli tocañe?

<sup>19</sup> Nach Jesúsen' gože'ne':

—¿Bixchen' žo' naca' bene' güen? Toz bene' güen zoa, na' len' Dios. <sup>20</sup> Le' nezdo' da' none' mandadw goncho: “Bi gata'lenle no'ol bi nac no'ol chele o bene' byo bene' bi nac bene' chele. Nono gotle. Bi cuanle. Bi güe'le diža' güenlaže' che bene' lježle. Le gap bala'an xaxna'le.”

<sup>21</sup> Na' gož ben' le':

—Yogo'loł da' quinga gwzolagua' chonczan' cate' ne' nactia' bidao'.

<sup>22</sup> Nach cate' bene' Jesúsen' xtižen' na' gože'ne':

—Zoa to da' ne' chyažjen gono', jayete' yogo' da' de chio', na' mechw dan' le'edo' chen, bnežjon bene' yaše'. Yeyoža' šejnilažo' neda' na' yo'o gaco' neda' txen. Nach še gono' ca', cate' yežino' yaba gan' zoa Diosen' da' zaca'ch gata' chio'.

<sup>23</sup> Perw na' bena' cate' beyož bende' diža' dan' gož Jesúsen' le', gocyāše'chgüede', le' bene' gwni'achgua goque'. <sup>24</sup> Na' Jesúsen' gwne'e bene' gwni'ana' na' gože'ne':

—Leca zdebe naquen to bene' gwñi'a gwzenague' che Diosen' cont Diosen' nabi'e yichjlažda'ogüe'. <sup>25</sup> Bedao'ch te to be xen be nzi' camello to lo' nag yeše' clél ca to bene' gwñi'a gwzenague' che Diosen' cont Diosen' nabi'e yichjlažda'ogüe'.

<sup>26</sup> Na' bene' ca' bosozenague' xtiže'na' gose'ene':

—¿Noxen' šjayzoa len Diosen' še ca'?

<sup>27</sup> Na' Jesúsen' gože' legaque':

—Da' bi gac gon beñachen', bitw nacho bi gac gon Diosen' len.

<sup>28</sup> Nach Pedroa' gože' le':

—Neto' ba gwlejyichjto' yogo' da' de cheto' cont nacto' le' txen.

<sup>29</sup> Na' gož Jesúsen' legaque':

—Da' li žia' le'e, note'teze bene' ba gwlejyichje' liže', xaxne'e, biše', xo'ole' o xi'ine' neče chzenague' che Diosen' cont Diosen' chnabi'e yichjlažda'ogüe', <sup>30</sup> yežlio nga yonežjo Diosen' le' da' nac da' zaca'ch, na' cate' yežine' yaban' gata' yela' mban che' toli' tocañe.

*Da' yoble gosyixjue'e Jesúsen' ba zoa gate'*

*(Mt. 20:17-19; Mr. 10:32-34)*

<sup>31</sup> Na' gwlejiže Jesúsen' bene' šižinw ca' gwleje' cont zjanaque' txen len le' na' gože' legaque':

—Na'a ba zejcho Jerusalénna' gan' gac yogo'loł dan' nyoj chia' dan' bosozoj da' bene' ca' gosoe' xtiža' Diosen' cani', neda' naca' bena' gwseła' Diosen' golja' beñach. <sup>32</sup> Gaca' lo na' bene' ca' bi zjanac bene' Israel, na' yesezi'diže' neda', na' yesene' yela' ya' chia', nach yosoži'e xene' cho'alagua'. <sup>33</sup> Yesot yesyine' neda' na' yesote' neda', perw yeyon ža yebana' ladjo bene' guat ca'.

<sup>34</sup> Perw bene' ca' zjanaque' Jesúsen' txen bi gosejni'ide' dan' gože' legaque', le zjanchoł yichjlažda'ogüen', da'nann' bi gosejni'iden'.

*To bene' lchol bene' Jericó bele'ede'*

*(Mt. 20:29-34; Mr. 10:46-52)*

<sup>35</sup> Nach cate' ba zoa yežin Jesúsen' Jericó, to bene' lchol chi'e chanezen' chñabe' yosonežjo bene' le' con gaca' da' chesezande'. <sup>36</sup> Na' bende' chesede bene' zan gan' chi'ena', na' gwñabe' bin' chac. <sup>37</sup> Na' gose'ene':

—Jesús bene' Nazaret chdie' laguo' nga.

<sup>38</sup> Na' bosya'adie' gwne':

—Jesús, xi'in diaža che da' rey David, beyaše'laže'sca neda'.

<sup>39</sup> Nach bene' ca' zjažialao lao Jesúsen' gosedile' bene' lchol'en', gose'e le' cheyala' soe' šize, perw nachle bosya'adiache', gwne':

—Xi'in diaža che da' rey David, beyaše'laže'sca neda'.

<sup>40</sup> Jesúsen' gwleze', nach bene' mandaw šjasexi'e bene' lchol'en' lagüe'na'. Na' cate' gwbiga' bene' lchol'en' lao Jesúsen', nach gože'ne':

<sup>41</sup> —¿Bi chaclažo' gonda' le'?

Na' bene' lchol'en' gože'ne':

—Xana', benšca cont yele'eda'.

<sup>42</sup> Jesúsen' gože'ne':

—Bele'e. Dan' chejnlažo' neda' bach beyac yejlagon'.

<sup>43</sup> Na' la' bele'ete bene' lchola' na' gwda'ogüe' Jesúsen' benxene' Diosen'. Na' lecze ca' yogo' bene' ca' besele'ede' can' goquen' gosonxene' Diosen'.

## 19

*Jesúsen' na' Zaqueo*

<sup>1</sup> Nach Jesúsen' gwyo'e yež Jericó na' gwdeze' yešla'a ciudad'. <sup>2</sup> Na' zoa to bene' le' Zaqueo. Naque' bene' gwnabia' che bene' güechixjw ca', na' naque' bene' gwñi'a. <sup>3</sup> Gwdiljwlaže' naclen' gone' le'ede' Jesúsen', perw bitw goc, le gwnita' bene' zan len Jesúsen' na' Zaqueon' goque' to bene' bčhecw dao'. <sup>4</sup> Da'nan' gwza'sese' gwdie' lao bene' ca' cont gwyep'e to lo yag da' zoa gała'ze gan' te Jesúsen'. <sup>5</sup> Perw na' cate' bžin Jesúsen' xan yaguen', gwne'e lo yaguen' na' gože'ne':

—Zaqueo, bedao'nez beyetj. Cheyala' yega'ana' ližo' na'aže'.

<sup>6</sup> Nach Zaqueon' beyetjsese' chebede'. Nach beče'e Jesúsen' liže'na' na' benxene' le'. <sup>7</sup> Perw na' bene' ca' zjanžague' len Jesúsen' cate' besele'ede' can' goquen', yogüe' gosenie' che Jesúsen' gosene':

—Ba zeje' zjazoe' to liž bene' güen da' xinj.

<sup>8</sup> Nach Zaqueon' gwzeche' na' gože' Xanchon':

—Xana', gašje dan' de chia' gwnežjuan' bene' yaše'. Na' dan' ba gwca'a che bene', gwziya'a legaque' cont goseyixjwche' da' zča'och ca dan' cheyala' yeseiyxjue', yonežjwgaca'ne' tap ca'te'le.

<sup>9</sup> Na' Jesúsen' gože'ne':

—Na'aža ba beñ Diosen' yela' mban chio' toli tocane len che bene' lo' yo'o chio'. Na' da' li ba naco' xi'in diaža che da' Abraham lagüe dan' ba chejnilažo' Diosen' can' ben da' xozxta'ocho Abraham. <sup>10</sup> Ca nac neda', gwsela' Diosen' neda' golja' beñach cont zedyediljua' note'tez bene' ba mbiayi', na' gwnežjua' legaque' yela' mban toli tocane.

*Jempl che ši bene' bnežjw xangaque' legaque' mechw xen*

<sup>11</sup> Na' šlac ne' zjanžag bene' chosozenague' diža' dan' choe' Jesúsen', be'lene' legaque' to jempl, le ba nite' gała'ze Jerusalenna' na' gosacde' la' solaote nabi'e nación Israelen'. <sup>12</sup> Nach gwne':

—To bene' blao gwyeye' to yež zito' jene' dan' cheyala' gone' cont jaxi' lo ne'e nabi'e yež che', le gosebeje'ne' nabi'e yež chen' cate' yezine'. <sup>13</sup> Na' cate' za' se'e, gwleje' ši mos che' na' bnežjue' to toe' mechw xen. Nach gože' legaque': “Mechw nga gonele negosyw šlac bi zoa”.

<sup>14</sup> Perw bene' gualaž chen' besegue'ede' le', nach cate' beyož gwze'e, gosesele' bene' lao xane'na' ben' gwnabia'che' lao yogüe', jaseže'ne': “Bitw chaclaže'to' nabia' benga neto'.” <sup>15</sup> Perw la'czla' bi gosacclaže' bene' gualaž chen', bia'cze gwxi' lo ne'e nabi'e. Nach cate' bežin lažen' da' yoble, bene' mandadw šja'ac xmose' bene' ši ca' lagüe'na', bene' ca' bocua'añlene' xmechuen'. Goclaže' nezde' gaca' gosone' gan len mechw dan' bocua'añlene' to toe'. <sup>16</sup> Bene' nechw bžine' lagüen' na' gože'ne': “Xana', xmecho' dan' bocua'añleno' neda' benen gan ši ca'te'le ca dan' bocua'añon'.”

<sup>17</sup> Nach xanen' gože'ne': “Ba beno' da' güen. Naco' mos güen. Beno' can' cheyala' gono' len da' daon' bocua'añlena' le', da'nan' gona' cont nabi'o ši ciuda.” <sup>18</sup> Na' bene' gwchopen' bžine' lao xanen' na' gože'ne': “Xana', xmecho' dan' bocua'añleno' neda' benen gan gayo' ca'te'le ca dan' bocua'añon'.” <sup>19</sup> Nach gože' le': “Le' nabi'o gayo' ciuda.”

<sup>20</sup> Nach bžin yetoe' lao xane'na' na' gože'ne': “Xana', nga de xmecho' dan' bocua'añleno' neda'. Ba blažečhačan' bay nga. <sup>21</sup> Bžeba' le' dan' naco' to bene' znia. Chono' gan da' bi beno' žin na' chelapo' dan' gosaz bene' yoble.” <sup>22</sup> Nach gož xanen' le': “Dan' ba gwnao' ca' chlo'en napo'

dola'. Naco' mos mal. Chacdo' naca' to bene' znia, na' nezdo' chona' gan da' bi bena' žin na' chelapa' dan' gosaz bene' yoble. <sup>23</sup> Na' še nezdo' chona' ca', žbichen' bi gwlejo' xmechuan' bene' yoble cont yezian' len yichjen na'a ba bela'a?" <sup>24</sup> Nach gože' bene' ca' zjaze cuite'na': "Yeca'ale xmechuan' dan' bocua'anlena'ne' na' gwnežjwlen ben' ba noxe' ši ca'te' ca dan' bocua'anlena'ne'." <sup>25</sup> Nach gose'e le': "Xanto', ba noxe'cze' ši ca'te' ca dan' bocua'anleno'ne'." <sup>26</sup> Nach gož bene' gwnabian' legaque': "Chnia' le'e, ben' chon güen len dan' chnežjua'ne', gwnežjua'ne' da' zcha'och, perw na' bena' bi chgone' žin dan' chnežjua'ne', yeca'a da' daon' noxe'na'. <sup>27</sup> Na' ca nac bene' ca' chesegue'ede' neda', bene' ca' bi chesaclaže' nabia'gaca'ne', le šjaxi'e na' gotlene' lagu'a nga."

*Gosonxene' Jesúsen' cate' beyo'e Jerusalén*  
(Mt. 21:1-11; Mr. 11:1-11; Jn. 12:12-19)

<sup>28</sup> Na' cate' beyož be' Jesúsen' jempl nga nach gwze'e zeje' ciuda Jerusalén. <sup>29</sup> Na' cate' ba zoa yesežine' yež ca' da' zjanzi' Betfagé na' Betania do gan' zoa ya'a da' nzi' Ya'a Olivos, na' gwsele' chop bene' ca' mandadw ben' zjanaque' le' txen, <sup>30</sup> gože' legaque':

—Le šja'ac yež dan' chi' gała'ze, na' cate' žinlen' na' yeže'le to burr dao' da'ba' yag, be nono na' cuia. Le sežba' na' le che'ba' nga. <sup>31</sup> Še no nab bixchen' chsežleba', na' ye'ln'e': "Xanto' chyažjde'ba'."

<sup>32</sup> Nach bene' ca' gwseła' Jesúsen' gosa'aque' na' besele'ede'ba' da'ba' gan' gož Jesúsen' legaque' ca'. <sup>33</sup> Nach šlac cheseseže'ba', xamba' ca' gose'e legaque':

—¿Bixchen' chsežle burr daon'?

<sup>34</sup> Nach bene' ca' gwseła' Jesúsen' gose'e legaque':

—Xanton' chyažjde'ba'.

<sup>35</sup> Nach goseche'eba' lao Jesúsen' na' gosexo' xagaque' cože'ban' nach bosozie' Jesúsen'. <sup>36</sup> Na' šlac zeje' ngü'e'e nez bene' ca' zjanžag gosonx-ene'ne', na' goseyixjw no xagaque' lo nez cont blej burron' len. <sup>37</sup> Nach ba zja'aque' gała'ze Jerusalénna' na' besežine' gan' yesyeyetje' Ya'a Olivos. Na' bene' ca' zja'aclene' le' gwzolao gosonxene' Diosen', zižje cheso'e diža' che yogo'lo' yela' guac da' ba besele'ede' da' ben' Jesúsen'. <sup>38</sup> Nach gosene':

—jMbalaz rey chechon' ben' ba za' nga gwseła' Xancho Diosen' le' cont nabi'e! Cheyala' gonxencho Diosen' txen len bene' ca' nita' gan' zoe'na', le ba bene' cont benachen' gac yesyenite' binlo len le'.

<sup>39</sup> Na' len bene' zan ca' zja'aclene' Jesúsen' zja'ac bal' bene' fariseo. Nach to chope' gose'e Jesúsen':

—Maestrw, ben mandadw len bene' ca' za'ac len le' txen cont yesenite' šize.

<sup>40</sup> Nach boži'i Jesúsen' xtiža'gaquen', gwne':

—Chnia' le'e, šaca' bene' quinga nite' šize, yej quinga yesosya'an yesonx-enen neda'.

<sup>41</sup> Cate' bžine' gała'ze Jerusalénna', gwne'e ciudan', na' bene' xbab che bene' lo' ciudan' na' gwchežyaše', <sup>42</sup> na' gwne':

—Šaca' la'ch na'aža šejni'ile nac gonle cont soale binlo len Diosen', perw na'a ne' ngašen'. <sup>43</sup> Gwžin ža cate' bene' ca' chesegue'ede' le'e yesone' to yež da' šečhjen ciudan' cont nono gac yoxonj. <sup>44</sup> Na' yesote' le'e len xi'inle ca'. Na' yosyočhinje' ciudan' na' yesoslase' yej ca'. Ca' gac lagüe da' bi chejle'le Diosen' ba gwsele' neda' laole nga.



*Jesúsen' bebeje' bene' ca' cheson ya'a yodao' blaon'*

(Mt. 21:12-17; Mr. 11:15-19; Jn. 2:13-22)

<sup>45</sup> Jesúsen' gwyo'e chyo'o yodao' blaona' na' gwzologüe' bešaše' bene' ca' chesote' na' bene' chesa'o na'. <sup>46</sup> Na' gože' legaque':

—Nyojczę Xtiža' Diosen' žan: “Ližan' naquen to latje gan' yesoļ güiž bene' neda'”, perw le'e ba benlen ca to latje ga že' bene' gwban.

<sup>47</sup> Na' bsed blo'ede' bene' ca' že' yodao' blaona' yogo' ža. Na' bxož gwnabia' ca' na' bene' ca' chosed chosolo'e dan' bzoj da' Moisésen' na' nochle bene' blao che bene' Israel ca', goseyljwlaže' nacle yesone' yesote'ne'. <sup>48</sup> Perw bi besyeželde' nacle yesone' le' neche yogo' bene' besyebechgüede' xtiže'na'.

## 20

*Yela' gwnabia' che Jesúsen'*

(Mt. 21:23-27; Mr. 11:27-33)

<sup>1</sup> To ža šlac chsed chlo'e Jesúsen' bene' ca' chyo'o yodao' blaona' na' chyixjue'ede' diža' güen che Diosen', besežin bxož gwnabia' ca' na' len bene' gol ca' chesenabi'e naciónna' na' bene' ca' chosed chosolo'e dan' bzoj da' Moisés. <sup>2</sup> Na' gose'e le':

—Gwnašč neto' bi yela' gwnabia' napo' chono' da' qui, na' no beñ yela' gwnabian' cont chonon'.

<sup>3</sup> Na' boži'e xtiža'gaquen', gwne':

—Lecze de to da' nabda' le'e. Le našc neda' <sup>4</sup> ¿non' gwsela' da' Juanna' bzoe' bene' nis? ¿Dios nan' gwsele'ne', še benachen'?

<sup>5</sup> Na' legacze' gose' lježe':

—¿Bi nacho? Še ye'chone' Dios gwsela' le', na' ye'e chio': “¿Bixchen' ca gwyejle'le che'?” <sup>6</sup> Na' bi gac ye'chone' benach gwsela' le', le yogo'te bene' že' nga chesejle'e Diosen' gwsele' da' Juanna' be'e xtiže'na', na' yosožie' chio' yej še ye'chone' ca'.

<sup>7</sup> Na' gose'e Jesúsen':

—Bi nezeto' non' gwsela' da' Juan.

<sup>8</sup> Nach Jesúsen' gože' legaque':

—Lecz ca' neda' bi yapa' le'e bi yela' gwnabian' chonlenda' da' ca'.

*Jempl che mos mal ca'*

(Mt. 21:33-44; Mr. 12:1-11)

<sup>9</sup> Na' be'e jempl nga bzejni'ide' bene' ca' chosozenag che', gwne':

—To bene' goze' to cue' xen yag uvas na' bocua'anen' lo na' bene' ca' yesonen' žin na' gwze'e gwyeye' zito' na' jasoe' sša. <sup>10</sup> Cate' bžin ža yosyotobe' cosešen', nach gwsela' to xmose' lao bene' ca' nac lo na'gaque' yag uvasen' cont yosyonežjue'ne' to tlaw coseš dan' yesyezi'en. Na' bene' ca' nac lo na'gaque' yag uvasen' goseyine' mosen' na' to ga'alze bosyose'ene' bibi goso'ene'. <sup>11</sup> Nach xan yežlion' gwsele' yeto mosen', na' lecze gosot goseyine' le' na' gosonde' le' zgot, na' to ga'alze bosyose'ene' bibi goso'ene'. <sup>12</sup> Na' xan yežlion' gwsela'che' mos gwyone', na' lecze gosotlate'ne' gosone'ne' güe', na' besyebeje'ne' gan' že' yag uvas ca'.

<sup>13</sup> Na' xan yežlion' gwne': “¿Nacxe gona'?” Nach beyone' xbab gwne': “Sela' xi'ina' ben' chacchgüeda', le šeca güesezi'e xtiža' le'.” <sup>14</sup> Perw bene' ca' nac lo na'gaque' yag uvasen' cate' besele'ede' xi'ine'na', gose' lježe': “Benga

yega'anlene' yežlio nga cate' gat xe'. Le da gotchone' cont yega'anlenchon." 15 Nach besyebeje' le' gan' že' yag ca' na' gosote'ne'.

Nach Jesúsen' gwnabde' bene' ca' zjanžaguen':

—¿Nacxe gon xan yežlion' len bene' ca' bocua'anlene' yežlio chen'? 16 Šeje' šjetue' legaque' na' yodie' yežlion' lo na' bene' yoble.

Na' bene' ca' že'na' cate' gosende' diža' quinga dan' be' Jesúsen' gosene':

—¿Catec da' mal juisyw dan' goc!

17 Na' Jesúsen' gwna'chgüe' legaque' na' gwne':

—¿Bixe zejen da' nga nyojen le'e Xtiža' Diosen'? žan:

Yej dan' bi gosaclaže' güen yo'o ca' yosočhine',  
len ba naquen yej squin.

18 Na' ca nac yejna', note'tez bene' lažo' lo yeja' na' cue'žošje', na' note'tez bene' chiže' yeja' cate' lažon' na' gwšošjen le'.

*Ca nac dan' cheyała' gaxjw*

*(Mt. 21:45-46; 22:15-22; Mr. 12:12-17)*

19 Na' bene' ca' chososed chosolo'e dan' bzoj da' Moisés na' bžoz gwnabia' ca' la' besyeyiljwlaže'te nacle yesone' yesezene' Jesúsen', le gosache'ede' Jesúsen' be'e jemplna' neche dan' bi chesejnilaže' le'. Perw bibi gosone', le besežebe' bi yeson bene' ca' že'na' bene' chesejle'e che Jesúsen'. 20 Da'nana' gosesele' bene' yosogüia yesene'e Jesúsen' cont yesebeje'ne' diža' da' yosode'ede' cont yesagüe' xya che' lao gobernador ben' chnabia'. Gosacde' gone' xbab do laže'gaque' chosozenague' che'. 21 Nach gose'e le':

—Maestrw, nezeto' diža' da' cho'o na' da' chsed chlo'edo' bene' zejen to licha. Nezeto' toz can' chono' len note'tez bene'. Na' nezeto' diža' li cho'o chsed chlo'edo' bene' can' chazlaže' Diosen' goncho. 22 Na' da'nana' zedenabeto' le' žnaquen binlo no čhixjo da' cheyała' čhixjwcho che ben' nac la'zelagüe bene' gwnabia' ben' chi' Roma, še bi?

23 Na' goche'e Jesúsen' gague do lažen' chese'ene' ca', san chesaclaže' yesagüe' xya che xtižen'. Na' gože' legaque':

—¿Bixchen' chaclaže'le yoslažo'le neda' len xtižan'? 24 Le gwlo'e neda' to mechw. žNo lao dan' da' le'e mechw nga? na' žno la' dan' nyoj le'en ni?

Nach gose'ene':

—Čhe César ben' nac la'zelagüe bene' gwnabia' ben' chi' ciuda Roma.

25 Nach gože' legaque':

—Le gwnežjo bene' gwnabian' da' nac che bene' gwnabia', na' le gwnežjo Dios dan' nac che Dios.

26 Na' bi gosezaque'de' yososlažoe' le' len xtižen' lao bene' ca' že'na'. Na' besyebande' can' boži'e xtiža'gaquen', na' bich bi gose'ene'.

*Cate' yesyeban bene' guat ca'*

*(Mt. 22:23-33; Mr. 12:18-27)*

27 Na' lecze besežin bał bene' saduceo gan' zoa Jesúsen'. Bene' ca' chesene' bene' guaten' bi yesyebane'. Nach gosenabde' le', gose'ene':

28 —Maestrw, da' Moisésen' bzoje' can' cheyała' goncho, gwne' še to bene' byo gate' na' chzeb no'ol chen' perw na' nono bi güezeb chga'an, na' bene' biše' ben' ba gota' cheyała' yošagna'lene' no'ol güezeba' cont yesenita' xi'in diaža che da' bišen'. 29 Na' gosenita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'. 30 Na' bene' gwchopen' bošagna'lene' no'ol güezeba', na' lecze gote' nono xi'ine' gwnita'. 31 Na' bene'

gwyona' lecze bošagna'lene' no'olen', na' lec̄z ca' goc len le'. Na' ca' goc gosedaš bene' gaža' bosošagna'lene' no'ola', na' ne toe' ca' gosezoa xi'ine' len le'. <sup>32</sup> Gwde gosat yogo'lol bene' ca', nach got len no'ola'. <sup>33</sup> Na' cate' yesyebane' ladjo bene' guat ca', ¿nox bene' ca' soalene' no'ola' ca' xo'ole?', le yogo' bene' gaža' bosošagna'lene' le'.

<sup>34</sup> Na' Jesúsen' boži'e xtiža'gaquen', gože' legaque':

—Bene' ca' nita' lo yežlio nga chosošagne'e na' lec̄z chosošague' na' no xi'ingaque'. <sup>35</sup> Perw na' bene' ca' chaque Diosen' zjazaque' cont yosbane' legaque' ladjo bene' guat ca' cont šjasyenite' len le' toli tocanē, caten' yesyežine' gan' zoa Diosen' bich yosošagne'e neca yosonežjo xi'ine' no'ol yosošagne'e. <sup>36</sup> Bich yesate', le yesaque' ca' angl ben' že' yaba, na' yesaque' xi'in Dios lagüe dan' ba bosban Diosen' legaque' ladjo bene' guat ca'. <sup>37</sup> Na' lec̄z da' Moisésen' bzoje' che dan' chesyeban bene' guat ca'. Bzoje' can' gož Diosen' le' caten' bol güiže'ne' to lo yag yeše' dao' da' chey. Na' gwne' Xancho Diosen' naque' Dios ben' chonxen Abraham, ben' chonxen Isaac, na' ben' chonxen Jacob. <sup>38</sup> Na' bene' guat ca' bi chesonxene' Diosen', san bene' zjamban. Na' yogo' bene' ba gosejnilaže' Diosen', ne' zjambane' cont chesonxene' le'.

<sup>39</sup> Na' bal bene' chososed chosolo'ede' ley dan' bzoj da' Moisés gose'e Jesúsen':

—Maestrw, binlo boži'o xtiža'gaquen'.

<sup>40</sup> Na' bich besyeyaxjde' bi yesenabde' le'.

*Criston' naque' xi'in diaža che da' rey David*

*(Mt. 22:41-46; Mr. 12:35-37)*

<sup>41</sup> Jesúsen' gože' legaque':

—¿Nacxečen' chesena bene' Criston' ben' yedenabi'e naque' xi'in diaža che da' rey David? <sup>42</sup> Cuin Daviden' bzoje' Xtiža' Diosen' le'e libr da' nzi' Salmos, gwne':

Xancho Dios gože' Xanan':

“Gwche'edo' cuita' nga nabiach'otxen,

<sup>43</sup> na' gona' cont yogo' no chesegue'e le' yosozexjw yichje' yosozengue' chio'.”

<sup>44</sup> ¿Nacxe gac nacho Criston' naque' xi'in diaža che da' rey David? le cuin Davin' gože' le': “Xana”.

*Xtola' bene' ca' chososed chosolo'e dan' bzoj da' Moisésen'*

*(Mt. 23:1-36; Mr. 12:38-40; Lc. 11:37-54)*

<sup>45</sup> Bene' zan zjanžag chosozenague' cate' gože' bene' ca' zjanaque' le' txen:

<sup>46</sup> —Le gwsaca' cont bi gonle can' cheson bene' ca' chososed chosolo'e ley dan' bzoj da' Moisés. Legaque' chesyebede' chesaše' zjanyaze' lache' ton. Na' chesyebede' chesonxen bene' legaque' cate' chesyēžague' lagüe ya'a. Chesyebede' chesebi'e gan' chesebe' bene' blao cate' chja'aque' yodao' na' cate' chac lni. <sup>47</sup> Na' chesyegue'e yo'o che no'ole güezeb ca'. Na' cate' chosol güiže' Dios, sša cheso'e diža' cont yesaque' bene' leca chesonxene' Diosen'. Bene' can' chesacche' castigw clēl ca' yezica'chle bene' güen da' xinj.

## 21

*To no'ole güezebe bnežjue' Diosen' xmechue'na'*

*(Mr. 12:41-44)*

<sup>1</sup> Šlac zoa Jesúsen' chyo'o yodao', gwne'e na' ble'ede' bene' gwni'a ca' gosego'o xmechwgaquen' lo' cajen' gan' chesegüe'e mechw che yodaon'.  
<sup>2</sup> Na' lecze ble'ede' to no'ol güezebe bene' yaše' gwlo'e chop centav dao' che'na'.  
<sup>3</sup> Nach Jesúsen' gwne':

—Da' li žia' le'e, no'ol güezebe yaše' nga ba gwlo'oche' mechw da' zaca'ch clel ca yogo' bene' ca' yezica'chle. <sup>4</sup> Le yogo' legaque' chesegüe'e da' checho'onen lo yela' gwni'a chegaquen', perw no'ol nga, lo yela' yaše' yela' zi' che' gwlo'e yogo' da' de che', yogo' da' chachande'.

*Gwžin ža yosyočinje' yodao' blaona'*

*(Mt. 24:1-2; Mr. 13:1-2)*

<sup>5</sup> Na' bal bene' ca' chesejnilaže' che dan' chsed chlo'e Jesúsen' goso'e diža' catec xdan nac yodao' blaona' dan' gosonen' de yej xdan da' zaque' na' yo'on bi da' bosonežjo bene'. Nach Jesúsen' gwne':

<sup>6</sup> —Ca nac da' quinga chle'ele ngan', žin ža cate' ne to yej dan' zjancua' nga ca yega'añ zjancua' čože' lježen. Yogon' yosyočinje'.

*Dan' gac cate' ba za' bagwze yeyož yežlion'*

*(Mt. 24:3-28; Mr. 13:3-23)*

<sup>7</sup> Na' gosenabde' Jesúsen' gose'ene':

—Maestrw, ¿do bat gac dan' žo' nga? na' ¿nac gac nezeto' cate' ba zoa gac yogo' da' ca'?

<sup>8</sup> Na' gwne':

—Le gwsaca' cont nono siye' le'e. Le bene' zan yesaš yežlio nga bene' yesaclaže' yosolane' xlatja' nga, yesene': “Nedan' Criston' ben' gwlej Diosen' cont nabi'a”, na': “Ba za' gac juisyw.” Perw le'e bitw gwzenagle xtiža'gaquen'.  
<sup>9</sup> Na' cate' yenele chac gwdile nile na'le o yenele chi' žaš contr bene' ca' chesenabia', bi žeble, le zgua'tec da' quinga cheyała' gac. Perw gague lenña' nacho na'tec na'a yeyož yežlion'.

<sup>10</sup> Nach gože' legaque':

—Na' yesedile to yež len yeto yež yoble na' to nación len yeto nación yoble, <sup>11</sup> na' zan cuen ga xo'chgua na' zan latje lo yežlion' ga gata' gwbin na' cue' yižgüe', na' yesac yela' guac da' yesele'e bene' le'e yaban' da' zaca' yesyebande', na' yesežebchgua benachen' neche dan' chac.

<sup>12</sup> 'Perw za' gac yogo' da' quinga cate' yesezene' le'e na' yosochi yososaque' le'e na' yesone' le'e lo na' bene' gwnabia' che yodao' chelen', na' yeseyxjue' le'e ližya. Na' yeseche'xoxje' le'e do lao rey na' do lao nochle bene' gwnabia' dan' chejnilaže'le neda'.  
<sup>13</sup> Na' cate' gac da' quinga güe'le xtiža'na'.  
<sup>14</sup> Na' le gon xbab zoacza' chaclena' le'e, nach cate' gacle lo na' bene' ca' bi cuec yichjle nacle yoži'ile xtiža'gaquen',  
<sup>15</sup> le neda' goña' le'e xbab len yela' sina' chian' cont yoži'ile xtiža'gaque' sin cbi bi gac yesene'.  
<sup>16</sup> Na' bal le xaxna'le na' bene' biše'le na' biše' lježle na' bene' migw chele yesechje' yesone' le'e lo na' bene' chesegue'e le'e. Na' yesote' bal le.  
<sup>17</sup> Na' yogo'ze bene' yesegue'ede' le'e dan' chejnilaže'le neda'.  
<sup>18</sup> Perw chape Diosen' le'e na' bitw güe'le latje cuiayi'le,  
<sup>19</sup> na' goñe' yela' mban chele toli tocane še soale gwyo gwchejle yogo'lol dan' yesonde' le'e.

<sup>20</sup> 'Na' cate' le'ele ba besela'ac soldadw zan cue'ej cuit Jerusalénna' ben' yesedillen le'e, canan' nezele ba zoa cuiayi' ciudadan'.  
<sup>21</sup> Cana' bene' yesenita' Jerusalén cheyała' yosoxnje'. Na' bene' že' yezica'chle yež ga mbane Judea cheyała' šja'aque' do ya'adao'. Na' bene' yesenita' yixe', bi

cheyala' yesone' xbab yesyeyo'e lo' ciuda. <sup>22</sup> Cana' gwnežjo Diosen' castigw che xtoła' bene' ca' že' Judean', cont gac can' nyojen le'e Xtiža' Diosen'. <sup>23</sup> Nyaše' zjanac no'ol ca' zjanao' xi'in na' no'ol ca' ne' chosoguaže' bidao' lo' za ca'! Leca yesesaca'zi' bene' ca' že' doxen Judean', le Diosen' že' achgüe' legaque'. <sup>24</sup> Soldadw ca' yesote' bale' lo' gwdile na' yebale' yeseche xoxje' nación ca' dan' zjachi' doxen yežlion'. Na' bene' ca' bi zjanaque' bene' Israel yosyočinje' yo'o ca' dan' že' Jerusalénna' na' yosolej yosošošen'. Perw ba bžia' Diosen' bia' žin že' cate' bene' ca' bi zjanaque' bene' Israel bich yesenabi'e nación Israel.

### *Yid Jesucriston' da' yoble*

(Mt. 24:29-35, 42-44; Mr. 13:24-37)

<sup>25</sup> Ca' nac gwbiž, bio' na' beljw ca', gac da' yebanecho len legaquen. Na' bene' že' yežlion' yesaque' tole na' yesacžejlaže' catec sšag gon nisaon' chas chata' gaquen. <sup>26</sup> Na' bene' že' yežlio nga yesatte' šlat yesežebchgüe' dan' gaquen, le yogo' da' chle'echo le'e yaban' yesaquen ca' chac yežlion' cate' chxo'. <sup>27</sup> Na' cana'ch bene' že' yežlion' yesele'ede' neda' naca' ben' gwsela' Dios golja benach, za'a to lo' bejw len yela' guac xen na' yela' bene' zaca' juisyw chia'. <sup>28</sup> Na' cate' solao gac da' quinga, le gonchach laže'le na' le yebe. Ba zoa žin že' yida' da' yoble yebeja' le'e lo' da' malen'.

<sup>29</sup> Na' Jesúsén' be'lene' legaque' to jempl, na' gože' legaque':

—Le na'šc can' chon yag yixgüigw na' bite'teze yag yoble, <sup>30</sup> cate' chle'ele ba chebian laga' che'en dao' nach nezele bach zoa yela' tiemp ba. <sup>31</sup> Ca'czen' cate' le'ele ba chac da' mal ca' ba gwnia', cana'ch nezele ba zoa gwlo'e Diosen' yela' gwnabia' che'.

<sup>32</sup> Da' li žia' le'e, biña' yenit diaža' che le'e nita'le na'a cate' yeyož gac yogo'lol da' ca'. <sup>33</sup> Le'e yaba na' yežlion' yesede chen, perw ca' nac xtižan', gague da' te cbi gac can' žanna'.

<sup>34</sup> Na' le gon xbab cont bi gacle bene' lia na' bene' borrašw na' cont bi soale yelaž yežejele. Bene' ca' yesac bene' lia na' borrašw na' bene' ca' yesyelaž yesyežejde' bi yesebeze' batcan' gac yogo' da' quinga. <sup>35</sup> Na' toz can' gac che bene' že' doxen yežlion', yesac yogo' da' quinga cate' nono chon xbab. <sup>36</sup> Perw yogo' že' le soa le cuez batcan' gac da' quinga na' le yol güiž Diosen' cont bibi gac chele na' gac yedyesoale len neda' naca' ben' gwsela' Diosen' golja benach.

<sup>37</sup> Yogo' že' gwzoa Jesúsén' bsed blo'ede' bene' yodao' blao, na' yogo' že' beyeje' lo' ya'a da' nzi' Ya'a Olivos. <sup>38</sup> Na' yogo' zil besežin bene' zan bosozenague' che' šlac bsed blo'ede' legaque' chy'o yodao' blao.

## 22

### *Bosoxi'e cont yesezene' Jesúsén'*

(Mt. 26:1-5, 14-16; Mr. 14:1-2, 10-11; Jn. 11:45-53)

<sup>1</sup> Na' ba zoa gala' lni pascw caten' chesagüe' yetextil da' bibi levadura yo'on. <sup>2</sup> Na' bxoz gwnabia' ca' na' bene' ca' chososed chosolo'e ley dan' bzoj da' Moisésén' beseyiljue' nacle yesone' na' bi da' yosode'ede' cont yesezene' Jesúsén' na' yesote'ne', le besežebe' še cate' bi yesone yezica'chle bene' legaque'.

<sup>3</sup> Nach Satanásén' dan' chnabia' da' xigüe' ca' gwyo'o gwyazen lo' yichjlaždao' Judas Iscarioten' ben' goque' txen len bene' šiziñw ca' zjanaque' Jesúsén' txen, <sup>4</sup> na' gwyeje' jane'e bxoz gwnabia' ca' na'

beñe' gwnabia' che beñe' ca' chesape' yodao'na' cont bosoxi'e nacle gone' gwdie' Jesúsen' lo na'gaque'. <sup>5</sup> Na' leca besyebede' na' gose'e le' yosonežjue'ne' mechw. <sup>6</sup> Na' Judasen' gwxenlaže' len legaque', na' gwzologüe' gwđiljwlaže' nacle gone' gwdie' Jesúsen' lo na'gaquen' cate' bi že' beñe' zan.

*Jesúsen' blo'ede' legaque' can' cheyala' yesone' šjasyeza'laže' dan' gaten'*  
(Mt. 26:17-29; Mr. 14:12-25; Jn. 13:21-30; I Co. 11:23-26)

<sup>7</sup> Na' bžin ža gała' lni caten' chesagüe' yetextil dan' bibi levadura yo'o. Naquen ža cate' chesote' xila' dao' cont šjasyeza'laže' can' bosla Diosen' da' xoxxta'ogaquen' lo na' beñe' Egipto ca'. <sup>8</sup> Na' Jesúsen' gwleje' Pedroa' len Juanna' na' gože' legaque':

—Le šja'ac na' le šjasini'a dan' gagwcho lo lnin'.

<sup>9</sup> Na' gose'ene':

—¿Ga che'ndo' šjasini'ato'?

<sup>10</sup> Nach gože' legaque':

—Le šja'ac na' cate' ba gwyo'ole ciudan' na' yežagle to beñe' byo no'e to che'e nis. Na' šejlenlne' na' gan' yežinen' <sup>11</sup> le ye' xan yo'on': "Maestron' že': Gonšco' to yo'o ga gagua' xše' že' lni nga len beñe' ca' zjanaque' neda' txen." <sup>12</sup> Nach gwlo'ede' le'e to cuart xen dan' zoa yichjen na'ale gan' de yogo' da' chyažjecho. Na' le gwsini'a cont gagwcho na'.

<sup>13</sup> Na' gosa'aque' na' yogo' can' gož Jesúsen' legaque' goc. Nach bososini'e xše' že' lnina'.

<sup>14</sup> Na' cate' bač gwchi'e cho'a mesen' len postlw che' ca', <sup>15</sup> na' gože' legaque':

—Leca gwzelaža' gagua' yela' guagw che lni nga len le'e na'a za' saca'zi'a na' gata'. <sup>16</sup> Chnia' le'e, na'a zelao gagan'. Cate'ch ba blo'e Diosen' yela' gwnabia' che'na', cana'ch gagan' da' yoble.

<sup>17</sup> Na' gwxi'e vas gan' yože nis uvasen', na' beyož be'e yela' choxclen che Dios, nach gwne':

—Le sin', na' le ye'ej yogo'le late' güeje dan' yože lo' vas nga. <sup>18</sup> Chnia' le'e na'a zelao che'ej' vino che uvasen'. Cate' ba blo'e Diosen' yela' gwnabia' che'na', cana'ch ye'ejan' da' yoble.

<sup>19</sup> Nach gwxi'e yetextilen' na' be'e yela' choxclen che Diosen' na' bzoxjen' na' bnežjuen' legaque'. Na' gože' legaque':

—Da' nga cuerp chia' chzanlaža' neče le'e. Quinga gonle cont šjayze'ele bi zejen len le'e dan' yesote' neda'.

<sup>20</sup> Na' lecze bexue' vassen' cate' ba beyož gosagüe' xšen' na' gože' legaque':

—Dan' yože lo' vas nga zejen da' cobe dan' gwna Diosen' gone' gaclene' le'e. Na' solao gone' can' gwne', le yesote' neda' na' gwłalj xchenan' neče le'e.

<sup>21</sup> Na' da' li ben' gwdie' neda' lo na' beñe' ca' chesegue'e neda' nga chagwlene' neda' txen. <sup>22</sup> Na' gac chia' can' nžia bia' gac, neda' naca' bena' gwseła' Diosen' golja' beñach, perw nyaše'chguaze nac ben' gwdie' neda' lo na' beñe' ca'.

<sup>23</sup> Nach gosezolagüe' gosenabe lježgaque' noen' gon da' malen' nac ca'.

*Gosacyože' noe' nacch blao*

<sup>24</sup> Na' lecze gosezolagüe' gosacyože' noe' nacch blao. <sup>25</sup> Na' Jesúsen' gože' legaque':

—Nita' bene' gwnabia' che to to naci6n ca' na' chesone' byen chosozenag bene' chegaque', na' bene' gwnabia' ca' chesaclaže' yesoe' bene' diža' chegaque' zjanaque' bene' güenchgua. <sup>26</sup> Perw le'e gague can' cheyała' gonle. Še no le'e nacchle bene' bla0, cheyała' gwzexjwlaže' le len bene' lježle na' gonle ca bene' xcuide' ben' bibi na' neze. Na' še no le'e chnabia'le, cheyała' soale gaclen lježle. <sup>27</sup> Le gon xbab noe' nacch bene' bla0, še bena' chi' cho'a mesen' o še xmosen' ben' chon mandadw che'. Nacbia'cze ben' chi' cho'a mesen' naccze' bene' bla0ch. Perw neda', zoa' cont gaclena' le'e la'cze naca' Xanle.

<sup>28</sup> 'Le'e biņa' cuejyichjle neda' la'czla' bene' zan ba chesegue'ede' neda'. <sup>29</sup> Na' ca nac Xan' ba none' chia' cont nabi'a txen len le', lecze neda' ba nona' chele cont nabi'a'le txen len neda'. <sup>30</sup> Na' gona' cont ye'ej gagwle txen len neda' cate' yela'le gan' nabi'a, na' cue'le cuita'na' nabi'a'le šižiŋw cuen bene' ca' zjanaque' xi'ŋ diaža che da' Israel.

*Jesúsen' gwne' Pedroa' bi chebe' še nombi'e le'*  
(Mt. 26:31-35; Mr. 14:27-31; Jn. 13:36-38)

<sup>31</sup> Nach Jesúsen' gwne':

—Simón, ben xbab chio', Satanásen' dan' chnabia' da' xigüe' ca' ba gwñaben gaco' lo ne'en cont gonen cuejyichjo' bich šejnilažo' neda'. Na' dan' gonen len le' naquen ca dan' chon bene' caten' chdie' trigon' lo' rner. <sup>32</sup> Perw na' neda' ba gwñaba' gaclen Diosen' le' cont bi cuejyichjo' dan' chejnilažo' neda'. Na' cate' ba betiŋdo' xtoło'na', gono' chach laže' bene' lježo' quinga.

<sup>33</sup> Nach Pedroa' gože'ne':

—Ba bechoglaža' sa'alena' le', gague ližya na'ze, san gatlencza' le'.

<sup>34</sup> Na' Jesúsen' gože'ne':

—Pedro, žia' le', biņa' cuež jean' na'aže' cate' gac šon ni'a bi chchebo' še nombi'o neda'.

*Gwne' ba zoa yosoči yososaca' bene' legaque'*

<sup>35</sup> Na' gože' bene' ca' zjanaque' le' txen:

—¿Byažjele bi da' byažjele cate' gwseła' le'e jatixjue'ele xtiža'na'? Gwseła' le'e sin chi bia'le mechw, ne bzod, na' neca bia'le xelle.

Na' gose'ene':

—Bitw bi byažjeto'.

<sup>36</sup> Na' gože' legaque':

—Perw na'a še naple mechw, cheyała' gua'len, na' lecze ca' gua'le bzod. Na' še bitw bi spada chele de, le gote' xadon chelen' cont si'le to spada.

<sup>37</sup> Chnia' le'e gonle ca', le gac chia' can' nyojzen le'e Xtiža' Diosen' žan: "Gosone'ne' ca bene' güen da' xiŋj." Na' cheyała' gac yogo'lol dan' nyojen.

<sup>38</sup> Nach gose'ene':

—Xanto', gwña'šc nga noa'to' chope spada.

Na' gože' legaque':

—Güesaqueczen.

*Jesúsen' chol güiže' Diosen' latje gan' nzi' Getsemani'*  
(Mt. 26:36-46; Mr. 14:32-42)

<sup>39</sup> Nach gwze'e gweje' Ya'a Olivos can' ba yolagüe' chone', na' bene' ca' zjanaque' le' txen zjana'ogüe' le'. <sup>40</sup> Nach cate' besyežime' latjen' na' gože' legaque':

—Le yol güiž Dios cont bi gon gwxiyen' le'e gan.

41 Na' gwle'e len *legaque'* zito' ca gan' zelao žin to yej da' gwzala'cho, na' bzoa xibe' na' boł güiže' Dios, 42 gwne':

—Xa', benšca cont bi saca'zi'a na' bi yesote'nda' še ca' chazlažo', perw bi chnaba' gac da' žia' neda', san gac can' nao' le'.

43 Na' to angl beņe' za' yaba blo'elagüe' le' na' be'e le' fuerz valor. 44 Na' šlac chžaglaochgüe' len yichjlažda'ogüe'na' gwzolao chžaglaoche' chol güiže' Diosen' beyačlojite' yes. Na' nis yes che'na' beyaquen ca tlab'a güeje chen dan' zjanaquen chełson, besyeyinjitē lo yo. 45 Na' bezeche', na' beyeje' gan' nita' beņe' ca' zjanaque' le' txen, ble'ede' zjanite' chesetase' dan' leca gosacyaše'chgüede'. 46 Na' gože' *legaque'*:

—¿Bixchen' chtasle? Le chas, le yol güiž Dios cont bi gon gwxiyen' le'e gan.

*Gosezene' Jesúsēn'*

(Mt. 26:47-56; Mr. 14:43-50; Jn. 18:2-11)

47 Ne' choe'te Jesúsēn' diža' cate' besežin beņe' zan gała'ze gan' zoen'. Na' ben' le' Judas, ben' goque' txen len beņe' šižinw ca' gwlej Jesúsēn' cont zjanaque' le' txen, žialagüe' laogaque'. Na' gwbigue' gan' zoa Jesúsēn' na' bnopē' xague', perw gague do lažen' bene' ca'. 48 Na' Jesúsēn' gože' le':

—Judas, žchnopo' neda' cont gwdio'nda' lo na' beņe' quinga? neda' naca' bēna' gwseła' Diosen' golja' beņač.

49 Na' cate' beņe' ca' zjanaque' Jesúsēn' txen besele'ede' can' gac che'na' nach gose'ene':

—Xanto', žgwyinto' beņe' quinga spada cheton'?

50 Na' toe' gwdinen' mos che bχoz blaon', gwchogtechgüe' nague' liča. 51 Perw Jesúsēn' gože'ne':

—Bich gonle ca'.

Nach gwdane' nag mosen' na' beyone' le'. 52 Jesúsēn' gože' bχoz gwnabia' ca' na' beņe' ca' chesenabi'e beņe' ca' chesape' yodao', na' beņe' gole blao ca' chesenabia' nación Israelen' ben' zja'ac zjasexi'e le', gože'ne':

—¿Bixchen' nonle neda' ca to beņe' gwban za'acle zedexi'le neda' len spada na' len yag? 53 Yogo' žaze gwzōa' len le'e chyo'o yodao' blaon' na' bitw gwženle neda'. Perw na' ba bžin ža gonele neda' con can' chaclaže'le, na' ba bžin ža gac can' chaclaže' Satanásēn' dan' chnabia' beņe' ca' chesaš lo cholen'.

*Pedroa' bi gwchebe' še nombi'e Jesúsēn'*

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

54 Nach gosoxe' Jesúsēn' na' goseche'ene' liž ben' naque' bχoz blao che nación Israelen'. Nach Pedroa' na'ogüe' Jesúsēn' zito' zito'le. 55 Na' bosoxene' yi' chyo'o che bχoz blaona' na' gosebi'e cho'a yi'na'. Na' gwche' Pedroa' len *legaque'*. 56 Na' to no'ole güen žin ble'ede' chi'e cho'a yi'na' na' gwne'e le' na' gwne':

—Lecze len bengā naque' txen len Jesúsēn'.

57 Perw Pedroa' bitw gwchebe' še nombi'e Jesúsēn'. Gože'ne':

—No'ole, bitw nombi'ane'.

58 Na' gocze šlož, yeto beņe' ble'ede' Pedroa' gože'ne':

—Lenczo' naco' txen len beņe' ca'.

Na' Pedroa' gože'ne':

—Bitw lena' len *legaque'*.

59 Gwde to hor yetoe' gwne':

—Da' liče nac bengā txen len Jesúsēn', le naque' beņe' Galilea.



60 Na' Pedroa' gože'ne':

—Beñe', bi ñezda' bi dižan' cho'o.

Na' ñe' choe'te Pedroa' dižan' ca', gwchež to jea. <sup>61</sup> Na' Xancho Jesúsen' gwyechje' gwñe'e Pedroa' na' jayze'e Pedroa' diža' dan' gož Xanchon' le' caten' gwne': “Bina' cuež jean' ña'aže' cate' gac šone ñi'a bi chebo' še nombi'o neda'.” <sup>62</sup> Na' Pedroa' beze'e leca gwchežyaše'.

*Gosezi'diže' Jesúsen'*

(Mt. 26:67-68; Mr. 14:65)

<sup>63</sup> Na' beñe' ca' goseche'e Jesúsen' gosezi'diže' le', na' gosot goseyine' le'.

<sup>64</sup> Na' bosocheje' to lache' lao Jesúsen' na' goseyine' le' na' gose'ene':

—Gwñeya'ašč non' chyin le'.

<sup>65</sup> Na' zanch diža' da' gosene' gosezi'diže' Jesúsen'.

*Goseche'e Jesúsen' lao beñe' ca' chesenabia' nación Israelen'*

(Mt. 26:59-66; Mr. 14:55-64; Jn. 18:19-24)

<sup>66</sup> Na' cate' gwyeni', beñe' gole blao ca' chesenabia' nación Israelen' na' bxož gwnabia' ca' na' beñe' ca' chososed chosolo'e ley dan' bzoj da' Moisés besežague' na' gosone' mandadw gwyej Jesúsen' laogaque' gan chesenabi'ena', nach gose'ene':

<sup>67</sup> —Gwnašč neto' še le' naco' ben' gwlej Diosen' cont ñabi'o nación chechon'.

Nach gože' legaque':

—Šaca' ñia' le'e neda' naca' Criston' ben' gwlej Diosen' cont ñabia' nación chechon', bitw šejle'le chia'. <sup>68</sup> Na' šaca' bi ñabda' le'e, ñeca yoži'ile xtižan', ñeca gwsanlenda. <sup>69</sup> Neda' naca' ben' gwseļa' Diosen' golja' beñach. Na' ña'a cui'a cuit Diosen' ñabi'a txen len le', Dios ben' chnabia' doxen.

<sup>70</sup> Nach yogüe' yose'ene':

—¿Len' naco' dogualje Xi'in Diosen'?

Na' gože' legaque':

—Le can' žale nan' naca'.

<sup>71</sup> Na' gosene':

—iNoch no chyažje no gagw xya che! Chio' ba benecho ña'a chñe' che Diosen' dan' že' ca'.

## 23

*Bosocuiše' Jesúsen' lao Pilaton'*

(Mt. 27:1-2, 11-14; Mr. 15:1-5; Jn. 18:28-38)

<sup>1</sup> Na' yogo'lol beñe' ca' gosezože'e na' goseche'ene' lao Pilaton' ben' nac gobernador. <sup>2</sup> Na' gwzolaos bosocuiše' Jesúsen' gosene':

—Ba gwchoglaoto' che benga cheyaļa' gate' dan' chde' chgo'oyeļe' nación Israelen' cont yesejle'e che' na' lecze chžone' chixjwto' da' cheyaļa' chixjwto' lao rey César. Na' lecze že' len' naque' Criston' ben' gwlej Diosen' cont ñabi'e nación cheton'.

<sup>3</sup> Nach Pilaton' gwñabde'ne' gože'ne':

—¿Len' naco' rey che beñe' Israel?

Nach Jesúsen' boži'e xtižen', gwne':

—Can' gwnao'na', can' naquen.

<sup>4</sup> Nach Pilaton' gože' bxož ca' len yogo'lol beñe' ca' zjanžag lagüe'na':

—Bibi nļa'lagüe' še bi doļa' nap benga.

<sup>5</sup> Perw na' goseneche', gosene':

—Chde' chgo'oyele' yogo' bene' že' distritw Judea nga yesejle'e dan' chsed chlo'ede'. Gwzolaogüe' bsed blo'ede' distritw Galilean' perw lencze nga bač chsed chlo'ede' na'a.

*Pilaton' gwsele' Jesúsen' lao Herodes*

<sup>6</sup> Cate' bene Pilaton' can gosene', nach gwnabe' še Jesúsen' naque' bene' Galilea. <sup>7</sup> Na' cate' goche'ede' Jesúsen' ze'e Galilean' gan' chnabia' gobernador Herodes, na' gwsele'ne' lao Herodes, le ca hora' zoa Herodes Jerusalenna'. <sup>8</sup> Cate' Herodes ble'ede' le' bebede', le ba goc sša che'nde' le'ede' le'. Ba bende' xtiža' Jesúsen' na' zoe' lez le'ede' gone' to da' zaca' yebande'. <sup>9</sup> Nach da' zan da' gwnabde' Jesúsen', perw ne to xtižen' ca boži'i Jesúsen'. <sup>10</sup> Bxoz gwnabia' ca' na' bene' ca' chososed chosolo'e ley dan' bzoj da' Moisés gosezache' gala'ze na' bosocuiše'ne' len zan diža'. <sup>11</sup> Na' Herodes len zan soldadw che' ca' gosezolaogüe' gosezi'diže'ne' na' gosonle' che'. Nach cate' beyož bosoguacue'ne' to lache' xdan juisyw, gosesele'ne' da' yoble lao Pilaton'. <sup>12</sup> Na' žana' Pilaton' len Herodes gwzoloa gosaque' migw, la'czla' cate' za' gac ca' besegue'e lježe'.

*Gosechoglagüen' gat Jesúsen'*

(Mt. 27:15-26; Mr. 15:6-15; Jn. 18:39-19:16)

<sup>13</sup> Nach Pilaton' botobe' bxoz gwnabia' ca' na' bene' ca' chesenabia' nación Israelen' len yezan bene' yež, gan' chesone' yela' justisen'. <sup>14</sup> Nach gože' legaque':

—Le'e bedesanle benga lagua' nga, na' gwnale chde' chgo'oyele' bene' Israelen' yesone' contr gobiernna'. Neda' bač gwnabyožda'ne' lao le'e ca xyan' dan' chagwle che', ne to da' xinj ca chželda' še bi dan' none'. <sup>15</sup> Na' lecz ca' Herodes bitw bi xtole' bželde', na' besele' le' laoto' nga. Na' nachbia' bibi ben benga da' cheyala' gate'. <sup>16</sup> Na' na'a con gona' mandadw yeseyine' le' na' gwsana'ne'.

<sup>17</sup> Gwne' ca', le yogüiz chsane' to bene' pres lo lni pascw chegaque'. <sup>18</sup> Na' yogo' bene' ca' že' bososye'e toz ca gosene':

—Chojtega benga gate' na' gwsano' Barrabásen'.

<sup>19</sup> Na' Barrabásen' goseyixjue'ne' ližya da' bxie' gwdile lo' ciudan' na' goque' to bene' güet bene'. <sup>20</sup> Na' da' yoble Pilaton' gwnabde' legaque' še gwsane' Jesúsen', <sup>21</sup> perw bososye'e zižjeh gosene':

—jBde'e le'e yag cruz! jBde'e le'e yag cruz!

<sup>22</sup> Da' gwyon ni'a gož Pilaton' legaque':

—žBixe da' xinj nonen'? Ne to da' xinj bi chželda' še bi none' da' zaca' gate'. Na' gona' mandadw yeseyine' le' na' gwsana'ne'.

<sup>23</sup> Perw gosone' byen bososye'e yelate' zižjeh gosenabe' gwde'ene' le'e yag cruz. Nach Pilaton' bzenague' chegaquen' <sup>24</sup> na' gwchoglagüe' che' gac can' gosenabde' le'. <sup>25</sup> Nach bsane' Barrabás ben' zjanyixjue' ližyan', ben' gosenabe' gwsane', la'czla' Barrabásna' goque' ben' bxie' gwdile na' bene' güet bene'. Na' Pilaton' bodie' Jesúsen' lo' na'gaque' cont yesone' len le' ca chesaclaže'.

*Bosode'e Jesúsen' le'e yag cruz*

(Mt. 27:32-44; Mr. 15:21-32; Jn. 19:17-27)

<sup>26</sup> Na' šlac zjanche'ene' gan' yesote'ne' besyežague' to bene' yež Cirene le' Simón, za' zeze'e yixe'. Na' bosogüe'ene' yag cruz che Jesúsen' na' gwyeje' gwda'ogüe' Jesúsen'.

27 Na' bene' zan zjana'ogüe' le' na' zjalen zan no'ole. Na' no'ol ca' gwzola'os bososye'e gosebeže' che'. 28 Na' Jesúsen' gwyechje' na' gože' le'gaque':

—No'ole Jerusalén, bitw cuežle chia'. Yejni'a le' cuež chele na' che xi'inle. 29 Da' li gwžin ža cate' yesene': "Mbalaz nita' no'ole güiž no'ole cono gwžan na' nono bguaže'." 30 Cana' yesenablaže' yesebiže ya'a ca' cont čhenen le'gaque'. Yesenablaže' che' bdiņj goten le'gaque'. 31 Še yesot bene' neda' len bibi xtoła' de, įnacchxe yesonde' le'e nacle bene' güen da' xinj!

32 Na' lecze goseche'e chop bene' güen da' xinj cont bosode'e le'gaque' le'e yag cruz can' gosone' len Jesúsen'. 33 Na' cate' besežine' latje gan' nzi' Latje che Žit Yichj Bene' Guat, bosode'e Jesúsen' le'e yag cruzen'. Na' lecze bosode'e bene' mal ca' chop le'e yag cruzen' len le', toe' gwda' cuit Jesúsen' licha, na' yetoe' gwda' cuiten' robes. 34 Na' Jesúsen' gwne':

—Xa', bezi'xen che bene' quinga chesegue'ede' neda'. Gague zjanезде' bin' chesone'.

Na' gosone' rifa cate' besyele'e xalane' cont gota'bia' noe' yechelen. 35 Na' bene' zan besyežejde' le'. Na' bene' gwnabia' čhegaque' ca' gosonle' che', gosone':

—Yezica'chle bene' bosle'. Še da' li naque' Criston' ben' gwlej Diosen' yedenabi'e, žbixchen' bi chosla cuine'?

36 Nach soldadw ca' lecz ca' gosonle' che'. Gosebigue' gała'ze gan' zoa yag cruzen' na' bosonežjue'ne' vino zičj. 37 Nach gosone':

—Še len' naco' rey che bene' Israel, bosla cuino'.

38 Na' yichj yag cruz che'na' gwzoa to dan' nyojen, žan: "Bengan' rey che bene' Israel." Na' byojen diža' griego, diža' latín na' diža' hebreo.

39 Na' to bene' mal ben' da' le'e yag cruz cuit Jesúsen' lecze gwzi'diže'ne', gože'ne':

—Še le' naco' ben' gwlej Diosen' cont yedenabi'o nación čechon', bosla cuino' na' lecze bosla neto'.

40 Na' ben' yeto gwdilē' bene' lježen' gože'ne':

—žBi chžebo' Diosen'? Chio' ba da'cho le'e yag cruz cont gatcho can' da' le', 41 na' dan' gat chio' naquen licha cont si'cho castigw che xtoła'chon'. Perw benga, bitw bi doła' nape'.

42 Nach gože' Jesúsen':

—Jesús, šjayza'laže'go' neda' cate' žin ža ņabi'o.

43 Na' gož Jesúsen' le':

—Da' li chnia' le', ņa'aža soaczo' len neda' gan' zoa Diosen'.

*Can' goc caten' got Jesúsen'*

*(Mt. 27:45-56; Mr. 15:33-41; Jn. 19:28-30)*

44 Na' cate' bžin guagwbiž goc chol doxen lo yežlion' bžinte do cheda šone. 45 Bitw bseni' gwbižen'. Na' ca nac lache' dan' ze lo' yodao' blaona', bcheza' gacholen. 46 Nach Jesúsen' bosye'e zižje gwne':

—Xa', chon cuina' lo nao', bezi' spiritw chia'na'.

Na' beyož gwne' ca' gote'.

47 Na' cate' ble'e xan soldadon' can' goquen', benxene' Diosen' na' gwne':

—Da' licze benga goque' bene' gwyej to licha.

48 Na' bene' zan bene' besežag besele'ede' can' goc na' yogo'lolē' besyeya'aque' chesebaže' lcho'e gosacde' da' juisyw ba goc. 49 Na' yogo'

beñe' ca' zjanombia' Jesúsen', na' len no'ol ca' zjano' le' caten' beze'e Galilean', gosezeche' zito'le besele'ede' da' ca' goquen'.

*Bosocuaše' Jesúsen'*

(Mt. 27:57-61; Mr. 15:42-47; Jn. 19:38-42)

<sup>50</sup> Na' zoa to beñe' ciuda Arimatea gan' mbane Judean' na' le' José. Naque' txen len beñe' ca' chesenabia' nación Israel, na' naque' to beñe' güen beñe' zej to licha. <sup>51</sup> Ba zoe' chbeze' batcan' solao nabia' ben' sela' Diosen'. Bitw bene' txen len beñe' ca' gosechoglagüen' yesote' Jesúsen'. <sup>52</sup> Bena' gwyeje' lao Pilaton' jaynabe' cuerp che Jesúsen'. <sup>53</sup> Na' beletje'ne' le'e yag cruzen' na' btobe' le' to lache' xen na' la' bcuaše'te' le' to lo' bloj da' nche'ene' le'e yej. Na' naquen' to ba cobe ga nono na' yosocuaše'. <sup>54</sup> Na' yogo' da' ca' goc ža cate' chososini'e che ža che Dios. Na' ba bžin hor cate' cheyała' yosocueze' bite'teze žin o mandadw da' chesone'.

<sup>55</sup> Na' no'ol ca' za'aclene' Jesúsen' cate' gwze'e distritw Galilean' ja'aclene' Josén' cont besele'ede' ba che Jesúsen' gan' gwxa cuerp che'na'. <sup>56</sup> Nach gosa'aque' na' gosone' to da' chl'a' zix da' yeseyebe' cuerp che Jesúsen'. Na' ža che Diosen' gosenita'cze can' ža ley chegaquen', bibi žin gosone'.

## 24

*Jesúsen' bebane' ladjo beñe' guat*

(Mt. 28:1-10; Mr. 16:1-8; Jn. 20:1-10)

<sup>1</sup> Bał dmi gw ja'ac no'ol ca' da' yoble cho'a bloj gan' bosocuaše' Jesúsen' na' gosoxe' da' ca' ba gosone' da' chl'a' zix, na' yebał no'ole ja'aclene' legaque'. <sup>2</sup> Na' cate' besežine' na' besele'ede' ba bga'a yejen' dan' bosode'e cho'a blojen'. <sup>3</sup> Na' goso'e, na' bitw besyeželde' cuerp che Xancho Jesúsen'. <sup>4</sup> Šlac zjanite' chesyebande' che da' quinga, besele'ede' chope beñe' zjazecha cuitgaquen' zjanyaze' lache' da' chactitchgua. <sup>5</sup> Na' no'ol ca' besežebe' na' bosocheque' yichjgaquen' gosene'e lo yole. Nach beñe' ca' gose'e no'ol ca':

—¿Bixchen' cheyiljwle to beñe' mban nga ladjo beñe' guat? <sup>6</sup> Notoch no nla' nga. Ba bebane' ladjo beñe' guat na' mbancze'. Le šjayza'laže' can' gwne' cate' ne' zoale Galilean'. <sup>7</sup> Gwne' le' naque' ben' gwseła' Diosen' golje' beñach. Na' gwne' cheyała' gaque' lo na' beñe' mal ca' cont yesote' le' yosode'ene' le'e yag cruz, na' yeyon ža yebane' ladjo beñe' guat.

<sup>8</sup> Na' no'ol ca' jasyeze'ede' xtiže'na'. <sup>9</sup> Na' besyeya'aque' cho'a blojen' na' jasedixjue'ede' yogo' da' ca' len postlw ca' šnej na' len yezica'chle beñe' ca' nita' txen len legaque'. <sup>10</sup> Na' no'ol ca' jasedixjue'ede' postlw ca' zjanaque' beñe' quinga: María beñe' Magdala, na' Juana, na' María xna' Jacobo, na' len yebałe no'ole. <sup>11</sup> Na' postlw ca' bitw gosejle'e che no'ol ca', gosacde' chesenzen'.

<sup>12</sup> Perw na' Pedroa' la' gwzoža'te' na' la' gwza'seste' bžine' cho'a blojen' na' bcheque' na' ble'ede' lache' ca' zjachin' lo yo. Na' beze'e bebanchgüede' che da' ca' ble'ede'.

*Blo'elao Jesúsen' chop beñe' ca' šlac zja'aque' Emaús*

(Mr. 16:12-13)

<sup>13</sup> Na' lecze ža dmi gwna' chop beñe' ca' gosaque' Jesúsen' txen ja'aque' yež dan' nzi' Emaús, do šnej mil metr zito' par Jerusalénna'. <sup>14</sup> Na' legacze' bososalje' che yogo' da' ca' ba goquen'. <sup>15</sup> Ne' chesone' xbab na' ne'

chesoe'te' diža' čhen cate' Jesúsen' gwbigue' len legaque' na' gwz'alene' legaque' txen, <sup>16</sup> perw bitw gosache'ede' noxen' zejlen legaque'. <sup>17</sup> Nach gože' legaque':

—¿Bi dižan' choe'le šlac ngo'ole nezen'? ¿Bixčhen' chacyaše'le?

<sup>18</sup> Na' toe' le' Cleofas boži'e xtižen' gože'ne':

—¿Nacxe chaquen' gwza'o Jerusalén na' biṇa' gache'edo' da' ca' ba goc lo' ciudan'? ¿Tozo' le' zo' Jerusalén na' biṇa' gache'edo'!

<sup>19</sup> Na' Jesúsen' gože' legaque':

—¿Bi goquen' žale ca'?

Nach gose'ene':

—Dan' goc čhe Jesús bene' Nazaret. Goque' to bene' gwseḷa' Dios cont be'e xtižen', na' Diosen' len beṇachen' besyebede' yeḷa' guac čhen' dan' blo'e na' diža' dan' be'e. <sup>20</sup> Perw na' bṅoz gwnabia' čhecho ca' len bene' ca' chesenabia' nación čhechon' gosone' le' lo na' bene' ca' gosečhoglagüe' čhe' cheyaḷa' gate', na' bosode'e le' le'e yag cruz. <sup>21</sup> Ba goc šone ža na'a goc da' quinga. Na' neto' gwzoato' lez Diosen' gwseḷe' le' cont yebeje' nación čhecho lo da' malen'. <sup>22</sup> Na' no'ol ca' zjanac txen len neto', baḷe' goso'e diža' da' chebaneto', ja'aque' cho'a ban' be'e <sup>23</sup> na' bitw besyeželde' cuerp čhe'na'. Cate' besyela'aque' gosene' besele'eda'ogüede' angl bene' gose'e legaque' ba bebane' ladjo bene' guat ca'. <sup>24</sup> Na' ľecze to čhop bene' byo bene' ca' zjanaque' txen len neto' ja'aque' cho'a ban' na' besele'ede' cayanen' gosena no'ol ca' naquen, perw bi besele'ede' Jesúsen'.

<sup>25</sup> Na' gož Jesúsen' legaque':

—Nyaše'chguaze le'e bi chejni'ile na' bi chejle'le yogo' dan' bosozoj bene' ca' gwseḷa' Diosen' goso'e xtižen' cani'. <sup>26</sup> ¿Chaquale bi cheyaḷa' gac dan' ba goca'? Cristo ben' gwlej Diosen' cont yedenabi'e, benen byen gwzaca'zi'e yogo' da' quinga ba goc, perw yeyoža' la'laon naque' bene' zaca' juisyw.

<sup>27</sup> Na' be'e diža' len legaque' bsd blo'ede' legaque' yogo' dan' nyoj čhe'na' le'e Xtiža' Diosen', gwzolaoteque' len dan' bzoj da' Moisés na' len dan' bosozoj yezica'chle bene' gwseḷa' Diosen' goso'e xtižen' cani'.

<sup>28</sup> Na' besežine' gaḷa'ze yežen' gan' zja'aquen', na' Jesúsen' bene' ca' chon bene' šejch yelate' zito'ch. <sup>29</sup> Perw bene' ca' gosone' byen yega'ane' len legaque', gose'ene':

—Yega'aṅczo' len neto', le ba čhaḷ na' ba nac bagwže' par šejo'.

Na' gwyo'e cont yega'anlene' legaque'. <sup>30</sup> Na' šlac zjachi'e cho'a mesen' txen, Jesúsen' gwxi'e yetextilen' na' be'e yeḷa' choxclen čhe Diosen' na' bzojxen' bnežjuen' legaque'. <sup>31</sup> Cana'ch gosache'ede' le'na'. Na' šlac ne' nite' ca' con beṇite'. <sup>32</sup> Nach gose' ľježgaque':

—Łeca bebe lažda'očhon' cate' be'lene' chio' diža' chanez na' bsd blo'ede' chio' can' nyojen čhe' le'e Xtiža' Diosen'.

<sup>33</sup> Na' ľa' besyeya'actie' jaya'aque' Jerusalénna' na' besyežine' gan' zjan-dop zjanžag postlw ca' šnej len bene' ca' yezica'chle. <sup>34</sup> Na' bene' šnej ca' gose'e bene' ca' za' besyežin:

—Da' ľicze ba beban Xančhon'. Ba blo'elagüe' Simónna'.

<sup>35</sup> Nach bene' ca' čhop gose'e legaque' dan' goc šlac zjangüe'e nezen', na' gose'e legaque' besyeyombi'e le' cate' bzojje' yetextilen' cont yesagüen'.

*Jesúsen' blo'elagüe' bene' ca' zjanaque' le' txen  
(Mt. 28:16-20; Mr. 16:14-18; Jn. 20:19-23)*

36 Ne' chesoe'te' dižan' ca', cate'cze gwzecha Jesúsen' gachol. Nach gože' legaque':

—Le soa binlo len xbab dan' yo'o lo' yichjlažda'olen'.

37 Perwleca besežebe' na' besyebande', gosacde' še chesele'ede' bxin che da' bene' guata'. 38 Nach Jesúsen' gože' legaque':

—¿Bichen' chacle tole? na' ¿bichen' chonle xbab ca' lo' yichjlažda'olen'?

39 Le na'šc ni'a na' nga cont gacbe'ele nedan'. Le can neda' cont gacbe'ele. Šaca' naca' bene' guat, bi nac žit bela' chia' ca dan' chle'ele nga.

40 Beyož gwne' ca', blo'ede' legaque' ni'a ne'e ca'. 41 Na' legaque' bina' yeyož yesejle'e catec chesyebande' na' catec chesyebede'. Nach Jesúsen' gože' legaque':

—¿De late' da' gagua'?

42 Nach bosonežjue'ne' late' yid bel gague' na' late' chixe beser da' yože šina'ba'. 43 Gwxi'en na' gwdagüen' laogaquen'. 44 Nach gože' legaque':

—Ba gwnia' le'e cate' ne' zoalena' le'e cheyala' gac yogo'lol da' ca' bsi' Diosen' xneze zjanyoj chia' le'e ley dan' bzoj da' Moisés, na' le'e dan' bosozoj bene' ca' goso'e xtiža' Diosen' cani', na' lecze ca' da' nyoj le'e Salmos ca'.

45 Nach ben Jesúsen' cont gosejni'ide' da' ca' zjanyoj che' le'e Xtiža' Diosen'. 46 Na' gože' legaque':

—Benen byen goc da' quinga cont goc can' nyojen žan neda' gata' na' yebana' ladjo bene' guat yeyon ža, neda' naca' Cristo ben' gwlej Diosen' yedenabia'. 47 Na' le'e cheyala' güe'le xtiža'na' len bene' že' yogo' nación. Solaotecle güe'len Jerusalén. Güe'le xtižan' nale cheyala' yesyetinje benachen' xtola'gaquen' cont Diosen' yezi'xene' chegaque'. 48 Le'e cheyala' güe'le diža' che da' quinga ba ble'ele dan' ba goc chia'. 49 Na' lecze sela' Spiritw che Xa' Diosen' yedesoan len le'e can' gwnen'. Na' le yega'an lo ciuda nga na'a cuezle gon Xa' Diosen' le'e yela' guac da' za' yaba.

### *Beyep Jesúsen' yaba*

*(Mr. 16:19-20)*

50 Na' Jesúsen' gwche'e legaque' ja'aque' gan' chi' yež dan' nzi' Betania na' gwlis ne'e gwñabde' Diosen' gone' cont nite' mbalaz. 51 Na' ca beyoža' beyepe' yaban'. 52 Na' bene' ca' gosaque' le' txen besyega'ane' yešlož dao' gosonxene' Jesúsen' nach jaya'aque' Jerusalénna', chesyebegüede'.

53 Na' gwnita'teze' lo' yodao' blaona' chesonxene' Diosen'. Da' na'ze chzoja' na'a.

## DIŽA' GÜEN DAN' BZOJ SAN JUAN

*Jesucristo ben' nzi' Xtiža' Dios golje' goque' beṇach*

<sup>1</sup> Cate' gwxe yežlion' ba zoacze ben' nzi' Xtiža' Dios. Zoe' len Diosen' na' lecze naque' Dios. <sup>2</sup> Cate' gwxe yežlion' ba zoacze' len Diosen'. <sup>3</sup> Len' bene' yogo' beṇach, yogo' angl, yogo' da' ca' beyac da' mal, yogo' beyixe' na' bite'teze da' dech. Bibi de da' gwxe da' bi ben ben' nzi' Xtiža' Dios. <sup>4</sup> Le' nse'e yela' mban. Na' ben' ba zjanape' yela' mban toli tocaṇe da' none', legaquen' ba yo'o be'ni' lo' yichjlažda'ogaquen'. <sup>5</sup> Ben' nzi' Xtiža' Dios bide' nse'e be'ni' che yichjlaždao' beṇachen', na' la'czla' beṇe' zan bi gosejnilaže'ne' na' bi gwyo'o be'ni' chen' lo' yichjlažda'ogaque', bi gosezquede' yosocue'eje' be'ni' che'na'.

<sup>6</sup> Gwzooa to beṇe' le Juan, na' Diosen' gwsele'ne'. <sup>7</sup> Juanna' ben' bzoe' beṇe' nis bedeye'e diža' che ben' nsa' be'nin', cont yogo' beṇach guac yesejnilaže'ne'. <sup>8</sup> Gague Juanna' nac beṇe' nsa' be'nin', san le' bedeye'e xtiža' ben' nsa' be'ni' che yichjlaždao' beṇachen'. <sup>9</sup> Ba bžin ža be'ni' da' nac da' dogualje ba blan' yežlio nga, na' blan' cont gwseṇin' lo' yichjlaždao' note'teze beṇe'.

<sup>10</sup> Ben' nzi' Xtiža' Dios zoe' yežlion' cate' gwxteten. Na' la'czla' len' bene' yežlion' ben' že' yežlion' bi gosacbe'ede' non' naque'. <sup>11</sup> Golje' ladjo neto' beṇe' gualaž che', perw zan neto' beṇe' gualaž che' bi gwyejle'to' chen'. <sup>12</sup> San balteze chio' gwyejle'cho che', chio' gwyejnilaže'chone', bene' cont naccho xi'in Dios. <sup>13</sup> Na' gague lagüe goljcho nita' xaxna'cho zjanaque' beṇe' bela' chen ba naccho xi'in Dios. Na' gague lagüe to beṇe' byo gwzoalene' to no'ole ba naccho xi'in Dios, na' gague lagüe beṇe' byon' gocláže' soa xi'ine' ba naccho xi'in Dios, san da' chejnilaže'chone', da'nan' non Diosen' chio' xi'ine'.

<sup>14</sup> Jesucristo ben' nzi' Xtiža' Diosen' golje' goque' beṇach na' gwzoe' len neto'. Na' ble'eto' naque' beṇe' zaca' juisyw, le togue' naque' dogualje Xi'in Dios. Leca nži'ilaže'de' chio' beṇach na' bedezejni'ide' chio' diža' li che Diosen'. <sup>15</sup> Juanna' ben' bzoe' beṇe' nis be'e diža' che', gwne':

—Che bengan' bi'a diža' cate' gwnia': “Beṇe' za' za' zaca'che' ca neda', le ba zoacze le' cate' biṇa' soa' neda'.”

<sup>16</sup> Jesucriston' nži'ilaže'chgüede' yogo' chio' chejnilaže'chone' na' zoacze' chaclenchgüe' chio'. <sup>17</sup> Da' Moisésen' bzejni'ide' da' xoxxta'o neto' beṇe' Israel ley che Diosen' na' chlo'en yogo'cho napcho doła', na' Jesucriston' bedelo'ede' nži'ilaže' Diosen' chio' beṇach na' bedezejni'ide' chio' diža' li che Diosen'. <sup>18</sup> Nono na' soa beṇe' ba ble'ede' Diosen'. Toz ben' nac dogualje Xi'in Dios beṇe' tliša' ba bzejni'ide' chio' beṇach can' nac yichjlaždao' Diosen', le chacchgüe Diosen' le'.

*Juan ben' bzoe' beṇe' nis be'e xtiža' Jesúsén'*

*(Mt. 3:11-12; Mr. 1:7-8; Lc. 3:15-17)*

<sup>19</sup> Beṇe' chesenabi'e nación Israel cheton' beṇe' že' Jerusalén gososele' to chope bxož na' yebale beṇe' gosalje lo diaža che da' Leví cont gosenabde' Juanna' non' naque'. <sup>20</sup> Na' Juanna' bi bedi'ide', be'e diža' li gože' legaque':

—Gague nedan' Cristo ben' chbezcho seła' Diosen' yedenabi'e nación chechon'.

21 Nach gose'ene':

—¿Nox naco'? ¿Naco' da' Elías ben' be' xtiža' Diosen' cani'?

Na' gože' le'gaque':

—Bi naca' le'.

Nach gosenabde' le':

—¿Naco' ben' naquen yide' yedeye'lene' neto' xtiža' Diosen'?

Na' boži'en gwne':

—Bi naca'.

22 Nach da' yoble gosenabde' le':

—¿Non' naco'? cont ye'to' bene' ca' gosesele' neto'. ¿Bi ža togo' che cuino'?

23 Nach Juanna' gože' le'gaque':

—Neda' naca' ben' chne zižje to latje daš, žia': "Le gwža' yichjlažda'olen' cont gwzenagle che Xanchon' cate' yide'", can' gwna da' Isaiás ben' be' xtiža' Diosen' cani'.

24 Bene' ca' ja'ac lao Juanna', bene' fariseo ca' gosesele' le'gaque'. 25 Nach gose'ene':

—¿Bixchen' chzo' bene' nis še bi naco' Criston' naca naco' Elíasen' na' naca naco' ben' chbezcho yedeye'e xtiža' Diosen'?

26 Nach Juanna' gože' le'gaque':

—Neda' chzoa' bene' nis, na' gacho le'e ba zoa to bene' bina' gombia'le.

27 Len' za' gwlo'elagüe' na' zaca'che' ca neda', na' da' nacchgüe' bene' zaca' bitw zaca' gona xmandadoe' lechja' no xe'le'.

28 Yogo' da' quinga goquen gan' nzi' Betábara dan' chi' yešla'a yegw Jordán gan' chzoa' Juanna' bene' nis.

*Jesúsen' yeque'e xtoła' benachen'*

29 Na' beteyo Juanna' ble'ede' zej Jesúsen' gan' zoen' na' gože' ben' chosozenag che':

—Le na' ben' za' nga, Diosen' ba gwsele'ne' cont yeque'e xtoła' benachen'. Bena' zaca'lebe' ca xila' dao' ben' chot chio' bene' Israel cont Diosen' chezi'xene' xtoła'chon'. 30 Che len' bi'a diža', gwnia': "Ben' za' za' zaca'che' ca neda', na' le' ba zoacze' cate' bina' soa' neda'." 31 Neda' bi gocbe'eda' non' naque' perw Diosen' bzejni'ide' neda', na' da'nana' zedezoa' bene' nis cont yogo' chio' bene' Israel gacbe'echo non' naque'.

32 Juanna' le'ce gwne':

—Ble'eda' cate' betj Spiritw che Diosen' yaban' bžinen gan' zoa Jesúsen'. Bžinen ca to ngolbex na' bega'anen len le'. 33 Neda' bi gocbe'eda' še Jesús nan' naque' ben' gwseła' Diosen', nach Dios ben' gwsele' neda' chzoa' bene' nis gože'nda': "Le'edo' yetj Spiritw chia' na' yega'anen len bene' ba mbeja'. Len' naque' bene' gon cont soa Spiritw chian' lo' yichjlaždao' bene' na' nabian' le'gaque'." 34 Ba ble'eda' goc can' gwne' na' cho'a diža' le' bengan' Xi'in Dios.

*Bene' nechw ca' gwlej Jesúsen' cont gosaque' le' txen*

35 Beteyo Juan ben' bzoa' bene' nis zeche' da' yoble len yechope bene' zjanaque' txen len le'. 36 Na' cate' ble'ede' gwde Jesúsen', nach gože' bene' ca':

—Le na' ben' gwseła' Diosen' ben' zaca'lebe' ca xila' dao' ben' chot chio' bene' Israel cont Diosen' chezi'xene' xtoła'chon'.

37 Na' cate' bene' ca' chope, ben' zjanaque' txen len Juanna', gosende' can' gwnen' nach ja'aclene' Jesúsen'. 38 Nach beyechj Jesúsen' na' gwne'e le'gaque' zjana'ogüe'ne', na' gože' le'gaque':



—¿Bi chaclaže'le?

Na' gose'ene':

—Maestrw, ¿gan' zo'?

<sup>39</sup> Nach gože' legaque':

—Le šo'o na' le'ele.

Nach ja'aclene'ne' na' besele'ede' gan' zoen', na' besyega'anlene' le' žana', le ba nac bagwže', ca do cheda tap.

<sup>40</sup> Na ca nac beņe' ca' chope' bosozenag xtiža' Juanna' na' gosa'ogüe' Jesúsen', toe' Andrés, beņe' biše' Simón Pedro. <sup>41</sup> Na' Andrésen' za' gone' bichle da' za' gone' na' jel güiže' Simón bišen' na' gože' le':

—Ba bežaglaoto' ben' chesene' Mesías, ben' ba gwlezcho yide' yedenabi'e nación Israel chechon'. —Na' Mesías zeje diža' Cristo.

<sup>42</sup> Nach Andrésen' gwče'e beņe' bišen' gan' zoa Jesúsen'. Na' cate' Jesúsen' ble'ede' Simónna' gože'ne':

—Len' Simón xi'in Jonás. Perw yososi' beņe' le' Cefas. (Na' Cefas zeje diža' Pedro.)

*Jesúsen' gwleje' Felipe na' Natanael cont bsed blo'ede' legaque'*

<sup>43</sup> Beteyo Jesúsen' gwčhoglagüen' yeyeje' Galilean' na' jane'e Felipen' na' gože'ne':

—Yo'o len neda'.

<sup>44</sup> Felipen' goque' beņe' Betsaida gan' nac laž Andrésen' len Pedron'.

<sup>45</sup> Nach Felipen' jane'e Natanaelen' na' gože'ne':

—Bač ble'eto' ben' bzoj da' Moisésen' xtižen' le'e da' ca' gan' bzoje' ley chechon', na' lecze xtiže'na' bosozoj beņe' ca' goso'e xtiža' Diosen' cani'. Len' Jesús beņe' Nazaret, ben' nac xi'in José.

<sup>46</sup> Nach Natanaelen' gože'ne':

—¿Bat benecho yesene' Nazaret na' choj beņe' zaca'?

Nach gož Felipen' le':

—Yo'o cont le'edo'.

<sup>47</sup> Na' Jesúsen' ble'ede' bač zej Natanaelen' gan' zoe'na' nach gwne':

—Na' za' to bene' Israel gualaž chechon' beņe' naque' beņe' güen. Ne late'ze bi naque' beņe' gwxiye'.

<sup>48</sup> Natanaelen' bende' xtiža' Jesúsen' na' gože'ne':

—¿Nac chac nombi'o neda'?

Na' Jesúsen' gože'ne':

—Ble'eda' le' šlac zechao' xan yag yixgüigw cate' za' ne Felipen' le'.

<sup>49</sup> Nach Natanaelen' gwne':

—Maestrw, len' naco' dogualje Xi'in Dios. Len' naco' ben' chbezto' seļa' Diosen' yedenabi'o nación Israel chechon'.

<sup>50</sup> Na' Jesúsen' gože'ne':

—¿Da' gwnia' ble'eda' le' xan yag yixgüigw nan' chejli'o chia'? Da' zaca'ch ca da' quinga za' le'edo'. <sup>51</sup> Da' li chnia', le'ele yaban' gan' zoa Diosen' gaquen ca to da' chyaljo na' beņe' ca' zjanac angl che' chep chetj yesaque' yežlio gan' zoa' nga, le neda' naca' ben' gwseļa' Dios golja' beņaç.

## 2

*Gota' to yela' güešagna' yež da' nzi' Caná*

<sup>1</sup> Beyon ža gota' to yela' güešagna' yež da' nzi' Caná gan' mbane distritw Galilea. Na' xna' Jesúsen' gwyeje' liž ben' gan' gota' yela' güešagna'na'. <sup>2</sup> Na'

lecze gosaxe' Jesúsen' len bene' ca' zjanaque' le' txen cont ja'aque' gan' chac yela' güešagnan'. <sup>3</sup> Na' bebiž vino dan' chese'ej bene' ca' že'na', na' xna' Jesúsen' gože' le':

—Bich bi vino čhegaque' de.

<sup>4</sup> Na' gož Jesúsen' le':

—¿Bixchen' žo' ca'? le biña' žin hor gwlo'a non' naca'.

<sup>5</sup> Na' xne'ena' gože' bene' ca' cheson mandadon':

—Le gon bite'tez da' ne'.

<sup>6</sup> Na' nita' xop yeso' de yej ga chož nis da' chosočhin bene' Israel gualaž čheto' ca' par chesa' cheseyib cuine' can' ža ley čheton'. Na' to to yej ca' chožen do xono' che'e o do ši che'e nis. <sup>7</sup> Nach Jesúsen' gože' bene' güen mandadw ca':

—Le yosša' yeso' yej ca' nis.

Na' gosegue'en nis goseža'ten. <sup>8</sup> Nach gože' legaque':

—Le gaše' laten' na'a na' le šjanežjon ben' yo'o lo ne'e lnin'.

Na' gosone' can' gwnen'. <sup>9</sup> Na' ben' yo'o lo ne'e lnin' con bnixen' bi nezde' gan' zan', con bene' ca' cheson mandadw na'ze gosenezde' nisen' beyaquen vino, le legaquen' gosaše' nisen'. Na' bena' bnixen' na' goxe' bene' byo ben' bšagnan', <sup>10</sup> na' gože'ne':

—Yogo'ze bene' chon lni chdie' vino güen da' chzaca' la'ay cate' chzolao lnin', na' cate' ba zjane'eje' da' zil nach cho'e legaque' da' corrient. San le' bzago' vino šagüen' chdion' na'a ba cheyož lnin'.

<sup>11</sup> Da' nga ben' Jesúsen' yež Caná distritw Galilea goquen yela' guac nechw da' bene' cont blo'e naque' bene' zaca'chgua, nach bene' ca' gwleje' cont gosaque' le' txen gosejnilaže'ne'.

<sup>12</sup> Gwde na' Jesúsen' gwyeje' Capernaum len xne'e na' len bene' biše' ca', na' len bene' ca' zjanaque' le' txen, na' besyega'ane' na' chop šone ža.

*Jesúsen' bebeje' bene' cheson ya'a chyo'o yodao' blao*

*(Mt. 21:12-13; Mr. 11:15-18; Lc. 19:45-46)*

<sup>13</sup> Na' ba zoa gala' lni čhe neto' bene' Israel da' nzi' paschw, nach Jesúsen' gwyeje' Jerusalén len bene' ca' zjanaque' le' txen. <sup>14</sup> Cate' bžine' chyo'o yodao' blaon' bene' zan že' chesote' go'n na' xila' na' ngolbex, na' zjachi' bene' chosoše'e mechw. <sup>15</sup> Jesúsen' ble'ede' can' chaca' na' bene' to tašjw de do na' bčhinen' cont bebeje' yogo' bene' ca' že' chyo'o yodaon', len xila' ca', len go'n ca', na' beslase' xmechw bene' chosoša' mechon' na' gwlo'on'i'ane'e xmesgaquen'. <sup>16</sup> Na' gože' bene' ca' chesote' ngolbexen':

—Le yebej yogo' be qui nga. Bi gonle ya'a liž Xa' nga.

<sup>17</sup> Nach bene' ca' zjanaque' le' txen jaseza'laže' can' nyoj Xtiža' Diosen' gan' žan: “Da' chi'chgua yičhja' čhe ližon' chonten ga saca'zi'chgua.”

<sup>18</sup> Na' ben' chesenabia' nación Israel čheton' gose'ene':

—¿Bi yela' guac gonon' da' le'eto' cont šejle'to' zaco' bebejo' bene' ca'?

<sup>19</sup> Jesúsen' boži'e xtiža'gaquen' gwne':

—Le yochinj yodao' nga na' šone žaze yeyonan'.

<sup>20</sup> Nach bene' gwnabia' ca' gose'ene':

—Xopeyon iz byažjen gosone' yodao' nga, čhacdo' guac yeyonon' šone žaze?

<sup>21</sup> Perw Jesúsen' bsaca'lebde' cuerp čhen' yodao' cate' gwne' ca', na' legaque' gosone' xbab čhe yodao' na'zen' gwne' ca'. <sup>22</sup> Na' cate' bžin ža beyas bebane' ladjo bene' guat ca', bene' ca' zjanaque' le' txen jaseza'laže'

can' gwnen' na' gosejle'e Xtiža' Diosen' dan' nyoj che' na' lecze gosejle'e xtiža' Jesúsen'.

*Jesúsen' nezde' bin' yo'o lo' yichjlaždao' benachen'*

<sup>23</sup> Šlac gwzoa Jesúsen' Jerusalénna' lo lni pascon' bene' zan besele'ede' yela' guac ca' dan' benen' na' gosejle'e naque' bene' gwsela' Dios. <sup>24</sup> Perw Jesúsen' bi ben cuine' lo na'gaque', le nombi'e yichjlaždao' benachen'. <sup>25</sup> Bi byažjde' no ye' le' xbab da' yo'o lo' yichjlaždao' bene' ca'. Le nezeczede' bin' yo'o lo' yichjlaždao' to to chio' benach.

### 3

*Jesúsen' len Nicodemo*

<sup>1</sup> Na' gwzoa to bene' fariseo bene' le' Nicodemo. Goque' to bene' gwnabia' che naci6n Israel cheton'. <sup>2</sup> Gwyeje' lao Jesúsen' šeže'le na' gože'ne':

—Maestrw, nezeto' Diosen' gwsele' le' cont chzejni'ido' neto', le nono gac gon yela' guac ca' dan' chonon' še bi zoa Diosen' len le'.

<sup>3</sup> Na' gož Jesúsen' le':

—Da' li chnia' le', še non' bi galje yeto bi gac šjayzoe' gan' zoa Diosen' chnabi'e.

<sup>4</sup> Nach gož Nicodemon' le':

—¿Nac gon to bene' galje' še' ba naque' bene' gole? ¿Guaquech yeyo'e lo' le'e xne'en' cont galje' yeto?

<sup>5</sup> Na' Jesúsen' gozne':

—Chnia' le'e to da' zejen, še non' bi galje' len nis na' len Spiritw che Diosen', bi gac šjayzoe' gan' zoa Diosen' chnabi'e. <sup>6</sup> Bene' zjanaque' bela' chen chesenita' xi'ingaque' lecze bi' bela' chen. Na' Spiritw che Diosen' chnezjon yela' mban toli tocaņe che bene' chesejnilaže' Diosen'. Da'nana' žacho chesalje' yeto. <sup>7</sup> Bi yebando' dan' gwnia' chonen byen yogo' bene' galje' yeto. <sup>8</sup> Cate' chechj be' chechjen gate'teze, na' chendo' cholyoyen perw bi nezdo' ga zan' na' neca nezdo' ga šejen. Ca'czen' naquen len yogo' bene' chon Spiritw che Diosen' cont chesalje' da' yoble. Bi chle'echo da' chon Spiriton' perw nacia' ba bocoben yichjlažda'ogaque'.

<sup>9</sup> Nach Nicodemon' gože'ne':

—¿Nacxe gac can' žo' nga?

<sup>10</sup> Na' gož Jesúsen' le':

—Le' chsed chlo'edo' bene' Israel gualaž chechon' xtiža' Diosen', ¿bi chejni'ido' da' quinga? <sup>11</sup> Da' li neto' chyixjue'eto' da' nezeto' na' choe'to' diža' che da' ba ble'eto' na' bi chejle'le. <sup>12</sup> Ba bia' diža' che dan' chac yežlio nga na' bi chejle'ele. ¿Nac gac šejle'le še nia' le'e da' chac yaban'?

<sup>13</sup> 'Toze neda' naca' ben' gwsela' Diosen' golja' benach za'a yaba na' noch no zoa no ba beyep yaba cont nezde' che Diosen'. <sup>14</sup> Na' can' goc latje daš can' cate' gwłis da' Moisésen' beł de bronze bde'eba' to le'e yag, can' cheyala' gac yeselise' neda' to le'e yag, neda' gwsela' Diosen' golja' benach. <sup>15</sup> Na' gac chia' ca' cont note'teze bene' yesejnilaže' neda' bi cuiaye'e san gata' yela' mban che' toli tocaņe.

*Chaque Diosen' benachen'*

<sup>16</sup> 'Leca chaque Diosen' chio' benach, na' gwsela' Xi'ine' bene' tliša' cont note'tez bene' chejnilaže'ne' bi cuiaye'e, san gata' yela' mban che' toli tocaņe. <sup>17</sup> Na' Diosen' gwsele' Xi'inen' yežlio nga gague cont gwnežjue'

castigw che xtoła' beṇaḇhen', san cont gwnežjue' yela' mban ɕhegaque' toli tocaṇe.

<sup>18</sup> Note'tez beṇe' chesejnilaže' Xi'in Diosen' beṇe' tlišan', bi yesezi'e castigw che xtoła'gaquen', perw beṇe' bi chesejnilaže'ne' ba nchoglaon ɕhegaque' yezezaca'zi'e toli tocaṇe da' bi chesejnilaže' Xi'in Dios beṇe' tlišan'. <sup>19</sup> Na' can' naquen, beṇe' bi chesejnilaže' Xi'in Diosen' ba nchoglaon ɕhegaque' yezezaca'zi'e toli tocaṇe. Nchoglaon yezezacazi'e, le ba bid Xi'in Diosen' nse'e be'ni' che yichjlaždao' beṇaḇhen' perw na' chesyebchde' dan' nac ɕhol' cled ca be'ni' ɕhen', dan' chesone' da' malen'. <sup>20</sup> Yogo' beṇe' cheson da' mal chesegue'ede' be'ni' ɕhen' na' bi chesazlaže' yosozenague' ɕhe' cont bi gwlo'elaon še chesone' da' mal. <sup>21</sup> San note'tez beṇe' cheson can' ža diža' li che Diosen', chesyebede' chosozenague' ɕhe Criston', le chlo'en zoacze Diosen' chaclene' legaque' cont chesone' can' ža diža' li ɕhen'.

*Juan ben' bzoa beṇe' nis be'che' diža' che Jesúsen'*

<sup>22</sup> Gwde na' Jesúsen' len beṇe' ca' zjanaque' le' txen ja'aque' yež dao' ca' zjachi' gan' mbane distritw Judean'. Na' šlac gosenite' na' bosozoe' beṇe' nis. <sup>23</sup> Na' Juanna' lecze bzoe' beṇe' nis yež gan' nzi' Enón da' chi' gała'ze Salim, le na' dechgua nis. Na' ja'ac beṇe' gan' gwzoen' cont bzoe' legaque' nis. <sup>24</sup> Caten' bina' yeseyiɕjue' Juanna' ližyan' goc ca'.

<sup>25</sup> Nach gwche' to žaš len beṇe' ca' zjanaque' txen len Juanna' na' yeto ɕhope beṇe' Israel gualaž ɕheto' ɕhe dan' chesezoa beṇe' nis. <sup>26</sup> Nach ja'aque' lao Juanna' na' gose'ene':

—Maestrw, ben' gwzoa len le' yešla'a yegw Jordánna', ben' cho'o xtižen', baɕ chzoe' beṇe' nis na' yogo'ze beṇe' chja'aque' gan' zoe'na'.

<sup>27</sup> Nach Juanna' gože' legaque':

—Nono gaxene' še bi gon Diosen' cont yesonxen beṇe' le'. <sup>28</sup> Nezczele can' ba gwnian', bi naca' Cristo ben' chbezcho seła' Diosen' yedenabi'e chio', san naca' ben' gwseła' Diosen' cont bia' xtižen' žialaole. <sup>29</sup> Cate' chac to yela' güešagna', toz beṇe' byo ben' chšagnan' chzi'e no'olen'. Perw še zoa beṇe' migw che' len le' ža'na, chebede' cate' ben' chšagnan' že' zoe' mbalaz. Can' chac len neda', chbechgüeda' beṇe' zan chosozenague' ɕhe Criston'. <sup>30</sup> Len' cheyała' šejch yesonxen beṇe' le' na' neda' cheyała' šejch yesanlaže' neda'.

*Beṇe' za' gan' zoa Diosen'*

<sup>31</sup> Ca nac Cristo ben' za' gan' zoa Diosen', le' naque' beṇe' zaca'ch ca yogo'loł beṇe'. Yezica'chle beṇaḇ zjanaque' beṇe' ɕhe yežlio ngaze na' ɕhe yežlio ngaze cheso'e diža'. Perw na' Cristo ben' za' gan' zoa Diosen' zaca'che' ca yogo'loł beṇe'. <sup>32</sup> Le' cho'e diža' ɕhe da' ca' ba ble'ede' na' diža' da' ba bende' gan' zoa Diosen', na' nono chzenag xtižen'. <sup>33</sup> Na' note'tez beṇe' chosozenag xtiža' ben' za' gan' zoa Diosen', nachia' bena' nežde' Diosen' cho'e diža' li. <sup>34</sup> Na' bena' gwseła' Diosen', bena' za' gan' zoe'na', len' cho'e xtiža' Diosen', le Spiritw ɕhe Diosen' zoan len le', na' cate' Diosen' chone' Spiritw ɕhen' bi chyisen' late' güeje. <sup>35</sup> Diosen' chacde' Xi'ine' Criston' na' ba bene' lo ne'e yogo'loł da' de yežlion'. <sup>36</sup> Na' beṇe' ca' chesejnilaže' Xi'in Diosen' de yela' mban ɕhegaque' toli tocaṇe, san beṇe' cheson güedenag len Xi'in Diosen', bi gata' yela' mban ɕhegaque', le Diosen' gone' cont yezezaca'zi'e toli tocaṇe.

## 4

*Jesúsen' be'e diža' len to no'ole Samaria*

<sup>1-3</sup> Na' goquen' bene' zanch chosozenague' che Jesúsen' ca bene' chosozenag che Juanna', na' bene' zanch chesezoa nis len Jesúsen' ca bene' chesezoa nis len Juanna', la'czla' gague cuin Jesúsen' bzoe' bene' nis, bene' ca' zjanaque' le' txen gosonen'. Nach cate' Jesúsen' gwneзде' bene' fariseo ca' gosacbe'ede' bene' zanch zjana'ogüe' le', nach beze'e distritw Judean' na' beyeje' distritw Galilean' len bene' ca' zjanaque' le' txen.

<sup>4</sup> Na' benen byen zjaya'aque' nez da' chde Samarian'. <sup>5</sup> Ca' goquen' besežine' to yež da' nzi' Sicar lo distritw Samarian'. Yežen' chega'anen gala'ze gan' de yežlio dan' bnežjw da' Jacob da' xi'ine' José. <sup>6-8</sup> Na' žia to bej da' nacchgua sitjw da' nzi' Bej che da' Jacob. Ca do guagwbiž Jesúsen' ba chjaxaquede' ngüe'e nezen' nach gwchi'e cho'a bejen'. Na' bene' ca' zjanaque' le' txen ba zja'aque' lagüe yežen' zjasexi'e da' yesagüe' len le', cate' bžin to no'ole Samaria cho'a bejen' cont güe'e nis. Na' Jesúsen' gože'ne':

—Ben late' nis ye'eja'.

<sup>9</sup> Na' no'ole Samarian' boži'en gože'ne':

—¿Nacxečen' le' naco' bene' Israel chnabdo' neda' nis ye'ejo'? le no'ole Samaria neda'.

(Na' ca nac bene' Israel gualaž cheto' ca', bi cheseņe lježe' len bene' Samaria ca'.) <sup>10</sup> Nach Jesúsen' gože'ne':

—Neda' ba goša' le': “Ben late' nis ye'eja'”, na' šaca' nezdo' da' chaclaže' Diosen' gone' le' na' šaca' chacbe'edo' non' naca' neda', ba gwnabdon' neda' na' ba beña' le' nis da' choņ yeļa' mban toļi tocaņe šaca'.

<sup>11</sup> Na' no'olen' gože'ne':

—Bene', bi noxo' bi gaše'don' na' bej nga naquen sitjw. ¿Gaxe si'o nis da' choņ yeļa' mbanņa' žo' ca'? <sup>12</sup> ¿Chacdo' zaca'cho' ca da' xoxxta'ocho Jacob ben' bocua'an len neto' bej nga gan' güe'eje' len xi'ine' ca' na' len beyixe' che' ca'?

<sup>13</sup> Gož Jesúsen' le':

—Note'tez bene' ye'ej nis che bej nga bia'cze bilde' da' yoble. <sup>14</sup> Na' note'tez bene' ye'ej nisen' gwnežjua'ne' neda', gwbatech bilđen' da' yoble, le dan' gwnežjua'nen' gaquen lo' lažda'ogüe' ca to latje ga chaldi nis cont gata' yeļa' mban che' toļi tocaņe.

<sup>15</sup> Na' no'olen' gože'ne':

—Bene', beņ neda' nisen' žo' ca' cont bich bilđan' na' bich yida' dexian' nga.

<sup>16</sup> Jesúsen' gože'ne':

—Beyej jel güiž bene' chio' na' le da nga.

<sup>17</sup> Nach gože' Jesúsen':

—Notno bene' chia' zoa.

Na' Jesúsen' gože' no'olen':

—Ledo' can' gwnaon' nono bene' chio' zoa, <sup>18</sup> le gayo' bene' chio' ba gwnita' na' bene' zoaleno' na'a gague naque' bene' chio'. Da' li can' ba gwnaon'.

<sup>19</sup> Na' gož no'olen' le':

—Bene', chacbe'eda' naco' to bene' chac chyixjue'ede' bi da' ža Diosen'.

<sup>20</sup> Da' xoxxta'o neto' bene' Samaria gosonxene' Diosen' lo ya'an zoa nga, na' le'e nacle bene' Israel žale Jerusalénņa' cheyaļa' gonxenchone'.

21 Jesúsen' boži'en gože'ne':

—No'ole, gwyejle' chia', gwžin ža cate' bi gonen byen gonxenle Diosen' lo ya'a nga ne Jerusaléna'. 22 Le'e nacle bene' Samaria bi nombia'ya'e'le Dios ben' chonxenle. Neto' bene' Israel nombia'to' Dios ben' chonxento', na' ladjo' neto' bene' Israel choj ben' yebej benachen' lo da' malen'. 23 Chžin ža na' na'a ba gole', cate' bene' yesonxene' Xacho Diosen' can' cheyala'cze yesonxene' le', gate'tez nite', lo' yichjlažda'ogaquen' yesonxene' bene' naque' dogualje Dios, le Xacho Diosen' cheyiljue' bene' yesonxene' le' ca'. 24 Diosen' bi naque' bene' bela' chen, naque' spiritiw. Da'nan' bene' yesonxen le', lo' yichjlažda'ogaque' cheyala' yesonxene' bene' nac dogualje Dios.

25 Nach no'olen' gože'ne':

—Nezda' yid ben' ba gwlej Diosen' cont yedenabi'e chio', ben' nzi' Mesías o Cristo, na' cate' le' yide' yedezejni'ide' chio' yogo' da' quinga.

26 Nach Jesúsen' gože' no'olen':

—Neda' choe'lena' le' diža' naca' ben' žo' ca'.

27 Ne' choe'lente Jesúsen' no'olen' dižan' cate' bene' ca' zjanaque' le' txen besyžine' cho'a bejen'. Na' besyebande' choe'lene' to no'ole diža', perw ne toe' bi gosnabde'ne' bi dižan' choe'lene' no'olen' o bixchen' chšaljlene' le'. 28 Nach no'olen' bocua'an che'e nis chen' na' beyeje' lo yežen' jayeže' bene' gualaž che' ca':

29 —Le šo'o le na' to bene' ba gože' neda' yogo'te da' ba bena'. ¿Še bengan' Cristo ben' chbezcho yedenabi'e?

30 Na' besežaše' yežen' ja'aque' gan' chi' Jesúsen'. 31 Na' šlac zjayda no'olen', bene' ca' zjanaque' Jesúsen' txen gosata'yoede' le', chese'ene':

—Maestrw, gwdagw.

32 Na' Jesúsen' gože' legaque':

—Bi nezele de to yela' guagw chia'.

33 Na' gose' lježe':

—¿Gague ba bedesesan bene' da' gwdagüe'?

34 Na' gož Jesúsen' legaque':

—Len neda' naquen ca to yela' guagw chona' can' chazlaže' Dios ben' gwseła' neda' cont gac yogo' da' chnalaže'. 35 Le'e žale: “Ne' dech yetap bio' cont yedobe cosešen'.” Na' neda' chnia', le na' na' le'ele to coseš da' chyažje yedob na'a. 36 De da' goncho na'a cont bene' yosozenague' che Diosen' na' gata' yela' mban čhegaque' toli tocaŋe. Na' bene' cheseyixjue'ede' xtiža' Diosen' na' lente bene' chesone' cont yosozenag bene' xtižen' txen yesenite' mbalaz. 37 Diža' nga naquen da' li, žan: “Bene' yoble chaz na' bene' yoble chelap.” 38 Bač chseła' le'e šjaylaple gan' bi gozle, le le'e gonle cont yosozenag bene' xtiža' Diosen' dan' ba goseyixjue'e bene' yoble.

39 Na' ca nac bene' yež Sicar ga mbane Samaria, zane' gosejnilaže' Jesúsen' da' gosende' gwna no'olen': “Ba gože' neda' yogo' da' ba bena'.”

40 Nachen' besežin bene' Sicaren' gan' chi' Jesúsen' gosata'yoede' le' yega'anlene' legaque', na' bega'aŋe' čhope ža. 41 Na' bene' zanch gosejni-laže' Jesúsen' cate' gosende' diža' da' be' cuine'. 42 Nach gose'e no'olen':

—Bač chejle'to' na'a, gague dan' bzenagto' xtižo' na'ze, san da' ba beneto' choe' cuine' dižan', na' nezeto' bengan' Cristo ben' gwlej Diosen' cont yebeje' benachen' lo da' malen'.

*Jesúsen' beyone' xi'in to bene' gwnabia'*

43 Na' cate' goc *chop* ža, Jesúsen' len *bene'* ca' zjanaque' *le'* txen gosa'aque' jaya'aque' Galilea. 44 *Le* cuin Jesúsen' ba gwne' note'teze *bene'* cho'e xtiža' Diosen', bi chesonla'ançe *bene'* gualaž *chen'* *le'*. 45 Na' cate' besežine' Galilean' *bene'* gualaž *chegaquen'* bosolebe' Jesúsen' dan' ba besele'ede' yogo' da' güen da' bene' Jerusalénna' *lo* *lnin'*, *le* lencze *legaque'* ja'aque' *lnina'*.

46 Na' gozej Jesúsen' yetni'a yež Caná dan' chi' distritw Galilea gan' bene' cont nisen' beyaquen vino. Na' yež Capernaum gwzoa to *bene'* gwnabia' *bene'* chon žin *che* rey, na' chacšenchgüe *xi'ine'*. 47 *Xa* bi'na' cate' bende' ba bežin Jesúsen' Galilean' zeze'e Judean', nach gwyeje' lao Jesúsen' gwneyoede' *le'* šeje' šjayene' *xi'inen'*, *le* ba zoa gatbe'. 48 Na' Jesúsen' gože'ne':

—Še bi chle'ele *yeła'* guac na' bichle da' zaca' yebanele, bi chejle'le *chia'*.

49 Nach ben' chon žin *che* reyen' gota'yoede' *le'* gwne':

—*Bene'*, yo'ošca šlac *biña'* gat bi' *chian'*.

50 Na' Jesúsen' gože'ne':

—Beyej ližo', bi gat bi' *chion'*.

Nach gwyejle' bena' dan' gož Jesúsen' *le'* na' beze'e. 51 Ba zoa yežine' cate' jasešag xmoše' ca' *le'* na' gose'ene':

—Ba beyac bi' *chion'*.

52 Na' gwnabde' *legaque'* bi hor gwzolao beša'alaže'be', na' gose'e *le'*:

—Neje cheda to gwde guagwbiz bechojbe' da' *lan'*.

53 Na' *xaben'* gocbe'ede' ca' hor na'czen' gož Jesúsen' *le'* bi gat bi' *chen'*. Nach gwyejnilaže' Jesúsen', *le'* len yogo' *bene'* že' ližen'.

54 Da' nga goc *yeła'* guac gwchop da' ben Jesúsen' šlac beze'e Judean' na' bežine' Galilea.

## 5

*Jesúsen' beyone' to bene' nat late' cuerp che'*

1 Na' gwde to tiemp bžin ža goc yeto *lni* *che* neto' *bene'* Israel Jerusalénna', na' Jesúsen' gwyeje'. 2 Jerusalénna' gała'ze cho'a puert *che* ze'e da' nyečj ciudan' dan' nzi' Puert *che* Xila' žia to ga chož nis da' nzi' Betesda, na' ze gayo' chalšil cue'ej cuite gan' chož nisen'. 3 Na' *bene'* zan *bene'* güe' zjadie' chalšil ca', no *bene'* lchoł, no *bene'* nxinj ni'e, no *bene'* natsi' late' güeje *cuerp* *chegaquen'*. Zjadie' chesebeze' batcan' ta nisen'. 4 *Le* tgüeje betj to angl na' bte' nisen', na' *bene'* nechw *bene'* cho'e *lo'* nisen' cheyož chta anglen' len, cheyacde' bite'tez yižgüe' che'ede'. 5 Na' cate' bžin Jesúsen' na' de to *bene'* ba goc šino'šonechoa iz chacšende'. 6 Na' Jesúsen' ble'ede' ben' na' gocbe'ede' ba chac sša de' ca', na' gože'ne':

—¿Chaclažo' yeyaco'?

7 Na' *bene'* güen' gože' Jesúsen':

—*Bene'*, nono zoa no co' neda' *lo'* nisen' cate' chdan. Na' šlac zya'a cont šo'a, *bene'* yoble chyobde' chetje' *lo'* nisen'.

8 Nach gož Jesúsen' *le'*:

—Gwyas na' botobe xta'on na' gwda.

9 Na' *la'* beyacte bena' na' botob xte'en na' gwzolao chde'. Perw na' goquen' to ža *che* Dios cate' bi de *lsens* gon neto' *bene'* Israel žin. 10 Nach *bene'* gwnabia' *che* neto' *bene'* Israel gose'e bena' beyaquen':

—Ža *che* Dios *na'a*. Bi de *lsens* yeyoa' xta'ona'.

11 Na' gož ben' *legaque'*:

—Bena' beyon neda' gože'nda': "Botobe xtaon' na' gwda."

<sup>12</sup> Nach gose'ene':

—¿Non' gož le': "Botobe xtaon' na' gwda"?

<sup>13</sup> Na' ben' beyaquen' bi gwneзде' non' beyon le', le Jesúsen' benite' ladjo bene' zan ca'. <sup>14</sup> Gwdechle Jesúsen' bedile' bena' beyaquen' lo' yodao' blaon' na' gože' le':

—Bač beyaco' na'a, na' cheyała' cuejyichjo' da' malen' bich gonon', cont bi gac chio' to da' malech.

<sup>15</sup> Nach beza' bena' jatixjue'ede' bene' gwnabia' che nación Israel cheton' gože' legaque' Jesúsna' ben' beyon le'. <sup>16</sup> Da'nan' bene' gwnabia' ca' gwzolao gosebe'na'ogüe' Jesúsen' na' cheseyiljue' nacle yesone' yesote'ne' da' chone' yela' guac ca' ža che Dios cate' bi de lsens gon neto' bene' Israel žin. <sup>17</sup> Na' Jesúsen' gože' legaque':

—Xan' zoacze' chelalde' bate'teze na' lecze ca' neda'.

<sup>18</sup> Da'nan' goseyljwlaže'che' nacle yesone' yesote' Jesúsen', perw gague neče bi chone' can' ža ley gan' chgualan' che ža che Dios na'zen', san lecze da' gwne' Diosen' naque' Xe', le zejen toz ca' zaque' len Diosen'.

*Yela' chnabia' da' nape Xi'in Diosen'*

<sup>19</sup> Na' gož Jesúsen' legaque':

—Chnia' le'e to da' zejen, bibi chac gona' to gualaza'. Con da' chle'eda' chon Xan', lenna' chona', na' bite'teze da' chon Xan', lenna' chona', le neda' naca' Xi'ine'. <sup>20</sup> Chaque Xan' neda' na' chlo'ede' neda' yogo' dan' chone'. Na' gwlo'ede' da' zaca'ch ca' da' quinga da' gona' cont yebanele. <sup>21</sup> Ca Xa' Diosen' chosbane' bene' ladjo bene' guat ca', ca'cze chona' neda' naca' Xi'ine', chnežjua' yela' mban che note'tez bene' chbeja' cont gata' yela' mban čhegaque'. <sup>22</sup> Na' Xan' bi chchoglagüe' che ne to bene' še nape' doła', san ba gwlo'e lo' na' choglagua' che yogo' beñač še non' nap doła'. <sup>23</sup> Xan' chaclaže' yogo' bene' yesonxene' neda' lecze can' chesonxene' le'. Na' bene' bi chonxen neda', ne Xa' Diosen' bi chonxene', le le'na' gwsele' neda'.

<sup>24</sup> Chnia' le'e to da' zejen, bene' chosozenag xtižan' na' chesejnilaže' Dios ben' gwseła' neda', de yela' mban čhegaque' toli tocaņe. Na' bi yesezaca'zi'e toli tocaņe da' bi chesejnilaže'ne'. Bich zjanaque' ca' bene' guat len yichjlažda'ogaquen' da' bi chosozenague' che Diosen', san ba bocobe' yichjlažda'ogaquen' neče ba chesejnilaže'ne'. <sup>25</sup> Chnia' le'e to da' zejen, gwžin ža cate' bene' zjanac ca' bene' guat len yichjlažda'ogaque' yesende' xtiža' neda' naca' Xi'in Dios, na' bene' yosozenag chia' gata' yela' mban čhegaque' toli tocaņe, na' bač chzolao chac ca' na'a. <sup>26</sup> Xa' Diosen' zoacze' toli tocaņe na' chone' cont zjamban beñačen', na' lecze ba bene' cont neda' naca' Xi'ine' zoa' toli tocaņe na' chona' cont zjamban bene'. <sup>27</sup> Na' lecze ba bene' neda' yela' chnabia' cont nia' non' nap doła', le ba gwsele' neda' golja' beñač. <sup>28</sup> Bi yebanele dan' chnia' nga, le gwžin ža cate' yogo'lo' bene' guat že' lo' ba yesende' cate' yol güiža'ne'. <sup>29</sup> Na' bene' ca' goson da' güen šlac gosebane' yesyechoje' na' yesebane' toli tocaņe. Na' bene' ca' goson da' mal šlac gosebane' yesyechoje' na' yesezaca'zi'e toli tocaņe.

*Jesúsen' bzejni'ide' nape' yela' chnabia'*

<sup>30</sup> Bibi chac gona' to gualaza'. Chzenaga' bin' ža Xan' cont nia' che beñačen' noe' nap doła'. Na' dan' nia' gac che to to bene' naquen' da' cheyała' gac, le bi chi'yichja' gac dan' chnalaža'; san chi'yichja' gac can'



chnalaže' Xan' ben' gwsela' neda'. <sup>31</sup> Šaca' toz neda' chgua'a da' bali non' naca', bi naquen to da' šejle'le. <sup>32</sup> Perw zoa Xan' cho'e diža' li non' naca', na' nezda' diža' da' cho'e chia' naquen da' šejle'le. <sup>33</sup> Bač gwsela'le bene' lao Juanna' cont jasenabde'le' nac nac chia', na' Juanna' be'e diža' li non' naca'. <sup>34</sup> Perw neda' bi chyažjda' diža' da' güe' ne to beñač chia'. San chnia' da' quinga cont le'e šejle'le chia' na' gata' yela' mban chele toli tocañe. <sup>35</sup> Juanna' goque' ca to yi' da' chseni'chgua dan' bzejni'ide' le'e che Diosen', na' šlož daon' bebele dan' bsd blo'eden'. <sup>36</sup> Na' de to da' choe' xtiža' da' zaca'ch ca diža' da' choe' Juanna' chia': chona' yogoloł da' ba gwlo'o Xan' lo na' gona', na' da' ca' chonan' choen' diža' le Xan' gwsele' neda'. <sup>37</sup> Nach Xan' ben' gwsela' neda' lecze cho'e xtižan', la'czla' biña' yenele can' chnen' na' biña' le'ele can' naquen'. <sup>38</sup> Xtižen' biña' šon' lo' yichjlažda'olen', le bi chejnilaže'le neda' naca' ben' gwsele'. <sup>39</sup> Chsedyane'le gan' nyoj Xtiža' Diosen', le chaquele gaple yela' mban toli tocañe neche chsedlen. Na' da' ca' chsedlen' zjanyojen chesoen' xtiža'. <sup>40</sup> Perw bi chaclaže'le šejnilaže'le neda' cont gata' yela' mban chele toli tocañe.

<sup>41</sup> Na' neda' bi chyažjda' yesena benachen' naca' bene' zaca'. <sup>42</sup> Nombi'a le'e na' nezda' bi chaquele Diosen'. <sup>43</sup> Xan' ba gwsele' neda' chona' con da' že', perw bi chejle'le chia'. Na' cate' za'ac bene' cheson con bi da' ža xbab čegacze', nachle chejle'le čegaque'. <sup>44</sup> ¿Nacxe gac šejle'le chia'? le chzelaže'le yesena bene' chonle güen, na' bi chzelaže'le gonle cont toz Diosen' ne' chonle güen. <sup>45</sup> Bi gonle xbab neda' gwcuiša' le'e lao Xan'. Da' Moisésen' hcuiše' le'e lagüen', le chsedchguale dan' bzojen' chaquele cont soale binlo len Diosen', perw bi chejle'le xtižen'. <sup>46</sup> Šaca' chejle'le xtiža' da' Moisésen', chia' neda'czen' chejle'le še ca', le xtiža' nedan' bzoje'. <sup>47</sup> Na' da' bi chejle'le dan' bzoj da' Moisésen', ¿nacxe gonle šejle'le bi dan' žia' le'e?

## 6

*Jesúsen' bguagüe' gayo' mil bene'*

(Mt. 14:13-21; Mr. 6:30-44; Lc. 9:10-17)

<sup>1</sup> Gozde goc ca' Jesúsen' gweyeje' yešla'a nisdao' che Galilea len bene' ca' zjanaque' le' txen. Na' nisdao' na' lecze nzin' Nisdao' Tiberias. <sup>2</sup> Na' bene' zan zjanao' Jesúsen' da' ba besele'ede' yela' guac dan' chonen' cheyone' bene' güe' ca'. <sup>3</sup> Na' gwloe Jesúsen' to lo ya'a len bene' ca' zjanaque' le' txen na' gosebi'e. <sup>4</sup> Na' da' yoble ba zoa gala' lni che neto' bene' Israel da' nzi' pascw. <sup>5</sup> Na' cate' gwña' Jesúsen' ble'ede' bene' zan ba zjanao' le' na' gože' Felipen':

—¿Gaxe si'cho da' yesagw yogo' bene' quinga?

<sup>6</sup> Gwne' ca' yešque bi na Felipen', le Jesúsen' nezeczede' naquen' gone'. <sup>7</sup> Na' Felipen' gože'ne':

—Chop gayoa denario yetextilen' bi gaquen yesyechele to toe' ne late' güejen.

<sup>8</sup> Na' yeto ben' naque' Jesúsen' txen le Andrés na' naque' bene' biše' Simón Pedro. Na' Andrésen' gože' Jesúsen':

<sup>9</sup> —Nga zoa to bi' byo dao' na' de gayo' yetextil de cebada chebe' na' yechope beł ya'a. Perw ¿bi de gon da' quinga? le bene' zanna' že' nga.

<sup>10</sup> Nach Jesúsen' gože' bene' ca' zjanaque' le' txen:

—Le ye' yogo'lóle' yesebi'e.

Dechgua yixye latjen', na' gosebe' bene' ca' lo yixyena', ca do gayo' mil bene' byo, bi cuent no'ole len bidao'. <sup>11</sup> Nach gwxi' Jesúsen' yetextil ca', na'

beyož be'e yela' choxc̄len che Diosen' bnežjuen' bene' ca' zjanaque' le' txen cont goseyisen' len bene' ca' zjachi' na'. Na' lec̄z ca' bene' len beḷ ya'a ca'. Na' goso'e to toe' con ca'te'te' gosaclaže' gosagüe'. <sup>12</sup> Na' beyož gosagüe' ca'te'te' goseljde', Jesúsen' gože' bene' ca' zjanaque' le' txen:

—Le yotobe da' ca' bega'an late' güeje cont bibi cuiayi'.

<sup>13</sup> Nach bosyotobe' da' bixjw ca' dan' besyega'an lao gayo' yetextil ca' de cebad, na' goquen šižinw žome. <sup>14</sup> Cate' bene' ca' besele'ede' yela' guac dan' benen' nach gosene':

—Da' ḷi bengan' choe' xtiža' Dios na' naque' ben' ba gwlezcho seḷa' Diosen' yežlio nga.

<sup>15</sup> Na' cate' Jesúsen' gocbe'ede' ba zoa yeseche'exoxje' le' cont yesone' le' rey chegaque', nach gozze'e gozeje' ya'adaon' toze'.

*Jesúsen' gwze'e lo nisdaon'*

(Mt. 14:22-27; Mr. 6:45-52)

<sup>16</sup> Cate' ba gwxin, bene' ca' zjanaque' Jesúsen' txen jaya'aque' cho'a nisdaon'. <sup>17</sup> Na' besyeyo'e to lo' barcw zjaya'aque' ciuda Capernaum. Ba gol na' Jesúsen' bina' yežine'. <sup>18</sup> Na' chas chata' chac nisdaon' le chechjhgua be'. <sup>19</sup> Ba goc sša zjaya'aque' len barcon' lo nisdaon' cate' besele'ede' ba zjajda Jesúsen' cheze'e lo nisen' gala'ze gan' zej barcon'. Na' besežebe'. <sup>20</sup> Na' gože' legaque':

—Nedan', bi žeble.

<sup>21</sup> Nach chesyebede' besyegüe'ene' lo' barcon'. Na' la' besyežintie' ga nac yo biž cho'a nisdaon' gan' zjaya'aquen'.

*Bene' zan chesyeyiljue' Jesúsen'*

<sup>22</sup> Na' beteyo bene' zan bene' ca' besyega'an yešla'a cho'a nisdaon' gosache'ede' nono Jesúsen' nla' na' gosache'ede' bibi barcw yoble gota'ch san toga dan' besyeyo'o bene' ca' zjanaque' Jesúsen' txen, na' zjanezde' Jesúsen' bi beyo'e len legaque' lo' barcon'. <sup>23</sup> Nach besežin barcw da' za'ac ciuda Tiberias gala'ze gan' gosagüe' yetextilen' caten' beyož be' Xancho Jesúsen' yela' choxc̄len che Diosen'. <sup>24</sup> Na' cate' gota'bia' nono Jesúsen' bežel gan' nite'na' nach besyeyo'e lo' barcw ca' ja'aque' Capernaum cont besyeyiljue' Jesúsen' do na'.

*Yela' guagw da' chnežjon bene' yela' mban toli tocaṇe*

<sup>25</sup> Na' cate' bene' zan ca' besyeželde' Jesúsen' yešla'ale nisdaon' nach gose'e le':

—Maestrw, žbatca' bla'o nga?

<sup>26</sup> Na' Jesúsen' gože' legaque':

—Chnia' le'e to da' zejen, cheyiljwle neda' neche dan' gwdagwle ca beljele na'zen', gague neche chejle'le chia' lagüe ba ble'ele yela' guac ca' ba benan'. <sup>27</sup> Bi cheyala' cuecyichjle gata' da' ye'ej gagwle da' chbiayi', san cuecyichjle gata' da' goṇ yela' mban chele toli tocaṇe. Diosen' gwsele' neda' golja' benač na' neda' gona' to da' ye'ej gagwle cont gata' yela' mban chele toli tocaṇe. Na' Xa' Diosen' ba blo'e naca' ben' ba gwsele'.

<sup>28</sup> Na' gose'ene':

—žBi cheyala' gonto', cont yebe Diosen' neto'?

<sup>29</sup> Na' gož Jesúsen' legaque':

—Da' nga gonle cont yebe Diosen' le'e, šejnilaže'le neda' naca' ben' gwsele'.

<sup>30</sup> Na' gose'e Jesúsen':

—¿Bi yela' guac gono' še ca' cont le'eto' na' šejnilaže'to' le'? ¿Bi gono'?  
<sup>31</sup> Da' xoxxta'ocho ca' gosagüe' yela' guagw da' nzi' maná šlac gosenite' latje dašen', na' nyoj Xtiza' Diosen' čhegaquen', žan: "Yela' guagw da' za' yaban' be'e legaque' gosagüe'."

<sup>32-33</sup> Nach Jesúsen' gože' legaque':

—Chnia' le'e to da' zejen, gague da' Moisésen' bnežjue' da' xoxxta'ocho ca' yela' guagon', san Xa' Diosen' bnežjuen' legaque'. Na' bi nacho lenna' zan' yaba gan' zoe'na', san de to yela' guagw da' ba gwsela' Diosen' na'a da' za' yaban' na' betjen yežlion', na' chnežjon yela' mban čhe note'teze bene' chesagw len.

<sup>34</sup> Nach bene' ca' gose'e le':

—Bene', beňšca neto' yela' guagon' žo' ca' gagwton' yogo' ža.

<sup>35</sup> Nach Jesúsen' gože' legaque':

—Neda' naca' yela' guagw da' chnežjon bene' yela' mban toli' tocañe. Note'teze bene' yosozenag chia' na' yesejnilaže' neda', guata' da' chyažje yichjlažda'ogaque' toli' tocañe. <sup>36</sup> Na' ba gwnicza' le'e, la'czla' ba ble'ele neda' bi chejnilaže'le neda'. <sup>37</sup> Yogo' bene' chbej Xan' cont yesaque' neda' txen, chžin ža chesejnilaže' neda'. Na' note'teze bene' chaclaže' šejnilaže' neda', bi gwsia'ne' ca'ale, san gaclena'ne' cont šejnilaže'nda'. <sup>38</sup> Neda' za'a yaba na' betja' yežlion' gague cont gona' da' žan chia' san cont gona' can' chaclaže' Xan' ben' gwsela' neda'. <sup>39</sup> Len' chaclaže' bi gua'a latje cuiayi' ne toze bene' ba gwleje' cont yesaque' neda' txen. Nach cate' žin ža te čhe yežlion' cana' yosbangaca'ne' ladjo bene' guat še ba gosate'. <sup>40</sup> Xan' chaclaže' yogo'loł bene' yesejni'ide' non' naca' na' yesejnilaže' neda' cont gwnežjue' legaque' yela' mban toli' tocañe, na' neda' yosbana' legaque' ladjo bene' guaten' še ba gosate' cate' žin ža te čhe yežlion'.

<sup>41</sup> Na' zan bene' Israel gualaž čheto' legacze' besežeše' čhe dan' gwna Jesúsen': "Neda' naca' yela' guagw da' za' yaba." <sup>42</sup> Gosene':

—¿Gague bengan' Jesús xi'in José? Nombia'cho xaxna' benga. ¿Bi dižan' cho'e že' ze'e yaba betje' yežlio?

<sup>43</sup> Nach Jesúsen' gože' legaque':

—Bich žešele chia'. <sup>44</sup> Nono gac yesejnilaže' neda' še Xan' ben' gwsele' neda' bi gaclene' legaque' yesejnilaže', na' cate' žin ža te čhe yežlion' yosbana' legaque' še ba gosate'. <sup>45</sup> Le'e gan' bosozoj bene' ca' goseyixjue'ede' xtiža' Diosen' cani' žan: "Yogüe' Diosen' gwsed gwlo'ede' legaque'." Na' yogo' no yesežeze can' ža Xan' na' yosozenague' cont yesone' can' že'na', lecz yesejnilaže' neda'.

<sup>46</sup> 'Bi nacho zoa bene' ba ble'ede' Xan'. Toza' neda' ba ble'eda'ne', le za'a gan' zoen'. <sup>47</sup> Chnia' le'e to da' zejen, bene' chesejnilaže' neda', de yela' mban čhegaque' toli' tocañe. <sup>48</sup> Neda' naca' yela' guagw da' chnežjon yela' mban toli' tocañe čhe beňačen'. <sup>49</sup> Da' xoxxta'ocho ca' gosagüe' yela' guagw da' nzi' maná šlac gosenite' latje dašen', na' bia'cze gosat yogüe'. <sup>50</sup> Neda' cho'a diža' čhe to yela' guagw da' za' yaban' na' bene' chagw len bi gate'. <sup>51</sup> Neda' naca' yela' guagw dan' za' yaban' dan' nsa' yela' mban toli' tocañe. Bene' šejnilaže' neda', bane' toli' tocañe. Na' yela' guagw da' chnežjua' cont gata' yela' mban čhe beňačen' naquen cuerp chia'.

<sup>52</sup> Nach bene' Israel gualaž čheto' ca' legacze' besežeše', gosene' čhe':

—¿Nacxe gone' gone' cuerp čhen' gagwchon?

<sup>53</sup> Jesúsen' gože' legaque':

—Chnia' le'e to da' zejen, Diosen' gwsele' neda' golja' benach, na' še bi chagwle cuerp chian' na' še bi che'ejle xchenan', bi de yela' mban chele toli tocanē. <sup>54</sup> Bene' chesagw cuerp chian' na' chese'eje' xchenan' de yela' mban chegaque' toli tocanē, na' še ba gosate', cate' te che yežlion' yosbana' legaque' ladjo bene' guat ca'. <sup>55</sup> Le cuerp chian' naquen dogualje yela' guagw, na' xchenan' naquen dogualje da' ye'ejle. <sup>56</sup> Bene' ca' chesagw cuerp chia' na' chese'eje' xchenan' de yela' mban chegaque' toli tocanē, na' zjanaque' txen len neda' na' neda' naca' txen len legaque'. <sup>57</sup> Xa' Diosen' gwsele' neda' na' de yela' mban chia' da' naca' toze len le'. Na' ca'cze gac len bene' yesagw cuerp chian', yesenite' toli tocanē dan' zjanaque' txen len neda'. <sup>58</sup> Cuerp chian' naquen yela' guagw da' za' yaba. Na' len bi naquen ca da' gosagw da' xozxta' ocho ca' latje dašen', le bene' gosagw len bia'cze gosate'. Na' bene' chesagw yela' guagw dan' žia' ca', yesenite' toli tocanē.

<sup>59</sup> Jesúsen' bsd blo'ede' da' ca' lo' yodao' che bene' Israel gualaž cheto' ca' da' zoa Capernaum.

*Xtiža' Jesúsen' chnežjon yela' mban toli tocanē che bene' chosozenag chen*

<sup>60</sup> Na' zan bene' ca' zjanao' Jesúsen', cate' gosende' da'na' chzejni'ide' legaque', gosene':

—Zdebechgua naquen goncho dan' chzejni'iden'. ¿Noxen' gac gon can' žen'?

<sup>61</sup> Gocbe'e Jesúsen' chesenie' che' dan' bzejni'ide' legaque' da' ca', na' gozne':

—¿Bi chazlaže'le can' ba gwnian'? <sup>62</sup> ¿Nacxe nale cate' le'ele neda' yeyepa' gan' gwzoo' cana'?' neda' naca' ben' gwsela' Diosen' golja' benach.

<sup>63</sup> Spiritw chian' chnežjon benachen' yela' mban, na' cuerp chian' bi gac gonē ca'. Diža' dan' bach bia' len le'e zjazacan' len yichjlažda'olen' cont banle toli tocanē še šejle'le chen. <sup>64</sup> Perw ne' nita' balle bi chejle'le.

Jesúsen' gwne' ca' le' gocbe'ede' cate' gosezolao bene' ca' gosedalene' le' noe' bi chesejle'e che' na' noe' gwdie'ne' lo' na' bene' ca' chesegue'ede' le'.

<sup>65</sup> Na' gozna' Jesúsen':

—Chac can' ba gwnian', nono gac šejnilaže' neda' še bi gaclen Xa' Diosen' le' cont šejnilaže'nda'.

<sup>66</sup> Beyož bzejni'i Jesúsen' legaque' da' ca', zan bene' ca' ba chosozenag xtižen' gosebejyichje' bich bosozenaguen'. <sup>67</sup> Nach Jesúsen' gože' šižinw bene' ca' gwleje' cont gosaque' le' txen:

—¿Len le'e chaclaže'le yeyejle?

<sup>68</sup> Na' gož Simón Pedron' le':

—Xanto', noch no zaca' gwzenagto' xtižen'. Tozo' le' cho'o diža' da' chnežjon yela' mban che bene' chzenague' chen. <sup>69</sup> Neto' chejnilaže'to' le' na' nezeto' naco' Cristo ben' gwlej Diosen' cont nabi'o, na' naco' dogualje Xi'in Dios, Dios ben' zoa toli tocanē.

<sup>70</sup> Na' Jesúsen' gože' legaque':

—Ba gwleja' le'e šižinwle cont zoale len neda' na' nezda' tole chzenagle che gwxiyen'.

<sup>71</sup> Gwne' ca' che Judas Iscariote ben' naque' xi'in to bene' le' Simón, le gwnezde' Judasen' ba naquen gwdie' le' lo' na' bene' ca' chesegue'e le', na' Judasen' naque' to bene' šižinw ca'.

## 7

*Bene' biše' Jesúsen' bi gosejnilaže' le'*

<sup>1</sup> Gwde na' Jesúsen' gw dacze' bsd blo'ede' ben' že' distritw Galilean'. Bich goclaze' šejche' Judean', le bene' gwnabia' che nación Israel cheton' že' na' cheseyiljue' nacle yesone' yesote'ne'. <sup>2</sup> Na' ba zoa gála' lni che neto' bene' Israel da' nzi' Lni che Ranšw Yix. <sup>3</sup> Na' bene' biše' Jesúsen' gose'ene':

—Bitw yega'año' nga. San gwey Judean' cont bene' ca' chosozenag chio' yesele'ede' yela' guac dan' chonon'. <sup>4</sup> Note'teze bene' še chaclaže' yesacbe'e bene' naque' to bene' zaca', bi gone' yela' guac bagaše'ze. Še da' li chono' yela' guac, ben cont yesele'e yogo'lol bene' can' chonon'.

<sup>5</sup> Bene' biše' Jesúsen' gose'ene' ca', le ne legaque' bi gosejnilaže'ne'. <sup>6</sup> Nach gož Jesúsen' legaque':

—Biŋa' žin ža ša'a, san le'e guac šja'acle bate'teze. <sup>7</sup> Bene' ca' bi zjanombi'e Diosen' bi gac yesegue'ede' le'e, san chesegue'ede' neda', le chzejni'ida'ne' chesone' da' xinj. <sup>8</sup> Le šja'ac lnin'. Neda' bi sa'a ŋa'a, le biŋa' žin ža chia'.

<sup>9</sup> Beyož gože' legaque' ca' bega'aŋe' Galilean' yeto chop ža.

*Jesúsen' gweyje' Jerusalén gan' yo'o lnin'*

<sup>10</sup> Nach gwde gosa'ac bene' biše' ca' zja'aque' lnin' gwza' Jesúsen' len bene' ca' zjanaque' le' txen zja'aque' lnin', perw bi ja'aque' can' nla'ze san bagaše'ze. <sup>11</sup> Na' bene' gwnabia' che nación Israel cheton' že' Jerusalénna' besyeyiljue' le' lo lnin', chesene':

—¿Ganxe bena'?

<sup>12</sup> Na' bene' ca' zjandop zjanžag lo lnin' šižize goso'e diža' che Jesúsen', na' gague toze ca gosene'. Bale' gosene': “Naque' bene' güen”, na' bale' gosene': “Bi naque', chonlede' bene'.”

<sup>13</sup> Na' goso'e diža' šižize che Jesúsen', le yogo'ze bene' chesežebe' bi yesone' bene' gwnabia' ca' legaque' še yesacbe'ede' cheso'e diža' güen che Jesúsen'.

<sup>14</sup> Na' do gašje zej lnin' cate' gwey Jesúsen' gan' zoa yodao' blao che neto' bene' Israel na' gwzolao chsed chlo'ede'. <sup>15</sup> Na' besyebane bene' gwnabia' ca', gosene':

—¿Nacxečen' da' zan neze benga? le gague bi nseden'.

<sup>16</sup> Na' Jesúsen' gože' legaque':

—Dan' chsed chlo'edan' bi naquen xbab checza', san naquen xbab che bene' gwseła' neda'. <sup>17</sup> Note'tez bene' chesaclaže' yesone' can' chazlaže' Dios ben' gwseła' nedan', guacbe'ede' še dan' chsed chlo'edan' zan' che Dios o še naquen da' chaljalaže'za'. <sup>18</sup> Cate' to bene' chsed chlo'ede' xbab checze', cheyljue' nacle gone' cont gacxene'. San cate' to bene' chaclaže' gacxen bene' gwseła' le', nezecho xtižen' naquen da' li na' bi chziye'e.

<sup>19</sup> 'Da' Moisésen' bene' le'e ley dan' nsedlen' perw ne tole bi chonle can' žanna'. ¿Bixchen' cheyljwle nacle gonle gotlenda'?

<sup>20</sup> Bene' ca' že'na' gose'ene':

—Yo'o da' xigüen', nan' chol chŋenošo'. ¿No chaclaže' got le'?

<sup>21</sup> Jesúsen' gože' legaque':

—Toz yela' guac da' bena' ža che Dios cate' bi de lsens gon chio' bene' Israel žin, na' yogo'le chebanele. <sup>22</sup> Da' Moisésen' bene' mandaw soacho seřw dan' že' circuncišion (la'czła' bi gwzolao seřon' len le' san len da' xoxxta'ocho ca' bene' gwnita' can'te), na' da'nan' chzoale bi' byo dao' ca'

señwna' ža che Dios. <sup>23</sup> Can' naquen, la'czla' še naquen ža che Dios, chzoale no bi' byo dao' señw cate' chaquebe' xono' ža cont chonle can' ža ley dan' bzoj Moisésen', na' žbixchen' chža'ale neda' dan' ba beyona' to bene' güe' ža che Diosen'? <sup>24</sup> Bi cheyala' yosbaga'le bene' che da' chle'ele chone', le bi nezele še chazlaže' Diosen' can' chone', san le nabyane' cont nezele bi ža Diosen', nachen' gacbe'ele non' cheyala' yosbaga'le.

*Jesúsen' gwne' ze'e gan' zoa Diosen'*

<sup>25</sup> Nach to chope bene' Jerusalén ca' gosene':

—žGague benga ben' chesyeyiljue' cont yesote'ne'? <sup>26</sup> Le na' can' cho'e dižan' lao yogo' bene' na' bibi chese'e le'. žGague ba cheson bene' gwnabia' checho xbab le naque' Cristo ben' chbezcho yedenabia'? <sup>27</sup> Perw nezecho ga bene' benga, na' cate' yid Criston' nono yeseneze ga bene' le'.

<sup>28</sup> Jesúsen' chsed chlo'ede' chalšil che yodao' blao cate' gosene' ca'. Nach gwne' žižje gože' legaue':

—Chaquele nombia'le neda' na' chaquele nezele ga bene' neda'. Perw gague con za'a to gualaza'. Da' li zoa bene' gwsele' neda', na' le'e bi nombia'le'. <sup>29</sup> Neda' nombi'ane', le za'a gan' zoen' na' le' gwsele' neda'.

<sup>30</sup> Na' da' gwne' ca' bal bene' gosaclaže'chgüe' yesezene' le', perw nono gwzen le' da' biña' žin ža gague' lo na'gaquen'. <sup>31</sup> Na' bene' zan gosejle'e Jesúsen' naque' bene' gwseła' Dios, na' gosene':

—Cate' yid Criston' žgonche' yela' guac da' zaca'ch ca da' chon benga?

*Bene' chesape' yodao' blaon' ja'aque' cont šjasekene' Jesúsen'*

<sup>32</sup> Bene' fariseo ca' gosende' diža' cheso'e bene' ca' che Jesúsen'. Da'n'an' bosoxi'e len bene' ca' zjanac bxoz gwnabia' che nación Israel cheton' na' gosesele' bene' chesape' yodao' blaon' cont šjasekene' Jesúsen'. <sup>33</sup> Nach Jesúsen' bsed blo'echde' bene' ca' že'na', gwne':

—Soacha' yeto tiemp dao' len le'e nach yeya'a gan' zoa ben' gwseła' neda'. <sup>34</sup> Na' yeyiljwle neda' na' bi yeželele neda', le gan' soan' bi gac yidle.

<sup>35</sup> Nach bene' gwnabia' che nación Israel cheton' gose' lježe':

—žGan' chacde' yeyeje' ga bi yeželechone'? žYeyeje' gan' zjanaslas bene' gualaz checho ladjo bene' griego ca' na' gwsed gwlo'ede' legaue'? <sup>36</sup> žBi zejen dan' gwnen': “Yeyiljwle neda' na' bi yeželele neda' na' gan' soan' bi gac yidle”?

*Jesúsen' be'e diža' che Spiritw che Diosen'*

<sup>37</sup> Ža cate' zelao chesone' lnin' naquen ža xench, na' Jesúsen' zeche' chsed chlo'ede' na' gwne' žižje, gwne':

—Note'tezle še lo' yichjlažda'olen' nacle ca bene' chbilláže', cheyala' šejnilaže'le neda' na' goña' le'e yela' mban toli tocane, na' lenna' gaquen lo' yichjlažda'olen' ca to nis da' gwbat cheyo'ojen cont bich gacle ca to bene' chbilláže'. <sup>38</sup> Le'e chejnilaže'le neda', gac chele can' ža Xtiža' Diosen' da' nyojen, to da' güen juisyw gac lo' yichjlažda'olen' cont gacle ca to yežlio ga chaldi nis, gan' de zan yegw da' cheseyilen len.

<sup>39</sup> Na' dan' gwna Jesúsen' ca' be'e diža' che Spiritw che Diosen' da' yedesoan lo' yichjlaždao' note'tezcho chejnilaže'chone'. Na' caten' gwne' ca' Spiriton' biña' yedesoan lo' yichjlaždao' bene', le biña' gac yogo' da' cheyala' gac cont gacbia' Jesúsen' naque' bene' zaca' juisyw.

*Gosaque' chople neche Jesúsen'*

<sup>40</sup> Bene' ca' chosozenag xtiža' Jesúsen' bale' gosene':

—Da' li benga naque' ben' choe' xtiža' Diosen' ben' naquen yide'.

<sup>41</sup> Na' yebale' gosene':

—Benga Criston' ben' naquen yedenabia'.

Perw yebale' gosene':

—¿Bixe n̄acho bene' Galilea ba gwlej Diosen' cont yedenabi'e chio'?

<sup>42</sup> Xtiža' Diosen' da' nyojen žan Criston' ben' yedenabi'e choje' lo diaža che da' rey David na' gaque' bene' Belén gan' nac laž da' David.

<sup>43</sup> Can' goc bene' ca' gosaque' chople neche Jesúsens'. <sup>44</sup> Na' bale' gosaclaže' yesezene'ne', perw nono gwzen le'.

*Bene' gwnabia' che nación Israelen' bi gosejle'e che Jesúsens'*

<sup>45</sup> Na' bene' chesape' yodao' blaon' jaya'aque' gan' nita' b̄xoz gwnabia' ca' len bene' fariseo ca', le bene' can' gosesele' legaque' cont yesezene' Jesúsens'. Na' bene' ca' gose'e legaque':

—¿Bixchen' bi nche'elne'?

<sup>46</sup> Na' bene' chesape' yodao' blaon' gose'ene':

—Biña' yeneto' bene' cho'e diža' güen ca dan' choe' bena'.

<sup>47</sup> Nach bene' fariseon' gose'e legaque':

—¿Lente le'e ba gwxiye'e? <sup>48</sup> Ne toz neto' nacto' bene' fariseo biña' šejle'to' xtižen' na' neca bene' gwnabia' chechon', ne toze' biña' šejle'e xtižen'. <sup>49</sup> Perw bene' quinga že' nga bi zjanombi'e ley dan' bzoj da' Moisésens' na' ba zjambiaye'e, da'nan' chesejle'e xtižen'.

<sup>50</sup> Na' Nicodemo ben' gwyey lao Ješusen' šeže'le naque' txen len bene' gwnabia' ca'. Na' Nicodemon' gože' legaque':

<sup>51</sup>—Ley chechon' bi choen' latje choglaochō che to bene' ba ben da' mal še biña' güe'e diža' naquen' goc na' še biña' nezecho bi dan' bene'.

<sup>52</sup> Nach yezica'chle bene' gwnabia' ca' gose'e le':

—¿Leno' le' ba beyaco' bene' Galilea? Bsed Xtiža' Diosen' da' nyojen na' nezdo' ne to bene' choe' xtiža' Diosen' ca' na' choje' Galilean'.

<sup>53</sup> Nach besyeya'ac to toe' jaya'ac ližgaque'.

## 8

*No'olen' besyedole'de' len xtoe'*

<sup>1</sup> Na' Jesúsens' gwyeye' ya'a da' nzi' Ya'a Olivos. <sup>2</sup> Na' beteyo cate' gwyeni' gwyeye' yodao' blaon' da' yoble na' yogo' bene' ca' že' na' gosebigue' lagüen' na' gwchi'e na' gwzomagüe' chsed chlo'ede' legaque'. <sup>3</sup> Nach bene' chososed chosolo'e ley dan' bzoj da' Moisésens' na' bene' fariseo ca' jasesane' to no'ole bene' besyedole'de' len xtoe'. Na' bosozече' le' gachol bene' ca' chosozenag che Jesúsens'. <sup>4</sup> Na' gose'e Jesúsens':

—Maestrw, no'ole nga ba bedole'to' delene' xtoe'. <sup>5</sup> Na' ley chechon' da' bzoj Moisésens' žan cheyala' gotcho no'ol ca' cheson ca' gwchelchone' yey. Na' žbi žo' le'? žbix cheyala' gonechone'?

<sup>6</sup> Gose'e Jesúsens' ca' da' gosaclaže' yesebeje' le' diža' da' yosočhine' yesagüe' xya che'. Na' Jesúsens' con bcheque' bzoje' lo yon' len xbene'. <sup>7</sup> Na' bene' ca' gosone' byen gosenabchde' le' bi že'. Nach Jesúsens' bebe'šagüe' na' gože' legaque':

—Guaque con note'tezle bi de xtoła'le solaole gwchellene' yejen'.

<sup>8</sup> Nach bcheque' da' yoble bzojche' lo yon'. <sup>9</sup> Na' bene' ca' zjanče' no'olen' cate' gosende' can' gož Jesúsens' legaque', zjanezde' lecze ba zjanoncze' da' xiņj, nach tgüeye tgüeye' besyechoje' gwzolaotequen' len bene'

golech na' bžinten len beṇe' xcuide'ch, nach bega'an yetoze no'olen' len Jesúsén' gan' že' beṇe' ca' chsed chlo'ede'. <sup>10</sup> Nach Jesúsén' bebe'šagüe' da' yoble na' ble'ede' noch no beṇe' ca' zjanla' na' gože' no'olen':

—No'ole, ¿gaṇxe beṇe' ca' chosocuiš le'? ¿Ne toe' bi beṇ le' castigw?

<sup>11</sup> Na' no'olen' gože'ne':

—Ne toe', beṇe'.

Na' Jesúsén' gože'ne':

—Ne neda' bi gona' le' castigw. Beyej na' bich gono' da' malen'.

*Jesúsén' nse'e be'ni' che yichjlaždao' beṇačh*

<sup>12</sup> Jesúsén' gozo'e diža' da' yoble chzejni'ide' beṇe' ca' že' na', gwne':

—Neda' nsa'a be'ni' che yichjlaždao' beṇačhen'. Beṇe' zjanaque' neda' txen bich zjanaque' ca beṇe' yichjlaždao' lchoḷ beṇe' cheson da' xinj, san lo' yichjlažda'ogaque' naquen ca to da' yo'o be'ni'. Da'nán' ba de yela' mban čhegaque' toli tocaṇe.

<sup>13</sup> Nach beṇe' fariseo ca' gose'e Jesúsén':

—Cho'o diža' che cuino' naco' beṇe' zaca', na' da'nán' bi naquen to da' yesejle' beṇe'.

<sup>14</sup> Na' gož Jesúsén' legaque':

—La'czla' cho'a diža' che cuina', xtižan' naquen da' li. Neda' nezda' gan' gwza'a na' gan' yeya'a, perw le'e bi nezele gan' za'a na' gan' yeya'a.

<sup>15</sup> Le'e chosbaga'le neda' con can' chon beṇačhen' xbab, san neda' nono chosbaga' bi da' yosbaga'. <sup>16</sup> Perw na' šaca' bi da' yosbaga' beṇe', gonan' ca cheyaḷa', le bibi de da' chona' to gualaza', san chona' dan' ža Xan' ben' gwseḷa' neda'. <sup>17</sup> Ley chechon' dan' chsedlen' žan cheyaḷa' šejle'cho cate' chedil diža' da' chesoe' čope testigw. <sup>18</sup> Na' nac čopto' choe'to' xtiža': neda' cho'a diža' che cuina' na' Xan' ben' gwseḷa' neda' lecze cho'e diža' chia'.

<sup>19</sup> Na' gose'ene':

—¿Gaxe zoa xaon'?

Na' gwna Jesúsén':

—Ne neda' ne Xan' bi nombia'le. Šaca' nombia'le neda' lecze nombia'le Xan'.

<sup>20</sup> Diža' ca' bsed blo'e Jesúsén' cate' ze' gaḷa'ze gan' chesegüe'e mechw lo' yodao' blao che neto' beṇe' Israel. Na' nono gwzen le', le bina' žin ža gaque' lo' na' beṇe' chesegue'ede' le'.

*Jesúsén' gože' legaque' bi gac šjaya'aque' gan' yeyejen'*

<sup>21</sup> Nach Jesúsén' gože' legaque':

—Neda' yeya'a, na' yeyiljwle neda' perw bi gac yeyejle gan' yeya'an, le bina' yetinjele xtoḷa'len' cate' žin ža gatle.

<sup>22</sup> Na' da' gwne' ca' beṇe' gwnabia' che nación Israel čheton' gosene':

—¿Yeyot cuinen' že' gan' yeyejen' bi gac šejcho?

<sup>23</sup> Nach Jesúsén' gože' legaque':

—Le'e nacle beṇe' che yežlio nga na' chzenagle che dan' chnabia' yežlion', san neda' za'a yaba na' bi chzenaga' che dan' chnabia' yežlion'.

<sup>24</sup> Da'nán' gwnia' bina' yetinjele xtoḷa'len' cate' žin ža gatle. Le še bi šejle'le neda' naca' doxen can' gwnian', gatle bina' yetinjele xtoḷa'len'.

<sup>25</sup> Nach gose'e Jesúsén':

—¿Nox naco' le'?

Na' gož Jesúsén' legaque':



—Zan n̄i'a ba gwnia' le'e non' naca'. <sup>26</sup> Ne' dech da' zan da' n̄ia' cont gwzejni'ida' le'e nape doła'. Perw beṇe' gwseła' neda' neṇde' yogo'loł na' cho'e diža' li, na' neda' choe'lena' beṇachen' diža' da' ba benda' gwne'.

<sup>27</sup> Beṇe' gwnabia' ca' bi gosejni'ide' choe'lene' legaque' diža' c̄he Xe' Diosen'. <sup>28</sup> Nach Jesúsen' gože' legaque':

—Cate' ba gwde gwłisle neda' to le'e yag, neda' naca' beṇe' gwseła' Diosen' golja' beṇach, cana'ch gache'ele le naca' ben' ba gwnia' le'e, na' gache'ele bibi chona' to gualaza', san con da' bzejni'i X̄an' neda', len̄na' žia'. <sup>29</sup> X̄an' ben' gwsele' neda' zoacze' len neda'. Na' bi chbejyichje'nda', le bate'teze chona' da' chazlaže'.

<sup>30</sup> Na' šlac Jesúsen' choe'lene' beṇe' ca' dižan' nach beṇe' zan gosezolao chesejnilaže' le'.

*Beṇe' ca' chnabia' da' malen' yichjlažda'ogaquen'*

<sup>31</sup> Nach Jesúsen' gože' beṇe' gualaž c̄heto' ca' baḥ gosezolagüe' chesejnilaže'ne':

—Še soacze gonle can' ba gwnian', gwlo'en da' li nacle txen len neda'. <sup>32</sup> Na' še soacze gonle can' ba gwnian', nachen' šejni'ile diža' li c̄hian' na' gaclenen le'e cont yechojle lo na' da' chnabia' le'e.

<sup>33</sup> Bał beṇe' ca' gose'e Jesúsen':

—Neto' nacto' diaža c̄he da' Abrahanna' na' nono na' soa beṇe' n̄abia' neto'. ¿Bixchen' žo' yechojto' lo na' da' chnabia' neto'?

<sup>34</sup> Na' gož Jesúsen' legaque':

—Chnia' le'e to da' zejen, yogo' beṇe' cheson da' xinj zjanaque' lo na' da' mal da' chnabian' legaque'. <sup>35</sup> Beṇe' zoa liž x̄an xšine' bi naque' xi'in ben' gan' chone' žinna', san šlož güejze zoe' txen len legaque' len bi da' chesone'. San beṇe' golje' txen len le', bate'teze zoe' len legaque'. <sup>36</sup> Neda' naca' dogualje Xi'in Dios na' guac gona' cont da' malen' bich n̄abi'an yichjlažda'olen' na' yechojle lo ne'en na' bich gaquen ca' x̄anle. <sup>37</sup> Neṇda' nacle diaža c̄he da' Abrahanna', perw bia'cze chejiljwlaže'le nac gonle cont gotle neda'. Na' chonle ca' da' bi chzenagle xtižan'. <sup>38</sup> Neda' cho'a diža' c̄he da' ca' ba ble'eda' cate' zoa' cuit X̄an', na' le'e lecze chonle da' ba benele gwna x̄alen'.

<sup>39</sup> Nach beṇe' ca' gose'e Jesúsen':

—¿Bixchen' žo' ca'? Neto' nacto' diaža c̄he da' Abraham.

Na' gož Jesúsen' legaque':

—Šaca' nacle dogualje diaža c̄he da' Abraham, gonle can' ben da' Abrahanna' šaca'. <sup>40</sup> La'czła' ba bzejni'ida' le'e diža' li da' benda' gwna Diosen', bia'cze chejiljwlaže'le nac gonle gotle neda'. Da' Abrahanna' bi bene' can' chonlen'. <sup>41</sup> Toz can' chonle len x̄alen'.

Nach beṇe' ca' gose'e le':

—Toz Diosen' naque' X̄ato' na' bi chzenagto' c̄he nochle beṇe'.

<sup>42</sup> Jesúsen' gože' legaque':

—Šaca' Diosen' naque' x̄ale gaquele neda', le neda' gwza'a gan' zoa Diosen'. Bi za'a nga to gualaza', Diosen' gwsele' neda'. <sup>43</sup> ¿Bixchen' bi chejni'ile dan' chnia' le'e? Neṇda' bi chejni'ile dan' bi chaclaže'le gwzenagle chia'. <sup>44</sup> Satanás dan' chnabia' da' xigüe' ca' naquen x̄ale, nachen' chebele chonle can' chnalazen'na'. Len ba naquen güet beṇe' cate' gwxete yežlion'. Na' bi chzenaguen c̄he diža' li, le diža' li bi yo'en lo' yichjlažda'ogüen. Cate' ch̄nen diža' güenlaže' ch̄nen con can' nac cuinen,

le naquen güenlaže' na' yogo' diža' güenlažen' zan' len len. <sup>45</sup> Na' neda', da' cho'a diža' li, bi chejle'le chia'. <sup>46</sup> Bibi da' mal nona' na' da'nan' ne tole' bi gac gwlo'ele še bi da' mal ba bena'. Neda' zoateza' cho'a diža' li, ¿bixchen' bi chejle'le chia'? <sup>47</sup> Beñe' ca' chon Diosen' legaue' cuent ca xi'ine' chosozenague' xtižen'. Na' le'e bi chzenagle chen' da' bi nacle xi'ine'.

*Ba zoacze Criston' cate' golje da' Abraham*

<sup>48</sup> Nach beñe' gwnabia' che nación Israel cheton' gose'e Jesúsen':

—Can' ba gwnaczto' nachia'cze naco' txen len beñe' Samaria ca' na' yo'o to da' xigüe' lo' yichjlažda'oguoñ' chonen ga chol chñenošo'.

<sup>49</sup> Jesúsen' gože' legaue':

—Bi yo'o da' xigüen' lo' yichjlažda'ogua', san chonxena' Xan' na' le'e chñele chia'. <sup>50</sup> Bi chyljua' no gonxen neda', perw zoa Xan' chaclaže' beñachen' yesonxene' neda' na' Xan' choglagüen' chele naple doła' da' chñele chia'. <sup>51</sup> Chnia' le'e to da' zejen, note'teze beñe' yosozenague' xtižan', guata'cze yela' mban che' toli tocañe.

<sup>52</sup> Nach da' yoble beñe' gwnabia' ca' gose'e le':

—Nach beyož gwnezeto' yo'o to da' xigüe' lo' yichjlažda'oguoñ' chonen ga chol chñenošo'. Ba got da' xozxta'ocho Abrahanna', na' len beñe' ca' goso'e xtiža' Diosen' cani' lecze ba gosate', na' chñenošo' žo' beñe' chosozenag xtižon' gata' yela' mban che' toli tocañe. <sup>53</sup> ¿Chacdo' zaca'cho' ca da' xozxta'ocho Abrahanna' len beñe' ca' gosoe' xtiža' Dios beñe' ba gosat? ¿Noxen' chacdo' naco'?

<sup>54</sup> Gož Jesúsen' legaue':

—Šaca' chonxen china' bibi zejen, perw Xan' ben' žale naque' Dios ben' chejnilaže'le chonxene' neda'. <sup>55</sup> Le'e bi nombialne', san neda' nombiane'. Šaca' nia' bi nombiane' gaca' beñe' güenlaže' can' naclena'. Perw neda' nombiane' na' chzenaga' xtižen'. <sup>56</sup> Da' Abrahanna' ben' žale nac xozxta'ole bebechgüede' gwnezde' le'ede' ba za'a len beñachen' na' zoe' mbalaz ba ble'eden'.

<sup>57</sup> Na' gose' beñe' blao che nación Israel cheton' le':

—Biña' gacdo' šiyon iz. Chñenošo' žo' ba ble'edo' Abrahanna'.

<sup>58</sup> Jesúsen' gože' legaue':

—Chnia' le'e to da' zejen, ba zoacza' neda' cate' biña' galje Abrahanna'.

<sup>59</sup> Nach gosenize' yej da' yosochele' le', perw Jesúsen' bcuaše' na' beze'e yodaon'. Neca gosache'ede' cate' bedie' ladjogaue'.

## 9

*Jesúsen' bene' cont ble'e to beñe' golje' nchole'*

<sup>1</sup> Txen zej Jesúsen' len beñe' ca' zjanaque' le' txen cate' besele'ede' to beñe' byo golje' nchole'. <sup>2</sup> Na' gose'e Jesúsen':

—Maestrw, ¿non' nap doła' golje benga nchole', še le' o še xaxñe'en?

<sup>3</sup> Na' Jesúsen' gože' legaue':

—Benga golje' nchole' gague da' nape' doła' na' gague da' zjanap xaxñe'en doła', san golje' ca' cont le'ele can' chon Diosen'. <sup>4</sup> Cheyala' goncho xšin Dios ben' gwseła' neda' šlac ne' de latje. Gwžin ža bich gala' gonchon. <sup>5</sup> Šlac ne' zoa' yežlion' chgua'a be'ni' lo' yichjlaždao' beñachen'.

<sup>6</sup> Beyož gwne' ca' gwcho'on xene' lo' yon' na' bene' late' gona' len xene' na' gwdebe' gonan' yejlao beñe' lcholēn'. <sup>7</sup> Nach gože' ben':

—Gwyej jaydib yejlaguon' cho'a yel da' nzi' Yel Siloé.

(Na' Siloé zeje diža' Nselā.) Na' gwyeje' na' beyib yejlagüen' na' cate' beze'e zjayde' ba chle'ede'. <sup>8</sup> Na' bene' gualiz̄ che' na' nochle bene' ba beše'e le' yogo' ža cate' ne' nčholen' gosene':

—¿Gague bengan' ba ble'echo chbe' chñabe' carida?

<sup>9</sup> Na' bale' gosene':

—Le bengan'.

Na' yebale' gosene':

—Bi nac le' san yeto bene' yoblen', perw toz ca naque' len benga.

Perw ben' beyaquen' gože' legaque':

—Nedan'.

<sup>10</sup> Na' gose'ene':

—¿Nac goquen' gwzolao chle'edo'?

<sup>11</sup> Na' gože' legaque':

—To bene' le Jesús' bene' late' gona' na' gwdeben' yejlaguan' na' gože'nda': “Gwyej cho'a yel da' nzi' Yel Siloé na' jaydiben'.” Na' gwyā'a na' beyiban' na' gwzolao chle'eda'.

<sup>12</sup> Nach gose' bene' ca' le':

—¿Ganxe bena'?

Na' gože' legaque':

—Bi nezda'.

*Bene' fariseo ca' gosenabyože' nac goquen' ba chle'ede'*

<sup>13</sup> Nach goseche'e ben' goc lčholen' gan' že' bene' fariseo ca'. <sup>14</sup> Nac to ža che Dios caten' Jesús'en' bene' gonan' dan' gwdebe' yejlao bena' cont ble'ede' na' bi de lsens gon neto' bene' Israel žin ža che Diosen'. <sup>15</sup> Na' bene' fariseo ca' lecze gosenabde' le' nac goquen' ba chle'ede'. Na' gože' legaque':

—Gwdebe' gona' yejlaguan' na' jaydiban' na' na'a ba chle'eda'.

<sup>16</sup> Nach bal bene' fariseo ca' gosene':

—Nezecho bi zoa Diosen' len bena' beyone' bene' lčholen', le chone' da' bi cheyala' gone' ža che Diosen'.

Na' yebale' gosene':

—¿Nac gon to bene' güen da' xinj gone' yeļa' guac ca dan' ben benga?

Na' legacze' besechoje' čhop cuen. <sup>17</sup> Na' da' yoble gose'e ben' golje' nčhole':

—¿Bi žo' le' che ben' bene' cont chle'edo'?

Na' bena' gwne':

—Naque' to bene' choe' xtiža' Dios.

<sup>18</sup> Na' bene' gwnabia' che nación Israel četon' bi gosejle'e golje ben' nčhole' na' na'a bač chle'ede'. Nach gosaxe' xaxne'ena'. <sup>19</sup> Na' gosenabde' legaque', gose'ene':

—¿Xi'inle benga ben' žale golje' nčhole'? ¿Nacxe goquen' chle'ede' na'a?

<sup>20</sup> Xaxne'ena' gose'e legaque':

—Nezeto' bengan' xi'into', na' nezeto' golje' nčhole'. <sup>21</sup> Perw bi nezeto' nac goquen' ba chle'ede' na'a, na' neca nezeto' non' ben cont ba chle'ede'. Ba zejeczede' iz, le nabe cuine' cont güe'e diža' naquen' goc.

<sup>22</sup> Xaxne'en gosene' ca' da' chesežebe' bene' gwnabia' ca', le bene' gwnabia' ca' ba gosečhoglagüen' bi yosolebe' lo' yodaon' note'teze bene' güe'e diža' chejle'e Jesús'en' naque' Cristo ben' chesebezn' yedenabi'e. <sup>23</sup> Da'nān' xaxne'en gosene': “Ba zejeczede', le nabe cuine'.”

<sup>24</sup> Nach da' yoble gosaxe' ben' golje' nčhole' na' gose'ene':

—Be' diža' li lao Diosen', le bi naquen can' gwnao' bače. Nezetō' ben' gwnao' beyon le' naque' beņe' güen da' xinj.

<sup>25</sup> Na' ben' beyac yejlagüen' gwne':

—Bi nezdā' še naque' beņe' güen da' xinj o še bi naque'. Da' nezdā', goca' beņe' lchoł na' na'a ba chle'eda'.

<sup>26</sup> Na' da' yoble gose'e le':

—¿Bi bende' le? ¿Nac benen' chle'edo'?

<sup>27</sup> Na' gože' legaue':

—Ba gwniczā' le'e na' bi chzenagle. ¿Bixchen' chaclaže'le yenian' da' yoble? ¿Len le'e chaclaže'le gwzenagle che'?

<sup>28</sup> Nach gosezi'diže' le', gosene':

—Le' naco' txen len le', san neto' nacto' txen len da' Moisés. <sup>29</sup> Nezetō' Diosen' be'lene' Moisésen' diža', perw bengā bi nezetō' ga ze'e.

<sup>30</sup> Na' ben' golje' nchole' gože' legaue':

—jDa' zaca' yebanecho, bi nezele ga za' bengā, na' bene' cont chle'eda'! <sup>31</sup> Nezecho Diosen' bi chzenague' che beņe' cheson da' xinj, san chzenague' che note'tez beņe' chejniłaže' le', beņe' cheson can' chnalažen'. <sup>32</sup> Na' gwzolaoten cate' gwxe yežlion' biñā' yenecho zoa beņe' chac chone' cont chle'e beņe' golje' nchole'. <sup>33</sup> Šaca' bengan' bi ze'e gan' zoa Diosen' bibi gac gone'.

<sup>34</sup> Beņe' fariseo ca' beselocchgüe' na' gose'e le':

—Len' goljtio' naco' beņe' mal juisyw, ¿chacdo' zaco' gwseddo' neto'?

Na' besyebeje' le' lo' yodaon'.

*Beņe' ca' zjanchoł yichjlažda'ogaue'*

<sup>35</sup> Jesúsen' bende' diža' che ben' beyac yejlagüen' can' goc che' ba besyebeje'ne' lo' yodaon' nach jašague'ne' na' gože'ne':

—¿Chejniłažo' Xi'ın Diosen' ben' gwselen'?

<sup>36</sup> Na' gož ben' le':

—Beņe', gwna neda' non', cont šejniłaža'ne'.

<sup>37</sup> Jesúsen' gože'ne':

—Nedan' ben' ba ble'eczedo' na' nedan' choe'lēna' le' diža'.

<sup>38</sup> Nach bēna' bzōa xibe' benxene' Jesúsen', gwne':

—Xana', chejniłaža' le'.

<sup>39</sup> Nach Jesúsen' gwne':

—Za'a yežlio nga cont gata'bia' non' nap doła' na' non' bi nap doła'. Zedeyena' cont beņe' ca' bi chesejni'i bich yesaque' ca beņe' lchoł, na' zedeyena' cont beņe' ca' chesacde' chesejni'ide' yesaque' ca beņe' lchoł len yichjlažda'ogaquen'.

<sup>40</sup> Nach bał beņe' fariseo ca' nita' gała'ze caten' gwne' ca' na' gosende' xtižen', gose'e Jesúsen':

—¿Chacdo' len neto' nacto' ca beņe' lchoł?

<sup>41</sup> Nach Jesúsen' gože' legaue':

—Šaca' nacle ca beņe' lchoł, bibi xtoła'le de, san žale chejni'ile, na' da'nān' naple doła'.

## 10

*Jempl che beņe' güeye' xila' ca'*

<sup>1</sup> Chnia' le'e to da' zejen, beņe' bi cho'o lo' le'ej che xilan' gan' nac cho'a puerten' san chepe' ga yoble cont cho'e, benān' naque' beņe' gwban.

<sup>2</sup> Ben' chsaljue' na' cho'e cho'a puerten', len' güeyoe' xilan'. <sup>3</sup> Na' ben' chap cho'a puert le'ej che xilan' chsaljue' puertan' cont cho'o ben' chyoeban'. Na' xila' ca' chosozenagba' xtiža' ben' chyoeban', le' zjanombia'ba' ši'en cate' chaxe'ba' cho'e lagacba' cont chbeje'ba'. <sup>4</sup> Na' cate' ba gwleje' yogo'ba' lo' le'ejen', chbialagüe' laogachan', na' xila' che' ca' chesa'oba' le' da' zjanombia'ba' ši'en. <sup>5</sup> Bi chesa'oba' bene' yoble, san chosyoxonjba' dan' bi zjanombia'ba' ši'en.

<sup>6</sup> Jesús'en' be'e diža' che bene' güeye' xila' ca' par bzejni'ide' bene' ca' že'na', perw bi gosejni'ide' bi zejen dan' gože' legaquen'.

*Jesús'en' zaca'lebde' ca to bene' chyo'e xila' chen' binlo*

<sup>7</sup> Nach Jesús'en' bsd blo'echde' legaque' yeto, gwne':

—Chnia' le'e to da' zejen, nedan' naca' ca cho'a puert gan' cheso'o xila' ca' lo' le'ej chegachan'. <sup>8</sup> Yogo' nochle bene' ba goside' cate' za' yida' neda', bene' bosozejni'ide' diža' güenlaže', guac nacho zjanaque' bene' gwban. Perw bene' chesejnilaže' neda' bi chosozenague' xtiža' bene' ca'. <sup>9</sup> Neda' naca' ca cho'a puert che le'ej che xila' ca'. Na' note'tez bene' yesejnilaže' neda', gata' yela' mban chegaque' toli tocanē na' soacza' gaclena' legaque' bite'tez da' cheseyažjde'.

<sup>10</sup> 'Bene' ca' žia' bene' gwban chesaclaže' yesone' cont bene' ca' žia' zjanaque' xila' chia' yesebejyichje' xtižan' na' yosozenague' che legaque'. Na' še yosozenague' che legaque', yesebiaye'e. Na' neda' za'a chnežjua' yela' mban toli tocanē che bene' chesejnilaže' neda' cont nite' güenchgua. <sup>11</sup> Neda' binlo chgüia chna'a bene' chesejnilaže'nda' ca chon to bene' güeye' xila' bene' chyo'e xila' chen' binlo. Na' da' nži'ida' legaque', da'nan' chzane cuina' gata' neche legaque'. <sup>12</sup> Nita' bene' chesezi' laxjue' cont chosoyoe' xila' che bene'. Na' bene' chesezi' laxjue' chesebejyichje' xila' ca' cate' chesele'ede' za' beco'yo, le xila' ca' bi zjanacba' be chegaque'. Cheso'e latje chñiz beco'yon' xila' ca' na' chesoslasba' legacba'. <sup>13</sup> Na' bene' bi zjanaque' xan xila' ca' chosoxonje' da' bi zjanži'ide' xilan', le bi zjanac xilan' be chegaque', san chosoyoeba' dan' chesezi' laxjuen'.

<sup>14</sup> 'Neda' binlo chgüia chna'a bene' ca' chesejnilaže'nda', chona' ca chon to bene' chyo'e xila' chen' binlo. Na' nombi'a' bene' ca' chesejnilaže' neda' na' legaque' zjanombi'e neda'. <sup>15</sup> Nombi'a' legaque' ca Xan' nombi'e neda' na' neda' nombi'a' Xan'. Na' da' nži'ida' legaque' chzane cuina' gata' neche legaque'. <sup>16</sup> Nita' bene' yoble bene' bi zjanaque' bene' Israel bene' yesejnilaže' neda'. Na' cheya'la' šjatoba' legaque' cont yosozenague' chia', nach yesaque' toze len yezica'chle bene' ba chesejnilaže' neda' na' toz neda' gwgüia na'a yogo'lolē'.

<sup>17</sup> 'Chzane' cuina' yesot bene' neda', na' techle yebana' da' yoble. Na' Xan' chacchde' neda' le chazlaže' da' chona' ca'. <sup>18</sup> Nono checa'a yela' mban chian' san chzanlaže' cuina' gata'. Guac zane cuina' yesote'nda' na' lec' guac yeyas yebana' ladjo bene' guaten', can' non Xan' mandadw gona'.

<sup>19</sup> Na' da' yoble bene' nación Israel cheton' besechoje' chople neche xtiža' Jesús'en'. <sup>20</sup> Zane' gosene':

—Yo'o da' xigüen' yichjlažda'ogüe', nan' chol chñenoše'. ¿Bixchen' chzenagle xtižen'?

<sup>21</sup> Na' yebale' gosene':

—Beṇe' yo'o da' xīgüen' yichjlažda'ogüen' bi gac gwšalje' ca'. ¿Guac gon da' xīgüe' cont le'e beṇe' l̄chol'?

*Beṇe' gwnabia' che nación Israel besegue'ede' Jesúsen'*

<sup>22</sup> Na' cate' bžin ža gwyo'o l̄ni dan' chesone' chjasyeze'ede' žan' beyož besyeyone' yodao' blao che Diosen', ba bžin tiemp zag Jerusalénna'. <sup>23</sup> Na' Jesúsen' chde' chašil che yodao' blaon' gan' nzi' Chašil che Salomón. <sup>24</sup> Na' beṇe' gwnabia' che nación Israel cheton' gosechje' Jesúsen' na' gose'ene':

—¿Bixchen' chono' cont chacžejlaže'to' še naco' Cristo ben' chbezto' seļa' Diosen' cont yedenabi'e nación chechon'? Še len' Criston', gwnatega neto' zaca'lao.

<sup>25</sup> Na' gož Jesúsen' legaue':

—Ba gwnia' le'e na' bi chejle'le. Da' ca' ba bena' len yela' guac che Xan' chlo'en naca' beṇe' gwsele'. <sup>26</sup> Perw bi chejle'le chia' da' bi nacle txen len beṇe' chesejnilaže' neda', can' ba gwnicza' le'e. <sup>27</sup> Nombi'a beṇe' chesejnilaže' neda', na' žia' legaue' xila' chia'. Legaue' chosozenague' chia' na' chesone' con can' chzejni'ida'ne'. <sup>28</sup> Na' chnežjua' legaue' yela' mban toli tocane na' gwbat yesebiaye'e na' nono gac yesyeca'a legaue' lo na'. <sup>29</sup> Xan' ba gwleje' beṇe' ca' chesejnilaže' neda' cont chgüia chna'a legaue'. Na' nono gac yesyeca'a legaue' lo na' Xan', le nape' la'zelagüe yela' chnabia' xen. <sup>30</sup> Neda' na' Xan' toz beṇe' nacto'.

<sup>31</sup> Beyož gwne' ca' beṇe' gwnabia' ca' gosenize' yej cont yosocheḷenen'. <sup>32</sup> Na' gož Jesúsen' legaue':

—Da' zan da' güen ba ble'ele bena' len yela' guac che Xan'. ¿Che nonna' chaclaže'le gwchelle neda' yej?

<sup>33</sup> Na' beṇe' gwnabia' ca' gose'e le':

—Gague che yela' guac ca' benon' gwcheḷto' le' yej san da' chneya'o che Diosen'. Con beṇačze le' na' chon cuino' ca Dios.

<sup>34</sup> Na' gož Jesúsen' legaue':

—Nezeczele can' nyoj Xtiža' Diosen' dan' nsedle gan' žan: “Neda' ba gwnia', le'e nacle ca neda' Dios.” <sup>35</sup> Na' Xtiža' Diosen' da' nyojen gague da' te chen', na' lenna' žan Diosen' gwne' che beṇe' ca' bosozenag xtižen' cani' gosaque' ca le'. <sup>36</sup> Diosen' gwleje' neda' cont gaclena' benachen' že' yežlio nga na' čnacexchen' ža le'e chneya'a che Diosen' da' žia' naca' Xi'ine'? <sup>37</sup> Še dan' chonan' bi chlo'en yela' guac che Xa' Diosen', bi cheyaļa' šejle'le chia' šeca'. <sup>38</sup> Perw še chache'ele chona' da' zaca' len yela' guac che Diosen', cheyaļa' šejle'le len' gwsele' neda', la'czla' bi chaclaže'le šejle'le xtižan'. Na' še šejle'le che da' ca' chonan', nachen' nezele zoa Xan' len neda' na' neda' zoa' len le', le toz beṇen' nacto'.

<sup>39</sup> Nach da' yoble gosaclaže' yesezene' Jesúsen' perw bitw bdoḷe'.

<sup>40</sup> Jesúsen' beyeje' jayzoe' yešla'a yegw Jordanna' latje gan' gwzoa da' Juanna' šlac ne' chzoe' beṇe' nis. <sup>41</sup> Na' beṇe' zan ja'ac gan' gwzoe' cont bosozenague' xtižen' na' gosene':

—Da' Juanna' ne to yela' guac bi bene', perw yogo'loḷ dan' gwne' che benganaquen da' li.

<sup>42</sup> Na' beṇe' zan gosejnilaže' Jesúsen' latje na'.

## 11

*Can' goc cate' got Lázaro*

1-2 Na' gwzoa to bene' gocšene bene' yež Betania le' Lázaro. Betania naqen laž María na' bene' bile' Marta, na' legaque' zjanaque' bene' zan Lázaron'. María nan' bzoe' to set zix ni'a Xancho Jesúsén' na' bosbiže' ni'en len yiša' yichje'. 3 Na' bene' zan Lázaron' gosesele' diža' gan' zoa Jesúsén', chese'e le':

—Xanto', bene' xmigo' Lázaron' ba chacšende'.

4 Cate' gwneze Jesúsén' chacšene Lažaron', na' gwne':

—Ca nac yižgüe' chen', bi che'eden' cont yela' goten' gonen le' gan, san che'eden' cont gacbe'ele catec bene' zaca' nac Diosen' na' gacbe'ele naca' bene' zaca'chgua, neda' naca' dogualje Xi'in Dios.

5 La'czla' Jesúsén' chacde' Martan' len bene' bilen' na' len Lázaron', 6 cate' gwnezde' chacšene Lázaron', bega'anche' yečhope ža gan' zoen'. 7 Nach gože' bene' ca' zjanaque' le' txen:

—Le šo'o šejcho distritw Judean' da' yoble.

8 Na' gose'ene':

—Maestrw, bi ža na'zen' bene' gwnabia' che nación chechon' gosaclaže' yesote' le' yosochele' le' yej. ¿Da' yoble šejo' na'?

9 Jesúsén' gože' legaque':

—Lagüe žan' nsa' šižinw hor, na' bene' chda lagüe ža bi chčegüe', le nseni' gwbižen' lo yežlion'. 10 Na' bene' chda ba goļ chčegüe', le nac chol.

11 Gwde gwne' ca' nach gože' legaque':

—Bene' xmigwcho Lázaron' ba chtase' na' ša'a šjaysbana'ne'.

12 Na' gose'ene':

—Xanto', še ba chtase' güeyacczede'.

13 Jesúsén' gwne' ca' dan' gwnezde' ba got Lázaron', na' bene' ca' zjanaque' Jesúsén' txen gosacde' še chtaszen'. 14 Nach Jesúsén' bochixgaten' bi zejenna' gwne' ca':

—Ba got Lázaron'. 15 Na' chebeda' bi gwzoa' na' šlac chacšende', cont gona' šejle'le chia'. Le šo'o šejcho gan' de'na'.

16 Nach ben' le' Tomás ben' bososi'e Tomás Cuaš gože' yezica'chle bene' ca' zjanaque' Jesúsén' txen:

—Le šo'o cont gatcho txen len Jesúsén' še yesote'ne'.

### *Jesúsén' že' chac chosbane' bene' guat*

17 Na' ja'aque' Betanian' len Jesúsén', na' cate' besežine'na' bene' Betania ca' bosozende' le' ba goc tap ža bosocuaše' Lázaron'. 18 Betanian' chin' gaļa'ze Jerusalénna' ca do gašjw hor. 19 Na' bene' zan bene' gualaž čhegaque' že' Jerusalénna' besežine' gan' zoa Martan' len Marían' cont yeso'e legaque' yela' chxenlaže' da' got bene' zangaquen'. 20 Nach Martan', cate' gwnezde' Jesúsén' ba bžine' cho'a yežen', na' gwze'e jašague'ne'. Na' Marían' bega'ane' yo'ona'. 21 Nach Martan' gože' Jesúsén':

—Xana', šaca' zo' nga caten' gocšene bene' zanan' bilja gote' šaca'. 22 Na' nezda' la'czla' ba gote', bite'tez da' nabdo' Diosen' gone', gonczen'.

23 Nach gož Jesúsén' le':

—Güeban bene' zanon'.

24 Nach Martan' gože'ne':

—Nezda' yebane' cate' yesyeban bene' guat ca' žan' te che yežlion'.

25 Na' gož Jesúsén' le':

—Neda' chac chosbana' bene' guat ca' le nsa'a yela' mban toļi tocaņe. Da'nan' bene' ca' yesejnilaže' neda', la'czla' yesate', guata' yela' mban

chegaque' toli tocañe. <sup>26</sup> Na' note'tez beñe' nite' chesejnilaže' neda', gwbat yesebiaye'e. ¿Chejli'o da' nga chnia' le'?

<sup>27</sup> Na' gož Martan' le':

—Xana', chejli'a naco' dogualje Xi'in Dios. Chejli'a naco' Criston' ben' ba gwlezto' sela' Diosen' yežlion' yedenabi'e.

*Jesúsen' gwcheže' gan' bosocuaše' Lázaron'*

<sup>28</sup> Beyož gwna Martan' ca' beyeje' jayeže' María bilen' šižize:

—Ba bla' Maestron' cho'a yežen' na' chñie' le'.

<sup>29</sup> Na' Marían' cate' bende' dan' gož Martan' le' la' gwza'te' na' gwyeje' gan' zoa Jesúsen'. <sup>30</sup> Biña' žin Jesúsen' lagüe yežen' ca' horen', ne' nga'ane' cho'a yežen' gan' jašag Martan' le'. <sup>31</sup> Na' beñe' Jerusalén ca' nita' liž María, beñe' cheso'e le' yela' chxenlaže' da' got beñe' zanen', cate' besele'ede' gwza' Maríen' nach gosa'aclene' le', gosacde' zeje' cho'a blojen' gan' ngaše' zjačeže'.

<sup>32</sup> Na' Marían' cate' bžine' gan' zoa Jesúsen' na' ble'ede' le', la' bzoate xibe' lagüen', gože'ne':

—Xana', šaca' zo' nga caten' gocšene da' beñe' zanan', bilja gote' šaca'.

<sup>33</sup> Na' cate' ble'e Jesúsen' chbež Marían' na' lecze chesebež beñe' Jerusalén ca' za'aclene' le', da' juisyw da' goque Jesúsen' na' bžaglagüe' lo' yichjlažda'ogüen'. <sup>34</sup> Na' gože' legaque':

—¿Ga bcuaše'lene'?

Na' gose'e le':

—Xanto', yo'o na' le'edo'.

<sup>35</sup> Na' gwchež Jesúsen'. <sup>36</sup> Na' beñe' Jerusalén ca' gosene':

—Le na' catequen' chacde' le'.

<sup>37</sup> Na' bałe' gosene':

—Bengan' bene' ga ble'e beñe' lchołen', na' šaca' gwzoe' nga caten' gocšene Lázaron', benlje' cont bi gote'.

*Jesúsen' bosbane' Lázaron' ladjo beñe' guaten'*

<sup>38</sup> Na' da' yoble da' juisyw da' goque Jesúsen' lo' lažda'ogüen'. Na' gwyeje' gan' bosocuaše' ben'. Naquen to bloj na' da' to yej cho'enna'. <sup>39</sup> Na' Jesúsen' gože' beñe' ca':

—Le ca'a yejen'.

Na' Martan' beñe' zan da' Lázaron' gože'ne':

—Xana', ba chła' ben' zigw, le bač goc tap ža gote'.

<sup>40</sup> Na' gož Jesúsen' le':

—Ba gwnia' le' še šejnilažo' neda' na' le'edo' nac Diosen' beñe' zaca' juisyw.

<sup>41</sup> Nach beñe' ca' goseque'e yejen'. Na' Jesúsen' gwñe'e yabale na' gwne':

—Xa', choxcleno' ba bzenago' chia'. <sup>42</sup> Nezda' yogo' ni'a chzenago' chia', perw žia' ca' cont beñe' ca' že' nga yesejle'e len' gwselo' neda'.

<sup>43</sup> Beyož bol güiže' Diosen', gwñe' zižje, gwne':

—Lázaro, bechoj.

<sup>44</sup> Nach la' bechojte Lázaron' ndobyoy ni'a ne'en to cint de lache' na' to bay ndobe cho'alagüen'. Na' Jesúsen' gože' legaque':

—Le yozaše' lachen' na' le gwsane' yeyeje'.

*Bosoxi'e yesezene' Jesúsen'*

(Mt. 26:1-5; Mr. 14:1-2; Lc. 22:1-2)



<sup>45</sup> Na' zan bene' Jerusalén ca' bene' ja'aclene' Marían' besele'ede' yela' guac da' ben Jesúsén' na' gosejnilaže'ne'. <sup>46</sup> Perw bal bene' Jerusalén ca' ja'aque' lao bene' fariseo ca' na' jaseže' legaque' Jesúsén' bosbane' Lázaron'. <sup>47</sup> Nach bħoz gwnabia' ca' che neto' bene' Israel len bene' fariseo ca' bosyotobe' yogo'lo'lo' bene' ca' chesenabia' nación cheton'. Na' bosoxi'e gosene':

—¿Nac goncho? le yela' guac zan chon benga. <sup>48</sup> Na' še nacho jayenna', yogo'ze bene' yesejnilaže'ne', na' yesid bene' nación Roma na' yeseque'e yodao' blao chechon' na' yosožiaye'e nación chechon'.

<sup>49</sup> Na' to bene' gwnabia' zoa ca horen' le' Caifás. Le' naque' bħoz blao lo izen'. Na' gože' legaque':

—Le'e gague bi nezele. <sup>50</sup> Na' bi chache'ele napen chio' cuent toz ben' gat, clél ca cuiayi' yogo'cho lente nación checho nga.

<sup>51</sup> Gague con ca gwnalaže'ze Caifásen' gwne' ca', san da' naque' bħoz blao iznan', Diosen' bene' ga gwne' ca' cont gwdixjue'ede' gat Jesúsén' neche nación cheton'. <sup>52</sup> Na' ca nac dan' gaten', gague gate' neche nación cheto' na'zen' san gate' cont yogo' bene' ba gwlej Diosen' yesaque' xi'ine' gate'teze nación, yesaque' txen yesejnilaže'ne'. <sup>53</sup> Ca' goquen', žana' bene' gwnabia' ca' gosezolaže' bosoxi'e nacle yesone' yesote' Jesúsén'.

<sup>54</sup> Na' da'nan' Jesúsén' bich gwdacze' con can' nla'ze gan' že' bene' gwnabia' che nación cheton'. Nach gwze'e distritw Judean' na' gwche'e bene' ca' zjanaque' le' txen to yež da' nzi' Efraín da' chi' gała'ze latje dašen', na' besyega'ane' na'.

<sup>55</sup> Na' ba zoa gała' lni pascw che neto' bene' Israel. Na' bene' zan bene' za'ac to to yež zja'aque' Jerusalénna' cate' za' gała'le lnin' cont yeson cuine' xilaže' can' ža ley cheton'. <sup>56</sup> Na' besyeyiljue' Jesúsén' do gan' zoa yodao' blaon' na' cate' bi besyeželde'ne' na' gose' lježe':

—¿Bi chaquele? ¿Güide' lni nga, še bi yide'?

<sup>57</sup> Gosene' ca' le bħoz gwnabia' cheto' ca' na' bene' fariseo ca' ba gosechoguen' še note'tez bene' nezde' gan' zoa Jesúsén' cheyala' gwzende' legaque' cont yesezene' le'.

## 12

*Marían' chgüe'e set zix ni'a Jesúsén'*  
(Mt. 26:6-13; Mr. 14:3-9)

<sup>1</sup> Na' yexop ža za' gała' lni pascon', Jesúsén' gwche'e bene' ca' zjanaque' le' txen yež Betanian' gan' zoa Lázaron' ben' bosbane' ladjo bene' guaten'. <sup>2</sup> Na' bal bene' Betanian' bososiñi'e to xše' da' gwdagw Jesúsén' cont gosonxene'ne'. Na' Martan' bdie' yela' guagw na' Lázaron' gwche'lene' bene' ca' cho'a mesen' txen len Jesúsén'. <sup>3</sup> Na' Marían', de ca do tya set zix che' da' zaca'chgua la'ay na' naquen dogualje da' bchoj lo yag yej da' nzi' nardo. Na' jabigue' gała'ze xni'a Jesúsén' na' gwlo'e set zixen' ni'ena' na' beyoža' bosbižen' len yiša' yichje'. Na' doxen yo'ona' gwla'chguan ze set zixen'. <sup>4</sup> Na' Judas Iscariote xi'in' to bene' le' Simón, le' naque' to bene' šižinw ca' zjanaque' Jesúsén' txen, na' len' ba naquen gwdie' Jesúsén' lo na' bene' ca' cheseque'ede' le'. Na' Judasen' gwne:

<sup>5</sup>—¿Bixchen' bi bete' seten' na' gone' mechon' cont gaclenen bene' yaše'? le zacan' ca no laxjw mos da' gone' gan tğüiz.

<sup>6</sup> Judasen' gwne' ca' gague da' beyaše'de' beñe' yašen' san da' goque' beñe' gwban. Len' beḅue' mechw da' bosochin yogüe' na' gwlejlane' mechon'. <sup>7</sup> Nach Jesúsen' gože'ne':

—Bibi ye'ine', le' ba bene' da' non gone' len neda' che ža cate' gaša'.  
<sup>8</sup> Beñe' yaše' ca' nita'cze' len le'e bate'teze, san neda' bich soacza' yesša' len le'e.

*Bḅoz gwnabia' ca' bosoxi'e yesote' Lázaron'*

<sup>9</sup> Na' beñe' zan beñe' Israel gualaž cheton' gosenezde' zoa Jesúsen' lagüe' yež Betanian' na' ja'aque', gague cont yesele'ede' Jesús na'zen' san da' gosaclačže' yesele'ede' lencze Lázaron' ben' bosbane' ladjo beñe' guaten'.

<sup>10</sup> Na' bḅoz gwnabia' che nación Israel cheton' bosoxi'e lecze yesote' Lázaron', <sup>11</sup> le' beñe' zan beñe' Israel ba chesyecuase' len legaque' na' ba chesejnilaže' Jesúsen' dan' gosenezde' bosbane' Lázaron'.

*Jesúsen' beyo'e ciuda Jerusalénna' da' yoble*

*(Mt. 21:1-11; Mr. 11:1-11; Lc. 19:28-40)*

<sup>12</sup> Na' beteyo Jesúsen' len beñe' ca' zjanaque' le' txen gosa'aque' Betanian' na' ja'aque' Jerusalén. Na' beñe' zan chesežag Jerusalénna' da' ba zoa gała' lnin', na' zane' cate' gosenezde' žin Jesúsen' Jerusalénna', <sup>13</sup> besežaše' jaseleze' le' zjanoxe' no zin. Na' chesegüe'e lban' che', chesene':

—jLeca beñe' zaca' bengal! Mbalaz ben' za' nga nselal' Xancho Diosen' le' cont nabi'e. jMbalaz beñe' naque' Rey che nación Israel chechon'!

<sup>14</sup> Na' bžel to burr dao' be gwžia Jesúsen', na' goc can' nyoj Xtiža' Diosen' žan:

<sup>15</sup> Le'e chonxenle Diosen' ciuda Jerusalénna', bi žeble; le' na', ba za' Rey chelen' žie' to burr dao'.

<sup>16</sup> Na' beñe' ca' zjanaque' Jesúsen' txen gague cate gosejni'ide' chac con can' bosozoj ben' gosoe' xtiža' Diosen' cani'. Beyož got Jesúsen' na' goc yogo' da' ca' gosaquen' cont bla'lagüe le' Jesúsen' naque' beñe' zaca' juisyw, cana'ch jasyeza'laže' diža' ca' da' zjanyoj che' Jesúsen' na' gosejni'iden'.

<sup>17</sup> Beñe' ca' besele'e cate' Jesúsen' bol' güiže' Lázaron' na' bosbane' le' cont bechoje' lo' ban' gosoe'lene' beñe' ca' že' lo' ciudan' diža' can' goquen'.

<sup>18</sup> Na' da'nan' beñe' zan jaseleze' Jesúsen' da' ba gosende' diža' che' yela' guac dan' bene' bosbane' Lázaron'. <sup>19</sup> Nach beñe' fariseo ca' gose' lježe':

—Ba chle'ele bibi chac bi goncho. Yogo'ze beñe' ba chosozenague' che'.

*To chope beñe' griego gosenabe' yesoe'lene' Jesúsen' diža'*

<sup>20</sup> Na' zjalen to chope beñe' griego beñe' ca' ja'aque' gosonxene' Diosen' lo' lnin'. <sup>21</sup> Na' beñe' ca' besežine' gan' zoa Felipen' ben' nac beñe' Betsaida ga' mbane' distritw Galilean', na' gose'ene':

—Si'xenšco', chaclaže'to' güe'lento' Jesúsen' diža'.

<sup>22</sup> Na' Felipen' gwyeje' jane'e Andrésen' nach choptie' jaseže' Jesúsen' ca'.  
<sup>23</sup> Nach Jesúsen' gože' legaque':

—Na'a ba bžin hor gac yogo'lol' da' cheyala' gac cont la'lagüe naca' beñe' zaca' juisyw. <sup>24</sup> Žia' to da' zejen, še to trigon' bi yexinjen cate' lažon' lo' yon', con chega'ancze tozen; perw še yexinjen na' yelan', da' zan trigon' gonen. <sup>25</sup> Note'tez beñe' con chi' yichje' gac güen' chegaque' yežlio nga, beñe' ca' yesebiaye'e. Na' note'teze beñe' chesene' bibi nonen' še bi gac chegaque' yežlio nga, šjasyezoe' len Diosen' toli' tocañe. <sup>26</sup> Na' note'tez beñe' chesaclačže' yesone' xšinan', cheyala' yesejnilaže' neda' na'

yosozenague' chia'. Na' gan' soa' neda' lecze na' yesezoa bene' ca' yeson xšinan'. Note'tez bene' yeson xšinan', Xan' gone' cont yesacxene'.

*Jesúsen' gwdixjue'ede' yesot bene' le'*

<sup>27</sup> Ba chžaglagua' lo' yichjlažda'oguan'. ¿Chaquale nabda' Xan' yosle' neda' lo da' ca' ba zoa gac chia' na'a? Bitw gona' ca', le za'a cont gac chia' yogo' da' ca'.

<sup>28</sup> Nach bol güiže' Diosen', gwne':

—Xa', ben len neda' cont yesacbe'e bene' naco' bene' zaca' juisyw.

Beyož gwne' ca' na' gwne' Dios ben' zoa yaban', gwne':

—Ba bena' len le' cont chesacbe'e bene' naca' bene' zaca' juisyw na' za' goncha' ca' yeto.

<sup>29</sup> Na' zan bene' ca' že' na' gosende' dan' gwna Diosen' na' gosene' gwzion' gwne. Na' yeba'le' gosene':

—To angl gwne' le'.

<sup>30</sup> Na' Jesúsen' gwne':

—Diosen' gwne' neda' zižje gague cont nezda' neda' chzenague' chia' san cont neze le'e. <sup>31</sup> Ba bžin ža Diosen' chogbi'en' che bene' ca' bi chesejle'e chia'. Na' ba bžin ža Satanás dan' chnabia' da' xigüe' ca' na' dan' chnabia'te bene' ca' bi chosozenag che Diosen' solao nit yela' chnabia' chen. <sup>32</sup> Na' cate' yeselise' neda' to le'e yag, cana'ch gona' cont zan bene' že' doxen lo yežlion' yesejnilaže' neda'.

<sup>33</sup> Gwne' ca' cont gosenezde' yesot bene' le' yosode'ene' to le'e yag cruz.

<sup>34</sup> Na' bene' ca' že'na' clele gosejni'ide' dan' gwnen' na' gose'e le':

—Ba beneto' can' ža Xtiža' Diosen' da' nyojen, na' nezeto' žan Cristo ben' sela' Diosen' yedenabi'e nación chechon' soe' toli toca'ne. Na' le' ¿bixchen' žo' naco' bene' gwse'la' Dios goljo' bena'ch na' žo' yesote' le' to le'e yag cruz še ca'? ¿Nox naco' šaca'?

<sup>35</sup> Nach Jesúsen' gože' legaue':

—Yešlož da'ozen' soa' len le'e, neda' nsa' be'ni' che yichjlažda'olen'. Le gwzenag chia' šlac ne' de latje šo' be'ni' chian' lo' yichjlažda'olen', cont bi cuiayi'lenle' da' mal dan' chnabia' le'e. Ben' chda gan' nac chol' bi chacbe'ede' gan' zeje'. Can' naquen len le'e. <sup>36</sup> Le šejnilaže' neda' šlac ne' zoa' len le'e, cont šo' be'ni' chian' lo' yichjlažda'olen'.

Gwde gwna Jesúsen' ca' beze'e na' bcuaše'de' legaue'.

*Zan bene' Israel bi gosejnilaže' Jesúsen'*

<sup>37</sup> Na' la'czla' bene' Israel gualaž cheto' ca' besele'ede' ben Jesúsen' da' zan yela' guac, zane' bi gosejnilaže'ne'. <sup>38</sup> Goc can' bzoj da' Isaíasen' ben' be' xtiža' Diosen' cani', gwne':

Xanto', nono chejle' diža' dan' chyixjue'eton', na' nono chesacbe'e blo'o yela' guac chion'.

<sup>39</sup> Bi goc yesejle'e, le goc chegaue' can' ža yeto dan' bzoj da' Isaíasen', žan: <sup>40</sup> Diosen' bene' cont bi gosejni'ide' na' cont zjanaue' bene' güedena.

Ba bene' cont chesele'ede' na' bi zjañezde' bi zejen, na' bi chesacbe'ede' lo' yichjlažda'ogaue' bi zejen dan' chlo'ede' legaue'.

Šaca' chesejni'ide' na' chesacbe'ede' bi zejen dan' chlo'eda' legaue', ba besyetiñjde' na' ba beca'a xto'la'gaquen' šaca'.

<sup>41</sup> Da' Isaíasen' gwne' ca' da' ble'ebande' nac Jesúsen' bene' zaca' juisyw nach be'e diža' che'.

<sup>42</sup> Na' la'czła' zanch bene' Israel gualaż cheto' ca' bi gosejnilaže' Jesúsen', bia'cze bene' zan na' len no bene' gwnabia' cheto' gosejnilaže'ne', perw bi goso'e diža' chesejnilaže'ne' le besežebe' bich yosoleb bene' fariseo ca' legaque' lo' yodaon'. <sup>43</sup> Gosaclaže'che' yesenite' binlo len benachen' clél ca' yesenite' binlo len Diosen'.

*Xtiža' Jesúsen' naquen da' žialao*

<sup>44</sup> Nach Jesúsen' gwne' ziže gože' bene' ca' že'na':

—Bene' chesejnilaže' neda' gague neda'zen' chesejnilaže' san lente Xan' ben' gwsela' neda'. <sup>45</sup> Na' bene' chne'e neda' chle'ede' bene' gwsela' neda'. <sup>46</sup> Neda' za'a yežlio nga chgua'a be'ni' lo' yichjlaždao' bene' ca' chesejnilaže' neda', cont bi yesenite' yesonche' da' malen'. <sup>47</sup> Na' note'tez bene' nezde' can' ba gwnian' na' bi chzenague' chia', gague neda' gwnežjua' castigw che xtolen', le bi za'a yežlion' cont gwnežjua' castigw che xtola' benachen', san za'a cont gwnežjua' yela' mban toli tocané che bene' yesejnilaže' neda'. <sup>48</sup> Perw de da' choglaon che bene' ca' bi chesejnilaže' neda' na' bi chosozenague' che dan' ba gwnian', xtižan' dan' ba bian', lenna' choglaon che bene' ca' zjanape' dola' cate' žin ža te che yežlion'. <sup>49</sup> Gague bia' diža' to gualaza', san Xa' ben' gwsela' nedan' none' mandadw bin' cheyała' nia' na' bin' cheyała' gwsed gwlo'eda'. <sup>50</sup> Na' nezda' dan' none' mandadw nia' nsan' yela' mban toli tocané che bene' yosozenag chen. Na' da' li, con can' ža Xan', can' choe'lena' le'e diža'.

## 13

*Gwdib Jesúsen' ni'a bene' ca' zjanaque' le' txen*

<sup>1</sup> Na' Jesúsen' ba nezde' ba bžin ža yeze'e yežlion' na' yeyeje' gan' zoa Xe' Diosen', na' gocde' yogo' bene' ba chejnilaže' le' lo' yežlio nga. Da'n'an' za' gala' lni pascon' bzejni'ide' bene' ca' zjanaque' le' txen, le chacyane'czede' legaque'.

<sup>2</sup> Bač gwlo'o Satanásen' xbab lo' yichjlaždao' Judas Iscariote, ben' nac xi'in to bene' le Simón, cont gwdie' Jesúsen' lo' na' bene' ca' chesegue'ede' le'. Na' ba zjanite' chesagüe' xše'. <sup>3</sup> Na' Jesúsen' nezde' Xen' ba bene' cont nape' la'zelagüe' yela' chnabia', na' nezde' gan' zoa Diosen' gwze'e na' gan' zoe' nan' yeyeje'. <sup>4</sup> Da'n'an' gwzože'e cate' ba chesyedagüe' xše' na' gwlečhje' xe' da' nyaze' cha'le na' gwxi'e to lache' da' bčhej lsinen'. <sup>5</sup> Nach gwxi'e nis na' gwde'en to lo' ša' na' gwzologüe' gwdibe' ni'a bene' ca' zjanaque' le' txen ca' to mos, na' bosbiže' ni'agaquen' len lachen' nčhej lsinen'.

<sup>6</sup> Na' cate' ba zoa chibe' ni'a Simón Pedro, Pedron' gože'ne':

—Xana', žle' chibo' ni'an'?

<sup>7</sup> Na' Jesúsen' gože'ne':

—Dan' chona' nga bi chejni'idon' na'a, perw gwžin ža cate' šejni'idon'.

<sup>8</sup> Na' gož Pedron' le':

—Gwbat gua'a latje chibo' ni'an'.

Jesúsen' gože'ne':

—Še bi chiban', bich gaco' txen len neda'.

<sup>9</sup> Na' Pedron' gože'ne':

—Xana', gague ni'a na'zen' chibo' še ca', san doxena'.

<sup>10</sup> Nach gož Jesúsen' le':

—Beṇe' noša' nazje', ni'e na'zen' chyažjen čhibe', le doxen cuerp chen' naquen xilaže'. Can' nac le'e, nac lažda'olen' xilaže', la'czła' gague yogo'le.

<sup>11</sup> Jesúsen' gwnežde' non' gwde' le' lo na' beṇe' chesegue'ede' le'. Da'nan' gwne': "Gague yogo'le nac lažda'olen' xilaže."

<sup>12</sup> Na' cate' beyož gwdbibe' ni'a yogüe', nach beyaze' xe' dan' chaze' cha'le na' bebi'e da' yoble cho'a mesen'. Na' gože' legaque':

—¿Chejni'ile bi zejen dan' ba bena' nga len le'e? <sup>13</sup> Le'e nsi'le neda' Maestrw na' Xanle, na' güenczen' žale, le can' naca'. <sup>14</sup> Na' neda' la'czła' naca' Xanle na' Maestrw chele, ba gwdbiba' ni'alen' ca to mos, na' can' cheyała' gaclen lježle ca to mos. <sup>15</sup> Ba gwdbiba' ni'alen' cont blo'eda' le'e cheyała' gonle can' ba benan'. <sup>16</sup> Chnia' le'e to da' zejen, note'teze mos bi naque' beṇe' blaoch ca xane', na' to beṇe' zej mandadw bi zaca'che' ca beṇe' gwseła' le'. <sup>17</sup> Še chejni'ile da' quinga na' gonle can' gwnian', nach soale mbalaz.

<sup>18</sup> Bi žia' ca' che yogo'le. Nombi'a yichjlaždao' to to le'e ba gwleja' cont soale txen len neda'. Na' nežda' gac can' ža Xtiza' Diosen' da' nyojen žan: "Beṇe' gwdagw len neda' txen ba blej bšošje' neda'." <sup>19</sup> Chnia' le'e da' quinga cate' za' gac ca' cont cate' ba goc ca' soačhačhle šejle'le le naca' ben' gwseła' Diosen' can' ba gwnia' le'e. <sup>20</sup> Chnia' le'e to da' zejen, beṇe' ca' chosolebe' note'tez beṇe' chseła', neda'czen' chosolebe' še ca', na' beṇe' chosolebe' neda' lecze chosolebe' Dios beṇe' gwsele' neda'.

*Jesúsen' gwne' toe' gwdie' le' lo na' beṇe' ca' chesegue'ede' le'*

*(Mt. 26:20-25; Mr. 14:17-21; Lc. 22:21-23)*

<sup>21</sup> Beyož gwna Jesúsen' ca' ba gwzolač chacyaše'chgüede' lo' yichjlažda'ogüen', na' bochixgaten' gwne':

—Da' li chnia' le'e, to le'e gwdelenda' lo na' beṇe' chesegue'e neda'.

<sup>22</sup> Na' beṇe' ca' zjanaque' le' txen con chesena' cho'alač lježe' chesone' xbab che noen' gwne' ca'. <sup>23</sup> Na' toe' chi'e cuiten' dan' chaquechgüe' Jesúsen' le'. <sup>24</sup> Nach Pedron' bene' señw len bena' cont gwṇabde' Jesúsen' no chen' gwne' ca'. <sup>25</sup> Nach gwbigue' bago gože' Jesúsen':

—¿Non' gon ca'?

<sup>26</sup> Na' gož Jesúsen' le':

—Bena' gwnežjua' late' yetextilen' cate' ba blo'ojan' lo' nis yela' guagon', le'na' gon ca'.

Nach blo'oje' late' yetextilen' lo' nis yela' guagon' na' bnežjuen' Judas Iscariote beṇe' nac xi'in to beṇe' le' Simón. <sup>27</sup> Na' beyož bnežjue' Judasen' yetextilen' la' gwyo'o gwyazte Satanás dan' chnabia' da' xigüe' ca' lo' yichjlaždao' Judasen'. Nach Jesúsen' gože' Judasen':

—Da' ba zoa gono' benen bedao'nez.

<sup>28</sup> Na' ne to ben' zjachi' cho'a mesen' bi gosejni'ide' bixchen' gože' le' ca'. <sup>29</sup> Ba le' gosacde' da' noxe' Judasen' bols mechon' Jesúsen' gože' le' šjaxi'e da' cheseyažjde' lo lṇin' o šjanežjue' mechw da' chyažje no beṇe' yaše'. <sup>30</sup> Nach cate' beyož gwdagw Judasen' pedas yetextil dan' bnežjw Jesúsen' le', la' bchojte'. Na' ba nac ba goł gual.

*To da' cobe da' non Jesúsen' mandadw goncho*

<sup>31</sup> Gwde bchoj Judasen', Jesúsen' gwne':

—Diosen' gwsele' neda' golja' beṇač na' na'a ba nla'laon naca' beṇe' zaca' juisyw, na' neda' lecze ba chlo'a Diosen' naque' beṇe' zaca' juisyw.

<sup>32</sup> Na' dan' chlo'a naque' beṇe' zaca', lecze le' gwlo'e naca' beṇe' zaca', na'

la' gontien' na'a. <sup>33</sup> Xi'inda'ogua', yešložga soa' len le'e. Na' yeyiljwle neda', na' chnia' le'e dan' goša' beñe' gwnabia' che nación Israel chechon', bi gac sa'lenle neda' gan' yeya'an. <sup>34</sup> Na' to da' cobe chžia' bia' gonle, gaque lježle tole yetole. Can' chacda' le'e, lecz can' cheyala' gaque lježle tole yetole. <sup>35</sup> Na' yesezeze yogo'lol beñe' nacle neda' txen še soaczle gaque lježle tole yetole.

*Jesúsen' gwne' Pedron' bi chebe' nombi'ene'*

(Mt. 26:31-35; Mr. 14:27-31; Lc. 22:31-34)

<sup>36</sup> Na' Simón Pedron' gože' Jesúsen':

—Xana', ¿gan' yeyejo'?

Na' gož Jesúsen' le':

—Gan' yeya'an bi gac sa'leno' neda' na'a, perw techle yido' ga'oguo' neda'.

<sup>37</sup> Na' Pedron' gože' le':

—Xana', ¿bixchen' bi gac sa'lena' le' na'a? Gwzanlaže' cuina' gata' še chonen byen cont gaclena' le'.

<sup>38</sup> Na' gož Jesúsen' le':

—¿Chacdo' gwzanlaže' cuino' gato' cont gacleno' neda'? Da' li chnia' le', cate' cuež jean' ba goc šon ni'a bi chchebo' nombi'o neda'.

## 14

*Beñe' chesejnilaže' Jesúsen' lecze zjanombi'e Xe' Diosen'*

<sup>1</sup> Bich gacžejlaže' le. Le šejnilaže' Diosen' na' lecze le šejnilaže' neda'. <sup>2</sup> Da' zan yo'o da' že' gan' zoa Xa' Diosen'. Ba gwnia' le'e šaca' bibi latje de chele, san yeya'a šjajenšagua' yo'o che to tole. <sup>3</sup> Na' cate' yeyož šjajenšagua' yo'o chele ca', cana'ch yida' da' yoble yeči'a le'e cont yedyezoale gan' šjayzoa' neda'. <sup>4</sup> Nezele gan' yeya'an' na' ba nezele nac gonle cont yežinle na'.

<sup>5</sup> Na' gož Tomásen' le':

—Xanto', bi nezetu' gan' yeyejo'. ¿Nacxe gac nezetu' nac gonto' yežinto' na'?

<sup>6</sup> Jesúsen' gože'ne':

—Neda' naca' nezen' na' nsa'a yogo' diža' li, na' toz neda' chac chnežjua' beñe' yela' mban toli tocañe. Ne toze beñe' bi yežine' gan' zoa Xan' še bi šejnilaže' neda'. <sup>7</sup> Še nombia'yane' le neda', lente Xan' ba nombia'le še ca'. Na' bačh nombia'lné' na'a na' ba ble'elne'.

<sup>8</sup> Na' gož Felipen' le':

—Ben cont le'eto' Xaon', lezen' chñabeto' le'.

<sup>9</sup> Jesúsen' gože'ne':

—Felipe, sša xen ba gwzoa' nga len le'e na' ¿bina' gombi'o neda'? Note'tez beñe' ba ble'e neda' lencze Xan' ba ble'ede'. ¿Bixchen' chñabo' gona' cont le'ele Xan'? <sup>10</sup> ¿Bi chejli'o zoa' len Xan' na' le' zoe' len neda'? Diža' da' choa' len le'e bi choan' to gualaza'. Xa' nan' zoe' len neda' na' len' chone' cont choa' dižan' chaclaže' gua' na' chona' bi da' chaclaže' gona'. <sup>11</sup> Le šejle' chia' zoa' len Xan' na' le' zoe' len neda'. Na' še bi chejle'le xtižan', le šejle' chia' dan' ba ble'ele chona' yela' guac. <sup>12</sup> Na' chnia' to da' zejen, beñe' ca' chesejnilaže' neda', da' ca' chonan' lecze legaquen yesone'. Na' da' zaca'ch ca da' ca' yesone', le yeya'a gan' zoa Xan'. <sup>13</sup> Na' bite'teze da' nabele Xan' lagüe da' chejnilaže' le neda' naca' Xi'ine', gonan', cont gwlo'a nac Xan' beñe' zaca' juijyiw. <sup>14</sup> Bite'tez da' nable gona' lagüe da' chejnilaže' le neda', neda' gonan'.

*Jesúsen' gwne' sele' Spiritw che Diosen'*

<sup>15</sup>Še chaquele neda', gonle can' nona' mandadw. <sup>16</sup>Na' nabda' Xan' cont sele' Spiritw chen' soan len le'e toli tocanē na' gaclenen le'e. Na' Spiritw che Diosen' gwzejni'in le'e da' nac da' li. <sup>17</sup>Na' bene' bi chesejnilaže' Diosen', Spiritw chen' bi gac soan len le'gaque', le bi chesele'eden' na' neca chesejle'e še zoan. San le'e nombia'len, le zoan len le'e na' gwžin ža yedesoa lo' yichjlažda'olen' nabian' le'e. <sup>18</sup>Bi yocua'aṅa' le'e ca bi güezebe. Güidca' yeto gan' zoale nga. <sup>19</sup>Yešlož bene' ca' bi chesejnilaže' Diosen' bich yesele'ede' neda', perw le'e gwle'eczele neda'. Na' da' zoa' toli tocanē, da'nān' soale toli tocanē. <sup>20</sup>Na' cate' žin ža yedesoa Spiritw che Diosen' lo' yichjlažda'olen', cana'ch gacbe'ele neda' zoa' len Xan' na' le'e zoale len neda' na' neda' zoa' len le'e. <sup>21</sup>Bene' zjaṅezde' dan' nona' mandadw yesone' na' chesonen', bene' ca' chesacde' neda'. Na' bene' ca' chesacde' neda' lecze chaque Xan' le'gaque', na' neda' lecze soa' gacda' le'gaque' na' gona' cont yesombia'che' neda'.

<sup>22</sup>Na' Judas (perw gague Judas Iscariote) gože'ne':

—Xanto', žbixchen' gono' cont neto' nezeto' zoaczo' len neto' na' bi gono' ca' len bene' bi chesejnilaže' Diosen'?

<sup>23</sup>Na' Jesúsen' gože'ne':

—Bene' chesacde' neda' chosozenague' xtižan', na' Xan' lecze gacde' le'gaque' na' neda' len xan' yedesoa' len le'gaque'. <sup>24</sup>Bene' bi chesacde' neda' bi chosozenague' xtižan'. Na' diža' dan' chnian' bi cho'an to gualaza' san cho'a diža' da' ža Xan' ben' gwsela' neda'.

<sup>25</sup>'Da' quinga ba gwnia' le'e šlac ne' zoa' len le'e. <sup>26</sup>Na' Xan' sele' Spiritw chen' soan lo' yichjlaždao' le'e chejnilaže'le neda' cont gaclenen le'e. Na' Spiriton' gwzejni'in le'e yogo' da' cheyała' nezele na' gonen cont šjajza'laže'le yogo' dan' ba gwnia' le'e.

<sup>27</sup>'Na' hcua'aṅa' le'e na' chona' cont soa cuezle binlo len xbab chelen'. Chaclača' soa cuezle binlo len xbab chelen' can' zoa' neda'. Nono benačh gac gone' cont soa cuezle binlo len xbab chelen' can' chac chona' neda'. Bi gacžejlaže'le, neca žeble. <sup>28</sup>Ba benele gwnia' yeya'a gan' zoa Xan' na' yida' da' yoble gan' zoale nga. Na' ša chaquelenda' ca cheyała', nach chebele dan' yeya'a gan' zoa Xan', le Xan' zaca'che' ca neda'. <sup>29</sup>Na' ba gwnia' le'e na'a bibi na' gac, cont soačhačhle šejnilaže'le neda' caten' gac ca'.

<sup>30</sup>'Bich gua'a diža' zan len le'e, le ba za' Satanás dan' chnabia' da' xigüe' ca' na' dan' chnabia'te bene' ca' bi chesejnilaže' neda', na' tilenen neda', perw bi gonen neda' gan. <sup>31</sup>Chona' con can' non Xan' mandadw cont neze benačhen' chacda' Xan'. Le šo'o na'a, ba gole šejcho.

## 15

*Jesúsen' zaca'lebe' ca to yag da' chbia uvas*

<sup>1</sup>'Neda' zaca'leba' ca to yag da' chbia uvas. Na' Xan' zaca'lebe' ca bene' chonš'i yaguen'. <sup>2</sup>Na' le'e chejnilaže'le neda' zaca'leble ca xoze' yaguen'. Na' to to xoze' yaguen' da' bibi chbian, chchoguen'. Na' to to xozen' da' chbia uvasen' chpe'en cont chbiachen da' zanch. <sup>3</sup>Na' le'e ba nacle ca to xozen' da' ba mpe'e, le bačh chzenagle xtižan' dan' ba be'lena' le'e. <sup>4</sup>Le soačhačh len neda' cont soačhača' len le'e. Can' nac xoze' yaguen' bibi chac cuian' to gualazen še bi nca'an le'e yaguen', can' naquen len le'e, bi gacle can' chazlaže' Diosen' še bi soačhačhle len neda'.

<sup>5</sup> 'Neda' zaca'leba' ca to yag da' chbia uvas na' le'e zaca'leble ca xozen'. Note'tezle še soačhačhle len neda' lecze soačhača' len le'e na' gacle can' chazlaže' Diosen', ca'aczen' nac che yag uvazen' dan' chbiachgua, le bibi gac gonle to gualazle. <sup>6</sup> Beñe' bi zoačhače' len neda', gac che' can' chac len xoze' yag da' bibi chbia, le chesečhogueñ' na' chesebižen na' chžin ža chosotoben' chesadoen' yi' cont cheseyen.

<sup>7</sup> 'Na' le'e še zoačhačhle len neda' na' zoačhačhle chzenagle xtižan', bite'tez da' chaclaže'le nabele Diosen', gonczen'. <sup>8</sup> Chacxen Xan' cate' zoale chonchguale dan' chazlažen', na' še chonle ca', yesacbe'e beñe' da' li chejnilaže'le neda' na' chzenagle chia'. <sup>9</sup> Ca Xan' chacde' neda', lecz ca' neda' ba chacda' le'e. Le soa le gon can' žia' cont gacbe'ele chacda' le'e. <sup>10</sup> Še gonle can' nona' mandadw, nachen' gacbe'ele chacda' le'e, le neda' chona' dan' non Xan' mandadw na' chacbe'eda' chacde' neda'.

<sup>11</sup> 'Ba gwnia' le'e ca' cont soale mbalaz ca mbalazen' zoa' neda'. Chaclačža' soale mbalaz juisyw. <sup>12</sup> Na' da' nga nona' mandadw gonle, gaque lježle tole yetole can' chacda' neda' le'e. <sup>13</sup> Nono zoa beñe' chaquech lježe' ca beñe' chzanlaže' cuine' gate' neče beñe' migw che'. Na' can' chona' neda'. <sup>14</sup> Na' le'e nacle migw chia' še chonle con can' nona' mandadw. <sup>15</sup> Na' bich žia' nacle beñe' güen žin chia', le to beñe' güen žin bi nezde' yogo' da' chon xanen', san žia' nacle migw chia'. Le yogo'lol da' ba benda' gwna Xan' ba bzejni'idan' le'e. <sup>16</sup> Gague le'e gwlejlje neda' naca' Xanle. Neda' gwleja' le'e cont chejnilaže'le neda'. Na' chselja' le'e cont šjenle can' chazlaže' Xan', na' gague da' te che da' ca' gonlen'. Na' yogo'lol da' nabele Xan' gone' lagüe da' chejnilaže'le neda', gonczen'. <sup>17</sup> Da' nga da' chona' mandadw gonle, gaque lježle tole yetole.

*Beñe' bi chesejnilaže' Diosen' chesegue'ede' beñe' chosozenag che Jesúsén'*

<sup>18</sup> Še beñe' bi chesejnilaže' Diosen' chesegue'ede' le'e, le gon xbab ba chesegue'eczede' neda' cate' za' yesegue'ede' le'e. <sup>19</sup> Ša nacle txen len beñe' ca' bi chesejnilaže' Diosen', nachen' yesacde' le'e can' chesaque' beñe' lježen' šaca'. Perw ba gwleja' le'e cont chzenagle chia'. Da'n'an' chesegue'ede' le'e da' bi nacle legaque' txen. <sup>20</sup> Le šjasa'laže' dan' gwnia' le'e: "Note'teze mos bi naque' blaoch ca xanen'." Bosochi bososaca' beñe' neda', na' lecz ca' yesonde' le'e. Na' balze beñe' bosozenague' xtižan', lecze balze' yosozenague' xtiža'len'. <sup>21</sup> Na' da' bi zjanombi'e Diosen' ben' gwselja' neda', da'n'an' yesonde' le'e yogo' da' ca', le chesegue'ede' le'e da' chzenagle chia'.

<sup>22</sup> Ša neda' bi bedezejni'ida' legaque', bi zjanape' doļa' da' chesegue'ede' neda' šaca'. Perw na'a bibi de da' yosode'ede' yesene' bi zjanape' doļa'. <sup>23</sup> Beñe' chgue'ede' neda' lente Xan' chgue'ede'. <sup>24</sup> Ba bena' yeļa' guac da' nono nochle na' gon, na' šaca' bi besele'eden' bi zjanape' doļa' da' chesegue'ede' neda'. Perw ba besele'ede' da' ca' na' bia'cze chesegue'ede' neda' len Xan'. <sup>25</sup> Na' chac can' nyoj Xtiža' Diosen' dan' chososed' gan' žan: "Besegue'ede' neda' la'czļa' bibi da' mal bena'."

<sup>26</sup> 'Ba gwnia' le'e selja' Spiritw che Xa' Diosen' gaclenen le'e. Spiriton' san' gan' zoa Xan' na' gwzejni'in le'e diža' li chia' neda'. <sup>27</sup> Na' lecz ca' le'e cheyala' güe'le xtižan', le ba gwzoale len neda' šlac ba gwdixjue'eda' xtiža' Xa' Diosen'.



## 16

<sup>1</sup> 'Ba gwnia' le'e yogo' da' ca' cont bi gacžejlaže'le. <sup>2</sup> Le yesyebeje' le'e lo' yodao' chegaque' ca', na' gwžin ža cate' note'tez bene' yesote' le'e yesacde' chebe Diosen' dan' chesonen'. <sup>3</sup> Yesonde' le'e yogo' da' ca' le bi zjanombi'e Xan' neca neda'. <sup>4</sup> Žia le'e da' quinga cont cate' žin ža gac can' gwnian' nach šjaze'ele.

*Da' chon Spiritw che Diosen'*

'Bi gwnia' le'e yogo' da' ca' gac chele cate' za' gwzola' bzejni'ida' le'e xtiža' Diosen', le ne' zoacza' chaclena' le'e. <sup>5</sup> San na'a yeya'a gan' zoa Xan' ben' gwsela' neda', na' ne tole bi chnabele neda' gan' yeya'a. <sup>6</sup> Na' ba chacyaše'le dan' ba gwnia' yeya'a. <sup>7</sup> Perw da' li napen le'e cuent yeya'a, le še bi yeya'a, Spiritw che Xa' Diosen' dan' gaclenen le'e bi yedesoa lo' yichjlažda'olen'. Na' yeya'a nach sejan' len le'e. <sup>8</sup> Na' cate' yid Spiriton' gwzejni'in benachen' zjanape' dola', na' gwzejni'in non' nac bene' güen len Diosen', na' gwzejni'in gata' castigw toli tocanē che bene' bi chosozenague' chia'. <sup>9</sup> Spiriton' gwzejni'in legaque' zjanape' dola' da' bi chesejnilaže' neda'. <sup>10</sup> Na' gwzejni'in legaque' non' nac bene' güen len Diosen', le yeya'a gan' zoa Xa' Diosen' na' le'e bich le'ele neda'. <sup>11</sup> Na' gwzejni'in legaque' gata' castigw che xtoła'gaquen' toli tocanē, le Satanás dan' chnabia' da' xigüe' ca' na' dan' chnabia'te bene' ca' bi chesejnilaže' Diosen' ba nchoglaon chen gwnežjw Diosen' castigw chen toli tocanē.

<sup>12</sup> 'Ne' dech da' zan da' nia' le'e, perw naquen zdebe šejni'ilen na'a. <sup>13</sup> San cate' yedesoa Spiritw che Diosen' lo' lažda'olen' cont gwzejni'in le'e da' nac da' li, len gwsed gwlo'en le'e yogo' da' cheyala' nezele chia', le Spiriton' chnen diža' li. Bi güe'en diža' to gualazen, san güe'en bite'tez diža' da' chzene Xan' len, na' chixjue'en le'e bica' da' za' za'ac. <sup>14</sup> Spiriton' gonen cont gwlo'elaon naca' bene' zaca' juisyw, le gwzejni'in le'e xtiža'. <sup>15</sup> Xan' ba bene' cont nežda' yogo' da' neze le', na' da'nan' gwnia' Spiriton' chixjue'en le'e xtižan'.

*Jesúsen' gwne' šložze yesacyaše'de' na' techle yesyebede'*

<sup>16</sup> 'Šlož bi le'ele neda', na' te yešlož na' yezle'ele neda' da' yoble, le yeya'a gan' zoa Xan'.

<sup>17</sup> Na' ba le bene' ca' zjanaque' Jesúsen' txen gose' lježe':

—¿Bi zejen dan' che'e chio' te yešlož na' bich le'echone' na' techle lecze yešlož na' yezle'echone' da' yoble? Na' ¿bi zejen dan' že' yeyeje' gan' zoa Xen'? <sup>18</sup> ¿Bi zejen dan' že' yešlož? Bi chejni'icho bin' že'.

<sup>19</sup> Jesúsen' goche'ede' chesaclaže' yesenabde'ne' bi zejen, na' gože' legaque':

—¿Ba chnabe lježe bi zejen dan' gwnia': "Yešlož na' bich le'ele neda' na' techle lecze yešlož na' yezle'ele neda' da' yoble"? <sup>20</sup> Da' li chnia' le'e ba zoa cuežle na' yegüine'le šlac bene' ca' bi chesejnilaže' Diosen' yesyebede'. Yeyaše'laže'le, perw šložzen' na' techle yebele. <sup>21</sup> Cate' chzan no'olen' chžaglagüe' šlac chaque' bes che yela' sanña'. Na' cate' ba golje bda'ona' bich chone' xbab che dan' bžaglagüen', le chbede' ba golje yeto benach yežlio nga. <sup>22</sup> Lecze ca' le'e ba chacyaše'le na'a, perw cate' yežagcho da' yoble soachle mbalaz na' nono gac yeca'a yela' chebe chelen' lo' yichjlažda'olen'.

<sup>23</sup> 'Na' cate' ba bžin ža šjajzoo' da' yoble gan' zoa Xan', cana'ch bich yažjele bi nable gwzejni'ida' le'e. Da' li chnia' le'e, da' chejnilaže'le neda'

bite'tez da' nabele Xan', gonczen' le'e. <sup>24</sup> Ža na'aža bibi na' nabele Xan' ye'line' chnablen da' chejnilaže' le neda'. Na' na'a le nabe Xan' bi da' nabelene' ye'line' ca', na' gone' can' nabelenen' cont soale mbalaz juisyw.

*Criston' ba bene' cont yenit yela' chnabia' che gwxiyen'*

<sup>25</sup> 'Da' zan ba gwnia' le'e len jempl. Gwžin ža cate' bich gwzejni'ida' le'e len jempl, san gua'a diža' da' šejni'ile cate' gwzejni'ida' le'e che Xan'. <sup>26</sup> Na' cate' ba bžin žana', cana'ch nabele Xan' bi da' nabelene' ye'line' chnablen da' chejnilaže' le neda'. Na' bi yažjen nabda' Xan' gaclene' le'e. <sup>27</sup> Le cuincze Xan' chacde' le'e dan' chaquele neda' na' chejle'le gwsele' neda'. <sup>28</sup> Gan' zoa Xa' Diosen' gwza'a na' ba bida' yežlio nga. Na' na'a yeza' yežlio nga na' yeya'a gan' zoa Xan'.

<sup>29</sup> Nach gose'ene':

—Bač cho'o diža' da' chejni'ito' na' bi cho'o jemplw. <sup>30</sup> Ba chacbe'eto' nombi'o yogo' xbab che beṇachen'. Ba nezedo' bi chesaclaže' beṇe' yesenezde' cate' biṇa' yesenaben'. Da'nan' bač chejle'to' zao' gan' zoa Diosen'.

<sup>31</sup> Na' gož Jesúsen' legaque':

—Žba chejle'le na'a? <sup>32</sup> Ba bžin ža na' na'a ba gole' gaslasle. To tole ca'a xnez che chele na' gwcua'anle toza'. Perw bi zoa' toza', le zoa Xan' len neda'. <sup>33</sup> Ba gwnia' le'e ca' cont soa cuezle binlo len xbab chele, le chejnilaže'lenda'. Yežlio nga saca'zi'le, perw bi gacžejaže'le, neda' ba bena' cont yenit yela' chnabia' che gwxiyen' dan' zoa na'a chnabian' yežlio nga.

## 17

*Jesúsen' gwnabde' Diosen' gaclene' beṇe' ca' zjanaque' le' txen*

<sup>1</sup> Beyož gwna Jesúsen' da' ca' nach gwne'e yabale na' gwne':

—Xa', ba bžin hor gac chia' dan' ba bžio' bia' gac. Ben cont nacia' nedan' Xi'ino' naca' beṇe' zaca' juisyw cont neda' gona' ga gacia' le' naco' beṇe' zaca' juisyw. <sup>2</sup> Ba beṇo' neda' yela' chnabia' lao yogo' beṇač cont chnežjua' yela' mban toli tocaṇe che yogo' beṇe' ca' ba gwlejo' chesejnilaže' neda'. <sup>3</sup> Na' beṇe' ca' zjanape' yela' mban toli tocaṇe zjanombi'e le', le tozon' zaco' gonxento', na' lecze zjanombi'e neda' Jesucristw beṇe' gwselo'.

<sup>4</sup> 'Lo yežlion' ba bena' cont nacia' naco' beṇe' zaca' juisyw, le ba beyož bena' yogo'lo' da' gwlo'o lo na' gona'. <sup>5</sup> Na' na'a Xa', ben cont la'laon naca' beṇe' zaca' juisyw cate' yela'a gan' zon', doxen can' blo'elaon cate' gwzoa' len le' cate' za' xete yežlion'.

<sup>6</sup> 'Ba gwlejo' baḷ beṇač chesejnilaže' neda', na' bač blo'eda' legaque' can' naco' na' can' chonon'. Zjanaque' xi'ino' na' beṇo' cont chesejnilaže' neda' na' chesone' can' žon'. <sup>7</sup> Na' ba zjanezde' yogo'lo' da' chona' na' yogo' diža' da' choa' zjanaquen chio' le'. <sup>8</sup> Le ba be'lena' legaque' diža' dan' ba bzejni'ido' neda' na' ba bosozenague' chen, na' ba chesacbe'ede' da' li gwza'a gan' zon', na' chesejle'e le len' gwselo' neda'.

<sup>9</sup> 'Chnaba' gacleno' legaque'. Bi chnaba' gacleno' yogo' beṇač, san gacleno' beṇe' ca' gwlejo' chesejnilaže'nda' le ba zjanaque' lo nao'. <sup>10</sup> Na' yogo' beṇe' chesejnilaže' neda' lecze chesejnilaže' le'. Na' ca'cze naquen, note'tez beṇe' zjanaque' xi'ino' lecz zjanaque' xi'ina', na' beṇe' ca' chesejnilaže'nda' chosolo'e naca' beṇe' zaca' juisyw.

<sup>11</sup> 'Na' na'a bich soa' yežlio nga, perw beṇe' quinga chesejnilaže' neda' nita'cze' yežlio nga, na' neda' ba zeza' gan' zo'na'. Xa', naco' la'zelagüe

bene' laždao' xilaže', na' chnaba' gwchino' yela' chnabia' chio' cont gwcuas gwcuizo' da' malen' len legaque' cont nita'cze' yesaque' toze len lježgaque', ca chio' naccho toze. <sup>12</sup> Šlac ba gwzoa len legaque', neda' ba bchina' yela' chnabia' chion' cont bcuas bcuiža' da' malen' len legaque'. Da'nan' ne toe' bi gwžiai', con toz ben' ba naquen cuiaye'e cont gac doxen can' ža Xtizo' dan' nyojen.

<sup>13</sup> 'Na' na'a ba zeza' gan' zon', na' šlac ne' zoa' yežlio nga cho'a diža' quinga cont bene' qui nita'chgüe' mbalaz ca mbalazen' zoa' neda'. <sup>14</sup> Neda' ba be'lena' legaque' xtižon', na' bene' ca' bi chesejnilaže' le' cheseque'ede' legaque' dan' bi chesone' txen len legaque', ca' neda' bi naca' txen len bene' ca' bi chesejnilaže' le'. <sup>15</sup> Na' ca' nac bene' ca' chesejnilaže' neda', bi chnaba' yeca'o' legaque' lo' yežlio nga, san chnaba' gacleno'ne' cont Satanás dan' chnabia' da' xigüe' ca' bi siye'en legaque'. <sup>16</sup> Legaque' bi zjanaque' txen len bene' bi chesejnilaže' le', ca' neda' bi naca' txen len bene' bi chesejnilaže' le'. <sup>17</sup> Ben cont bene' ca' chesejnilaže' neda' yesaclaže' yesone' con da' žo', le' ba zjanombi'e diža' li chio'. Yogo' da' ba bzejni'ido' legaque' naquen da' li. <sup>18</sup> Len' gwselo' neda' yežlion' cont ba bia' xtižon', na' lecze ca' chsela' legaque' yeso'e xtižan'. <sup>19</sup> Chzanlaže' cuina' chona' con da' žo' le' cont yesaclaže' yesone' con can' žo' da' zjanombi'e diža' li chion'.

<sup>20</sup> 'Na' bi chnaba' gacleno' legacze', san lecze gacleno' bene' ca' yesejnilaže' neda' cate' yesende' diža' dan' yesoe' bene' quinga. <sup>21</sup> Xa', ben cont yogo'lole' yesaque' toze len lježgaque' na' yesaque' txen len chio', ca' le' naco' toze len neda' na' neda' naca' toze len le'. Ben cont yeyož yesaque' toze len chio' na' len lježgaque' cont bene' ca' bi chesejnilaže' le' yesacbe'ede' len' gwselo' neda'. <sup>22</sup> Na' yela' bala'an dan' nono' neda' ba bnežjuan' legaque' cont zjanaque' toze len bene' lježe' ca' chio' naccho toze. <sup>23</sup> Legaque' zjanaque' txen len neda' na' neda' naca' txen len le' cont yogo'cho gaccho toze. Gaccho toze cont bene' ca' bi chesejnilaže' le' yesacbe'ede' len' gwselo' neda' na' yesacbe'ede' chacdo' bene' ca' can' chacdo' neda'.

<sup>24</sup> Xa', chacdo' neda' cate' biña' xe yežlio nga na' nono' neda' bene' zaca' juisyw. Na' chaclaža' bene' quinga gwlejo' chesejnilaže' neda' yedyesenite' len neda' gan' yedyesoan' cont yesele'ede' naca' bene' zaca' juisyw. <sup>25</sup> Xa', naco' la'zelagüe' bene' chon da' zej to licha. Na' ca' nac bene' ca' bi chesejnilaže'nda', lecze bi zjanombi'e le', perw neda' nombi'a le', na' bene' ca' ba gwlejo' cont chesejnilaže' neda' zjanezde' len' gwselo' neda'. <sup>26</sup> Na' ba bzejni'ida' legaque' can' nacon' na' can' chonon', na' za' gwzejni'ichda' legaque', cont yesacbe'ede' chacdo' legaque' can' chacdo' neda', na' cont neda' soacza' len legaque'.

## 18

*Judasen' bdie' Jesúsen' lo' na' soldadw' ca'*

*(Mt. 26:47-56; Mr. 14:43-50; Lc. 22:47-53)*

<sup>1</sup> Beyož gwna' Jesúsen' da' ca', gwza'lene' bene' ca' zjanaque' le' txen ja'aque' šla'a Yegw Cedrón gan' gota' to le'ej ga goseze zan yag olivos. Na' goso'e lo' le'ejen'. <sup>2</sup> Na' Judasen' ben' ba naquen gone' Jesúsen' lo' na' bene' ca' cheseque'ede' le' lecze nombi'e latjen', le' zan ni'a Jesúsen' len bene' ca' zjanaque' le' txen ba besedobe' na'. <sup>3</sup> Ca' goquen' bžin Judasen' na' nche'e xonj soldadw' na' yexonj bene' chesape' yodao' blaon' bene' gosese'la' bžoz gwnabia' ca' na' bene' fariseo ca' cont yesezene' Jesúsen'. Zjanxobe' no

lintern na' zjanoxe' no yi' yech na' zjanaŀe' spada. <sup>4</sup> Jesúsen' ba neẓde' yogo'loŀ da' za' gac che', na' bchoje' jašague' legaque' na' gwne':

—¿Non' cheyiljwle?

<sup>5</sup> Na' gose'ene':

—Cheyiljwto' Jesús beṇe' Nazaret.

Na' gož Jesúsen' legaque':

—Nedan'.

Na' Judasen' ben' ba naquen gone' Jesúsen' lo na'gaquen' zelene' legaque'. <sup>6</sup> Cate' Jesúsen' gože' legaque': “Nedan”, la' besyebiga'te' cosxanŀe' na' jasechaze' lo yon'. <sup>7</sup> Na' da' yoble Jesúsen' gože' legaque':

—¿Non' cheyiljwle?

Na' legaque' gose'ene':

—Cheyiljwto' Jesús beṇe' Nazaret.

<sup>8</sup> Na' Jesúsen' gwne':

—Ba gwnia' nedan'. Na' še nedan' cheyiljwle, le güe' latje šjaya'ac beṇe' quinga.

<sup>9</sup> Gwne' ca' cont goc can' ba gwdixjue'ede' caten' gwne': “Ne to beṇe' ca' ba gwlej Diosen' chesejnilaže' neda' bi yesebiaye'e.” <sup>10</sup> Na' Simón Pedron' no'e to spada na' goljen' gwdinen' mos che b̄xoz blaon' gwchogtechgüe' nague' licha. Na' mosen' le' Malco. <sup>11</sup> Na' Jesúsen' gože' Pedron':

—Bego'o spada chion' lo' ližen'. ¿Chacdo' bi cheyaŀa' gac da' ba nžia' bia' Xa' Diosen' gac chia'?

*Goseche'e Jesúsen' lao ben' le' Anás*

(Mt. 26:57-58; Mr. 14:53-54; Lc. 22:54)

<sup>12</sup> Nach soldadw ca' len xangaque' na' len beṇe' chesape' yodao' blao che nación Israel cheton' gosezene' Jesúsen' na' bosochje'ne'. <sup>13</sup> Na' goseche'ene' da' nechw lao Anás ben' naque' xta'obi'in' che Caifás. Na' Caifásen' goque' b̄xoz blao che nación Israel cheton' lo' izen'. <sup>14</sup> Na' Caifásna' ben' gože' beṇe' gwnabia' cheton' napen legaque' cuent toz ben' gat clél ca cuiayi' yogüe'.

*Pedron' bi gwchebe' naque' Jesúsen' txen*

(Mt. 26:69-70; Mr. 14:66-68; Lc. 22:55-57)

<sup>15</sup> Simón Pedron' len yeto beṇe' naque' Jesúsen' txen gosa'ogüe'ne'. Na' nombia' ben' nac b̄xoz blao ben' yeto. Da'nan' goc gwyo'e len Jesúsen' chyo'o che b̄xoz blaon'. <sup>16</sup> Na' Pedron' bega'ane' do cho'a puerten'. Nach ben' yeto, da' nombia' b̄xoz blaon' le', gwyeje' na' be'lene' diža' bi' no'olen' chap cho'a puerten' cont gwlo'obe' Pedron'. <sup>17</sup> Nach bi' no'olen' chape cho'a puerten' gožbe' Pedron':

—¿Gague leno' le' chzenago' dan' chsed chlo'e benga?

Na' Pedron' gwne':

—Bi lena' neda'.

<sup>18</sup> Beṇe' güen žin ca' na' beṇe' ca' chesape' yodao' blaon' ba gosebeque' to yi' ya'alj, le chac zag, na' zjazeche' cho'a yin' cont chesyže'ede'. Na' Pedron' ze' len legaque' cho'a yin' cheže'ede'.

*Gosenabde' Jesúsen' che dan' chsed chlo'eden'*

(Mt. 26:59-66; Mr. 14:55-64; Lc. 22:66-71)

<sup>19</sup> Na' ben' nac b̄xoz blaon' gwnabde' Jesúsen' che beṇe' ca' chosozenag che dan' chsed chlo'eden' na' che da' ca' chzejni'iden'. <sup>20</sup> Na' Jesúsen' gože'ne':

—Ba bi'a diža' doxen latje lagüe. Zan ni'a bsd blo'eda' lo' yodao' c̄hecho ca' na' chyo'o yodao' blaon' gan' chesežag yogo' beṇe' gualaž c̄hechon'. Bibi diža' gwnia' bagaše'ze. <sup>21</sup> ¿Bixchen' chṇabdo' neda'? Gwnabe beṇe' ca' gosende' dan' bsd blo'edan'. Legaque' zjaṇezde' bi dižan' bia'.

<sup>22</sup> Beyož gwna Jesúsen' ca', to ben' chape yodao' blaon' zie' na', na' gwdape' x̄aguen', gože'ne':

—¿Ca' choži'o xtiža' ben' nac b̄xoz blaon'?

<sup>23</sup> Jesúsen' gwne':

—Še bi da' mal ba gwnia', be' diža' c̄he bi da' malen' ba gwnia', na' še gwnia' güen, ¿bixchen' chgapo' neda'?

<sup>24</sup> Nach Anásen' bdie' Jesúsen' ncheje' lao Caifásen' ben' nac b̄xoz blaon'.

*Da'yoble Pedron' bi gw̄chebe' še naque' txen len Jesúsen'*

(Mt. 26:71-75; Mr. 14:69-72; Lc. 22:58-62)

<sup>25</sup> Na' Pedron' zie' cho'a yin' cont cheže'ede' na' beṇe' ca' nita'na' gose'ene':

—¿Gague lenczo' len' chzenago' dan' chsed chlo'e benga?

Na' bi gw̄chebe', gwne':

—Bi lena' neda'.

<sup>26</sup> To xmos b̄xoz blaon' naque' biše' ljež ben' gw̄chog Pedron' nagen', na' le' gože' Pedron':

—¿Gague ble'eda' le' len Jesúsen' lo' le'ej gan' ze yag olivos?

<sup>27</sup> Na' Pedron' da' yoble bi gw̄chebe', na' la' gw̄chežte to jea.

*Goseče'e Jesúsen' lao Pilaton'*

(Mr. 27:1-2, 11-14; Mr. 15:1-5; Lc. 23:1-5)

<sup>28</sup> Na' do cheni'las beṇe' gwnabia' ca' gosebeje' Jesúsen' gan' zoa Caifásen' na' goseče'ene' gan' zoa gobernador Pilato ben' chon yela' justis. Na' legaque' bi goso'e len Jesúsen' yo'o gan' zoa Pilaton', le can' nac costumbr c̄heton' bi chac yesagüe' xše' lni pascon' še yeso'e gan' že' beṇe' bi zjanac beṇe' Israel. <sup>29</sup> Da'nán' Pilaton' bchoje' na' gože' legaque':

—¿Bi ben benga? ¿Bi xya chagwle c̄he'?

<sup>30</sup> Na' beṇe' gwnabia' ca' gosene':

—Šaca' benga bi naque' beṇe' güen da' xinj bi bdeto'ne' lo' naon'.

<sup>31</sup> Na' gož Pilaton' legaque':

—Le yeče'e, na' le gon yela' justis c̄he' can' ža ley c̄helen'.

Nach beṇe' gwnabia' c̄he nación Israel c̄heton' gose'ene':

—Bi de lsens gotto' beṇe'.

<sup>32</sup> Da' gosone' ca' goc can' gwna Jesúsen' caten' bzejni'ide' nac yesone' yesote'ne'. <sup>33</sup> Nach Pilaton' beyo'e yo'ona' na' goxe' Jesúsen' na' gože'ne':

—¿Naco' le' Rey c̄he beṇe' Israel ca'?

<sup>34</sup> Jesúsen' gože'ne':

—¿Con da' goljlažon' chṇabo', še beṇe' yoble gose'e le' ca'?

<sup>35</sup> Pilaton' gože'ne':

—¿Chacdo' naca' neda' beṇe' Israel? Beṇe' Israel gualaž chio' na' b̄xoz gwnabia' c̄hele ca' bosodie' le' lo' na' nga. ¿Bi da' xinj benon'?

<sup>36</sup> Jesúsen' gože'ne':

—Yela' chnabia' chia' nža'le naquen len yela' chnabia' c̄he beṇe' chesenabi'e yežlio nga. Šaca' yela' chnabia' chia' naquen c̄he yežlio nga na' šaca' ṇabi'a nación ca' že' yežlio nga, beṇe' ca' chosozenag chian' gosedi'le' cont

bi goca' lo na' bene' gwnabia' che nación Israel cheton' šaca'. Perw yela' chnabia' chian' bi naquen che yežlio nga.

<sup>37</sup> Nach Pilaton' gože'ne':

—¿Na' len' naco' rey še ca'?

Na' gwna Jesúsen':

—Da' li can' žon', naca' rey na' ba bida' yežlio nga cont gwzejni'ida' benachen' diža' li na' yogo' bene' chesone' txen len diža' li chosozenague' chia'.

<sup>38</sup> Nach gož Pilaton' le':

—¿Bi dan' diža' li?

*Gosechoglagüen' yesote' Jesúsen'*

(Mt. 27:15-31; Mr. 15:6-20; Lc. 23:13-25)

Beyož gwna Pilaton' ca' na' bezchoje' yeto ši'i gan' že' bene' gwnabia' che nación Israel cheton' na' gože' legaque':

—Bibi nla'lagüe še bi da' xinj non benga. <sup>39</sup> Perw na' de costumbr chele gwsana' to bene' de ližya lo lni pascon'. ¿Chaclaže'le gwsana' benga naque' Rey che le'e bene' Israel?

<sup>40</sup> Nach bososye'e gosene':

—Bi gwsano' bena'. Barrabás na' gwsano'.

Na' Barrabásen' naque' to bene' gwban.

## 19

<sup>1</sup> Nach Pilaton' bene' mandadw goseyine' Jesúsen'. <sup>2</sup> Na' soldadw ca' gosone' to corona de xis yeše' na' bosozoen' yichj Jesúsen' na' bosoguacue'ne' to lache' moradw ca da' chosochin no rey. <sup>3</sup> Nach gosonle' che', gosene':

—¡Viva Rey che bene' Israel!

Na' gosegapa'chgüe' xague'.

<sup>4</sup> Nach Pilaton' bchoje' da' yoble na' gože' bene' gualaž cheto' ca' že' na':

—Cueja'ne' da' yoble cont nezele bibi da' xinj chželda' še bi da' none'.

<sup>5</sup> Na' bechoj Jesúsen' chyo'ona', na' zoa corona de xis yešen' yichje' na' ne' nyaze' lache' moradon'. Na' Pilaton' gože' legaque':

—Le na', nga ze ben'.

<sup>6</sup> Na' bžoz gwnabia' ca' na' bene' chesape' yodao' blaon' cate' besele'ede' Jesúsen' na' bososye'e zan ni'a gosene':

—¡Bde'e le'e yag cruz! ¡Bde'e le'e yag cruz!

Nach Pilaton' gože' legaque':

—Le'e le che'e na' le gwde'e le'e yag cruzen', le neda' bibi da' xinj cheželda' še bin' none'.

<sup>7</sup> Na' bene' gwnabia' ca' che nación Israel cheton' gose'e le':

—De to ley cheto' da' žan cheyala' gate' da' že' naque' Xi'ın Dios, le con to benačzen' naque'.

<sup>8</sup> Ba chžeb Pilaton' can' ba chaquen', na' cate' bende' xtiža'gaquen' bžebche'. <sup>9</sup> Na' beyo'e yo'o gan' zoe' da' yoble, nche'e Jesúsen', na' gože' Jesúsen':

—¿Ga bene' le'?

Na' Jesúsen' bi boži'e xtižen'.

<sup>10</sup> Nach Pilaton' gože'ne':

—¿Bi choži'o xtižan'? ¿Bi nezdod' napa' yela' chnabia' cont gwsana' le' na' napa' yela' chnabia' cont chogbi'an yosode'e le' le'e yag cruz?

<sup>11</sup> Jesúsen' gože'ne':

—Bibi yela' gwnabia' napo' šaca' Diosen' bi nonen' le'. Da'nan' bene' bdie' neda' lo naon' napche' dola' ca le'.

<sup>12</sup> Nach Pilaton' beyiljwlaže' nacle gone' gwsane' Jesúsen'. Perw bene' gwnabia' che nación cheton' bososye'e gosene':

—Še gwsano' benga, contr rey che nación Roman' chono' še ca', le note'tez bene' že' naque' rey chone' contr rey César.

<sup>13</sup> Nach Pilaton', beyož bende' xtiža'gaquen', gwleje' Jesúsen' chyo'ona' na' lecze bchoj le' na' gwchi'e gan' chone' yela' justisen', to latje da' nzi' Gan' Nagw Yej, na' diža' hebreo nzin' Gabata. <sup>14</sup> Do guagwbiž ža cate' za' solao lni pascon' Pilaton' gože' bene' gwnabia' cheto' ca':

—Le na', nga zoa rey chelen'.

<sup>15</sup> Nach da' yoble gosezolagüe' bososye'e gosene':

—¡Cheyala' gate'! ¡Bde'e le'e yag cruz!

Nach Pilaton' gože' legaque':

—¿Rey chele nga gona' mandaw yosode'e le'e yag cruz?

Nach bħoz gwnabia' ca' gose'ene':

—Gague rey cheto' benga. Toze César naque' rey cheto'.

<sup>16</sup> Nach Pilaton' bdie' Jesúsen' lo na'gaque' cont te'e le'e yag cruzen'. Nach gosa'aque' Jerusalénna' goseche'e Jesúsen' cho'a ciudan'.

*Bosode'e Jesúsen' le'e yag cruz*

(Mt. 27:32-44; Mr. 15:21-32; Lc. 23:26-43)

<sup>17</sup> Na' Jesúsen' zeje' no'e yag cruz chen' na' besežine' to latje nzi' Latje che Žit Yichj Bene' Guat, na' diža' hebreo nzin' Gólgota. <sup>18</sup> Na' soldaw che gobernadores' bosode'ene' le'e yag cruzen', na' lecze bosode'e yechope bene' le'e yechope yag cruz cuiten' na' Jesúsen' gwyo'e gachol bene' ca' chope'. <sup>19</sup> Na' gobernador Pilaton' bene' mandaw byoj diža' da' gwda' yichj yag cruz che Jesúsen'. Na' bosozojen' žan: “Jesús bene' Nazaret, Rey che bene' Israel”. <sup>20</sup> Bosozojen' diža' hebreo, diža' griego na' diža' latín. Na' na' bene' Israel gualaž cheto' bosolaben', le gan' gwda' Jesúsen' le'e yag cruzen' naquen gała'ze ciuda Jerusalénna'. <sup>21</sup> Nach bħoz gwnabia' ca' na' yezica'chle bene' gwnabia' che nación Israel cheton' gose'e Pilaton':

—Bi gwzojo' “Rey che bene' Israel”, san bzoj: “Le' gwne' naque' rey che bene' Israel.”

<sup>22</sup> Na' Pilaton' gwne':

—Da' bena' mandaw bosozoje', ba nyojennna'.

<sup>23</sup> Nach soldaw ca', beyož bosode'e Jesúsen' le'e yag cruzen', goseque'e xalana' Jesúsen' na' besyele'en gosebejen' tap cuenle na' tgüejen gosezi' to toe'. Na' lecze goseque'e yeto xe' da' naquen to güelize, na' bibi dia chen de. <sup>24</sup> Na' gose' lježe':

—Bi gwzoxjchon san gonchon rifa cont nezecho no yechelen.

Na' dan' gosone' ca' goc can' nyoj Xtiža' Diosen', žan: “Besyele'e xalanan' legacze', na' gosone' rifa lache' dan' chazan'.”

<sup>25</sup> Na' do gała'ze yag cruz che Jesúsen' zecha Marían' ben' nac xna' Jesúsen' na' bene' bile xne'ena', na' María bene' naque' no'ol che Cleofas na' María bene' naque' bene' Magdala. <sup>26</sup> Na' cate' Jesúsen' ble'ede' zecha xne'en gała'ze len to bene' naque' le' txen, bene' chaquechgüe Jesúsen' le', nach gože'ne':

—Bena' gaque' ca xi'ino'.

27 Nach gože' bena':

—Bži'ilaže' x̄na' nga ca x̄nao'.

Na' žana' gwque'ene' bene'ne' ca bene' lo' yo'o.

*Can' goc caten' got Jesúsēn'*

(Mt. 27:45-66; Mr. 15:33-41; Lc. 23:44-49)

28 Gwde na' Jesúsēn' ba nezdē' baḥ goc yogo' da' cheyaḷa' gac. Nach cont goc can' ža yelate' Xtiža' Diosēn' da' nyojen gwne':

—Chbīlda' nis.

29 Na' de late' vino zichj da' yože' to lo' xguag dao'. Na' to bene' bzaže'de' vino zichjen' to esponja bzoen' to lo' xis da' že' hisopo na' gwḷisen' blapēn' cho'a Jesúsēn'. 30 Na' beyož gw̄xop Jesúsēn' vinon' na' gwne':

—Baḥ goc yogo'loḷ da' cheyaḷa' gac.

Nach bcheque' yichjen' gote'.

*To soldadw godoe' lanza cuit le'e Jesúsēn'*

31 Na' yeteyo gaquen ža che Dios na' ža l̄ni xen, da'nan' bene' gwnabia' che nación cheton' jasenabde' Pilaton' gone' mandadw yeseyišjw soldadw che' ca' n̄i'a bene' ca' zjada' le'e yag cruzēn' cont yob yesate' na' yesyeque'e ḷegaque' le'e yag cruz ca', le bi gosaclaže' yeseda'ch bene' ca' le'e yag cruzēn' ža che Dios. 32 Nach soldadw ca' ja'aque' jasedišjue' chope la'a n̄i'a ben' gwda' šla'a cuit Jesúsēn'. Na' ḷecze ca' gosone' len ben' gwda' le'e yag cruzēn' cuiten' yešla'a. 33 Na' cate' besežine' gan' da' Jesúsēn', besele'ede' ba gote' na' bich goseyišjue' n̄i'e ca'.

34 Perw to soldadon' godoe' lanza cuit le'e Jesúsēn', na' la' bchojten chen len nis. 35 Neda' ble'eda' can' goquen' na' nezdā' cho'a diža' li. Na' cho'a diža' li can' goquen' cont lencze le'e šejle'le. 36 Na' goc da' ca' len Jesúsēn' cont goc can' ža Xtiža' Diosēn' da' nyoj che', žan: “Ne to žit yo'e bi yeseyišjue'.” 37 Na' yeto da' žan: “Yesēne'e ben' ba bosožie' güe'.”

*Bosocuaše' Jesúsēn'*

(Mt. 27:57-61; Mr. 15:42-47; Lc. 23:50-56)

38 Beyož goc yogo' da' ca', José bene' nac bene' ciuda Arimatea janabde' Pilaton' gwnežjue' ḷsens yeque'e cuerp che Jesúsēn'. Na' Pilaton' be'e ḷsens. Nach Josēn' gwyeje' na' beque'e cuerp che Jesúsēn'. Josēn' ba chejnilaže' Jesúsēn' perw chejnilaže'ne' bagaše'ze da' chžebe' bene' gwnabia' cheto' ca'. 39 Na' len Josēn' ḷecze gwyej Nicodemo ben' ba gwyej gan' zoa Jesúsēn' šeže'le. Na' Nicodemon' no'e to da' chlā' zix da' none' len yal dan' že' mirra, na' len to bište dan' že' aloes, ca do šona roben'. 40 Nach bosyochele' cuerp che Jesúsēn' to lache' xen na' len dan' chlā' zixēn', ca' chon neto' bene' Israel cate' chcuāše'to' bene' guat. 41 Na' gaḷa'ze latje gan' bosode'e Jesúsēn' le'e yag cruzēn' gota' to le'ej ga goseze yag. Na' na' za' goseche'ene' to bloj cont yosočhinen' ca to ba, na' nono bene' guat na' šo' lo'enna'. 42 Ža caten' got Jesúsēn' naquen ža caten' chososiṇi'e che ža che Diosēn'. Na' da' chesacbyende' yosocuaše'ne', da'nan' jaseḷo'e Jesúsēn' lo' bloj coba', le naquen gaḷa'ze.

## 20

*Jesúsēn' bebane' ladjo bene' guaten'*

(Mt. 28:1-10; Mr. 16:1-8; Lc. 24:1-12)



<sup>1</sup> Na' bal dmigw María bene' Magdalan' gweje' cho'a blojen' gan' bosocuaše' Jesúsen' na' ble'ede' ba bga'a yejen' dan' bosode'e cho'a blojen'. <sup>2</sup> Nach beza'sese' beyeje' gan' zoa Simón Pedron' len yeto bene' naque' Jesúsen' txen, na' gože' legaque':

—Ba besyebeje' Xanchon' lo' blojen' na' bi nezeto' ga besyeyo'ene'.

<sup>3</sup> Nach Pedron' na' ben' yeto gosa'aque' ja'aque' cho'a blojen'. <sup>4</sup> Choptie' goseza'sese' perw ben' yeto gwza'sesche' ca Simón Pedron' na' byobech bžine' cho'enña' ca le'. <sup>5</sup> Na' bcheque' gwne'e lo'enña' na' ble'ede' lache' ca' zjachin' lo' yo perw bi gwyo'e. <sup>6</sup> La' bla'te Simón Pedron' na' le' gwyo'e lo' blojen' na' lecze ble'ede' lache' ca' gan' zjachin'na'. <sup>7</sup> Na' bay dan' bosoguzje' yichjen' bi chin' gan' chi' lache' ca', san ndoben chin' šla'ale. <sup>8</sup> Nach lencze ben' yeto gwyo'e, le bina' šo'e la'czla' byobech bžine' cho'enña', na' ble'ede' can' naquen na' gweje'le'e. <sup>9</sup> Le bina' yesejni'ide' Xtiža' Diosen' da' nyojen žan cheyala' yebane' ladjo bene' guaten'. <sup>10</sup> Na' besyeya'aque' jaya'aque' yo'o gan' nite'na'.

*María bene' Magdalan' ble'ede' mbancze Jesúsen'*  
(Mr. 16:9-11)

<sup>11</sup> Na' Marían' bega'ane' na' gwzeche' gala'ze cho'a blojen' chbeže'. Na' ne' chbežte' ca' bcheque' gwne'e lo' blojen'. <sup>12</sup> Na' ble'ede' chope angl bene' zjanyaz lache' šiš zjachi'e lo' blojen', toe' chi' zej yichjle na' yetoe' chi' zej xni'ale gan' gota' cuerp che Jesúsen'. <sup>13</sup> Nach gose'e no'olen':

—¿Bixchen' chbežo' no'ole?

Na' boži'en gože' legaque':

—Ba besyeyo'e Xanan' na' bi nezda' gale jasesane'ne'.

<sup>14</sup> Beyož gwna' Marían' ca' gweychje' ble'ede' zecha Jesúsen' cožen', perw bi goche'ede' še naque' le'. <sup>15</sup> Na' gož Jesúsen' le':

—¿Bixchen' chbežo', no'ole? ¿Non' cheyiljo'?

Marían' bene' xbab še ben' chape' yaguen' nach boļ güiže' le', gože'ne':

—Bene', še len' beyo'one' ga yoble, gwna neda' gale jaysano'ne' cont yeyo'ane'.

<sup>16</sup> Jesúsen' gože'ne':

—iMaría!

Na' Marían' gweychje' da' yoble na' gože'ne':

—iRaboni! —naquen to diža' hebreo na' zejen Maestrw.

<sup>17</sup> Jesúsen' gože'ne':

—Bi goxo' neda', le bina' yeyepa' gan' zoa Xan'. Beyej len yezica'chle bene' ca' ba bosozenag xtižan' bene' ca' zjanaque' ca biše' zana', na' gožgaque' yeyepa' gan' zoa Xan' ben' lecz naque' Xale. Naque' Dios ben' chonxena' na' lecze naque' Dios ben' chonxenle.

<sup>18</sup> Nach beza' María bene' Magdalan' na' jaydixjue'ede' yezica'chle bene' ca' chosozenag xtiža' Jesúsen' le' ba ble'ede' Xanchon'.

*Bene' ca' zjanaque' Jesúsen' txen besele'ede' mbancze'*  
(Mt. 28:16-20; Mr. 16:14-18; Lc. 24:36-49)

<sup>19</sup> Na' cate' ba goc choļ že' dmigon', bene' ca' zjanaque' Jesúsen' txen zjandop zjanžague' lo' yo'o na' zjanseyjwte' puert ca' da' besežebe' bene' gwnabia' che nación Israel' cheton'. Nach Jesúsen' ble'e na' gwze' gachol' legaque'. Na' gože' legaque':

—Le soa binlo len xbab da' yo'o lo' yichjlažda'ole.

20 Beyož gwne' ca' na' blo'ede' legaque' taque' ca' na' cuit le'ena'. Na' besyebede' cate' besele'ede' le' naque' Xanchon'. 21 Na' gozne' da' yoble:

—Le soa binlo len xbab da' yo'o lo' yichjlažda'olen'. Can' gwsela' Xan' neda' yežlio nga bia' xtižen', lecze ca' neda' chsela' le'e güe'le xtižan'.

22 Beyož gwne' ca' blobe' legaque' na' gože' legaque':

—Le si' Spiritw che Diosen'. 23 Bene' ca' yesyetinge xtoła'gaquen', naple yela' chnabia' ye'ine' ba gwnitlaon, na' naple yela' chnabia' cont ye'le bene' bi yesyetinge xtoła'gaquen' bitw nitlaon.

*Tomás ble'ede' mban Jesúsen'*

24 Na' Tomás ben' bososi'e Tomás Cuaš lene' len bene' šižinw ca' ba gosedalene' Jesúsen', na' bi gwzoe' cate' Jesúsen' bedyelo'elagüe' legaque' že' dmigon'. 25 Na' bene' ca' yezica'chle gose'ene':

—Ba ble'eto' Xanchon'.

Na' Tomásen' gože' legaque':

—Bi šejli'a mbancze' še bi le'eda' yiž che claven' le'e taque' ca' na' gwzebe xbenan' gan' gwdebe clav ca' na' gwzebe na'an cuit le'en.

26 Gozde' to xman zjanite' lo' yo'on da' yoble na' zoa Tomásen' len legaque'. Na' da' yoble nyeyjw puert ca', cate' bezla' Jesúsen' na' gozzeché' gachol'legaque'. Na' gwne':

—Le soa binlo len xbab da' yo'o lo' yichjlažda'olen'.

27 Nach gože' Tomásen':

—Gwna' lo' taca' quinga na' bzeben xbenon'. Na' bzebe naon' cuit li'a nga cont šejli'o. Na' bich gaco' bene' bi chejle', san šejli'o.

28 Nach Tomásen' gože'ne':

—jXana' na' Dios chia'!

29 Na' Jesúsen' gože' Tomásen':

—Tomás, ba chejli'o da' ba ble'edo' neda'. Mbalaz bene' ca' ba chesejle'e la'czla' bina' yesele'ede' neda'.

*Da' quinga zjanyojen cont šejle'cho Jesúsen' naque' bene' gwsela' Dios*

30 Da' zan yela' guac ben' Jesúsen' da' besele'e bene' ca' zjanaque' le' txen da' bi nyojen nga. 31 Perw zjanyoj da' quinga cont šejle'le' Jesúsen' naque' Cristo ben' gwlej Diosen' cont nabi'e na' naque' Xi'in Dios, na' cont gata' yela' mban toli' tocaņe chele da' chejnilaže'lene'.

## 21

*Jesúsen' blo'elagüe' gaže bene' ca' zjanaque' le' txen*

1 Gwdechle yeto ža yoble Jesúsen' bozlo'elagüe' bene' ca' zjanaque' le' txen cho'a nisdao' da' nzi' Nisdao' Tiberias. Quinga goc: 2 Txen nite' Simón Pedron' len Tomásen' ben' bososi'e Tomás Cuaš, na' Natanael bene' yež Caná gan' mbane Galilean', na' chope xi'in Zebedeo na' yechope bene' ca' zjanaque' Jesúsen' txen. 3 Na' Simón Pedron' gože' legaque':

—Ša'a gwxen beļ da' yoble.

Na' gose'e le':

—Lecze sa' neto'.

Nach gosa'aque' ja'aque' cho'a nesdaon' na' goso'e to lo' barcw. Na' nocze no beļ beseželde' že'na'. 4 Na' do ba zoa šeni' besele'ede' zecha Jesúsen' cho'a nesdaon', perw bi gosacbe'ede' še Jesús nan'. 5 Nach Jesúsen' gože' legaque':

—Bene' migw chia' ģnono beļ chdole'le'?

Na' gose'ene':

—Nono chdole'to'.

<sup>6</sup> Nach gože' legaue':

—Le gwzala' yixjw bel̄ chelen' cuit barcon' lichale na' senlba'.

Nach bosozala' yixjw bel̄ chegaquen', na' tantw be zan besedola', bi gosezoede' yosyocuen' lo' barcon'. <sup>7</sup> Nach ben' chaquechgüe Jesús'en' le', gože' Pedron':

—Xancho nan'.

Na' cate' gože' Simón Pedron' Xancho nan', la' beyacwte Pedroa' xalanen', le gague bi nyaze' cha'len' chone' žinna', na' la' bxite'te' lo' nisen' cont byob bežine' gan' zoa Jesús'en'. <sup>8</sup> Na' yezica'chle bene' ca' zja'aclene' barcw daon' zjanxobe' yixjw gan' že' bel̄ ya'a ca'. Bi naquen' zito' cho'a nisdaon', ca do yeto gayoa metrze. <sup>9</sup> Na' cate' besyežine' cho'a nisdaon' besele'ede' chi' yi' ya'alj na' xoa bel̄ ya'a lagüenna' na' len yetextil. <sup>10</sup> Na' Jesús'en' gože' legaue':

—Le yeyoxe' ngale to chope bel̄ ya'a ca' za' gwxenle.

<sup>11</sup> Na' Simón Pedron' gwyeje' jaxi'e yixjw belen' gan' chi' barcon' na' bexoben' ga nac yo biž. Žen' to gayoa ši'ineyon bel̄ xen, perw bi bcheza' yixjon' la'czla' be zan gwže' lo'enna'. <sup>12</sup> Na' Jesús'en' gože' legaue':

—Le da gagwle xsil.

Na' ne toe' bi besyeyaxjde' ye'ene': “¿No le?” , le ba gosacbe'ede' naque' Xancho'n'. <sup>13</sup> Jesús'en' gwbigue' na' gwxi'e yetextilen' na' bnežjue' che to toe' na' lecz ca' bene' len bel̄ ya'an.

<sup>14</sup> Da'na' goc da' gwyon̄ ni'a blo'elao Jesús'en' bene' ca' zjanaque' le' txen gwde bebane' ladjo bene' guaten'.

*Jesús'en' be'lene' Simón Pedron' diža'*

<sup>15</sup> Na' cate' besyedagüe', Jesús'en' gože' Simón Pedron':

—Simón xi'in̄ Jonás, ¿chaquechdo' neda' clcl can' chesaque bene' quinga neda'?

Pedron' boži'en gože'ne':

—Xana', nezdo' chacda' le'.

Jesús'en' gože'ne':

—Bsed blo'e bene' ca' za' gwzolao chesejnilaže' neda', bene' ca' zjanac ca me' xila' chia'.

<sup>16</sup> Na' da' gwchop̄ ni'a gože' le':

—Simón xi'in̄ Jonás, ¿chacdo' neda'?

Na' da' yoble gwna Pedron':

—Xana', le' nezdo' chacda' le'.

Jesús'en' gože'ne':

—Bgüia gwña' bene' ca' chesejnilaže' neda', bene' ca' zjanac ca xila' chia'.

<sup>17</sup> Da' gwyon̄ ni'a gož Jesús'en' le':

—Simón xi'in̄ Jonás, ¿chacdo' neda'?

Na' Pedron' gocyas'e'de' dan' gož Jesús'en' le' ca' da' gwyon̄ ni'a, na' gože' le':

—Xana', le' neze nle'edo' yogo'lol. Nezdo' chacda' le'.

Jesús'en' gože' le':

—Bsed blo'e bene' ca' chesejnilaže' neda', bene' ca' zjanac ca xila' chia'.

<sup>18</sup> Da' li chnia' le', cate' goco' bene' güego', cuino' gwyaz xalanon' na'

gwyejo' con ga žan čhio'. Perw cate' gaco' beņe' gole, gwłi naon' na' beņe' yoble čhize' xałano' na' yečhe'e le' ga bi chaclažo'.

<sup>19</sup> Gože'ne' ca' cont gwņezde' can' gacxen Diozen' len da' gac čhe' cate' žin ža gate'. Na' gwde gwna Jesúsen' can' gac čhe Pedron' nach gože'ne':

—Con gwyejnilaže' neda' na' bzenag čhia'.

*Can' gwna Jesúsen' čhe ben' chacchgüede'*

<sup>20-22</sup> Na' yeto beņe' naque' Jesúsen' txen na'ogüe' legaue'. Na' beyečj Pedron' na' ble'ede' le' na' gože' Jesúsen':

—Xana', žnac gac čhe benga?

Jesúsen' gože'ne':

—Še chaclaža' ne' zoacze' cate' yida' yeto žbin' chacžejlažo'? Con gwzoateze gwyejnilaže' neda' na' bzenag čhia'.

Ben' gwne' ca' naque' ben' chaquehgüe Jesúsen' na' ben' gwche' cuit Jesúsen' txen cate' gosagüe' xše' žen' cate' za' gac Jesúsen' lo na' beņe' ca' chesegue'ede' le'. Na' cana' bena' gwņabde'ne': “Xana', žnoxen' gwdie' le' lo na' beņe' ca'?”

<sup>23</sup> Na' dan' gož Jesúsen' Pedron': “Še chaclaža' ne zoacze' cate' yida' yeto žbin' chacžejlažo'?”, da'nan' gwditj diža' len beņe' ca' chsejnilaže' Criston' gosene' bi gat bena'. Perw Jesúsen' gague gože'ne' bi gate', san gože'ne': “Še chaclaža' ne' zoacz benga cate' yida' yeto, žbin' chacžejlažo'?”

<sup>24</sup> Nedan' nezdá' can' goc yogo' da' quinga na' da'nan' ba bia' diža' čhegaquen na' ba bzojan'. Na' lecze le'e nezczele choa' diža' li.

<sup>25</sup> Na' da' zanch da' ben Jesúsen' da' bi zjanyojen, le ša zjanyoj yogon' tgüeje tgüejen, libr zan juisyw yesaquen še ca'.

Da' na'ze chzoja' ņa'a.

## DA' GOSON POSTLW CA'

### *Jesúsen' gwne' sele' Spiritw che Diosen'*

<sup>1</sup> Teófilo, ca nac dan' bzoja' da' nechw, bzoja' yogo' lo' da' ben Jesúsen', na' lecze bzoja' yogo' dan' bsd blo'ede' cate' gwzolaote' bsd blo'ede' <sup>2</sup> žinten cate' beyepe' yaba. Šlac bsd blo'ede' gwleje' postlw che' ca', na' Spiritw che Diosen' bzejni'in Criston', na' Criston' gože' legaque' nac yesone'. <sup>3</sup> Nach gwde gosot bene' mal ca' Jesúsen' na' gwde bebane' ladjo bene' guaten' nach jalo'elagüe' postlw che' ca'. Na' da' zan da' bene' cont gosenzede' mbanczen'. Na' gwdalene' legaque' choa ža na' bzejni'ide' legaque' can' chnabia' Diosen'.

<sup>4</sup> Na' šlac ne' zoa Jesúsen' len postlw che' ca' gože' legaque' cbi yesyežaše' ciuda Jerusalénna'. Gwne':

—Le yega'an le cueze gac can' gwna Xa' Diosen' gac, ca dan' bzejni'ida' le'e. <sup>5</sup> Da' zaque' ben Juan da' bzoe' bene' nis, perw yeto čhope ža da' zaca'ch gac chele dan' yedesoa Spiritw che Diosen' lo' yichjlažda' olen' nabi'an le'e.

### *Jesúsen' beyepe' yaban'*

<sup>6</sup> Na' ža na'teže šlac ne' zjandop zjanžague' len Jesúsen' gose'ene':

—Xanto' žba bžin ža gono' cont yechoj nación Israel chechon' lo' na' bene' zito' ca'?

<sup>7</sup> Jesúsen' gože' legaque':

—Bitw naquen nezele bi ža bi hor gon Xacho Diosen' da' ca' toze' ba bžie' bia' gone'. <sup>8</sup> Perw na' cate' yedesoa Spiritw che'na' len le'e, gaclenen le'e len yela' guac čhenpa' cont güe'le xtižan' ciuda Jerusalén ni, na' doxen ga mbane distritw Judean', na' distritw Samaritan', na' doxen yežlion'.

<sup>9</sup> Beyož gwna Jesúsen' ca', cheseña'te bene' ca' chesejnilaže' le', beyepe' yaba to lo' bejw na' bich besele'ede' le'. <sup>10</sup> Na' ne' cheseña'te bene' ca' le'e yaban' gan' besele'ede' beyepe', cate'cze gosacbe'ede' ba zjazeča čhope angl len legaque' bene' zjanyaz lache' šiš. <sup>11</sup> Na' bene' ca' čhope gose'e legaque':

—Bene' Galilea, žbixchen' čhna'le le'e yaban'? Can' ble'ele beyep Jesúsen' yaban' caten' bechoje' ladjwlen', can' le'eczele yide' da' yoble.

### *Gosebeje' Matías cont goque' postlw laz Judasen'*

<sup>12</sup> Na' nite' ya'a dan' nzi' Ya'a Olivos na' jaya'aque' Jerusalénna'. Jerusalénna' naquen gala'ze con ca'te' de lsens yesa'aque' ža che Dios can' ža ley che bene' Israel ca'. <sup>13</sup> Na' cate' besyežine' Jerusalénna' postlw ca' šnej na' bene' ca' zjanžague' gosegüe' gan' nite'na' lo' cuart zoa yichjen'. Postlw ca' šnej bene' quinga: Pedro, Jacobo, Juan, Andrés, Felipe, Tomás, Bartolomé, Mateo, Jacobo xi'in Alfeo, na' Simón ben' chon txen partid dan' nzi' cananista, na' Judas ben' nac bene' biše' Jacobon'. <sup>14</sup> Na' gosenita'teže postlw ca' šnej chosoł güiže' Diosen' txen len bene' ca' zjanaque' biše' Jesúsen' na' len María xna' Jesúsen' na' len yezica'chle no' ol ca' zjanžag.

<sup>15</sup> Na' ca' hora' Pedroa' zeche' ladjo to gayoa galje bene' chesejnilaže' Jesucriston' cont be'lene' legaque' dižan', na' gože' legaque':

16 —Beñe' migw, Spiritw che Diosen' benen cont rey David bzoje' na' be'e diža' che Judasen' ben' gwche' beñe' ca' gosezen Jesúsen' gan' jasešague' le'. Na' benen byen goc can' nyoj Xtiža' Diosen'. 17 Judasen' goque' txen len neto' na' bene' txen len neto' yogo'loł dan' gwyo'o lo na'to' bento'. 18 Na' gosezi'e late' yežlio len mechw dan' gwxi' Judasen' bene' da' malen' bdie' Jesúsen' lo na' beñe' ca'. Perw na' blažoe' cosyichj gan' goładite' na' gošj li'ena', doxen xjaloen' bchoj. 19 Yogo' bene' že' Jerusalénna' gosenezde' can' goc chen' na' da'nan' bososi'e yežlion' Acéldama na' xtiža'gaque'na' zejen Yežlio Chen. 20 Goc can' nyoj to salmo žan:

Liže'na' gaquen to yo'o daš, nono soa na'.

Na' lecze nyojen žan:

Na' te beñe' yoble yołane' žin dan' bene'.

21 'Na' nga nita' beñe' ba gosone' txen len chio' šlac gwɔdalen Xancho Jesúsen' chio'. 22 Ba gosone' txen gwzolaoten cate' da' Juan bzoje' le' nis bžinten caten' beyepe' yaban', na' cheyała' cuejcho toe' gone' txen len neto' postlw güe'to' diža' can' beban Xancho Jesúsen' ladjo beñe' guat ca'.

23 Na' gosebeje' chope beñe', toe' José ben' le Barsabás, na' lecz le' Justo, na' ben' yeto Matías. 24-25 Nach bosol güiže' Diosen' gose'ene':

—Xanto', le' nombi'o yichjlaždao' yogo'loł beñe'. Lao beñe' ca' chope blo'ešca neto' noe' ba gwlejo' cont gaque' postlw na' gone' xšinon' txen len neto'. Le ca nac Judasen', gwlejyichje' dan' ngo'o lo ne'e gone' na' ba zjayde' gan' naquen yeyeje' yela' güen da' mal che'na'.

26 Nach gosone' rifa cont gosenezde' non' ba gwlej Diosen' na' Matíasen' bchoje' na' gosone' le' cuent len postlw ca' yešnej.

## 2

### *Can' goc cate' bla' Spiritw che Diosen'*

1 Na' bžin ža lni dan' že' Pentecostés, na' postlw ca' na' yogo'loł beñe' ca' ba gosejnlaže' Jesúriston' zjandop zjanžague' toze latje. 2 Na' zejenez goc to sšag le'e yaban' ca sšag che to be' bdono' gual na' nenxeje lo' yo'o gan' zjachi'ena'. 3 Na' besele'ede' gała'ze yichj to toe' gosezoa tgüeje yi' bel da' čala'nin. 4 Ca' goc jašo'o Spiritw che Diosen' lo' yichjlaždao' to toe', na' Spiriton' benen cont gosezolagüe' goso'e gwde gwdele diža' da' gosejni'i beñe' zito' ca'.

5 Na' ca tiempen' beñe' zan beñe' Israel že' Jerusalénna' beñe' chesonx-ene' Diosen', za'aque' doxen yežlion'. 6 Na' cate' gosende' chac sšaguen' gan' že' postlw ca', zan beñe' Israel ca' besežague', na' leca besyebande', le to to postlw ca' bosozejni'ide' legaque' len diža' da' chesejni'i to toe'. 7 Bi gosejni'ide' bin' chac na' besyebande' gosene':

—¿Gague beñe' distritw Galilea beñe' quinga? 8 ¿Nacxečen' to tocho chenecho cheso'e diža' can' chesoe' beñe' gualaž checho diža'? 9 Bałcho naccho beñe' nación Partia, na' bałcho beñe' nación Media, na' bałcho beñe' nación Elam, na' bałcho beñe' distritw Mesopotamia. Na' yebałcho beñe' distritw Judea, na' yebałcho beñe' distritw Capadocia, yebałcho beñe' distritw Ponto, na' yebałcho beñe' distritw Asia, 10 yebałcho beñe' distritw Frigia na' beñe' distritw Panfilia, na' yebałcho za'cho nación Egipto, na' yebałcho za'cho yež ca' zjachi' Africa do te ciuda Cirene. Na' chio' naccho cuent len beñe' nación Roma, bałcho goljcho naccho beñe' Israel na' yebałcho ben cuincho txen len beñe' Israel. 11 Na' bałcho

naccho bene' yež ca' zjachi' Creta na' bene' distritw Arabia. Na' gate'tez bene' naccho, yogo'cho chenecho chesoe' bene' distritw Galilea quinga xtiža'chon' da' chaccho, cheso'e diža' che da' zan da' ba ben Diosen' da' zaca' yebanecho.

<sup>12</sup> Na' yogo' bene' ca' besedobe' chosozenague' besyebande' na' gosacžejlaže' bin' chac, na' zane' gosene':

—¿Bi zejen dan' chaquen'?

<sup>13</sup> Na' yebałe' goseneye'e gosene':

—¡Bene' quinga chesezožde'!

*Diža' dan' be' Pedroa' len bene' Israel ca' besežag*

<sup>14</sup> Na' Pedroa' gwzeche' lao ben' zjandop zjanžague' txen len postlw ca' yešnej na' be'e diža' zižje gwne':

—Le'e bene' Judea na' note'tezechle zoale ciuda Jerusalén ni, che'nda' gwzenagle chia' na' gonle xbab che da' za' ni'a le'e. <sup>15</sup> Bene' lježa' quinga bitw chesezožde' can' chaquele, le ne' nac tempran. <sup>16</sup> Ba chac can' bzoj da' Joel ben' be' xtiža' Diosen' cani' bzoje' dan' gwna Diosen', žan:

<sup>17</sup> Cate' ba zoa žin ža cont yeyož yežlion',

neda' Dios gona' cont Spiritw čhian' yedesoan len bene' že' doxen yežlion'.

Na' gona' cont xi'inle ca' yeso'e xtiža'na',

na' bene' byo xcuide' ca' yesele'edagüede' bi da' gona',

na' güe'lena' bene' byo gol ca' diža' lo bišgal čhegaquen'.

<sup>18</sup> Na' yogo' bene' ca' chesejnilaže' neda', bene' byo na' no'ole,

yedesoa Spiritw čhian' len legaque' cont yeso'e xtižan'.

<sup>19</sup> Gona' cont yesele'e beñachen' da' zaca' yesyebande' le'e yaban' na' lagüe yežlion',

na' gona' yela' guac chia'na' len chen, len yi' na' len žen da' nac ca bejw.

<sup>20</sup> Bich gwseñi' gwbižen', na' bio'na' yeyaquen xna ca chen

cate' za' žin ža yida' da' yoble gwnežjua' castigw che yogo' bene' cbi chesejnilaže'nda', neda' naca' Xanle.

Žana' gaquen to ža žialao xen.

<sup>21</sup> Nach note'tez bene' yesenabe' gaclena' legaque',

neda' naca' Xanle yebeja' legaque' lo da' malen'.

Can' gwna Diosen'.

<sup>22</sup> 'Na' le'e bene' Israel gualaž chia', le gwzenag chia'. Jesúsen' ben' nac bene' yež Nazaret, Diosen' blo'ede' naque' bene' zaque'. Diosen' bene' cont Jesúsen' bene' yela' guac na' bichle da' zaca' yebanecho can' nezczellen'.

<sup>23</sup> Lo yela' neze che Diosen' bin' za' gac, bi'e latje gwzenle Jesúsen' na' bdelene' lo na' bene' mal ca' gosote'ne' bosode'ene' le'e yag cruzen'.

<sup>24</sup> Perw na' Diosen' bechis bosbane'ne' ladjo bene' guat ca', le bi gwzoe yela' goten' nabian' le'. <sup>25</sup> Quinga bzoj da' rey David xtiža' Jesúsen' cani'te, žan:

Nezda' Xana' Diosen' zoe' len neda' do ža do yel,

na' zoe' chaclene' neda' cont bi chžeba'.

<sup>26</sup> Da'na'na' zoa mbalaz na' choa' diža' leca chebeda'.

Na' lecze chebeda' nezda' yechis yosbane' neda' ladjo bene' guat ca' cate' ba gota'.

<sup>27</sup> Dios chia', nezda' bi yocua'ano' neda' gan' že' bene' guat ca',

neca go'o latje gožo' cuerp čhia'na', neda' naca' xi'ino' na' nac lažda'oguan' xilaže'.

<sup>28</sup> Ba blo'edo' neda' can' soa cueza' mbalaz.

na' mbalaz soa' dan' soaleno' neda'.  
Beyoż gwna Pedroa' ca' nach gože' legaque':

<sup>29</sup>—Bene' Israel, nezecho da' xozxta' ocho rey David gote' na' bosocuaše' le'. Na' nombia'cho ba gan' bosocuaše' le'. <sup>30</sup> Na' da' rey Davin' be'e diža' can' bzejni'i Diosen' le' na' gwneзде' gwlo'o Diosen' da' bali' gague da' te bi gac can' gwne'. Gwneзде' gon Diosen' cont Criston' galje' lo diaža che' na' nabi'e nación Israelen' can' gwnabia' le'na'. <sup>31</sup> Diosen' bene' cont da' rey Davin' gwneзде' can' gaquen' na' da'nana' be'e diža' che Criston' ben' ba gwseła' Diosen' cont nabi'e. Gwne' Criston' yebane' na' bi yega'ane' gan' že' bene' guat ca' na' neca gožo' cuerp che'na'. <sup>32</sup> Na' Diosen' bechis bosbane' Jesúsena' ladjo bene' guat ca', na' yogo' neto' choe'to' diža' nezeto' beyas bebane'. <sup>33</sup> Na' Diosen' len yela' guac che'na' bene' cont beyep Jesúsena' gan' zoe'na' na' chnabi'e txen len le'. Na' Diosen' bnežjue'ne' Spiritw che'na' can' gwne'. Na' Jesúsena' ba bene' yela' guac nga da' ba benele na' da' ba ble'ele. <sup>34</sup> Gague da' rey Davin' beyep yaban', san da' David bzoje' che Jesúsena' gwne':

Xancho Diosen' gože' Xanan':

“Gwche'edo' cuita' nga nabi'a'cho txen,

<sup>35</sup> na' gona' cont yogo' no cheseque'e le' yosozexjw yichje' yosozenague' chio.”

<sup>36</sup> Da'nana' yogo' chio' bene' Israel cheyala' nezecho Jesúsena' ben' betwle bda'lna' le'e yag cruz, Diosen' gwleje'ne' cont naque' Xancho' na' naque' Cristo, zeje diža' naque' ben' gwseła' Diosen' nabi'e nación chechon'.

<sup>37</sup> Na' cate' bene' ca' zjanžaguen' gosende' xtiža' Pedroa', da' juisyw da' gosacde' lo' lažda'ogaquen', nach gose'e Pedroa' na' len yezica'chle postlw ca':

—Bene' gualaž, žbin' cheyala' gonto'?

<sup>38</sup> Nach Pedroa' gože' legaque':

—To tole cheyala' yetinjale xtoła'le ca' na' soale nis dan' ba chejnilaže'le Jesucriston', na' Diosen' yezi'xene' chele na' gone' le'e Spiritw che'na' soan lo' yichjlažda'olen'. <sup>39</sup> Xancho Diosen' gone' note'tezle Spiritw che'na' can' ba gwne', le'e na' xi'inle ca' na' note'tez bene' zito', le chnežjue' yogo' bene' chbeje' cont yesaque' lo' ne'e.

<sup>40</sup> Nach Pedroa' be'lene' legaque' diža' zan, na' gwneyoede' legaque' gwne':

—Le yechoj ladjo bene' mal quinga bene' cbi zjanombia' Dios.

<sup>41</sup> Ca' goquen' bene' ca' gosejle'e diža' dan' be' Pedroa' gosezoe' nis. Na' lo žana' šon' mil bene' gosejnilaže' Jesúsena' na' gosaque' txen len yezica'chle bene' chesejnilaže' le'. <sup>42</sup> Yogüe' gosenita'teze' bosozenague' dan' bososed bosolo'e postlw ca' legaque'. Na' gosaque' toze len yezica'chle bene' gosejnilaže' Jesúsena' na' gose'ej gosagüe' txen na' gosenite' bosol gižže' Diosen' txen.

*Can' goson bene' ca' gosejnilaže' Criston' da' nechw*

<sup>43</sup> Na' yogo'ze bene' besyebande' can' goson postlw ca' da' zan da' güen da' zaca' yebanecho len yela' guac che Diosen'. <sup>44</sup> Na' bene' ba chesejnilaže' Jesúsena' gosaque' toze na' gosone' toze yogo'lol' da' zjade chegaque'. <sup>45</sup> Na' gosote' yežlio na' bichle da' zjadede' na' mechw dan' besele'ede' čhen goseyisen' lao yogo'lole' con da' beseyaže' to toe'. <sup>46</sup> Na' tža tža besedop besežague' yodao' blaona' na' lecze do laže' gose'ej gosagüe' txen liž to togaque' na' gosenite' mbalaz. <sup>47</sup> Gosenita'teze' gosonxene'



Diosen'. Na' gosazlaže' beṇe' yezica'chle can' gosone'na'. Na' tža tža Xancho Diosen' bene' cont gosanch beṇe' ca' gosejnilaže' Jesucriston'.

### 3

#### *Beyac to beṇe' nxinj ṇi'e*

<sup>1</sup> Na' to ža Pedroa' na' Juan ja'aque' yodao' blaona' do cheda šone, hor cate' beṇe' Israel ca' chosoḷ güiže' Diosen' yogo' ža. <sup>2</sup> Na' gwzoo to beṇe' nxinj ṇi'e ca goljte' na' yogo' ža gosebēc beṇe' le' cho'a puert che yodao'na', puert dan' nzi' Puert Xdan, cont gwṇabe' mechw lao beṇe' ca' chja'ac yodao'na'. <sup>3</sup> Nach cate' bžin Pedroa' len Juan yodao'na' na' ben' nxinj ṇi'ena' boḷ güiže' legaque' yosonežjue'ne' mechw. <sup>4</sup> Nach Pedroa' len Juanna' gosebeze' na' goseṇa'chgüe' le' na' Pedroa' gože'ne':

—Gwṇa' neto'.

<sup>5</sup> Na' bēna' bene' xbab yosonežjue'ne' mechw. <sup>6</sup> Perw Pedroa' gože'ne':

—Bibi mechw chia' de da' goṇa' le', perw zoa to da' gona' gaclena' le': len yela' guac che Jesucriston' beṇe' naque' beṇe' yež Nazaret, chona' mandadw gwzoža' na' gwda.

<sup>7</sup> Na' Pedroa' beṇe' ne'e liča na' bsože'ene', na' goctē gwzeche' na' ṇi'ena' la' besyeyacten da' gual na' lecz ca' bechj ṇi'e ca'. <sup>8</sup> Na' cate' gocbe'ede' ba besyeyac ṇi'en', bxite' yela' chbe che'. Na' gwyo'e chašil che yodao'na' len legaque' chxite' na' cho'e yela' choṇcḷen che Diosen'. <sup>9</sup> Na' beṇe' ca' že' chašilen' besele'ede' can' chde' chxite' cho'e yela' choṇcḷen che Diosen'. <sup>10</sup> Na' besyeyombi'e le' naque' ben' chbe' chṇab mechw yogo' ža cho'a puert che yodao'na', puert dan' nzi' Puert Xdan, na' leca besyebande' da' ba beyac ṇi'ena'.

#### *Pedroa' be'e xtiža' Diosen' chašil yodaon'*

<sup>11</sup> Na' gosenite' chašil da' nzi' Chašil che da' Salomón dan' ze gan' zoa' yodao'na'. Na' ben' beyac ṇi'ena' bi bsane' Pedroa' len Juanna'. Nach yogo' beṇe' že' yodaon' besežagsese' chašila' cont jasene'e ben' beyaquen', le besyebanchgüede'. <sup>12</sup> Na' cate' Pedroa' ble'ede' ba zjanžag beṇe' zan gan' nite'na' nach be'lene' legaque' diža', gože' legaque':

—Le'e beṇe' gualaž chia' beṇe' Israel, žbixčēn' chebanele? žChaquele len yela' guac cheton' bento' cont beyac bēnga? žŠe chaquele beyaque' dan' chonchguato' can' chazlaže' Diosen'? Bi naquen ca'. <sup>13</sup> Dios ben' gosonxen da' xozxta'ocho Abraham, Isaac na' Jacob, blo'e nac Xi'ine' Jesúsen' beṇe' zaca' juisyw. Perw le'e bdele Jesúsen' lo na' justis ca' cont gosote'ne' na' bžonle cate' Pilaton' goclaže' gwsane'ne'. <sup>14</sup> Can' benle len Jesúsen' la'czla' naque' beṇe' laždao' xilaže' juisyw na' naque' la'zelagüe beṇe' chon da' güen. Nach gwṇable bosan Pilaton' to beṇe' güetw beṇe' na' bi gwṇable yosane' Jesúsen'. <sup>15</sup> Na' ca nac Jesúsen' ben' bxe yela' mban toḷi tocaṇe, le'na' betwle, perw na' Diosen' bechis bosbane' le' ladjo beṇe' guat ca'. Neto' ble'eto'ne' na' choe'to' diža' ba bebane' ladjo beṇe' guat ca'. <sup>16</sup> Na' chle'ele bēnga cbi goc se'e na' nombia' lne', na' ṇa'a ba beyac ṇi'ena' len yela' guac che Jesúsen' ben' chejnilaže'to'. Le da' chejnilaže'to' Jesúsen', da'nān' besyeyacšagüe' ṇi'a bēnga na' ba chle'ele can' beyaquen'.

<sup>17</sup> Beṇe' migw, nezdā' le'e na' beṇe' gole blao chele ca' betwle Jesúsen' lagüe bi gwyejni'ile Diosen' gwsele'ne'. <sup>18</sup> Na' da' benle ca' goc can' gwna Diosen' gac, da' bene' mandadw bosozoj da' beṇe' ca' gosō'e xtižen' cani', bosozoje' che Criston' ben' gwlej Diosen' cont ṇabi'e. Bosozoje' che

gosene' yosochi yososaca' bene' le'. <sup>19</sup> Da'nan' le yeyonšca xbab chele na' le yetinje xtoła'len' cont Xancho Diosen' gwnitlagüen' na' gone' ga soale mbalaz. <sup>20</sup> Nach Xancho Diosen' sele' Jesúsén' yežlio nga yetni'a, ben' gwleje' cani'te cont naque' Cristo checho. <sup>21</sup> Perw chonen byen yega'an Jesucriston' yaban' na'a, na' cate' žin ža gon Diosen' cont yežlio nga yeyaquen da' cobe, cana' yide' yeto. Ca' gosena bene' gwleje' cani' cont goso'e xtižen'. <sup>22</sup> Da' Moisésen' be'lene' da' xoxxta'ocho diža', gože' legaque': "Xancho Diosen' sele' yeto bene' gualaž chechon' cont güe'lene' le'e xtiže'na' can' gwsele' neda'. Che bena' gwzenagle bite'tez ne'. <sup>23</sup> Na' Diosen' gone' yesebiayi' yogo' bene' ca' cbi yosozenague' che bena' selen', na' bich yesenite' txen len bene' ca' chesonxene' le'." Can' gož Moisésen' da' xoxxta'ocho ca'.

<sup>24</sup> Lecz ca' yogo' lo' bene' goso'e xtiža' Diosen' cani', gwzolaozen len da' Samuel na' yogo' bene' ca' gosedeč, goso'e diža' che da' ca' ba chac tiemp na'a. <sup>25</sup> Le'e nacle xi'in diaža che da' bene' ca', na' dan' gož Diosen' legaque' gone', na' dan' gože' yezica'chle xoxxta'ole ca', lecz naquen che le'e. Gože' da' Abrahanna': "To bene' galje lo diaža chio' gone' cont bene' že' doxen yežlion' nite' mbalaz." <sup>26</sup> Da'nan' cate' Diosen' bosbane' Xi'ine' Criston' ladjo bene' guat ca', zgua'tec gwsele'ne' lao chio' bene' Israel da' goclaže' gaclene' chio' cont to tocho yetinjecho xtoła'chon'.

## 4

### *Pedroa' na' Juanna' nite' lao bene' gwnabia' ca'*

<sup>1</sup> Ne' chesoe'lente Pedroa' na' Juanna' bene' ca' diža' cate' besežin bal bꝑoz che bene' Israel ca', na' bene' gwnabia' che ben' chesape' yodao' blao chegaque'na' na' bene' saduceo ca' bene' cbi chesejle'e še yesyeban bene' guat ca'. <sup>2</sup> Bene' ca' cheseže'e che dan' chososed chosolo'e Pedroa' len Juanna', le chesene' nezecho gwžin ža cate' yesyeban bene' guat ca' da' beban Jesúsén'. <sup>3</sup> Na' bene' blao ca' gosezene' Pedroa' len Juanna' na' goseyixjue' legaque' ližya do yel, le ba chxin na' bi goła' yesone' yela' justis chegaquen' ca' cheyla' že'na', san bosocuezen' beteyoch. <sup>4</sup> Na' ca' nac bene' ca' gosende' chesoe' Pedroa' na' Juanna' xtiža' Diosen', zane' gosejnilaže' Criston', na' txen len bene' ca' ba gosejnilaže'ne' cana', gosac do gayo' mil bene' byo cbi cuent no'ole.

<sup>5</sup> Na' beteyo bene' gwnabia' che bene' Israel ca', bene' gole blao ca' na' bene' bososed bosolo'e ley dan' bzoj da' Moisés, besedop besežague' ciuda Jerusalenna' <sup>6</sup> len Anás ben' naquech bꝑoz blao, na' len Caifás, na' Juan, na' Alejandro na' nochle bene' zjanaque' biše' ljež ben' naquech bꝑoz blaon'. <sup>7</sup> Na' gosone' mandadw jasexi'e Pedroa' na' Juanna' na' cate' ba zjazie' laogaquen' gosenabde' legaque':

—¿No ben' lsens chele cont beyonle bene' nxiñjen'? o ¿no yela' guac che bchinle beyonlene'?

<sup>8</sup> Na' Spiritw che Diosen' dan' yo'o lo' yichjlaždao' Pedroa' benen cont gože' bene' ca':

—Le'e bene' gwnabia' na' bene' gole bene' blao che nación Israel chechon', <sup>9</sup> chñable nac bento' da' güen beyonto' bena' nxiñj ni'ena'. <sup>10</sup> Le'e na' yogo' bene' gualaž cheyla' nezele Jesucriston' ben' naque' bene' Nazaret bene' yela' guac che' cont beyacšgüe' benga. Le'e betwle Jesucriston' bda'ln'e' to le'e yag cruz, perw Diosen' bečhis bosbane'ne' ladjo bene' guat ca'. <sup>11</sup> Bi gwyejle'le che Jesucriston', da'nan' zaca'leble ca

beñe' cheson yo'o beñe' bi chesazlaže' yej güen da' ba naquen yej squin che yo'ona'. <sup>12</sup> Toze Jesucriston' guac goñe' chio' yela' mban toli' tocañe, na' noch no zoa doxen lo yežlion' beñe' gac goñe' yela' mban toli' tocañe che chio' beñaçh.

<sup>13</sup> Besyebane beñe' gwnabian' can' boži'i Pedroa' na' Juanna' xtiža'gaquen' sin cbi besežebe', le nacbia' zjanaque' beñe' yiçe' na' bi zjansedteque'. Nach gosacbe'ede' legaquen' ba gosedalene' Jesúsen'. <sup>14</sup> Na' dan' zecha ben' beyaque ni'ena' txen len Pedroa' na' Juanna', bi besyežebe' beñe' gwnabian' bi yesene' čhegaque'. <sup>15</sup> Nach beñe' gwnabian' besyebeje' postlw ca' chy'o'ole šlac bosoxi'e legacze' nacle yesone'. <sup>16</sup> Na' beñe' gwnabian' gose' lježgaque':

—¿Bi goncho len beñe' quinga? Yogo' beñe' že' ciuda Jerusalén ni zjanezde' gosone' to yela' guac xen na' bi gac ye'cho beñe' bi gosone' yela' guaquen'. <sup>17</sup> Leteçoze goncho cont cbi gaslas diža' dan' cheso'ena'. Da'n'an' cheyała' ye'cho legaque' gata' castigw čhegaque' še yesoe'che' xtiža' Jesúsen'.

<sup>18</sup> Nach gosaxe' Pedroa' na' Juanna' da' yoble na' gose'e legaque' bich yeso'e diža' che Jesúsen' na' noch no yososed yosolo'ede'. <sup>19</sup> Nach Pedroa' na' Juanna' bosyoži'e xtižen' gose'e legaque':

—Le gon xbab che da' nga, ¿chaquele chaclaže' Diosen' gwzenagto' chele o še chaclaže' gwzenagto' che le'? <sup>20</sup> Bi gac cuzto' bich güe'to' diža' che da' ba ble'eto' na' ba beneto'.

<sup>21-22</sup> Na' da' zan da' gose' beñe' gwnabia' ca' legaque' cont yosošebe'ne'. Perw na' bi beseželde' nacle yesone' legaque' castigw, le beñe' zan chesonxene' Diosen' dan' beyac bena' len yela' guac che Diosen'. Ba gwdie' čhoa iz na' ca goljte' bi goc se'e. Nach bososane' Pedroa' na' Juanna'.

*Gosenabde' Diosen' gaclene' yeso'e xtiže'na' sin cbi yesežebe'*

<sup>23</sup> Na' Pedroa' len Juanna' cate' bososan beñe' gwnabian' legaque' jaya'aque' gan' nita' yezica'chle beñe' chesejnilaže' Criston' na' gosoe'lene' legaque' diža' yogo'lol can' gose' bxoz gwnabia' ca' na' beñe' gole blao ca' legaque'. <sup>24</sup> Na' cate' gosende' dan' gose' Pedroa' len Juanna' legaque', toze can' gosone' xbab na' bosol' güiže' Diosen', gosene':

—Xanto' Dios, len' beno' yaban' na' yežlion' na' nisdaon'. Len' beno' beñaçh na' be ca' chesaš na' bica'chle da' zjade, na' len' chnabi'o doxen. <sup>25</sup> Na' le' beno' cont da' rey David bzoje' diža' quinga dan' gož Spiritw chion' le', žan:

Beñe' ca' cbi zjanaque' beñe' Israel chesase' contr le', Xanto' Dios, perw bicze gac can' chesone' xbaben'.

<sup>26</sup> Beñe' gwnabia' che nación ca' na' che yež ca' txen zjanaque' chesone' contr le' Xanto' Dios, na' contr Xi'ino' Criston' ben' gwse'lo' cont nabi'e.

<sup>27</sup> Na' Xanto' Dios, naquen da' li rey Herodes na' Poncio Pilato na' beñe' cbi zjanaque' beñe' Israel gosaque' txen len beñe' Israel ca' lo ciuda nga. Na' yogüe' gosone' txen cont gosote' Xi'ino' Jesúsen' ben' nac beñe' laždao' xilaže' juisyiw, ben' gwlejo' cont nabi'e. <sup>28</sup> Gosone' can' gwčhogbi'o gac dan' bžio' bia' cani'te. <sup>29</sup> Na' na'a Xanto', gwña can' cheson beñe' gwnabia' ca', le chesaclaže' yosošebe' neto' beñe' güen žin chio'. Na' goclen neto' cont bi žebto' güe'to' xtižo'na'. <sup>30</sup> Na' cate' güe'to' xtižo'na' blo'ešca yela' guac

che Xi'ino' Jesúsen' bene' laždao' xilaže' juisyon' cont gac yela' guac, na' yesyeyac no bene' chesacšene na' gac bichle da' yesyebane bene'.

<sup>31</sup> Na' cate' beyož bosol güiže' Diosen', Diosen' bene' gwxo' gan' zjandop zjanžague' na' na' Spiritw che'na' gwzoachguan len legaque', nach gosoe' xtiža' Diosen' sin cbi besežebe'.

### *Gosone' dan' zjade čhegaque' toze*

<sup>32</sup> Na' yogo' bene' ca' gosejnilaže' Criston' toz ca' gosac yichjlažda'ogaque'. Na' yogo' bi da' zjade čhegaque' gosonen' toze, na' nono gwna: "Čhia' da' nga", o "Čhia' da' na'", le naquen čhe yogo'lol gaque'. <sup>33</sup> Na' postlw ca' len yela' guac xen čhe Diosen' bosozejni'ide' bene' Jesúsen' bebane' ladjo bene' guat ca'. Na' Diosen' goclenchgüe' legaque' len bi dan' gosone'. <sup>34</sup> Na' bibi goc falt bi da' beseyažje bene' gosejnilaže' Criston', le bene' zjanape' no yežlio o no yo'o gosoten'. Na' mechw dan' besele'ede' čhe to ton <sup>35</sup> bosonežjuen' postlw ca', na' postlw ca' goseyisen' len bene' beseyažjden'. <sup>36</sup> Can' ben to bene' Chipre bene' le José. Naque' xi'in diaža čhe da' Levin' na' postlw ca' bososi'ene' Bernabé, zeje diža' ben' cheyonxenlaže' bene'. <sup>37</sup> Joséna' bete' to yežlio čhe' na' mechw dan' ble'ede' čhen bnežjuen' postlw ca'.

## 5

### *Da' mal dan' goson Ananías na' Safira*

<sup>1</sup> Na' zoa to bene' le Ananías na' no'ol čhe'na' Safira, na' gosote' to yežlio čhegaquen'. <sup>2</sup> Perw na' legacze' bosoxi'e yosonežjue' late'ze mechw dan' besele'ede' čhen na' yese'e postlw ca' doxenenna'. Nach gwyey Ananíasen' na' bnežjue' postlw ca' mechon'. <sup>3</sup> Nach Pedroa' gože'ne':

—Ananías, ¿bixchen' bzenago' čhe Satanás dan' chnabia' da' xigüe' ca' na' chacdo' xoayago' Spiritw čhe Diosen'? Čhi'o neto' choño' doxen mechon' dan' ble'edo' čhe yežlion', len ba gwlo'ošagüe'le laten' par cuinle. <sup>4</sup> Čhio' yežlion' cate' bina' goton', na' čhio' mechon' dan' ble'edo' cate' beton' na' zaco' cont beno' da' chaclažo' len len. ¿Bixchen' benle da' malen' nac ca'? Gague contr neton' ba benle benlaže'le, san contr Diosen'.

<sup>5</sup> Nach Ananíasen' cate' bende' xtiža' Pedroa' to gwbižze' na' gote'. Na' yogo' bene' ca' gosende' diža' can' goquen' besežebchgüe'. <sup>6</sup> Na' besežin to čhope bene' xcuide' gan' gwbiž da' Ananíasen' na' bosyočhele' cuerp čhen' to lache' na' besyeyo'ene' ga bosocuaše'ne'.

<sup>7</sup> Na' gwde do šon hor gote' cate' bžin no'ol čhe'na' na' gwyo'e lo' yo'on sin cbi nežde' bin' ba goc čhe bene' čhen'. <sup>8</sup> Na' Pedroa' gože'ne':

—¿To ca'te' ble'ele čhe yežlion'?

Na' Safiran' gože'ne':

—To ca'te'ten'.

<sup>9</sup> Nach Pedroa' gože' no'olen':

—¿Bixčhen' goco' toze len bene' čhion' chaquele gonle Diosen' prueba še lede' can' že' bi cheyala' xoayagcho? Cho'a puert nga zjazecha bene' ba bosocuaše' bene' čhio'na' na' na'a yeso'e le'.

<sup>10</sup> Na' la' gwbižte Safiran' lao Pedroa' na' gote'. Na' cate' goso'o bene' xcuide' ca' lo' yo'ona' besele'ede' ba gote' nach goso'ene' jasecuaše'ne' cuit da' bene' čhe'na'. <sup>11</sup> Na' yogo' bene' chesejnilaže' Criston' besežebe' can' goquen' na' lecze besežeb yezica'chle bene' gosende' diža' can' goquen'.

### *Gosone' da' zan yela' guac*

<sup>12</sup> Na' postlw ca' gosone' da' zan yela' guac na' bichle da' besele'e bene' da' zaca' yesyebande'. Na' bene' ca' chesejnilaže' Xancho Jesucriston' chesedop chesežague' txen chašil che yodao' blaona' gan' nzi' Chašil che da' Salomón. <sup>13</sup> Na' yezica'chle bene' ca' že' Jerusalénna' gosapchgüe' legaque' bala'an, la'czla' besežebe' yesaque' txen len legaque'. <sup>14</sup> Perw na' zane' gosejnilaže' Xancho' na' gosaque' txen, zan bene' byo na' no'ole. <sup>15</sup> Na' cate' no bene' gosacšende' goseyixjue' legaque' tnez do lo cam do lo yagla', gosebeze' te Pedroa' cont yesechele' bxin che' na' yesyeyacde' še bi yižgüen' chese'ede'. <sup>16</sup> Na' bene' ca' že' yež da' zjachi' gala'ze ciuda Jerusalénna' ja'aque' zjanche'e bene' chesacšene na' bene' zjajo'o zjanyaz da' xigüe'. Na' yogo'lole' besyeyacde'.

*Bene' saduceo ca' goseyixjue' Pedroa' len Juanna' ližya*

<sup>17</sup> Nach ben' nacch bxož blao na' yezica'chle bene' saduceo bene' cbi chesejle' yesyeban bene' guat, besegue'ede' postlw ca'. <sup>18</sup> Na' gosezene'ne' na' goseyixjue' legaque' ližya. <sup>19</sup> Na' to angl bene' za' gan' zoa Xancho Diosen' bžine' ližyan' šeže'le na' gwsaljue' puert ca' na' bebeje' legaque'. Na' gože' legaque':

<sup>20</sup> —Le šja'ac yodao' blaona' na' le güe' diža' len ben' chesežagna' naquen' yesone' cont gata' yela' mban chegaque' toli tocañe.

<sup>21</sup> Nach dan' gosende' can' gož anglen' legaque', ja'aque' yodao' blaona' cate' gwyeñi' na' bososed bosolo'ede' ben' zjanžag na'.

Na' ben' nac bxož blao len bene' gole blao ca' chesenabia' nación Israelen' besedobe' cont bosoxi'e, nach gosone' mandadw šjasexi'e postlw ca' gan' zjade' ližyan'. <sup>22</sup> Na' cate' ben' chesap yodaon' besežine' ližyan' gague no postlw ca' zjanla' na' jaya'aque' lao bene' gwnabia' ca' jasyedixjue'ede'. <sup>23</sup> Gose'e bene' ca':

—Nyeyjwchach ližyan' na' lecze na' nita' soldadw ca' cho'a puerta' chesapen' perw cate' gwsaljwto' puerten' gague no postlw ca' že' lo' ližyan'.

<sup>24</sup> Na' ben' nacch bxož blao na' bene' gwnabia' che ben' chesap yodaon' na' bxož gole blao ca' cate' gosende' rsonna' besyebande', gosene':

—¿Nac gac da' nga na'a?

<sup>25</sup> Na' šlac chesacžejlaže', bžin to bene' gože' legaque':

—Bene' ca' gwduxjwle ližyan' zjaze' chašil che yodao' blaona' chososed chosolo'ede' bene'.

<sup>26</sup> Nach bene' gwnabia' che ben' chesap yodaon' len bene' gop ca' jasa'aque' jasexi'e postlw ca' diža' šagüe'. Bi gosone' znia len legaque' da' besežebe' bene' chosozenag xtiža' postlw ca' še yosožie' legaque' yej. <sup>27</sup> Na' cate' besežin postlw ca' lao bene' gwnabia' ben' nita' chosoxi'a, nach ben' nacch bxož blao gože' legaque':

<sup>28</sup> —Ba bento' mandadw bi güe'le diža' che Jesúsen' na' bich gwsed gwlo'ele bene' xtižen', na' ba gwdisle xtiže'na' doxen ciuda Jerusalénna'. Na' ba chosbague'le neto' žale betwto'ne'.

<sup>29</sup> Nach Pedroa' na' postlw ca' gose'e legaque':

—Nacchen da' žialao xen gwzenagto' che Diosen' clal ca' che benach. <sup>30</sup> Le'e betwle Jesúsen' bda'ln'e' to le'e yag cruz, perw Dios ben' chonx-encho na' ben' gosonxen da' xozxta'ocho ca' bečhis bosbane'ne' ladjo bene' guat ca'. <sup>31</sup> Na' na'a Diosen' ba bnežjue'ne' yela' bala'an xen na' yela' gwnabia' xen cont chnabi'e na' chnežjue' yela' mban toli tocañe che

beñe' chesejnilaže'ne'. Na' le'na' chazlaže' gaclene' yogo' chio' beñe' Israel yetinjecho xtoła'chon' nach yezi'xene' chechon'. <sup>32</sup> Neto' nezeto' can' ben Diosen' len Jesúsen' na' choe'to' diža' čhen, na' lecze Spiritw che Diosen' choen' diža' che Jesúsen' lo' yichjlažda'oton', le Diosen' ba gwsele' Spiritw čhen' zoan lo' yichjlaždao' beñe' chosozenag che'.

<sup>33</sup> Na' beseža'achgua beñe' gwnabia' ca' cate' gosende' can' gož Pedroa' legaque' na' gosaclaže' yesote' postlw ca'. <sup>34</sup> Perw gwzoa to beñe' fariseo len legaque' beñe' le Gamaliel. Chsed chlo'ede' beñe' ley dan' bzoj da' Moisésen' na' gosapchgua beñe' le' bala'an. Na' Gamalielen' gwzeche' na' bene' mandadw yesechoj postlw ca' chyo'ole šlac güe'lene' beñe' ca' že'na' diža'. <sup>35</sup> Na' gože' beñe' ca' že'na':

—Beñe' gualaž, cheyała' goncho xbab nac goncho len bene' quinga cont goncho da' nac güen. <sup>36</sup> Le yosa'laže' can' goc cate' bchoj ben' le Teudas gwne' naque' beñe' zaque'. Na' do tap gayoa beñe' bosozenag che' na' gosaque' le' txen. Perw na' bžin ža gosot beñe' le' na' besyeyaslas ben' gosaque' le' txen, gague bi gocch yesone'. <sup>37</sup> Na' gwdechle ca tiempen' bosochele' bal beñe' že' to to yež, bchoj to beñe' distritw Galilea ben' le Judas na' beñe' zan gosaque'ne' txen. Na' lecze bžin ža gosote'ne' na' beñe' ca' gosaque' le' txen lecze besyeyasläse'. <sup>38</sup> Na' da'nän' žia' le'e can' chacda' cheyała' goncho, jaseye beñe' quinga, bibi gonecho legaque'. Le še chososed chosolo'ede' xbab čegacze', yeniten. <sup>39</sup> Na' še dan' chososed chosolo'ede' naquen che Dios, bibi gac goncho cont chi gaslasen. Cheyała' gwsaca'cho cont bi tillencho Diosen'.

<sup>40</sup> Na' gosazlaže' beñe' gwnabia' ca' can' gož Gamalielen' legaque'. Nach gosaxe' postlw ca' na' goseyine' legaque' na' gosone' mandadw bich yososed yosolo'ede' che Jesúsen' bate'tezechle. Nach bososane' legaque'. <sup>41</sup> Na' ca nac postlw ca', cate' besyechoje' gan' gota' yela' güexian', chesyebede', le Diosen' be'e latje bosochi bososaca' bene' legaque' neče dan' chososed chosolo'ede' che Jesúsen'. <sup>42</sup> Na' yogo' ža bososed bosolo'ech postlw ca' che Jesucriston' do liž beñe' na' cate' chja'aque' yodao' blaona'.

## 6

*Beñe' ca' chesejnilaže' Criston' gosebeje' gaže beñe' goson žin bixjw*

<sup>1</sup> Na' ca tiempen' zej chanch beñe' ca' chesejnilaže' Jesucriston' na' beñe' ca' cheso'e diža' griego gwzolao chesežeše', chesene' no'ol güezeb ca' nchixe legaque' bi chesezi'e lebe len no'ole güezeb ca' cheso'e diža' hebreo cate' chesyeyise' dan' chese'ej chesagw to togaque'. <sup>2</sup> Nach postlw ca' šižinw bosyotobe' yezica'chle beñe' ca' chesejnilaže' Jesucriston' na' gose'e legaque':

—Bi naquen güen neto' gwsanto' bich gwsed gwlo'eto' beñe' xtiža' Diosen' cont chisto' dan' yese'ej yesagw beñe'. <sup>3</sup> Da'nän' beñe' migw, le cuej gaže beñe' lježle, beñe' zoachgua Spiritw che Diosen' len legaque', beñe' zjanac beñe' sina' na' beñe' cheson da' güen, na' le gon lo na'gaque' yeseyise' dan' yese'ej yesagw beñe' ca'. <sup>4</sup> Na' neto' soateze soato' yol güižto' Diosen' na' gwsed gwlo'eto' beñe' xtižen'.

<sup>5</sup> Na' gosazlaže' yogo' beñe' ca' na' gosone' can' gose' postlw ca' legaque', na' gosebeje' to beñe' le Esteban beñe' chejnilaže'chgua Diosen' na' zoachgua Spiritw che Diosen' len le'. Na' lecze gosebeje' Felipe, na' Prócoro, na' Nicanor, na' Timón, na' Parmenas, na' Nicolás beñe' ciuda

Antioquía ben' bene' txen len beṇe' Israel. <sup>6</sup> Na' bosozoe' legaque' lao postlw ca' na' postlw ca' bosol güiže' Diosen' chegaque' na' gosexoa na'gaquen' yichj beṇe' ca' cont gozezi' lo ne'e zin dan' yesonen'.

<sup>7</sup> Na' beṇe' zanch gosende' xtiža' Xancho Jesucriston', na' zan beṇe' Jerusalénna' gosejnilaže'ne' na' ľecze zan bxož ca' bosozenague' na' gosejle'e xtiže'na'.

### *Gosezene' Esteban*

<sup>8</sup> Na' Estebanna' gwzoachgua yeļa' guac che Diosen' len ľe' na' Diosen' golenchgüe' ľe'. Da'nan' bene' yeļa' guac na' bichle da' zaca' yesyebane beṇe' lao beṇe' ca' že' na'. <sup>9</sup> Na' zoa to yodao' dan' chesene' Yodao' che Beṇe' ca' Bich Zjanaque' Esclavos. Beṇe' ca' chesedop chesežag yodao'na' za'aque' ciuda Cirene na' ciuda Alejandría na' distritw Cilicia na' distritw Asia. Na' baļ beṇe' ca' gwzolao gosacyože' len Estebanna', <sup>10</sup> perw na' bi besyeželde' nac yosyoži'e xtižen', ľe Spiritw che Diosen' bnežjon ľe' yeļa' sina' na' bzejni'in ľe' bin' gwne'. <sup>11</sup> Nach gosego'oyele' to chop bene' cont goso'e diža' güenlaže' che', gosene' Estebanna' gwneye'e che da' Moisésen' ben' bzoj ley che beṇe' Israel ca'. Na' ľecze gosene' Estebanna' gwne' diža' ya' che Diosen'. <sup>12</sup> Na' beṇe' ca' gosacyože' che Estebanna' bosota bosone' beṇe' lo ciuda na' beṇe' gole blaō che beṇe' Israel ca' na' beṇe' ca' chososed chosolo'ede' ley dan' bzoj da' Moisésen' cont gosaque' toze. Na' ja'acese' gan' zoa Estebanna' na' gosezene'ne' na' goseche'ene' gan' že' beṇe' ca' chesenabia' nación Israelen'. <sup>13</sup> Na' goseyiljue' beṇe' goso'e diža' güenlaže' beṇe' gosene' che':

—Benga bicze šize zoe' chṇe' diža' bya' che yodao' blaō che Diosen' nga na' ley dan' bzoj da' Moisés. <sup>14</sup> Ba beneto' že' Jesús ben' naque' beṇe' yež Nazaret yochinje' yodao' blaona' na' yoše'e costumbr checho dan' ben da' Moisés mandadw na' ocho.

<sup>15</sup> Na' yogo' beṇe' ca' zjachi' gan' chesone' yeļa' justisen' gosene'e cho'alao Estebanna' na' besele'ede' chactiten ca' cho'alao angl.

## 7

### *Choe' Estebanna' diža'*

<sup>1</sup> Nach ben' nacch bxož blaona' gože' Estebanna':

—¿Naquen can' chesena beṇe' quinga?

<sup>2</sup> Na' Estebanna' gože' legaque':

—Le'e beṇe' gole na' note'teze beṇe' gualaž, ľe gwzenag chia' len to chop da' nia' ľe'e. Diosen' ben' nac ľa'zelagüe beṇe' zaca' blo'elagüe' da' xoxxta'ocho Abraham cate' gwzoe' distritw Mesopotamia cate' za' šjasoe' ciuda Harán. <sup>3</sup> Na' Diosen' gože'ne': “Bchoj lažo' na' gwlejjichj beṇe' biše' ľježo' na' gwwej jasoa latje gan' gwlo'eda' ľe'.” <sup>4</sup> Beyož gož Diosen' Abrahanna' ca', nach Abrahanna' bchoje' gan' že' beṇe' Caldea ca' na' jasoe' Harán. Na' bžin ža got da' xe'na' na' gwdechle Diosen' gwche'e da' Abrahanna' gan' zoacho nga. <sup>5</sup> Diosen' bi bnežjue' da' Abrahanna' yežlio gaquen che', ne late' da'ozen', san gwne' gaquen che xi'in diaža che' cate' ba gote', ľa'czļa' nono xi'ine' na' soa cate' gož Diosen' ľe' ca'. <sup>6</sup> Nach Diosen' gwne' šjasenite' laž beṇe' zito' tap gayoa iz ga yesaque' esclavos na' yesežaglaochgüe'. <sup>7</sup> Nach Diosen' ľecze gože'ne': “Neda' gwnežjua' castigw che nación gan' yesone' xi'in diaža chio' ca' esclavos na' gona' cont yesyechoje' naciónna' na' yeside' yesonexene' neda' nga.” <sup>8</sup> Nach Diosen' gože' Abrahanna' gone' güen len xi'in diaža che'na'. Na' bene' mandadw

soa Abrahanna' to señw dan' že' circuncióñ, le' na' len bene' byo ca' zjanaque' diaža che', cont gacbia' le chesejle'e che dan' gwna Diosen'. Da'na'na' cate' golje xi'ine' Isaaquen' bzoe'be' señw to xmanzebe', na' lecze can' ben da' Isaaquen' cate' golje xi'ine' Jacob. Na' ca'cze ben da' Jacoben' len da' xi'ine' ca' šižinw, bene' ca' gosac šižinw diaža che bene' Israel.

<sup>9</sup> 'Na' xi'in da' Jacoben' ben' le José, bene' biše' ca' gosacxi'ede' le' na' gosote'ne' gosezi' bene' nación Egipto le'. Perw Diosen' gwzoe' len Josén'. <sup>10</sup> Na' goclene'ne' len yogo'loł da' bžaglagüe'. Na' Diosen' bene' cont da' faraón ben' chnabia' Egipton' bebede' Josén' na' gocbe'ede' naque' bene' sina'. Na' da'nana' faraónna' gwleje' le' cont goque' gobernador che nación Egipton' na' bene' lo ne'e ližen' na' yežlio che'na'.

<sup>11</sup> 'Na' goc gwbin doxen Egipton' na' lecze can' goc gan' nzi' distritw Canaán na' da' xozxta'ocho ca' bi beseželde' da' yesagüe' na' besežaglaochgüe'. <sup>12</sup> Perw na' bžin ža da' Jacoben' bende' diža' de trigw Egipton' na' gwsele' da' xozxta'ocho ca' jasexi'en da' nechw. <sup>13</sup> Na' bechop ni'a ja'aque' cate' ben Josén' ga besyeyombia' bene' biše' ca' le', nach gwneze faraónna' can' nac diaža che Josén'. <sup>14</sup> Na' Josén' bene' mandadw šjasexi'e xagaque' Jacoben' na' yogo'loł biše' lježe' ca', zjanaque' ca' do gayonšino' bene'. <sup>15</sup> Can' goc gwyej Jacoben' jasoe' Egipton' na' Egiptona' gote', na' lecze na' gosat xi'ine' ca' bene' ca' gosac xozxta'ocho. <sup>16</sup> Na' gwdechle besyeyo'e žit benat chegaquen' na' jasecuase'ne' to lo' bloj ba da' gosone' yež gan' nzi' Siquem. Da' Abrahanna' gwxi'e ban' cani'te che xi'in da' Hamor gwduxjen' mechw.

<sup>17</sup> 'Na' cate' ba zoa žin tiemp gwnežjo Diosen' legaque' yežlio can' gože' Abrahanna', ba zej chan bene' Israel ca' že' laž bene' Egipto ca'. <sup>18</sup> Na' ca' chac beža' rey che Egipton' na' rey coben' bi gwnežde' can' goclen Josén' nación chen'. <sup>19</sup> Na' rey nga gwdiljwlaže' bi da' mal bene' len da' xozxta'ocho bene' Israel ca' na' bene' mandadw šjasecho'on xi'ingaque'na' cont yesatbe'. <sup>20</sup> Na' ca' tiempen' golje da' Moisésen' na' bebe Diosen' lebe', na' xaxna'be' bososča'ogüe'be' šone bio'. <sup>21</sup> Perw na' bžin ža jasecho'onšaze'be' na' xi'in faraónna' to no'ole beželde'be' na' beyo'ebe' liže' bosča'ogüe'be' ca' xi'ine'. <sup>22</sup> Ca' goquen' bsd da' Moisésen' tcho'a yela' sina' che bene' Egipto ca' na' bene' da' zaca' na' be'e diža' da' zaca'.

<sup>23</sup> 'Na' choa ize da' Moisésen' cate' gwnan šjane'e bene' Israel gualaž che' ca'. <sup>24</sup> Na' jale'ede' to bene' Egipto chchi chsaque' to bene' Israelen'. Nach da' Moisésen' betue' bene' Egipton', boži'e da' malen' bende' bene' gualaž che'na'. <sup>25</sup> Bene' xbab gocde' yesacbe'e bene' gualaž che' chaclen Diosen' le' cont yosle' legaque' lo na' bene' Egipto ca', perw bi gosacbe'ede'. <sup>26</sup> Na' beteyo gosedil chopze bene' Israel. Na' bžin da' Moisésen' gocde' gone' cont yesenite' binlo, na' gože' legaque': "¿Bixchen' chdillen lježle le'e nacle bene' gualažze?" <sup>27</sup> Nach ben' nap dola'na' bžigue' da' Moisésen' ca'ale gože'ne': "¿No gwna le' gaco' bene' gwnabia' cont gono' yela' justis cheto'na'? <sup>28</sup> ¿Lez chaclažo' goto' neda' can' beto' bene' Egipton' neje?" <sup>29</sup> Na' cate' bene' da' Moisésen' can' gož bena' le' nach bxonje' jasoe' nación gan' nzi' Madián la'czla' naque' bene' zito' len bene' ca'. Na' bšagne'e na' gwnita' chope xi'ine'.

<sup>30</sup> 'Na' goc choa iz zoe' na', cate' to angl bene' gwseła' Dios blo'elagüe' le' latje dašen' galaže Ya'a Sinaí, yo'o anglen' to lo' yi' beł chdoljen to lo' yag xis yeše'. <sup>31</sup> Na' cate' ble'e da' Moisésen' can' chaquen' bebande' nach gwbigue' yelate' cont ble'ešagüe'de' na' bende' chol güiž Xancho Diosen'



le', che'ene': <sup>32</sup> "Neda' naca' Dios ben' chonxen Abraham, ben' chonxen Isaac, na' ben' chonxen Jacob." Nach da' Moisésen' gwxyzie' catec bžebe', gague cheyaxjde' ne'e. <sup>33</sup> Na' gož Xanchon' le': "Gwlečj xelo'na' cont gapo' neda' bala'an, le latje gan' zechao'na' naquen chia'. <sup>34</sup> Neda' ba ble'eda'yela' yaše'yela' zi' da' chde nación chia' Israelen' bene' že' Egipton' na' ba benda' ca chesonyaše'. Da'na'na' gaclena' legaque'. Beda na'a cont seła' le' Egipton'."

<sup>35</sup> 'Diosen' gože'ne' ca' la'czla' bene' Israel ca' cbi gosezi'e che', gose'e Moisésen': "¿No gwna le' gaco' bene' gwnabia' cont gono'yela' justis četo'?" Diosen' gwsele' da' Moisésen' cont gwnabi'e da' xozxta'ocho ca' na' cont bebeje' legaque' lo na' bene' Egipto ca', na' angl che Diosen' ben' ble'e da' Moisésen' lo' yi' bel gwzoe' goclene'ne'. <sup>36</sup> Na' da' Moisésen' bebeje' legaque' Egipton' gan' bene' zan yela' guac na' bichle da' zaca'yebane bene', na' lecz ca' bene' cate' besežine' Nisdao' Xnan' na' šlac gosenite' latje dašen' čhoa iz. <sup>37</sup> Na' da' Moisésnan' gože' da' xozxta'ocho ca': "Xancho Diosen' sele' yeto bene' gualaž chechon' cont gü'lene' le'e xtiže'na' can' gwsele' neda'. Čhe benan' gwzenagle." <sup>38</sup> Da' Moisésen' gwzoe' len da' xozxta'ocho ca' latje dašen', na' lo Ya'a Sinaín' to angl bene' gwseła' Diosen' gože' le' diža' da' zjansa'yela' mban, na' bzoje' dižan' par chio'.

<sup>39</sup> 'Perw na' da' xozxta'ocho ca' zan las bi bosozenague' che da' Moisésen', bosozoe'ne' to šla'ale. Gosaclaže' šjaya'aque' Egipton'. <sup>40</sup> Na' šlac zej da' Moisésen' lo Ya'a Sinaí, gose'e bene' biše' Aarónna': "Ben da' le'echo da' šejnilaže'cho na' da' cuialao laocho tnez. Le ca' nac Moisésen' ben' bebej chio' Egipton', nono neze bin' ba goc che'." <sup>41</sup> Nach gosone' to me' go'n dao' de oro na' gosote' no beyixe' gosonxene' me' daon', na' gosone' lni che' bena' gosone' len ni'a na'gaque'. <sup>42</sup> Da'nan' Diosen' gwlejyichje' nación Israelen' na' be'e latje gosejnilaže' gwbiž, bio', na' beljw. Na' da' nga nyojen len dan' bosozoj da' bene' ca' goso'e xtiža' Diosen' cani', žan: Le'e bene' Israel, gague nedan' benxenle' caten' betwle beyixe' latje dašen' lao čhoa iz.

<sup>43</sup> Benle' no da' benxenle', na' bia'le yodao' da' chacte chedobe gan' benxenle' dan' nzi' Moloc, na' bia'le beljon' benxenle' dan' nzi' Renfán. Na' dan' ba gwlejyichje' neda', da'nan' cueja' le'e gan' zoalen' na' seła' le'e nación zito' do gan' nzi' Babilonia.

<sup>44</sup> Na' šlac chesaše' latje dašen', da' xozxta'ocho ca' gosone' to yodao' da' chacte chedobe gan' že' yej ta'a gan' nyoj ley čhegaque'na'. Na' gosonen' con can' gož Diosen' da' Moisésen' na' con can' blo'ede' le'. <sup>45</sup> Nach cate' da' Josué gwče'e legaque' gan' ben Diosen' cont goseque'e yežlio che' bene' zito' ca', lecze goso'e yodao' da' chacte chedobe. Na' ne' bosočhine' yodaon' bžinten tiemp che' da' rey David. <sup>46</sup> Na' Diosen' bebede' da' rey Davin', na' da' Davin' goclaže' gone' to yodao' che' Diosen', Dios ben' lecze benxen da' Jacoben' cani'te. <sup>47</sup> Perw na' da' xi'ine' Salomón benen'. <sup>48</sup> Na' Diosen' ben' chnabia' doxen, bi nacho zoe' lo' yo'o da' chon benachen', san chac can' gwna Diosen' dan' bzoj to bene' be' xtiže'na' cani', žan:

<sup>49</sup> Neda' zoa' yaba chnabia', na' guac gona' con bi chazlaža' lo yežlion'. Na' ¿chaquele gonle' to liža'na'? Neda' bi chyažjda' yo'o ga yezi'laža'.

<sup>50</sup> Neda' bena' yogo'te da' zjade.

<sup>51</sup> 'Dan' bi chzenagle, dan' bi chejle'le lo' lažda'olen' nacchgualē beņe' gūedenag can' gosac da' xoxxta'ocho ca'. Bicze chzenagle che Spiritw che Diosen'. <sup>52</sup> Da' xoxxta'ocho ca' lecze bosochi bososaque' beņe' ca' gosote xtiža' Diosen' cani', na' gosote' legaque' caten' gosote diža' can' sela' Diosen' Xi'ine' ben' nac beņe' gūen juisyw. Na' cate' bide', le'e bdelne' lo' na' beņe' ca' gosote'ne' na' le'e naple doła' dan' gosote'nen'. <sup>53</sup> La'czla' nombia'le ley dan' bosonežjw angl ca' da' Moisésen', bi chzenagle chen.

#### *Gosote' Estebanna'*

<sup>54</sup> Na' cate' Esteban' gože' legaque' ca', beselocchgüe' gosagwxejte laye'. <sup>55</sup> Perw na' Esteban' gwzoachgua Spiritw che Diosen' len le', bcos lagūen' gwne'e yabale na' ble'ede' chac to be'ni' gual gan' zoa Diosen' na' ble'ede' zecha Jesúsen' cuit Diosen' chnabi'e txen len le'. <sup>56</sup> Nach Estebanna' gwne':

—Le na'šc nła'xeje yaban' na' nła' Jesúsen' ben' golje' beņach zeche' cuit Diosen' chnabi'e txen len le'.

<sup>57</sup> Nach beņe' ca' zjanžaguen' leca beseloque' na' bososya'adie' na' bososejyw naggaque'na' na' to ši'ize ja'acsese' gan' ze Estebanna'. <sup>58</sup> Nach gosebeje' Estebanna' cho'a yež na' bosožie'ne' yej. Na' beņe' ca' bosožie' le' yejen' bosonežjue' xagaque' da' zjandobe' to beņe' xcuide' beņe' le Saulo cont gapen'. <sup>59</sup> Na' šlac chosožie' Estebanna' yej, Esteban' bol güiže' Diosen', gwne':

—Xana' Jesús, bezi' neda' yaban'.

<sup>60</sup> Nach bzoa xibe' lo' yon' na' gwne' zižje, gwne':

—Xana' bi gono' cuent xtola' beņe' quinga dan' chesote' neda'.  
Na' beyož gwne' ca', gote'.

## 8

#### *Saulo bchi bsaque' beņe' chesonxen Jesucriston'*

<sup>1-2</sup> Na' ca' nac Saulon', gwyazlaže' dan' gosote' da' Estebanna'.

Na' beņe' ca' chesejnilaže' Jesucriston' ciuda Jerusalénna' jasecuaše' da' Estebanna', na' gosebežchgüe' che'. Na' gwde gosote' da' Estebanna' gosezologüe' bosochi bososaque' beņe' ca' chesedop chesežag chesonx-ene' Jesucriston' Jerusalénna', na' yogo' beņe' ca' chesonxen Jesucriston' besyeyasłase', ja'aque' yež ca' zjachi' do distritw Judean', do distritw Samaria, perw gague len postlw ca'. <sup>3</sup> Na' Saulon' gwzologüe' cheje' liž to to beņe' ca' chesonxen Jesucriston' chjaxobe' no beņe' byo na' no no'ole cont chche'e legaque' ližya.

#### *Beņe' ciuda Samaria gosende' diža' gūen che Jesucriston'*

<sup>4</sup> Na' beņe' ca' chesonxen Jesucriston' ben' besyeyasłase' ja'aque' doxen, jasedixjue'ede' xtiža' Jesucriston'. <sup>5</sup> Na' ben' le Felipe bžine' ciuda Samarian' na' be'e diža' che Jesucriston'. <sup>6</sup> Na' cate' gosende' xtižen' na' besele'ede' yela' guac dan' bene' len legaque', beņe' zan besedobe' bosozenague' che'. <sup>7</sup> Bebeje' da' xigüe' ca' zjajo'o zjanyaz yichjlaždao' beņe' zan, na' cate' besyechojen chososya'adian. Na' zan beņe' natzi' late' gūeje cuerp chegaque'na' beyone' legaque', lecze beyone' no beņe' nxinj ni'e. <sup>8</sup> Na' besyebchgüe beņe' ca' že' ciudan'.

<sup>9</sup> Na' lo' ciudan' zoa to beņe' guaža' beņe' le Simón. Da' zan da' beņe' da' besyebane beņe' Samarian' gwziye'e legaque' gože'ne' naque' beņe'

zague'. <sup>10</sup> Na' šlac bene' da' ca', yogo' bene' lo ciudan' bosozenague' che' tcho'a, no bene' gole ca' lente no bi' xcuide' ca', gosene' che':

—Le began' nse'e yela' guac xen che Diosen'.

<sup>11</sup> Zan iz bosozenague' che', le gwziye'e legaue' len yela' guaža' che'na'. <sup>12</sup> Perw cate' Felipen' gwduxjue'ede' diža' güen che Jesucriston' len legaue' na' bzejni'ide' legaue' che yela' chnabia' che Diosen', zane' gosejle'e che' na' gosezoe' nis, bene' byo na' no'ole. <sup>13</sup> Na' lencze Simón gwyejle'e che' na' gwzoe' nis na' gwzolaogüe' gwdalene' Felipen', na' bebande' ca' nac yela' guac ca' dan' chon Felipen' na' yezica'chle da' zaca' yebanecho.

<sup>14</sup> Na' postlw ca' nite' ciuda Jerusalénna' gosende' bene' ca' že' ciuda Samaria ba chosozenague' xtiža' Diosen', nach gosesele' Pedroa' len Juanna' Samarian'. <sup>15-16</sup> Na' cate' besežine'na' bosol' güiže' Diosen' gosenabde'ne' soa Spiritw chen' lo' yichjlaždao' bene' Samaria ca', le ca' hora' biña' soan lo' lažda'ogaue' la'czla' ba gosezoe' nisen' dan' chesejni-laže' Xancho Jesús'en'. <sup>17</sup> Nach gosexoa na' postlw ca' yichjgaue' cont gwzoa Spiriton' lo' yichjlažda'ogaquen'.

<sup>18</sup> Na' ble'e Simón can' cheson postlw ca' chesexoa ne'e yichj bene' cont chzoa Spiriton' len legaue', na' bšabde' legaue' mechw. <sup>19</sup> Gože' legaue':

—Le gon cont neda' gac xoa na'a yichj note'teze bene' na' soa Spiriton' len legaue' can' chon le'e.

<sup>20</sup> Nach Pedroa' gože'ne':

—Cuiayo'o len xmechon' dan' chono' xbab guac si'o len mechw da' chon Diosen'. <sup>21</sup> Bi zaco' gono' da' nga chonto', le yichjlažda'oguo' naquen mal lao Diosen'. <sup>22</sup> Da' cheyala' gono', betinje da' malen' chono' na' gwñab goclen lao Diosen' cont yezi'xene' chio' ca' nac xbaben' yo'o lo' yichjlažda'oguo'. <sup>23</sup> Nacia' da' mal dan' yo'o lo' yichjlažda'oguo' chnabi'an le' na' ngo'on le' nez malen'.

<sup>24</sup> Nach Simónna' boži'e xtižen' gože' le':

—Le ñab goclen lao Xancho' cont ñe to da' mal dan' bač gwnao' nga bi gac chia'.

<sup>25</sup> Na' Pedroa' len Juanna' cate' beyož goseyixjue'ede' xtiža' Diosen' lo' ciuda Samarian' na' beyož goso'e diža' can' ba goclen Xancho Jesucriston' legaue', nach jaya'aque' Jerusalénna'. Na' šlac zjaya'aque'na' goseyixjue'ede' xtiža' Xancho Jesucriston' len bene' ca' že' yezica'chle yež ca' gan' mbane distritw Samaria.

### *Felipe na' bene' Etiopía*

<sup>26</sup> Nach Xancho Diosen' gwsele' to angl bene' gože' Felipe:

—Gwej gan' xoa nez dan' chetj Jerusalénna' na' chden latje dašen' chžinen yež dan' nzi' Gaza.

<sup>27</sup> Nach Felipe gwlo'e nezen', na' šlac zeje' ble'ede' to bene' nación Etiopía zeyo'e to lo' carret zeze'e gwyeje' Jerusalénna' jenxene' Diosen'. Le' naque' to bene' blao na' ba none' le' capar cont gone' xšin no'ole gwnabia' che bene' Etiopía ca', šo'o lo' ne'e mechw che'. Na' no'ole gwnabian' le' Candace. <sup>28</sup> Na' ben' yo'o lo' carreten' chlabe' libr dan' bzoj da' Isaíasen' ben' be' xtiža' Diosen' cani'. <sup>29</sup> Nach Spiritw che Diosen' gožen Felipen':

—Jayxen carreten' na' gwyejlene' txen.

<sup>30</sup> Nach gwza'ses Felipen' cont jayxene' carreten' na' cate' bžine' gala'ze bende' chlab ben' libr dan' bzoj da' Isaíasen'. Nach gože'ne':

—¿Chejni'ido' dan' chlabo'na'?

<sup>31</sup> Na' bene' Etiopían' boži'e xtižen' gože' Felipen':

—¿Nacxe gac šejni'ida' da' ngan', le gague no nla' no gwzejni'ide' nedan'?

Nach gota'yoede' Felipen' cont gwo'e lo' carreten' gwche'lene'ne'.

<sup>32</sup> Na' gan' chlabo'na' nyojen žan:

Ca to xila' be nxob bene' cont gote'ba',  
na' ca to xila' dao' be bi chosya'a cate' chšibe'ba',  
can' bene', bibi gwne' caten' gosezi' gosebague'ne'.

<sup>33</sup> Na' gosone' le' ca to bene' bibi zaca'.

Na' bi gosone' yeła' justis che' ca cheyała' gaquen.

Na' nono diaža che' nita', le goseque'e yeła' mban che' lo yežlio nga.

<sup>34</sup> Nach bene' Etiopían' gože' Felipen':

—Benšca goclen gwna neda' no čhen' ža ben' bzoj Xtiža' Diosen' ca', ¿če cuinen' že' ca' o še che bene' yoble?

<sup>35</sup> Nach Felipen' gwzolaküe' bzejni'ide' bi zejen dan' chlab bene' Etiopían', gože' le' diža' güen che Jesúsen'. <sup>36</sup> Na' ca' chac, besežine' ga žia nis, nach bena' gože' Felipen':

—Nga žia nis, ¿cbi gac soa' nisen' na'a'?

<sup>37</sup> Nach Felipen' gože'ne':

—Še chejnilažo' Jesucriston' do yichj do lažo', guac so' nisen'.

Nach gwne':

—Chejli'a Jesucriston' naque' xi'in Diosen'.

<sup>38</sup> Nach bene' mandaw bcueze' carreten' na' betj Felipen' len bene' Etiopían' jasežo'e lo' nisen' cont Felipen' bzoe'ne' nis. <sup>39</sup> Na' cate' besyechoje' lo' nisen', Spiritw che Diosen' la' beche'eten Felipen' ga yoble, na' bich ble'e bene' Etiopían' le'. Na' mbalaz beza' ben' beyo'e lo' carreten'. <sup>40</sup> Nach Felipen' bžine' yež dan' nzi' Azoto na' gwzolaküe' gwdičjue'ede' diža' güen che Jesucriston' to to yež da' zjachi' gała'ze ga gwdie' bžinte' Cesarean'.

## 9

*Diosen' bocobe'yichjlaždao' Saulon'*  
(Hch. 22:6-16; 26:12-18)

<sup>1</sup> Na' Saulon' con chdacze' cho'e diža' can' chaclaže' gote' bene' chesejnilaže' Xancho Jesucriston' na' chdacze' cheyljwlaže' nacle gone' gote' legaque'. Na' da'nan' Saulon' gwyeje' lao bxoz blao che bene' Israelen', <sup>2</sup> na' gwñabde'ne' gwzoje' to yiš da' goxe' yosolab bene' že' to to yodao' nita' ciuda Damasco cont yesenezde' nape' yeła' gwnabia' sene' bene' ca' ba chesejnilaže' Jesucriston' na' gwcheje' legaque' cont che'e legaque' ciuda Jerusalenna' la'czla' bene' byo o la' no'ole. <sup>3</sup> Cate' beyož bnežjue'ne' yišen' gwlo'e nez, na' ba zoa žine' ciuda Damascon' cate' zejzenez to be'ni' da' za' yaban' gwyečhjen le'. <sup>4</sup> Na' gwbiče' lo yon'. Na' bende' che' to bene' le':

—Saulo, ¿bixchen' chči chsaco' neda'?

<sup>5</sup> Na' Saulon' boži'e xtižen' gože' le':

—¿No le' bene'?

Nach bena' gože'ne':

—Nedan' Jesús ben' chči chsaco'. Na' dan' chgue'edo' neda', chone zi' cuino' can' chac che to go'n be chlibe lo ya dan' zoa lo carroš cheba'.

<sup>6</sup> Na' do chaž chžebze' gože' le':

—Xana' Jesús, ¿bin' chaclažo' gona'?

Nach *Xancho*' gože'ne':

—Beyas na' gwyey ciuda *Damascon*' na' zoa to bene' ye'e le' da' cheya<sub>l</sub>a' gono'.

<sup>7</sup> Na' bene' ca' zja'aclen *Saulon*' benit be<sub>ch</sub>o<sub>l</sub> gosac lo' yichjlažda'ogaque'na' catec besežebe' dan' goquen', le gosende' ši'i bene' perw nono besele'ede'. <sup>8</sup> Nach beyas *Saulon*', perw cate' bexa' lagüen' con bich ble'ede'. Nach bene' ca' nžague'na' goso<sub>x</sub>e' ne'e goseče'ene' *Damascon*'. <sup>9</sup> Na' šone ža gwzoe' sin cbi ble'ede' na' bi güe'ej gwdagüe'.

<sup>10</sup> Na' zoa to bene' chejnilaže' *Xancho* *Jesucriston*' *Damascon*' bene' le *Ananías*, na' *Ananíasen*' ble'edagüede' *Xancho*'. Na' *Xancho*' gože'ne':

—*Ananías*.

Na' boži'e xtižen' gwne':

—Nga zoa, *Xana*'.

<sup>11</sup> Nach *Xancho*' gože'ne':

—Gwzoža' na' gwyey liž *Judas* dan' zoa cay dan' chesene' *Nez Licha*, na' nabo' to bene' le *Saulo*, to bene' ciuda *Tarso*. Ba cho<sub>l</sub> güiže' neda'.

<sup>12</sup> Na' ba bena' cont ble'edagüede' le' gwyo'o gan' zoe'na' na' gw<sub>x</sub>oa nao' yejlagüe'na' cont yele'ede'.

<sup>13</sup> Nach *Ananíasen*' boži'e xtižen' gože' le':

—*Xana*', ba benda' bene' zan cheso'e xtiža' bena', ca nac da' mal juisyw ba bene' *Jerusalén* len bene' ca' ba gwlejo' cont zjanaque' lo' nao'. <sup>14</sup> Na' chesene' ze'e nga no<sub>x</sub>e' yiš che b<sub>x</sub>oz gwnabia' ca' cont sene' yogo'lo<sub>l</sub> neto' chejnilaže'to' le'.

<sup>15</sup> Nach *Xancho* *Jesucriston*' gože' *Ananíasen*':

—Gwyey, le ba gwleja' *Saulon*' cont šjazejni'ide' xtiža' len bene' cbi zjanac bene' *Israel* na' len rey *čhegaque*' ca', na' lente le'e nacle bene' *Israel*.

<sup>16</sup> Na' gwlo'eda'ne' ca' nac da' yaše' da' zi' da' gac *čhe*' dan' gwzenague' *čhia*'.

<sup>17</sup> Nach *Ananíasen*' gwyeye' gan' zoa *Saulon*' na' gwyo'e lo' yo'ona' na' gw<sub>x</sub>oa ne'e yej<sub>l</sub>ao *Saulon*', gože'ne':

—Bene' migw *Saulo*, *Xancho* *Jesúsen*' ben' blo'elagüe' le' tnez gan' za'ona' ba gwse<sub>l</sub>e' neda' zedena'a le' cont yele'edo' na' soa *Spiritw* *čhe* *Diosen*' len le'.

<sup>18</sup> Nach *la*' besyeyinjte da' ca' že' lo' yejlagüen', zjanaquen ca' yid bdi'ej, na' *la*' bele'etede'. Nach gwzože'e cont gwyeye' gan' gwzoe' nisen'. <sup>19</sup> Ca beyoža' gwdagüe' na' beyaclaže'. Na' bega'a<sub>n</sub>e' *Damascon*' yeto *čhop* ža len bene' ca' chesejnilaže' *Xancho*'.

*Saulon' be'e xtiža' Diosen' Damascon'*

<sup>20</sup> Na' *la*' gwzolaote gwyeye' to to yodao' be'e diža' *čhe* *Jesúsen*', gwne' len' naque' *Xi'in* *Diosen*'. <sup>21</sup> Na' yogo' bene' ca' chesende' xtiže' dan' cho'ena' besyebande' na' chese' lježe':

—¿Gague bengan' *chda* *chonit* *cholane*' bene' ca' chesejnilaže' *Jesúsen*' ciuda *Jerusalénna*'? na' ¿gague da' na'czen' bide' nga *na*'a cont gw<sub>č</sub>heje' bene' ca' na' šjasane' lega<sub>q</sub>ue' lao b<sub>x</sub>oz gwnabia' ca'?

<sup>22</sup> Na' *Saulon*' tža tža *Diosen*' goclene'ne' cont be'e diža' *čhe* *Jesúsen*' tcho'a, gwne' *Jesúsen*' naque' ben' gwse<sub>l</sub>a' *Diosen*' cont *nabi*'e. Na' bene' *Israel* ca' že' *Damascon*' bi beseželde' bin' yesene', le gosache'ede' dan' *čhe*'e lega<sub>q</sub>ue' naquen da' *li*.

*Saulon' bi goque' lo' na' bene' ca' chesegue'ede' le'*

23 Na' cate' ba goc sša choe'len Saulon' bene' Damasco ca' xtiža' Jesucriston' nach bosoxi'a bene' Israel ca' yesote'ne'. 24 Na' gosenite' chesape' to to cho'a puert che ze'ena' dan' nyečj ciudan' cont yesezene' Saulon' yesote'ne' bate'teze choje', perw na' Saulon' gočbe'ede' ba zjachi'na'ogüe'ne'. 25 Na' bene' ca' chesejnilaže' Jesucriston' besyeletje'ne' le'e ze'e dan' nyečj ciudan' šeže'le besyegüe'ene' to lo' žome cont goc bechoje' lo' ciudan'.

*Gwyej Saulon' Jerusalénna'*

26 Nach beze'e beyeje' Jerusalén. Na' cate' bežin Saulon' ciuda Jerusalénna' goclaže' gone' txen bene' ca' chesejnilaže' Jesucriston', perw yogo'lole' besežebe' le', bi gosejle'e še da' li ba chejnilaže' Jesucriston'. 27 Nach Bernabé gwčhe'e Saulon' ja'aque' gan' že' postlw ca' na' be'lene' legaque' diža' can' goc ble'e Saulon' Xancho Jesúsen' šlac ngüe'e nez zeje' Damascon' na' can' goc Xancho' be'lene' Saulon' diža'. Na' lecze gož Bernabén' legaque' Saulon' ba be'e xtiža' Jesúsen' Damascon' sin cbi bžebe'. 28 Nach postlw ca' gosejle'e can' goc čhe Saulon', na' gwzoloao gw dalen Saulon' bene' ca' chesejnilaže' Jesucriston' Jerusalénna'. 29 Na' sin cbi bi chaž chžebe' gwzologüe' chzejni'ide' bene' Israel ca' diža' che Xancho Jesúsen', con bene' chesac diža' griego. Bene' byen bzejni'ide' legaque' xtiža' Diosen', perw na' legaque' gosaclaže' yesote'ne'. 30 Na' cate' bene' ca' chesejnilaže' Jesucriston' Jerusalénna' gosacbe'ede' ba zjachi'na'ogüe' yesote'ne', nach goseče'ene' ja'aque' ciuda Cesarea na' besyesele'ne' ciuda Tarso.

31 Na' bene' ca' chesedop chesežague' chesonxene' Jesucriston' doxen distritw Judean', distritw Galilean' na' distritw Samaritan' gosenite' binlo, noch no bosochi bososaca' legaque', na' gosenita'čhače' gosejnilaže' Xancho Jesúsen' na' bosozenague' čhe' do yichj do laže'gaque'. Na' Spiritw čhe Diosen' benen cont gosacčhač laže'gaque' na' benen cont gwyane'.

*Beyac ben' le Eneas*

32 Ca nac Pedroa' cheje' to to yež gan' že' bene' ca' ba gwlej Diosen' cont zjanaque' lo ne'e chjane'e legaque'. Na' to ža gwyeje' jane'e bene' ca' že' yež dan' nzi' Lida. 33 Na' yež Lidan' jati'e to bene' le' Eneas. Ba chac xono' iz de' che'ede', natzi' late' cuerp čhe'na'. 34 Nach gož Pedroa' le':

—Eneas, Jesucriston' cheyone' le'. Gwyas na' btob xcamo'na'.

Nach la' gwyaste bena'. 35 Na' yogo'lol bene' že' Lidan' na' bene' že' yež dan' nzi' Sarón besele'ede' bena' ba beyacde' na' gosebejyichje' costumbr čhegaque' cont gosejnilaže' Xancho Jesucriston'.

*Dorcas bebane' ladjo bene' guat ca'*

36 Na' ca tiemp na', to ciuda dan' nzi' Jope zoa to no'ole le' Tabita, na' diža' griego le' Dorcas. Na' chejnilaže' Jesucriston' na' zoe' chone' da' güen na' chaclene' no bene' yaše' bene' chyažj chčhine'. 37 Perw na' gocšene Dorcasen' na' gottechgüe', na' bosoguazje'ne' na' gosexoe'ne' to lo' cuart da' zoa yichj yo'o cha'te. 38 Na' gała'ze chega'an yež Lidan' len Jopen', na' bene' ca' chesonxen Jesucriston' Jopen' gosenezde' Pedroa' zoe' Lidan'. Nach gosele' čhope bene' jasata'yoede' Pedroa' gose'ene':

—Benšca goclen yo'o len neto' netec na'a.

39 Na' Pedroa' la' gwza'te' gwyeje' len bene' ca'. Na' cate' besežine' Jopen', goseče'ene' lo' yo'o gan' xoa bene' guaten', na' la' gosebiga'te yogo' no'ol güezebe lagüe'na' chesebeže' chosolo'ede' le' lache' dan' ben da' Dorcasen'

šlac gwbane', no vestidw na' no camis. <sup>40</sup> Nach Pedroa' bešaše' yogo'loł bene' ca' chyo'ole na' bzoa xibe' boł güiže' Diosen'. Na' beyechje' chne'e cuerp che no'olen', na' gože'ne':

—Tabita, gwyas.

Nach la' bexa'te yejlao da' Dorcasen' gwne'e Pedroa' na' la' bebe'te'. <sup>41</sup> Nach Pedroa' bexae' ne'ena' bsože'e le', nach goxe' no'ole güezeb ca' na' yezica'chle bene' ca' zjanaque' lo na' Diosen' na' blo'ede' legaque' ba beban Dorcasen'. <sup>42</sup> Na' yogo'loł bene' Jopen' gosende' can' goquen', na' bene' zanch gosejnilaže' Xancho Jesucriston'. <sup>43</sup> Na' Pedroa' bega'ane' Jopen' zan ža, gwzoe' liž to bene' le Simón, bene' chonšagüe' yid.

## 10

### *Pedroa' na' Cornelio*

<sup>1</sup> Na' ciuda Cesareana' zoa to bene' le Cornelio, naque' xan to gayoa soldadw, na' bosozoa la soldadw che' ca' Bene' Italia. <sup>2</sup> La'czla' Cornelion' cbi naque' bene' Israel, benxene' Diosen', na' lecze ca' goson bene' lo' yo'o che', cheszoe' chesape' Diosen' bala'an. Na' Cornelion' chaclenteze' bene' Israel bene' chyažj chchine', na' zoateze' choł güiže' Diosen'. <sup>3</sup> Na' goc che', to ža do cheda šone ble'edagüede' to angl bene' gwsela' Diosen' gwyo'e gan' zoe'na', na' anglen' gože'ne':

—Cornelio.

<sup>4</sup> Nach Cornelion' chna'chgüe' lao anglen' na' do chžebe' gože'ne':

—¿Bixen' Xana'?

Nach gož anglen' le':

—Diosen' nezde' can' zo' choł güižo'ne' na' chnežjo' dan' cheseyažje bene' yaše', na' Diosen' chaclaže' gaclene' le'. <sup>5</sup> Da' nga gono' na'a, gwsela' bene' šjasexi'e to bene' zoa ciuda Jopen' bene' le Simón na' lecze le' Pedro. <sup>6</sup> Zoe' liž to bene' chonšagüe' yid. Bena' lecze le' Simón, na' liž ben' zoan cho'a nisdao'. Na' Simón Pedroa' ye'e le' bin' cheyała' gono'.

<sup>7</sup> Cate' beza' anglen' Cornelion' goxe' chope mos che' na' to soldadw bene' chaclen le', na' soldadoa' lecze chonxene' Diosen'. <sup>8</sup> Na' Cornelion' bzejni'ide' legaque' yogo'lołte can' goquen' nach gwsele' legaque' Jopen'. Na' gosegüe'e nez zja'aque'.

<sup>9</sup> Na' beteyo gala'ze ba zja'aque' za' yesežine' ciuda Jopen' cate' Pedroa' gwloe' yichjo'o che' yo'o gan' zoe'na' ca' do guagwbiž cont jel güiže' Diosen'. <sup>10-11</sup> Na' šlac choe'lene' Diosen' diža' gwdonchgüe', con goclaže' gagüe' cate. Na' šlac chac dan' gagüe'na', ble'edagüede' le'e yaban' chetj to lache' xen na' nchej tap squinen na' chetjen gan' zoe'na'. <sup>12</sup> Na' lo'enña' zjaže' yogo' cuen beyixe' že' yežlion', be žia tap ni'a na', na' be chososa' le'eban' lo' yo, na' len be žia xil be chaš le'e yaba. <sup>13</sup> Nach bende' gož Diosen' le':

—Gwyas Pedro na' betw be ca' gwdagw.

<sup>14</sup> Nach Pedroa' gože'ne':

—Bi gagua' legacba' Xana'. Ne tni'a bina' gagua' be zban zjanac ca', le cbi de lsens len ley cheto'na' gagwto' ben' zjanac ca'.

<sup>15</sup> Nach Diosen' gože' le' da' gwchope:

—Ben' bach gwnia' gago' bi nao' be zban zjanacba'.

<sup>16</sup> Da' gwyon ni'a gož Diosen' le' ca' nach la' begüete lachen' le'e yaban'.

<sup>17</sup> Šlac chacžejaže' Pedroa' bi zejen dan' ble'edagüeden', besežin bene' ca' gwsela' Cornelion' cho'a puert liž Simón ben' chonšagüe' yiden', le ba

goseṇabe' gan' zoa liže'na'. <sup>18</sup> Nach zižje goseṇabe' še le na' zoa to beṇe' lecze le Simón Pedro. <sup>19</sup> Na' Pedroa' ne' chone' xbab che dan' ble'edagüede', cate' gož Spiritw che Diosen' le':

—Simón, šone beṇe' chesyeyiljue' le'. <sup>20</sup> Gwzoža' na' beyetj cont šejleno' legaue', na' bi gaczejlažo' la'czla' bi zjanaque' beṇe' Israel, le neda' gwseła' legaue'.

<sup>21</sup> Nach Pedroa' beyetje' jašague' beṇe' ca' gwseła' Cornelion', nach gože' legaue':

—Nga zoa', nedan' Simón Pedro. ¿Bičen' cheyiljwle neda'?

<sup>22</sup> Nach gose' beṇe' ca' le':

—To xan soldadw beṇe' le Cornelio gwsele' neto'. Le' zejcz'e chone' da' güen na' chonxene' Diosen' na' yogo'lol beṇe' Israel ca' cheso'e xtize' ca beṇe' šagüe' naque'. To angl che Diosen' gože' le' yedenabe' šejo' liže'na' cont gwzenague' chio' še bin' yo'one'.

<sup>23</sup> Nach gwlo'o Pedroa' legaue' yo'o na' besyega'anlene' le' tže'. Nach beteyo Pedroa' gwyase' gwejlene' legaue' na' gwche'e to chope beṇe' Jopen' beṇe' chesejnilaže' Jesucriston'.

<sup>24</sup> Na' beteyo cate' besežine' ciuda Cesarean', Cornelion' bač nto be' biše' lježe' len xmiğüe' ba zjažie' liže'na' chesebeze' le'. <sup>25</sup> Na' cate' bžin Pedroa' liž Cornelion' la' bchojte Cornelion' bšague'ne' na' bzoa xibe' lagüe'na' benxene'ne'. <sup>26</sup> Na' Pedroa' bsože'e le', gože'ne':

—Bezoža'. Lecze beṇač neda'.

<sup>27</sup> Na' ne' choe'lente' le' dižan' ca' cate' gwyo'o Pedroa' lo' yo'on na' ble'ede' beṇe' zan ba že' lo yo'ona'. <sup>28</sup> Nach gože' legaue':

—Nezeczele ley che neto' beṇe' Israel žan bi cheyala' šo'to' liž beṇe' bi zjanaque' beṇe' Israel, na' žan bi cheyala' gonto' txen len le'e bi nacle beṇe' Israel. Perw bač bzejni'i Diosen' neda' ne to beṇe' cbi cheyala' gona' xbab che' naque' beṇe' zban par šo'a liže'na'. <sup>29</sup> Da'n'an' cate' bene' quinga bedesexi'e neda', bi goczejlaža' še nacle gona', san ba bida' do yichj do laža', na' na'a chaclaža' nezda' ¿bixčen' gwñio' neda'?

<sup>30</sup> Nach Cornelion' gože'ne':

—Na'a chac tap ža do cheda šone zoa' sin cbibi nagua', na' choj güiža' Diosen' liža' nga, cate'cze ble'eda' to beṇe' byo lagna'na' nyaze' to lache' da' chgo'oten be'ni'. <sup>31</sup> Nach gože' neda': “Cornelio, ca nac da' gwñabdo' Diosen', bač bzenague' čen, na' nezde' chnežjo' da' chyažj da' chchine' beṇe' yaše'. <sup>32</sup> Na' na'a gwseła' to chope beṇe' šjasexi'e to beṇe' zoa ciuda Jopen' beṇe' le Simón Pedro. Zoe' liž to beṇe' lecze le Simón, to beṇe' chonšagüe' yid. Liž ben' chonšagüe' yiden' zoan gała'ze cho'a nisdao'. Na' cate' la' Pedroa' ližo' nga nach güe'lene' le' diža'.” <sup>33</sup> Nach la' gwseła'tia' beṇe' ca' bedesexi'e le', na' choxclenteco' bač bido'. Na' nezce Diosen' yogo'to' nita'to' nga gwzenagto' yogo'lolte dan' ba ben Diosen' mandadw nao'.

### *Pedroa' be'e diža' liž Cornelion'*

<sup>34</sup> Nach Pedroa' gwzolagüe' be'e dižan' gwne':

—Da' li bač nezda' nono nla' beṇe' nacho nzoa Diosen' le' to šla'aze. <sup>35</sup> Gate'teze beṇe' nación con beṇe' chesonxen Diosen' do yichj do laže' na' chesone' da' güen, Diosen' chbede' legaue'. <sup>36</sup> Diosen' gwduxjue'ede' neto' beṇe' Israel guac soato' binlo len le' še šejnilaže'to' Xi'ine' Jesucriston' beṇe' naque' Xan yogo'lol beṇe'. <sup>37</sup> Nezele dan' ba goc doxen distritw Judean' dan' gwzoloa' distritw Galilean' gwde gwduxjue'e da' Juanna'



xtiža' Diosen' na' bzoe' bene' nis. <sup>38</sup> Nezele Diosen' gwleje' Jesúsen' ben' naque' bene' yež Nazaret cont chaclene' chio' beṇaḥ, na' be'ene' Spiritw che'na' na' yela' chnabia'. Na' gwda Jesúsen' bene' da' güen na' beyone' yogo'loḷ bene' ca' chsaca'zi' Satanás dan' chnabia' da' xigüe' ca', le Diosen' zoe' len le'. <sup>39</sup> Neto' nezeto' na' choe'to' diža' che yogo' da' güen da' ben Jesúsen' na' dan' bsed blo'ede' distritw Judean' na' ciuda Jerusalénna'. Na' choe'to' diža' can' gosote'ne' bosode'ene' to le'e yag cruz. <sup>40</sup> Perw na' Diosen' bechis bosbane'ne' ladjo bene' guat ca' beyon ža na' ben Diosen' cont Jesúsen' blo'elagüe' neto'. <sup>41</sup> Gague yogo'loḷ bene' besele'ede' Jesúsen' caten' bebane' ladjo bene' guat ca', perw Diosen' gwleje' neto' cont choe'to' xtiže'na' na' bene' cont ble'eto'ne'. Na' neto' güe'ej gwdagw-lento'ne' txen gwde bebane' ladjo bene' guat ca'. <sup>42</sup> Jesúsen' bene' mandadw chixjue'eto' beṇaḥen' Diosen' bzoe' le' gone' yela' justisen' len yogo' bene' zjamban na' len yogo' bene' ba gosat. <sup>43</sup> Na' da' ca' bosozoj yogo' bene' goso'e xtiža' Diosen' cani'te zjanyojen chesenan note'tez bene' yesejnilaže' Jesucriston', Diosen' yezi'xene' xtoḷa'gague'na'.

*Spiritw che Diosen' gwyo'on lo' yichjlaždao' baḷ bene' bi zjanaque' bene' Israel*

<sup>44</sup> Ne' cho'ete Pedroa' diža'na' cate' Spiritw che Diosen' gwyo'on lo' yichjlaždao' yogo' bene' ca' chosozenag diža' dan' cho'ena'. <sup>45</sup> Na' bene' Israel ben' chesejnilaže' Jesucriston', bene' ca' zja'ac len Pedroa' liž Cornelion', besyebande' dan' gwyo'o Spiritw che Diosen' lo' yichjlaždao' bene' ca' cbi zjanaque' bene' Israel. <sup>46</sup> Gosache'ede' gwyo'o Spiritw che Diosen' lo' yichjlaždao' bene' ca' že' liž Cornelion', le gosende' gosonxen bene' ca' Diosen' goso'e diža' da' bi gosejni'ide' na' lecze gosonxene' Diosen' len xtiža'gague'na'. <sup>47</sup> Nach Pedroa' gože' bene' Israel ca' nžaguen':  
—Bibi de da' gwžon yesezoa bene' quinga nisen', le nacbia' ba zoa Spiritw che Diosen' len legaque' can' zoan len chio'.

<sup>48</sup> Nach Pedroa' bene' mandadw gosezoe' nis da' chesejnilaže' Jesucriston'. Na' gosata'yoede' le' cont bega'ane' yeto chop ža.

## 11

*Pedroa' gože' bene' Jerusalén ca' can' goquen'*

<sup>1</sup> Na' postlw ca' na' yezica'chle bene' ca' že' distritw Judean' ben' chesejnilaže' Jesucriston' gosende' xtiža' bene' ca' bi zjanaque' bene' Israel lecze ba chosozenague' xtiža' Diosen'. <sup>2</sup> Nach Pedroa' beze'e gwyejche' ciuda Jerusalénna' gan' nita' bene' Israel ben' chesejnilaže' Jesucriston' na' legaque' gosenelagüe' che', <sup>3</sup> gose'ene':

—¿Bixchen' ba gwyejo' gan' že' bene' cbi zjanaque' bene' Israel na' jatagwleno' legaque'? Malen' ba beno'.

<sup>4</sup> Nach Pedroa' gwzologüe' be'lene' legaque' diža' tcho'a yogo' dan' goc che', gože' legaque':

<sup>5</sup> —Šlac zoa' ciuda Jopen' chol güiža' Diosen', ble'edagüeda' ca to lache' xen nchej dapte squin ca' chetjen le'e yaban' zan' gan' zoa'na'. <sup>6</sup> Na' gwṇa'yana' na' ble'eda' lo'enna' že' beyixe' ca' chaš yežlion' be žia tap ni'a na', na' ble'eda' be chososa' le'eban' lo yo, na' be žia xil be chaš le'e yaba, na' baḷ be ca' zjanacba' be znia. <sup>7</sup> Na' benda' gož Diosen' neda': "Gwyas Pedro, na' betw be ca' gwdagw." <sup>8</sup> Nach boži'an gwnia': "Xana', bi gagua' legacba'. Ne tni'aze biṇa' gagua' be zban zjanac ca', le

bi de l̄sens len ley cheto'na' gagwto' ben' zjanac ca.”<sup>9</sup> Na' da' gwchop ni'a Diosen' gwne': “Be baçh gwnia' gago' bi ñao' zjanacba' be zban.”<sup>10</sup> Šon̄ ni'a gože' neda' ca' nach begüe lachen' le'e yaban'.<sup>11</sup> Za' beyož ble'edagüeda' da'na' cate' besela'ac šone'bene' byo gan' zoa'na'bene' za'ac ciuda Cesarean' chesyeyiljue'nda'.<sup>12</sup> Na' Spiritw che Diosen' bzejni'in neda' cheyala' ša'alena' legaque' sin cbi gaczejlaža', na' gwchi'a bene' lježcho quinga xop, gwyejto' Cesarean' bžinto' liž ben' le Cornelio na' gwyo'oto' ližen'.<sup>13</sup> Nach Cornelion' be'lene' neto' diža' can' blo'elao to angl le' liže'na' na' anglen' gože'ne': “Gwseła' bene' šja'ac ciuda Jopen' šjasexi'e to bene' le Simón Pedro.<sup>14</sup> Bena' ye'e le' len bene' lo' yo'o chio' nac gonle cont gata' yela' mban chele toli tocañe.”<sup>15</sup> Nach cate' gwzolagua' bia' dižan' len bene' ca' že' liž Cornelion', Spiritw che Diosen' gwyo'on lo' yichjlažda'ogaque'na' can' gwyo'on lo' lažda'ochon' cana'.<sup>16</sup> Nach jaysa'laža' xtiža' Xancho Jesucriston' can' gwne': “Da' zaque' ben Juan da' bzoe' bene' nis, perw da' zaca'che' gac chele cate' yedesoa Spiritw che Diosen' lo' yichjlažda'olen' nabi'an le'e.”<sup>17</sup> Na' ba ben Diosen' cont zoa Spiritw che'na' lo' yichjlažda'ogaquen' dan' gosejnilaže' Xancho Jesucriston' can' ba bene' len chio' chejnilaže'chone', na' ¿nox naca' neda' gwžona' gon Diosen' dan' chaclaže' gone'?

<sup>18</sup> Na' ca' beyož bosozenague' xtiža' Pedroa' bich bi gosene' che Pedroa' dan' gwyeje' liž Cornelion', san goso'e yela' choxclen che Diosen', gosene':

—Na'a ba nezecho lecze len bene' ca' bi zjanaque' bene' Israel chazlaže' Diosen' yesyetinjde' xtola'gaque'na' cont gwnežjue' yela' mban chegaque' toli tocañ.

*Bene' ca' chesonxen Jesucriston' ciuda Antioquía gan' mbane Siria*

<sup>19</sup> Na' gwde gosot bene' Israel ca' Estebanna', gosezolagüe' bosochi bososaca'chgüe' yezica'chle bene' ca' chesejnilaže' Jesucriston', nach bene' ca' chesejnilaže'ne' gosasłase'. Bałe' ja'aque' do distritw Fenicia, na' yež ca' zjachi' to lo yežlio da' žia lo' nisaon' gan' nzi' Chipre na' do ciuda Antioquía ga mbane distritw Siria. Na' gan' zja'aque' bososed bosolo'ede' con bene' zjanac bene' Israel xtiža' Jesúsen', bi bososed bosolo'eden' bene' cbi zjanaque' bene' Israel.<sup>20</sup> Perw na' to chope bene' Chipre na' bene' ciuda Cirene lecze bosoxonje' ja'aque' ciuda Antioquían', na' gosezolagüe' goseyixjue'ede' diža' güen che Xancho Jesucriston' len bene' ca' cbi zjanaque' bene' Israel.<sup>21</sup> Na' Xancho' goclene' legaque' len yela' guac che'na' na' bene' zan gosebejyichje' da' ca' chesejnilaže' na' gosejnilaže' Xancho'.

<sup>22</sup> Na' cate' bene' ca' chesejnilaže' Jesucriston' ciuda Jerusalénna' gosende' can' ba chac ciuda Antioquían', nach bosose'e Bernabén' cont gwyeje' Antioquían'.<sup>23</sup> Na' cate' bžin Bernabén' Antioquían', ble'ede' da' li ba goclenchgua Diosen' bene' ca', na' bebechgüede'. Nach gwneyoede' legaque' nita'chache' yosozenague' che Xancho' do yichj do laže'.<sup>24</sup> Bernabén' naque' to bene' güen, na' chejnilaže'chgüe' Jesucriston' na' Spiritw che Diosen' zoachguan len le'. Na' zanch bene' Antioquían' gosejnilaže' Jesucriston'.

<sup>25</sup> Gwde na' Bernabén' gwze'e zeje' ciuda Tarson' jaydiljue' Saulon', nach cate' beželde' le', gwche'ene' Antioquían'.<sup>26</sup> Na' gosenite' Antioquían' tgüiz gosone' t xen len bene' Antioquía ca' chesedop chesežag chesonxene' Jesucriston' na' bososed bosolo'ede' bene' zan. Na' Antioquía na'tequen'

gwzolao bososi'e bene' ca' chesejnilaže' Jesucriston' bene' cristian da' chosozenague' che Criston'.

<sup>27</sup> Šlac nita' Bernabén' na' Saulon' lo ciuda Antioquían', besežin bal bene' Jerusalén ben' chosozende' bene' bi dan' ba gož Diosen' legaque'. <sup>28</sup> Na' cate' bene' ca' besežinna', toe' bene' le Agabo gwzeche' lao bene' ca' zjandop zjanžag chesonxen Jesucriston' be'e diža' can' ba bzejni'i Spiritw che Diosen' le', gwne' doxen yežlion' gata' to gwbin juisyw. Na' cate' bžin ža gwnabia' ben' le Claudio doxen gan' mbane nación Roman', cana' goc gwbinna' can' gwna Agabon'. <sup>29</sup> Nach bene' ca' chesedop chesežag chesonxene' Jesucriston' Antioquían' bosoxi'e yosotobe' mechw cont yeseselen' yesaclene' bene' lježgaquen' chesonxen Jesucriston' gan' mbane distritw Judean'. Na' bosoxi'e to toe' yosonežjue' gacate' da' gac yosonežjue'. <sup>30</sup> Na' gosone' can' bosoxi'ena' nach gosesele' Saulon' len Bernabén' distritw Judean' jasenežjue' mechon' bene' ca' chosogüia chesene'e bene' chesejnilaže' Jesucriston' ciuda Jerusalénna'.

## 12

### *Gosote' Jacobon' na' goseyixjue' Pedroa' ližya*

<sup>1</sup> Na' ca tiempa' rey Herodes bchi bsaque' bal bene' ca' chesonxene' Jesucriston'. <sup>2</sup> Nach bene' mandadw gosote' Jacobo bene' biše' Juanna' len spada. <sup>3</sup> Na' gocbe'e rey Herodesen' chesyebe bene' Israel ca' dan' bene' mandadw gosote' Jacobon', nach bene' mandadw gosezene' Pedroa' cate' gola' lni cate' chesagüe' yetextil dan' bibi levadura nchixen. <sup>4</sup> Nach Herodesen' gwdixjue'ene' ližya na' gwsele' šino'to soldadw bene' gosape' ližyan', tap güeje' do ža do yel. Herodesen' bene' xbab cueje'ne' ližyan' te lnin' cont gone' yela' justis che' lao bene' že' lo ciudan'. <sup>5</sup> Soldadw ca' gosapchgüe' Pedroa' šlac de' ližyan', perw na' ca nac bene' ca' chesejnilaže' Jesucriston', gosnabchgüede' Diosen' gaclene' Pedroa'.

### *Diosen' bebeje' Pedroa' ližyan'*

<sup>6</sup> Na' to že' ca gwxeze ngüia Herodesen' cueje' Pedroa' ližyan' cont gone' yela' justis che', Pedroa' de' chtase' ladjo chope soldadw na' ncheje' chope gden, na' lecze nita'te soldadw bene' chesape' cho'a puert ližyan'. <sup>7</sup> Cate'cze zejzenez to angl bene' gwseła' Xancho Diosen' bžine' lo' ližyan' gan' de Pedroa' na' gwyeni'chgua lo' ližyan'. Anglen' bte' cuit le'e Pedroa' bosbane'ne', gože'ne':

—Netec na'a gwyas.

Na' la' besyeyežte gdenna' zjanchej na' Pedroa'. <sup>8</sup> Nach gož anglen' le':

—Bego'o xpanto' na' bolej xelon'.

Nach ben Pedroa' ca'. Nach gož anglen' le':

—Bechele xadon chio' na' beyo'o len neda'.

<sup>9</sup> Nach bechoj Pedroa' zena'ogüe'ne' perw bi gocbe'ede' še da' li anglen' chon ca' len le', con gocde' še chle'edagüede'. <sup>10</sup> Beyož besyedie' chop cuen gan' nita' soldadw ca' chesape' ližyan', besyěžine' gan' zoa puert zaguanna' dan' nac de ya gan' chesechoje' cont chja'aque' la cay, con to gualazze puerten' byaljon cont besyechoje', na' cate' ba gosa'aque' late' nach anglen' boca'ane' Pedroa' toze'. <sup>11</sup> Cana'ch gocbe'e Pedroa' da' li ba bechoje' ližyan', nach gwne':

—Ba cheyache'eda' da' licze Xana' Diosen' ba gwsele' angl che'na' na' bosle' neda' lo' na' Herodesen' na' bosle' neda' lo' yogo' da' ca' chesaque bene' Israel gualaž chia' ca' yesonde' neda'.

<sup>12</sup> Na' ne' chonte Pedroa' xbaden' ca', gwze'e gwyeje' liž María xna' Juan ben' lecze le Marcos. Na' liž Marian' zjandop zjanžag bene' zan chosol güiže' Diosen'. <sup>13</sup> Nach bsiže' cho'a puert zaguanna' na' la' bchojte to bi' no'ole le Rode jana'be' non'. <sup>14</sup> Na' cate' bžimbe' cho'a puerten' beyombia'be' ši'i Pedroa', na' tantw bebebe' bi gwsaljwbe' puerten' san beyesbe' gan' že' bene' ca' jayežbe' legaque' ba bla' Pedroa'. <sup>15</sup> Nach gose'ebe':

—¿Gague chactonto'na'?

Perw lebe' nezczebe' le'na'. Nach legaque' gose'ebe' naquen bxin che'.

<sup>16</sup> Perw Pedroa' ne' chsižcze' cho'a puerten'. Nach ja'aque' gosesaljue'. Cate'cze besele'ede' le'na' besyebande'. <sup>17</sup> Nach Pedroa' bene' seřn len ne'e cont gosenite' šize bosozenague' be'e diža' can' goc bebej Xancho Diosen' le' ližyan'. Nach lecze gože' legaque' cheyala' yosozende' Jacobon' na' yezica'chle bene' lježgaque' can' ba goquen'. Nach beze'e zjayde' ga yoble.

<sup>18</sup> Nach cate' gwyeni', yela' güeban juisyw gwnita' soldadw ca' na' gosole' diža', gosene':

—¿Bixen' goc len Pedroa'?

<sup>19</sup> Nach rey Herodesen' bene' mandadw jasyediljue' Pedroa' na' gwñabde' soldadw gop ca' nac goquen' bele'. Perw soldadw ca' bibi rson bosonežjue'. Nach bene' mandadw gosote' soldadw ca'. Nach gwza' Herodesen' distritw Judean' jazoe' ciuda Cesarea.

### *Got rey Herodesen'*

<sup>20</sup> Ca horan' Herodesen' chža'achgüe' bene' ciuda Tiro na' bene' ciuda Sidón ca'. Perw na' bene' ca' beseyažjde' yesezi'e da' yese'ej yesagüe' gan' chnabia' rey Herodesen'. Da'na'na' bosocode' ljež bene' Tiro na' bene' Sidón ca' cont jasenežjue' mechw che ben' nac lo' ne'e gan' mbane Herodes, ben' le' Blasto. Gosone' ca' cont Blaston' gwne' chegaque' lao reyen', le gosaclaže' gwzenag reyen' chegaque' cate' šja'aque' lagüe'na' šjaseñabe' yesenite' binlo len le'. <sup>21</sup> Nach rey Herodesen' bžie' bia' to ža gwtobe' legaque' cont güe'e diža' laogaque'na'. Na' cate' bžin žan', reyen' gwyaz xalane' dan' nac xdan dan' chaze' cate' chone' yela' justis, nach gwchi'e xišne'e gan' chnabi'e na' be'e diža' lao bene' ca' že' žana'. <sup>22</sup> Nach bene' ca' bososye'e, gosene':

—Diosen' choe' diža', gague benachen'.

<sup>23</sup> Na' lo' hora' gwseła' Xancho Diosen' to angl ben' ben cont gocšene reyen' gwže'e bzoga' lo' le'e na' gote'. Goc che' ca' dan' be'e latje gosonxen bene' le' gualaz da' yesonxene' Diosen'.

<sup>24</sup> Perw ca' nac xtiža' Xancho Jesucriston' gos gwlałjchguan.

<sup>25</sup> Na' Bernabén' len Saulon' beyož gosone' yogo' da' cheyala' yesone' ciuda Jerusalénna', nach besyeya'aque' jaya'aque' ciuda Antioquían'. Na' goseche'e to bene' le Juan na' lecze lie' Marcos.

## 13

*Bernabén' na' Saulon' ja'aque' jasedixjue'ede' xtiža' Jesucriston' yež zito'*

<sup>1</sup> Na' len bene' ca' chesedop chesežag chesonxene' Jesucriston' ciuda Antioquían' zjančixe bene' cheseyixjue'ede' bene' yoble bi da' che' Diosen' legaue', na' zjalen bene' chosed chosolo'ede' xtiža' Diosen'. Na' legaue' zjalie' Bernabé, na' Simón ben' zjansi'e bene' gasj, na' Lucio bene' ciuda Cirene, na' Saulo, na' Manaén. Na' Manaénna' bgole' t xen len rey Herodes ben' gwnabia' distritw Galilea. <sup>2</sup> Na' to ža bene' ca' chesejnilaže' Jesucriston' gosone' gwbas zjandop zjanžague' chesonxene'ne' cate'cze gož Spiritw che Diosen' legaue':

—Le cuej Bernabén' len Saulon' cont yesone' xšina' con gate'teze seļa' legaue'. <sup>3</sup> Nach bene' ca' bosol güižche' Diosen' sin cbi zjane'ej zjanagüe', nach gosexoa na'gaue' yichj Saulon' len yichj Bernabén', gosone' ca' cont gosegüe'e xšin Diosen' lo na'gaue'. Gwdena' bosose'e legaue'.

### *Postlw ca' goso'e xtiža' Jesucriston' Chipre*

<sup>4</sup> Nach Spiritw che Diosen' gwselan' Bernabén' len Saulon' yež gan' nzi' Seleucia. Na' Seleuciana' goso'e lo' barcon' cont besežine' Chipre. Na' Chipren' naquen to yežlio dao' dan' chi' lo' nesdaon'. <sup>5</sup> Besežine' yež dan' nzi' Salamina gan' mbane Chipren' na' gosezologüe' goseyixjue'ede' xtiža' Diosen' lo' yodao' che bene' Israel ca'. Na' zjanche'e Juan ben' lece le Marcos cont chaclene' legaue'. <sup>6</sup> Na' ca' gosaše' gosedie' doxen Chipren' besežine' yež gan' nzi' Pafos. Na' Pafosna' besežague' to bene' guaža' le Barjesús. Naque' bene' Israel na' chxoayague' že' chzende' bi dan' che' Diosen' le'. <sup>7</sup> Barjesúsen' naque' xmigw gobernador ben' le Sergio Paulo. Sergio Paulon' naque' to bene' chejni'ichgüe'. Na' le' goxe' Bernabén' na' Saulon', le goclaže' yosozende' le' xtiža' Diosen'. <sup>8</sup> Na' Barjesúsen' lece bososi'ene' Elimas, diža' griego zejen bene' guaža'. Le' goclaže' bi šejle' Sergio Paulo xtiža' Diosen' dan' choe' Bernabén' na' Saulon'. <sup>9</sup> Na' Spiritw che Diosen' zoachguan len Saulon' ben' lece le Pablo, nach bcos lagüen' gwna'chgüe' Elimasen'. <sup>10</sup> Nach gože'ne':

—Naco' xi'iq Satanás dan' chnabia' da' xigüe' ca', yela' güexoayag chio' na' yela' bene' mal chio'. Bi chazlažo' bite'teze da' güen. ¿Bichen' cbi chbezo' chžono' yosozenag bene' diža' li che Xanto' Diosen'? <sup>11</sup> Da'nana' Xanto' Diosen' gone' castigw chio' na' choło' to tiemp, bi gac le'edo' gwbiža'.

Nach la' gwchołtie', gwde ca to bejw lo yejlagüe'na', nach gwzologüe' chgan chtobe' cheyiljue' no goxe' ne'e cont cue' nez. <sup>12</sup> Gobernadores' ble'ede' can' goquen' na' gwyejle'e xtiža' Xancho Jesucriston', na' bebanchgüede' can' ža dižan'.

### *Pablon' na' Bernabén' ja'aque' Antioquian' gan' mbane distritw Pisidia*

<sup>13</sup> Nach Pablon' len bene' ca' nžague'na' gosa'aque' yež Pafosen', goso'e lo' barcon' cont besežine' yež gan' nzi' Perge gan' mbane distritw Panfilia. Na' Juan ben' lece chese'e Marcos gwlejyichje' legaue' beyeje' Jerusalénna'. <sup>14</sup> Na' Pablon' len Bernabén' gosa'aque' yež Perge na' besežine' ciuda Antioquían' gan' mbane distritw Pisidia. Na' cate' bžin ža che Dios nach ja'aque' yodao' che bene' Israel ca' dan' zoa na' na' jasechi'e. <sup>15</sup> Na' ca beyož blab to bene' libr gan' nyoj ley che Diosen' len dan' bosozoj bene' ca' goso'e xtiža' Diosen' cani', bene' ca' chesenabia' lo yodao'na' gosesele' to bene' gan' chi' Pablon' len Bernabén' na' gože' legaue':

—Beñe' migw, še de bi diža' da' chaclaže'le güe'le ñeyoele beñe' quinga, guac ñalen ña'a.

<sup>16</sup> Nach Pablon' gwzchede' bene' señw len ne'ena' cont yosozenag beñe' ca' zjachi'na', na' gože' legaque':

—Le gwzenag le'e beñe' Israel na' nochle chonxenle Diosen'. <sup>17</sup> Dios ben' chonxen chio' beñe' Israel gwleje' da' xozxta'ocho ca' na' golenen' legaque' cont yesaque' to yež xen šlac gosenite' nación Egipto gan' gosaque' beñe' zito'. Nach Diosen' bebeje' legaque' Egipton' len yela' guac chen'. <sup>18</sup> Na' Diosen' gwdape' yela' chxenlaže' čhoa iz len da' xozxta'ocho ca' šlac gosaše' latje dašen'. <sup>19</sup> Diosen' bonite' gaž yež da' zjachi' gan' nzi' Canaán cont bnežjue' da' xozxta'ocho ca' yežlio čhegaquen'. <sup>20</sup> Nach gwde na' Diosen' gwleje' tgüje tgüje juez cont gosenabi'e nación Israelen' lao tap gayoa yogašje iz bžinte tiemp čhe da' Samuel ben' be'e xtiža' Diosen' cani'. <sup>21</sup> Nach tiemp čhe da' Samuelen' da' xozxta'ocho ca' gosenabde' Diosen' gone' to rey beñe' ñabi'e legaque'. Na' Diosen' bnežjue' legaque' rey Saúl na' gwnabi'e legaque' čhoa iz. Saúl nan' goque' xi'in ben' le' Cis, na' goque' diaža čhe da' ben' le Benjamín ben' gwzoa cani'te. <sup>22</sup> Nach bžin ža Diosen' beque'e yela' gwnabia' čhe Saúlen' na' bzoe' ben' le David cont gwnabi'e. Na' gwne' čhe rey Davin': "Chbeda' David xi'in Isai nga, le chaclaže' chone' can' chazlažan' na' chzenague' bite'tez da' čhapan'e'." <sup>23</sup> Nach ña'a Diosen' ba gwsele' yeto beñe' golje' lo diaža čhe da' rey Davin', ben' le Jesús. Ba gwsele' le' cont gone' chio' beñe' Israel yela' mban toli tocañe can' gwne' cani'. <sup>24</sup> Na' cate' biña' solao Jesúsben' gwsed gwlo'ede' beñe', da' Juanna' gwdixjue'ede' len yogo' beñe' Israel gualaž čhechon' cheyala' yesyetinjde' xtoła'gaque' na' yesezoe' nis. <sup>25</sup> Na' cate' beyož ben Juanna' dan' yo'o lo ne'e gone', nach gože' beñe' ca' chosozenag čhe': "¿Chonle xbab naca' neda' ben' chbezle sela' Diosen'? Bi naca' bena'. Za' yid bena', na' da' nacchgüe' beñe' zaca', bi zaca' gona' mandadw čhe' lechja' no xele'."

<sup>26</sup> Beñe' migw, chio' naccho xi'in diaža čhe da' xozxta'ocho Abraham, na' nochle le'e chonxenle Diosen' txen len neto' beñe' Israel, xtiža' Diosen' dan' žan gone' chio' yela' mban toli tocañe naquen par chio'. <sup>27</sup> Beñe' ciuda Jerusalén ca' len beñe' gwnabia' čhegaque' ca' bi gosejli'e gwseła' Diosen' Jesúsben', na' bi gosejni'ide' da' ca' zjanyoj čhe' le'e libr dan' bosozoj beñe' ca' goso'e xtiža' Diosen' cani' la'czla' chosolaben' lo' yodaon' yogo' ža čhe Dios. Na' dan' bi gosejni'ide', da'nan' gosechoglagüen' yesote' Jesúsben', nach goc can' nyoj čhe'. <sup>28</sup> Na' la'czla' gosenezde' bibi da' mal non Jesúsben' cont yesote' le', gosenabde' Pilaton' gone' mandadw yesot soldadw čhe' ca' le'. <sup>29</sup> Na' goc čhe Jesúsben' yogo' dan' nyoj čhe' le'e Xtiža' Dios dan' bosozoj beñe' ca' gosenita' cani'. Na' beyož gote'na' nach besežin beñe' besyeletje' cuerp čhe'na' le'e yag cruzen' na' bosocuaše'ne'. <sup>30</sup> Na' gwdena' Diosen' bečhis bosbane' le' ladjo beñe' guata'. <sup>31</sup> Na' beñe' ca' zjanaque' Jesúsben' txen cate' gwze'e distritw Galilea cont gwyeje' ciuda Jerusalén, legaque' besele'ede' Jesúsben' yezan ža gwde bebane' ladjo beñe' guata', na' legaque' cheso'e diža' čhen' len yezica'chle beñe' Israel.

<sup>32</sup> Na' lencze neto' chyixjue'eto' le'e diža' güen cont nezele ba chac da' güen dan' gož Diosen' da' xozxta'ocho ca' cani'. <sup>33</sup> Ba benen' len chio' naccho xi'in diaža čhe da' beñe' ca', dan' bosbane' Jesúsben' ladjo beñe' guaten'. Na' goc can' nyojen čhe' le'e libr dan' nzi' Salmos, na' salmo gwchopen' žan: "Le' naco' xi'ina'; ña'aža ba blo'a zoaczo'." <sup>34</sup> Na' Diosen'

lecze bene' cont nyojen ga yoble che' dan' bosbane' le' ladjo bene' guaten' na' gwbat gožo' cuerp chen', žan: "Gona' güen len le' dołol can' goša' rey Davin'." <sup>35</sup> Na' nyoj yeto salmo žan: "Bi go'o latje gožo' cuerp čian' neda' naca' ben' chacchgüedo' na' ben' chon xšinon'." <sup>36</sup> Nezecho da' rey Davin' gwnabi'e bene' Israel ca' gwnita' ca tiemp čen' can' gwnalaže' Diosen' na' beyožen' gote' na' bgaše' len yezica'chle da' xozxta'ocho ca' na' lecze gožo' cuerp čen'. <sup>37</sup> Perw na' Diosen' bosbane' Jesúsen' ben' nyoj Xtižen' žan ca', na' bi gožo' cuerp čen'. <sup>38</sup> Na' cheyala' nezele bene' migw, Jesúsen' ben' choa' diža' che', chezi'xene' xtoła' note'tez bene' chejnilaže'ne'. <sup>39</sup> Bi beyaccho bene' güen len Diosen' da' bi benyane'cho can' ža ley dan' bzoj da' Moisésen', perw note'tezcho chejnilaže'cho Jesúsen', len' ba cheyone' chio' bene' güen. <sup>40</sup> Le gwsaca' cont bi gac chele can' bosozoj bene' ca' goso'e xtiža' Diosen' cani', žan:

<sup>41</sup> Cheyala' gonle xbab, le'e chnelaole chia', na' cheyala' yebanele, le gwžin ža cuiayi'le.

Neda' Dios gona' to da' yebanele šlac mbanle,  
to da' bi šejle' le la'czla' še no čixjue'e le'e can' gaca'.

<sup>42</sup> Beyož bzejni'i Pablon' bene' ca' že'na' nach besyechoje' lo' yodaon'. Nach bene' ca' ba goson cuine' bene' Israel gosata'yoede' Pablon' len Bernabén' yeside' ža che Dios xmanña' yeto cont yosozejni'ide' legaue' yelate' che da' ca' ba bosozejni'ide'. <sup>43</sup> Nach bene' zan bene' Israel len zan bene' ca' ba goson cuingaque' bene' Israel zja'aclene' Pablon' len Bernabén'. Nach Pablon' na' Bernabén' goseneyoede' legaue' cont nita'che' yesejnilaže'che' Diosen' ben' chaclen legaue'.

<sup>44</sup> Na' cate' bežag xmanña' ža che Dios yogo'lolcze bene' lo' ciudan' besežag cont bosozenague' xtiža' Diosen'. <sup>45</sup> Na' gwnita' bene' Israel bene' bi gosejle' che Jesúsen', na' cate' besele'ede' ba nac bene' zan chosozenague' che Pablon' na' gosacxi'ede' le' na' gosenelagüe' che' na' gosezi'diže' le'. <sup>46</sup> Perw na' Pablon' len Bernabén' bi besežebe' san gose'e bene' ca' že'na':

—Ba bento' can' gwnalaže' Diosen' na' zgua'tec bzejni'ito' le'e nacle bene' Israel gualaž četo'. Na' na'a dan' bi chaclaže'le gwzenagle, chonle cont bi gon Diosen' le'e yela' mban toli tocañe. Da'nan' na'a gwzejni'ito' bene' ca' bi zjanac bene' Israel. <sup>47</sup> Gonto' ca' neče Xanto' Diosen' bač bene' mandadw gonton', le nyojen žan:

Bač nzoa' le'e cont co'ole be'ni' čian' lo' yichjlaždao' bene' ca' bi zjanac bene' Israel,  
cont bene' ca' že' doxen yežlion' yesacbe'ede' guac nitlao xtoła'gaue'.

<sup>48</sup> Na' bene' ca' bi zjanac bene' Israel chesebede' beyož gosende' can' gwna Pablon', na' gosene' güenchgua nac xtiža' Diosen'. Na' yogo' bene' ca' ba gwlej Diosen' cont gata' yela' mban čhegaue' toli tocañe, legaue' gosejle'e xtiža' Diosen' dan' be' Pablon' len Bernabén'. <sup>49</sup> Can' goc bene' ca' že' doxen distritwna' gosende' xtiža' Xancho Jesucriston'. <sup>50</sup> Perw bal bene' Israelen' goso'e diža' len no'ol blao ca' gosonxen Diosen' na' len bene' gwnabia' blao ca' lo' ciudan', na' bosoš'e'e xbab čhegaquen' cont gwzolao gosone' contr Pablon' len Bernabén' na' bich goso'e latje yesenite' doxen distriton'. <sup>51</sup> Nach Pablon' len Bernabén' cate' besyeya'aque' ciuda Antioquían' gosebibe ni'agaue' cont bežib yo bište dan' žianña'. Gosone' ca' cont bosolo'ede' bene' ca' chesyebej legaue' malen' chesone' chosolague' legaue'. Nach jaya'aque' yež Iconio. <sup>52</sup> Na' mbalazchgua

gwnita' beṇe' ca' chesonxen Jesucriston' ciuda Antioquían', na' Spiritw  
 che Diosen' gwzoachguan len legaque'.

## 14

### *Pablon' len Bernabén' besežine' yež Iconio*

<sup>1</sup> Na' goquen' Pablon' len Bernabén' besežine' yež Iconion' na' ja'aque' yodao' che beṇe' Israel. Na' cate' goso'e xtiža' Jesucriston', beṇe' zan beṇe' Israel ca' na' len zan beṇe' cbi zjanac beṇe' Israel gosejle'e che'.  
<sup>2</sup> Perw na' gwnita' beṇe' Israel ca' beṇe' bi gosejle'e che Jesucriston', na' legaque' gosenelagüe' che beṇe' ca' chesejnilaže' Jesucriston' na' gosone' cont beṇe' ca' bi zjanac beṇe' Israel gosezolagüe' besegue'ede' Pablon' len Bernabén'.  
<sup>3</sup> Perw na' Pablon' len Bernabén' besyega'ane' sša Iconion' cheso'e xtiža' Xancho Jesucriston' sin cbi besežebe'. Na' Xancho' blo'e le diža' lin' cheso'e chesene' Diosen' chacde' beṇachen', le be'e legaque' yela' guac cont gosone' da' zaca' yebanecho cont gosaclene' beṇe'.  
<sup>4</sup> Na' beṇe' ca' že' lo yežen' gosaque' chople, bale' gosede'e beṇe' Israel ca' ben' bi gosejnilaže' Jesucriston' na' yebale' gosede'e Pablon' len Bernabén'.  
<sup>5</sup> Nach beṇe' Israel ca' gosone' yela' güexi'a len beṇe' ca' cbi zjanac beṇe' Israel na' len justis chegaque' cont yesone' contr Pablon' len Bernabén' na' yosochele' legaque' yej.  
<sup>6</sup> Perw cate' gwṇeze Pablon' len Bernabén' dan' chesaclaže' yesone' len legaque', bosyoxonje' jaya'aque' yež Lистра na' yež Derbe na' yezica'chle yež ca' zjachi' distritw dan' nzi' Licaonia.  
<sup>7</sup> Na' lecz goseyixjue'ede' xtiža' Xancho Jesucriston' len beṇe' ca' že' na'.

### *Bosožie' Pablon' yej šlac zoe' Listran'*

<sup>8</sup> Na' yež Listran' besežague' to beṇe' golje' nxiñj ni'e ca', cate' gocte' bidao' bi goc se'e.  
<sup>9</sup> Con chi'teze' chzenague' choe' Pablon' dižan'. Nach Pablon' gwṇe'e le' na' gocbe'ede' bena' chejle'e Diosen' nape' yela' guac cont yeyone' ni'en'.  
<sup>10</sup> Nach Pablon' bol güiže'ne' gože' le' zižje:

—Gwzoža'.

Na' la' gwzoža'te' na' gwzolao chde'.  
<sup>11</sup> Na' že' beṇe' zan chesene'e can' goquen' na' legaque' bososye'e gosene' diža' Licaonia:

—Xancho beṇe' ca' chejnilaže'cho ba gosetje' nga chesone' yela' guac, na' chle'etecho legaque' ca beṇach.

<sup>12</sup> Gosene' Bernabén' naque' xangaque' ben' zjansi'e Júpiter, na' Pablon' naque' xangaque' ben' zjansi'e Mercurio. Gosene' ca' le Pablon' choe'che' dižan'.  
<sup>13</sup> Na' yodao' gan' chesonxene' xangaque' Júpiteren' zoan cho'a yež. Na' bꝑoz che Júpiteren' jaxi'e goṇ be ba zjanone' xdan zjanžie' legacba' corona yej. Nach bꝑoza' gwꝑhe'e beṇe' zan cho'a yežen' gan' zoa puert che ze'e dan' nyečhj yežen' na' goclaže' yesote' goṇen' yesonxene' postlw ca'.  
<sup>14</sup> Na' Pablon' len Bernabén' cate' gosacbe'ede' can' yeson beṇe' ca', gosečeza' xagaque' dan' bi gosaclaže' yesonxen beṇe' ca' legaque'. Nach gosedie' gachol beṇe' ca' gose'e legaque' zižje:

<sup>15</sup> —Beṇe', žbixchen' chonle ca'? Lecz beṇach neto'. Za'to' cont chyixjue'eto' le'e cheyala' gwša' yichjlažda'olen' na' cuejyichjle costumbr quinga dan' bibi zaca' na' gonxenle Dios ben' zoa toli tocane. Le' bene' yaban', yežlion', nisdaon', beṇach, be ca' chesaš na' bite'tezechle da' chle'echo le'e yaban', lo yežlion' na' lo' nis.  
<sup>16</sup> Cani' Diosen' bi bžone' gon beṇachen' bite'tez da' mal da' žan yesone'.  
<sup>17</sup> Perw zoacze' chone' da' güen len yog'o' beṇach cont yesenezde' zoe' naque' Dios. Chone' cont chac



yejw cont chac dan' chazcho na' chata' da' che'ej chagwcho cont zoacho mbalaz.

<sup>18</sup> Na' la'czla' Pablon' len Bernabén' gosene' yogo' da' ca', cane gosezoede' bosožone' yesot bene' Lистра ca' go'ṇna' yesonxene' legaque'.

<sup>19</sup> Nach besežin bał bene' Israel bene' nita' yež Iconio na' ciuda Antioquía dan' chi' distritw Pisidian', na' bene' ca' gosego'oyele' bene' Lистра ca' cont gosaque'ne' txen bosochele' Pablon' yej. Na' cate' gosone' xbab bačh gote' nach gosexobe' le' cho'a yeža' na' bosyocua'aṇe' le' na'. <sup>20</sup> Perw na' bene' ca' chesonxene' Jesucriston' besedobe' gan' de Pablon', nach Pablon' beyase' beyeje' lo ciudan' da' yoble. Nach beteyo beza' Pablon' len Bernabén' jaya'aque' yež Derben'.

<sup>21</sup> Nach cate' besežine' Derben' bosozende' bene' ca' že' na' diža' güen che Jesucriston', na' bene' zan gosone' txen len legaque' gosejle'e che Jesucriston'. Na' gwdena' gosa'aque' ja'aque' da' yoble Listran' na' Iconion' na' Antioquían'. <sup>22</sup> Na' to to yež gan' ja'aque' gosone' čhačh laže' bene' ca' chesonxene' Jesucriston' na' gose'e legaque' yesenite' yesonxene' le' do yichj do laže', na' gose'e legaque' da' zan da' gac da' saca'zi'cho šlac chbezcho yeyejcho yaban' gan' zoa Diosen' chnabi'e. <sup>23</sup> Na' to to yež ga besyedie' gosebeje' bene' yosogüia yesene'e yezica'chle bene' ca' chesonxene' Jesucriston'. Na' Pablon' len Bernabén', cate' za' yesa'aque' to to yež, gosone' gwbas na' bosol güiže' Diosen' gosenabe' gaclen Xancho Jesucriston' bene' ca' ba chesejnilaže' le'.

*Pablon' len Bernabén' jaya'aque' Antioquía gan' mbane distritw Siria*

<sup>24</sup> Cate' gosa'aque'na' Pablon' len Bernabén' besyedie' distritw Pisidia na' besežine' distritw Panfilian'. <sup>25</sup> Na' goseyixjue'ede' xtiža' Jesucriston' yež Perge na' beyožen' jaya'aque' yež Atalia. <sup>26</sup> Nach Atalian' besyeyo'e lo' barcw jaya'aque' ciuda Antioquían' gan' mbane distritw Sirian'. Le bene' Antioquíanan' gosesele' Pablon' na' Bernabén' cana'te na' gosenabde' Diosen' šejlene' legaque' na' gaclene' legaque' cont yosozejni'ide' bene' xtiže'na'. Na' ṇa'a besyežine' ba beyož gosone' dan' gosego'o bene' ca' lo na'gaque' yesone'. <sup>27</sup> Na' bosyotobe' bene' ca' chesonxene' Jesucriston' na' gose'ene' yogo'lol can' ben Diosen' len legaque' šlac zja'aque', can' goclene' legaque' cont zan bene' bi zjanac bene' Israel ba gwzolao chesejnilaže' Jesucriston'. <sup>28</sup> Na' besyega'aṇe' Antioquían' sša len bene' ca' chesonxene' Jesucriston'.

## 15

*Gosone' yela' güexi'a len bene' ca' že' ciuda Jerusalénna'*

<sup>1</sup> Na' šlac Pablon' len Bernabén' ṇe' nite' ciuda Antioquían' besežin to čhope bene' za'ac distritw Judean' na' gosezolagüe' bosozejni'ide' bene' ca' chesonxen Jesucriston' na'. Gose'ene' yogo'lol bene' byo cheyała' yesezoe' señw dan' že' circuncisión can' ža ley dan' bzoj da' Moisésen' cont gata' yela' mban čhegaque' toli tocaṇe. <sup>2</sup> Na' Pablon' len Bernabén' gosacyože' len bene' ca' za'ac distritw Judea dan' chosozejni'ide' ca'. Nach bene' ca' chesonxene' Jesucriston' Antioquían' gosečhoglagüen' šja'ac to čhope' Jerusalén len Pablon' na' Bernabén'. Šja'aque' šjasene'e postlw ca' že'na' na' len bene' ca' chosogüia chesene'e lježgaquen' cont yesone' yela' güexi'a len legaque' che dan' chosozejni'i bene' ca' za'ac distritw Judean'.

<sup>3</sup> Nach bene' ca' chesedop chesežag chesonxene' Jesucriston' Antioquían' goseselē' legaque' Jerusalénna'. Na' bene' ca' zja'aquen' gosediē' distritw Fenicia na' distritw Samaria. Na' yež ca' gan' že' bene' chesonxene' Jesucriston', bene' ca' zja'aquen' gose'e legaque' zan bene' bi zjanac bene' Israel ba gosebejyichje' da' ca' gosejnilaže' do cana' cont chesejnilaže' Diosen'. Nach bene' ca' že' distritw Fenicia na' distritw Samaria besye-bechgüede' gosende' dižan'.

<sup>4</sup> Na' cate' Pablon' len Bernabén' besežine' Jerusalénna', bene' ca' chesedop chesežag chesonxene' Jesucriston', na' postlw ca' na' len bene' ca' chosogüia chesena' lježgaquen' besežague' bosoguape' legaque' tiox. Nach Pablon' len Bernabén' gose'e legaque' yogo'lol can' ba goclen Diosen' legaque'. <sup>5</sup> Nach nita' to čhope bene' Fariseo bene' ba chesonxene' Xancho Jesucriston', na' tgüeje tgüeje' gosezie' gosene':

—Note'tez bene' byo gonxene' Jesucriston' cheyała' soe' señw dan' nzi circuncisión na' cheyała' gone' can' ža ley dan' bzoj da' Moisésen'.

<sup>6</sup> Nach besedobe postlw ca' len bene' ca' chosogüia chesena' lježgaque', na' bosoxi'e še naquen can' chesena bene' ca'. <sup>7</sup> Ba chac sša cheso'e dižan' cate' gwzoža' Pedron' gože' legaque':

—Bene' migw, nezele ba goc zan iz Diosen' gwleje' neda' jatixjue'eda' diža' güen che Jesucriston' len bene' ca' bi zjanac bene' Israel cont gosejle'e che'. <sup>8</sup> Na' Diosen' nombi'e yichjlaždao' yogo'lol bene', na' cont nezecho chacde' bene' ca' bi zjanac bene' Israel can' chacde' chio' naccho bene' Israel, nacha' gwsele' Spiritw čhen' gwyo'on lo' yichjlaždao' bene' ca' can' ba gwyo'on lo' yichjlažda'ochon'. <sup>9</sup> Toz ca' chon Diosen' len chio' na' len legaque', note'tezcho ba beya' beyibe' lažda'ochon' dan' chejle'cho che Jesucriston'. <sup>10</sup> Ba chonle contr Diosen' dan' chaquele gwčhile bene' ca' bi zjanac bene' Israel cont yesa'ogüe' costumbr che chio' bene' Israel. Nezele catec zdebe zjanaquen, ne chio' ne xozxta'ocho ca' bi goc yesone' yogo' can' ža diža' gol čheto' ca'. <sup>11</sup> Bi cheyała' goncho ca', le nezecho note'tez naccho, Xancho Jesúsēn' chone' yela' mban checho toli tocanē dan' chacde' chio', gague neče dan' choncho can' ža ley che Moisés.

<sup>12</sup> Beyož gwna Pedroa' ca' nach bich bi gosena bene' ca', san yogüe' gosenite' šize bosozenague' xtiža' Pablon' len Bernabén'. Goso'e diža' can' bnežjo Diosen' legaque' yela' guac cont gosone' da' zaca' yebanecho gan' že' bene' ca' bi zjanac bene' Israel. <sup>13</sup> Na' beyož goso'e dižan' nach postlw Jacobo be'e dižan', gwne':

—Bene' migw, le gwzenag diža' nga gua'a. <sup>14</sup> Simón Pedro nga ba bzejni'ide' chio' can' ben Diosen' da' nechw len bene' bi zjanac bene' Israel cont blo'e chacde' legaque', ba gwleje' bale' cont zjanaque' lo' ne'e. <sup>15</sup> Na' dan' goc ca' chotilen da' ca' bosozoj bene' goso'e xtiža' Diosen' cani', le nyojen žan:

<sup>16</sup> Tena' yida' da' yoble na' gona' cont nabia' xi'in diaža che da' rey David, la'czla' na'a nono xi'in diaža che' chnabia', na' gona' cont soa toe' da' yoble nabi'e.

<sup>17</sup> Gona' ca' cont yogo' bene' bi zjanac bene' Israel guac yeseyiljue' nac yesone' yesenite' binlo len neda'.

Note'tez bene' nación guac yosol güiže' neda'.

<sup>18</sup> Can' gwna Xancho Diosen' cani'te, bene' cont gosenēze bene' can' gaquen'.

19 'Na' lagüe nyoj Xtižen' žan ca', chacda' neda' bi cheyała' gonecho zed bene' ca' bi zjanac bene' Israel bene' ba chesebejyichje' costumbr gole chegaque' na' chesonxene' Diosen'. 20 Con gwzójcho ye'gacchone' bi yesone' txen len bi dan' cheson bene' dan' chesene' naquen che l gua'a lšaca' dan' chesonxene', neca yesata'lene' no no'ol cbi nac no'ol chegaque' o bene' byo cbi nac bene' chegaque', neca yesagüe' be chesote' chosošoque' do lba'ba', neca yesagüe' chen che beyixe'. 21 Nabcho bi yesone' da' ca', le cani'te nita' bene' to to yež chosozejni'ide' ley chechon' dan' bzoj da' Moisésen' dan' žan bi goncho da' ca', na' chosolabe' leyna' yogo' ža che Dios.

22 Nach postlw ca' len bene' chosogüia chesene'e yezica'chle bene' chesonxene' Jesucriston', na' len bene' chesedop chesežag, gosazlaže' can' gwna Jacobon', na' bosoxi'e choj chope bene' lježe' šja'aque' ciuda Antioquían' txen len Pablon' na' Bernabén'. Na' gosebeje' Judas ben' lecze gože'ne' Barsabás, na' Silas, ben' zjanac bene' blao len legaque'. 23 Na' bosozoje' to cart da' gosoxe' bene' ca' žan:

“Neto' postlw, len bene' chosogüia chesene'e yezica'chle bene' chesonxene' Jesucriston', na' len yogo' bene' chesedop chesežag len neto', chguapto' le'e tiox le'e zoale Antioquían' na' distritw Siria na' distritw Cilicia. Bi nacle bene' Israel perw ba nac lježcho chonxencho Jesucriston'. 24 Ba nezeto' to chope bene' besechoj nga ja'aque' gan' zoalen' gosone' šejlaže'le len dan' bosozejni'ide', na' chacle tole dan' chesene' cheyała' soale señw dan' že' circuncisión na' cheyała' gonle yogo' bichle dan' ža ley dan' bzoj da' Moisésen'. Bi nezeto' gosa'aque' na' gague mandadw che neto' gose'e le'e ca'. 25 Da'n'an' gwzoato' txen bento' yela' güexi'a gwlejšto' chope bene' quinga chšela'to' gan' zoalen', txen len postlw Pablon' na' len Bernabén', bene' ca' chaquechgüeto'. 26 Nezeto' Pablon' len Bernabén' zan las ba ša' yesate' dan' cheso'e xtiža' Xancho Jesucriston'. 27 Na' chšela'to' Judasen' len Silasen' cont yosozejni'ide' le'e diža' cho'a yogo' dan' bzojto' le'e cart nga. 28 Chazlaže'to' can' bzejni'i Spiritw che Diosen' neto', na' da'n'an' bi gonto' mandadw bichle da' zdebe gonle san da' quinga chaqueto' chonen byen cbi gonlen. 29 Bi gagwle yela' guagw dan' ba bosozie' lo l gua'a lšacan' chesonxenen', na' bi gagwle be ca' chesote' chosošoque' do lba'ba', bi gagwle chen che beyixe', na' bi gata'lenle no'ol cbi nac no'ol chele o bene' byo ben' cbi nac bene' chele. Na' še gwzenagle che da' quinga ba gwnato' bi gonle, güenna' chonle še ca'. Da' na'ze chzójto' le'e cart nga. Diosen' gaclenšque' le'e.”

30 Can' goquen' bene' ca' chesonxene' Jesucriston' Jerusalénna' gesele' bene' ca' chope len Pablon' na' len Bernabén' gosa'aque' zja'aque' ciuda Antioquían'. Na' cate' besežine' Antioquían' bosotobe' bene' ca' chesonxene' Jesucriston' na' bosonežjue' legaque' carten' gosesela' bene' Jerusalén ca'. 31 Na' cate' bene' Antioquía ca' bosolaben' besyebede' ca' consejon' nyoj le'e carta'. 32 Na' Judasen' len Silasen' lecze gosaque' bosozende' bene' bin' ba gwna Diosen'. Nach gosoe'lene' bene' Antioquía ca' diža' zan gosone' chač laže'gaque' na' gosaclene' legaque' cont gosonxenche' Jesucriston'. 33 Gosenite' Antioquían' zan ža, nach cate' bžin ža šjaya'aque', bene' Antioquía ca' gose'e legaque': “Nayežagcho”, na' lecze gose'e legaque' yesyežine' Jerusalénna' to šagüe' to güen. 34 Na' Silasen' bechoglaže' yega'ane' Antioquían'. 35 Na' Pablon' len Bernabén'

gosenita'cze' Antioquían' na' txen len yezan bene' bosozejni'ide' bene' xtiža' Xancho Jesucriston'.

*Pablon' gwyeye' da' yoble gan' ba jatixjue'ede' xtiža' Diosen'*

<sup>36</sup> Nach cate' ba goc sša nite' Antioquían', Pablon' gože' Bernabén':

—Šejcho da' yoble yogo' yež ca' gan' ba jatixjue'echo xtiža' Xancho Jesucriston' šjana'cho nac cheson bene' ca'.

<sup>37</sup> Nach Bernabén' goclaže' šja'aque' na' yeseče'e Juan ben' lecz le Marcos. <sup>38</sup> Perw Pablon' gwne' bi gonen güen yeseče'ene' dan' gwle-jičhj Marcosen' legaque' cate' besežine' distritw Panfilian' na' bi benlene' legaque' xšin Diosen'. <sup>39</sup> Cate' gota'bia' ne toe' bi goclaže' gac can' ža ben' yeto, nach besyele'e. Bernabén' gwze'e gwče'e Marcosen' na' gosoe' lo' barcw ja'aque' Chipren'. <sup>40</sup> Na' Pablon' gwleje' Silasen' cont che'e le'. Na' bene' ca' chesonxene' Jesucriston' Antioquían' bosol güiže' Xancho Diosen' gosenabe' gaclene' legaque' gate'tez šja'aque'. Nach Pablon' len Silasen' gosa'aque'. <sup>41</sup> Na' ja'aque' to to yež ca' zjachi' distritw Sirian' na' len distritw Cilician' gosone' čhačh laže' bene' ca' chesedop chesežag chesonxene' Jesucriston'.

## 16

*Timoteon' gwzologüe' chonlene' Pablon' na' Silasen' txen*

<sup>1</sup> Na' Pablon' len Silasen' besyežine' yež Derben' nach gwdena' besyežine' yež Listran'. Na' Listran' zoa to bene' chonxene' Jesucriston' le' Timoteo. Xna' Timoteon' naque' bene' Israel na' chonxene' Jesucriston', na' xen' naque' bene' griego. <sup>2</sup> Na' bene' ca' chesonxene' Jesucriston' yež Listran' len yež Iconion' cheso'e diža' čhe Timoteon' chesene' zoacze' chone' da' güen. <sup>3</sup> Da'nan' Pablon' gwñabe' šejlen Timoteon' legaque', nach gwčhi'ene' gan' bosozoe' le' señw dan' že' circuncisión. Bene' ca' le' yogo' bene' že' na' goseñezde' xa Timoteon' bi naque' bene' Israel na' Timoteon' biña' soe' señon', na' lecze Pablon' goclaže' yega'ane' güen len bene' Israel ca'. Cate' beyož bzoe'ne' señua' na' gosa'aque'. <sup>4</sup> Na' to to yež ga besežine' bosozende' bene' ca' chesonxene' Jesucriston' can' nac yela' güexi'a čhe postlw ca' len bene' chosogüia chesene'e lježgaque' Jerusalenna' čhe da' ca' cheyala' yesone'. <sup>5</sup> Na' bene' ca' chesedop chesežag chesonxene' Jesucriston' gosenita'čhače' gosejnilaže'ne' na' gwyanche' tža tža.

*Pablon' ble'edagüede' to bene' distritw Macedonia chatayoede' le' šjeje' laže'*

<sup>6</sup> Nach Spiritw čhe Diosen' bi ben' latje šjasedixjue'e Pablon' len Silasen' len Timoteon' xtiža' Diosen' yež ca' zjachi' distritw gan' nzi' Asia. Da'nan' gosodie' yež ca' zjachi' distritw ca' gan' nzi' Frigia na' Galacia. <sup>7</sup> Besežinte' gała'ze distritw gana' nzi' Misia na' gosone' xbab yeso'e distritw da' nzi' Bitinia, perw lez na' bi be' Spiritw čhe Jesúsen' latje šja'aque'. <sup>8</sup> Nach gosodie' gała'ze distritw Misian' na' besežine' ciuda dan' nzi' Troas dan' chi' cho'a nisdaon'. <sup>9</sup> Nach že'na' Pablon' ble'edagüede' zecha to bene' distritw Macedonia lagüe', che'e le': "Yo'o Macedonia cont gacleno' neto'." <sup>10</sup> Neda' Lucas gwzoa' len legaque' na' da' ble'edagüe Pablon' bene' Macedonian', nach gwñezeto' chaclaže' Diosen' šjazenetu' bene' Macedonia ca' diža' güen čhe Xancho Jesucriston'. Nach bsini'a čheto' cont gwza'to' gwyejto' distritw Macedonian'.

*Pablon' len Silasen' ja'aque' Filipos*

<sup>11</sup> Na' cate' gwza'to' ciuda da' nzi' Troas dan' chi' cho'a nisdao' gwyo'oto' to lo' barcw zejto' liča gan' chi' to yežlio lo' nisen' dan' nzi' Samotracia, nach beteyo bžinto' yežen' dan' nzi' Neápolis. <sup>12</sup> Nach gwza'to' Neápolis bžinto' ciudan' nzi' Filipos gan' mbane distritw Macedonia na' bega'anto' to chop ža. Filipos naquen ciuda blaoch che distriton' gan' že' bene' Roma. <sup>13</sup> Na' cate' bžin ža che Dios bchojto' ciudan' na' gwyejto' cho'a yegw gan' chaqueto' chjaseļ güiže' Diosen', nach gwche'to' na' be'lento' no'ol ca' ba zjandoben' diža' güen che Jesucriston'. <sup>14</sup> Toe' le Lidia naque' bene' Tiatira na' chote' lache' güen da' nac color moradw, na' chonxene' Diosen' do yichj do laže'. Xancho Diosen' bene' cont bzenague' che dan' bzejni'i Pablon' le'. <sup>15</sup> Nach le' len bene' lo' yo'o che' gosezo'e' nis. Gwdena' gota'yoede' neto' gwne':

—Še chejle'le da' li ba chonxena' Xancho Jesucriston', le šo'o soale ližan'. Nach gwyejto' jasoato' ližen', le bene' byen.

<sup>16</sup> Na' to ža zejto' gan' chosol güiže' Diosen' cate' bežagto' to no'ol güego' no'ole esclava. Yo'o nyaz da' xigüen' yichjlažda'oben' chonen cont chac chneya'abe', na' gan' xen chombe' par xambe' ca' chneya'abe'. <sup>17</sup> Na' lebe' na'obe' neto' len Pablon' gate'tez zejto', na' chosya'abe' žabe':

—Bene' quinga chesone' xšin Diosen' ben' chnabia' doxen, na' cheseyixjue'ede' le'e can' gata' yela' mban chele toli tocaņe.

<sup>18</sup> Ba chac zan ža chombe' ca' cate' goque Pablon' zed, na' gwyechje' gože' da' xigüen' yo'o lo' yichjlažda'oben':

—Len yela' chnabia' che Jesucriston' chnia' le' bechoj lo' yichjlaždao' bi'nga.

Na' la' bechojte da' xigüen' lo' yichjlažda'oben'.

<sup>19</sup> Na' gwdena' cate' gosacbe'e xambe' ca' ba bechoj da' xigüen' lo' yichjlažda'oben' na' bich bi gan' yesone' len lebe', nach gosezene' Pablon' len Silasen' na' jasesane' legaque' lagüe ya'a gan' že' bene' ca' chesenabia' ciudan'. <sup>20</sup> Na' cate' besežine' gan' že' justis ca', gose'e' legaque':

—Bene' Israel quinga chesaše' chesebeque' da' zed lo' ciuda nga. <sup>21</sup> Na' chosolo'ede' costumbr da' bi de lsens gao' chio' naccho bene' Roma.

<sup>22</sup> Nach bene' ca' lo' ciudan' gosase' contr Pablon' len Silasen', na' bene' gwnabia' ca' gosone' mandadw goselechje' xagaque' cont goseyine' legaque' xis. <sup>23</sup> Beyož goseyinchgüe' legaque' nach bosoži'e' legaque' ližya, chese'e' ben' chape' ližyan' gwna'yane' legaque' cont bi yesyechoje'. <sup>24</sup> Beyož gose'e' le' ca', nach bži'e' legaque' lo' cuart ližyan' dan' zoa la'zelaoze gan' nac biže'te na' bchide' ni'agaquen' len yag dan' nzi' cepo.

<sup>25</sup> Ca' gosenita' Pablon' len Silasen' ca' do chel, chosol güiže' Diosen' na' chesole' no' himno chesonxene' Diosen', na' yezica'chle bene' ca' zjade ližyan' chosozenague'. <sup>26</sup> Nach zejzenez leca gwxo' na' bsesechguan len yo'o ližyana'. Na' to ši'ize yogo' puert che ližyana' beseyaljon na' besyeyež yogo' gden ca' dan' zjanchej ni'a na' bene' ca' že' lo' ližyan'. <sup>27</sup> Bosbanen ben' chape' ližyan' na' cate' ble'ede' ba zjanyaljo puert ca', la' goljte spada čen' cont yeyot cuine', le bene' xbab ba bosyoxonj yogo' bene' ca' zjade ližyan'. <sup>28</sup> Nach Pablon' gože'ne' zižje:

—Bibi gone cuino'. Nga zoacze yogo'to'.

<sup>29</sup> Nach ben' chap ližyan' gwñabe' to yi', na' gwyo'osese' zjaņe'e' gan' de Pablon' len Silasen'. Do chxzize' bzoa xibe' lao bene' ca', le chžebchgüe'.

<sup>30</sup> Na' la' bebejte' legaque' lo' cuart gan' zjajo'en', che'e' legaque':

—¿Bi cheyala' gona' cont gata' yela' mban chia' toli tocaņe?

31 Nach gose'e le':

—Gwyejnilaže' Xancho Jesucriston', le' na' bene' lo' yo'o chio', na' gata' yela' mban chele toli tocaṇe.

32 Nach ben' chape' ližyan' gwche'e legaque' ližen' na' gosoe'lene' le' len bene' lo' yo'o chen' xtiža' Xancho Jesucriston'. 33 Nach ca hora' ben' chap ližyan' gwdibe' lo' güe' che Pablon' na' che Silasen', na' gwdena' jasoe' nis len bene' lo' yo'o che' ca'. 34 Nach ben' chape' ližyan' beche'e Pablon' len Silasen' liže' bgüe'ej bguagüe' legaque'. Mbalaz zoe' ba chejnilaže' Diosen' txen len bene' lo' yo'o che'.

35 Cate' ba gwyeni' bene' gwnabia' ca' gosesele' xa'ag jaseže' ben' chap ližyan' yosane' bene' ca' šjaya'aque'. 36 Nach le' gože' Pablon':

—Bene' gwnabia' ca' baḥ gosesele' rson yosana' le'e. Guac yeyejle to šägüe' to güen.

37 Nach Pablon' gože' xa'ag ca':

—Ba goseyine' neto' latje lagüe ya'a sin cbi gosone' yela' justis cheto' še bi nonto' na' gosegüe'e neto' ližya, len nacto' bene' nación Roma. ¿Na' chesone' xbab yososane' neto' šižize? Bi gac, san yesid cuine' yesyebeje' neto'.

38 Nach xa'ag ca' jasyeyeže' bene' gwnabia' ca' can' gož Pablon' legaque'. Na' bene' ca' besežebe' cate' gosenezde' Pablon' len Silasen' zjanaque' bene' nación Roma. 39 Nach bene' gwnabia' ca' ja'aque' gan' zjade Pablon' len Silasen' na' gosata'yoede' legaque' yesyezi'xene' can' ba goquen', na' diža' šägüe' gose'e legaque' yesyechoje' yesyeya'aque' lo' ciudan'. 40 Nach bechoj Pablon' len Silasen' ližyan' na' ja'aque' liž Lidian' da' yoble, na' da' yoble gosone' chaḥ laže' bene' ca' chesonxene' Jesucriston' na' beyožen' besyeya'aque'.

## 17

### *Bene' Tesalónica ca' gosone' contr Pablon'*

1 Cate' Pablon' na' Silasen' gosa'aque' ciuda Filipos nach ja'aque' yež da' nzi' Anfípolis na' len yež da' nzi' Apolonia na' besyežine' to ciuda da' nzi' Tesalónica gan' zoa to yodao' che bene' Israel. 2 Na' Pablon' ca' costumbr che' gwyeje' yodao' ža che Dios. Na' ca' goc, šone ža che Dios be'lene' legaque' diža'. 3 Bzejni'ide' legaque' gože'ne' bene' ca' goso'e xtiža' Diosen' cani' bosozoje' xtiža' Criston'. Gosene' ben' seła' Dios yedenabi'e, cheyała' yosoči yososaca' bene' le' na' yesote'ne' na' techle yeyas yebane' ladjo bene' guat ca'. Gože' bene' Tesalónican':

—Jesúsen' ben' choa' diža' che', le'na' Criston' ben' gwseła' Dios cont nabi'e.

4 Nach bał bene' Israel gosejle'e xtiža' Pablon' len Silasen' na' gosaque' txen len legaque', na' lecze zan bene' griego bene' chesonxen Diosen' na' zan no'ole blao lecze gosejle'e. 5 Perw gwnita'ch bene' Israel bene' bi chesejle'e xtiža' Diosen'. Legaque' gosacxi'ede' Pablon' len Silasen' na' bosyotobe' xonj bene' mal bene' chesaš lagüe ya'a na' gosaque' txen gosone' cont gwche' žaš doxen ciudan'. Nach bene' že' lo' ciudan' ja'aque' liž ben' le' Jasón chesacde' yesyebeje' Pablon' len Silasen' liže'na'. 6 Cate' besežine' liž Jasónna', noch no bene' ca' nita'. Nach cate' bi besyeželde' Pablon' len Silasen', na' gosoxe' Jasónna' len yebał bene' chesonxene' Jesucriston' na' goseḥe'e legaque' lao bene' ca' chesenabia' ciudan', na' bososye'e gosene':

—Beṇe' ca' nita' liž benga chesaše' chesebeque' da' zed doxen, na' na'a ba besele'e gan' zoacho nga. <sup>7</sup> Jasón ni ba blebe' legaque' ližen', na' bi chesone' can' ža ley che César ben' nac la'zelagüe beṇe' gwnabia' chechon' chi' ciuda Roman', na' chesene' zoa yeto rey beṇe' le Jesús beṇe' nabi'e chio'.

<sup>8</sup> Na' cate' gosende' diža'na', beṇe' lo ciuda ca' len beṇe' gwnabia' čhegaque' ca' gosebecche' žaš. <sup>9</sup> Nach Jasónna' len beṇe' lježe' ca' bosožie' mechw cont beṇe' gwnabia' ca' bososane' legaque', con še bich yesyežin Pablon' na' Silasen' lo ciudan', chesene'.

*Pablon' len Silasen' ja'aque' yež Berea*

<sup>10</sup> Nach že'na' beṇe' ca' chesonxene' Jesucriston' lagüe ciuda Tesalónican' bosyose'e Pablon' na' Silasen' cont ja'aque' yež gan' že' Berea. Na' cate' besyežine' nach ja'aque' lo' yodao' che beṇe' Israel ca'. <sup>11</sup> Na' beṇe' Israel ca' že' Berean' zjanacche' beṇe' šagüe' clal ca' beṇe' Israel ca' že' Tesalónican' na' besyebede' bosozenague' xtiža' Jesucriston' dan' bosozejni'i Pablon' len Silasen' legaque'. Na' tža tža besyeyiljue' gan' nyoj da' ca' bosozejni'i beṇe' ca', cont yesenezde' še le can' žan. <sup>12</sup> Na' zane' gosejle'e xtiža' Xancho Jesucriston' na' lecze zan beṇe' griego ca' na' zan no'ole blao. <sup>13</sup> Nach beṇe' Israel ca' že' Tesalónican' bene' ca' cbi chesejle' che Jesucriston', gosende' diža' ba zoa Pablon' len Silasen' Berean' chosozejni'ide' xtiža' Diosen'. Nach gosa'aque' ja'aque' Berean' na' gosone' cont beṇe' Berea ca' lecz gosone' contr Pablon'. <sup>14</sup> Perw na' beṇe' Berea ca' chesejnilaže' Jesucriston' la' bososa'te Pablon' gwyeje' cho'a nisdao'. Na' ca nac Silasen' len Timoteon' len Timoteon' legaque' besyega'ane' Berean'. <sup>15</sup> Na' to chop beṇe' Berean' ja'aque' jasesane' Pablon' ciuda dan' nzi' Atenas. Na' cate' besyeya'aque' jaya'aque' Berean' Pablon' gwsele' rson len legaque' cont Silasen' len Timoteon' lecz šja'aque' cate gan' zoe'na'.

*Pablon' bsed blo'ede' beṇe' Atenas ca'*

<sup>16</sup> Na' Pablon' šlac zoe' ciuda Atenasen' chbeze' žin Silasen' len Timoteon', gocchgüe' tole lo' yichjlažda'ogüe' da' ble'ede' da' zan l' gua'a lšaca' da' chesejnilaže' beṇe' ca'. <sup>17</sup> Da'n'an' bzejni'ide' beṇe' Israel ca' lo' yodao' čhegaque'na' len yezica'chle beṇe' ca' chesonxene' Diosen'. Na' yogo' ža gwyeje' ga chac ya'a je'e xtiža' Diosen' len beṇe' ca' že'na'. <sup>18</sup> Nach beṇe' ca' že'na' gwzolao chesoe'lene' le' diža'. Bale' chesejle'e dan' bzejni'i to beṇe' le' Epicuro, na' yebale' chesejle'e dan' bosozoj beṇe' ca' chesene' estoico. Na' bale' gosene':

—¿Bin' chon ža benga?

Na' yebale' gosene':

—Chacljede' gwzejni'ide' chio' che no beṇe' cobe beṇe' šejnilaže'cho.

Gosene' ca' le Pablon' ba bzejni'ide' legaque' xtiža' Jesús'en' na' ba be'e diža' Jesús'en' bebane' ladjo beṇe' guat. <sup>19</sup> Nach goseche'e Pablon' to latje dan' nzi' Areópago gan' chesedobe beṇe' blao čhegaque' cate' chosoxi'e bi da' chesone'. Nach gose'e Pablon':

—Che'neto' gwzejni'ido' neto' bi da' coben' dan' chsed chlo'edo'. <sup>20</sup> Bina' yeneto' diža' can' nac dan' cho'o nga na' chaclaže'to' nezeto' bi zejen yogo' da' ca'.

<sup>21</sup> Ca nac beṇe' Atenas ca', de costumbr čhegaque' yogo' ža con chesaše' cheso'e diža' o chosozenague' che bi da' cobe da' de, na' lecz ca' cheson no beṇe' zito' že' Atenas.

22 Nach Pablon' gwzeche' gachol' legaque' gan' chesone' yela' güexi'a na' gože' legaque':

—Le'e bene' Atenas, chacbe'eda' leca chejnilaže'le zan l' gua'a lsaca'.  
23 Cate' gwdia' tnez ble'eda' gan' chonxenle' zan l' gua'a lsaca', na' ble'eda' to latje gan' nyojen žan: “Che Xancho ben' nono nombia'.” Na' ca nac ben' chonxenle' sin cbi nombia'ln'e', che benan' chyixjue'eda' le'e.

24 'Dios ben' ben yežlion' na' yogo' da' de lagüe yežlion', len' chnabi'e yaban' len yežlion'. Bi chyažjde' yo'o da' chon beṇachen' cont soe' len chio'.  
25 Bibi chyažje Diosen' gwnežjo beṇachen' le', na' bibi gac yesone' yesaclene' le'. Diosen' cho'e yela' mban che yogo'lol' bene', cho'e legaque' biš grasyw na' cho'e legaque' yogo' bi da' zjanape'.

26 'Diosen' bene' bene' nechon', na' toz ca nac yogo' beṇač xi'in diaža che'. Na' bsi'e xneze bat nita' to toe' na' ga yesenite'.  
27 Diosen' bnite' yogo' beṇachen' lo yežlion' cont yeseyiljue' nacle yesone' yesombi'ene' na' yesonxene'ne'. Na' da' li Diosen' bi zoe' zito' len to to chio'.  
28 Le' chone' cont zoacho mbancho na' chdacho. Nac da' li can' gosena to chope bene' poeta chele ben' goso'e diža' xdan, gosene': “Naccho diaža che Diosen'.”  
29 Na' dan' naccho diaža che Diosen' bi cheyala' goncho xbab nac Diosen' ca no l' gua'a lsaca' de oro, de plata o de jej. Chesaljšaže' beṇachen' chesone' da' ca'.  
30 Cani' Diosen' be'e latje gason beṇachen' con ca gwna xbab čegaque' yela' cbi chejni'i čegaque', perw ṇa'a Diosen' chone' mandadw yogo'lol' bene' že' doxen yežlion' yesebejyichje' da' malen' chesonen'.  
31 Diosen' chaclaže' cuejyichjcho da' malen', le ba mbeje' Jesucriston' gone' yela' justis che yogo' beṇač na' gwnežjue' castigw che yogo' bene' cbi chesejnilaže' le', na' Diosen' zejcz'e to licha dan' gone' ca'. Na' Diosen' ba nžie' bia' bat gone' yela' justis che beṇač. Na' dan' bosban Diosen' Jesucriston' ladjo bene' guaten', nezecho Jesucristwnan' gone' yela' justis che beṇachen'.

32 Cate' bene' Atenas ca' beyož gosende' gwna Pablon' yesyeban bene' guat ca', ba'e gosezi'diže' le' na' yebale' gose'ene':

—Na' gwzenagto' xtižon' yeto ža yoble.

33 Can' goc beza' Pablon' latje gan' že' bene' ca'.  
34 Perw ba' bene' Atenas ca' gosaque' Pablon' t xen na' gosonxene' Jesucriston'. Na' bene' ca' gosaque' Pablon' t xen len to bene' byo le Dionisio na' yeto no'ole le Dámaris. Na' Dionision' naque' t xen len bene' gwnabia' ca' ben' cheson yela' güexi'a gan' nzi' Areópago.

## 18

### *Ca goc šlac zoa Pablon' Corinto*

1 Gwde goc da' ca', Pablon' beze'e ciuda Atenasen' na' gwyeje' ciuda gan' nzi' Corinto.  
2 Cate' bžine' Corinton' bežague' to bene' Israel le' Aquila bene' naque' bene' distritw Ponto, na' len no'ol che' ben' le Priscila. Za' besyežingale' Corinton' zeya'aque' nación Italia, le rey Claudio, ben' chnabia' ca' hora' doxen gan' mbane naciónṇa', bene' mandadw besyežaš yogo' bene' Israel ca' že' ciuda Roma. Nach Pablon' gwyeje' jane'e Aquilan' len Priscilan'.  
3 Xšingaque' naquen chesone' yo'o de lache', na' toze ca nac xšin Pablon'. Nach bega'ane' gosenite' t xen na' gosone' žinṇa' t xen.  
4 Na' yogo' ža che Dios Pablon' gwyeje' yodao' che bene' Israel ca' jazejni'ide' legaque' che Jesucriston', cont ba' bene' Israel len ba' bene' bi zjanac bene' Israel yesejnilaže'ne'.



<sup>5</sup> Nach Silasen' len Timoteon' gwde gosa'aque' distritw Macedonian' besežine' gan' zoa Pablon', na' cana'ch Pablon' bsane' xšinen' maced' cont gota'ch latje gwdixjue'ede' xtiža' Jesúsen' na' bzejni'ide' bene' Israel ca' Jesucristwnan' naque' bene' chesebeze' seła' Diosen' yedenabi'e. <sup>6</sup> Perw bene' Israel ca' beseže'e Pablon' na' bosožie' yela' ya' che'. Nach Pablon' gwšibe' xe'na' cont blo'e chbejyichje' legaque', gwne':

—Bibi doła' napa' dan' cuiayi'le toli tocanē. Le'e napple doła'. Na' na'a šjased šjalo'eda' bene' ca' bi zjanac bene' Israel.

<sup>7</sup> Nach bechoje' lo' yodao'na' na' beze'e bežine' liž to bene' le Justo. Justo na'na' zoe' chonxene' Diosen' na' liže' z oan' cuit yodao'na'. <sup>8</sup> Na' to bene' le' Crispo naque' bene' gwnabia' che yodaon'. Na' Crispon' len yogo' bene' lo' yo'o che' gosaque' t xen chesejle'e che Xancho Jesucriston'. Na' yezan bene' Corinto gosejle'e cate' gosende' xtiža' Jesucriston' da' choe' Pablon' na' gosezoe' nis. <sup>9</sup> Na' goc to že' Pablon' ble'edagüede' Xancho Jesucriston', che'ene':

—Bi žebo' Pablo. Gwzoateze be' xtižan' na' bi so' šize. <sup>10</sup> Neda' zoa' len le' na' bi gona' latje no gone le' da' mal, le bene' zan že' lo ciuda nga bene' chesonxene' neda'.

<sup>11</sup> Ca' goquen' bega'an Pablon' Corinton' tgüiz yogašje bsd blo'ede' legaque' xtiža' Diosen'.

<sup>12</sup> Na' ca tiempen' ben' le Galión naque' gobernador distritw gan' nzi' Acaya. Nach bene' Israel ca' nita' ciuda Corinto bene' cbi chesonxen Jesucriston' gosaque' toze gosone' contr Pablon'. Na' goseche'ene' jas-esane'ne' gan' chon gobernadore' yela' justisen'. <sup>13</sup> Na' cate' besežine'na' gose'e gobernadore'ne':

—Benga chde' chgo'oyele' bene' lo' yežen' yesone' bi da' cobe cont yesonxene' Diosen' na' da' chzejni'ide' goncho, bi zejen to li len ley chechon'.

<sup>14</sup> Bač zoa ne Pablon' cate' gobernador Galiónna' gože' bene' Israel ca':

—Ca nac xya dan' chagwle nga, šaca' naquen to da' xinj o to da' malchgua, gonan' yela' justis. <sup>15</sup> Perw naquen che diža', na' che bene', na' che ley chelen'. Da'n'an' le gwye' nacle gonle. Bi co'o lo' na' gona' yela' justis che dan' nac ca'.

<sup>16</sup> Nach bešaše' legaque' gan' chone' yela' justisen'. <sup>17</sup> Nach bene' ca' bi zjanac bene' Israel gosenize' Sóstenes ben' ba nac bene' gwnabia' che yodaon', gosot goseyine' le' lao gobernador Galiónna', perw bena' bibi cuent bene' legaque'.

### *Pablon' beyeje' Antioquían' da' yoble*

<sup>18</sup> Na' bega'anč Pablon' ciuda Corinton' yezan ža beyož goc da' ca', na' cate' beze'ena' gože' bene' ca' chesonxen Jesucriston': “Nayežagcho”, nach beze'e t xen len Priscilan' na' Aquilan'. Ja'aque' to yež da' nzi' Cencrea gan' bšib yichj Pablon' da' bač beyož bene' to da' gwlo'o cho'e lao Diosen' gone'. Na' beyožen' Pablon', Aquilan' na' Priscilan' besyeyo'e lo' barcw da' zej nación Siria. <sup>19</sup> Na' cate' besyežine' ciuda Efeson' besyechoje' lo' barcon', na' Priscilan' len Aquilan' besyega'ane' Efeson'. Na' Pablon' gwyeje' yodao' che bene' Israel ca' je'lene' bene' ca' ba zjandob na' xtiža' Dios. <sup>20</sup> Na' bene' ca' že' lo' yodaon' gosata'yoede' le' yega'anche' len legaque', perw bi goclaze'. <sup>21</sup> Nach gože' legaque':

—Nayežagcho, le chonen byen soa' lni dan' šo' ciuda Jerusalénna', perw güidchcza' deña'a le'e yeto še Diosen' gone' latje.

Nach beze'e ciuda Efeson' na' beyo'e lo' barcon' zeyeje'. <sup>22</sup> Cate' bežine' ciuda Cesarean' bechoje' lo' barcon' na' gwyeye' Jerusalénna' na' bguape' tiox beñe' ca' chesedop' chesežag' chesonxene' Jesucriston'. Nach beze'e beyeye' ciuda Antioquían'. <sup>23</sup> Gwde to tiemp' zoe' Antioquían', nach gwze'e da' yoble gwyeje' to to yež dan' nita' distritw Galacia na' Frigia, bene' çhaçh laže' beñe' ca' chesonxene' Jesucriston'.

*Apolos gwduxjue'ede' xtiža' Diosen' ciuda Efeson'*

<sup>24</sup> Na' ca' tiemp' na' bžin to beñe' Israel ciuda Efeson' beñe' le Apolos. Naque' beñe' ciuda Alejandría. Le' chac cho'e diža' güen lao yogo' beñe', na' ba nsede' binlo doxen Xtiža' Diosen' dan' nyoj. <sup>25</sup> Apolosen' chejle'e dan' bzejni'i Juanna' che Xancho Jesúsén' na' ñezde' can' bzoe' beñe' nis caten' besyetiñjde' xtolá'gaquen'. Na' Apolosen' be'e diža' do yichj do laže' bzejni'ide' binlo che Jesúsén', la'czla' con dan' bsd blo'e da' Juan na'zen' ñezde'. <sup>26</sup> Nach Apolosen' gwzolao be'e diža' che Xancho Jesucriston' lo' yodao' che beñe' Israel ca' sin cbi chaž chžebe'. Na' cate' Priscilan' na' Aquilan' gosende' can' chzejni'i Apolosen', legaque' gosebejiže' le' na' bosozejni'ichde' le' che Jesucriston' da' ca' bina' ñezde'. <sup>27</sup> Gwdena' cate' Apolosen' bene' xbab šeje' distritw gan' nzi' Acaya, beñe' Efeso ca' chesonxen Jesucriston' gose'e le' chone' güen dan' šeje' na' bosozoje' to cart da' bexae' che beñe' ca' chesonxen Jesucriston' distritw Acaya cont beñe' ca' bosolebe' le'. Na' Diosen' nži'ilaže' beñe' Acaya ca' na' ba goclene' zacy' cont chesejnilaže' Xancho Jesucriston'. Na' cate' bžin Apolosen' Acayan' be'lene' legaque' diža' da' goclenchguan' legaque'. <sup>28</sup> Bzejni'ide' yogo'lol' bene' gože'ne' clemen' cheson beñe' Israel gualaž çhen' bi chesejle'e che Jesúsén'. Bzejni'ide' legaque' can' nyoj Xtiža' Diosen' žan Jesúsén' naque' Cristo ben' chesebeze' yedenabi'e.

## 19

*Šlac gwzoo Pablon' ciuda Efeson'*

<sup>1</sup> Na' šlac zoa Apolosen' ciuda Corinto, Pablon' beze'e bedie' yež ca' zjachi' do ya'adao' na' bežinte' ciuda Efeson'. Efeson' bežague' bał beñe' chesonxene' Jesucriston'. <sup>2</sup> Na' gože' legaque':

—¿Zedesoa Spiritw çhe Diosen' lo' yichjlažda' olen' caten' gwzolao chejni-laže' le' Jesucriston'?

Nach gose'e le':

—Bi ñezeto' še zoa Spiritw çhe Diosen'.

<sup>3</sup> Nach Pablon' gože'e legaque':

—¿Bi dižan' chejle'e le' da' gwzooale nisen' še ca'?

Nach gose'e le':

—Gwzoato' nis can' bzejni'i da' Juanna'.

<sup>4</sup> Nach gož Pablon' legaque':

—Da' Juanna' bzoe' beñe' nis cate' besyetiñje xtolá'gaque' na' lecze gože' legaque' cheyala' yesonxene' bena' za' seła' Diosen'. Na' da' gwne' ca' be'e diža' che Jesucriston'.

<sup>5</sup> Beyož bosozenague' can' gwna Pablon' nach gosezoe' nisa' da' yoble cont bosolo'e da' li chesejnilaže' Xancho Jesúsén'. <sup>6</sup> Nach Pablon' gwzooa ne'ena' yichj to toe' na' Spiritw çhe Diosen' gwzooan lo' yichjlaždao' to toe', nach gosene' diža' da' cbi chesejni'ide' na' goseyixjue'ede' bi dan' gož Diosen' legaque'. <sup>7</sup> Na' yogo' beñe' ca' zjanac ca do šižinue'.

8 Na' do šone bio' Pablon' bsed blo'ede' bene' ca' chesedop chesežag lo' yodao' che bene' Israel ca' dan' zoa Efeson'. Bi bžebe', na' bzejni'ide' legaque' na' gwneyoede' legaque' yeson cuingaque' lo na' Diosen' cont nabi'e legaque' len xbab chegaquen'. 9 Na' bchoj ba| bene' güedenag bene' cbi chesejle'cze', na' lao bene' ca' že' yodao'na' gosene' diža' ya' che xtiža' Jesucriston' dan' chzejni'i Pablon'. Da'nan' Pablon' bechoje' gan' že' bene' ca' na' bebeje' ben' ba chesonxene' Jesúcriston' na' gwche'e legaque' gan' zoa to yo'o xen che to bene' le' Tiranno na' bzejni'ide' legaque' yogo' ža. 10 Na' gwzoa Pablon' chop iz bzejni'ide' bene' ca', na' can' goc, yogo' bene' že' distritw Asia gosende' xtiža' Xancho Jesúsén', bene' zjanac bene' Israel lente bene' bi zjanac bene' Israel. 11 Na' Diosen' bchine' Pablon' cont bene' yela' guac da' besyebanchgüe bene'. 12 Na' jasesane' no bay no lache' da' ba bchelen Pablon' gan' zjade bene' güe' na' la' chesyeyactede' bi yižgüe' chese'ede', na' bene' ca' yo'o nyaz da' xigüe' yichjlažda'ogaque'na' lecze besyechojen.

13 Lecze chesaš ba| bene' Israel chesyebeje' da' xigüe' da' zjajo'o lo' yichjlaždao' bene' na' gosaclačže' yosočhine' la Xancho Jesúsén' cont yesyebeje' da' xigüe' ca', nach gose'e da' xigüen':

—Len yela' chnabia' che Jesúsén' ben' choe' Pablon' xtiže'na' chonto' mandadw yechojle.

14 Na' zoa to b\_xoz gwnabia' che bene' Israel le' Esceva, na' nita' gaže xi'ine'. Na' bene' quingan' bosochine' la Jesúsén' gosaclačže' yesyebeje' da' xigüen'. 15 Nach goc to šlas chesone' ca' cate' to da' xigüen' boži'in xtižen', gožen legaque':

—Nombi'a Jesúsén' na' ba benda' diža' che Pablon', perw bi nombi'a le'e cont šejli'a xtiža'len'.

16 Nach bena' yo'o nyaz da' xigüen' bxite' gwñize' bene' ca' betlate' legaque' na' gwcheze' xalana'gaque'. Nach bosyoxonje' liž bena' ga'alyide' na' bedo chen zjanaque' dan' bene' legaque' zi'. 17 Na' goslas diža' can' goquen' gosenezete yogo' bene' že' Efeson', bene' Israel lente bene' cbi zjanac bene' Israel. Nach yogüe' besežebe' na' gosacbe'ede' Xancho Jesúsén' naque' bene' zaque'.

18 Nach bene' zan ba chesejle'e xtiža' Xancho Jesúsén', na' zane' go-sexoadole' lao bene' ca' chesedop chesežag chesonxene' Jesucriston' cheso'e diža' che da' malen' ba gosone'. 19 Na' bene' ca' gosac bene' guaža' na' bene' güene ya'a bosyotob libr chegaquen' na' gosoxen' bosozeyen' lao bene' lježe' bene' chesonxene' Jesucriston'. Na' besyebeje' cuent ca do gaca'te' zaca' libr ca' na' bžinen šiyon mil mechw plata, na' to to mechw plata ca' zacan' do tža žin. 20 Can' goc, bene' zan gosende' xtiža' Xancho Jesucriston', na' gwyanch bene' bosozenague' che'.

21 Nach gwde goc da' ca' Pablon' bene' xbab yeyeje' Jerusalénna', na' goclačže' yedie' šjayne'e bene' ca' že' yež gan' mbane distritw Macedonia len Acaya. Nach bene' xbab yeyož yeyeje' Jerusalénna' lecze cheyala' šjeje' ciuda Roma. 22 Na' gwleje' chope bene' chesonlene' le' xšin Diosen' na' gwsele' legaque' distritw Macedonian', zjale' Timoteo na' Erasto, perw na' le' bega'anche' distritw Asian' yeto chope ža.

*Bene' ca' besegue'ede' Pablon' gosebecchgüe' da' zed ciuda Efeson'*

23 Na' gwche' to da' zed gual ciuda Efeson', le nita' bene' beseže'e xtiža' Jesúsén' dan' bsed blo'e Pablon'. 24 Quinga goc: gwzoa to bene'

le' Demetrio bene' chon yodao' dao' de plata da' naquen ca nac yodao' gan' zoa xonax Diana ben' chesonxene'. Na' bene' ca' gosonlene' žinŋa' gosonchgüe' gan, le gwda'ochguan. <sup>25</sup> Nach btobe' bene' ca' goson žin txen len le' na' nochle bene' goson žin dan' nac ca', na' gože' legaue':

—Nezele ca nac žin dan' nlancho choncho nga, chonlenchon gan xen. <sup>26</sup> Na' ba beneczele na' ba ble'eczele can' chon to bene' le Pablo chsed chlo'ede' bene' lo ciuda Efeso checho nga na' lecze chsed chlo'ede' zan bene' že' doxen distritw Asia nga, che'e legaue' bibi zaca' l gua'a lsaca' da' cheson benachen' cont chesejnilažen'. Na' bene' zan ba chosozenague' che' na' chesebejyichje' dan' chejnilaže'cho. <sup>27</sup> Le gonšc xbab nacle goncho, le xož yesene' che žin dan' choncho nga, na' gague lezen, san lecz xož yesone' cont yodao' che xonax Diana chechon' yega'anen ca to da' bibi zaca' na' len yela' chze na' yela' zaca' che xonaxen'. Na' nezele ca nac xonax Diana chechon', yogo'cze bene' distritw Asia nga na' bene' gate'tezechle chesonxene' le'.

<sup>28</sup> Beyož gosende' xtiža' Demetron' beselocchgüe' na' bososye'e gosene':

—Leca bene' zaca' xonax Diana che chio' bene' Efeso.

<sup>29</sup> Nach gwche' da' zed doxen lo ciudan', na' gosaque' toze' jasenize' chope bene' distritw Macedonia bene' gosaque' txen len Pablon', toe' le Gayo na' yetoe' Aristarco. Na' gosexobe' legaue' besežine' gan' chesedobe yogo' bene' lo ciudan'. <sup>30</sup> Na' Pablon' goclaže' šo'e gan' zjandobe bene' ca' cont gü'lene' legaue' diža', perw bene' ca' chesonxene' Jesucriston' lo ciudan' bi goso'e latje šo'e. <sup>31</sup> Bal' bene' zjanaque' bene' gwnabia' distritwna' zjanac xmigw Pablon' na' lecze gosesele' rson gose'e Pablon' bi šje' gan' zjandobe bene' ca'. <sup>32</sup> Na' bene' ca' zjandoben' gosone' sšag juisyw. Gwde gwdele bososya'a to toe'. Na' bene' zan bi zjañezde' bichen' zjandobe'na'. <sup>33</sup> Bene' Israel ca' bosožigue' to bene' le Alejandro lao bene' ca' že'na' cont be'lene' legaue' diža', na' bosozejni'ide' le' bin' cheyla' ne'. Na' Alejandron' gwlis ne'e cont gwnabe' nite' šize yosozenague' diža' dan' gü'e laogaquen' gwzoe' rson che bene' ca' chesejnilaže' Jesucriston'. <sup>34</sup> Perw cate' besele'ede' le' gosache'ede' lecze naque' bene' Israel, na' besyezolagüe' da' yoble bososye'e, gosene':

—Bene' zaca' juisyw xonax Diana che chio' bene' Efeso.

Ca do chop hor bososye'e ca' da' bi chesonxen bene' Israelen' xonax chegaquen'.

<sup>35</sup> Na' bene' güezoj chegaquen' cane goc bebecžie' legaue'. Na' gože'ne':

—Le'e bene' gualaž, yogo' bene' že' doxen yežlion' zjañezde' naquen checho gapši'icho yodao' che xonax Dianan'. Naque' bene' zaque', le l gua'a lsaca' chen' blažon' le'e yaba. <sup>36</sup> Na' nono gac na da' yoble. Da'nan' le soa šize na' bich gonle da' bi zejen. <sup>37</sup> Na' ca nac bene' quinga nche'ele nga, bibi na' yesebane' lo' yodao' checho ca' na' neca nacho chosožie' yela' ya' che xonax Diana chechon'. <sup>38</sup> Na' Demetrio nga len yezica'chle bene' lježe', še chac bi chac chegaque' len bene' yoble, nita' bene' gwnabia' chechon' cont yesone' yela' justis chegaquen', con šja'aque' yeso'e legaue' part še ca'. <sup>39</sup> Na' še bichle da' chnabe' gac, cheyla' goncho to yela' güexi'a cont choglaon. <sup>40</sup> Perw ca nac žaš da' nga chac na'a, xož бага'cho choncho contr gobiern' can' že'cho nga, na' bibi de ye'gacchone' še yesenabe' bixchen' goc žaš da' nga chac na'a.

<sup>41</sup> Beyož gože' legaue' ca' bene' mandadw besyežaše'.

## 20

*Pablon' gwyejche' distritw Macedonia na' nación Grecia*

<sup>1</sup> Nach cate' beyož gwche'ži da' zeden', Pablon' goxe' beņe' Efeso ca' chesonxen Jesucriston' cont ja'aque' gan' zoe'na' na' bene' čhačh laže'gaque' cont yesenite' yesejnilaže' Jesucriston'. Nach gože' legaque': "Nayežagcho", na' goseyela' lježe' na' beze'e beyeje' da' yoble distritw Macedonia. <sup>2</sup> Na' gwdie' to to yež da' zjachi' gala'ze Macedonian' bene' čhačh laže' beņe' ca' chesonxene' Jesucriston', na' beyožen' gwyejche' nación da' nzi' Grecia. <sup>3</sup> Na' gwzoe' Grecian' šon bio'. Na' cate' bžin ža yeze'e, ba zoa yeyo'e lo' barcon' yeyeje' distritw Siria gan' nac laže' cate' gwneзде' zjachi'nao' beņe' Israel ca' le'. Da'nan' bene' xbab yeza' ni'e yedie' gan' mbane distritw Macedonia na'le. <sup>4-5</sup> Na' xonj beņe' ja'aque' ciuda da' nzi' Troas gan' gosebeze' Pablon' len neda' Lucas, na' gosa'aclene' neto' distritw Asia. Quinga zjale beņe' ca': Sópater, beņe' yež Berea, na' Aristarco len Segundo ben' zjanac beņe' ciuda Tesalónica, na' Gayo beņe' yež Derbe, na' Timoteon' na' čhope beņe' za'ac distritw Asia, Tíquico len Trófimo. <sup>6</sup> Na' gwde ljin' cate' chesagüe' yetextil da' bibi levadura nchixen, neda' len Pablon' gwza'to' Filiposen' na' goc gayo' ža cate' bžinto' ciuda Troas gan' ba nita' beņe' ca' chesebeze' neto', nach gwzoato' na'ze gaže ža.

*Can' goc šlac zoa Pablon' Troas*

<sup>7</sup> Na' cate' bžin ža dmigw besedobe beņe' ca' chesonxene' Jesucriston' lo' ciuda Troasen' na' gwyejto' güe'ej gwdagwto' txen len legaque', na' Pablon' bzejni'ide' legaque' xtiža' Diosen'. Na' dan' ba zoa yeza' Pablon' ca' gwxeze nach be'e diža' bžinte do chel. <sup>8</sup> Na' yogo'to' ndop nžagto' to lo' yo'o de šon cuia, yo'oto' lo' cuarten' dan' zoa yichjen cha'te, na' zjaze da' zan yi' lámpara. <sup>9</sup> Na' to bi' güego' lebe' Eutico žiabe' cho'a ventan. Na' Pablon' ton zej diža' dan' cho'ena' na' gwtas bi'na' gan' žiabe' cho'a ventanna'. Na' šlac chtasbe' blažo'be' lo' yo che'ele. Nach cate' besyecose'be' bi' guat besyecose'. <sup>10</sup> Nach Pablon' betje' bžine' gan' jasyedixjue'eben' na' bcheque' lao bi' guata' gwdele'be'. Nach gože' beņe' ca':

—Bi žeble, mbanczbe'.

<sup>11</sup> Nach Pablon' begüe' da' yoble na' gosagüe' na' bezolagüe' cheyo'e diža' len legaque'. Ne' choe'te' dižan' ca' cate' gwyeni'. Nach beze'e. <sup>12</sup> Nach bi'na' blažo' cho'a ventanna', beņe' ca' že'na' besyech'e'be' besyebchgüede' dan' mbanczbe'.

*Gosa'aque' ciuda Troasen' na' ja'aque' ciuda Mileto*

<sup>13-14</sup> Nach bxi'ato' len Pablon' neto' bebialaoto' beyejto' lo' barcw bežinteto' ciuda gan' nzi' Asón na' Pablon' gwyazlaže'che' begüe'e nez bela'te' Asónna' cont gwyo'e lo' barcon' txen len neto'. Nach gwyejto' ciuda gan' nzi' Mitilene. <sup>15</sup> Bezsa'to' Mitilenen' na' beteyo bežinto' gala'ze to yežlio da' chi' lo' nisdaon' gan' nzi' Quío. Na' gwde yeto ža bežinto' gan' chi' yeto yežlio lo' nisdaon' da' nzi' Samos. Na' bechojto' lo' barcon' gwyejto' yež dan' nzi' Trogilio gan' bega'anto' tže' bezi'laže'to'. Nach beteyo bezyo'oto' lo' barcon' na' bežinto' ciuda Mileto. <sup>16</sup> Ca' bento' bi' gwdeto' ciuda Efeson', le Pablon' bi' goclaže' šede' yež ca' zjachi' do distritw Asian'. Chachyende' yob žine' Jerusalénna' še gala' soe' na' ža lni dan' nzi' Pentecostés.

*Pablon' bšajlene' bene' chosogüia chesene'e bene' ca' chesonxen Jesucriston' Efeson'*

<sup>17</sup> Na' šlac zoato' ciuda da' nzi' Mileto Pablon' goxe' bene' Efeson' bene' chosogüia chesene'e yezica'chle bene' ca' chesonxene' Jesucriston'. <sup>18</sup> Na' cate' besela'aque' Pablon' gože' legaue':

—Nezele can' bena' caten' gwzoo' distritw Asia gan' zoa lažlen', bena' da' güen šlac gwzoo' len le'e gwzolaotia' ža nechw žan' bžina' na'. <sup>19</sup> Gwzoo' bena' xšin Diosen' na' bi benxen cuina'. Zan ni'a gwchežchgua' chele. Na' da' zan da' bosochi bososaca' bene' Israel ca' neda'. <sup>20</sup> Bzejni'ida' le'e yogo' dan' byažje šejni'ile, neca bezi'laža', bzejni'ida' le'e do gan' chdop chžagle na' len liž tole. <sup>21</sup> Bzejni'ida' bene' zjanac bene' Israel gualaž chia' lente bene' cbi zjanac bene' Israel can' chaclaže' Diosen' yesyetinje xtola'gaquen' na' yesejnilaže' Xancho Jesucriston'. <sup>22</sup> Na' na'a yeya'a Jerusalén, le Spiritw che Diosen' chonen byen yeya'a, na' bi nezdá' bin' gac chia' yežina' na'. <sup>23</sup> Con nezdá' to to yež gan' ba bedia' Spiritw che Diosen' ba bzejni'in neda' doła' gata' ližya na' gac bichle da' saca'zi'a. <sup>24</sup> Perw bi chi' yichja' che da' ca' saca'zi'a. La'czla' še yesote' neda', chzanda' yela' mban chia'. Toze da' chi' yichja' ša'lao gona' yogo' dan' gwlo' Xancho Jesucriston' lo na' gona', na' soa' mbalaz lo' yichjlažda'oguan' šlac chonan', le Xanchona' gwleje' neda' cont chyixjue'eda' diža' catequen' nži'ilaže' Diosen' benačen'.

<sup>25</sup> Ca' nac le'e, ba bzejni'ida' le'e che yela' chnabia' che Diosen', perw na'a ne tole bich le'ele neda'. <sup>26</sup> Da'nán' chnia' le'e bibi doła' napa' še nole cuiayi'. <sup>27</sup> Bač bzejni'ida' le'e yogo' dan' chaclaže' Diosen' nezele, bibi bcuaša'. <sup>28</sup> Da'nán' cheyała' cuec yichjle che yogo'loł dan' ba bzejni'ida' le'e na' lecze ca' le gwsed le gwlo'e yezica'chle bene' chesedop chesežag chesonxene' Xancho Jesucriston' cont yosozenague' che dan' ba bzejni'ida'. Le gon ca' le Spiritw che Diosen' ba gwlejen le'e cont gwzejni'ile yezica'chle bene' chesonxene'ne'. Jesucriston' bnežjw cuine' bedelałj xchene' beque'e xtola'chon' cont bozoe' chio' binlo len Diosen' da' yoble. <sup>29</sup> Nezdá' cate' bich zoa' len le'e yesela'ac bene' yese'nde' yesexoayague' le'e cont cuejyichjle bich gwzenagle che Jesucriston'. <sup>30</sup> Ladjw le'e yesechoj bene' yososed yosolo'ede' diža' güenlaže' gualaz da' yososed yosolo'ede' diža' li. Yesone' ca' cont ga'ole dan' yososed yosolo'e legaue'. <sup>31</sup> Da'nán' le gwsaca' cont nono yesexoayag le'e. Na' le gon xbab, le šon izen' ba gwzoo' bzejni'ida' le'e na' gwneyoeda' le'e do ža do yel gwchežtia' chele.

<sup>32</sup> Na' na'a bene' migw, Diosen' gaclene' le'e na' xtiže'na' gwzejni'ichen can' chacde' le'e. Na' xtiže'na' gaclenen le'e cont šjayzoalenle Diosen' txen len yezica'chle bene' ba gwlej Diosen' zjanaque' lo ne'e. <sup>33</sup> Bi chzelaža' bi da' de che bene', neca chzelaža' xmechwgaque' na' neca xagaque'. <sup>34</sup> Nezczele can' bena' žin cont bžel da' byažjda' len da' beseyažje bene' ca' gosenite' len neda'. <sup>35</sup> Na' bena' žinna' ca' cont blo'eda' le'e cheyała' gaclencho bene' še bi cheseyažjde'. Na' šjasa'laže'le can' gwna Xancho Jesúsen': "Mbalazeč zoacho caten' chnežjwcho bi dan' chnežjwcho bene' clél ca caten' chesone' chio' bi dan' chesone' chio'."

<sup>36</sup> Na' beyož be' Pablon' dižan' nach bzoa xiben' txen len yogo' bene' ca' na' bosol güiže' Diosen'. <sup>37</sup> Na' yogo'lole' gosebeže' che Pablon' na' goseyele' le' na' bosonope' ne'ena'. <sup>38</sup> Nach gosa'aque' len neto' bžinteto'

gan' beyo'oto' lo' barcon'. Da' juisyw gosacde' dan' gože' legaque' bich yesele'ede' le'.

## 21

### *Pablon' beyeje' Jerusalén*

<sup>1</sup> Beyož bze diža' lježto' len bene' ca' nach beyo'oto' lo' barcon' na' zjaydato' licha bžinteto' gan' chi' to yežlio lo' nisdaon' da' nzi' Cos, na' beteyon' bežinto' gan' chi' yeto yežlio lo' nisdaon' da' nzi' Rodas, nach bezsa'to' bezžinto' ciuda Pátara. <sup>2</sup> Na' cate' bežinto' Pátaran' bželetto' yeto barcw dan' chzan' šejen distritw Fenicia, na' beyo'oto' lo'enña'. <sup>3</sup> Na' ba zjaydato' lo' barcon' cate' ble'eto' yežlio dan' chi' lo' nisdao' dan' nzi' Chipre, chin' šla'a rovesle. Nach bedeto' zjaydato' gan' mbane distritw Siria. Nach cate' bezžinto' ciuda gan' nzi' Tiro besyēletje' yoa' da' zonsa' barcon' na' neto' bechojto' lo' barcon'. <sup>4</sup> Na' jaydiljwto' bene' ca' chesonxene' Jesucriston' Tiron' na' bega'anlento' legaque' to xman. Na' Spiritw che Diosen' bzenen legaque' cont gosata'yoede' Pablon' bi šeje' ciuda Jerusalénna'. <sup>5</sup> Perw na' cate' ba gwde to xman beza'to', na' yogüe' len xi'ingaque' len xo'olgaque' gosa'aque' len neto' cho'a yežen' na' bzoa xibto' len legaque' boļ güižto' Diosen' cho'a nisdaon'. <sup>6</sup> Beyožen' bze diža' lježto' na' gwdeļa' lježto', nach beyo'oto' lo' barcon' na' legaque' besyeya'aque' zjaya'ac ližgaque'.

<sup>7</sup> Na' beza'to' ciuda Tiron' bežinto' gan' že' ciuda Tolemaida. Nach beyetjto' lo' barcon' jayna'to' bene' ca' chesonxene' Jesucriston' lo' ciuda Tolemaidan' na' bega'anlento' legaque' tža. <sup>8</sup> Na' beteyo beza'lento' Pablon' na' bežinto' Cesarean' na' jayga'anto' liž Felipe ben' naque' txen len bene' ca' yexop ben' chesaclene' postlw ca' len žin bixjw da' gota'. Na' Felipen' zoateze' cho'e diža' che Jesucriston'. <sup>9</sup> Felipen' nita' tap xi'ine' no'ol güego' na' chosozende' bene' bi dan' ba gož Diosen' legaque'. <sup>10</sup> Zan ža ba gwzoato' liž Felipen' cate' bla' to bene' distritw Judean' bene' le Agabo, lecze chaque' chzende' bene' bi dan' ba gož Diosen' le'. <sup>11</sup> Nach Agabon' gwnabe' xpant Pablon' na' bchejen' ni'a ne'e, na' gože' neto':

—Spiritw che Diosen' ba bzenen neda' bene' Israel ca' že' Jerusalénna' yosocheje' ni'a na' ben' nac che' bant nga na' yesone' le' lo' na' bene' ca' bi zjanac bene' Israel.

<sup>12</sup> Cate' beyož beneto' can' gwna Agabon', neto' len bene' Cesarea ca' gota'yoeto' Pablon' bi šeje' Jerusalénna'. <sup>13</sup> Nach Pablon' gwne':

—Bi cuežle chia' o gonle ga soayaša'. Chzane cuina' yosocheje' neda' na' yesote' neda' Jerusalénna' dan' chyixjue'eda' xtiža' Xancho Jesúsén'.

<sup>14</sup> Na' cate' gocbe'eto' bibi gac gonto' cont cbi šeje' ciuda Jerusalénna', nach bich bi gožto'ne', con gwnato':

—Gac con can' ža Xanchon'.

<sup>15</sup> Nach bsiñi'ato' beza'to' zjaydato' Jerusalén. <sup>16</sup> Na' to chope bene' Cesarean' bene' chesonxen Jesucriston' gosa'aque' txen len neto', na' goseche'e neto' liž to bene' le Mnasón. Bena' ba goc sša chonxene' Jesucriston'. Naque' bene' Chipre, perw ba zoa liže' Jerusalénna'. Na' ba bosoxi'e soato' liže'na'.

### *Pablon' bežine' Jerusalénna' jane'e Jacobon'*

<sup>17</sup> Na' cate' bežinto' ciuda Jerusalénna' bene' lježto' ca' že'na' besyebede' bosoguape' neto' tiox. <sup>18</sup> Na' beteyo gwyejlento' Pablon' jaña'to' Jacobon', na' bžinto'na' ba zjandop zjanžag yogo' bene' blao ben' chosogüia

chesene'e yezica'chle bene' ca' chesonxene' Jesucriston' na'. <sup>19</sup> Nach Pablon' bguape' legaque' tiox na' beyožen' be'lene' legaque' diža' doxen can' ba ben Diosen', le zan bene' bi zjanac bene' Israel ba chesonxene' Jesucriston' gan' ba gwyeye' je'lene' legaque' xtiža' Diosen'. <sup>20</sup> Na' cate' bosozenague' dan' gož Pablon' legaque', nach goso'e yela' choxcen che Diosen' na' gose'e Pablon':

—Bene' migw, nezdo' zan mil bene' Israel gualaž checho ca' ba chesonxene' Jesucriston' na' yogüe' chesacde' chonen byen goncho yogo' da' ca' zjanyoj le'e ley chechon' dan' bzoj Moisés. <sup>21</sup> Na' zane' ba zjanende' chsed chlo'edo' bene' Israel gualaž chechon' nita' laž bene' zito' bich cheyala' yesone' can' ža le'e ley chechon' na' bi yesezoa' xi'ingaque' ca' señw dan' že' circuncisión. <sup>22</sup> ¿Nacxe ye'to' legaque'? le zane' yesežag nga cate' yesende' bač zo' nga da' yoble. <sup>23</sup> Güen goncho quinga: nita' tap bene' nga bene' zoa to da' zjango'o cho'en lao Diosen' na' chesaclaže' yesone' can' gosenen'. <sup>24</sup> Na' cheyala' chi'o' legaque' yodao' blaon' na' gono'ne' txen chixjo' beyixe' ca' gwnežjwle bxozen' gote' cont yexi' yeyachle can' ža leyna'. Na' yeyožen' gac yosošib yichjgaque' can' zjango'o cho'en. Gono' ca' len legaque' cont yogo' bene' yesacbe'ede' bi chzo' ley chechon' to šla'ale can' chesenen', san chono' can' žanna'. <sup>25</sup> Na' ca' nac bene' ca' bi zjanac bene' Israel bene' ca' chesonxene' Jesucriston' yež yoble, ba bzojto' legaque' can' nac yela' güexi'a chechon', gožto'ne' bi yesagüe' yela' guagw dan' chesene' naquen che l' gua'a lšacan' chesejnilaže' bene', na' bi yesagüe' chen, na' bi yesagüe' be chat chosošoque' lba'ba', lecze bi yesata'lene' no'ole bi nac xo'olgaque' o bene' byo bi nac bene' chegaque'.

#### *Gosezene' Pablon' yodao' blaona'*

<sup>26</sup> Beteyo gwza' Pablon' gwče'e bene' ca' tap cont yesyexi yesyeyache' yodao' blaona' can' ža' ley chegaque'na'. Nach Pablon' gwyo'e gana' zoa bxozen' gwdixjue'ede' le' bi ža yanen' yeyož yesaque' xi'laže' cont yosonežjue' beyixe' ca' gote' che to to legaque'.

<sup>27</sup> Bač zoa gac gaže ža chesone' can' ža leyna' cont chesyexi chesyeyache', nach gozej Pablon' lo' yodao' blaona'. Na' bal' bene' Israel ca' za'ac distritw Asian' besele'ede' le' lo' yodaon' na' gosego'oyele' bene' že' do na' cont yesezene' Pablon'. <sup>28</sup> Bososya'adie', gosene':

—Le'e bene' gualaž, le gon txen sencho benga. Chde' doxen chsed chlo'ede' contr yež Israel chechon', na' contr ley chechon' dan' bzoj da' Moisésen', na' contr yodao' checho nga. Na' na'a ba none' yeto da' mal juisyw contr yodao' dan' nac che Dios chechon', ba gwlo'e bene' bi zjanac bene' Israel lo'enna'.

<sup>29</sup> Gosene' ca' neče da' besele'ede' Pablon' lo' ciudan' chdalene' to bene' ciuda Efeso le' Tróximo, na' gosacde' še Pablonan' gwče'e le' lo' yodao'na', la'czla' bi bene' ca'.

<sup>30</sup> Na' gosonchgüe' to žašyey. La' besedobte bene' zan cho'a yodaon' na' goso'e lo' yodaon' goseniže' Pablon', besyebeye' le' na' la' bosyoseyjwte' puert ca'. <sup>31</sup> Na' ba zoa yesote' le' cate' gwneze ben' yo'o lo' ne'e soldadw che nación Roma ben' že' lo' ciudan'. Cate' gwneзде' ba chac to žašyey juisyw doxen ciudan', <sup>32</sup> nach btobe' soldadw ca' len bene' gwnabia' chegaque' ca', na' gosa'aque' zja'acsese' gan' chi' da' zeda'. Na' cate' bene' ca' chesote' Pablon' besele'ede' ba besežin soldadw ca' len bene' gwnabia' chegaque' ca', la' gosebezte' bich goseyine' Pablon'. <sup>33</sup> Cate' ben' yo'o lo' ne'e yogo' soldadon' bžine' gan' že' bene' ca', na' bene'



mandadw gosoḡe' soldadw che' ca' Pablon' na' bosocheje' le' chope gden. Nach gwnabde' bene' ca' že'na' no nac Pablon' na' bi bene'. <sup>34</sup> Na' bene' ca' že'na' bososya'adie', gwde gwdele chesena to toe'. Na' gwde cbi gwyejni'i ben' yo'o lo' ne'e soldadw ca' bin' chac catec sšag chesone', nach bene' mandadw gosoche'e Pablon' cuartel. <sup>35-36</sup> Nach yogo' bene' ca' zjana'ogüe' legaque' chesosye'e zjambeque' to žaš juisyw. Na' cate' besežine' cho'a nepe' che cuartelen' goselen soldadw ca' Pablon' neche dan' chesaclaže' bene' ca' yesenize' le', na' yogo' bene' ca' chesosye'e, chesene':

—Le gote'.

*Pablon' be'lene' bene' zan ca' diža'*

<sup>37</sup> Baḡ cheso'e lo' cuartelen' cate' Pablon' gože' ben' yo'o lo' ne'e soldadw ca':

—¿Goḡo' latje gua' to chope diža'?

Nach bena' gože'ne':

—¿Chaco' diža' griego? <sup>38</sup> ¿Bi naco' bene' nación Egipto ben' gwda btob tap mil bene' güet bene' bat ngaze na' gwche'e legaque' latje dašen' gan' chesone' contr gobiernen'?

<sup>39</sup> Nach Pablon' gože'ne':

—Gague benan' neda'. Neda' naca' to bene' Israel na' ciuda blao gan' mbane distritw Cilician' dan' nzi' Tarso nac laža'. Ben goclen beḡ latje güe'lena' bene' quinga diža'.

<sup>40</sup> Nach bena' bnežjue' latje. Nach Pablon' gwzeche' lo' nepen' bene' seḡw len ne'e cont bene' ca' že'na' gosenite' šize bosozenague' che'. Nach gwzologüe' be'e diža' len legaque' diža' hebreo.

## 22

<sup>1</sup> Gože' legaque':

—Bene' gole len bene' xcuide', le gwzenag diža' dan' gua' laole nga.

<sup>2</sup> Na' cate' gosache'ede' chne' legaque' diža' hebreo gosenite' šize. Nach Pablon' gože' legaque':

<sup>3</sup> —Neda' naca' bene' Israel. Golja' ciuda Tarso gan' mbane distritw Cilicia, perw gwcha'ogua' ciuda Jerusalén ni. Na' bseda' len maestrw blao ben' le Gamaliel. Bzejni'ide' neda' doxen can' ža ley che da' xozxta'ocho ca'. Na' godca' chonchgua' can' chazlaže' Diosen', cayanen' chaque le'e za'acle nga na'a. <sup>4</sup> Na' bchi bsaca' zan bene' ca' chesejnilaže' Jesucriston', goclaza' gotto' legaque'. Na' gwxena' no bene' byo na' no no'ole chesonx-ene' le' na' gwche'egaca'ne' ližya. <sup>5</sup> Bxoz ben' naquech bene' blao na' nochle bene' gole blao ca' chesenabia' nación Israel chechon' zjanezde' can' bena'. Legaque' gosone' yiš dan' bexua' gwya'a ciuda Damascon' gan' godca' sena' baltez bene' chesonxen Jesucriston' cont che'egaca'ne' Jerusalén ni par gonto'ne' castigw.

*Pablon' cho'e diža' can' goc che' cate' Diosen' bocobe' yichjlažda'ogüe'*  
(Hch. 9:1-19; 26:12-18)

<sup>6</sup> Na' šlac zya'a ciuda Damascon' ca do guagwbiž cate' to be'ni' gual da' za' yaba gwyechjen neda'. <sup>7</sup> Na' gwbiža' lo' yon' benda' to bene' gože' neda': "Saulo, Saulo ¿bixchen' chchi chsaco' neda'?" <sup>8</sup> Nach boži'a xtižen', goša'ne': "¿No le' bene'?" Nach gwne': "Nedan' Jesús bene' Nazaret na' neda' chchi chsaco'." <sup>9</sup> Bene' ca' zya'alena'na' besežebchgüe' besele'ede' be'nin', perw bi gosejni'ide' dan' gož Jesúsén' neda'. <sup>10</sup> Nach goša'ne':

“¿Bin' cheyała' gona' Xana?” Nach Xana' Jesúsen' gwne': “Beyas na' gwyejteze ciuda Damascón, na' cate' žino'na' to bene' ye'e le' dan' cheyała' gono'.” <sup>11</sup> Na' gwchoła' catec gwna'chgua' be'nin', nach bene' ca' zya'alena' t xen gosoxe'de' taca' cont bžinto' Damascón.

<sup>12</sup> Na' to bene' le Ananías zoe' ciuda Damascón ben' chonxene' Diosen' do yichj do laže' na' chzenague' che yogo' ley dan' bzoj Moisésen'. Na' yogo'loł bene' gualaž checho ca' že'na' cheso'e xtiža' Ananíasen' naque' bene' chon da' güen. <sup>13</sup> Ananíasna' bide' gan' zoan' na' cate' ble'e nach gože' neda': “Saulo, bele'e.” Na' beyož gwne' ca' la' bele'eteda' na' ble'eda' le'. <sup>14</sup> Nach gože' neda': “Dios ben' chonxencho na' ben' benxen da' xoxxta'ocho ca', len' ba gwleje' le' cana'te cont nezd' can' chaclaže' gono', na' ba ble'edo' Xi'ine' ben' nac la'zelagüe bene' chon da' güen, na' ba bendo' xtiže'.” <sup>15</sup> Nachen' go'o xtižen' len bene' zan bene' že' lo yežlion' gwzejni'igacdo'ne' da' ca' ba bendo' na' ba ble'edo'.” <sup>16</sup> Na' lecz gož Ananíasen' neda': “¿Bičen' cuezo'? Yo'o so' nis. Na' nabdo' Xancho Jesucriston' cont yeya' yeyibe' yichjlažda'oguoñ len da' malen'.” Can' gože' neda'.

*Diosen' gwleje' Pablon' cont be'e xtižen' len bene' ca' bi zjanaque' bene' Israel*

<sup>17</sup> Na' gwdena' beyeda' ciuda Jerusalén ni na' gwya'a lo' yodao' blaon' jel güiža' Diosen', na' šlac choł güiža'ne' ble'edagüeda' Xancho Jesucriston'. <sup>18</sup> Na' Xanchoñ gože' neda': “Bi šedo' chojo' ciuda Jerusalén ni, le bi yosozenag bene' quinga xtižo' dan' go'o chian'.” <sup>19</sup> Nach goša'ne': “Xana', legaque' zjanezde' neda' gwya'a to to yodao' jet jatina' bene' ca' chesonx-ene' le' na' bseyjwgaca'ne' ližya. <sup>20</sup> Na' lecz naca' bene' ca' t xen cate' gosote' Esteban ben' be' xtižon', na' neda' gwna'a xadon' che bene' ca' gosot le'.” <sup>21</sup> Nach Xancho Jesucriston' gože' neda': “Bchoj na' seła' le' zito' go'o xtižan' len bene' ca' bi zjanac bene' Israel.”

*Pablon' len ben' yo'o lo ne'e soldadw ca'*

<sup>22</sup> Bene' ca' zjandoben', nga zelao bosozenague' xtiža' Pablon', beseže'e da' be'e diža' che bene' zito' bene' bi zjanac bene' Israel, nach gosezolagüe' chososye'e, chesene':

—Le got bena'. Bich cheyała' bane'.

<sup>23</sup> Bososya'adie' na' beselocchgüe' bosozala' xagaque' ca'ale na' gosaše' bište yon' bosozalen' lo be'. <sup>24</sup> Cate' ble'e ben' yo'o lo ne'e soldadw ca' can' chesonen' nach bene' mandadw gosego'o soldadw ca' Pablon' lo' cuartelen' na' yesitye'ne' cont güe'e diža' bi da' malen' ba bene'. Goclaže' nezde' bičen' bene' lo ciudan' chososya'adie' che'. <sup>25</sup> Na' ba zjancheje' Pablon' cont yesitye' le' cate' gože' to soldadw ben' zena' bene' chnabi'e lao to gayoa soldadw:

—Can' ža ley, bi de lsens chinle neda' sin cbi nezele še bin' nona', le neda' naca' bene' nación Roma.

<sup>26</sup> Beyož gože' bene' gwnabia' che soldadon' ca' la' gwyejte ben' lao ben' yo'o lo ne'e yogo' soldadw ca', ježe'ne':

—Gwsaco' bin' gondo' ben' ba bdołan', le naque' bene' nación Roma.

<sup>27</sup> Nach ben' yo' o lo ne'e soldadw ca' gwyeje' lao Pablon' gože'ne':

—Gwna neda' ¿le bene' nación Roma le'?

Nach Pablon' gože'ne':

—Bene' nación Roma neda'.

<sup>28</sup> Nach ben' yo'o lo ne'e yogo' soldadw ca' gože' Pablon':

—Mechw xen gwxaqueda' cont naca' cuent len beṇe' nación Roman'.  
Nach Pablon' gože'ne':

—Neda' golja' naca' beṇe' nación Roma.

<sup>29</sup> Nach beṇe' ca' ba nita' cont yeseýine' Pablon' la' besyecuaste' cuiten',  
na' ben' yo'o lo ne'e yogo' soldadw ca' lecze bžebe' dan' ba bcheje' Pablon'  
cont yeseýine'ne'.

*Gosele' Pablon' gan' chosoxi'a beṇe' ca' chesenabia' Israelen'*

<sup>30</sup> Nach beteyo ben' yo'o lo ne'e soldadw ca' gwseže' gdenṇa' nchej  
Pablon'. Na' bene' mandadw besedobe bṇoz gwnabia' ca' len yogo' beṇe'  
gole blao ca' chesenabia' nación Israelen' cont nezd' bi dan' chosocuiše'  
Pablon'. Na' cate' ba besedobe beṇe' ca' nach gwleje' Pablon' na' gwsele'  
le' gwzeche' laogaquen'.

## 23

<sup>1</sup> Nach Pablon' gwṇe'e beṇe' gole blao ca' chesenabia' nación Israelen'  
na' gože' legaque':

—Beṇe' migw, ža ṇa'aža nezd' lo' lažda'ogua' ba bena' can' chazlaže'  
Diosen'.

<sup>2</sup> Nach Ananías ben' nacch bṇoz blao bene' mandadw len beṇe' ca' zjaze  
cuit Pablon' yesebaže' cho'ena'. <sup>3</sup> Na' Pablon' gože'ne':

—¡Diosen' gone' le' castigw, beṇe' güexoayag! Chi'o nga cont gono' yela'  
justis chia' can' ža ley chechon' na' chono' contr ley beno' mandadw  
yesebaže' choa'.

<sup>4</sup> Beṇe' ca' že' gała'ze gose'e Pablon':

—Bi cheyala' yoži'o xtižen' ca', le naque' bṇoz blao che Dios.

<sup>5</sup> Nach Pablon' boži'en gwne':

—Beṇe' migw, bi gwnezd' še beng' bṇoz blaon'. Nezd' Xtiža' Diosen'  
dan' nyojen žan: “Bi yoži'ile diža' zi' len beṇe' gwnabia' chelen'.”

<sup>6</sup> Pablon' gocbe'ede' beṇe' ca' chesenabia' nación Israelen' zjanaque'  
chople. Bale' chesejle'e can' chsed chlo'e beṇe' ca' zjansi'e saduceo na'  
yebale' can' chsed chlo'e beṇe' ca' zjansi'e fariseo. Nach Pablon' gože'  
beṇe' ca' že'na':

—Beṇe' migw, naca' beṇe' fariseo, na' naca' xi'in beṇe' fariseo. Na' zoa'  
nga chonle yela' justis chia' neche chejli'a yesyeban beṇe' guat ca'.

<sup>7</sup> Beyož gwne' ca' beṇe' fariseo ca' len beṇe' saduceo ca' ben' zjandop  
zjanžag na' gosezolagüe' chosošaše', na' besechoje' chople. <sup>8</sup> Le beṇe'  
saduceo ca' chesene' bi yesyeban beṇe' guat ca' na' bi chesejle'e nita'  
angl o nochle spiritw yoble. Na' beṇe' fariseo ca' chesejle'e yesyeban  
beṇe' guat ca' na' chesejle'e nita' angl na' nita' nochle spiritw. <sup>9</sup> Yogo'  
ben' že'na' chesosye'e chosošaše'. Nach to chope beṇe' zjansed ley dan'  
bzoj Moisésen', ben' zjanac beṇe' fariseo, gosezože'e gosone' Pablon' txen,  
gosene':

—Bibi da' mal non beng'. Še no spiritw o no angl ba gwṇelen le', bi  
cheyala' goncho contr le', le contr Diosen' goncho še ca'.

<sup>10</sup> Leca gwche' to žaš xen na' ben' yo'o lo ne'e yogo' soldadw ca' bžebe' še  
yosozoxj yosotine' Pablon'. Nach bene' mandadw besežin soldadw che'  
ca' cont jasyeleje' Pablon' ladjo beṇe' ca' na' besyeche'ene' cuartelen' da'  
yoble.

<sup>11</sup> Nach že' beteyon' Xancho Jesucriston' bžine' gan' de Pablon' na'  
gože'ne':

—Bi žebo' Pablo. Can' ba bi'o xtižan' Jerusalén ni, lecz ca' cheyała' go'o xtižan' ciuda Roma.

*Bosoxi'e yesote' Pablon'*

<sup>12</sup> Na' beteyo bal bene' Israel besedobe' na' bosoxi'e yesote' Pablon'. Na' gosechogbi'en, gosene':

—Diosen' gone' chio' castigw še ye'ej gagwcho sin cbina' gotcho Pablon'.

<sup>13</sup> Nde čhoa bene' bosoxi'e yesote' Pablon'. <sup>14</sup> Nach ja'aque' gan' že' b̄xoz gwnabia' ca' len bene' gole bene' blao ca' chesenabia' nación Israelen' na' gose'e legaue':

—Bach gwchogbia'to' gon Diosen' neto' castigw še ye'ej gagwto' sin cbina' gotto' Pablon'. <sup>15</sup> Na' le yotobe lježle le gon yela' güexi'a gwxe cont nabele ben' yo'o lo ne'e yogo' soldadw ca' cueje' Pablon' yide' laolen', gwde'ele za' yeyiljwyožechle bi da' xinj ba none'na'. Na' neto' cue'na'oto'ne' tnez gotto'ne' cate' za' le'e gan' nita'len'.

<sup>16</sup> Na' zoa to bi' byo bi' nac xi'in bene' zan Pablon' na' lebe' benebe' da'na' chesacde' yesonde' le'. Na' gwyejbe' cuartelen' jazenebe' Pablon'. <sup>17</sup> Nach Pablon' goxe' to bene' chnabi'e to gayoa soldadw na' gože'ne':

—Ben goclen gwche' bi' nga lao bene' gwnabia' chelen'. De to da' ye'be' le'.

<sup>18</sup> Bene' gwnabia' che soldadon' gwche'e bi'na' lao ben' yo'o lo ne'e yogo' soldadw ca' na' gože' le':

—Pablo ben' de ližya goxe' neda' na' gwñabe' goclen lagua' cont zedesana' bi' nga laguon', že' de to da' ye'be' le'.

<sup>19</sup> Nach ben' yo'o lo ne'e yogo' soldadw ca' bexae' na'be' gwche'ebe' to šla'ale gwñabde'be':

—¿Bi che'ndo' nao' neda'?

<sup>20</sup> Nach bi'na' gožbe' le':

—Bene' blao che bene' Israel gualaž cheto' ca' ba bosoxi'e yesenabe' cuejo' Pablon' gwxe na' yosode'ede' selo'ne' gana' chesežag bene' gwnabia' čhegaquen' cont yeseyiljwyože' bi da' xinj non Pablon'. <sup>21</sup> Perw bi šejli'o čhegaue'. Nde čhoa bene' ca' yesebe'na'ogüe' Pablon' tnez cont yesote' le' na' ba gosechogbi'en bibi yes'e'ej yesagüe' šlac bina' yesote'ne'. Na' ba chesebeze' gwzenago' čhegaue' cont cuejo' Pablon'.

<sup>22</sup> Nach ben' yo'o lo ne'e soldadon' bouse'e bi'na' na' gože'be':

—Gwsaco' bi go'o diža' che rsonna' ba bedesano' lagua' nga.

*Gosesele' Pablon' lao gobernador ben' le Félix*

<sup>23</sup> Nach ben' yo'o lo ne'e yogo' soldadw ca' goxe' čhope bene' gwnabia' ben' chesenabia' to gayoa güeje soldadw na' bene' mandadw yososi'ni'a čhegaue' cont šja'aque' ciuda Cesarea do cheda ga šeže'le na' yeseče'e čhop gayoa soldadw bene' yesa'ac ni'aze na' gayonši bene' yesebia cabayw na' yechop gayoa soldadw bene' yesoxe' lanza. <sup>24</sup> Lecze gože' legaue' chyažje cabayw be cuia Pablon', le le'na' yeseče'e gana' zoa gobernadores' ben' le Félix, na' yesape' Pablon' cont bibi gac che' tnez.

<sup>25</sup> Nach bzoje' to cart che gobernadores' da' bgoxe' legaue', žan:

<sup>26</sup> “Señor Gobernador: Neda' Claudio Lisias chzoja' le' gobernador Félix, nacteco' bene' blao, chguapa' le' tiox. <sup>27</sup> Bene' Israel ca' ba gosezene' benga na' ba bosoxi'e yesote'ne', perw cate' gwñezda' naque' bene' nación Roma, gwy'a len soldadw čhia' ca' jasla'ne' lo na'gaquen'. <sup>28</sup> Na' cont nežda' bičen' chosocuiše' le', gwčhi'ane' gan' chosoxi'a bene' gwnabia'

che nación Israelen'. <sup>29</sup> Nach gwñezda' chosocuiše' le' che bize da' chesac che' len ley chegaque'na', na' bi nacho bi da' mal ba none' cont yesote' le' o cont gate' ližya. <sup>30</sup> Perw na' ba gwñezda' ba bosoxi'a bene' Israel ca' yesote' le', da'nan' la' chselā'tia'ne' laguo' le' na' lecze bena' mandaw len bene' ca' chosocuiš le' šja'aque' laguo' na' yesene' bin' chesac chegaque' len le'. Si'xenšco' yogo' da' quinga chñeyoeda' le'. Claudio Lisias."

<sup>31</sup> Nach soldaw ca' gosone' can' ben bene' gwnabia' chegaquen' mandaw, besyebeje' Pablon' na' šeže'le gosegüe'e nez len le' besežine' yež da' nzi' Antípatris. <sup>32</sup> Na' cate' gwyeni' besyebi'i soldaw ca' ja'ac ni'aze' jaya'aque' cuartelen' na' bene' ca' gosebia cabayon' ja'aclene' Pablon'. <sup>33</sup> Na' cate' besežine' ciuda Cesarean' bosonežjue' gobernadoren' carten' zjanoxe'na' na' lecz gosone' Pablon' lo' ne'e. <sup>34</sup> Na' gobernadoren' cate' beyož blabe' carten' gwñabde' Pablon' ga bene' naque'. Na' cate' gwñezde' naque' bene' distritw Cilicia, <sup>35</sup> nach gože'ne':

—Gwzenaga' bin' nao' cate' yesela'ac bene' ca' chosocuiš le'.

Nach bene' mandaw bososeyjue' Pablon' lo' yo'o gan' chbe' rey Herodesen' cate' chone' yela' justis.

## 24

### *Pablon' be'e diža' lao gobernador Félix*

<sup>1</sup> Cate' bač goc gayo' ža zoa Pablon' ciuda Cesarean', nach bžin Ananías ben' nac bxož bloach che bene' Israelen' na' nche'e to chope bene' gole blao chegaque' na' len to bene' le Tértulo ben' chac chne' lao bene' gwnabia'. Na' ja'aque' lao gobernadoren' gosagüe' xya che Pablon'. <sup>2</sup> Na' cate' jasexi'e Pablon', Tértulon' gwdagüe' xya che', gože' gobernador Félixen':

—Si'xeno', señor gobernador, za'to' laguo' nga. Binlo' juisyw zoa nación chechon' na' da' zan da' šagüe' ba chac da' chnabi'o neto'. <sup>3</sup> Gate'tez zoato' žato' choxcleno' can' chono'na', señor gobernador, catec chbeto' can' chnabi'ona'. <sup>4</sup> Na' cont bi goneto' le' bichle zed, chata'yoeda' le' gwzenago' šlož dao' dan' zedenato' na'a. <sup>5</sup> Ben' ba goxo' laguo' nga, ñezeto' naque' to bene' chbecchgua da' zed. Chde' doxen yežlion' chone' cont neto' bene' Israel chacto' chople. Na' naque' bene' blao len bene' ca' chesene' bene' nazareno lagüe chesejnilaže' Jesús ben' nac bene' yež Nazaret. <sup>6</sup> Na' goclaže' gone' da' mal juisyw lo' yodao' cheton' na' da'nan' gwzento'ne' cont chogbia'to' che' con can' ža ley cheton'. <sup>7</sup> Perw na' gwyaz Lisiasen' ben' nac bene' gwnabia' che soldaw ca' na' beque'ene' lo' na'ton'. <sup>8</sup> Na' gože' neto' cheyała' yidto' laguo' nga cont gwcuisto'ne'. Guac ñabdo' Pablon' cuino' cont ñezdo' nac da' li can' chcuisto'ne' nga.

<sup>9</sup> Nach bene' Israel ca' za'aclene' Tértulon' gosaque' toze len le' gosene' le' can' naquen. <sup>10</sup> Nach gobernadoren' bene' señw len Pablon' cont ñe', na' Pablon' gwzologüe' gwne':

—Ñezda' ba goc zan iz chono' yela' justis che nación ni, na' da'nan' chbeda' gwzoo' rson chian' laguon'. <sup>11</sup> Na'a chac šižinw ža gwyaa' Jerusalénna' jenxena' Diosen'. Na' guac ñabdo' bene' ca' besele'e neda' še leca' naquen. <sup>12</sup> Bi nacho besele'ede' chacyoža' len no bene' lo' yodao' blaon' ñe' lo' yodao' yoble o gate'teze lo' ciudan'. <sup>13</sup> Na' bibi gac yeson bene' quinga cont yosolo'e napa' dola' ca dan' chosocuiše' neda'. <sup>14</sup> Bi gwcuša' diža', da' li chonxena' Diosen' ben' gosonxen da' xozxta'oto' ca', la'czla' chonxena'ne' can' cheson bene' ca' zjano' da' cobe dan' bi

chesazlaže' bene' quinga, na' chejli'a che yogo' lo' Xtiža' Diosen' dan' nyoj le'e ley cheton' na' da' ca' bosozoj bene' ca' goso'e xtiža' Diosen' cani'. <sup>15</sup> Na' zoa' lez yosban Diosen' bene' ca' ba gosat, bene' güen lente bene' mal. Lencze bene' gualaž chia' can' nite' lez gon Diosen' ca'. <sup>16</sup> Da'n'an' zoa' chi' yichja' chona' can' chaclaže' Diosen' neche nezda' lo' yichjlažda' ogua' bibi dola' napa' lao Diosen' ne lao benachen'.

<sup>17</sup> Ba goc zan iz zoa' zito' na' za' bela'a Jerusalenna' na'a cont bnežjua' mechw da' btoba' da' gaclenen bene' yaše' ca', na' lecz ca' jasana' yelaten' lo' yodao' blaon'. <sup>18</sup> Ca' goquen' zoa' lo' yodao' blaon' ba bexi beyacha' can' cheyala' gacto' cont chnežjwto' bi dan' chnežjwto' lao Diosen', cate' to chope bene' Israel za'ac Asia besele'e gan' zoa'na'. Na' bi nacho mbeca' žaš, neca ndop nžaga' bene' zan. <sup>19</sup> Na' bene' ca' za'ac distritw Asian' cheyala' yesid cuine' yosocuiše' neda' laguo' nga še bi da' mal chesacde' chona'. <sup>20</sup> Na' bene' quinga nita' nga guac yesene' še bi da' mal nona' caten' bosodie' neda' lao bene' ca' chesenabia' nación Israelen'. <sup>21</sup> Še toz dan' bi chesazlaže' dan' goše' gaca'ne' caten' zjandob bene' ca' chesenabia', gwnia': "Ca nac yela' justis chia' dan' chonle na'aža, chonlen dan' chejli'a gwžin ža yesyeban bene' ca' ba gosat."

<sup>22</sup> Gobernador Félixen' ba nezde' can' chosozejni'i bene' ca' ba chesejle' che Jesucriston', na' cate' bende' can' gwna Pablon', bich goclaže' gone' yela' justis che' ca' hora', gwne':

—Cate' yid Lisiasen' ben' nac bene' gwnabia' che soldadw ca', cana' yeyož gwzenaga' can' nac dan' chagwle xya nga.

<sup>23</sup> Nach bene' mandadw beche' xan soldadon' Pablon' gan' die' ližyan' na' be'e latje gon Pablon' con bi chaclaže' gone', na' be'e latje jaseña' bene' migw chen' le' jasesane' bi dan' byažjde'.

<sup>24</sup> Nach beza' gobernador Félixen' ciuda Cesarean', perw cate' gwde to chope ža bežine' da' yoble nche'e no'ol che' ben' le Drusila. Na' Drusilan' naque' no'ole Israel. Nach gobernadore' bene' mandadw gosaxe' Pablon' da' yoble na' bzenague' be' Pablon' diža' gwne' yogo' lo' bene' cheyala' yesejnilaže' Jesucriston'. <sup>25</sup> Nach Pablon' be'lenche' le' diža' can' cheyala' gaccho bene' güen lao Diosen', na' can' gwsaca'cho cont bi goncho da' mal, na' lecze be'lene' le' diža' can' gon Diosen' cate' žin ža gone' justis che yogo' benach na' gwnežjue' castigw che yogo' bene' bi chesejnilaže' le'. Na' gobernador Félixen' bžebe' na' gože' Pablon':

—Da' na'ze gwzenaga' na'a, guac yeyejo'. Na' cate' nlatja' guaxcza' le' yeto.

<sup>26</sup> Gobernadore' godce' še gwnežjo Pablon' le' mechw cont yosane' le'. Da'n'an' goxe' Pablon' güeltze be'lene' le' diža'. <sup>27</sup> Ca' chac gwde chop iz nach yeto bene' yoble bene' le Porcio Festo gwdie' blane' xlatje'. Na' Félixen' goclaže' yega'ane' binlo len bene' Israelen' cate' ba bechoje' gobernador, da'n'an' bene' mandadw bega'an' Pablon' ližyan'.

## 25

### *Pablon' bzoa rson che' lao gobernador Feston'*

<sup>1</sup> Na' cate' bžin Feston' ciuda Cesarean' gan' nabi'e, gwzoe' šone ža na' gwze'e gwyeje' Jerusalenna'. <sup>2</sup> Nach bžox gwnabia' ca' len nochle bene' blao che bene' Israel ca' ja'aque' jaseñe'e le' cont bosocuiše' Pablon'. <sup>3</sup> Na' gosata'yoede' Feston' gone' mandadw šjasesane' Pablon' Jerusalén.

Gosata'yoede' le' gone' ca' le gosacłaze' yesebe'na'ogüe' Pablon' cont yesote'ne' tnez. <sup>4</sup>Na' gobernador Feston' boži'e xtiža'gaque', gwne':

—Yega'anche' Cesarean' gan' die' ližyan' le neda' bich chžeda' ša'a na'. <sup>5</sup>Na' le cuej no bene' gwnabia' chele sela'le legaque' len neda' cont yosocuiše' le' lagua' gan' gona' yela' justis še bi da' xinj ba none'.

<sup>6</sup>Nach gwzoa' gobernador' len legaque' Jerusalénna' do xono' o do ši ža na' gwdena' beze'e beyeje' Cesarean'. Na' beteyo gwchi'e gan' chone' yela' justisen' na' bene' mandadw gwyej Pablon' lagüen'. <sup>7</sup>Nach cate' bžin Pablon' lagüen' ba nita' bene' Israel ca' za'ac Jerusalénna' na' la' gosechjte' le' na' gosezolagüe' bosocuiše' le' chesene' da' zan da' mal juisyw ba bene', perw bi blo'elaon še diža' li cheso'e. <sup>8</sup>Nach Pablon' bzoa rson che', gwne':

—Bibi doła' napa' len ley che neto' bene' Israel ne len yodao' blao cheton' na' ne len rey César ben' chnabia' doxen nación Roman'.

<sup>9</sup>Na' Feston' goclaže' yega'ane' binlo len bene' Israel ca', da'nan' gože' Pablon':

—¿Bi che'ndo' sao' Jerusalén gona' yela' justis chion' na'le che yogo' da' ca' chosocuiš bene' quinga le'?

<sup>10</sup>Nach Pablon' gwne':

—Rey Césaren' ba nzoe' le' cont gono' yela' justis, na' cheyała' gac yela' justis chia' laguo' nga. Ca nac bene' Israel quinga, le' nezczedo' bibi da' xinj na' gona' len legaque'. <sup>11</sup>Šaca' ba gwđapa' doła' o bichle da' ba bena' da' cheyała' gata', bi žia' bi gata'. Perw bibi nona' ca nac dan' chosocuiše' neda' nga, na' nono zaca' gwde neda' laogaque'na'. Da'nan' chnaba' tia' lao rey Césaren' cont gone' yela' justis chian'.

<sup>12</sup>Nach Feston' bene' yela' güexi'a len bene' gwnabia' che' ca' bi yesone' len Pablon' nach gože'ne':

—Ba gwñabo' tio' lao rey César na' lagüe' nan' šejo'.

### *Gobernador Feston' bdie' Pablon' lao rey Agripan'*

<sup>13</sup>Na' cate' ba gwde yeto chope ža, rey Agripa len no'ol che' ben' le Berenice besežine' Cesarean' bedeseguape' Feston' tiox. <sup>14</sup>Na' cate' gwneze gobernador Feston' nite' yezan ža, nach be'lene' rey Agripan' diža' che Pablon', gože'ne':

—Zoa to bene' nyixjw Félixen' ližya nga cate' bechoje'. <sup>15</sup>Na' cate' gwya'a Jerusalénna' bžoz gwnabia' ca' na' nochle bene' blao che bene' Israel ca' gosenabe' choglaguan' cont gaque' castigw. <sup>16</sup>Perw na' goše'gaca'ne' bi de costumbr che chio' bene' nación Roma gwdecho bene' yesaque' castigw še bi yesyedilagüen' len bene' ca' chosocuiš le' cont yosozoa rson chegaque'. <sup>17</sup>Nach cate' besela'aque' nga beteyo la' gwche'tia' gan' chona' yela' justis na' bena' mandadw gosebeje' Pablon'. <sup>18</sup>Na' cate' bosocuiš bene' ca' le', ne toz da' mal dan' chacda' yososbague'de' le' bibi gosene'. <sup>19</sup>Dan' chac chegaque', bi chejnilaže' Pablon' can' chesejnilaže' legaque', na' cheso'e diža' che to bene' ba got, bene' le Jesús, na' Pablon' že' mbancze'. <sup>20</sup>Cate' bich bi bežellaža' gona' ca dan' chesac chegaquen' na' goša' Pablon' še chaclaže' yodia'ne' Jerusalén cont gac yela' justis chen' che da' ca' chososbague'de' le'. <sup>21</sup>Nach Pablon' gwñabe' šeje' gone' yela' justis che' lao rey César Augusto, na' bena' mandadw beyeyjue' šlac gac gwđia'ne' lao rey Césaren'.

<sup>22</sup>Nach rey Agripan' gože' Feston':

—Chaclaža' gwznenaga' can' choe' ben' dižan'.

Nach Feston' gože' le':

—Gwxe gwzenago' che' šeca'.

<sup>23</sup> Nach beteyo gosacxenchgua rey Agripan' len Berenice cate' goso'e gana' chi' gobernadores', na' lecz zjachi' bene' ca' chesenabia' soldadw ca' na' yogo' no bene' blao che ciudan'. Na' gwdena' Feston' bene' mandadw jasexi'e Pablon'. <sup>24</sup> Na' Feston' gwne':

—Rey Agripa, na' len yogo' le'e že'le nga len neto', ca nac benga ze laole nga, yogo' bene' Israel bene' že' Jerusalén len bene' že' Cesarea nga ba gose'e neda' benga naque' bene' mal na' yogo'cze' chesene' bi cheyala' bane'. <sup>25</sup> Na' ba gwñabyoža' na' gota'bia' bibi none' da' zaca' choglaguan' che' gate'. Na' ba gwñabe' tie' lao rey César gone' yela' justis che', na' ba gwcheba' gwdia'ne' ciuda Roma na'ale gan' zoa rey Césaren'. <sup>26</sup> Na' chaczejlaža', le bibi chežellaža' gwzoja' reyen' yapa'ne' bin' none'. Da'nan' bach gwleja'ne' laole nga, na' chbechgüeda' chbeja'ne' laguo' le' rey Agripa, cont yeyož gwzenagcho che' na' gata' bi da' gwzoja'. <sup>27</sup> Chacda' bi naquen to licha seła'ne' Roman' sin cbi gwzoja' še bin' none'.

## 26

*Pablon' bzoe' rson che' lao rey Agripan'*

<sup>1</sup> Nach rey Agripan' gože' Pablon': —Guac nao' bi da' gaclenen le'.

Nach Pablon' gwlis ne'en lao bene' ca' gwzolagüe' bzoa rson chen', gwne':

<sup>2</sup> —Chbechgüeda' rey Agripa, ba gosone' latje gua' diža' laguo' nga na'a ca nac dan' chosocuiš bene' Israel gualaž checho ca' neda'. <sup>3</sup> Le' nombi'o costumbr che chio' bene' Israel na' nezdo' can' chesacyož bene' gualaž checho ca' legacze'. Da'nan' chata'yoeda' le' gapšco' yela' chxenlaže' gwzenago' chia' nga.

*Quinga ben Pablon' cate' bina' šejnilaže' Criston'*

<sup>4</sup> Yogo' bene' Israel gualaž chechon' zjanezde' can' ba gwzoo' chonxena' Diosen' cate' ne' nactia' bidao', caten' gwzoo' laža' lente caten' gwzoo' ciuda Jerusalén. <sup>5</sup> Na' še chese'nde' yeso'e diža', lecze zjanezde' goca' txen len bene' ca' zjansi'e fariseo cate' nactia' bi' xcuide' na' bene' fariseo ca' chesonche' yogoloł costumbr gole can' nyoj ley chechon' clel can' cheson yezica'ch bene' Israel gualaž checho ca'. <sup>6</sup> Na' legaque' chesagüe' xya chia' neche chejli'a gwžin ža cate' Diosen' yosbane' bene' guat ca' can' gože' da' xoxxta' ocho ca'. Neche da'nan' zoa' nga na'aža cont gac yela' justis chian'. <sup>7</sup> Bene' zan lo šižinw cue' chio' bene' Israel nite' chesebeze' batcan' yosban Diosen' bene' ca' ba gosat, can' že' gone'. Da'nan' chesonxene' le' do ža do yel. Lecz neda' zoa' lez gac ca', na' da'nan' bał bene' Israel gualaž chechon' chosocuiše' neda' nga rey Agripa. <sup>8</sup> Na' le'e chi'le chzenagle chia', žbixchen' chaquele nono šejle' dan' yosban Diosen' bene' ca' ba gosat?

*Cana' Pablon' bgue'ede' bene' chesejnilaže' Criston'*

<sup>9</sup> Cana' neda' godca' cheyala' gue'eda' bene' ca' chesonxen Jesús ben' nac bene' Nazaret, na' da' zan benchgua' contr legaque'. <sup>10</sup> Bene' zan bene' chesejle' che Jesúsen' Jerusalénna' gwduxjua' ližya, gwropa' yiš dan' bosozoj bxoz gwnabia' ca' cho'en diža' napa' yela' gwnabia' cont gona' ca'. Na' cate' gosechoglagüe' yesote' no bene' ca', goca' toze can' bosoxi'e yesone'. <sup>11</sup> Na' zan las gwy'a to to yodao' jasaca' legaque'



cont yesebejyichje' bich yesonxene' Jesúsen'. Na' catec bgue'eda' legaque' gwy'a'a yež zito' jalagšiba' legaque'.

*Da' yoble Pablon' cho'e diža' can' goc che' cate' Diosen' bocobe' yichjlažda'ogüe'*

(Hch. 9:1-19; 22:6-16)

<sup>12</sup> 'Can' goc to ža cate' zya'a ciuda Damascon', noxa' yiš che bꝑoz gwnabia' ca' dan' žan gwꝑhi gwsaca' beñe' ca' chesonxene' Jesúsen'. <sup>13</sup> Ca do guagwbiz' zya'a ngua'a nezen' señor rey, cate'cze ble'eda' to be'ni' juisyw da' za' le'e yaba, chseni'chen ca gwbižen', na' gwyechjen neda' len beñe' ca' zya'alena' txen. <sup>14</sup> Na' yogo'to' gwbižto' lo yon', na' neda' benda' to beñe' chñe' diža' hebreo gwne': "Saulo, Saulo žbixchen' chꝑhi chsaco' neda'? Dan' chondo' neda', chone zi' cuino' ca chon to go'ñ be chlibe lo ya dan' zoa lao carroš cheban'." <sup>15</sup> Nach bol güiža'ne', goža'ne': "žNo le' beñe'?" Nach Xana' Jesúsen' boži'en, gwne': "Neda' Jesús na' neda' chꝑhi chsaco'. <sup>16</sup> Beyas, le bač blo'elagua' le' na' ba gwleja' le' gono' xšina' na' go'o diža' che da' nga ba ble'edo' na' che bichle dan' za' le'edo' da' za' gwlo'eda' le'. <sup>17</sup> Na' na'a sela' le' gan' že' beñe' ca' bi zjanac beñe' Israel. Na' bi gona' latje no got le', ne beñe' Israel gualaž chio' ca' na' ne beñe' bi zjanac beñe' Israel. <sup>18</sup> Chsela' le' gan' že' beñe' bi zjanac beñe' Israel na' gwzejni'ido'ne' cont yesebejyichje' da' malen' zjanone' na' yesone' da' güen. Chaclaža' yesyechoje' lo na' Satanás dan' chnabia' da' xigüe' ca' na' yosozenague' che Diosen' cont nitlao xtola'gaque', na' lecze chaclaža' yesaque' txen len nochle beñe' chesejnilaže' neda' beñe' ba zjanac lo na' Diosen'."

*Pablon' bsed blo'ede' beñe' xtiža' Criston'*

<sup>19</sup> 'Ca' goc chia' rey Agripa, bzenaga' ca dan' gož Jesúsen' neda' zoe' yaban' caten' ble'edagüeda'ne' tnez. <sup>20</sup> Zgua'tec jazejni'ida' beñe' ca' že' ciuda Damasco xtiže'na' na' gwdechle jazejni'ida' beñe' ca' že' Jerusalenna' len beñe' že' doxen distritw Judean', goše'gaca'ne' cheyała' yesebejyichje' xtola'gaque' na' yosozenague' che Diosen' na' yesone' da' güen cont gacbia' ba gosebejyichje' da' malen'. Can' bzejni'ida' beñe' Israel gualaž checho ca' lente beñe' ca' bi zjanac beñe' Israel. <sup>21</sup> Na' neče dan' chona' ca', beñe' gualaž checho beñe' chesegue'ede' neda' gosezene' neda' yodao' blaon' na' gosaclaže' yesote' neda'. <sup>22</sup> Perw na' Diosen' zoe' chaclene' neda', na' da'nan' zoacza' cho'a xtižen' ža na'aža len yogo'lolle že'le nga, le'e nacle beñe' blaolente le'e bi nacle beñe' blaol. Bi nacho bichle chzejni'ida' beñe' da' bi bzoj da' Moisésen' len yezica'chle ben' gosoe xtiža' Diosen' cani'. <sup>23</sup> Gosene' Criston' ben' za' sela' Diosen' saca'zi'e na' gate' na' gaque' beñe' nechw yebane' ladjo beñe' guat ca'. Na' lecž gosene' le'na' gwzende' beñe' Israel len beñe' bi zjanac beñe' Israel can' cheyała' yesone' cont šo' be'ni' che' lo' yichjlažda'ogaque'.

*Pablon' goclaze' šejnilaže' rey Agripan' Jesucriston'*

<sup>24</sup> Ca' cho'e dižan' cate'cze gobernador Feston' gwñe' zižje gože'ne':

—jChactonton' Pablo! Dan' ba bsedteco' nan' bač chactonto'.

<sup>25</sup> Nach Pablon' gože' gobernadores':

—Bi chactonta' señor gobernador, san diža' lin' cho'a, diža' da' zaca' gwzenago'. <sup>26</sup> Na' rey Agripa nga nombi'e da' quinga choa' diža' chen, da'nan' bi chžeba' choa' diža' lagüe' nga. Nežda' chacbe'ede' choa' diža' li, le

dan' goc che Jesúsen' bi n̄acho goquen bagaše'ze. <sup>27</sup> Le' rey Agripa, ¿chejli' o da' ca' bosozoj beñe' ca' goso'e xtiža' Diosen' cani'? Nežda' chejli'on.

<sup>28</sup> Nach rey Agripan' gože' Pablon':

—¿Chacdo' bedao' co'oyelo' neda' cont šejnilaža' Jesucriston'?

<sup>29</sup> Nach Pablon' gože'ne':

—Ch̄naba' lao Diosen' žin ža cate' le' len yezica'chle beñe' že' nga šejnilaže'le Jesucriston' can' chejnilaža'ne', še yob o še ñe' chžach, perw cbi gata'le ližya can' dia' neda'.

<sup>30</sup> Beyož gwna Pablon' ca' bežoža' rey Agripan' len no'ol čhen' Berenice, na' len gobernador Feston' na' len beñe' ca' gosebe' len legaque'. <sup>31</sup> Nach cate' ba besyeyo'e ga yoble, rey Agripan' na' gobernador Feston' gose' lježe':

—Bi n̄acho ba non benga da' zaca' gate' o da' zaca' chixjwchone' ližya.

<sup>32</sup> Nach rey Agripan' gože' Feston':

—Šaca' bi gwnabe' tie' lao rey Césaren' cont gac yela' justis che'na' guac yosančhone'.

## 27

### *Gosesele' Pablon' ciuda Roman'*

<sup>1</sup> Na' cate' bosoxi'e yesesele' Pablon' distritw Italia gan' chi' ciuda Roman', nach gwlo'e Pablon' len yezica'chle pres ca' lo na' to x̄an soldadw beñe' le Julio. Na' Julion' naque' txen len soldadw ca' ben' zjansi'e Batallón che Augusto. Na' neda' Lucas gwzoa' len Pablon'. <sup>2</sup> Nach gwyo'oto' to lo' barcw da' za' ciuda da' nzi' Adramitio cont žinen distritw Asia, beža'to' ciuda Cesarean'. Na' za'len Aristarcon' neto'. Naque' beñe' ciuda Tesalónica dan' chi' distritw Macedonia. <sup>3</sup> Nach ža beteyo bžinto' ciuda da' nzi' Sidón. Na' x̄an soldadw ben' le' Julio bencze' güen len Pablon', be'e latje gwyeje' gan' že' beñe' migw che' ca' cont bosonežjue' le' bi dan' byažjde'. <sup>4</sup> Na' cate' bechojto' ciuda Sidónna' beža'to' bedeto' gała'ze gan' n̄la' yežlio dan' chi' lo' nisdao' dan' nzi' Chipre. Chechjhgua be' clele ca horen', na' yežlion'a bcue'ejen neto' len be'na'. <sup>5</sup> Na' beyož gwdeto' lo' nisdao' dan' de gała'ze gan' zjambane distritw Cilicia na' distritw Panfilia, nach bžinto' ciuda dan' nzi' Mira dan' chi' gan' mbane distritw Licia.

<sup>6</sup> Na' ciuda Miran' x̄an soldadon' bželde' yeto barcw da' za' ciuda Alejandría da' za' šej distritw Italia, na' bene' mandadw gwyo'oto' lo'en txen len Pablon'. <sup>7</sup> Nach gwza'to' zejto' lo' nisen' da' yoble. Zan ža zejto' šolaže', cañe bžinto' gwdeto' ciuda gan' nzi' Gnido. Na' dan' ñe' chechj ben' clele gan' zejton', da'n̄an' bi goc šejto' liča, nach gwca'ato' zejto' chcue'ej cuinto' len yelate' yežlio dan' nga'an lo' nisdao' dan' nzi' Creta, gan' bitec gwyechj be', na' gwdeto' gała'ze gan' zoa to ya'a da' nzi' Salmón. <sup>8</sup> Na' zejto' gała'ze ga zoa yo biž chcue'ej cuinto', cañe bžinto' gan' nzi' Buenos Puertos gała'ze yež dan' nzi' Lasea.

<sup>9</sup> Goc zan ža zejto' ca' na' bačh chžebto' šjažiayi' cuinto' lo' nisdao', le ba bžin tiemp zag cate' chechjhgua be'. Nach Pablon' gwñeyoede' beñe' ca' yesebeze' na'ze. <sup>10</sup> Gože' legaque':

—Le'e beñe' le'e chsa'le barcon', ba chacbe'eda' can' zejcho nga cañe chac chzan', xož cuiayi' barcon' len yoa' chelen', na' lente chio' yo'ocho lo' barcon' xož cuiayi'cho.

<sup>11</sup> Nach  $\bar{x}$ an soldadw ca' bzenagche'  $\bar{c}$ he  $\bar{x}$ an barcon' na'  $\bar{c}$ he ben' chsa' len clcl ca'  $\bar{c}$ he Pablon'. <sup>12</sup> Le bi nac latje  $\bar{g}$ üen cho'a nisdao' gan' zoaton' ga'anto' tiemp zaguen', na' gwyan bene' ca' gosacde' cheyala' sa'to' šejto' še gonen žinto' Fenice gana' soato' šlac te da' zaguen'. Fenice naquen to yež ga chac cho'o barcw gan' mbane Creta na' bi chactec zag, le šla'ale nla' ga chla' gwbiž na' šla'ale ga chxoā gwbiž.

*To be' gual gwyechjen lo nisaon'*

<sup>13</sup> Cate' gwzōlao chechj to be' goḷ dan' za' che'elle na' bene' ca' chososa' barcon' gosacde' guac šja'acche' gan' gosaclaže', nach gozsa'to' zejto' lo nisen' da' yoble to lcue'ej  $\bar{c}$ he Cretan'. <sup>14</sup> Gague goc sša cate' ba chac to be' gual da' nzi' Noreste chechjchguan clele gan' zej barcon'. <sup>15</sup> Na' chžiga'chguan barcon'. Bibi goc yesone' cont šejchto'. Na' btoblaže'to' gwžiga' ben' barcon' len neto' con can' chechjenna'. <sup>16</sup> Nach bžinto' to lcue'ej yežlio da' nga'an lo' nisen' dan' nzi' Claudia, gan' bitec chechj be'. Na' barcw cha'o gan' yo'oton' nxoben to barcw dao' da' chon žin choslan bene' cate' chac bi da' chac  $\bar{c}$ he barcw xenna'. Na' cane goc bocueto' barcw daon' lo' da' cha'ona'. <sup>17</sup> Beyoža' bchejto' barcw cha'ona' do gual cont gwlo'oto' fuers  $\bar{c}$ hen. Na' besežebe' gaga' barcon' to latje gan' nac yox da'na' nzi'in Sirte, nach bosoletje' lache' xen dan' chonen cont chžiga' ben' barcon'. Nach con zejto' lo' nisen' con gan' gwyej barcon'. <sup>18</sup> Beteyo ba chož nisen' lo' barcon' da' chechjchgua ben', nach gosešaše' yoa' dan' nsa' barcon' gwzōlao bosozala'šazen' lo' nisen'. <sup>19</sup> Na' ža gwyone goclento' legaue' bzala'to' xšinlaz barcon' lo' nisen'. <sup>20</sup> Zan ža bi blo'elao gwbižen' na' šeže'le bibi beljw ble'eto', do ža do yel goc yejw na' gwyechj be', na' bich gwzoato' lez yelato'.

<sup>21</sup> Ba $\bar{c}$ h goc sša bi chagwto', nach Pablon' gože' bene' ca':

—Le'e bene', chac quinga dan' bi bzenagle  $\bar{c}$ hia' caten' gwnia' le'e bi sa'cho Cretan', na' dan' bi bzenagle  $\bar{c}$ hia', ba gwžiai' yoa'  $\bar{c}$ he barcon' len xšinlazen. <sup>22</sup> Perw na'a bi soayaše'le, ne tole cbi cuiayi' yela' mban  $\bar{c}$ hele, san barcw ngazen' cuiayi'. <sup>23</sup> Neda' chonxena' Diosen' na' ba ben cuina' lo ne'e, na' le' ba gwsele' to angl bene' blo'elagüe' neda' nže'e. <sup>24</sup> Nach angla' gože' neda' diža' nga: “Bi žebo' Pablo. Cheyala' žino' lao rey César ben' chi' ciuda Roma, na' da'nan' yelao', bibi gac  $\bar{c}$ hio', na' lez yosla Diosen' yogo' bene' ca' že' lo' barcon'.” <sup>25</sup> Na' dan' gwna anglen' ca', bene', le yebe. Nežda' Diosen' gone' gac doḷoḷ can' gož anglen' neda'. <sup>26</sup> Da' gac  $\bar{c}$ hecho yecho'onen  $\bar{c}$ hio' yo biž da' nga'an late' lo' nisen'.

<sup>27</sup> Na' cate' ba goc žta'gwbiž zejto' lo' nisen' nžiga' ben' neto' nile nale lo' nisaon' dan' nzi' Adria, nach ca' do chel bene' ca' zjansa' barcon' gosache'ede' ba zejto' gala'ze yo biž. <sup>28</sup> Nach beseletje' to plom lo' nisen' cont bosochixe' ca' do gaca'te' sitjw nac nisen'. Beyož bosochixen'na' gosenezde' goquen šino'tchoa metr. Nach gosezdie' yelate' na' bosozchixen' da' yoble na' ca' horen' goquen gažechoa metr. <sup>29</sup> Na' besežebe' šjati'i barcon' yej lo' nisen', nach beseletje' tap ya xen dan' že' ancla, bosochjen' xan barcon' cont gosoxen' len, na' do chesežebze' chesebeze' batcan' šeni'. <sup>30</sup> Nach bene' ca' zjansa' barcon' gosaclaže' yosyoxonje'. Besyēletje' barcw dao' dan' ncua' xina' barcon', con bosode'ede' yesēletje' ancla ca' dan' ncua' lagüen'. <sup>31</sup> Nach Pablon' boḷ güiže'  $\bar{x}$ an soldadw ca', gože'ne':

—Še bene' quinga bi yesyega'ane' lo' barcw nga, bi yelacho.

<sup>32</sup> Nach soldadw ca' gosechogue' don' zjanca' barcw daon' bososanen' lo' nisa'.

<sup>33</sup> Do šbal Pablon' gwzolaogwneyoede' yesagw bene' ca' že' lo' barcon', gože' legaque':

—Ba chac žta'gwbiž zoale bi chtasle na' bi che'ej chagwle.

<sup>34</sup> Chata'yoeda' le'e le gagw cont soale binlo, le ne tole ca cuiayi'.

<sup>35</sup> Beyož gwne' ca' bexue' to yetextil, be'e yela' choxcen che Diosen' lao yogo' neto' že'to' lo' barcon' na' gwxi'e to pedasen' gwdagüen'. <sup>36</sup> Nach yogo'to' bebeto' na' lecz gwzolaoto' gwdagwto'. <sup>37</sup> Chop gayoa gayonšino'to' nacto' že'to' lo' barcon'. <sup>38</sup> Na' beyož gwdagwto' ca beljeto', nach trigon' da' ne' nga'anch lo' barcon', gosebejen' bosozalen' lo' nisdaon' cont barcon' bich gotcequen zi'i.

### *Goxj barcon'*

<sup>39</sup> Cate' gwyeni' bi zjanombi'e yežlion' gan' besežinen', perw besele'ede' de to latje ga žia nisen' šize na' cho'enna' nac laše' lo' yox. Nach gosaque' toze gosaclaže' yesone' cont žin barcon' šjačen' laše' lo' yoxen'. <sup>40</sup> Na' gosechogue' do che ancla ca', gosebejyichjen' lo' nisen'. Lecze goseseže' do dan' bosocheje' yag dan' chsa' barcon' licha na' goselise' lache' dan' zoa yichj barcon' cont bžiga' ben' len, nach zja'aque' cho'a yo bižen'. <sup>41</sup> Na' gosodie' ga chedił nisdaon' len yeto da' yoble, na' jačaz lagüe barcon' lo' yoxen', bich goc tan. Na' nisen' gwzolaogwneyoede' bzočen' barcon' catec fuers nsan'. <sup>42</sup> Nach soldadw ca' gosaclaže' yesote' pres ca' cont bi yeseyele' nisen' na' yosyoxonje'. <sup>43</sup> Perw xan soldadw ca' goclaže' yosle' Pablon', da'nana' bžone' yeson soldadw ca' can' chesaclaže' yesonen'. Bene' mandadw len pres ca' še noe' chac chyla' nisen' zgua'tec legaque' yesexite' lo' nisen' cont yesyechoje' yo biž. <sup>44</sup> Na' bene' mandadw bene' ca' bi chac yeseyela' nis yosochine' no yagla' o bichle xšinlaz barcon' cont yesyežine' lo' yo. Na' can' gosone' na' yogüe' besyežine' lo' yo bižen'.

## 28

### *Dan' goc che Pablon' šlac zoe' Malta*

<sup>1</sup> Cate' bechojto' lo' nisdaon' bžinto' yo bižen', bene' ca' že'na' gose'e neto' ba bžinto' gan' nzi' Malta, naquen to yež dan' chi' to lo' yežlio da' nga'anen lo' nisdaon'. <sup>2</sup> Na' bene' ca' že'na' gosaque' bene' šagüe' len neto', bosoxene' to yi' xen na' goxe' yogo'to' gan' nite'na', le ba chac yejw na' chacchgua zag. <sup>3</sup> Nach Pablon' btobe' xonj xis bcue'en lo' yin', cate' bchoj to bel be nac venen lo' xis ca' gwdi'inba' ne'e goła'ditban'. <sup>4</sup> Na' besele'e bene' Malta ca' nala'dit belen' na' Pablon', na' gose' lježe':

—Benga naclje' bene' güet bene'. Da'nana' la'czla' bele' lo' nisen', Diosen' bi güe'e latje banche'.

<sup>5</sup> Nach Pablon' con gwžib ne'ena' lo' yin' na' bexope belen', na' bibi gocde'. <sup>6</sup> Yogo' bene' ca' chesebeze' batcan' solao gata' ne'en yi' o batca' gate'. Gosebeze' šša na' besele'ede' bibi gocde'. Nach gosone' xbab yoble, gosone' naque' to bene' šejnilaže' cho.

<sup>7</sup> Na' bene' gwnabia' che doxen Malta le' Publio na' yežlio che' zjaden gała'ze latje gan' bžinton', na' blebe' neto', gwzoato' ližen' šone ža. <sup>8</sup> Na' xa Publion' chacšenchgüede' yo'e da' la na' che'ede' yiž chen. Nach Pablon' gwyo'e gan' de'na' bol güiže' Diosen', nach gwxo'a ne'en yichj bene' güen' na' beyaque'. <sup>9</sup> Beyožen' jasexi'e yezica'chle bene' lagüe yeža'

beñe' chese'ede' yižgüe' na' gwnabde' Diosen' yeyone' legaque', na' lecze besyeyaque'. <sup>10</sup> Na' da' zan da' güen goson beñe' ca' len neto'. Na' cate' bžin ža beza'to' bosyoži'e lo' barcon' yogo' da' ca' chyažjeto'.

*Pablon' bžine' ciuda Roman'*

<sup>11</sup> Bega'anto' Malta šon bio', nach gwza'to' zejto' lo nisen' yo'oto' to lo' barcw da' za' ciuda Alejandria da' gwlezen latjen' šlac gwde da' zaguen'. Na' mben le'e barcon' l' gua'a lsaca' che beñe' ca' le' Cástor na' Pólux. <sup>12</sup> Na' bžinto' ciuda dan' nzi' Siracusa gan' bega'anto' šone ža. <sup>13</sup> Nga gozza'to' cont bžinto' yež da' nzi' Regio. Na' bega'anto' tža. Nach gwzolao chečj be' dan' za' che'el'e, na' beza'to' da' yoble beteyo bežžinto' ciuda da' nzi' Puteoli na' bechojto' lo' barcon'. <sup>14</sup> Nga bežagto' beñe' lježto' chesonxene' Jesucriston' Puteoli na' gosenabe' gwzoato' len legaque' to xman. Na' gwdena' gwza' ni'ato' zejto' Roman'. <sup>15</sup> Na' cate' za' žinto' ciuda Roman' goseneze beñe' lježto' že' Roman' ba zoa žinto', na' bañe' bedeseleze' neto' latje gan' nzi' Šone Tiend na' yebañe' lagüe ya'a dan' nzi' Che Apio. Cate' ble'e Pablon' legaque' be'e yela' choxclen che Diosen' na' gwbede' lo' yichjlažda'ogüe'. <sup>16</sup> Na' cate' bžinto' Roman', xan soldadw ca' bene' yezica'chle pres ca' lo na' beñe' gwnabia' che soldadw ca' nita' na', perw be'e latje gwzoa Pablon' toze' ga yoble na' con gwzoa to soldadw gwdape' le'.

*Pablon' be'e xtiža' Jesucriston' Roman'*

<sup>17</sup> Beyon ža bžinto', Pablon' goxe' beñe' blaö che beñe' Israel ca' že' ciuda Roman'. Na' cate' beyož besedobe'na' gože' legaque':

—Beñe' migw, beñe' gualaž checho ca' že' ciuda Jerusalén gosezene' neda' gosone' neda' lo na' beñe' gwnabia' che nación Roman', la'czla' bibi bena' contr beñe' gualaž ca' na' ne contr costumbr che da' xozxta'ochon'. <sup>18</sup> Nach beñe' gwnabia' che nación Roman' gosenabyože' na' gosaclaže' yososane' neda' cate' gosacbe'ede' bibi nona' da' zaca' yesote'nda'. <sup>19</sup> Nach beñe' gualaž ca' že' Jerusalénna' bosožoncze' yososane' neda'. Da'nana' gwnaba' tia' lao rey Césaren' cont gac yela' justis chia'. Perw bi nacho gagua' xya che beñe' gualaž checho da' gosonde' neda' ca'. <sup>20</sup> Da'nana' zoa' nga bač goxa' le'e cont le'eda' le'e na' güe'lena' le'e diža'. Na' ncheja' gden ni neče dan' zoa' lez yosban Diosen' beñe' ca' ba gosat, cacze zan chio' beñe' Israel zoacho lez.

<sup>21</sup> Nach beñe' ca' gose'ene':

—Bibi cart na' la' laoto' nga dan' za' distritw Judean' da' bosozoj beñe' Jerusalén ca' güen' diža' še bin' chac len le', na' nono beñe' gualaž na' la' beñe' ne mal chio'. <sup>22</sup> Perw chaclaže'to' yeneto' go'o diža' che dan' chejli'o che Jesúsen', le nezeto' doxen cheseñe' che le'e chejle'le che'.

<sup>23</sup> Na' bosozie' bia' to ža cont šjasene'e le' da' yoble, na' cate' bžin žan' beñe' zan ja'aque' gan' zoen'. Nach Pablon' be'lene' legaque' diža' do ža. Be'e diža' che dan' cheyala' gwzenagcho che Diosen' ben' chnabia' doxen, na' bzejni'ide' legaque' da' ca' zjanyoj le'e ley dan' bzoj Moisésen' na' len dan' bosozoj yezica'chle beñe' goso'e xtiža' Diosen' cani' che Jesucriston', cont yesejle'e che'. <sup>24</sup> Na' bañe' beñe' ca' gosejle'e xtižen' da' be'e na' yebañe' bi gosejle'en'. <sup>25</sup> Dan' bi gosone' toz ca' yesone' xbab, gwzolao besyeya'aque'. Nach Pablon' gože' legaque':

—Dan' gož Spiritw che Diosen' da' Isaiasen' dan' bzoje' che da' xozxta'ochö ca' naquen da' li, žan:

<sup>26</sup> Gwyej gož be<sub>ne</sub>' gualaž chio' ca' xtižan':

Da' li yenele, perw na' bitw šejni'ile bi zeje dan' yenelen'.

Na' da' li le'ele, perw bi gacbe'ele bi zejen dan' le'elen'.

<sup>27</sup> Nacle be<sub>ne</sub>' güedenag na' bach natcze yichjlažda'olen'.

Bi chazlaže'le gwzenagle dan' chenele na' dan' chle'ele;

con nacle be<sub>ne</sub>' güedenag.

Šaca' bi nacle be<sub>ne</sub>' güedenag, šejni'ile bi zejen dan' chenele na' dan' chle'ele.

Nach yetinjele xtola'le cont yeca'an na' yocoba' yichjlažda'olen'.

<sup>28</sup> Che'nda' nezele ba gwzolaon na'a Diosen' chsele' be<sub>ne</sub>' cheseyixjue'ede'

xtižen' len be<sub>ne</sub>' bi zjanac be<sub>ne</sub>' Israel cont yosozenague' che' na' gata'

yela' mban chegaque' toli tocane.

<sup>29</sup> Beyož gwna Pablon' ca', be<sub>ne</sub>' Israel ca' besyežaše' chesacyožchgüe' che dan' gwnen'.

<sup>30</sup> Na' chop iz nya' gwzoa Pablon' ciuda Roman' to yo'o ga chyixjue',

na' blebe' yogo'lol be<sub>ne</sub>' jasene'e le'. <sup>31</sup> Na' bzejni'ide' legaque' Diosen'

chnabi'e doxen, na' lecz bzejni'ide' che Xancho Jesucriston'. Nono bžon

gwzejni'ide' be<sub>ne</sub>', na' be'e xtiža' Diosen' con can' goclaže'.

## CART DAN' BZOJ POSTLW SAN PABLO CHE BEÑE' CA' ŽE' ROMA

<sup>1</sup> Neda' Pablo chzoja' le'e. Chona' bite'tez dan' ža Xancho Jesucriston'. Diosen' gwleje' neda' cont naca' postlw che', na' gwsele' neda' cont chyixjue'eda' diža' güen che'. <sup>2</sup> Diosen' ba gwzologüe' bzende' benachen' diža' güen che', bene' cont gwnita' bene' goso'e xtižen' cani' na' bozo-zojen'. <sup>3</sup> Na' diža' güen che Diosen' chzejni'in chio' che Xi'ine' Xancho Jesucriston'. Len' golje' benach lo diaža che da' rey David. <sup>4</sup> Na' Spiritw che Diosen' blo'en Xancho Jesucriston' naque' dogualje Xi'in Dios na' nape' yela' guac, le Jesucriston' bebane' ladjo bene' guat ca'. <sup>5</sup> Na' neto', da' chejnilaže'to' Xancho Jesucriston', Diosen' bene' da' güenchgua len neto', le gwleje' neto' na' gwsele' neto' chyixjue'eto' xtižen'. Na' gwsele' neto' chyixjue'eton' cont šanch bene' yesejnilaže'ne' na' yosozenague' che'. Na' Xancho Jesucriston' soe' blaoch cate' bene' že' yogo' nación yosozenague' che Diosen'. <sup>6</sup> Can' naquen, Diosen' ba gwleje' le'e cont nacle lo na' Jesucriston'.

<sup>7</sup> Chzoja' da' nga par yogo' le'e že'le Roman' le'e ba mbej Diosen' cont nacle lo ne'e. Diosen' chadne' le'e. Na' chnaba' lao Xacho Diosen' len Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlažda'olen'.

### *Pablon' goclaže' šjane'e bene' ca' chesejnilaže' Jesucriston' ciuda Roma*

<sup>8</sup> Zgua'tec ni'a le'e Jesucriston' zoe' chaclene' neda' cont choa' yela' choxcen che Diosen' par yogo' le'e, le bene' ca' že' doxen lo yežlion' cheso'e diža' can' chejnilaže'le Criston'. <sup>9</sup> Nezcze Diosen' yogo' ni'a cate' chol güiža'ne' chnaba' gaclene' le'e. Naque' ben' chejnilaža' do yichj do laža' na' chona' xšinen' choa' diža' güen che Xi'ine' Jesucriston'. <sup>10</sup> Chnaba' lao Diosen' gone' latje yedena'a le'e še ca' chnalaže' gona', le ba chac sša zelaža' yida'. <sup>11</sup> Chaclaža' yedena'a le'e na' gwzejni'ichda' le'e cont soachachle šejnilaže'le Diosen'. <sup>12</sup> Na' le'e len neda' soacho gonchachlaže' lježcho dan' chejnilaže'cho Jesucriston'.

<sup>13</sup> Bene' migw, che'nda' nezele zan ni'a ba goclaža' yida' yedena'a le'e, perw biña' gac yedena'a le'e. Chaclaža' yida' gona' xšin Diosen' gan zoale cont šanle gwzenagle che Jesucriston' ca' ba goc yezica'chle yež ga ba gwy'a. <sup>14</sup> Nezda' cheyala' gua' diža' güen che Jesucriston' len yogo'lol bene', bene' že' ciudan', na' bene' že' yixe', na' bene' chesac letr na' bene' cbi chesac letr. <sup>15</sup> Da'n'an' che'nchgüeda' gua' xtižen' len le'e že'le Roman' can' ba bian' ga yoble.

### *Diža' güen che Jesucriston' nsan' yela' guac che Diosen'*

<sup>16</sup> Bi cheto'eda' gua' diža' güen che Jesucriston', le xtižen' nsan' yela' guac che Diosen' cont bene' chesejle' chen gata' yela' mban chegaque' toli tocanē. Nsan' yela' guac len neto' bene' Israel, na' lecze len le'e bi nacle bene' Israel. <sup>17</sup> Na' diža' güen che Jesucriston' chzejni'in chio' še bene' yesejnilaže' Jesucriston', Diosen' gone' legaque' bene' güen, na' bi de bichle da' gac goncho cont gaccho bene' güen len le'. Can' nyoj Xtiža' Diosen' žan: "Diosen' že' bene' chejnilaže' le' naque' bene' güen len le' na' gata' yela' mban che' toli tocanē."

*De xtoła' benachen'*

<sup>18</sup> Diosen' zoe' yaban' na' ba blo'ede' benachen' toli tocaṇe yesesaca'zi' yogo' beṇe' cbi chesejnilaže' le' na' chesone' da' xinj. Na' da' chesone' da' xinjen' bi chesaclaže' yesombia' beṇe' yoble diža' li che Diosen'. <sup>19</sup> Na' Diosen' gone' yesezaca'zi'e, le ba zjaṇezde' zoe' da' ba blo'ede' legaque' can' ba benen'. <sup>20</sup> Bi chle'echo can' nac Diosen', na' bi chle'echo can' zoe' chnabi'e, perw nezecho de yela' guac che' can' bene' bxie' yežlion', na' yogo' beṇač chesele'ede' da' ca' ba bene'. Da'n'an' bibi de da' yosode'e beṇachen' yesene' bi zjaṇezde' še zoe'. <sup>21</sup> La'czła' zjaṇezde' zoa Diosen', bi chesonxene' le', neca cheso'e yela' choxclen che'. Xbab čhegaquen' bibi zacan' na' zjančoļ yichjlažda'ogüen' yela' bi chejle' čhegaquen'. <sup>22</sup> Chesene' zjanaque' beṇe' sina' perw chesone' xbab da' bibi zaca'. <sup>23</sup> Chosozoe' Diosen' to šla'ale la'czła' naque' la'zelagüe' beṇe' zaca' na' zoe' toli tocaṇe. Na' gualaz le', chesejnilaže' no l gua'a lsaca' che beṇač beṇe' te che, na' no l gua'a lsaca' che be zoa xil, che be žia tap ni'a na'ba' na' che no be xigüe'.

<sup>24</sup> Da'n'an' Diosen' ba gwlejjichje' legaque' cont chesone' da' xinj can' ža lo' lažda'ogaquen', na' baḷe' ba chesonchgüe' da' nac yela' zto' len cuerp čhegaquen' toe' len yetoe'. <sup>25</sup> Diosen' gwlejjichje' legaque' cont chesone' yela' zto', le legaque' gosebejjichje' diža' li che Diosen' na' chesejle'e che da' güenlaže'. Chesejnilaže' da' ca' ben Diosen' na' bi chesejnilaže' Dios ben' cheyala' šejnilaže'cho na' gonxencho toli tocaṇe. Ca'czen' gacšca.

<sup>26</sup> Da'n'an' Diosen' gwlejjichje' legaque' cont chesone' yela' zto' con da' žan lo' yichjlažda'ogaque'. Can' chac, nita' no'ole beṇe' bich chesone' can' cheyala' yeson no'olen', san cheseque'e ljež no'olgaque' cont chesone' len legaque' da' bi cheyala' yesone'. <sup>27</sup> Na' nita' beṇe' byo beṇe' bitw chese'nde' yesenita'lene' no'ole, san chesezelaže' ljež beṇe' byogaque' nach cheseca'a lježe' cont chesone' yela' zto'. Na' dan' ba chbiayi' cuerp čhegaquen', naquen castigw da' cheyala' yesezi'e yela' güen da' xinj čhen'.

<sup>28</sup> Bi chesaclaže' beṇachen' yosozenague' che Diosen', da'n'an' ba gwlejjichje' legaque' len xbab mal čhegaquen'. Da'n'an' nite' chesone' da' bi cheyala' yesone'. <sup>29</sup> Chesonchgüe' yogo' da' xinj. Beṇe' byo chesata'lene' no'ole bi nac no'ol čhegaque', na' no'olen' chesata'lene' beṇe' byo bi nac beṇe' čhegaque'. Chesexi'e beṇe'. Chesezelaže' bi da' de che beṇe'. Zjanaque' beṇe' xi'a juisyw, chesegue'e lježe', chesot lježe', chesedile', cheseziye'e, zjanacchgüe' beṇe' güedenag, na' chja'aque' chjaseleje' diža' che beṇe'. <sup>30</sup> Chesene' mal che beṇe' yoble, chesegue'ede' Diosen', na' bibi bala'an' chesozoe' beṇe' yoble. Chesa'laže'. Chesonxen cuine' cheso'e diža' zjanaque' beṇe' güen. Chesaljlaže' bichle da' mal da' yesone'. Bi chosozenague' che xaxne'e. <sup>31</sup> Bi chesejni'ide'. Bi chesone' da' ba gosene' yesone'. Bi chesacde' beṇe' yoble. Bi chesyexi'xen che lježe' na' bi chesyeyaše' lježe'. <sup>32</sup> Zjaṇezde' Diosen' že' toli tocaṇe yesezaca'zi' ben' cheson da' ca'. Na' la'czła' zjaṇezde' can' že', con nita'cze' chesone' da' xinjen' na' chesyebede' cate' beṇe' yoble chesone' can' cheson legaquen'.

**2***Diosen' zejcz'e to licha da' chone' castigw che xtoła'chon'*

<sup>1</sup> Še nacho che beṇe' yoble da' xinjen' chone', bibi zaca' ye'cho Diosen' gague bi xtoła'cho de, note'tez naccho. Cate' chnecho che da' chon beṇe' yoble, na' cheyechjen chio', le toz can' choncho len da' cheson legaque'.



<sup>2</sup> Nezecho še choncho da' xinj ca' nac da' ca' ba gwnian', Diosen' gone' cont saca'zi'cho che xtoła'chon' na' zejcz'e' to licha da' gone' ca'. <sup>3</sup> ¿Chaquale Diosen' bi gone' da' saca'zi'cho cate' chnecho che da' xinj da' chon bene' yoble na' chontecho can' chesone'na'? Bi cheyala' gaquecho bi gone' da' saca'zi'cho, le gonczen'. <sup>4</sup> ¿Bi chacbe'ele Diosen' nacchgüe' bene' šagüe' na' bene' xenlaže' len chio' napcho doła' na' chone' ca' cont gacbe'echo da' xinjen' choncho na' yetinjechon? <sup>5</sup> Le'e bi chetinjele xtoła'len' nacle bene' yid, na' chonle cont Diosen' ža'ache' le'e na' gonche' ga saca'zi'le cate' žin ža chogbi'e che benachen'. Cana' gwlo'e zejcz'e' to licha can' chogbi'en saca'zi' to to benach che xtoła'gaquen'. <sup>6</sup> Na' cana' to tocho saca'zi'cho o gone' ga gac güen checho con ca' nac da' ba bencho. <sup>7</sup> Na' še cheyiljwlaže'cho nac goncho cont šjayzoacho len Diosen' toli tocan'e, na' cont yebe Diosen' chio', na' cont gone' gacchcho bene' zaca', soacho goncho da' güen bite'teze da' gwžaglaacho. Nach Diosen' gone' cont bancho toli tocan'e. <sup>8</sup> Na' še zoacho choncho con da' chazlaže'cho na' bi chzenagcho diža' li che Diosen', san zoacho chzenagcho che da' malen', Diosen' ža'ayichje' chio' na' gone' ga saca'zi'cho toli tocan'e. <sup>9</sup> Yogo' benach bene' chon da' xinj saca'zi'e na' žaglagüe', zgua'tec žaglao neto' bene' Israel na' tech yezica'chle bene'. <sup>10</sup> Yogo'cho še choncho da' güen, Diosen' gone' cont šjayzoacho mbalaz len le' na' gone' cont gacxencho, na' gone' cont soacho binlo len xbab dan' yo'o lo' yichjlažda'ochon'. Zgua'tec gone' ca' len neto' nacto' bene' Israel, na' techle gone' ca' len le'e bi nacle bene' Israel.

<sup>11</sup> Toz ca' chon Diosen' len yogo'lol benach. <sup>12</sup> Bene' bi zjanombi'e ley dan' bzoj da' Moisésen' na' chesone' da' xinj, Diosen' gone' yesebiaye'e gague lagüe dan' bi zjanombi'e leyna', san lagüe dan' zjanезде' chesone' da' xinj. Na' bene' zjanombi'e leyna' na' chesone' da' xinj, Diosen' gone' ga yesebiaye'e da' bi chesone' can' žanna'. <sup>13</sup> Gague con yenecho can' ža leyna' cont Diosen' ne' naccho bene' güen len le', san goncho can' žanna', nach Diosen' ne' naccho bene' güen len le'. <sup>14</sup> Bene' bi zjanac bene' Israel na' bi zjanombi'e ley dan' bzoj Moisésen', tgüeje lo' lažda'ogaquen' chonen cont chesone' da' güen can' ža leyna' cheyala' yesone', na' la'czla' bi zjanombi'e leyna' dan' zoa yichjlažda'ogaquen' chžian bia' yesone' da' güen, naquen ca' to ley len legaue'. <sup>15</sup> Nacbia' zjanезде' lo' lažda'ogaque' cheyala' yesone' da' ca' nžia bia' leyna' yesone', le chesone' late' güejen. Na' zjanезде' lo' yichjlažda'ogaquen' še da' chesone' naquen güen o še naquen mal. <sup>16</sup> Can' gac caten' žin ža Diosen' gone' lo' na' Jesucriston' choglagüen' che to tocho ca' nac xbab chechon' da' ba bencho na' bichle da' ba bencho bagaše'ze še naquen güen o še naquen mal. Can' chnia' cate' chyixjue'eda' diža' güen che Jesucriston'.

### *Bene' Israel bi chesone' can' ža' leyna'*

<sup>17</sup> Na' le'e nacle bene' Israel gualaž chia', šeca chonle xbab zoale binlo len Diosen' da' nsedle ley dan' bzoj Moisésen', na' šeca cha'laže'le dan' nombia'le Diosen'. <sup>18</sup> Nezele bin' chazlaže' Diosen' na' chacbe'ele bin' nac da' güen na' bin' nac da' mal, le nsedle xtižen'. <sup>19</sup> Chaquale zaca'le cont co'ole be'ni' lo' yichjlaždao' bene' bi nombia' Diosen'. <sup>20</sup> Na' chaquale guac gwzejni'ile bene' cheson clele nac cheyala' yesone', na' chaquale guac gwswed gwlo'ele bene' cobe xtiža' Diosen', le nombia'le diža' li chen' na' len nsan' doxen da' cheyala' nezele. <sup>21</sup> Le'e chsed chlo'ele bene' yoble, žbixchen' bi chsed chlo'e cuinle? Le'e žale bi cheyala' no cuan, žbixchen'

chbanle? 22 Le'e žale nono gata'len no'ole bi nac no'ol che', na' no'olen' bi gata'lene' ben' bi nac bene' che', ¿bixchen' chonle da' che'le bene' bi gone'? Le'e chgue'ele l gua'a lsaca' da' chesejnilaže' bene' ¿bixchen' chjalanle bi da' de lo' yo'o gan' že' l gua'a lsaca' ca'? 23 Cha'laže'le da' nsedle ley da' bzoj Moisésen', perw chzoale Diosen' to šla'ale da' bi chonle can' ža leyna'. 24 Chac can' nyoj Xtiža' Diosen' žan: "Da' chonle da' xinj, bene' bi zjanac bene' Israel chesene' mal che Diosen'."

25 Še choncho can' ža leyna' zaca'czen dan' ba gwzoacho señw lo cuerp chechon' da' zejen chio' bene' Israel naccho yež che Diosen'. Perw še bi choncho can' ža leyna', bibi zejen da' ba gwzoacho señw dan' nzi' circuncisión. 26 Bene' bi naque' bene' Israel bi zoe' señua', na' še chone' can' ža ley che Diosen', Diosnan' ne' naque' txen len chio' zoacho señua'. 27 Na' bene' cheson can' ža leyna', la'czla' bi zjanaque' bene' Israel na' bi zjazoe' señw dan' nzi' circuncisión lo cuerp chen', chesone' cont nacbia' de xtoła' le'e nsedle leyna' perw bi chonle can' žanna'. 28 Bi nacho nacccho dogualje bene' Israel da' na'ocho costumbr che nación chechon' na' dan' zoa señw lo cuerp chechon'. 29 Naccho dogualje bene' Israel gague dan' choncho can' ža leyna' da' nyojen, san da' chejnilaže'cho Diosen' do yichj do laže'cho na' ba be'cho latje bocobe Spiritw che Diosen' yichjlažda'ochon'. Da'nan' Diosen' güe'e diža' güen checho, la'czla' še notno chne güen checho.

### 3

1 ¿Bi da' güen da' chga'an che chio' bene' Israel da' goljcho lo diaža che da' xozxta'ochon' še ca'? ¿Bi da' güen da' chga'an da' ba zoacho señw da' nzi' circuncisión? 2 Da' xen da' chga'an. Na' da' blaoch da' chga'an, Diosen' bnežjue' da' xozxta'ocho ca' Xtižen' da' nyojen par yogo' benach. 3 Na' la'czla' zan bene' gualaž checho bi gosejle'e chen, bi nacho Diosen' bi gone' güen can' gwne' gone' len chio' naccho nación che'na'. 4 Goncze' con can' že'na'. Yogo' ni'a Diosen' chne' diža' li, la'czla' še žin ža cate' yogo'lol bene' yesene' diža' güenlaže'. Chac can' nyoj Xtiža' Diosen' žan: Le' gwlo'edo' benachen' le cho'o diža' li.

Na' ca' nac bene' ca' cheson xbab bi chono' can' žon', yesache'ede' chonczo' can' žo'na'.

5 Bał bene' chesene' cate' choncho da' xinj chlo'en ca' bene' güen nac Diosen', na' chesene' Diosen' bi zeje' to li še chone' cont saca'zi'cho che da' xinj dan' chonchon'. 6 Clelen' chesone' xbab. Šaca' Diosen' bi chone' da' zej toli, bi gac gone' yela' justis che chio' benach. Perw gonczen'.

7 Na' nita' bał bene' chesone' xbab clele, chesene': "Cate' choe'cho diža' güenlaže' chlo'en ca' bene' güen juisyw nac Diosen' da' cho'e pur diža' li. Da'nan' bi cheyala' ne' napcho doła' cate' chonlaže'cho." 8 Lecze chesonlaže' bał bene' chesene' neda' bzejni'ida' guaque goncho da' mal cont gac da' güen. Da' cheyala'cze gon Diosen' cont sacazi' note'tez bene' ža ca'.

*Yogo'cho napcho doła' lao Diosen'*

9 ¿Bixen' ša? ¿Naquech chio' bene' Israel bene' güench ca' bene' bi zjanac bene' Israel? Bi naccho ca'. Ba bzejni'ida' toz ca' nac che chio' bene' Israel len che bene' bi zjanaque' bene' Israel, yogo'cho de xtoła'cho. 10 Na' Xtiža' Diosen' nyojen žan: Nono zoa bene' zej to licha, ne toe'.

11 Nono nla' bene' chejni'i cont gwzenague' che Diosen',  
nono nla' bene' cheyljue' le'.

12 Yogo' benach ba zjanque'e nez mal.  
Yogüe' ba zjanaque' ca to da' bibi zaca'.  
Ne to nono zoa bene' chone' da' güen.

13 Len xtiža'gaquen' chesexoayague' bene'.

Ca zban chla' cho'a ba che bene' guat še bi nyeyjon binlo, ca' zban chla'  
xtiža'gaquen'.

Na' ca venen che bel znia nac xtiža'gaquen' da' cheso'e.

14 Pur diža' mal diža' bya' že' cho'agaquen'.

15 Con bize da' chosode'ede' cont chesote' bene'.

16 Gate'teze chja'aque' zjanse'e yela' yaše' yela' zi' ca nac da' chesone'.

17 Bi chesezoe' binlo len lježe'.

18 Bi chesežebe' Diosen' len bi da' mal chesone'.

19 Na' nezecho Diosen' bene' chio' bene' Israel ley chen'. Da'n'an' ne tocho  
bi chac nacho bibi xtola'cho de, le bi choncho can' žanna'. Nachen' Diosen'  
že' si'cho castigw che xtola'chon', con can' že' che yogo' benach, le yogüe'  
bi chesone' can' ža ley chen'. 20 Bi nacho zoa bene' naque' bene' güen len  
Diosen' da' chone' yogo' da' ža ley na', le notno chon ca'. Leyna' chlo'en  
chio' naccho bene' güen da' xinj.

*Bene' šejnilaže' Jesucriston' gague' bene' güen len Diosen'*

21-22 Na' na'a Diosen' ba blo'e can' goncho cont gaccho bene' güen len  
le', na' bich bi že' che da' ca' ža ley na' cheyala' goncho, san že' cheyala'  
šejnilaže'cho Jesucriston' cont gaccho bene' güen len le'. Doxen Xtiža'  
Diosen' dan' nyojen cani'te chzejni'in cheyala' šejnilaže'cho Jesucriston'  
cont gaccho bene' güen. Na' toz can' chon Diosen' len yogo'lol benach.

23 Le yogo'cho ba bencho da' xinj, na' ne tocho bi naccho bene' güen  
can' chaclaže' Diosen' gaccho. 24 Perw na' Diosen' nži'ilaže'de' chio',  
na' gague bi chzi'e par že' naccho bene' güen len le', le Cristo Jesús'en'  
ba bnitlagüe' xtola'chon'.

25 Diosen' gwsele' Jesucriston' bnežjw cuine'  
gosote'ne' neche xtola' benach. Na' note'teze bene' yesejnilaže'ne' nitlao  
xtola'gague'. Diosen' gwsele'ne' cont nachia' zeje' to licha da' gwdape' yela'  
chxenlaže' bezi'xene' xtola' bene' ca' gwnita' cani' bene' gosejnilaže'ne'.

26 Na' lecze gwsele'ne' cont nachia' zeje' to licha da' že' che yogo' chio'  
chejnilaže'cho Jesús'en' naccho bene' güen.

27 Bi cheyala' gonxen cuincho güe'cho diža' naccho bene' güen. Šaca'  
choncho doxen dan' ža ley na' zaca' gonxen cuincho güe'cho diža' naccho  
bene' güen, perw nono chon can' ža ley na'. Con da' chejnilaže'cho  
Jesucriston', da'n'an' zaca' cont yeyaccho bene' güen len Diosen'. 28 Can'  
naquen, note'tez bene' chejnilaže' Jesucriston', Diosen' že' naque' bene'  
güen len le' da' chejnilaže'ne', gague lagüe dan' chone' can' ža ley na'.

29 ¿Chaquele Diosen' naque' Dios che chio' naccho bene' Israel ngaze?  
Lecze naque' Dios che bene' bi zjanac bene' Israel. 30 Le toze Diosen' zoa  
na' len' že' che yogo'cho naccho bene' güen len le' con še chejnilaže'cho Je-  
sucriston', na' toz can' chone' len chio' zoacho señw dan' že' circuncisión  
na' len bene' cbi zjazoa señwna'. 31 ¿Chaquele choncho ley na' ca to da'  
bibi zaca' da' žacho cheyaccho bene' güen len Diosen' cate' chejni'laže'cho  
Jesucriston'? Bi chonchon ca to da' bibi zaca', san chlo'echo naquen da'  
zaca'chgua.

## 4

*Can' ben da' Abraham*

<sup>1</sup> Na' le'e bene' gualaž chia' len le'e bi nacle bene' Israel, da' xozxta'oto' Abraham ĵbixe nacho che'? <sup>2</sup> Šaca' Abrahanna' bene' doxen can' ža leyna', zaca' gonxen cuine' da' naque' bene' güen, san bi bene' doxen can' žanna' na' bibi gota' da' zaca' gonxen cuine' lao Diosen'. <sup>3</sup> Quinga ža Xtiža' Diosen' da' nyojen: "Abrahanna' gwejnilaže' Diosen' na' da'nan' Diosen' gwne' naque' bene' güen len le'." <sup>4</sup> Cate' to bene' chone' žin, chone' gan laxjue' na' xan žinna' bi chone' to goclen cate' chnežjue' laxjuen'. <sup>5</sup> San to goclen chon Diosen' že' che chio' chejnilaže' chone' naccho bene' güen len le', le bi choncho da' güen. Choncho da' xinj, na' Diosen' chnitlagüe' da' xinj chechon' še chejnilaže' chone'. <sup>6</sup> Lecz da' Davin' be'e diža' ca mba chzoa ben' chnitlao Diosen' xtolen' na' bibi cuent chone' še ba ben ben' da' güen o ba bene' da' mal. <sup>7</sup> Bzoz Davin' da' nga žan:

Mba zoacho še ba bezi'xen Diosen' che da' xinj da' ba bencho.

Mba zoacho še ba bñitlagüe' xtoła'chon'.

<sup>8</sup> Mba zoacho še Diosen' že' checho bibi xtoła'cho de.

<sup>9</sup> ĵChaquele neto'zen' zoato' señw dan' že' circuncisión gac soato' mba can' gwnen'? Gague neto'zen'. Lencze le'e bi zoale señw dan' že' circuncisión guac soale mba. Nezecho Diosen' gwne' da' Abrahanna' naque' bene' güen len le' da' gwejnilaže'ne'. <sup>10</sup> Gwne' che da' Abrahanna' naque' bene' güen len le' cate' biña' soe' señw dan' že' circuncisión, gague beyož gwzoe'nna' gwne' ca'. <sup>11</sup> Na' gwdechle gwzoe' señwna' cont gwnezde' Diosen' bñitlagüe' xtole' da' ba chejnilaže'ne'. Na' da'nan' Abrahanna' naque' xozxtao' yogo' bene' chesejnilaže' Diosen' cont nitlao xtoła'gaquen' la'czla' bi zjazoe' señwna'. <sup>12</sup> Na' lecze naque' xozxtao' neto' bich bi xtoła'to' de da' chejnilaže'to' Diosen', neto' zoato' señw dan' že' circuncisión. Perw gague naque' xozxta'oto' da' zoato' señwna', san da' chejnilaže'to' Diosen' can' gwejnilaže' da' Abrahanna' le'.

*Diosen' bene' güen len da' Abrahanna' da' gwejnilaže'ne'*

<sup>13</sup> Diosen' gože' da' Abrahanna' gone' cont le' len bene' za' yesalje lo diaža' chen' yesac chegaque' doxen yežlion'. Gož Diosen' da' Abrahanna' ca' da' gwejnilaže'ne'. Da'nan' gwna Diosen' naque' bene' güen gague da' bene' can' ža leyna'. <sup>14</sup> Šaca' ža Diosen' con bene' yeson doxen can' ža leyna' yesac chegaque' yežlion', bibi zaca' šejnilaže'cho Diosen' šeca', na' bibi zejen da' gwne' gone' güen len bene' za' yesalje lo diaža che da' Abrahanna'. <sup>15</sup> Na' leyna' nsan' castigw che beñachen', le bi chesone' can' žanna. Šaca' bibi ley de da' gwžian bia' bi da' cheyała' gon chio' beñach, bibi xtoła'cho de šeca'.

<sup>16</sup> Can' naquen, note'teze bene' chesejnilaže' Diosen', none' legaque' ca xi'in diaža che da' Abrahanna', na' Diosen' gone' cont legaque' yesac chegaque' yežlion' can' gože' da' Abrahanna'. Gague neto'zen' nombia'to' ley da' bzoz da' Moisésen' gac cheto' yežlion'. Na' nacczen da' li gon Diosen' güen len note'tez bene' chejnilaže'ne'. Na' gone' ca' cont gacbia' to goclen chone' len bene' ca' chesejnilaže'ne' can' gwejnilaže' da' Abrahanna' le'. Na' da' non Diosen' cuent Abrahanna' naque' ca xozxtao' yogo' chio' chejnilaže'chone', <sup>17</sup> chac can' gože' da' Abrahanna' gwne': "Ba nzoa' le' gaco' xozxtao' bene' še' nación zan." Dios ben' gwejnilaže' da'

Abrahanna' nape' yela' guac cont yosbane' bene' guat, na' chac chone' cont gac da' bina' gac.

<sup>18</sup> Abrahanna' bi gwnezde' nac gac can' gwna' Diosen' gac, san con gwzoe' gweyjele'e che Diosen' na' gwzoe' lez gon Diosen' cont nita' bene' zan xi'in diaža' che'. <sup>19</sup> Gwzoacze' gweyjele'e can' gož Diosen' le' la'czla' ba naque' bene' gole par soa xi'ine', le ba zejgale' to gayoa iz, na' no'ol che' Sara naque' bene' güiž. <sup>20</sup> Gwzozateze' gwejnilaže' Diosen' na' bi gocžejlaže' len da' gož Diosen' le' gone', san gwzoachache' gwejnilaže'ne' na' benxene'ne'. <sup>21</sup> Abrahanna' gwnezde' Diosen' nape' yela' guac cont gone' can' gwnen'. <sup>22</sup> Da'n'an' Diosen' gwne' naque' bene' güen da' gwejnilaže'ne'.

<sup>23</sup> Na' dan' nyojen žan Diosen' gwne' naque' bene' güen da' gwejni-laže'ne', gague nyojen ca' che Abraham na'zen'. <sup>24-25</sup> Lecze nyojen che yogo'cho, le Diosen' lecze že' naccho bene' güen len le' da' chejnilaže'chone'. Cont gwnitlagüe' xtola'chon' Diosen' gwsele' Xancho Jesucriston' bnežjw cuine' gosote' le'. Na' Dios ben' chejnilaže'cho bechis bosbane'ne' ladjo bene' guat ca' cont beyone' chio' bene' güen.

## 5

### *Zoacho binlo len Diosen' da' chejnilaže'cho Jesucriston'*

<sup>1</sup> Na' ca nac chio', da' ba chejnilaže'cho Xancho Jesucriston', Diosen' ba gwne' naccho bene' güen len le', na' lecze da'n'an' ba zoacho binlo len le'. <sup>2</sup> Da' chejnilaže'cho Jesucriston', Diosen' zoacze' nži'ide' chio'. Na' chebecho nezecho gone' soacho mbalaz juisyw can' zoa le' cate' šjayzoacho txen len le'. <sup>3</sup> Na' lecze chebe chezaque'cho cate' chzaca'zi'cho, le nezecho še gonxenlaže'cho cate' chzaca'zi'cho, nach gwyo gwchejchcho cate' de bichle da' saca'zi'cho. <sup>4</sup> Na' še chonxenlaže'cho cate' chzaca'zi'chon', chlo'en zoachachcho chejnilaže'cho Diosen'. Na' še zoachachcho chejni-laže'chone', nezecho šjayzoacho txen len le'. <sup>5</sup> Na' dan' zoacho lez šjayzoacho txen len Diosen', bi nacho naquen to da' güenlaže' chaquecho gac checho ca'. Le Diosen' ba gwsele' Spiritw chen' zolan len chio' na' chnen lo' lažda'ochon' žan chacchgüe Diosen' chio'.

<sup>6</sup> Chio' beñač naccho bene' güen da' xinj na' bibi chac goncho cont yezoacho binlo len Diosen', perw bžin ža cate' Diosen' gwsele' Criston' bnežjw cuine' gote' neče chio' napcho doła'. <sup>7</sup> Nono zoa bene' gwnežjw cuine' yesot bene' le' neče bene' yoble, la'czla' še nac ben' bene' güen, o še gwchojlja tgüej bene' yeyaxjde' gwnežjw yela' mban che' yesote'ne' gualaz to bene' šgäüe'. <sup>8</sup> San Diosen' blo'ede' chacchgüede' chio' da' gwsele' Criston' gote' neče chio' la'czla' zoacho choncho da' xinj. <sup>9</sup> Na' dan' got Criston' neče chio', Diosen' že' naccho bene' güen da' chejnilaže'cho le'. Na' Criston' lecze gone' cont bi saca'zi'cho cate' žin žan' Diosen' chogbi'e che yogo'lol bene'. <sup>10</sup> Cana' bi gwzoacho binlo len Diosen'. Perw Xi'ine' Criston' bnežjw cuine' gote' neče chio' cont bozoe' chio' binlo len Diosen'. Na' na'a ba zoacho binlo len le' na' nezecho zoacze Criston' chone' cont žin ža šjayzoacho len Diosen'. <sup>11</sup> Na' lecze chebecho nombia'cho Diosen', le Xancho Jesucriston' ba bozoe' chio' binlo len le'.

### *Adánna' gwleque' da' mal yežlio nga, san Jesucriston' gwleque' da' güen*

<sup>12</sup> Yela' güedenag che bene' nechw ben' le Adán gwxe da' malen' yežlio nga, na' da' malen' nsan' yela' got. Can' goc, gwzolao chesat yogo'

benachen', le yogo'lole' chesone' da' mal. <sup>13</sup> Benachen' gwzolaos chesoncze' da' xinjen' cate' gwzoate da' Adán, la'czla' bina' gata' ley dan' bzoj da' Moisésen'. Na' gan' bibi ley de, nono chon xbab še cheson bene' da' xinj. <sup>14</sup> Perw na' gwzolaon len da' Adánna' na' len bene' gwnita' caten' gwbane', bžinten len bene' gwnita' caten' gwban Moisésen', yogo'lole' gosate' can' chesat bene' ža na'aža. La'czla' legaue' bi gosone' güedenag len to da' gož Diosen' legaue' can' ben Adánna', bia'cze yogüe' gosone' da' xinjen'. Adánna' gwleque' yela' goten', san Jesucriston' ben' ba naquen sela' Diosen', len' bxie' yela' mban toli tocanē.

<sup>15</sup> iNža' xen ca dan' gwxe caten' Adánna' bene' da' xinjen' na' ca dan' gwxe cate' Diosen' gwsele' Jesucriston'! Yogo' chio' benach gatcho lagüe da' ben Adánna' da' xinjen', san yogo' chio' benach guac soacho mba da' nži'i Diosen' benachen' na' gwsele' Xi'ine' Jesucriston' cont chaclene' note'tezcho. <sup>16</sup> Toz Adánna' bi bzenague' che Diosen' na' da'nán' Diosen' gwne' yesezaca'zi' yogo'cze benachen' toli tocanē che xtoła'gaquen'. Nach Diosen' gwsele' toz bene' güen cont bnitlagüe' xtoła' note'tezcho chejni-laže'chone' na' beyone' chio' bene' güen la'czla' da' zan da' xinj ba bencho. <sup>17</sup> De yela' got che chio' benach neche da' xinj da' ben toz ben' gože' Adán, san mbalaz juisyw chac che chio' benach neche da' güen da' ben Jesucriston' bnežjw yela' mban che' neche yogo'cho. Diosen' nži'ide' chio', nachen' bibi chchixjue' chonze' chio' ca bene' güen še chejni-laže'cho Jesucriston', na' none' chio' yela' mban toli tocanē cont nabia'cho txen len Jesucriston'.

<sup>18</sup> Can' naquen, da' ben toz Adánna' da' xinj, Diosen' gwchogbi'en saca'zi' yogo' benachen' che xtoła'gaquen'. Na' neche da' güen da' ben toz Jesucriston' da' bnežjw cuine' gosote'ne', da'nán' nitlao xtoła' note'tezcho chejni-laže'chone', cont none' chio' ca bene' güen. <sup>19</sup> Len da' xinj dan' ben Adánna' cate' bene' güedenag len Diosen', gwxe da' xinj da' chon yogo' chio' benach. Na' da' bzenag Jesucriston' che Diosen' na' bnežjw cuine' cont nitlao xtoła' benachen', da'nán' note'tezcho chejni-laže'chone' none' chio' ca bene' güen.

<sup>20</sup> Cate' Diosen' bnežjue' ley čhen' da' bzoj Moisésen' na' gwcha'o gw-xench da' xinj da' gosen benachen', le bi bosozenague' čhen. Perw na' la'czla' gwcha'o gw-xen da' malen', gwcha'o gw-xench yela' ži'ilaže' che Diosen' len chio' benach. <sup>21</sup> Can' chac, de yela' got che yogo' chio' benach da' naccho bene' chon da' xinj, ca'cze Diosen' nži'ide' yogo' chio' benach cont note'tezcho gaccho bene' güen len le' na' gata' yela' mban čecho toli tocanē še šejnilaže'cho Xancho Jesucriston'.

## 6

*Bi cheyala' soacho goncho da' xinj san soacho goncho can' chazlaže' Criston'*

<sup>1</sup> ¿Nacxen' cheyala' goncho na'a ba nezecho nži'ilaže' Diosen' chio'? ¿Gonchcho da' malen' cont yezi'xenchcze Diosen' che chio'? <sup>2</sup> Gague can' goncho. Cate' gwzolaos chejni-laže'cho Criston' bich goclaže'cho nabia' da' malen' chio'. Da'nán' guac nacho ba gotcho len da' xinjen' cont bich gonchon. <sup>3</sup> ¿Bi chache'ele can' zejen da' gwzoacho nis? Zejen da' chejni-laže'cho Jesucriston' ben' got neche chio', bač naccho ca to bene' guat len da' xinjen' cont bich gonchon. <sup>4</sup> Na' dan' gwzoacho nis lecze guac nacho bgaše'cho can' bosocuaše' Criston'. Na' con can' bečhis bosban Xancho

Diosen' Criston' ladjo bene' guaten' len yela' guac xen che', ca'czen' bene' len chio', ba bocobe' yichjlažda'ochon' cont soa cuezcho goncho da' güen.

<sup>5</sup> Na' can' žacho ba gotcho len da' xinjen' dan' chejnilaže'cho Criston', ľecze guac nacho bechis bosban Diosen' chio' can' bechis bosbane' Criston', ľe ba bocobe' yichjlažda'ochon'. <sup>6</sup> Cana' ne' chnabia' da' malen' chio' len yogo' da' choncho. perw na'a da' chejnilaže'cho Criston' ben' got neche chio', ba none' chio' ca to bene' guat len da' xinjen' cont bich gonchon na' cont da' mal dan' yo'o ľo' yichjlažda'ochon' bich soan nabian' chio'. <sup>7-8</sup> Bene' ba got bich zoe' chone' da' xinj, na' ca' nacczen len chio' chejnilaže'cho Criston', bich che'necho nabia' da' malen' chio' na' bich zoacho chzenagcho chen. Na' chejle'cho gone' cont soacho bancho len ľe' na'a na' toľi tocanē. <sup>9</sup> Na' nezecho Criston' beyas bebane' ladjo bene' guaten' na' gwbat gate' da' yoble ľe bich soe yela' gotten' ľe'. <sup>10</sup> Na' cate' gosote' Criston', tni'aze bnežjw yela' mban che' neche xtoľa'chon'. Bich chyažjen gwnežjw cuine' da' yoble, san ba zoalene' Diosen' chone' con bi da' chazlaže' Diosen'. <sup>11</sup> Nach dan' gote' neche xtoľa'chon', cheyaľa' soacho goncho cont da' mal dan' yo'o ľo' yichjlažda'ochon' bich nabian' chio', na' cheyaľa' soacho txen len Xancho Jesucriston' cont goncho dan' chazlaže' Diosen'.

<sup>12</sup> Da'nan' bi güe'cho latje nabia' da' malen' cuerp chechon' dan' nac da' gat na' goncho bi da' xinj da' selažen'. <sup>13</sup> Bi cheyaľa' gon cuincho ľo na' da' gwxiyen' cont goncho da' mal len cuerp chechon'. Cheyaľa' gon cuincho ľo na' Diosen' cont goncho da' güen. Guac nacho Diosen' bechis bosbane' chio' ladjo bene' guaten' da' bocobe' yichjlažda'ochon'. <sup>14</sup> Bich nabia' da' malen' chio', ľe nezecho Diosen' chbede' chio' gague neche da' choncho can' ža ley dan' bzoj da' Moisés, san dan' naque' bene' šagüe'.

*Bene' chzenag che da' malen' naque' ca bene' zoa xan, bene' chnabia' ľe' cont gonche' da' malen'*

<sup>15</sup> ĽGontezcho da' xinjen' da' nezecho nži'i Diosen' chio' na' nezecho bi chone' cuent še ba bencho da' ža leyna' cheyaľa' goncho? Bitw goncho ca'. <sup>16</sup> Nezecho še ba chzenagcho che to bene' cont goncho bite'tez že', choe'cho latje chnabi'e chio'. Na' ca'cze naquen len chio' še chzenagcho che da' malen' na' chontezchon, ba chnabia' da' malen' chio' še ca'; na' bi gag šjayzoalencho Diosen' toľi tocanē še ca' choncho. San še zoacho chzenagcho che Diosen', nachen' zejczcho choncho da' güen na' šjayzoalencho Diosen' toľi tocanē. <sup>17</sup> Na' choa' yela' choxcľen che Diosen' na'a ba chzenagle do yichj do laže'le xtiža' Diosen' da' ba bzejni'ito' le'e, na' bich chzenagle che da' malen' can' benľe cana'. <sup>18</sup> Diosen' ba bebeje' le'e ľo' da' malen' na' ba ben cuinľe ľo ne'en cont soale gonľe da' güen. <sup>19</sup> Ba bzejni'ida' le'e bia' diža' che bi da' chac che chio' benach cont šejni'ile. Nachen' chnia' le'e, con can' gwzoale bentezle da' nac da' yela' zto' len cuerp chelen', na' benchgualē da' malen', ľecze can' cheyaľa' gon cuinľe ľo na' Diosen' gonľe da' güen cont chazlaže' Diosen' can' chonľen'.

<sup>20</sup> Caten' ne' zejcho choncho da' malen' bi chzenagcho che Diosen' neca choncho da' güen. <sup>21</sup> Na' bibi banez na' le'echo che da' mal ca' ba bencho, san na'a ba cheto'echo chen. Bene' ca' ne' chesonteze' da' malen' gata' castigw chegaque' toľi tocanē. <sup>22</sup> Na' chio', Diosen' ba bebeje' chio' ľo da' malen' na' yo'ocho ľo ne'ena'. Da'nan' zejech choncho da' güen can' chazlaže' Diosen' na' šjayzoacho len ľe' toľi tocanē. <sup>23</sup> Še zoacho choncho da' xinjen', gata' castigw checho toľi tocanē cate' gatcho. San

Diosen' chon<sup>h</sup>dadze' chio' to da' güen juisyw, chio' chejnilaže' cho Xancho Jesucriston', chone' cont šjayzoacho len Diosen' to<sup>l</sup>i toca<sup>ñ</sup>e.

## 7

*Naccho ca to bene' ba got len ley da' bzoj Moisésen'*

<sup>1</sup> Bene' migw, da' nga žia' le'e, le nombia'le ley dan' bzoj Moisésen'. Nezczecho con bene' ca' zjamban cheya<sup>l</sup>a'cze yosozenague' che leyna'. <sup>2</sup> Ca to no'ole nšagna', šlac mban bene' che' cheya<sup>l</sup>a' soalene' le', le can' chon leyna' mandadw gone'. Na' še ba got bene' chen', cana' ba bele' len leyna' da' chon mandadw soalene' bene' chen'. <sup>3</sup> Še no'olen' soalene' bene' yoble šlac ne' mban bene' chen', nape' do<sup>l</sup>a' len leyna' da' chzoa xtoe'. Perw na' še ba got bene' chen', leyna' žan ba guac yošagna'lene' bene' yoble na' bi nacho chone' da' xin<sup>j</sup> yošagne'e.

<sup>4</sup> Bene' migw, can' naquen len chio' chejnilaže'cho Criston'. Ba belachon len leyna' da' žan saca'zi'cho che xto<sup>l</sup>a'chon' to<sup>l</sup>i toca<sup>ñ</sup>e. Na' ba gwnitlao xto<sup>l</sup>a'chon' dan' bnežjw Criston' yela' mban chen' gosote'ne' le'e yag cruzen'. Da'n'an' ba zoacho txen len Criston' ben' beban ladjo bene' guaten', na' zoacho cont goncho can' chazlaže' Diosen'. <sup>5</sup> Cana' zoacho chzenagcho che da' malen' dan' yo'o lo' yichjlažda'ochon'. Na' cate' gwnezecho can' ža ley dan' bzoj da' Moisésen', nachle be'laže'cho bencho da' malen', na' da' malen' nšan' castigw checho to<sup>l</sup>i toca<sup>ñ</sup>e cate' gatcho. <sup>6</sup> Perw na'a ba belachon len ley da' žan cheya<sup>l</sup>a' si'cho castigw to<sup>l</sup>i toca<sup>ñ</sup>e, le Criston' beque'e xto<sup>l</sup>a'chon'. Na' ba chaclaže'cho goncho can' chazlaže' Diosen', na' chonchon gague cont na' Diosen' naccho bene' güen len len', san chonchon dan' ba bocobe Spiritw chen' yichjlažda'ochon'.

*Bi güe'cho latje n<sup>a</sup>b<sup>i</sup>a' da' malen' chio'*

<sup>7</sup> Bi cheya<sup>l</sup>a' goncho xbab nac to da' mal ley dan' bzoj da' Moisésen'. Leyna' bzejni'in neda' bi dan' bi cheya<sup>l</sup>a' gona' cont gocbe'eda' chona' da' xin<sup>j</sup>. Na' gwnezd<sup>a</sup>' naquen mal chzelaža' bi da' de che bene', le leyna' žan: "Bi selaže'le bite'teze da' de che bene'." <sup>8</sup> Na' cate' gwnezd<sup>a</sup>' can' ža leyna', nachle da' mal dan' yo'o lo' yichjlažda'oguan' benen gwzelaže'cha'. Da' li cate' bi nezecho can' ža leyna', bi nezecho še choncho da' xin<sup>j</sup>. <sup>9</sup> Neda' gwzoa' to tiemp bi gocbe'eda' bi cheya<sup>l</sup>a' selaža'. Perw cate' bžin ža gwnezd<sup>a</sup>' nžian bia' bi cheya<sup>l</sup>a' selaža', nachle bzenagcha' che da' mal da' yo'o lo' yichjlažda'oguan' na' gwzelaže'cha'. Da'n'an' gwnezd<sup>a</sup>' cheya<sup>l</sup>a' sia' castigw che xto<sup>l</sup>a'n' to<sup>l</sup>i toca<sup>ñ</sup>e. <sup>10</sup> Leyna' nyojen cont gwzenagcho chen na' gata' yela' mban checho to<sup>l</sup>i toca<sup>ñ</sup>e, perw da' bi bzenaga' chen, bzejni'in neda' gata' castigw chia' to<sup>l</sup>i toca<sup>ñ</sup>e. <sup>11</sup> Can' goc, cate' bemb<sup>i</sup>'a leyna', da' malen' da' yo'o lo' yichjlažda'oguan' gwxoayaguen neda' cont bencha' da' malen', nach gwchoglaon chia' gata' castigw che xto<sup>l</sup>a'n' to<sup>l</sup>i toca<sup>ñ</sup>e.

<sup>12</sup> Ley dan' bzoj Moisésen' nacczen che Dios, na' to to da' nžian bia' goncho naquen güen na' zejen to l<sup>i</sup>cha. <sup>13</sup> ¿Nacho leyna' da' naquen güen chguan' chonen cont saca'zi'cho che xto<sup>l</sup>a'chon' to<sup>l</sup>i toca<sup>ñ</sup>e? Bi nac len. Da' mal da' yo'o lo' yichjlažda'ochon' bi ben' latje goncho can' cheya<sup>l</sup>a' goncho, na' da'n'an' gwchoglaon checho saca'zi'cho che xto<sup>l</sup>a'chon' to<sup>l</sup>i toca<sup>ñ</sup>e. Leynan' da' nac da' güen chlo'en chio' Diosen' chgue'echgüede' da' mal da' choncho.

<sup>14</sup> Nezecho leyna' naquen che Spiritw che Diosen' na' naquen güen, san chio' yo'o da' malen' lo' yichjlažda'ochon' na' zoacho choncho da'



xinj. <sup>15</sup> Bi choncho da' güen da' chaclaže'cho goncho, san da' xinj da' chgue'echo lēlen' choncho. Bi chache'echo bixchen' choncho ca'. <sup>16</sup> Na' dan' chgue'echo da' mal dan' chonchon', zejen chache'echo nac leyna' güen. <sup>17</sup> Gague chion' choncho da' xinj da' bi chaclaže'cho goncho, san da' mal dan' yo'o lo' yichjlažda'ochon' chžigan' chio' cont chonchon. <sup>18</sup> Nezecho bi naccho beñe' güen, le yo'o da' malen' lo' yichjlažda'ochon'. Chaclaže'cho goncho da' güen perw bi chac gonchon. <sup>19</sup> Bi choncho da' güen da' chaclaže'cho goncho, san choncho da' xinj da' bi che'necho goncho. <sup>20</sup> Da'nan' chnia', gague chion' choncho da' xinj da' bi chaclaže'cho goncho, san da' mal dan' yo'o lo' yichjlažda'ochon' chžigan' chio' cont chonchon.

<sup>21</sup> Can' chac checho, cate' che'necho goncho da' güen, da' mal dan' yo'o lo' yichjlažda'ochonan' chžonen gonchon. <sup>22</sup> Lo' yichjlažda'ochon' chbecho goncho can' ža ley che Diosen', <sup>23</sup> perw chache'echo, yo'o yeto da' yo'o lo' yichjlažda'ochon' chžonen goncho da' güen, na' lenña' chnabian' chio' cont choncho da' xinjjen'.

<sup>24-25</sup> ¡Nyaše' chac checho! Lo' yichjlažda'ochon' chaclaže'cho goncho can' ža ley che Diosen', perw da' mal dan' yo'o lo' yichjlažda'ochon' chnabian' chio' len cuerp chechon' cont choncho da' xinjjen'. ¿Non' soe da' mal dan' yo'o lo' yichjlažda'ochon' cont bi nabian' cuerp chechon' len xbab chechon'? Le dan' chnabia' da' malen' chio' da'nan' si'cho castigw toli tocanē. Choχcien Diosen' len' soede' da' mal dan' yo'o lo' yichjlažda'ochon' cont bich nabian' chio', le ba chejnilaže'cho Xancho Jesucriston'.

## 8

### *Spiritw che Diosen' chonen chio' yela' mban toli tocanē*

<sup>1</sup> Na' na'a da' ba naccho txen len Cristo Jesúsēn', bich gata' castigw checho toli tocanē, le ba chzenagcho che Spiritw che Diosen' cont choncho da' güen na' bich chzenagcho che da' malen' dan' yo'o lo' yichjlažda'ochon'. <sup>2</sup> Cate' ne' zoacho chontezcho da' malen' nchoglaon checho si'cho castigw che xtoła'chon' toli tocanē, perw na'a Spiritw che Diosen' ba benen chio' yela' mban toli tocanē da' chejnilaže'cho Cristo Jesúsēn' na' Spiritw chen' chnabian' yichjlažda'ochon'. Da'nan' bich saca'zi'cho toli tocanē. <sup>3</sup> Ley da' bzoj Moisésēn' bi gwzoen yebejen chio' lo' da' malen', le yo'o da' malen' lo' yichjlažda'ochon'. Nach Diosen' gwsele' Xi'ine' Jesucriston' golje' yežlion', goczze cuerp chen' ca cuerp che chio' beñe' güen da' xinj. Na' Jesucriston' bnežjw cuine' neche xtoła'chon' cont da' malen' bich nabian' chio' len xbab da' yo'o lo' yichjlažda'ochon'. <sup>4</sup> Diosen' gwsele'ne' cont soacho goncho da' güen can' ža ley chen' cheyała' goncho. Le bich chzenagcho che da' malen' dan' yo'o lo' yichjlažda'ochon', san ba zoacho choncho da' güen lagüe dan' chzenagcho che Spiritw che Diosen'.

<sup>5</sup> Še chzenagcho che da' mal dan' yo'o lo' yichjlažda'ochon', con da' malzen' chebecho choncho; san še chzenagcho che Spiritw che Diosen', chebecho choncho da' ca' chazlaže' Diosen'. <sup>6</sup> Le še zoacho chebecho da' malen', nachle si'cho castigw toli tocanē, na' še chebecho da' ca' chazlaže' Spiritw che Diosen', guata' yela' mban checho toli tocanē na' soa cuezcho binlo len xbab dan' yo'o lo' yichjlažda'ochon'. <sup>7</sup> Choncho ze beñe' chgue'e Diosen' cate' chebecho da' malen', le cate' chebecho da' malen' bi chazlaže'cho nēca chac gwzenagcho che ley chen'. <sup>8</sup> Na' še zoacho

chzenagcho che da' mal dan' yo'o lo' yichjlažda'ochon', bi chebe Diosen' chio'.

<sup>9</sup> Na' chio', da' ba bedesoa Spiritw che Diosen' lo' lažda'ochon', bi zoacho chzenagcho che da' malen' da' yo'o lo' yichjlažda'ochon', san zoacho chzenagcho che Spiritw che Diosen'. Na' bene' bi zoa Spiritw che Criston' lo' lažda'ogüen', gague da' li chejnilaže' Criston'. (Spiritw che Criston' lecze naquen Spiritw che Dios.) <sup>10</sup> Perw na' še ba zoa Criston' len chio', Diosen' že' naccho bene' güen len le' na' lecze šjayzoacho len le' toli tocañe la'czla' yesat cuerp chechon' neche da' malen' dan' de yežlion'. <sup>11</sup> Diosen' bečhis bosbane' Cristo Jesús'en' ladjo bene' guaten', na' lecze gwžin ža cate' Diosen' yechis yosbane' chio' len cuerp checho quinga da' chesat, le Spiritw chen' zoan lo' lažda'ochon'.

<sup>12</sup> Da'n'an' bene' migw, chonen byen gwzenagcho che Spiritw che Diosen'. Bi cheyala' gwzenagcho che da' mal dan' yo'o lo' lažda'ochon'.

<sup>13</sup> Le še soacho gwzenagcho che da' mal dan' yo'o lo' lažda'ochon', saca'zi'cho toli tocañe. Na' še gwzenagcho che Spiritw che Diosen' cont bi gwzenagcho che da' malen', nach gata' yela' mban checho toli tocañe.

<sup>14</sup> Na' note'tezcho še chzenagcho che dan' chzejni'i Spiritw che Diosen' chio', naccho xi'in Dios. <sup>15</sup> Diosen' bene' chio' Spiritw chen' caten' gwque'e chio' ca xi'ine'. Da'n'an' bich chžebcho Diosen' can' chžebcho to bene' znia cate' choncho xšinen'. Bich chžebcho Diosen', san chol güižchone', che'chone': "Xa". <sup>16</sup> Na' lecze Spiritw chen' chnen lo' lažda'ochon' cont nezecho naccho xi'in Dios. <sup>17</sup> Na' da' naccho xi'in Dios, gwžin ža cate' yogo' da' de che Criston' gaquen checho txen len le'. Na' can' bzanlaže' cuin Criston' gwdi gwxaque', can' cheyala'cze zanlaže' cuincho saca'zi'cho bi da' gac checho cont Diosen' gone' ga gacchgua güen checho txen len le' yaban'.

<sup>18</sup> Yežlio nga de da' chzaca'zi' chzaca'yaše'cho. Perw chacda' bibi zaca'czen cue' yichjcho che da' ca' chac checho, le gwžin ža leca mba juisyw gac checho cate' šjayzoacho len Diosen'. <sup>19</sup> Diosen' bene' benačh, bene' beyixe', len bica'chle da' zjade. Na' yogo'cho len bichle da' ca' bene' zoacho lo' juisyw chbezcho batcan' gon Diosen' gacchgua mba che chio' naccho xi'ine'. <sup>20</sup> Na' yogo' da' ca' ben Diosen' bich zjanacšagüen'. Na' gague con to gualazen zjanaquen ca', san Diosen' bžie' bia' zjanaquen ca'. Perw za' yeyonšagüe' Diosen' legaquen len beyixe' ca' na' len chio' benačh. Na' txen chbezcho gone' cont gac checho binlo. <sup>21</sup> Yogo'cze da' ca' bene' yesebiayin', na' chesebezen batcan' žin ža cate' gone' cont yeyac cuerp che chio' naccho xi'in Diosen' da' cobe na' da' zaca'chgua can' nac che Criston', le canan' lecze yesyeyacšagüe' da' ca' cont bich te chegaquen.

<sup>22</sup> Nezecho ža na'aža yogo' da' ca' ben Diosen' chesežaglaon ca to no'ole bene' chzan. <sup>23</sup> Na' gague da' ca'ze chesežaglaon, san lencze chio' benačh chžaglaochi na' chbežgüe'cho. Ba ben Diosen' chio' Spiritw chen' cont nezecho gwžin ža gaguech güen checho. Na' chbežgüe'cho lo' lažda'ochon' chbezcho batcan' gon Diosen' cuerp cob chechon' cont gwlo'e ba nque'e chio' ca xi'ine'. <sup>24</sup> Cate' Diosen' bene' yela' mban checho toli tocañe gwzolao chbezcho gone' cuerp cobe chechon', na' lenna' ne' chbezcho. Nono zoa ne' chbeze' gac da' nezde' ba goc. <sup>25</sup> Na' še biña' le'echo da'na' chbezcho gac, cheyala' cuezcho gaquen sin cbi chjaxaque'laže'cho.

<sup>26</sup> Na' Spiritw che Diosen' chaclenen chio', le bi nezecho can' cheyala' goncho yol güižcho Dios, san Spiritw che Diosen' chacbe'en cate' con

chebanecho na' cate' bi cheželecho diža' da' güe'lencho Diosen', nach chñen gualazcho len diža' da' bi chejni'icho. <sup>27</sup> Na' Dios ben' chña' chgüie' yichjlaždao' yogo'cze beñe', chejni'ide' bin' chaclaže' Spiritw chen' cate' chñen gualazcho, le ba gwleje' chio' naccho lo ne'e. Na' con da' chaclaže' Diosen' chñab Spiriton' lagüen'.

*Diosen' de'e chio' na' da'nan' nono soe chio'*

<sup>28</sup> Na' ñezecho bite'tez dan' chac, Diosen' chone' cont gac güen che chio' chaquechone', le ba gwleje' chio' cont naccho lo ne'e can' gwnalaže'. <sup>29</sup> Cate' bina' galjcho Diosen' gwñezde' šejnilaže'chone' na' bsi'e xñezen' gac yichjlažda'ochon' güen can' nac yichjlaždao' Xi'ine' Jesucriston'. Bsi'e xñezen' gac Jesucriston' beñe' blao lao yogo'cho na' chio' gaccho ca biše' lježe' bi' xcuide'ch. <sup>30</sup> Can' naquen, cani'te Diosen' bsi'e xñezen' gac yichjlažda'ochon' güen can' nac yichjlaždao' Jesucriston' na' gwleje' chio' cont naccho lo ne'e. Lecze beyone' chio' beñe' güen len le' na' bene' cont gacchgua güen checho txen len Jesucriston' yaban'.

<sup>31</sup> ¡Catec güenna' chon Diosen' len chio' ba bsi'e xñezen' gac checho yogo' da' ca! Len' de'e chio', nachen' notno soe chio'. <sup>32</sup> Diosen' bi bžone' saca'zi' Xi'ine' Jesucriston', san gwsele'ne' cont yeque'e xtoła'chon'. Da'nan' ñezecho yebede' gone' chio' yogo' bite'tez da' yažjecho. <sup>33</sup> Diosen' ba gwleje' chio' naccho lo ne'e, na' beque'e xtoła'chon'. Na' notno soe gwcuiš chio' lagüen', le ba gwne' bibi xtoła'cho de. <sup>34</sup> Nono zoa no gac gon cont ña Diosen' de xtoła'cho. Criston' bzanlaže' cuine' gosote'ne' cont beque'e xtoła'chon', na' beyas bebane' ladjo beñe' guat ca', chi'e chnabi'e txen len Diosen'. Na' len' chñie' gualaz chio' lao Diosen'. <sup>35</sup> ¿De da' gwžon cont Criston' bich gacde' chio'? ¿Gwžon no da' mal da' gac checho? ¿Gwžon no yela' yaše' yela' zi' da' gac checho? ¿Gwžon no yela' xi'a che beñe' chgue'e chio'? ¿Gwžon no yela' chbił chdon checho? ¿Gwžon cate' bi de xalana'cho? ¿Gwžon še bi da' xož gac checho? ¿Gwžon še za' no beñe' gote' chio'? Bibi de da' gwžon cont Criston' bich gacde' chio'. <sup>36</sup> Chac can' nyojczy Xtiža' Diosen' žan:

Xanto' Dios, da' chejniłaže'to' le' nita' beñe' chesaclaže' yesote' neto' do ža do yel.

Chesone' xbab nacto' ca to xila' be yesote'.

<sup>37</sup> Na' la'czła' yogo' da' mal ca' za'ac len chio', bi chac chop laže'cho, san chebechgüecho le ñezecho zoacze Criston' chacde' chio'. <sup>38</sup> Neda' ñezda' bibi de da' gac gwžon cont Diosen' len Criston' bich yesacde' chio'. Yela' goten' bi gonen, ñe yela' mbanna', ñe no angl, ñe no da' xigüe', ñe no beñe' gwnabia', ñe da' chac checho ña'a o bichle da' za'za'. <sup>39</sup> Ne da' de le'e yaban', ñe da' de gabilen', ñe bichle da' ben Diosen' bi gac yosožonen cont Diosen' bich gacde' chio'. Ba blo'ede' catec chacde' chio' dan' gwsele' Xancho Jesucriston' beque'e xtoła'chon'.

## 9

*Diosen' gwque'e beñe' Israel ca' ca xi'ine'*

<sup>1-2</sup> Neda' naca' txen len Criston' na' choa' diža' li, bi chonlaža', chnia' chacyaše'chgüeda' na' chacchgüeda' lo' lažda'ogua' che beñe' gualaz chia' beñe' bi chesejniłaže' Criston'. Spiritw che Diosen' chaclenen neda' cont ñezda' diža' lin' choa'. <sup>3</sup> Chacda' gwzanda' cuina' cuiaya'a šeca' da' cuejiže' Diosen' neda' cuit Criston' gonen cont beñe' gualaz chia' ca' yesejniłaže' Criston'. Chacda' legaque', le gosaljje' zjanaque' beñe' Israel ca neda'.

<sup>4</sup> Diosen' gwque'e xozxtao' neto' bene' Israel ca xi'ine', na' gwzoe' len legaque' lo' be'ni' juisyw. Na' gwne' gaclene'ne', na' bnežjue' legaque' ley da' bzoj Moisésen'. Na' blo'ede'ne' naclen' yesonxene'ne', nach gože' legaque' bichle da' güen da' gone' len legaque'. <sup>5</sup> Bene' gole blao bene' za' che'elte gosaque' xozxtao' neto' bene' Israel. Na' lo diaža chegaque'na' golje Criston' ben' gwsela' Diosen'. Criston' lecze naque' Dios na' chnabi'e yogo'te beñach, yogo'te beyixe' na' yogo'lol' bichle da' de yežlio nga na' gate'teze. Cheyała' gonxenchone' toli tocañe. Na' can' gonšcaczcho.

<sup>6</sup> Na' bi cheyała' goncho xbab bi ben Diosen' can' gwne' gone' güen len neto' bene' Israel. Gague yogo' neto' goljto' lo diaža che da' Israelen' na Diosen' nacto' bene' Israel, le gague yogo'to' chejnilaže'to'ne'. <sup>7</sup> Na' gague yogo' neto' goljto' lo diaža che da' Abrahanna' nacto' dogualje xi'in diaža che', le gague yogo'to' chejnilaže'to' Diosen' can' gwyejnilaže' da' Abrahanna' le'. Quinga gož Diosen' Abrahanna' cani', gwne': "Xi'in diaža che da' Isaaquen' gona' cuent lo diaža chion'." <sup>8</sup> Na' dan' gwne' ca' zeje diža' Diosen' chbeje' bene' zjanaque' xi'ine' gague da' gosalj'e lo diaža che bene' Israelen', san bene' chesejle'e gon Diosen' gac chegaque' can' že' con can' gwyejle' da' Abrahanna', legacze' zjanaque' xi'ine' na' zjanaque' xi'in diaža che da' Abraham. <sup>9</sup> Quinga gož Diosen' Abrahanna' gone', gwne': "Cate' žin tiempen' bžia' bia' yida', cana' ba zoa to bi' che no'ol chio' Sara ni'."

<sup>10</sup> Na' gague da' na'zen', san lecze ca' Diosen' be'e diža' che xi'in da' Rebecan' bin' gosac choptebe' xi'in da' xozxta'oto' Isaac. <sup>11-12</sup> Cate' biña' yesalje bi' cuaš ca' na' bibi na' yesombe' cont nacho zjanacbe' bi' güen o bi' mal, Diosen' blo'ede' chbeje' note'tez bene' chaclaže' cont gone' güen len legaque'. Le Diosen' gože' Rebecan': "Bin' galje da' nechw gwzexjw yichjbe' cont bin' za' cože'ben' nabia'be' lebe'." Gwne' ca' cont nezecho chbeje' bene' gac güen chegaque', gague lagüe da' chesone' bi da' güen, san cont gac can' chnalazen'. <sup>13</sup> Na' ga yoble nyoj Xtiža' Diosen' žan: "Gocda' Jacob na' bgue'eda' Esaú."

<sup>14</sup> Bi cheyała' goncho xbab Diosen' cbi chone' da' zej to licha dan' chone' ca'. Zejcz'e to licha. <sup>15</sup> Chone' can' gože' Moisésen' cani'te, gwne': "Yeyaše'laža' con non' chazlaža' yeyaše'laža', na' ži'ilaže'da' con non' chazlaža' ži'ilaže'da'." <sup>16</sup> Diosen' chbeje' bene' cont yeyaše'laže'de' le', gague can' chaclaže' beñachen', na' gague da' chesone' bi da' chesone', san Diosen' cheyaše'laže'de' con non' chbeje' yeyaše'laže'de'. <sup>17</sup> Na' Xtiža' Diosen' nyojen can' gože' bene' gwnabia' che Egipton', gwne': "Neda' bena' naco' rey cont chlo'eda' bene' yeła' guac chia' da' chona' len le'. Chonan' cont yeseneze bene' že' doxen lo yežlion' zoa' chnabi'a'." <sup>18</sup> Can' naquen, Diosen' cheyaše'laže'de' con non' chazlaže' yeyaše'laže'de', na' lecze bene' zjanaque' bene' güedenag, lecze chazlaže' gone' legaque' bene' güedenag.

<sup>19</sup> Na' da' chon Diosen' ca', guacte gonle xbab nale: "Con can' ba nžia Diosen' bia' chon chio' beñach. ¿Bixchen' že' de xtoła'chon' še ca'?" <sup>20</sup> Perw ¿no nac chio' beñach gacyožencho Diosen'? Ca to no yeso' xguague bi gac yen' bene' ben len: "¿Bixchen' beno' neda' quinga?" <sup>21</sup> Bene' güen yeso' xguaguen' guac gone' con can' chazlaže' len gonan'. Chac chone' ton da' nac xdanchgua na' len gona' na'ze gone' yeto da' gon žin len bite'teze.

<sup>22</sup> Na' bi nacho chon Diosen' con can' chazlaže' len chio' beñach yogo' ni'a, nžie' bia' gwnežjue' castigw toli tocañe che bene' ca' bi chosozenag

çe', na' nape' yela' guac cont gone' ca'. Perw chzoede' sša chape' yela' chxenlaže' len legaue' na' gague la' seła'te' legaue' lo yi' gabilen' la'czła' zjazaue' yesebiaye'e. <sup>23</sup> Chone' ca' le nžie' bia' gone' da' güen juisyw len note'tezcho chejnilaže'chone', chion' cheyaše'laže'de'. Cani'te gwleje' chio' gac da' mba juisyw checho cate' šjayzoacho len le'. <sup>24</sup> Chion' ba gwleje' gac güen checho balcho naccho bene' Israel na' balcho bi naccho bene' Israel. <sup>25</sup> Can' ža le'e libr dan' bzoj Oseas ben' be' xtiža' Diosen' cani', žan: Bene' ca' bi zjanaue' yež chia', neda' Dios nia' legaue' yež chia', na' bene' ca' bi gocda', yapegaca'ne' chacda' legaue'. <sup>26</sup> Na' yež gan' gož Diosen' bene' ca': "Bi nacle yež chia'", na'teze Dios ben' zoa toli tocañe ye'e legaue' xi'ine'. <sup>27</sup> Na' Isaías ben' be' xtiža' Dios cani' gwne' quinga çe da' xozxtao' neto' bene' Israel: "La'czła' chio' bene' Israel šancho ca yox da' chi' cho'a nisdao', bał gacho šjayzoacho len Diosen'. <sup>28</sup> Le Diosen' gone' can' ba nchoglagüen' len chio' benač, na' bedao'nez gone' doxen can' ba ngüie' gone'." <sup>29</sup> Gac can' ža yeto da' bzoj Isaíasen' cani', žan: Šaca' Xancho Diosen' ben' nape yela' guac xen bi bocua'ane' to čhope bene' lo nación Israel chechon', ba gwžiyi'cho can' gosac çe bene' Sodoma na' bene' Gomorra ca'.

*Bene' Israel bene' bi chesejnilaže' Criston'*

<sup>30</sup> Quinga ba goc, bene' bi zjanaue' bene' Israel bi besyeyiljue' nacle yesone' cont Diosen' ne' zjanaue' bene' güen len le', perw bale' ba chesejnilaže' Criston' na' da'nan' ba zjanaue' bene' güen len Diosen'. <sup>31</sup> Na' zan bene' Israel gualaž četo' zjanao' to ley da' chžian bia' naclen' yesone' cont yesaque' bene' güen len Diosen'. Perw bi zjanaue' bene' güen len le', le bi chesone' doxen can' žanna'. <sup>32</sup> Na' bi goc yesaque' bene' güen len Diosen', le gosacde' yesone' da' güen cont yesaque' bene' güen len le' na' bi gosacbe'ede' con bene' yesejnilaže'ne' yesaque' bene' güen len le'. Goc čhegaue' ca chac çe bene' jati'i to yej. <sup>33</sup> Quinga nyoj Xtiža' Diosen' čhegaue': Gan' nzi' Sión seła' to bene', na' bena' zaca'lebe' ca to yej da' čhego' bene' na' ca to yej xen da' šjati'i bene' na' biže', le bene' zan bi yesejnilaže' ben' seła'. Na' note'teze' yesejnilaže' bena' selan', gwbat yesyetingde' çe dan' gosejnilaže'ne'.

## 10

<sup>1</sup> Bene' migw, lo' lažda'ogua' che'nchgüeda' bene' Israel gualaž chia' yesejnilaže' Jesucriston' cont gata' yela' mban čhegaue' toli tocañe, nachen' choł güiža' Diosen' chñaba' gaclene' legaue'. <sup>2</sup> Nežda' da' zan da' chesone' chesacde' yebe Diosen' legaue', perw bi chesacbe'ede' bin' chazlaže' Diosen'. <sup>3</sup> Bi chesejni'ide' cheyala' yesejnilaže' Criston' cont yesaque' bene' güen, san chesyeyiljue' bi da' güen da' yesone' chesacde' cont yesaque' bene' güen len le'. Da'nan' bi chesejnilaže' Jesucriston' can' chaclaže' Diosen' yesone'. <sup>4</sup> Le yogo' bene' chesejnilaže' Criston' ba besyeyaque' bene' güen len Diosen'. Na' chio' chejnilaže'chone' ba nezecho nono gac gonyañe' can' ža ley dan' bzoj Moisésen', neca gac yeyaque' bene' güen da' na'ogüe' lezen.

<sup>5</sup> Da' Moisésen' bzoje' can' cheyala' gon bene' cont gaque' bene' güen len Diosen' gwne': "Note'teze bene' chone' cayanen' ža leyna', nachen' guac bane' toli tocañe." <sup>6-7</sup> Na' chio' ba naccho bene' güen len le' da' chejnilaže' chone', na' bich choncho xbab načo: "¿No gac cue yaban' na' no gac yetj gan' že' bene' guaten'?" šaca' nacle goncho šjaxi'cho Criston' cont gaclene' chio'. <sup>8</sup> San diža' güen da' chyixjue'eto' žan: "Ba nombia'cho diža' da' chaclenen chio'. Choncho xbab che len na' choe'cho diža' can' žan." Lenña' diža' da' chyixjue'eto' bene' cont yesejnilaže' Jesucriston'. <sup>9</sup> Che'to' bene': "Še güe'lenle bene' diža' cont yesenezde' chejnilaže'le Jesucriston' na' chzenagle che' da' naque' Xanle, na' še šejle'le lo' yichjlažda'ole Diosen' bečhis bosbane' Jesucriston' ladjo bene' guaten', nachen' gata' yela' mban chele toli tocañe." <sup>10</sup> Le cheyala' šejle'cho lo' yichjlažda'ochon' cont yeyaccho bene' güen len Diosen' na' lecze cheyala' güe'lencho bene' diža' che dan' chejnilaže'cho Criston' cont gata' yela' mban checho toli tocañe.

<sup>11</sup> Xtiža' Diosen' nyojen žan: "Note'tez bene' yesejnilaže' Diosen', gwbat yesyetinjde' che da' gosejnilaže'ne'." <sup>12</sup> Bałcho naccho bene' Israel na' bałcho bi naccho bene' Israel, toz can' chon Diosen' len yogo'cho, le Xancho Jesucriston' naque' Xan yogo'lo' bene', na' cheyaše'laže'de' note'tezcho chñabcho gaclene' chio'. <sup>13</sup> Can' gwne': "Note'tez bene' yesenabe' gaclena' legaque', neda' naca' Xanle yebeja' legaque' lo' da' malen'." <sup>14</sup> Na' žnacxe yeson bene' yesenabe' goclen lağüen' še bi chesejnilaže'ne'? Na' žnacxe yesone' yesejnilaže'ne' še biña' yesende' xtižen'? Na' žnacxe yesende' xtižen' še nono zoa no güe'lene' legaque' xtižen'? <sup>15</sup> na' žnacxe yeson bene' yeseyixjue'ede' xtiža' Diosen' še Diosen' bi sele' legaque' yeseyixjue'eden'? Chac can' nyoj Xtiža' Diosen' žan: "Chbechgüecho caten' za'ac bene' cheseyixjue'ede' diža' güen chosozejni'ide' guac soacho binlo len Diosen'."

<sup>16</sup> Perw gague yogo' bene' gualaž cheto' chosozenague' diža' güen che Diosen'. Chac can' gwna Isaiás ben' be' xtiža' Diosen' cani', gwne': "Xana', nono chzenagtec diža' dan' chzeneto'ne'." <sup>17</sup> Bia'cze cheyala'cze yesene bene' diža' güen da' chzejni'in che Criston' cont yesejnilaže'ne'.

<sup>18</sup> Na' chñaba': žbiña' yesene bene' Israel gualaž cheton' diža' güen da' chzejni'in che Criston'? Bač gosenden'. Chac can' nyoj Xtiža' Diosen' žan: Bene' že doxen lo yežlion' ba gosende' xtižen';

ba zej xtižen' doxen.

<sup>19</sup> Na' chñaba' da' yoble: žbi gosejni'i bene' Israel gualaž cheton' diža' dan' chzejni'in che Criston'? Ba gosejni'iczdnen'. Le da' Moisésen' bzoje' da' gwna Diosen' čegaque', žan:

Neda' Dios gona' güen len bene' bi zjanac bene' nación chia', na' gue'ele legaque'.

Na' gona' güen len bene' nación ca' bene' bi chesejni'i, na' ža'ale.

<sup>20</sup> Nach Isaiásen' ben' be' xtiža' Diosen' cani' bi bžebe' gwduxjue'ede' da' nga gwna Diosen', žan:

Bene' bi besyeyiljw neda', besyeželde' neda'.

Na' bene' bi gosenab neda', blo'elagua' legaque'.

<sup>21</sup> Na' Diosen' gože' bene' Israel gualaž cheton', gwne': "Yogo' ni'a chñeyoeda' le'e cont gwzenagle chia', na' zoačhačhle chonle güedenag len xtižan'."

## 11

*Bal bene' Israel yesejnilaže' Jesucriston'*

<sup>1</sup> Bi cheyała' goncho xbab Diosen' bechojlaže' nación Israel četo' to ši'ize. Neda' naca' bene' Israel, golja' lo diaža che da' Abraham na' naca' diaža' che da' Benjamín. <sup>2</sup> Biña' yechojlaže' Diosen' neto' nacto' diaža che ben' gože' Israel, le gwleje' neto' cani'te cont nacto' nación che'. Le gon xbab can' nyoj dan' gwna Elías ben' be' xtiža' Diosen' cani', gwdagüe' xya che da' xozxta'oto' ca', gože' Diosen': <sup>3</sup> “Xana', bene' gualaž čhia' quinga ba gosote' bene' ca' goso'e xtižon', na' ba bosyočhinje' mes de yej ca' gan' cheyała' yesonxene' le'. Yetoga neda' zoa' chzenaga' čhio' na' lencze neda' chese'nde' yesote'.” <sup>4</sup> Nach Diosen' boži'e xtižen' gože'ne': “Ne' nita' gaže mil bene' ba gwleja' bene' biña' yosozoa xibe' yesonxene' l' gua'a lsaca' dan' nzi' Baal.” <sup>5</sup> Na' ca'cze naquen ža na'aža, neto' bene' Israel chejnilaže'to' Criston' bi nacto' bene' zan, perw Diosen' ba gwleje' neto' cont chonxento'ne', le nži'ilaže'de' neto'. <sup>6</sup> Diosen' gwleje' neto' cont chonxento'ne' da' nži'ilaže'de' neto'. Bi gwleje' neto' lagüe' da' nonto' bi da' güen. Šaca' gwleje' neto' lagüe' da' nonto' bi da' güen, bi naquen con to goclen da' choñ Diosen' neto' lo yela' bene' šagüe' che' cate' chbeje' neto' še ca', san naquen to goclenze.

<sup>7</sup> Zan bene' nación Israel četon', la'czla' chesonchgüe' da' chesacde' cheyała' yesone', bi chesyěželde' naclen' yesone' cont yesaque' bene' güen len Diosen'. Perw Diosen' gwleje' balto' cont šejnilaže'to'ne' na' none' neto' ca' to bene' güen. Na' bene' yezica'chle zjanaque' güedenag len Diosen'. <sup>8</sup> Chac čhegaque' can' nyoj Xtiža' Diosen' žan: “Diosen' bene' cont zjanaque' ca' bene' bicze nte. Na' ža na'aža zjanaque' ca' to bene' bi chle'e len yejlagüen', na' ca' to bene' bi chene len nagen'.” <sup>9</sup> Na' da' Davin' gwne' čhegaque':

Yogo' da' de da' chesyebede' yesaquen ca' to da' yeben legaque', na' yesaquen ca' to ga šjaselažoe' yesaque' castigw.

<sup>10</sup> Yesechoł yichjlažda'ogaquen', na' yedote yesezaca'zi'e can' chzaca'zi' ben' nlegw cože' no'e yoa' zi'i.

*Diosen' gwleje' bal bene' bi zjanac bene' Israel cont chesejnilaže'ne'*

<sup>11</sup> Nezczecho zan bene' Israel gualaž četon' bi chesejnilaže' Criston'. Na' čnaba', žzjanaque' ca' bene' gwo'o yeja' ni'e? žše zjanaque' ca' bene' gwbiže' na' gote'? Zjanaque' ca' to bene' con gwo'o yeja' ni'e na'ze. Da' bi chesejle'e che Criston' de latje cont le'e bi nacle bene' Israel chzenagle xtižen'. Da'n'an' legaque' gwžin ža yesezelaže' gon Diosen' güen len legaque' ca' ba chone' len le'e bi nacle bene' Israel. <sup>12</sup> Da' yoble čhnia', da' bi chesejnilaže' bene' gualaž četo' ca' Criston', chac ca' cont yezica'chle bene' že' yežlion' yesenite' mba con še yesejnilaže'ne'. Na' da' bchoj nación Israel četon' lo na' Diosen', de latje cont le'e bi nacle bene' Israel soale mba lo na' Diosen'. Perw gwžin ža cate' yogo'te bene' gualaž četo' yesenite' yesejnilaže' Diosen', na' cana'ch gac mba juisyw.

<sup>13</sup> Na' le'e bi nacle bene' Israel, che'nda' nezele Diosen' gwsele' neda' cont güe'lena' le'e xtižen' le'e bi nacle bene' Israel. Na' chona' con ga zelao chzaque'da' cont bene' yosozenague' che Diosen'. <sup>14</sup> Le chaclaža' gona' cont bene' gualaž čhia' ca' yesezelaže' gon Diosen' güen len legaque' can' chone' len le'e chejnilaže'lene', na' gata' yela' mban čhegaque' toli tocañe. <sup>15</sup> Diosen' ba bnite' zan bene' Israel gualaž četon' ca'ale to

tiemp cont le'e bi nacle bene' Israel gwbiga'le len le'. Na' gwžin ža cate' gon Diosen' yesyebiga' yezan bene' gualaž četo' len le'. Na' leca mba gac cate' yesyebigue' len Diosen'. <sup>16</sup> De costumbr che neto' nacto' bene' Israel cate' chonto' yetextil, na' chnežjwto' Diosen' to blōl dao' cuazin' cont chlo'eto'ne' doxenen naquen che'. Na' lecze še nacho to loe yaguen' naquen che Diosen', zejen lecze zoze' yaguen' naquen che'. Na' da' xoxxta'oto' ca' ben' gosejnilaže' Diosen' cani' zjazaca'lebde' ca blōl dao' cuazina' na' ca' loe yaguen'.

<sup>17</sup> Nación Israel četon' zaca'leben ca zoze' yag da' ba nchog xan yaga' to lao yag olivo güen na' ba bniten' šla'ale. Na' le'e bi nacle bene' Israel zaca'leble ca zoze' yag olivo da' ze do yiže', da' ba gwčogue' lagüen na' ba bozoen' yag güen cont beyaquen toze. Nach guac nacho loe yag güenna' ba noxen' le'e na' niže' chenna' chac banlenle. <sup>18</sup> Bi gaquele naquechle bene' güen ca bene' Israel gualaž četo' da' chac chele ca'. Gague le'e chnežjwle yela' mban che loe yaguen', san loe yaguen' chonen le'e yela' mban.

<sup>19</sup> Le'e bi nacle bene' Israel, šeca che'lja lježe: "Diosen' bene' bene' Israel ca yag da' gwčogue' zozen' cont goc bozoe' chio' gualaz legaque'." <sup>20</sup> Da' li can' žalen'. Perw da' bi gosejnilaže' Criston', Diosen' bene' len legaque' ca zoze' yag da' ba gwčog xan yaguen' len, na' ba bozoe' le'e lagüe da' chejnilaže'le Criston'. Da'nana' bi ga'laže'le, san le gwsaca' cont soačahčle šejnilaže'lene'. <sup>21</sup> Da' bi gosejnilaže' Criston', Diosen' bene' cont gwdi gwxcaca' bene' Israel gualaž četo' ca' bene' zjazaca'lebe' ca zoze' yag güenna', na' lecze ca' gone' saca'zi'le še bi soačahčle šejnilaže'lene'. <sup>22</sup> Le gonšč xbab can' nži'ilaže' Diosen' chio' chejnilaže'chone' na' can' chone' cont saca'zi' bene' ca' bi chesejnilaže'ne'. Nachen' cheyala' soačahčle šejnilaže'lene' cont bi gone' saca'zi'le can' ba bene' len bene' Israel gualaž četon' bi gosejnilaže'ne'. <sup>23</sup> Na' Diosen' yebede' si' lo ne'e bene' Israel gualaž četo' ca' cate' yesejnilaže'ne', le nape' yela' guac cont yozoe' legaque' binlo len le', nach yesaque' ca zoze' yag da' bezyone' toze len yag čen da' yoble. <sup>24</sup> Le'e nacle ca zoze' yag olivo da' ze yiže', Diosen' gwčogue' le'e na' bozoe' le'e lo zoze' yag güen la'czla' bi nacle dogualje zozen'. Na' naquechxe yebede' yozoe' bene' Israel gualaž četo' ca' le'e yaguen' da' yoble bene' ca' zjazaca'lebe' ca dogualje zoze' yaguen'.

*Bene' zan bene' Israel yesyeyaque' lo na' Diosen'*

<sup>25</sup> Bene' migw, che'nda' šejni'ile da' nga da' nono na' neze cont bi ga'laže'le gaquele zaca'chle clēl ca bene' Israel gualaž četo' ca'. Diosen' be'e latje zane' zjanaque' bene' güedenag len xtižen' šlac yesejnilaže' bene' bi zjanaque' bene' Israel ben' ba bsi'e xneze yesejnilaže'ne'. <sup>26</sup> Nach gwžin ža yogo' bene' Israel gualaž četo' ca' yesenita' yesaque' lo na' Diosen'. Gac can' nyoj Xtiža' Diosen' žan:

To bene' choj lo ciuda Sión yebeje' le'e lo da' mal da' chonle,  
le'e za'le lo diaža che da' Jacob.

<sup>27</sup> Na' cate' žin ža yeca'a xto'la'len',  
cana'ch ba goc can' ba gwnia' gona'.

<sup>28</sup> Dan' bi chesejle' zan bene' Israel gualaž četon' diža' güen che Diosen', da'nana' ba bzoe' šla'ale nación četon' na' ba gwleje' le'e bi nacle bene' Israel cont chejle'le che'. Perw na' Diosen' ne' chadce' bene' ca', le gwleje' da' xoxxta'oto' ca' cont yesaque' nación che'. <sup>29</sup> Na' Diosen' bi chetiñjde' che bene' mbeje' yesaque' nación che', neca chetiñjde' che



goclen da' chone' len be<sup>n</sup>achen'. <sup>30</sup> Cana'te le'e bi bzenagle che Diosen' na' da' bi gosaclaže' be<sup>n</sup>e' Israel gualaž cheton' yosozenague' che', nach beyaše'laže' Diosen' le'e na' goclene' le'e cont chzenagle che'. <sup>31</sup> Na' da' bi chosozenag be<sup>n</sup>e' Israel gualaž cheto' ca' che Diosen' na'a, chac ca' cont žin ža gwlo'e Diosen' ne' cheyaše'laže'de' legaque' can' cheyaše'laže'de' le'e. <sup>32</sup> Diosen' ba gwchoglagüe' che yogo' be<sup>n</sup>achen' de xto<sup>l</sup>a'gaque' da' bi chosozenague' che', na' ba bene' ca' cont le<sup>c</sup>ze gwlo'ede' cheyaše'laže'de' yogo'cze'.

<sup>33</sup> Le<sup>c</sup>a be<sup>n</sup>e' sina' Diosen'. Nezcze<sup>d</sup>e' yogo'lo<sup>l</sup>. Gwbat šejni'icho da' nžie' bia' gac o da' nžie' bia' gone' lo yela' sina' che'. <sup>34</sup> Nyoj Xtizen' žan: "Nono neze yogo' xbab che Xancho Diosen'; nono nape yela' sina' cont gwzejni'ide' le' can' cheya<sup>l</sup>a' gonen'. <sup>35</sup> Na' nono cheya<sup>l</sup>a' gon xbab yebi' i Diosen' güen len le' še bi da' ba be'ene'." <sup>36</sup> Yogo'lo<sup>l</sup> da' de naquen che Dios. Bene' be<sup>n</sup>ach, beyixe' na' bica'chle da' zjade. Na' lagüe yogo'lo<sup>l</sup> da' bene' zoe' blao. Len' gacxene' to<sup>l</sup>i toca<sup>n</sup>e. Can' gacšca.

## 12

### *Cheya<sup>l</sup>a' gon cuincho lo na' Diosen'*

<sup>1</sup> Be<sup>n</sup>e' migw, Diosen' ba cheyaše'laže'de' chio'. Da'n<sup>n</sup>an' ch<sup>n</sup>eyoeda' le'e le gon doxen cuin<sup>l</sup>e lo na' Diosen' na'a mban<sup>l</sup>e. Le gonen do yichj do laže'le. Na' le gac be<sup>n</sup>e' laždao' xilaže' le can' chazlaže' gonxenchone'. <sup>2</sup> Bi goncho ca cheson be<sup>n</sup>e' bi zjanombia' Diosen'. San cheya<sup>l</sup>a' nabecho Diosen' gwše'e xbab chechon' cont yebecho goncho dan' chazlažen'. Na' chaclaže' goncho da' güen, da' chebede' na' yogo' da' zej to licha.

<sup>3</sup> Diosen' nži'ilaže'de' neda' na' ba gwse<sup>l</sup>e' neda' cont chyixjue'eda' xtižen'. Da'n<sup>n</sup>an' chnia' bi cheya<sup>l</sup>a' gonxen cuincho, san cheya<sup>l</sup>a' gache'echo Diosen' ba goclene' chio' cont chejnilaže'chone' na' none' grasyw checho cont goncho bi da' goncho. <sup>4</sup> Can' nac cuerp chechon', zan cuen naquen na' gague toze žin da' cheson to to cuenen. <sup>5</sup> Le<sup>c</sup>ze can' naquen len chio', be<sup>n</sup>e' zan naccho chejnilaže'cho Criston' na' yogo' chion' naccho txen len le' na' len lježcho zaca'lebcho ca toze cuerp.

<sup>6</sup> Diosen' none' grasyw chechon' gwde gwdele da' gon to tocho. Še ba none' checho chixjue'echo bi da' gože' chio', nach cheya<sup>l</sup>a' chixjue'echon na' šej<sup>l</sup>e'cho gaclene' chio' gonchon. <sup>7</sup> Na' še Diosen' ba none' checho gaclencho bene', cheya<sup>l</sup>a' gaclencho legaque'. Na' še ba none' checho gwsed gwlo'echo be<sup>n</sup>e', cheya<sup>l</sup>a' gwsed gwlo'echone'. <sup>8</sup> Na' še Diosen' ba none' checho neyoecho be<sup>n</sup>e' cont yesone' da' güen, cheya<sup>l</sup>a' neyoechone'. Na' še ba none' checho gwnežjwcho da' chyažje be<sup>n</sup>e', cheya<sup>l</sup>a' gwnežjwchon do yichj do laže'cho. Na' še ba none' checho gaccho be<sup>n</sup>e' blao na' güia na' ljež chio' chonxenchone', cheya<sup>l</sup>a' cue' yichjcho güia na'cho legaque'. Na' še ba none' checho yeyaše'cho no be<sup>n</sup>e' yaše', no be<sup>n</sup>e' gole o no be<sup>n</sup>e' güe', cheya<sup>l</sup>a' yebecho gaclenchone'.

### *Da' cheya<sup>l</sup>a' gon chio' chejnilaže'cho Jesucriston'*

<sup>9</sup> Cheya<sup>l</sup>a' gaque ljež be<sup>n</sup>achcho do yichj do laže'cho, na' cheya<sup>l</sup>a' gue'echo da' malen' na' soaczcho goncho da' nac da' güen. <sup>10</sup> Ca chaque biše' goljcho, ca'cze cheya<sup>l</sup>a' gaquecho note'teze be<sup>n</sup>e' lježcho na' gonchone' be<sup>n</sup>e' xench ca cuincho.

<sup>11</sup> Bi gaccho be<sup>n</sup>e' xagüed, san goncho da' non Diosen' chio' goncho do yichj do laže'cho, le chonxench Xancho Jesucriston' len dan' chonchon'.

12 Cheyała' yebecho da' nezecho šjayzoacho len Diosen'. Cheyała' gwyo gwchejcho cate' chyí chzaca'cho. Na' lecze cheyała' yol güižcho Diosen' zan ni'a yogo' ža.

13 Cheyała' gaclencho bene' lježcho bene' chesejnilaže' Diosen' še bi da' cheseyažde' na' gwlebhchone' ližcho še zjanaque' bene' zito'.

14 Cheyała' nabcho lao Diosen' gac güen che bene' chosoči chososaca' chio'. Nabcho gac da' güen chegaque', gague da' mal.

15 Cheyała' yebecho txen len bene' chesyebe na' cuežcho txen len bene' chesebež.

16 Yogo'cho cheyała' goncho toze xbab. Bi cheyała' ga'laže'cho, san yol güižcho bene' yaše' bene' bibi chac na' bi gon cuincho bene' sina'.

17 Še bi da' mal chone bene' chio', bi nacho lecze da' mal yebi'icho len le'. Cheyała' cue' yichjcho goncho da' güen cont yesena bene' le naczen güen dan' chonchon'. 18 Cheyała' goncho bi da' gac goncho cont soacho binlo len yogo'lol bene'. 19 Chacda' le'e, nachen' chnia' cheyała' gwdecho to šla'ale bite'teze da' chesone bene' chio'. Diosen' gwyoecze' nac gone' len bene' chosoči chososaca' chio'. Xtizen' nyojen žan: "Xancho Diosen' že': Neda' yoži'a che da' mal da' chesone', na' neda' gwnežjua'ne' castigw."

20 Na' lecze žan: "Še chbil chdon bene' chgue'ede' chio', cheyała' güe'chone' da' ye'ej gagüe'; le še goncho güen len le', guacbe'eljede' chone' da' mal."

21 Bi güe'cho latje nabia' da' malen' chio' na' yebi'icho mal len bene' chonde' chio' mal, san yebi'icho güen len legaque' cont yesyetinjde' che da' malen' chesonen'.

## 13

1 To tocho cheyała' gwzenagcho che justis bene' chesenabia', le Diosen' bnite' legaque' chesenabi'e. 2 Še bi chzenagcho che bene' chesenabia', bi choncho da' nžia bia' Diosen' goncho, na' lecze chyiljwze xtol'a'cho na' gaccho castigw da' bi chzenagcho chegaquen'. 3 Bi cheyała' žebcho bene' ca' chesenabi'e še zoacho choncho da' güen, san še zoacho choncho da' xinj, nachen' žebcho yesone' chio' castigw. Na' cont bi žebcho legaque', con soacho goncho da' güen da' yesyebede'. 4 Justis ca' chesone' xšin Dios cont soacho güen. Perw še choncho da' xinj, cheyała' žebcho legaque', le zjanape' yela' chnabia' cont yesone' castigw che note'teze bene' cheson da' mal, le Diosen' none' lo na'gaquen' yosonežjue' castigw che bene' cheson da' mal. 5 Da'n'an' cheyała' gwzenagcho chegaque' cont bi si'cho castigw na' lecze cont gacbe'echo lo' yichjlažda'ochon' choncho can' cheyała' goncho. 6 Lecze da'n'an' cheyała' chixjwcho no che bien na' bichle da' cheyała' chixjwcho, cont bene' ca' chesenabia' guac yesone' da' yo'o lo ne'e yesone', na' cheyała' gwzenagcho chegaque', le Diosen' ba bzo'e' legaque' cont chesone' dan' cheyała' yesone'.

7 Chixjwcho še bi da' čala'cho che bene'. Še čala'cho che bien, chixjwchon. Še čala'cho che impuestw, chixjwchon. Na' gapcho bala'an' bene' cheyała' dap bala'an'. Na' gonxencho bene' cheyała' gacxen. 8 Cheyała' chixjwcho doxen bi da' čala'cho che bene', na' lecze cheyała' gaque yogo' ljež benačcho, le še chaquecho legaque', ba choncho da' non ley che Diosen' mandadw goncho. 9 Leyna' žan: "Bi gata'lenle no'ole bi nac no'ol čele o bene' byo bi nac bene' čele, bi gotle bene', bi cuanle, bi güe'le diža' güenlaže' che bene' lježle, bi selaže'le bite'teze da' de che bene'." Na' dech da' ža leyna'. Na' yogo'cze da' nžia bia' leyna' goncho,

baçh chonchon še chzenagcho che dan' žanna': "Le gaque ljež benachle ca chaque cuinle." <sup>10</sup> Še chaque lježcho, bibi da' mal gonechone'. Da'nan' choncho doxen can' nžia bia' leyna' še ba chaque lježcho.

<sup>11</sup> Caten' gwzolaicho chejniłaže'cho Criston' gwnezecho gwžin ža yide' da' yoble. Na' na'a ba za' bagwze yide' da' yoble. Da'nan' bich cheyała' gaccho ca bene' chtas, bene' bi chon xbab. <sup>12</sup> Yežlio nga zaca'leben ca ga nac chol, le že'chgua bene' cheson da' xinj; san gan' zoa Diosen' naquen ca ga yo'o be'ni'. Nach cheyała' cuejyichjcho bich goncho da' xinj na' goncho con da' chazlaže' Diosen', le ba zoa yide Criston' yedyexi'e chio'. <sup>13</sup> Cheyała' goncho da' güen, le ba yo'o be'ni' che Criston' lo' yichjlažda'ochon'. Bi cheyała' goncho txen lo lınin' ga chbe' žaš, bi cheyała' gaccho borrašw, bi cheyała' gata'lencho no'ole bi nac no'ol checho o bene' byo bi nac bene' checho o goncho bichle da' nac da' yela' zto', na' bi cheyała' tillen lježcho o gue'echo bene'. <sup>14</sup> Cheyała' gon cuincho lo na' Xancho Jesucriston' na' cue' yichjcho goncho da' chazlaže' cont da' malen' da' yo'o lo' yichjlažda'ochon' bi nabian' chio'.

## 14

*Toz Diosen' nezde' še bene' lježcho nape' dola'*

<sup>1</sup> Še zoa to bene' ba chejniłaže' Criston' na' biña' šejni'ide' nac cheyała' gone', con zoe' chacžejlaže', le gwlebe' gaque' txen len le'e, perw bi gacyožlenlne' che xbab çhen'. <sup>2</sup> Nita' bene' chesejniłaže' Diosen' chesacde' bi zjanape' dola' da' chesagüe' bite'teze yela' guagw, na' lecz nita' bene' yoble biña' yesejni'ide' bite'teze da' ye'ej gagwcho naquen güen lao Diosen'. Da'nan' chesacde' bi cheyała' yesagüe' bela' na' chesagüe' yixe' cuanze. <sup>3</sup> Ben' chagw bite'teze yela' guagw bi cheyała' gue'ede' ben' bi chagüe' bela', na' ben' bi chagw bela' bi cheyała' ne' che ben' chagüe' bela', le Diosen' ba none' chopte' ca xi'ine'. <sup>4</sup> ¿Noxe nac chio' gwlaže' checho še nac chon ben' ba gwlej Diosen' ca xi'ine'? Diosen' naque' Xan xi'ine' ca', na' len' ne' che to tocho še choncho da' güen o še choncho da' xinj. Na' lecze len' gone' cont soacho goncho da' güen.

<sup>5</sup> Nita' bene' cheson xbab nchoj to ža xen da' zaca'ch len Diosen' ca yezica'chle ža ca', na' lecze nita' bene' chesacde' toz ca zaca' yogo' ža ca'. To tocho cheyała' soacho do yichj do laže'cho goncho da' chejni'icho cheyała' goncho. <sup>6</sup> Bene' cheson xbab de ža da' zaca'ch ca ža ca' yezica'chle, chesebeje' žan' cont chesonxene' Dios. Na' bene' chesacde' toz can' zaca' ža ca', lecze chesonxene' Diosen' chesone' xbaben' ca'. Na' ben' chesagw bite'tez yela' guagw, chesonxene' Xancho Diosen' cate' chesagüen', le cheso'e yela' choxcen che Diosen' che dan' chese'ej chesagüen'. Na' ben' bi chesagw bela', chosožone' yesagüen' da' chesonxene' Diosen' na' lecze cheso'e yela' choxcen che'.

<sup>7</sup> Ne tocho bi yo'o lo na'cho gwžiacho bia' can' soa cuezcho šlaque mbancho, na' neca yo'o lo na'cho gwžiacho bia' nac gatcho. <sup>8</sup> Šlac mbancho zoacho cont goncho da' chaclaže' Xancho Jesucriston', na' še gatcho lecze cate' chaclaže' len' gatcho. Can' naquen, mbancho o gatcho, yo'ocho lo na' Xancho'. <sup>9</sup> Cuin Xancho Criston' gote' na' beyas bebane' ladjo bene' guat ca' cont naque' Xan yogo' bene' chesejniłaže'ne' bene' zjamban na' bene' ba gosat.

<sup>10</sup> Bi cheyała' nacho che bene' lježcho zjanape' doła' še bi da' chesone', na' bi cheyała' gue'e lježcho. Yogo'czecho techo lao Criston' cont le' chogbi'en checho še de xtoła'cho o še bibi de. <sup>11</sup> Nyojczye Xtiža' Diosen' žan: Xancho Diosen' že':

Da' li naca' Dios, zoa' mbana',  
na' yogo' bene' yedesezoa xibgaque' laguan',  
na' yogüe' yesene' toz neda' zaca' yesonxen benach.

<sup>12</sup> Can' naquen, yogo'czecho yodecho cuent lao Diosen' che bite'teze da' ba bencho šlac mbancho.

*Bi goncho da' gwžigan' bene' lježcho gone' da' mal*

<sup>13</sup> Da'n'an' chnia', bi cheyała' necho che bene' lježcho neche bi da' chesone'. Da' cheyała' yechoglaže'cho goncho, cuejyichjcho bi da' choncho še len chžigan' note'teze bene' lježcho gone' da' xinj o še len chonen ca šjabix šjalažoe'. <sup>14</sup> Xancho Jesucriston' bzejni'ide' neda' cont nezda' bi napcho doła' še gagwcho bite'teze yela' guagw. Perw še bene' chone' xbab gape' doła' lagüe da' gagüe' to da' gagüe', naquen mal gagüen' še ca'. <sup>15</sup> Še bene' lježcho chaque' tole lagüe da' chagwcho to da' chone' xbab naquen mal len Diosen', bi chaquechone' še chagwtezchon. Criston' bnežjw cuine' gote' neche bene' lježchon', na' chio' bi cheyała' gagwcho bi da' gonen cont gac choplaže' bene' lježchon' cuejyichje' Criston' na' cuiaye'e. <sup>16</sup> Še choncho bi da' chaquecho naquen güen, perw na' bene' lježchon' chesacde' naquen mal, bi gonchon cont bi yesene' choncho da' xinj. <sup>17</sup> Še ba choe'cho latje chnabia' Diosen' chio' len xbab chechon', dan' che'ej chagwchon' bi naquen da' žialao xen len chio'. Da' nac da' žialao xen, goncho da' zej to licha, soacho binlo len Dios na' len bene' lježcho, na' soacho mbalaz da' yo'o Spiritw che Diosen' lo' lažda'ochon'. <sup>18</sup> Še choncho da' zej to licha, na' zoacho binlo len Diosen' na' len lježcho, na' zoacho mbalaz da' yo'o Spiriton' lo' lažda'ochon', da' li chzenagcho che Criston'. Nachen' chebe Diosen' can' chonchon', na' lecze yezica'chle bene' chesene' choncho güen.

<sup>19</sup> Da'n'an' cheyała' yeyiljwlaže'cho can' goncho soacho binlo tocho yetocho na' can' gaclen bene' lježcho ca' cont yesenita'chache' yesejnilaže' Criston'. <sup>20</sup> Diosen' ba bnitlagüe' xtoła' bene' lježcho na' bi cheyała' gagwcho da' gonen gac choplaže' no bene' lježcho na' gone' da' chacde' naquen mal. Nezda' de latje gagwcho bite'teze yela' guagw, perw naquen mal gagwchon še len chonen choplaže' bene' lježcho. <sup>21</sup> Güenczen bi gagwcho bela' neca ye'ejcho vino na' neca goncho bichle da' goncho še len chonen cont bene' lježcho chacchoplaže' o gone' da' xinj o cuejyichje' bich šejnilaže' Criston'. <sup>22</sup> Še nezecho zoacho binlo len Diosen' da' chejni-laže'chone' na' chaquecho bi napcho doła' len bica' da' choncho, chopzcho len Diosen' nezecho. Mbalazen' zoacho še nezecho lo' yichjlažda'ochon' bi napcho doła' len bica' da' choncho. <sup>23</sup> Na' de xtoła'cho še chagwcho to yela' guagw na' chacžejlaže'cho chaquecho bilja cheyała' gagwchon, le bite'teze da' choncho še chaquecho naquen mal gonchon, napcho doła' chonchon še ca'.

## 15

*Cheyała' cue' yichjcho bene' lježcho*

<sup>1</sup> Baľcho ba zoačhačho chejnilaže'cho Criston' na' nezecho de latje ye'ej gagwcho bite'teze. Perw cheyaľa' gapcho yela' chxenlaže' len bene' biňa' yesejni'šagüe'de', na' bi goncho con da' žan čhecho. <sup>2</sup> To tocho cheyaľa' goncho bi da' güen da' chazlaže' bene' lježcho ca' goncho, cont gaclenen legaue' yesejnilaže'che' Diosen'. <sup>3</sup> Goncho ca', le ne Criston' bi bene' con da' gwnazen che', san goc che' can' nyoj Xtiža' Diosen', žan gože' Xe' Diosen': "Bene' besegue'ede' le' na' gosene' diža' bya' chio', lencze chia' neda' gosene'." <sup>4</sup> Na' Xtiža' Diosen' da' bosozoj bene' cani' chzejni'in chio' cont gwyo gwčhejcho šejnilaže'cho Diosen' cate' chzaca'zi'cho. Na' še goncho xbab can' žanna', na' gaclenchen chio' cont soacho lez gwžin ža gon Diosen' güen len chio'. <sup>5</sup> Diosen' chone' chio' yela' chxenlaže' cont chyo chčhejcho cate' chzaca'zi'cho. Na' chnablaža' lecze gone' gac yichjlažda'ole toze tole yetole, con can' chazlaže' Cristo Jesúsen'. <sup>6</sup> Na' gone' ca' cont toze can' nale gonxenle Dios ben' nac Xa Xancho Jesucriston'.

*Diosen' chaclaže' bene' bi zjanac bene' Israel yesonxene' le'*

<sup>7</sup> Da'nan' cheyaľa' le'e to to bene' lježcho binlo ca Criston' chle'ede' to to chio' binlo, chio' chejnilaže'chone'. Goncho ca' cont gacxen Diosen'. <sup>8</sup> Can' goc len Cristo Jesúsen', bzexjw yichje' ben cuine' ca to bene' güen žin cont goclene' neto' bene' Israel. Blo'ede' diža' li be' Diosen' cate' gože' da' xozxta'oto' ca' gone' güen len legaue'. <sup>9</sup> Na' lecze bid Criston' cont le'e bi nacle bene' Israel lecze gonxenle Diosen' da' ba beyaše'laže'de' le'e. Chac ca nyoj Xtiža' Diosen' dan' žan: Da'nan' gua' yela' choxcen chio' gan' že bene' bi zjanac bene' Israel, gola' gonxena' le'.

<sup>10</sup> Na' ga yoble žan:

Le'e bi nacle bene' Israel, le yebe txen len neto' bene' gwlej Diosen' nacto' nación che'.

<sup>11</sup> Na' lecze žan:

Yogo' le'e bi nacle bene' Israel, le gonxen Xancho Diosen'.

Yogo'lolle le güe' diža' che yela' gwnabia' che'.

<sup>12</sup> Na' da' Isaias ben' be' xtiža' Diosen' cani' bzoje' da' nga žan:

To bene' gualaž yide', bene' galje' lo diaža che da' Isai.

Le' nabi'e bene' že' to to yež na' to to nación,

na' bene' ca' bi zjanac bene' Israel yesebeze' gaclene' legaue'.

<sup>13</sup> Diosen' chone' cont chebecho dan' nezecho šjayzoacho len le'. Na' chnaba' gonšque' cont soale mbalaz juisyw na' soa cuezle binlo len xbab da' yo'o yichjlažda'olen' da' zoale chejnilaže'le Criston'. Gonšque' ca' cont Spiritw che Diosen' gaclenen le'e soačhačhle yebele da' nezele šjayzoale len le'.

<sup>14</sup> Bene' migw, nezda' ba nacle bene' šagüe' bene' chon da' güen, na' nezda' chejni'ichgüele na' chac chneyoe lježle. <sup>15</sup> Pero le'e cart nga ba beyaxjda' gwdila' le'e cont gonchle xbab, le Diosen' beži'ilaže'de' neda' gwleje' neda'. <sup>16</sup> Gwleje' neda' cont chyixjue'eda' xtižen' len bene' bi zjanac bene' Israel. Na' Diosen' yebede' da' ba goclena' legaue' cont bale' gosejle'e xtižen' na' gosaque' lo ne'e cate' Spiritw čhen' benen lažda'ogaquen' xilaže'.

<sup>17</sup> Chbeda' chona' xšin Diosen' da' ba goclen Cristo Jesúsen' neda' chona'. <sup>18</sup> Bi cheyaxjda' gua' diža' che bi da' ba ben bene' yoble, san choa' diža' che da' ba ben Criston', le chaclene' neda' choa' xtižen' na' bichle da' chona' cont zan bene' ca' bi zjanac bene' Israel chosozenague' che'.

<sup>19</sup> Spiritw che Diosen' goclenen neda' cont bena' yela' guac na' bichle da' besyebane bene' gate'teze gwy'a'a be'lena' legaque' xtiža' Diosen', gwzolagua' Jerusalén na' bžintia' gan' nzi' Ilirico. Na' ba gwđixjue'eda' xtižen' doxen gan' gwsele' neda'. <sup>20</sup> Na' ba bena' byen ba bia' diža' güen da' chzejni'in che Criston' gan' nono na' šejnilaže'ne', le bi chaclaža' tia' gwłana' xlatje bene' ba chosozejni'ide' xtiža' Diosen'. <sup>21</sup> Da'nan' chac can' nyoj Xtiža' Diosen' žan:

Bene' ca' biņa' yesende' xtižen' yesombi'ene',  
na' bene' ca' biņa' yesenezde' che' yesejni'ide' che'.

### *Pablon' šeje' Roma*

<sup>22</sup> Da' chzejni'ida' bene' ga yoble xtiža' Criston', da'nan' bi goc yida' gan' zoalen' la'czła' zan ni'a ba goclaža' yida'. <sup>23</sup> Cana'te zelaža' yedeņa'a le'e, perw na'ach ba beyož bena' da' gwlo'o Diosen' lo na' gona' do nga. <sup>24</sup> Nach cate' ša'a España cana' chacda' tia' yedeņa'a le'e. Na' mbalaz soa' yeyož le'eda' le'e na' gaclenle neda' cate' ša'a Españan'. <sup>25</sup> Na'a ša'a Jerusalén šjasana' mechw da' gaclenen bene' lježcho ca' že' na' bene' ca' ba gwlej Diosen' chesejnilaže'ne'. <sup>26</sup> Le bene' lježchon' že' yež ca' zjachi' distritw Macedonia na' Acayan' bosotobe' mechw da' gaclenen bene' lježcho ca' chesejnilaže' Diosen' Jerusalén ben' zjanac bene' yaše'. <sup>27</sup> Bene' ca' bosotoben' besyebede' bosonežjue' mechon', na' naquen to goclen da' cheyala' yesone' len bene' Israel gualaž cheto' ca', le la'czła' legaque' bi zjanaque' bene' Israel, ba zjanone' chegaque' yogo' da' güen da' ba bzejni'i Diosen' neto' bene' Israel, na' da'nan' cheyala'cze yesaclene' bene' gualaž cheto' ca' len da' cheseyažjde'. <sup>28</sup> Cate' bač beyož bena' lo na' bene' Jerusalén ca' mechon' bdoxen', cana'ch sa'a ša'a Españan' na' tia' na'a le'e. <sup>29</sup> Na' nezda' Criston' gaclene' neda' la'a gan' zoalen' cont güe'lena' le'e diža' güen che' da' gaclenen yichjlažda'olen' na' soachguacho mba.

<sup>30</sup> Bene' migw, nezda' chaquele Xancho Jesucriston' can' chacda'ne' neda', na' Spiritw che Diosen' chonen cont chaque lježcho tocho yetocho. Da'nan', bene' migw, chnaba' gacle neda' txen yoł güižcho Diosen' cont gaclene' neda'. <sup>31</sup> Nabechone' bi gaca' lo na' bene' gualaž cheto' ca' bene' bi chesejnilaže' Criston' Judean', na' lecze nabechone' cont bene' lježcho ca' že' Jerusalén bene' yo'o lo na' Diosen' yesazlaže' ca' dan' güe'gaca'ne'. <sup>32</sup> Nach še Diosen' goņe' latje, mbalaz yedeņa'a le'e na' yeyaclaža' soa' na' len le'e. <sup>33</sup> Dios ben' chon chzoa chbezcho binlo len xbab da' yo'o lo' yichjlažda'ochon' gaclene' yogo'le len xbab chelen'. Ca'šcacze gac.

## 16

### *Pablon' chguape' tiox bał bene' že' Roma*

<sup>1</sup> Chņeyoeda' le'e le gon txen len bene' zanchi Febe cate' le'e gan' zoalen'. Ba benchgüe' xšin Diosen' len bene' ca' chesedop chesežag chesonxene' Jesucriston' lo yež Cencrea. <sup>2</sup> Le gwlebe' ca' cheyala' gonle len ljež chio' yo'ochi lo na' Diosen'. Na' le gaclene' še bi da' chyažjde', le len' ba goclene' bene' zan na' lecze ba goclene' neda'.

<sup>3</sup> Le gwguap tiox Priscila len bene' che' Aquila. Legaque' ba gosone' žin che Cristo Jesús'en' txen len neda'. <sup>4</sup> Besezanlaže' cuingaque' yesate' cont bososle' neda' lo na' yela' goten'. Choa' yela' choxcen chegaque' can' gosonen'. Na' lecze yogo' bene' ca' bi zjanac bene' Israel bene' chesedop chesežag chesonxene' Jesucriston' cheso'e yela' choxcen chegaque'.

<sup>5</sup> Le gwguap tiox beñe' ca' chesedop chesežag liž Priscilan' na' Aquilan' chesonxene' Jesucriston'. Na' le gwguap tiox beñe' xmigua' Epeneto. Chacda'ne', le naque' beñe' nechw beñe' Acaya gwejnilaže' Criston'.  
<sup>6</sup> Nach le gwguap tiox María no'olen' ba benchgua xšin Diosen' gan' zoolen'.  
<sup>7</sup> Na' le gwguap tiox beñe' gualaž cheto' Andrónico len Junias. Legaque' byobch gosejnilaže' Criston' clal ca neda' na' txen gota'to' ližya. Lecz ca' postlw ca' yezica'chle cheso'e diža' güen čhegaque'.

<sup>8</sup> Le gwguap tiox beñe' xmigua' Amplias, le chacda'ne' da' ba chejnilaže' Xancho Criston'.  
<sup>9</sup> Na' le gwguap tiox Urbano ben' chon xšin Criston' txen len chio', na' lecze Estaquis, le chacda'ne'.  
<sup>10</sup> Lecze le gwguap tiox xmigua' Apeles. Da' zan ba bene' blo'e chejnilaže' Criston' do yichj do laže'. Na' le gwguap tiox beñe' ca' že' liž Aristóbulo.  
<sup>11</sup> Na' le gwguap tiox beñe' gualaž chia' Herodión na' lecze beñe' ca' že' liž Narciso, con noe' chesejnilaže' Criston'.  
<sup>12</sup> Le gwguap tiox no'ole xmigwcho Trifena len Trifosa, no'ol ca' cheson xšin Xancho Jesucriston'. Na' lecze le gwguap tiox beñe' zanchó Pérsida. Chaquechone' da' ba benchgüe' xšin Xancho'.  
<sup>13</sup> Na' le gwguap tiox Rufo. Naque' beñe' blao len chio' chejnilaže' cho Xancho Jesucriston'. Na' lecze le gwguap tiox xñe'ena', le ba none' neda' ca xi'ine'.  
<sup>14</sup> Le gwguap tiox Asíncrito, Flegonte, Hermas, Patrobas na' Hermes len beñe' lježcho zjanita' len legaque'.  
<sup>15</sup> Na' le gwguap tiox Filólogo na' Julia na' len Nereo na' beñe' zanen', na' Olimpas na' yogo' beñe' lježcho nita' len legaque'.

<sup>16</sup> Na' cate' chežagle txen le gwnopa' na' lježle cate' chguap lježle tiox cont nacbia' chaque lježle. Na' beñe' ca' chesedop chesežag chesonxene' Criston' yogo'te yež gan' ba gwya'a chosoguape' le'e tiox.

<sup>17</sup> Beñe' migw, chñeyoeda' le'e le gwsaca' cont bi gwzenagle che beñe' zjanac beñe' güetił, beñe' chesaclaže' gonle da' xinj, le bi chesone' txen len dan' ba bsedle che Diosen'.  
<sup>18</sup> Bi chosozenague' che Xancho Jesucriston' san chosozenague' che da' mal da' yo'o lo yichjlažda'ogaquen' na' chesone' con can' žanña'. Na' cheso'e diža' xdan chosopede' beñe' chesejle'daze cont chesexoayague' legaque'.  
<sup>19</sup> Yogo'ze beñe' zjanezde' chzenagle che beñe' chosozejni'ide' le'e, na' danan' chbeda'. Perw chaclaža' gacle beñe' sina' cont gwzenagle che da' nac da' güen, gague gwzenagle che da' nac da' mal.  
<sup>20</sup> Nach Dios ben' chon cont chzoa chbezcho binlo lecze yob gone' cont Satanásen' dan' chnabia' da' xigüe' ca' bi soen nabi'an chio'. Na' Xancho Jesucriston' soašque' gaclenšcace' le'e.

<sup>21</sup> Timoteo ben' chonlen neda' xšin Criston' nga chguape' le'e tiox, na' lecze ca' cheson beñe' gualaž cheto' Lucio na' Jasón na' Sosípater.

<sup>22</sup> Neda' Tercio chzoja' cart nga con can' ža Pablon', na' lecze chguapa' le'e tiox, le naccho txen chejnilaže' cho Xancho'.

<sup>23</sup> Lecze Gayo chguape' le'e tiox. Neda' Pablo zoa' liže' na' lecze liže' nga chesežag beñe' ca' chesonxen Criston'. Na' lecze Erasto ben' nac lo ne'e mechw che ciudan' chguape' le'e tiox na' len beñe' biše' Cuarto.

<sup>24</sup> Soašca Xancho Jesucriston' gaclenšque' yogo'le. Na' ca'šcace' gac.

### *Chonxene' Diosen'*

<sup>25</sup> Le gonxench Diosen'. Len' nape' yela' guac cont gaclene' le'e soachachle šejnilaže'lene' can' ža diža' güen da' chyxijue'eda' chzejni'ida' beñe' che Jesucriston'. Na' chzejni'ida' xtiža' Diosen' da' nono na' neze cate' za' xete yezlion',  
<sup>26</sup> perw na'a Diosen' ba bzejni'ide' chio' bi zejen da' ca' none' mandaw bosozoj beñe' ca' bosozoj Xtizen' cani'. Na' Dios ben'

zoa toli tocaṇe chaclaže' šej diža' čhen' yogo' yež cont yogo' chio' beṇač  
šejnilaže'cho Jesucriston' na' gwzenagcho če'.

<sup>27</sup> Toze Diosen' zaque' gonxen chio' beṇač, na' tozen' napchgüe' yela'  
sina'. Na' da' gwsele' Xancho Jesucriston' chaclene' chio', da'nan' chac  
chonxenchone' toli. Ca'šcace gac.



## CART NECHW DAN' BZOJ POSTLW SAN PABLO CHE BENE' CA' ŽE' CORINTO

*Pablon' chzoje' bene' chesedop chesežague' chesonxene' Jesucriston' Corinto*

<sup>1</sup> Neda' Pablo chzoja' cart nga. Diosen' gwleje' neda' par naca' postlw che Jesucriston', le can' gwnalaže'. Na' chguapa' le'e tiox txen len bene' migw checho Sóstenes ben' lecze chejnilaže' Jesucriston'. <sup>2</sup> Chzoja' cart nga par le'e chdop chžagle chonxenle Diosen' lo ciuda Corinto. Da' chejnilaže'le Jesucriston', da'nan' Diosen' ba gwleje' le'e cont yo'ole lo ne'e, can' gwleje' yogo' ben' chosol güiže' Xancho Jesucriston' na' zjanaque' le' txen gate'tezechle, le lecze naque' Xangaquen'. <sup>3</sup> Chnaba' lao Xacho Diosen' na' lao Xancho Jesucriston' yesaclene' le'e na' yesone' cont soa cuezle binlo len xbab da' yo'lo' yichjlažda'ole.

*Diosen' chaclene' chio' chejnilaže'cho Criston'*

<sup>4</sup> Yogo' ni'a choa' yela' choxclen che Diosen' par le'e can' chaclene' le'e lagüe chejnilaže'le Jesucriston'. <sup>5</sup> Na' da' chejnilaže'lene' chaclenchgüe' le'e cont chejni'ile yogo' da' ba bzejni'i Diosen' le'e na' cont choe'le diža' chen. <sup>6</sup> Na' ba chonle cont nacbia' xtiža' Criston' da' chejle'le naquen da' li. <sup>7</sup> Spiritw che Diosen' chonen cont chac chonle yogo' da' ca' chyažjen gonle šlac chbezcho yid Xancho Jesucriston' yeto. <sup>8</sup> Na' Diosen' gaclene' le'e soachachle gonle can' chazlažen' cont bibi doļa' gaple caten' yid Xancho Jesucriston' yeto. <sup>9</sup> Diosen' zoacze' chone' can' ba gwne' gone', na' le'na' gwleje' le'e cont nacle txen len Xi'ine' Jesucriston' ben' nac Xancho.

*Nža' nža'te chesena bene' chesonxen Jesucriston' Corinton'*

<sup>10</sup> Bene' migw, le'e chejnilaže'le Jesucriston'. Da'nan' chneyoeda' le'e, le gon txen len lježle na' bich gacle chople o šon taple len da' chonle xbab na' len da' žale. <sup>11</sup> Chnia' ca' bene' migw, le bene' nita' liž Cloé ba gose'e neda' chdile chšašle. <sup>12</sup> Chnia' chdile chšašle, le balle žale: "Naca' txen len da' chsed chlo'e Pablon'." Na' yeballe žale: "Naca' txen len da' chsed chlo'e Apolosen'." Na' yeballe žale: "Naca' txen len da' chsed chlo'e Pedron'." Na' yeballe žale: "Naca' txen len da' chsed chlo'e Criston'." <sup>13</sup> ¿Chaquele bid Criston' neche to chopzle? ¿Chaquele nedan' Pablo bnežjw cuina' gota' le'e yag cruz neche le'e? ¿Zsoale nis cont blo'ele chejnilaže'le neda'? Gague can'. <sup>14</sup> Choa' yela' choxclen che Diosen' bi bzoa' le'e nis, san Crispo na' Gayo na'zen' bzoa' nis. <sup>15</sup> Da'nan' noch no zoa len le'e bene' yesene' bzoa' legaue' nis, le bi chaclaža' no yesena gwzoe' nis cont blo'e chejnilaže' neda'. <sup>16</sup> Na' neda' lecze bzoa' nis bene' ca' že' liž Estéfanos, na' bi za'laža' še zoa nochle bene' bzoa' nis. <sup>17</sup> Nezda' Criston' bi gwsele' neda' cont gwzoa' bene' nis san cont chixjue'eda' diža' güen chen'. Na' bi cheyiljua' no diža' da' chaque benachen' diža' sina' choa' cate' chyixjue'eda' diža' güen chen', le še bene' yesone' xbab che yela' sina' chia', nach bi yesone' xbab che dan' ben Criston' bnežjw cuine' gosote'ne' le'e yag cruzen', na' lenna' nsan' yela' guac che Diosen'.

*Criston' bedelo'ede' yela' guac che Diosen' na' yela' sina' che'*

18 Bene' ca' yesebiaye'e lagüe bi chesejnilaže' Jesucriston', chesacde' bibi zaca' xtiža' Criston' da' choe'cho che'cho legaque' bnežjw cuine' neche xtolā'gague' le'e yag cruzen'. San chio' chejnilaže'chone', chio' ba de yela' mban checho toli tocañe, nezecho diža' nan' naquen da' zaca'chgua, le nsan' yela' guac che Diosen'. 19 Chac can' nyojen žan:

Neda' gona' cont nacbia' gague da' li zjansina' bene' ca' chesene' zjanaque' bene' sina'.

Na' gona' cont bene' ca' chesejni'i da' zan yežlio nga, bibi de gon ca dan' chesejni'ide'.

20 Chacljele ¿chixe bene' ca' zjansed yela' sina' che benachen'? na' ¿chixe bene' chososed chosolo'ede' ley che Diosen'? na' ¿chixe bene' chac chesene' diža' xdan diža' sina' che dan' chac yežlio nga? Quinga nac chegaque', Diosen' ba blo'e yela' sina' chegaquen' bi naquen da' sina'. 21 Diosen' naque' bene' sina' na' ba bene' cont yela' sina' che benachen' bi chaclenen legaque' yesombi'ene'. Le Diosen' chazlaže' con bene' yesejle' xtiže' dan' choe'to' gata' yela' mban chegaque' toli tocañe, la'czla' yezica'chle bene' chesacde' bibi zaca' xtižen' dan' choe'ton'.

22 Bene' Israel gualaž cheto' chesenabe' yesele'ede' yela' guac cont yesejle'e bin' ža Diosen', na' bene' chesac diža' griego cheseyiljue' no diža' da' chesacde' naquen da' sina'. 23 San neto' chyixjue'eto' xtiža' Criston' can' bnežjw cuine' gosote'ne' le'e yag cruzen'. Na' bene' Israel gualaž cheto' ca' bi chesazlaže' da' chyixjue'eto' na' bitw chesejle'en. Na' bene' bi zjanaque' bene' Israel lecze chesacde' bibi zaca' dižan' chyixjue'eton'.

24 Perw chio' ba gwlej Diosen' naccho xi'ine', la'aczla' še naccho bene' Israel o še bi naccho bene' Israel, nezecho Diosen' blo'e yela' guac chen' na' yela' sina' chen' dan' gwsele' Criston' bnežjw cuine' neche chio'. 25 Bene' ca' bi chesejnilaže' Diosen' chesacde' bi nac Diosen' bene' sina' lagüe da' be'e latje got Criston' le'e yag cruzen', na' chesacde' chlo'en bibi yela' guac nap Diosen'. Perw gague can', san xbab che Diosen' naquen da' sina'ch ca xbab che benachen', na' nape' yela' guac xench ca benachen'.

26 Bene' migw chia', le gon xbab can' nacle cate' Diosen' gwleje' le'e cont nacle xi'ine'. Gague zanle nacle bene' sina' len xbab che benachen', gague zanle nacle bene' chnabia', gague zanle goljle lo diaža che bene' blao. 27 Diosen' ba gwleje' chio' naccho xi'ine' la'czla' bibi yela' sina' che yežlio nga napcho, na' chesaque benachen' bibi chac goncho; nach Diosen' chaclene' chio' len yela' guac che' na' yela' sina' che' cont bene' zjanac bene' sina' len xbab che benachen' yesache'ede' na' yesacde' zto'.

28 Diosen' ba gwleje' chio' naccho xi'ine', zanchi naccho no bene' yixe', no bene' chesegue'e benach, na' gwleje' chio' cont gwlo'ede' bene' zjanaque' blao len benachen' bibi zjazaque' len le'. 29 Diosen' bene' cont nono gac gonxen cuine' lagüen'. 30 Diosen' ba none' chio' txen len Cristo Jesúsén', na' Criston' nse'e yela' sina' che Diosen' na' naque' la'zelagüe bene' güen bene' laždao' xilaže'. Na' dan' naccho txen len Criston', chone' chio' yela' sina' chen', na' yela' bene' güen chen', na' yela' bene' laždao' xilaže' chen', na' ba beque'e xtolā'chon'. 31 Da'nān' Xtiža' Diosen' nyojen žan: "Bi cheyała' gonxen cuincho san gonxench Xanchon'."

## 2

*Pablo be'e xtiža' Criston' ben' gosote' le'e yag cruz*

1 Bene' migw, cate' bedetixjue'eda' xtiža' Diosen' len le'e, bitw bia' diža' zdebe da' bi gwejni'ile na' gague bia' diža' xdan cont gaquele naca' bene' sina'. 2 San beçoglaža' be'lena' le'e diža' che Jesucriston' can' bnežjw cuine' gosote'ne' le'e yag cruz neçe xtoła'chon', na' bi be'lena' le'e bichle diža'. 3 Na' cate' gwzoa' len le'e gocbe'eda' bibi chac gona', na' leca bžeba' na' gola' gwxiza' bena' xbab še bi gwzenagle xtižan'. 4 Na' diža' da' be'lena' le'e gague bian' len yela' sina' che benačen' cont co'oyela' le'e gwzenagle chia', san Spiritw che Diosen' goclenen neda' len yela' guac chen na' benen cont bzenagle. 5 Goclaža' šejnilaže'le Criston' gague neçe yela' sina' che benačen', san neçe da' gwša' Diosen' xbab çhelen' len yela' guac chen'.

*Spiritw che Diosen' chonen yela' chejni'i*

6 Na' len bene' ba zjayolagüe' chosozenague' che Diosen' choe'cho diža' sina' da' za' che Diosen', bi zan' che yežlio nga ne che bene' blao o bene' gwnabia' zjanita' na'a, le te che bene' ca' na' te che yela' sina' çhegaquen'. 7 Diosen' ba bzejni'ide' neto' to yela' sina' da' nono gwejni'i cani', to da' bi'e xnezen' gac cate' bina' xe yežlion', le cana'te bi'e xnezen' yid Criston' yeque'e xtoła'chon' cont soacho mbalaz toli tocaņe. 8 Na' ne toze bene' gwnabia' bene' že' yežlio nga bi gosejni'ide' yela' sina' che Diosen', le šaca' gosejni'iden', bi bosode'e Xancho Jesucriston' ben' nac bene' zaca' juisyw le'e yag cruzen' še ca'. 9 Na' Xtiža' Diosen' da' nyojen žan:

Nono zoa bene' ba ble'ede' da' güen da' gon Diosen' len bene' ca' chesacde' le'.

Nono na' yende' diža' can' gone',

neca na' yesone' xbab lo' lažda'ogüen' can' gaquen'.

10 Perw Diosen' ba bene' cont Spiritw çhen' bzejni'in chio' can' gone', le Spiriton' chejni'in tcho'a yogo' da' chon Diosen', na' nezen da' ngaše' len benačen'.

11 Can' naquen len benačen', nono neze bi xbab chon bene' yoble, con to tocho nezecho bi xbab en' choncho. Na' ca'cze naquen len Diosen', con Spiritw che' na'zen' nezen bi xbab chone'. 12 Na' Diosen' ba bene' chio' Spiritw çhen' cont nezecho yogo' da' güen da' chon Diosen' len chio' lagüe nži'ilaže'de' chio'. Da'nan' bi choncho xbab can' cheson bene' bi chosozenag che Diosen'. 13 Na' cate' choe'lento' le'e xtiža' Criston', gague choe'to' diža' len yela' sina' cheton', san choe'to' diža' da' bzejni'i Spiritw che Diosen' neto', na' bene' ba yo'o Spiritw che Diosen' lo' yichjlažda'ogaquen', legacze' chesejni'ide' da' chsed chlo'eto'ne'.

14 Na' bene' bi yo'o Spiritw che Diosen' lo' yichjlažda'ogaque' bi chesejle'e che diža' da' chon Spiritw che Diosen' neto' da' choe'to' len legaque', san chesacde' naquen to da' bibi zaca'. Na' bi chesejni'ide', le bi yo'o Spiriton' lo' yichjlažda'ogaque' cont gaclenen legaque' yesejni'iden'. 15 Na' cate' yo'o Spiritw che Diosen' lo' yichjlažda'ochon' chacbe'echo che bite'teze še naquen da' zaca', perw bene' bi yo'o Spiritw çhen' lo' lažda'ogaquen', bi zaca' yesene' še da' choncho naquen da' zaca'. 16 Na' Xtiža' Diosen' da' nyojen žan: "Nono zoa chejni'i xbab che Diosen' cont gwzejni'ide' Diosa'." Perw Diosen' ba bene' chio' Spiritw che' cont šejni'icho xbab che Criston'.

### 3

*Gaccho txen len nochle bene' cheson xšin Diosen'*

<sup>1</sup> Bene' migw, bi goc gua' xtiža' Diosen' len le'e can' chona' len bene' chosozenag che Spiritw che Diosen', le ne' chzenagle che xbab chezle. Da'nan' zaca'leble ca bidao'. <sup>2</sup> Cate' gwzolao be'lena' le'e xtiža' Diosen' žinten ža na'aža, biņa' šejni'ile da' ca' chaclaže' Diosen' šejni'ile. Da'nan' ba bsed blo'eda' le'e da' bi naquen zdebe šejni'ile. <sup>3</sup> Chzenagle che xbab chezle na' da'nan' bi chac šejni'ile xtiža' Diosen' da' naquen zdebe. Da' chgue'e lježle na' chdile chšašle, nachbia' chzenagle che xbab chezle can' cheson bene' bi chesejnilaže' Criston'. <sup>4</sup> Chnia' chonle ca bene' bi chesejnilaže' Diosen', le balle žale: "Nacto' txen da' chsed chlo'e Pablo", na' yeballe žale: "Nacto' txen da' chsed chlo'e Apolos."

<sup>5</sup> Le gon xbab chia' neda' Pablo na' che Apolosen', con nacto' bene' güen xšin Dios. Na' Diosen' bene' cont gwyejni'laže'le Xancho Criston' cate' be'lento' le'e xtižen', na' lecze gwleje' to to neto' cont gonto' con da' chnaláže'. <sup>6</sup> Neda' zaca'leba' ca to bene' goz, le be'lena' le'e xtiža' Diosen' da' nechw, na' Apolosen' zaca'lebe' ca' bene' chyilen, le bsed blo'ede' le'e gwdechle. Na' toz Diosen' chone' cont chac cosešen'. Ca'cze goc len le'e, Diosen' bene' cont gwyejle'le xtižen' da' be'lento' le'e. <sup>7</sup> Bitec bi zaca' neda' da' be'lena' le'e xtiža' Diosen' da' nechw, na' neca Apolosen' da' bsed blo'echde' le'e, san Diosen' zaca'chgüe' da' bene' cont gwyejle'le xtižen'. <sup>8</sup> Bene' chyixjue'ede' xtiža' Diosen' da' nechw na' bene' chyixjue'eden' da' gwchope txen chesone' xšin Diosen'. Na' Diosen' gone' cont to toe' yesenite' mbalaz con can' gosone' xšine'na'. <sup>9</sup> Neto' chzejni'ito' le'e xtiža' Diosen', guac nacho nacto' bene' goz go'on che Diosen' na' le'e nacle yežlio gan' chac žinna'.

Na' le'e chdop chžagle chonxenle Criston' lecze zaca'leble ca to yo'o che Diosen'. <sup>10</sup> Na' guac nacho neda' naca' to bene' chac chon yo'o na' neda' bxia' len yo'ona', le Diosen' goclene' neda' cont bxia' xšinen' gan' zoalen'. Na' na'a nita' bene' yoble chosozejni'ide' le'e, na' guac nacho chesebeque' ze'en. Na' note'teze bene' chacde' gone' xšin Diosen' cheyla' gonyane' xbab še xšinen' gonen txen len lene yo'o dan' ba gwlecan'. <sup>11</sup> Na' nono gac cuec bichle lene yo'o, le ba gwlecan', na' Jesucristo bene' chejnilaže'cho, len' nacho naque' lene yo'ona'. <sup>12</sup> Na' bite'teze ze'e da' chozoa bene' lo lene yo'ona', chchejen con nac nonen', še nonen' de oro, de plata, de yej da' zaca', de yag o de yix o de dod. Na' ca'cze nac bite'teze da' choncho chaquecho chonchon par Diosen', chchejen še naquen da' zaca'. <sup>13</sup> Na' cate' žin ža yid Criston', gone' cont gacia' che da' ben to tocho še naquen da' zaca' o še bitw naquen. Na' yogo' da' bencho da' bi naquen da' zaca', Diosen' yonitlagüen' len yi' che'na' can' chac che to yo'o de yag, de yix o de dod cate' cheyen. <sup>14</sup> Na' še bencho da' naquen da' zaca', lenna' bi yeniten, na' Diosen' gone' cont soacho mbalaz da' benchon. <sup>15</sup> Na' še dan' benchon' bi naquen da' zaca', da' ca' benchon' yesebiayin' lo yi' che Diosen' na' bitec soacho mbalaz, con nacchguaze gac yechojcho bi šeycho.

<sup>16</sup> ¿Ba beyanlaže'le chio' chdop chžagcho chonxencho Jesucriston' yogo'cho txen zaca'lebcho ca to yodao' gan' chesonxene' Diosen'? ¿Ba beyanlaže'le zoa Spiritw che Diosen' len chio'? <sup>17</sup> Na' še no gone' cont chio' chdop chžagcho chonxencho Criston' cuejyichjcho diža' li' chen', Diosen' gwnežjue' castigw toli' tocanē che bene' gon ca', le Diosen' zoe' len chio' na' naccho lo ne'e.

<sup>18</sup> Bi siye' cuinle. Note'tezele še chaquele nacle bene' sina' len yela' sina' che yežlio nga, cheyla' gacbe'ele yela' sina' chelen' bi gaclenen le'e len

Diosen'. Na' cheyała' gacle ca to bene' bibi chejni'i cont Diosen' gone' le'e yela' sina' chen'. <sup>19</sup> Bene' bi chesejnilaže' Diosen', yela' sina' chegaquen' bi naquen da' zejen len Diosen'. Na' Xtiža' Diosen' nyojen žan: "Bene' ca' chesacde' zjanaque' bene' sina', Diosen' gone' cont yela' sina' chegaquen' gwžiyain' legaque'." <sup>20</sup> Na' yeto gan' nyojen žan: "Xancho nan' nežde' da' yesede che xbab che bene' sina' ca'." <sup>21</sup> Da'n'an' bi cheyała' ga'laže'le da' nacle txen len note'teze bene' chsed chlo'ede' le'e, le yogo'loł bi da' de zjanaquen chele cont yesaclenen le'e. <sup>22</sup> Neda', len Apolosen', na' len Pedron', gwseła' Diosen' neto' cont chaclento' le'e. Na' yežlio nga na' yela' mbanna', na' yela' goten', na' da' de na'a na' da' gata' bate'teze, yogo' da' ca' zjaden cont yesaclenen le'e. <sup>23</sup> Na' nacle lo na' Criston' na' Criston' naque' lo na' Diosen'.

## 4

### *Da'yo'o lo na' postlw ca' yesone'*

<sup>1</sup> Cheyała' gacbe'ele neto' ba gwđixjue'eto' xtiža' Diosen' len le'e nacto' bene' güen xšin Diosen'. Diosen' ba bzejni'ide' neto' da' nono gwneze cani' cont gwsed gwlo'eton' bene'. <sup>2</sup> Na' chonen byen gonto' con can' ngüe'e lo na'to' gonto'. <sup>3</sup> Na' ca naca' neda', bibi nonen len neda' še no justis che yežlio nga o še le'e nale bi chona' can' cheyała' gona'. Na' neca chnia' che cuina' še chona' can' cheyała' gona'. <sup>4</sup> Lo' lažda'ogua' chacda' bibi doła' napa' len bite'tez da' chona', perw gague da'n'an' na Diosen' chia' bibi xtola' de. Xancho Jesucriston' ne' še chona' can' cheyała' gona' o še bi chonan'. <sup>5</sup> Da'n'an' bi cheyała' žialaole nale che note'teze bene' še chone' can' cheyała' gone' o še bi chone'. Caten' yid Xancho Criston' yeto, canan' gone' cont nezecho da' nono neze na'a, na' gone' cont gacbe'echo can' nac xbab da' yo'o lo' yichjlaždao' benachen'. Na' cana' na Diosen' še nocho chon güen.

<sup>6</sup> Bene' migw, ba be'lena' le'e xtiža' Apolosen' na' xtiža' cate' bzejni'ida' le'e, cont soale gonle can' ža Xtiža' Diosen', le bi cheyała' ga'laže'le da' nacle txen len to bene' chsedde' le'e na' gue'ele yetoe'. <sup>7</sup> Na' žbixchen' chaquele zaca'chle ca yezica'chle bene'? Diosen' bene' yogo' da' de chele, na' da' ben Diosen' yogo' da' de chele, bi cheyała' ga'laže'le. <sup>8</sup> Chacljele bibi chyažjele na' chacljele ba nacle bene' zaca'chgua len Diosen' na' guac nabia'le ca no rey, na' chaquele bi chyažjele neto'. Yebeto' šaca' da' li nacle ca no rey can' chaquelen' cont soato' mbalaz txen len le'e. <sup>9</sup> Chacda' Diosen' ba bene' cont bene' že' yežlion' yesele'ede' neto' postlw ca bene' zjanac la'zelagüe bene' bibi zaca', ca bene' nchoglaon chegaque' yesate'. Na' benachen' len angl ben' že' gan' zoa Diosen' cheseņe'e can' chac cheto' ca to bene' chne'e to da' yežejde'. <sup>10</sup> Na' da' chonto' xšin Criston' da'n'an' bene' zan chesacde' bibi zaca'to', perw le'e, dan' ba chejnilaže'le Criston' chaclaže'le yesacde' nacle bene' sina'. Chesacde' bibi chac gon neto', perw le'e chaclaže'le yesacde' guac gonle bite'teze. Chesonxen bene' le'e na' chesegue'ede' neto'. <sup>11</sup> Ža na'aža zan ni'a chdeto' gwbin chbił chdonto', bibi xałana'to' de, chesebaže' bene' neto' na' bibi ližto' de. <sup>12</sup> Len ni'a na'to' chonto' žin cont chachanto'. Cate' chesezi'diža' bene' neto', con chnabto' nite' mbalaz, na' cate' chosoči chososaque' neto', chyo chčejšto' bi da' chesonde' neto'. <sup>13</sup> Cate' cheseņe' cheto', choł güižto' legaque' diža' šagüe'. Na' ža na'aža nita' bene' zan chesonde' neto' ca to no beb dao' o to no da' naquen zban da' ba becho'onen.

<sup>14</sup> Chzoja' da' nga gague cont gaquele zto' san cont gwzejni'ida' le'e, le nacle ca xi'ina' na' chacda' le'e. <sup>15</sup> Na' la'czla' bene' zan yesaclaže' yososed yosolo'ede' le'e che Criston', bi yesenita' zane' yesacde' le'e ca xale. Perw neda' naca' ca xale, le neda' gwžialagua' gwđixjue'eda' le'e diža' güen che Jesucriston' cont chejnilaže'lene'. <sup>16</sup> Na' da'nan' chņeyoeda' le'e gonle can' chonan'.

<sup>17</sup> Da'nan' chsela' Timoteon' gan' zoalen'. Lecze ba nona'ne' ca xi'ina', le bzejni'ida'ne' cont chejnilaže' Xancho Jesucriston', na' zoacze' chone' can' cheyala' gone'. Na' chsela'ne' cont šjayse'ede' laže'le can' gwzoa gwleza' ślac bzejni'ida' le'e che Criston', na' da' bzejni'ida' le'e naquen lebe len da' chzejni'ida' bene' gate'teze chesedop chesežague' chesonx-ene' Criston'. <sup>18</sup> Na' balle cha'laže'le chaquele bich yida' gan' zoalen'. <sup>19</sup> Perw chacda' yob yida' gan' zoalen' še Diosen' gonšque' latje. Na' cate' yida', cana'ch yedena'a bene' ya'laže' ca' še yesone' can' chesenen'. <sup>20</sup> Cate' Diosen' chnabi'e yichjlaždao' bene', dan' chesonen' chlo'en yela' guac chen', gague xtiža'gague' na'zen' gwlo'en še chnabi'e yichjlažda'ogaque'. <sup>21</sup> ¿Nac chaclaže'le gona'? ¿Yida' gan' zoalen' na' gona' le'e castigw, še yida' gwlo'a chacda' le'e na' yedeya' diža' šagüe' len le'e? Le gon xbab naquen' chaclaže'le yedeyena'.

## 5

### *To bene' gwzoalene' xna'zie' ca xo'ole'*

<sup>1</sup> Chesene' to le'e zoalenle xna'zile ca xo'olle. Da' nga naquen to yela' zto' xen, ne bene' ca' bi chesonxen Diosen' bi chžinlaže' yesone' ca'. <sup>2</sup> Na' la'czla' tole chonle da' malen' nac ca', chaquele güenchgua chonle lao Diosen'. Cheyala' yegüine'le na' cheyala' yebejle ben' chon ca' len le'e. <sup>3</sup> La'czla' bi zoa' na' len le'e, zoaczcho txen na' ba gwchoglagua' can' cheyala' gonle len ben' chon da' malen', can' gonle la'czla' ca' zoa' len le'e. <sup>4</sup> Nach cate' ndop nžagle chonxenle Xancho Jesucriston', le gon xbab naccho txen, na' zoacze Xancho Jesús'en' chaclene' le'e len yela' guac chen'. <sup>5</sup> Nach le cuej ben' ca'ale na' le gone' lo na' Satanás dan' chnabia' da' xigüe' ca' cont gonen can' chaclažen' len le'. Le gon ca' cont še yoša'šca yichjlažda'ogüe' na' bi cuiaye'e toli tocanē cate' žin ža yid Xancho Jesús'en' yeto.

<sup>6</sup> Bi cheyala' gaquele chonchgualē güen lao Diosen'. ¿Bi chache'ele chcha'o da' malen' cate' cho'echo latje, can' ža diža' dan' chesene': "Late'ze levadura da' chosočhine' cate' chesone' yetextil chonen cont cheyas doxen cuazin"?' <sup>7</sup> Bene' Israel gualaž čheto' bi chesagüe' yetextil da' nčhixen levadura lo lni pascw čheto' na' bi cheso'e latje yega'an ne late'ze levaduran' lo ližgague' lo lnin'. Na' ca'cze chio' chejnilaže'cho Criston' bi cheyala' güe'cho latje šo' da' malen' yichjlažda'ochon'. Cheyala' cuejyichjcho yogu' da' malen' cont gaccho ca to bene' cobe, le Criston' bnežjw cuine' gote' cont bocobe' yichjlažda'ochon', na' len chio' Criston' zaca'lebe' ca to be gosot bene' Israel gualaž čheton' lo lni pascon'. <sup>8</sup> Da'nan' cheyala' cuejyichjcho bite'teze da' mal, cont gaccho ca to bene' cobe, soacho do yichj do laže'cho na' goncho da' zej to li.

<sup>9</sup> Cana' bzoja' to cart gwnia' bi cheyala' soacho binlo len bene' chosozoa xtoe' na' bene' cheson bichle da' nac da' yela' zto' len cuerp čhegaque'. <sup>10</sup> Gwnia' bi gac soacho binlo len bene' cheson da' nac yela' zto', na' bene' chesezelaže' bi da' de che bene', na' bene' cheseque'e da' de che

bene' na' bene' chesonxene' l̄ gua'a l̄saca'. Na' can' gwnia' bi gac soacho binlo len legaque', cho'a diža' che ljež chio' chejnilaže' cho Criston'. Le šaca' choa' diža' bi gac soacho binlo len note'tez bene' cheson ca', bich gac bi goncho lo yežlio nga še ca'. <sup>11</sup> San da' žia' cheyala' goncho, bi soacho binlo len to bene' lježcho bene' chejnilaže' Criston' še nzoa xtoe' o še chone' bichle da' nac da' yela' zto' len cuerp che', o še chzelaže' da' de che bene', o chejnilaže' l̄ gua'a l̄saca', o chzi'diže' bene', o naque' bene' borrašw o bene' gwban. Neca cheyala' gagwlencho bene' lježcho bene' cheson ca'. <sup>12</sup> Bi naquen checho chogbi'acho che bene' bi chesejnilaže' Criston' še da' chesone' naquen güen o naquen mal, san chio' chdop chžagcho chejnilaže' cho Criston' cheyala' chogbi'acho che lježcho še chesonteze' da' mal. <sup>13</sup> Na' Diosen' chogbi'e che xtola' bene' ca' bi chesejnilaže' Criston', san le'e, le yebej bena' gwnia' chon da' malen' ladjwle.

## 6

*Bene' Corinto chesejnilaže' Criston' chesagüe' xya che lježgaque' lao justis ca'*

<sup>1</sup> Chebanda' chele can' chonle da' chagwle xya tole yetole na' chjana'le bene' bi chosozenag che Diosen' cont chesone' yela' justis chele. Cheyala' nabe lježle le'e ba gwlej Diosen' nacle lo ne'e cont legaque' yesone' yela' justis chele. <sup>2</sup> ¿Bi nezele žin ža cate' chio' naccho lo na' Diosen' goncho yela' justis che yezica'chle bene' že' yežlio nga? Na' še goncho yela' justis chegaque', guac goncho yela' justis che bi da' dao' da' bitec zjazaca'. <sup>3</sup> Na' lecze žin ža goncho yela' justis che angl ca'. Na' naquechxe goncho yela' justis che bi da' cheson bene' lo yežlio nga. <sup>4</sup> Na' cate' gagwle xya che lježle, bi šejle lao bene' bi chesejnilaže' Criston' cont yesone' yela' justis chele, le xbab chegaquen' bi naquen da' zaca'chgua len chio' chejnilaže' cho Criston'. <sup>5</sup> Žia' ca' cont yeto'ele che dan' chonle na' bich gonle ca'. ¿Ne tole bi nacle bene' sina' cont gon yela' justis che lježle cate' bi chac chele? <sup>6</sup> ¿Da'nan' chjatagwle xya che lježle len justis ca' bene' bi chesejnilaže' Criston'?

<sup>7</sup> Da' chacyož len lježle na'zen' chlo'en leca clelen' chonle. Mbalazech zoale šaca' chdele ca'ale še bi da' chone bene' lježlen' le'e. Yejni'a güe'le latje yeseque'e bi da' de chele. <sup>8</sup> Perw le'e chca'ale bi da' de che lježle na' da' zan da' chone lježle.

<sup>9</sup> ¿Bi nezele bene' ca' zjanaque' bene' mal lao Diosen' bi yesyežine' yaban' gan' zoa Diosen' chnabi'e? Bi güe'le latje no gonle le'e. Nita' bene' chosozoa xtoe' na' bene' cheson bichle da' yela' zto' da' nac ca'. Na' nita' bene' chesonxen l̄ gua'a l̄saca'. Na' nita' bene' chesata'lene' no'ole bi nac no'ol chegaque' o bene' byo bi nac bene' chegaque', na' nita' bene' byo bxej. <sup>10</sup> Nita' bene' chesebane' na' bene' chesezelaže' bi da' de che bene', na' bene' borrašw, na' bene' chesezi'diža' lježgaque' na' bene' cheseziye'e bene' yoble cont yeseque'e da' de chegaque'. Na' ne to bene' chon da' mal dan' zjanac ca' bi yesyežine' yaba gan' zoa Diosen' chnabi'e. <sup>11</sup> Balle benle da' mal dan' zjanac ca', perw na'a da' chejnilaže'le Xancho Jesúsén', Spiritw che Diosen' ba benen cont beyac lažda'olen' xilaže', na' benen cont nacle lo na' Diosen' na' cont nacle bene' güen len le'.

*Cheyala' goncho da' güen len cuerp chechon'*

<sup>12</sup> Da' li can' chesena bene', de latje goncho bite'teze, perw nezecho gague yogo' da' gonchon' naquen güen. Na' la'czla' še de latje goncho

bite'teze, bi cheyała' güe'cho latje n̄abia' bi dan' gonchon' chio'. <sup>13</sup> Na' da' li can' chesena yebałe', chesene': "Nsa' le'echon' par yela' guagw na' decze yela' guagw par gagwchon žinten lo' le'echo." Perw na' le'echon' len yela' guagon', chopten žin ža te čegaquen. Na' cuerp čechon' bi nsa'chon cont gata'len txocho o goncho bichle yela' zto' nac ca'. San nsa'chon cont gonxencho Xancho Jesucriston'. Na' Xancho Jesucriston' lecze chaclene' chio' len cuerp čechon'. <sup>14</sup> Diosen' bosbane' Xancho Jesucriston' ladjo beñe' guat ca', na' lecze žin ža cate' yosbane' chio' ladjo beñe' guat ca' len yela' guac čhen'.

<sup>15</sup> ¿Bi nezele naccho txen len Criston' na' cuerp čechon' zjanaquen čhe'? Na' bi cheyała' goncho cuerp čechon' da' nac čhe Criston' lo na' no no'ole zle'. <sup>16</sup> Note'tezle še chata'le len no'ole bi nac no'ol čhele o beñe' byo bi nac beñe' čhele, cuerp čhelen' gaquen toze len cuerp čhen', can' ža Xtiža' Diosen' da' nyojen žan: "Beñe' ca' čhope yesaque' toze cuerp." <sup>17</sup> Perw note'tezcho cate' chon cuincho lo na' Xancho Jesucriston', yichjlažda'ochon' chaquen toze len yichjlažda'ogüen'.

<sup>18</sup> Da'nan' bi cheyała' gata'lencho no'ole bi nac no'ol čhecho o beñe' byo bi nac beñe' čhecho o goncho bichle yela' zto' da' nac ca'. Yezica'chle da' mal ca' bitec chosožiyin' cuerp čechon', perw da' ca' zjanac ca' chosožiyin' cuerp čechon'. <sup>19</sup> ¿Bi chache'ele Spiritw čhe Diosen' zoan lo' yichjlaždao' to tocho ca zoa to beñe' liže'? le Diosen' ba gwsele' Spiritw čhen' zoan lo' yichjlaždao' chio' chejnlaže'cho Criston', na' bi gac goncho con bi žan čhecho. <sup>20</sup> Na' da' zaca' xen da' ben Xancho Criston' cont bechojcho lo na' gwxiyen'. Da'nan' cheyała' goncho can' chazlaže' Diosen' len cuerp čechon' na' len yichjlažda'ochon', le chopten zjanaquen čhe'.

## 7

### *Pablon' cho'e diža' che yela' güešagna'*

<sup>1</sup> Na' čhe dan' chnabele neda' le'e cart čhelen', še beñe' byon' bi chaclaže' si'e no'olen' gaque' xo'ole', güenna' chone'. <sup>2</sup> Perw na' že'chgua beñe' chesedalene' no'ole bi nac no'ol čegaque', na' beñe' cheson bichle da' nac da' yela' zto' len cuerp čegaquen', na' da'nan' yejni'a gwšagna'le na' to to beñe' byo soa xo'ole' na' to to no'ole soa beñe' čhe'. <sup>3</sup> Na' to to beñe' byo cheyała' gone' da' naquen gone' len no'ol čhe' na' to to no'ole cheyała' gone' da' naquen gone' len beñe' čhe'. <sup>4</sup> No'olen' bi gac ne' to gualaze' nac gone' len cuerp čhen' na' neca beñe' byon' bi gac ne' to gualaze' nac gone' len cuerp čhen', san cheyała' yosozenag čhe lježe'. <sup>5</sup> Na' le'e nšagna'le bi gwžonle gonlen lježle da' cheyała' gonle len cuerp čhelen', perw še naquen yela' güexi'a čhe choptele guacze bi gonlen to term dao' cont soatezle yol güižle Diosen'. Na' te termen' yezoalen lježle da' yoble, le Satanás dan' chnabia' da' xigüe' ca' co'oyelan' le'e gonle da' mal še leca žan soalen lježle.

<sup>6</sup> Ba gwnia' yogo' da' ca' cont nezele de latje soa xo'olle, perw gague nacho chon Diosen' mandadw gwšagna'le. <sup>7</sup> Chebeda' šaca' soa yogo'le can' zoa' neda' nono xo'ola' zoa. Perw nža'le grasyw da' non Diosen' to tocho čhe bi da' goncho.

<sup>8</sup> Na' le'e nac to gualazle, chacda' güench bi gwšagna'le, na' lecze le'e ba got beñe' čhele bi yošagna'le, san soale to gualazle can' zoa' neda'. <sup>9</sup> Perw še leca žan soalenle no'ole o soalenle beñe' byo, yejni'a gwšagna'le cont bi n̄abia' yela' chzelažen' le'e.



<sup>10</sup> Na' le'e no'ole le'e nšagna'le, chona' mandadw bi yela'ale len bene' chelen'. Na' gague neda'ze žia' ca', le naquen da' chon Xancho Criston' mandadw. <sup>11</sup> Na' še no'olen' yele'e len bene' che', cheyala' soa to gualaze' bi yede'e bene' yoble o cheyala' yeyeje' šjayzoalene' bene' che' da' yoble. Na' lecze le'e bene' byo le'e nšagna'le, bi yela'ale len xo'ollen'.

<sup>12</sup> Na' le'e bene' yezica'chle, nia' can' chona' xbab cheyala' gonle, la'czla' Xancho' bibi gwne' che da' ca'. To to le'e bene' byo še ba nšagna'lenle no'ole bi chejnilaže' Criston' na' chaclaže' soalencze' le', bi cheyala' yela'ale len le'. <sup>13</sup> Na' to to le'e no'ole še ba nšagna'lenle bene' bi chejnilaže' Criston' na' chaclaže' soalene' le', bi yela'ale len le'. <sup>14</sup> Bi naquen mal lao Diosen' soalenle bene' chele o no'ol chele bene' bi chejnilaže' Criston', le Diosen' chi' yichje' choptele dan' chejnilaže'lene' tole. Šaca' bi naquen ca', xi'inle ca' zjanacbe' ca' xi'in bene' bi chesejnilaže' Diosen', perw gague can', le lente legacbe' chi' yichj Diosen' dan' chejnilaže'lene' tole. <sup>15</sup> Perw še bene' chele o no'ole chele bi chejnilaže' Criston' na' bich chaclaže' soalene' le'e, le yela'a, le Diosen' chaclaže' soacho binlo len lježcho. <sup>16</sup> Na' le'e no'ole še gonle güen len bene' chele na' le'e bene' byo še gonle güen len no'ol chelen', guacte gonen cont yesejnilaže' Criston'.

<sup>17</sup> To tocho cheyala' soacho goncho da' non Xancho Diosen' lo na'cho goncho cate' gwleje' chio' naccho xi'inle'. Chona' mandadw yesone' ca' gate'teze chesedop chesežague' chesonxene' Criston'. <sup>18</sup> Še ba zoale señw dan' že' circuncisión cate' gwlej Diosen' le'e nacle xi'inle', bi gonle cont yenit señon'. Na' še biña' soale señon' cate' gwlej Diosen' le'e nacle xi'inle', bi nable yosozoe' le'e señon'. <sup>19</sup> Bibi nonen len Diosen' še nsa'cho señw che circuncisión o še bi nsa'chon. Da' naquen da' zeje, cheyala' goncho con bi chaclaže' Diosen'. <sup>20</sup> Con can' naccho caten' gwlej Diosen' chio' naccho xi'inle', ca'tezeczen' cheyala' soa cuezcho. <sup>21</sup> Še nacle esclavo cate' Xancho Diosen' gwleje' le'e, bibi sa'laže'le che dan'. Perw še guata' latje chixjwle cont chojle lo na' xanlen', le chixjon na' yechojle. <sup>22</sup> Na' la'czla' še nacle esclavo che bene' cate' Xancho Criston' gwleje' le'e, Criston' ba naque' Xanle na'a, gague benachen'. Na' chio' bina' gaccho esclavo che bene', nac Criston' Xancho, na' guac nacho naccho esclavo che'. <sup>23</sup> Da' zaca' xen da' ben Xancho Criston' cont bechojcho lo na' gwxiyen'. Da'n'an' bi cheyala' goncho xbab no benach naque' xancho. <sup>24</sup> Bene' migw, da' yoble žia' le'e, con can' naccho cate' gwlej Diosen' chio' naccho xi'inle', can' soa cuezcho, le lao Diosen' chzoa chbezcho.

<sup>25</sup> Na' can' cheyala' gac che no'ol güego' ca', Xancho Criston' bi bene' mandadw can' gac chegacbe', perw neda' nia' can' chacda' cheyala' gac, na' ba beyaše' beži'ilaže' Xancho' neda', na' da'n'an' diža' da' choa' zaca'czen gwzenagle chen. <sup>26</sup> Ba za' da' saca'zi'cho na'a, na' da'n'an' chacda' güen ch soa cuezcho con can' ba zoacho. <sup>27</sup> Le'e nšagna'le, bi yela'ale len xo'olle, na' le'e biña' soa xo'olle, bi chiljw xo'olle. <sup>28</sup> Perw bi nacho naquen mal še gwšagna'le, na' neca naquen mal še no no'ol güego' gwšagna'. Con da' zan da' zed de yežlio nga che bene' zjanšagna', na' chaclaža' bi gac chele ca'.

<sup>29</sup> Bene' migw, chaclaža' nia' le'e da' nga: Bich chega'an yezan iz cont goncho dan' ngüia Diosen' goncho. Da'n'an' le'e zoa xo'olle cheyala' soale gonle xšin Diosen' ca' bene' nono xo'ole' zoa. <sup>30</sup> Na' še de da' yegüine'le, cheyala' soale gonle xšin Diosen' ca' bene' bi chegüine'. Na' še zoale

mbalaz, cheyała' soale gonle xšine' ca bene' bi zoa mbalaz. Na' še si'le bi da' si'le, cheyała' soale gonle xšin Diosen' ca bene' bibi gwxi'e. <sup>31</sup> Na' še bi da' chchinle da' de yežlio nga, bi cheyała' cue' yichjle che len, le da' te che yogo' da' chle'echo yežlio nga.

<sup>32</sup> Na' chaclaža' bi cue' yichjle che da' ca' chac yežlio nga. Bene' nono xo'ole' zoa nlatje' gone' xbab che xšin Xancho Diosen' na' che bi da' chaclaže' Xanchon' gone'. <sup>33</sup> Perw bene' nšagne'e chi' yichje' che da' chac yežlio nga, le chone' xbab che bi da' chaclaže' xo'olen' gone', na' gague gac gone' xbab che toz Diosen'. <sup>34</sup> Na' lecze nža' can' chac che no'ole nšagna' na' che no'olen' bi nšagna'. No'ole bi nšagna' mbec yichje' che xšin Xancho Diosen' na' chon cuine' lo ne'e do yichj do laže'. Na' no'ole nšagne'e chbec yichje' che da' chac yežlio nga na' bi da' chaclaže' bene' che' gone'.

<sup>35</sup> Ba gwnia' ca' gague cont gwžona' gwšagna'le san cont gaclena' le'e. Con chaclaža' gaquele Xancho Diosen' do yichj do laže'le sin cbi gwžonen gonle can' chazlaže'.

<sup>36</sup> Na' še to bene' chacde' cheyała' güe'e latje gwšagna' xi'ine' no'ole, na' še no'olen' ba ngole' na' chaclaže' gwšagne'e, nacczen güen gone' can' ba gwchoglaže' gone' na' güe'e latje gwšagna' xi'inen'. Bi naquen mal gwnežjue' xi'ine' no'olen' bene' chnabe' le'. <sup>37</sup> Perw še zoa to bene' chacde' güench nono si' xi'ine' no'olen' na' bi nacho chonen byen gwšagna'be', nacczen güen gone' can' chazlažen' na' bi gwnežjue' bi' chen' gwšagna'be'. <sup>38</sup> Can' naquen, bene' chnežjue' bi' chen' chšagna'be' chone' güen, na' bene' bi chnežjue'be' chone' güench.

<sup>39</sup> Na' note'teze no'ole nšagna', cheyała' soe' len bene' che'. Perw še ba got bene' che', guac yegue'e bene' yoble, con še bene' chejnilaže' Xancho Criston'. <sup>40</sup> Perw chacda' neda' soache' mbalaz še yega'ane' to gualaze', na' chacda' xbab chian' naquen toze len xbab che Spiritw che Diosen'.

## 8

*Yela' guagw da' chosožia bene' lao l' gua'a lsaca' chesejnilaže'*

<sup>1</sup> Na' gwñable nac cheyała' goncho len yela' guagw da' chosožie' lao l' gua'a lsacan' chesejnilaže'. Da' li yogo'cho chejni'icho bibi zjazaca' l' gua'a lsaca' ca'. Na' cate' choncho xbab che da' chejni'icho, con chonxen cuincho, perw cate' chaque lježcho, cheyiljwlaže'cho nacle goncho cont gaclen lježcho. <sup>2</sup> Na' še chaquecho ba gweyjni'icho to da' zejen, cheyała' gacbe'echo bibi de da' chejni'icho ca cheyała' šejni'ichon. <sup>3</sup> Perw cate' chaquecho Diosen', nachle Diosen' nombi'e chio'.

<sup>4</sup> Gwñable še guac gagwcho yela' guagw da' chosožia bene' lao l' gua'a lsacan' chesejnilaže'. Nezecho l' gua'a lsaca' ca' bibi zjazacan', na' toz Diosen' zaque' šejnilaže'chone'. <sup>5</sup> Da' li de da' zan da' chesena benachen zjanaquen xangaque' da' chesejnilaže'. Na' la'czla' nita' bene' chesejnilaže' da' de yaba na' yežlion' chesene' da' ca' zjanaquen xangaque', <sup>6</sup> chio' nezecho toze Xacho Diosen' zaque' gonxencho, na' le' bene' cont gwxe yogo'te da' zjade na' zoacho cont gonxenchone'. Na' nezecho toze Jesucriston' naque' Xancho, na' le' bene' yogo' benach, beyixe' na' bichle da' zjade, na' le' chone' yela' mban checho.

<sup>7</sup> Gague yogo' bene' lježcho bene' chesejnilaže' Criston' chesejni'ide' da' nga nezecho. Bale' zjayolagüe' chesone' xbab bene' zaca' l' gua'a lsaca' ca', na' cate' chesagüe' yela' guagw da' ba bžia bene' lao l' gua'a lsacan', chesacde' chesagüe' da' naquen che l' gua'a lsacan'. Da'nan' lo'

yichjlažda'ogaque' chesacde' malen' chesone', le bina' yesejni'išagüe'de' naquen' naquen. <sup>8</sup> Na' yela' guagon' bibi zaca' gonen cont yebe Diosen' chio', neca chžonen yebede' chio' še bi gagwcho to yela' guagw o še gagwchon'. <sup>9</sup> Perw bał bene' bina' yesejni'išagüe'de' gague bi nonen len Diosen' še bin' ye'ej gagwcho. Na' neče legaue' cheyala' gwsaca'cho can' goncho cont bi goncho ca yeselažoe' lo da' malen' neče dan' che'ej chagwchon'. <sup>10</sup> Le'e nezele nono nac l gua'a lsaca' ca', na' da'nana' guac cue'le ye'ej gagwle ga chesone' lni che l gua'a lsacan' sin cbi bi doła' gapple. Na' bene' bina' šejni'ide' cate' le'ede' che'ej chagwle da'na', nach gacde' lecze guac gone' ca', perw lo' yichjlažda'ogüe' gacde' da' malen' chone'. <sup>11</sup> Na' guacte gwžiyai'cho bene' lježcho yela' chejni'i checho, la'czla' Criston' bnežjw cuine' gote' neče le'. <sup>12</sup> Cate' choncho cont bene' lježcho chesone' to da' ža yichjlažda'ogaque' naquen da' mal, choncho contr Criston' še ca'. <sup>13</sup> Da'nana' chnia' še dan' chagua' bela' chonen cont bene' lježa' lažoe' lo da' mal, gwbatech gagua'ba' cont ca lažoe' lo da' malen'.

## 9

### *Pablon' že' naque' dogualje postlw*

<sup>1</sup> Nezele neda' naca' postlw na' guac naba' gonele neda' ca chonle len yezica'chle postlw ca'. Neda' ble'eda' Xancho Jesúsena' na' bena' xšine' gan' zoale na' da'nana' chejnilaže'lene'. <sup>2</sup> Na' la'czla' še yezica'chle bene' bi chesejle'e naca' postlw, perw le'e chejle'le chia', le da' chejnilaže'le Xancho' ben' gwseła' neda', chlo'en da' li naca' postlw.

<sup>3</sup> Quinga choži'a xtiža' bene' ca' chesene' bi gwseła' Diosen' neda' naca' postlw: <sup>4</sup> Guac naba' yeson bene' da' ye'ej gagua' šaca' chaclaža' gona' ca'. <sup>5</sup> Na' guac gwšagna'lana' no'ole chejnilaže' Criston', na' yeči'ane' gan' šjena' xšin Diosen', can' chon Pedron', na' can' cheson yezica'chle postlw ca' na' can' cheson bene' biše' Xancho'. <sup>6</sup> Bixchen' neda' len Bernaben' lao yogo' postlw ca' chonto' žin len ni'a na'to' cont si'to' da' ye'ej gagwto' na' chixjwto' bichle gastw cheto' da' de šlac chyixjue'eto' xtiža' Diosen'?

<sup>7</sup> Nono soldadw zoa bene' nacho cuinze' chyixjue' gastw che'. Na' nono gaz yag uvav še bi gagüe' uvasen' cate' chbian. Na' lecze ca' nono bene' chyo'e šib xila' ca' nacho bi che'eje' late' xiže'ba' cate' chsien'. <sup>8</sup> Na' dan' žia' nga bi naquen con xbab cheza', le lez can' ža ley dan' bzoj da' Moisésena'. <sup>9</sup> Quinga bzoje' le'e ley: "Bi gwseyjwle cho'a go'n ca' šlac chosolej chosošjba' trigon' cont choj xen." Na' gague da' chi' yichj Diosen' che go'n ca' bene' cont byojen žan ca'. <sup>10</sup> San že' ca' chzejni'icзде' chio' che bene' ca' cheson xšin Diosen'. Da'nana' že' bene' chgua'ane' go'n na' bene' chonšagüe' trigw cheyala' yesenite' lez yesezi'e late' güeje cosešen'. <sup>11</sup> Na' ca' neto' ba bzejni'ito' le'e xtiža' Diosen', le gon xbab žnaquen da' zcha'och ca' da' cheyala' gonle šaca' gonle da' ye'ej gagwto' na' bichle da' chyažjeto'? <sup>12</sup> Naquen da' cheyala'cze gonle dan' choe'le da' cheseyažje yezica'chle bene' chososed chosolo'ede' le'e, perw nacchen da' cheyala' gonle gonle neto' da' chyažj chchine neto' cnel ca' legaue'.

Perw bi gwñabto' gonle neto' da' chyažj chchineto'. Chyo chchejlaže'to' bite'teze da' chac cheto' cont bibi gwžon šanch le'e gwzenagle diža' güen che Criston'. <sup>13</sup> Nezele bene' cheson mandadw lo' yodao' che neto' bene' Israel chesachbane' len da' chosonežjw bene' Israel gualaž cheton' che yodaon', chosyocua'ane' late' güeje beyixe' ca' chesote'

lao Diosen' chesagüe'ba'. <sup>14</sup> Na' ca'czen' non Xancho Criston' mandaw, bene' chosozenag xtižen' cheyalā' yosonežjue' da' cheseyažje ben' cheseyixjue'ede' diža' güen chen'. <sup>15</sup> Perw neda' bi gwnaba' gonle da' chyažj chchinda', na' gague chzoja' da' nga cont gonle ca'. Yejni'acle gata' clel ca' naba' gonle da' chyažjda', le chebechgüeda' dan' bibi gan chona' chyixjue'eda' xtiža' Criston'.

<sup>16</sup> Bi gac nia' chona' to goclen cate' chyixjue'eda' diža' güen che Jesucriston', le Diosen' gwleje' neda' chyixjue'edan' na' chonen byen gona' can' že'na'. Nyaše'chguaze naca' neda' še bi chixjue'edan'. <sup>17</sup> Šaca' chona' to da' ža xbab chia' chyixjue'edan', guac nia' zaca'czen sia' bi da' gonle neda' ca laxjua'. Perw chona' da' gwlo'o Diosen' lo na' gona', na' gague chona' to da' ža xbab chezan'. <sup>18</sup> Na' še nable bi chcua'anen len neda' da' chyixjue'eda' xtiža' Diosen', nach nia' chcua'anen da' chbechgüeda' bibi laxjua' chzia' chyixjue'eda' xtižen', la'czla' zaca'cza' si' laxjua'.

<sup>19</sup> Bi naca' xmos bene', perw chzexjw yichja' chon cuina' ca xmos yogo'te bene' cont šanch bene' yesejnilaže' Criston'. <sup>20</sup> Cate' zoa' len bene' Israel gualaž cheton', chona' can' cheson legaue' na' chona' ca nac costumbr che ley dan' bzoj Moisés cont yosozenague' cate' güe'lena' legaue' xtiža' Diosen', la'czla' nezda' bi chonen byen ga'oguan' cont soa' binlo len Diosen'. <sup>21</sup> Na' cate' zoa' len bene' bi zjanombia' ley dan' bzoj Moisésen', bi na'ogua' costumbr da' non leyna' mandaw, le chaclaža' yosozenag bene' ca' bi zjanombia' leyna' cate' choe'lena' legaue' xtiža' Diosen'. Perw bi nacho chzoa' ca'ale dan' ža Diosen', le chzenaga' can' ža Criston'. <sup>22</sup> Na' cate' zoa' len bene' chesacde' da' zan bi de lsens goncho, bi chona' da' ca' chesacde' naquen mal goncho, la'czla' nezda' bi naquen mal. Chona' ca' cont gac gwzejni'ichda' legaue'. Chon cuina' lebe len yogo'lol bene' cont gaclena' legaue' na' bale' yesejnilaže' Criston'. <sup>23</sup> Chi' yichja' yosozenague' diža' güen che Criston' cont soa' mbalaz txen len yezica'chle bene' chosozenague' xtiža' Criston'.

<sup>24</sup> Nezecho cate' chosoxonj zan bene' cont choj to bene' gon gan, yogüe' chesa'acses', la'czla' tozen' gon gan na' si'e premio. Na' ca chesa'acses bene' ca' do yichj do laže', ca' to to chio' cheyalā' soacho gwzenagcho che Diosen' do yichj do laže'cho cont gone' soacho mbalaz cate' yežincho gan' zoen'. <sup>25</sup> Bene' güitj ca' chosochejlaže' bi chesone' con can' ža cuerp čhegaquen' cont chesaque' bene' gual, le chesaclaže' yesone' gan cate' yeseyitje' na' yesezi'e premio, la'czla' dan' chesezi'en naquen to da' te che. Na' chio', chzenagcho che Diosen' cont si'cho to da' güen da' bi te chen'. <sup>26</sup> Da'nān' bi gona' ca to bene' chxonj, to bene' bi nezde' ga cheyalā' yežine', o ca to bene' chdile' len ponet, bene' bi nezde' ga cuaže'. <sup>27</sup> Bi chzenaga' che da' mal cate' žan gona' da' mal len cuerp chian', san chona' con ga zelao chzoeda' cont chona' can' chazlaže' Diosen'. Le nezda' še gwzenaga' che da' malen', bi yebe Diosen' neda' la'czla' ba gwduxjue'eda' xtižen' len bene' yoble.

## 10

*Cheyalā' na'yane'cho cont bi goncho da' malen'*

<sup>1</sup> Bene' migw, chaclaža' nezele Diosen' gwzoe' len yogo'lol da' xozxtao' neto' bene' Israel cate' besyechoje' Egipto, le yogüe' gosenite' xan to bejw gan' gwyo'o Diosen', na' Diosen' bene' cont yogüe' gosedie' nisdāo' da' nzi' Nisdāo' Xna. <sup>2</sup> Na' yogüe' gosaque' txen len da' Moisésen' cate' gwče'e

legaue' gan' gwžialao bejon' laogaue' na' cate' gosedie' nesdaon'. <sup>3</sup> Na' yogüe' gosagüe' toze yela' guagw da' bnežjw Diosen' legaue'. <sup>4</sup> Na' yogüe' gose'eje' toze nis da' bnežjw Diosen' legaue'. Na' nis da' gose'eje' bchojen lo yej, na' guac nacho Criston' goque' yej gan' bchoj nisen', le Criston' gwyejlene' legaue'. <sup>5</sup> Na' la'czla' Diosen' goclene' yogüe', zane' bi gosone' cont yebe Diosen' legaue', na' da'nan' gosebiaye'e latje dašen'.

<sup>6</sup> Na' yogo' da' gac chegaue' chzejni'in chio' bi cheyala' selaže'cho goncho bi da' mal can' goson legaue'. <sup>7</sup> Da'nan' chnia' le'e, bi šejnilaže'cho l' gua'a lsaca' can' goson bal da' xozxta'oto' ca'. Le nyoj Xtiža' Diosen' žan: "Gosebi'e gose'ej gosagüe' na' gosenite' gosone' lni." <sup>8</sup> Na' lecze bi cheyala' gata'lencho no'ole bi nac no'ol checho o bene' byo bi nac bene' checho. Can' goson zan da' xozxta'oto' cani', na' da'nan' šonechoa mile' gosate' yela' güen da' xinj chegaquen' lao toze ža. <sup>9</sup> Bi cheyala' goncho Xancho Criston' prueba še gone' can' ba gwnen'. Cani' bal da' xozxta'oto' ca' bi gosejle'e Diosen' gaclene' legaue' can' gwnen', na' Diosen' gwsele' bel znia gosotba' legaue'. <sup>10</sup> Na' lecze bi cheyala' bixjwcho len Diosen' can' goson bal da' xozxta'oto' ca' cani', na' Diosen' gwsele' to angl che' bene' betue' legaue'.

<sup>11</sup> Yogo' da' ca' gosac chegaue' zjanyojen le'e Xtiža' Diosen' cont chosozejni'in chio' nac cheyala' goncho zoacho na'a, le ba zoa yeyož yežlion'. <sup>12</sup> Da'nan' note'tezcho še chaquecho ba zoachachcho chejni-laže'cho Jesucriston', cheyala' na'yane'cho naquen' goncho cont bi lažo'cho lo da' malen'. <sup>13</sup> Bite'teze da' mal da' žan goncho o da' chac checho, bi nacho zdebechle chac checho can' chac che note'teze bene'. Diosen' zoacze' chaclene' chio' can' žen', bi cho'e latje gac checho da' bi soecho. Na' chzejni'ide' chio' nac goncho cont soecho bi goncho da' malen'.

<sup>14</sup> Da'nan' bene' migw ben' chacda', le cuejyichj yogo' bi da' cheson bene' chesejni-laže' l' gua'a lsaca' ca'. <sup>15</sup> Ba chejni'ile na' guac gonle xbab che da' quinga chzejni'ida' le'e cont šejni'ile choa' diža' da' zaca'. <sup>16</sup> Na' da' ca' che'ej chagwcho chjayze'echo bi zejen len chio' da' got Criston', choe'cho yela' choxclen che Diosen' cate' che'ej chagwchon. Na' dan' che'ejcho zejen chio' chejni-laže'chone' naccho txen len Criston' can' blalj xchene' cate' gosote'ne'. Na' dan' chagwcho late' güeje, zejen naccho txen len cuerp che Criston'. <sup>17</sup> Na' can' nac toze yetextil da' chzoxjcho chagw yogo'cho late' güejen, lecze ca' yogo' chio' chejni-laže'cho Criston' naccho toze len lježcho, le toze yetextilen' chagwcho txen.

<sup>18</sup> Le gon xbab can' cheson bene' Israel gualaž cheto' ca', chesote' beyixe' cate' chesonxene' Diosen', na' note'tez bene' chesagüe' xpela' ben' chesoten' zjanaque' txen chesonxene' le'. <sup>19</sup> Bi chaclaža' gonle xbab žia' l' gua'a lsaca' ca' zjanaquen da' zaca' o yela' guagw da' chjasežia bene' laogaquen naquen nža'le len bite'teze yela' guagw. <sup>20</sup> Gague can', le cate' bene' chosožie' bi da' chosožie' lao l' gua'a lsacan' dan' chesejni-lažen', chosožien' lao da' xigüe' ca', gague lao Diosen', na' bi chaclaža' gacle txen len da' xigüe' ca'. <sup>21</sup> Bi gac ye'ej gagwcho da' che'ej chagwcho chjayze'echo bi zejen da' got Xancho Criston' na' lecze ye'ej gagwcho gonxencho da' xigüe' ca'. Bi gac ye'ej gagwcho chopten. <sup>22</sup> Ža'a Diosen' chio' še goncho ca'. Na' bi naccho bene' gual ca Diosen' cont soecho bi da' gone' gac checho.

*Bi goncho da' chaque bene' lježcho naquen mal*

23 Chesene': "De latje goncho bite'teze", perw nezecho gague yogo' da' choncho naquen güen, na' la'czła' še de latje goncho bite'teze, gague yogo' da' choncho chaclenen chio'. 24 Ne tocho bi cheyala' goncho da' naquen güen len chio'ze, san goncho xbab še naquen güen len bene' lježcho.

25 Bite'teze bela' chesote' lagüe' ya'a le gagon' na' bi nable še bosozien' lao l gua'a lsacan' chesejnilaže', cont bi gaczejlaže'le še naple doła' gagwlen. 26 Le Xtiža' Diosen' nyojen žan: "Che Xancho Dios yežlio nga, benach, beyixe' na' yogo'te da' zjade lo yežlion'."

27 Na' cate' bene' bi chesejnilaže' Criston' chesaxe' chio' gagwcho ližgaque', še šejcho nach guac gagwcho bite'teze da' yesone' gagwcho sin cbi nabcho še bosozien' lao l gua'a lsacan', le Diosen' bi che'nde' gaczejlaže'cho še napcho doła' che'ej chagwchon. 28 Perw še no ye' chio': "Da' nga bosozie' lao l gua'a lsacan'", bi gagwchon cont bene' gwna ca' bi gacde' lenczcho chejnilaže'cho l gua'a lsacan', o gacde' napcho doła' chagwchon. 29 Bi nacho naquen da' mal len Diosen' gagwchon, con naquen da' mal len ben' gwna ca'.

Na' chnable žbixchen' cheyala' cuejyichjcho bich goncho bi da' choncho še bene' lježcho chesacde' napcho doła' chonchon? 30 Na' chonle xbab žbixchen' ža bene' lježcho choncho da' mal chagwcho to yela' guagw še choe'cho yela' choxcen che Diosen' neche len? 31 Quinga naquen, cate' che'ej chagwcho o bite'teze da' choncho, cheyala' gonchon cont gacxen Diosen'. 32 Na' bi cheyala' goncho bite'teze da' choncho še gonen cont bene' yoble yeselažoe' lo da' mal, la'czła' še zjanaque' bene' Israel gualaž cheton', o še bene' bi zjanaque' bene' Israel, o še ljež chio' chdop chžagcho chonxencho Diosen'. 33 Can' chona' neda', bite'teze da' chona' cheyljwlaža' nacle gona' cont to to bene' soe' mba. Na' bi cheyljwlaža' nacle gona' da' gaclen cuina' san da' gaclen bene' zan cont gata' yela' mban čhegaque' toli tocane.

## 11

1 Neda' chona' con can' ben Criston', na' chneyoeda' le'e gonle can' chonan'.

*Can' cheyala' yeson no'ol ca' cate' chdop chžagcho chonxencho Diosen'*

2 Na' na'a chnia' le'e chonle güen zoale chjayze'ele neda' na' chonle ca ba bzejni'ida' le'e. 3 Na' chaclaža' šejni'ile da' nga. Yogo' bene' byo cheyala' yosozenague' che Criston', le Criston' naque' blaoch ca legaque', na' yogo' no'ole cheyala' yosozenague' che bene' che', le bene' chen' naque' blaoch ca no'olen'. Ca'cze chon Criston', chzenague' che Xe' Diosen', le lecze naque' blaoch ca le'. 4 Note'teze bene' byo še nzoa xłape' cate' chol güiže' Diosen' šlac ndop nžagle txen o cate' chyixjue'ede' bi da' ža Diosen', naquen da' yela' zto', le zejen bi nac Criston' bene' blao len le'. 5 Na' note'teze no'ole še chol güiže' Diosen' o chyixjue'ede' xtiža' Diosen' sin cbi gwcuša' yichje' cate' chdop chžagle txen, naquen yela' zto' par bene' che', le naque' blaoch ca le'. Na' no'olen' chon ca' naque' lebe len no'ol ca' nšibdi yichjgaque', no'ole ca' bibi yela' zto' zjanombi'e. 6 Na' še no'olen' bi chaclaže' gwcuša' yichje' can' ba gwnian', yejni'a gwšib doxen yichjen'. Da'nan' še chaquele zto' gwšiblen, nach gwcuša'czlen can' cheson yezica'chle no'ol ca'. 7 Na' le'e bene' byo, bi cheyala' gwcuša' yichjlen' cate' yol güiže' Diosen' o cate' chixjue'ele bi da' ba gwna Diosen' le'e, le Diosen' gwleje' le'e cont gwlo'ele bene' nacchgüe'

bene' zaca'. Na' le'e no'ole, Diosen' gwleje' le'e cont gwlo'ele nac bene' che to tole bene' zaca'. <sup>8</sup> Diosen' bi bene' bene' byo len žit costiy che no'olen', san gwleje' žit costiy che bene' byo nechon' benen' no'ole. <sup>9</sup> Na' Diosen' bi bene' bene' byon' cont gaclene' no'olen', san bene' no'olen' cont gaclene' bene' byon'. <sup>10</sup> Da'nan' no'ol ca' cheyała' yosocuaše' yichjgaque' cont yosolo'e nac bene' byon' blaoch ca legaque', le angl ca' chosocuaše' laogaque' lao Diosen'. <sup>11</sup> Perw naccho txen len Xancho Jesucriston' la'czła' še naccho bene' byo o še no'ole, na' bi cheyała' yeson no'olen' xbab bi cheseyažjde' bene' byo na' neca bene' byo yesone' xbab bi cheseyažjde' no'olen'. <sup>12</sup> Naquen da' li Diosen' gwleje' žit costiy che bene' byo na' benen' no'ole, na' lecze naquen da' li yogo' bene' byo zoa no'ole gwxañ le', na' Diosen' bene' yogo' benach len bica'chle da' zjade.

<sup>13</sup> Le gon xbab chele na' gacbe'ele bi chazlaže'cho cate' to no'ole chol güiže' Dios sin cbi chcuaše' yichje', le can' nac costumbr chechon'. <sup>14</sup> Na' lecze bi chazlaže'cho še bene' byo bi gwšib yichjen' na' con chosožien' ca cheson bene' bxej. <sup>15</sup> Perw no'olen' xdanchgua nac yiša' yichjgaquen' cate' žian' da' tone, na' Diosen' none' yiša' yichjgaquen' gaquen to da' gwcuasen' yichjen'. <sup>16</sup> Še nole chaquele gwšašle che da' nga ba gwnia', cheyała' nezele neto' postlw bi choe'to' latje yesone' nža'le gate'teze chesedop chesežag bene' chesejnilaže' Diosen'.

*Bi chjasyeze'ede' Criston' cate' chese'ej chesagüe'*

<sup>17</sup> Na' de yeto da' ñia' le'e, le bi chonle güen cate' chdop chžagle chonxenle Criston' na' bi chaclenen le'e, san chonen mal. <sup>18</sup> To da' bi chonle güen, chesene' cate' chdop chžagle chonxenle Criston' bi chonle txen len lježle, na' chacda' nacłjan' li can' chesenen'. <sup>19</sup> Na' ca'łjan' cheyała'cze gac da' bi chon lježle txen, le chlo'en non' chejnilaže' Criston' do yichj do laže' na' non' gague da' li chejnilaže'ne'. <sup>20</sup> Na' cate' chežagle chagwle txen, bi chonle xbab bnežjw cuin Xancho Jesucriston' neche xtoła'chon', la'czła' chdop chžagle cont šjayze'elen. <sup>21</sup> To tole che'ej chagwle da' chyob chdoxe'le, neca chbez lježle. Da'nan' balle ne' chdonle cate' chedagwle na' yeballe che'ej chagwxattele na' chzože'le. <sup>22</sup> Yejni'a yega'an ližle ye'ej gagwle clcl ca gagwle lao bene' yaše' bene' bi de chegaque'. Da' chonle ca', nacbia' chgue'e lježle bene' cheyała' yesaque' txen len le'e da' chonxenle Diosen', na' chonle cont chesaque' tole da' bi de chegaque'. Na' naquen malchgua da' chonle ca', bi gac ñi'a chonle güen.

*Chjayze'echo bnežjw cuin Xancho Criston' neche xtoła'chon'*

(Mt. 26:26-29; Mr. 14:22-25; Lc. 22:14-20)

<sup>23</sup> Xancho Jesús'en bzejni'ide' neda' can' šjayze'echo da' bnežjw cuine' neche xtoła'chon'. Na' neda' ba bzejni'ida' le'e can' goquen', že' cate' Judasen' bdie'ne' lo na' ben' besegue'ede' le', Xancho Jesús'en bexae' to yetextil. <sup>24</sup> Na' be'e yela' choxcłen che Diosen' na' beyož be'e yela' choxcłen che' na' bzoxjen', na' gwne': "Le gagw yetextil nga. Lenna' naquen cuerp chia' da' chnežjua' neche xtoła'le. Na' quinga gonle šjayze'ele bi zejen len le'e dan' gwnežjw cuina' yesote' neda'." <sup>25</sup> Na' lecze ca' bene' cate' beyož gosagüe' xše', bexae' to vas nis uvas na' gwne': "Dan' yože lo vas nga zejen da' cobe dan' gwna Diosen' gone' gaclene' le'e. Na' lalje xčhanan' cont gac can' gwne' gonen'. Na' bate'teze ye'ejle ca da' nga chona' che'ejle ña'a, le šjayze'e bi zejen len le'e dan' gwnežjw cuina' yesote' neda'." <sup>26</sup> Nachen' yogo' ñi'a cate' chagwcho yetextilen' na' cate' che'ejcho

nis uvasen' chjayze'echo can' bene'na', na' chyixjue'echo can' bnežjw cuine' gote' neche xtoła' benačen'. Na' can' gonchczcho šlac biņa' yide' da' yoble.

*Naquen' goncho cate' chjayze'echo yela' got che Xancho Jesúsen'*

<sup>27</sup> Can' naquen, še chagwcho yetextilen' na' che'ejcho nis uvasen' cont chjayze'echo yela' got che Xancho Jesúsen' perw še bi chonxenchone' cate' choncho ca', napcho doła', le chonchon ca da' bibi zaca' cuerp che' dan' bnežjue' na' xchene' da' blalje' neche xtoła'chon'. <sup>28</sup> Da'n'an' cheyala' gonyane'cho xbab še choncho can' chazlaže' Diosen' cate' za' gagwcho yetextilen' na' ye'ejcho nis uvasen' cont šjayze'echo yela' got che Xancho Jesúsen'. <sup>29</sup> Le še ye'ej gagwcho sin cbi gonxencho Xancho Jesúsen' da' bnežjw cuine' gote' neche xtoła'chon', Diosen' gone' chio' castigw. <sup>30</sup> Na' zanle bi zoale güen na' chacšenele na' bał bene' ba gosate' da' bi gose'ej gosagüen' do laže'. <sup>31</sup> Na' še gacbe'echo na' goncho byen soacho binlo len Xancho Diosen', bi gone' chio' castigw cate' che'ej chagwchon. <sup>32</sup> Na' cate' napcho doła' can' che'ej chagwchon, Xancho Diosen' chone' chio' castigw cont yetinjecho da' malen' choncho na' bi si'cho castigw toli tocaņe can' yesezi' bene' bi chesejnilaže'ne'.

<sup>33</sup> Da'n'an' bene' migw chia', cate' chdop chžagle txen che'ej chagwle, le cueze lježle na' ye'ej gagwle txen. <sup>34</sup> Na' še chbił chdonle, yejni'a yega'an ližle ye'ej gagwle, clcl ca gon Diosen' le'e castigw can' chonle caten' chdop chžagle. Na' che bichle da' chaclaža' gwzejni'ida' le'e, cate' yida' gan' zoalena' nach nia' can' gonlen'.

## 12

*Spiritw che Diosen' chaclenen to tocho cont choncho bi da' choncho*

<sup>1</sup> Na' bene' migw, chaclaža' nezele ca chon Spiritw che Diosen' chaclenen to to chio' chejnilaže'cho Jesucriston'.

<sup>2</sup> Nezele cate' biņa' šejnilaže'le Criston' gwyejle'le diža' güenlaže' na' da'n'an' gwyejnilaže'le l gua'a lsaca' da' bibi biš grasyw nye'. <sup>3</sup> Na' da'n'an' chaclaža' šejni'ile da' nga na'a. Note'teze bene' že': "Chgue'eda' Jesúsen'", bi zoa Spiritw che Diosen' len le', perw bene' že': "Jesúsen' naque Xana'", že' ca' da' zoa Spiritw che Diosen' chaclenen le'.

<sup>4</sup> Toz Spiritw che Diosen' zoa, perw nža' nža' da' chaclenen to tocho choncho o nezecho. <sup>5</sup> Toz Xancho Jesucriston' chonxencho la'czla' nža' nža' ca chon to tocho xšinen'. <sup>6</sup> Na' la'czla' nža' nža' da' chon to tocho, toz Diosen' chone' cont to tocho chac choncho xšinen'. <sup>7</sup> Nacia' zoa Spiritw che Diosen' len chio', le chonen cont to tocho chac choncho da' chaclenen yogo'cho. <sup>8</sup> Diosen' ba nsi'e xnezen' chon Spiritw chen' cont bałcho chac chzejni'icho bene' yoble xbab sina' chen', na' lecze Spiriton' chonen cont yebałcho nezecho to da' nezecho na' chzejni'ichon bene'. <sup>9</sup> Na' lecze toz Spiritw chen' chonen cont bałcho chejnilaže'chguacho Diosen' na' chac bite'teze da' chnabechone'. Na' da' chaclen Spiriton' chio', bałcho chac choncho cont chesyeyaque bene' chesacšene. <sup>10</sup> Na' lecze Spiritw nan' chonen cont bałcho chac choncho yela' guac, na' bałcho chac chyixjue'echo bi da' ba gwna Diosen' chio'. Na' Spiritw che Diosen' chonen cont bałcho chacbe'echo che da' chesena bene' o da' cheson bene' še zan' che Diosen' o še zan' che da' xigüe' ca', na' Spiriton' chonen cont bałcho choe'cho gwde gwdele diža' da' bi nsedcho, na' yebałcho chac



che'cho bene' lježcho bi zeje diža' ca'. <sup>11</sup> Toz Spiritw che Diosen' chaclenen yogo'cho cont choncho yogo' da' chaclažen' gon to tocho.

*Yogo' chio' chejnilaže'cho Criston' naccho toze can' nac cuerp chechon'*

<sup>12</sup> Cuerp chechon' nsan' zan part, perw zjangoden' txen na' naquen toze. Na' lecze ca' chio' chejnilaže'cho Criston' naccho toze len le' na' len bene' lježcho ca'. <sup>13</sup> Bał chio' naccho bene' Israel na' yebał chio' bi naccho bene' Israel. Bałcho naccho esclavo na' yebałcho bi naccho. Perw yogo'czho gwzoacho nis par blo'echo ba ben Spiritw che Diosen' cont naccho txen len Criston', na' lecze toze Spiritw che Diosen' zoan lo' yichjlaždao' yogo'cho.

<sup>14</sup> Cuerp chechon' nsan' zan part, na' nža' can' nac to to parten'. <sup>15</sup> Ni'acho guac nan: "Bi naca' toze len cuerpen', le bi naca' ne'en." Perw la'czła' še nan ca', naquen toze len cuerpen'. <sup>16</sup> Na' nagcho guac nan: "Bi naca' toze len cuerpen', le bi naca' yejlagüen'." Perw la'czła' še nan ca', naquen toze len cuerpen'. <sup>17</sup> Šaca' doxen cuerp chechon' naquen yejlaochi, bi gac yenecho. Na' šaca' doxen cuerpen' naquen nagcho, bi gac le'echo. <sup>18</sup> Perw Diosen' bžie' bia' nsa' cuerp chechon' zan part da' cheson žin con can' gwyazlaže'. <sup>19</sup> Na' bi nya' cuerp chechon' šaca' nsan' toze part. <sup>20</sup> San cuerpen' nsan' zan part da' naquen txen cont naquen toze cuerp.

<sup>21</sup> Da'nan' yejlaochon' bi gac yen' na'chon': "Bi chyažjda' le'." Na' naca' gac ye' yichjchon' ni'achon': "Bi chyažjda' le'." <sup>22</sup> Na' la'czła' bał part cuerp chechon' chaquecho bitec naquen da' gual, perw chyažjehon. <sup>23</sup> Na' la'czła' bał part cuerp chechon' chaquecho bitec bi zacan', perw chi' yichjchon, da'nan' cheyacw xacho. Na' part che cuerp chechon' da' bi chaclaže'cho le'e bene', hcuaše'chon len xacho. <sup>24</sup> Perw part da' nsa' cuerp chechon' da' naquen xdan, bi hcuaše'chon. Na' Diosen' none' cont chi' yichjcho che part ca' da' bi zjanaquen xdan. <sup>25</sup> Na' none' cuerp chechon' toz cont to to parten' chapši'i lježen lebze na' chesonen žin txen. <sup>26</sup> Na' še guecho chac, bi zoa güen doxen cuerp chechon' še ca'. Na' še to parten' chaquecho xdan o chac chonen güenchgua, doxencho chebecho.

<sup>27</sup> Na' chio' chejnilaže'cho Criston', yogo'cho ngode'cho txen len le' na' yogo'cho txen naccho cuerp chen', na' guac nacho to tocho naccho ca to part güeje cuerp chen'. <sup>28</sup> Na' ca' nac chio' chdop chžagcho chonxencho Criston', da' nechw Diosen' gwleje' neto' nacto' postlw, na' da' gwchope gwleje' bał bene' cont cheseyixjue'ede' da' ba gož Diosen' legaue'. Na' da' gwyone gwleje' yebał bene' chososed cheselo'ede' xtižen'. Na' lecze gwlej Diosen' bene' cheson yela' guac, na' gwleje' bene' cheson cont cheseyyaque bene' chesačšene, na' gwleje' bene' chesaclene' bene' yoble cate' bi da' cheseyažjde'. Na' gwleje' bene' chesenabia' chio' chdop chžagcho chonxencho Criston', na' gwleje' bene' chac cheso'e gwde gwdele diža' da' bi zjansede'. <sup>29</sup> Gague yogo'cho naccho postlw. Gague yogo'cho chac chyixjue'echo bi da' ba gwna Diosen'. Gague yogo'cho chac chsed chlo'echo bene' xtižen', na' gague yogo'cho chac choncho yela' guac. <sup>30</sup> Gague yogo'cho chac choncho cont cheseyyaque bene' chesačšene. Gague yogo'cho chac choe'cho gwde gwdele diža' da' bi nsedcho. Gague yogo'cho chac chozejni'icho bi zejen diža' ca'. <sup>31</sup> Le yeyiljwlaže' gaclen Spiritw che Diosen' le'e cont gac gonle da' ca' zjanacch da' zaca'.

Na' de yeto da' zaca'ch naquen' cheyala' soa cuezcho.

## 13

*Cheyała' gaque lježcho*

<sup>1</sup> La'czła' še chaccho gwde gwdele diža' da' chesac beñachen' na' da' chesac angl ca', perw še bi chaque ljež beñachcho, bibi zaca'cho. Zaca'lebcho ca ya da' chonen sšag cate' chososižen' o ca platij da' chososiž beñe' güecuež. <sup>2</sup> Na' la'czła' še ba goclen Spiritw che Diosen' chio' cont chac chyixjue'echo bi da' ba gwne' chio', bibi zaca'cho še bi chaque ljež beñachcho. Na' la'czła' še nezecho yogo'loł da' nono ña' neze, na' la'czła' še chejni'icho yogo'loł da' naquen da' zaque', bibi zaca'cho še bi chaque ljež beñachcho. Na' la'czła' še leca chejnlaže'cho Diosen' cont chone' bite'teze da' zdebe cate' chñabechone' gonen', bicze bi zaca'cho še bi chaque lježcho. <sup>3</sup> Na' še gwnežjwcho beñe' yaše' yogo' bi da' de checho na' gwnežjw cuincho yosozey beñe' chio', bi gaclenen chio' lao Diosen' še bi chaque lježcho.

<sup>4</sup> Še chaque lježcho, chapcho yela' chxenlaže' len legaque', na' choncho güen len legaque', bi chgue'echo legaque' še chac güen chegaque', na' bi chonxen cuincho len xtiža'cho, na' bi cha'laže'cho. <sup>5</sup> Na' cate' chaque lježcho bi choncho nacteze len legaque', bi choncho xbab che cuinzcho, bi chbixjwcho, na' bi chgo'olaže'cho. <sup>6</sup> Na' cate' chaque lježcho bi chbecho še chon beñe' lježcho da' mal, san chbecho še chone' da' zej to li. <sup>7</sup> Na' cate' chaque lježcho, chapcho yela' chxenlaže' bite'teze da' chesonde' chio', na' choncho xbab güen che yogo'loł beñe', na' zoacho lez yesone' güen yogo' las, na' chyo chchejlaže'cho bite'teze da' chesone beñe' chio'.

<sup>8</sup> Gwbat te che da' cheyała' gaque ljež beñachcho. Perw gwžin ža cate' noch no chixjue'e bi da' ba gož Diosen' le', na' gwžin ža cate' bich yesoe' beñe' gwde gwdele diža' da' bi zjansede', na' gwžin ža cate' bich yažje bichle da' šejni'icho. <sup>9</sup> Biña' nezecho ña'a yogo' da' za' nezecho, na' biña' gac chixjue'echo binlo yogo'loł da' ba gož Diosen' chio'. <sup>10</sup> Perw gwžin ža cate' gon Diosen' cont yogo' da' de gaquen can' cheyała' gaquen. Cana' te che da' bi naquen ca cheyała' gaquen.

<sup>11</sup> Cate' goccho bidao' be'cho diža' can' chesoe' note'teze bidao' diža', bencho xbab can' cheson note'teze bidao' xbab, na' gwyejni'icho can' chesejni'i bidao'. Na' ña'a ba gwcha'ocho na' ba gwlejyichjcho bich choncho can' cheson bidao'. <sup>12</sup> Na'a biña' nezecho binlo da' nac che Diosen'. Zaca'lebcho ca beñe' chñe'e to lo spejw da' bitec chlo'e binlo. Perw gwžin ža cate' le'echo binlo na' nezecho doxen da' nac che Diosen', na' canan' gombia'chone' binlo ca binlo nombi'e chio'. <sup>13</sup> Nachen' da' quinga šone non Diosen' mandadw goncho toli tocañe: šejnilaže'chone', soacho lez gone' ga gacch güen checho, na' gaguecho Diosen' na' ljež beñachcho. Na' da' zejechen goncho lao da' ca' šone, gaguecho Diosen' len ljež beñachcho.

## 14

*Beñe' ca' chesoe'lene' Diosen' diža' da' bi zjansede'*

<sup>1</sup> Cheyała' cue' yichjle gaguele Diosen' na' len ljež beñachle, na' lecze cheyała' selaže'le gaclen Spiritw che Diosen' le'e gonle con bi da' chaclažen' gonle. Na' lao da' ca' chaclenen beñe' bi da' chesone', da' zaca'chen da' cheseyixjue'ede' bi da' ža Diosen'. Lenña' cheyała' selaže'chgualē gonle. <sup>2</sup> Bałcho chon Spiritw che Diosen' cont chac

choe'lencho Diosen' gwde gwdele diža' da' bi nsedcho. Na' cate' choe'lenchone' dižan' nac ca', bi choe'lencho beṇachen' diža', le notno chejni'i xtiža'chon', con naquen diža' da' choṇ Spiritw che Diosen' choe'lenchone' la'czla' bi chejni'ichon. <sup>3</sup> Perw bene' chyixjue'ede' bi da' ba gwna Diosen', chaclene' bene' yoble yesenita'chache' yesejni-laže' Diosen', na' yesenite' mbalazech, na' chesyeyacxenlaže' še bi da' chesac čegaque'. <sup>4</sup> Cate' choe'cho gwde gwdele diža' da' bi nsedcho, yichjlažda'ocho na'zen' chaclenen. Perw še chyixjue'echo bi da' ba gwna Diosen', chaclenen yogo' chio' chdop chžagcho chonxencho Criston'. <sup>5</sup> Yebeda' šaca' yogo'le gac güe'lenle Diosen' gwde gwdele diža' da' bi nsedle, perw yebechda' juisyw šaca' yogo'le gac chixjue'ele bi da' ye' Diosen' le'e. Lenna' zejehen clcl ca' güe'lenchone' gwde gwdele diža' šlac ndop nžagcho chonxencho Diosen'. Le še nono zoa no gwzejni'i bi zejen gwde gwdele diža' dan' choṇ Spiriton' ṇacho, bitw gaclenen bene' ljezcho yesenita'chache' yesejni-laže'ne'. <sup>6</sup> Bene' migw, nežda' bi gaclenen le'e še güe'lena' Diosen' gwde gwdele diža' da' bi chejni'ile caten' yedena' le'e. Perw gaclenen le'e še gwzejni'ida' le'e bi da' ba bzejni'i Diosen' neda'. Na' gaclenczen še gwzejni'ida' le'e bichle da' nežda' che Diosen', o bi da' ba gože' neda' cont chixjue'eda' le'e, o še gwsed gwlo'eda' le'e bi zeje xtižen'.

<sup>7</sup> Ca' nac bžejo, bi mbanen perw zoa ši'in cate' chcuež bene' len, na' lecze ca' arpan' cate' chyin' bene' len. Na' še toz nota da' chcuež ben' len bžejoa' o toz nota da' chyin' ben' cate' chyine' arpan' bate'teze, nono gacbe'e bin' chosocueže' še bi yosoše'e güeltze nota dan' chosocuežen'. <sup>8</sup> Cate' zoa to bene' chcueže' trompeta cont cheseneze soldadw ca' naquen' yesone', še bi gwcuežen' binlo, bi yesejni'ide' cheyała' šja'aque' lo gwdile. <sup>9</sup> Ca'cze naquen len chio', še güe'lencho Diosen' diža' da' bi chesejni'i bene', bi gaclenen legaque', le len legaque' naquen ca' che bene' chšalj toze'. <sup>10</sup> Nezecho bene' že' doxen yežlion' gwde gwdele diža' da' chesaque', na' to to beṇach chesejni'ide' dižan' goljelene'. <sup>11</sup> Na' še chio' bi chaccho diža' da' chac yeto bene', nezecho naque' bene' zito' len chio' na' naccho bene' zito' len le'. <sup>12</sup> Na' dan' chi' yichjle gaclen Spiritw che Diosen' le'e cont gac gonle bi da' chaclaže'le gonle, ca'czen cheyała' cue' yichjle gaclenen le'e gonle da' gaclen lježle cont yogo'le soachachle šejnilaže'le Diosen'.

<sup>13</sup> Na' še Spiritw che Diosen' gonen cont güe'lencho Diosen' gwde gwdele diža' da' bi nsedcho, cheyała' ṇabcho lecze gaclenen chio' gwzejni'icho bene' bi zeje diža' dan' choe'lencho Diosen'. <sup>14</sup> Le cate' Spiriton' chonen cont choṇ güiža' Diosen' len diža' da' bi nšeda', con nežda' lo' yichjlažda'ogua' choe'lana' Diosen' diža', perw bi chona' xbab čen, le bi chejni'idan'. <sup>15</sup> Quinga cheyała' goncho cate' choṇ güižcho Diosen', cheyała' güe'lenchone' bite'teze diža' da' choṇ Spiritw čen' chio' la'czla' še bi chejni'ichon, na' lecze cheyała' güe'lenchone' diža' da' chejni'icho. Na' cheyała' golcho bite'teze da' choṇ Spiritw che Diosen' golcho la'czla' še bi chejni'ichon, na' lecze cheyała' golcho da' chejni'icho. <sup>16</sup> Le še chonxencho Diosen' o choe'cho yela' choxcen che' len diža' da' bi chejni'i bene' yoble, bene' bi chesejni'i dižan' choe'chon' bi gac yesonxene' Diosen' txen len chio'. <sup>17</sup> La'czla' še choe'cho yela' choxcen che Diosen' binlo, perw bi chaclenen bene' yoble še bi chesejni'ide' xtiža'chon'. <sup>18</sup> Choa' yela' choxcen che Diosen' da' choe'lencha'ne' gwde gwdele diža' da' bi nšeda' clcl ca' le'e. <sup>19</sup> Perw cate' ndop nžagcho chonxencho Criston' vejni'a gua' gayo'ze diža' da' yesejni'i bene' cont gwzejni'ida' legaque', clcl ca' gua' ši

mil diža' da' bi yesejni'ide'.

<sup>20</sup> Bene' migw, bi cheyała' šo'cho xbab che bidao' bina' šejni'i, san šo'cho xbab che bene' chejni'i. Perw len da' malen' cheyała' gaccho ca bidao' bi' biña' gon da' mal. <sup>21</sup> Xtiža' Diosen' nyojen žan: "Neda' Dios gona' cont bene' zito' yesoe'lene' bene' Israel quinga xtiža', perw ne ca'cze bi yozozenague' chia'." Can' ža Xancho Diosen'. <sup>22</sup> Da'nan' nezecho Diosen' chchine' gwde gwdele diža' da' choe'lenchone' cont bene' bi yesejnilaže'ne' yesacbe'ede' zoacze' len chio'. Na' chio' chejnilaže'chone', Spiritw che Diosen' chonen cont bene' cheseyixjue'ede' chio' bi da' ba gož Diosen' legaque'. Can' chone' chzejni'ide' chio'. <sup>23</sup> Le gon xbab nac gac še šlac ndop nžag yogo'cho txen chonxencho Criston' yogo'cho güe'lencho Diosen' gwde gwdele diža' da' bi nsedcho, na' yesela' bal' bene' bi chesejni'i naquen' choncho chonxenchone' o bene' bi chesejnilaže'ne', legaque' yesene' chactontcho. <sup>24</sup> Perw še bene' ca' bi chesejnilaže' Diosen' o bene' ca' bi chesejni'i naquen' chonxenchone' yesela'aque' šlac yogo'cho chzejni'i lježcho bi da' ba gož Diosen' chio', nach yesacbe'ede' zjade xtole' cate' yesende' xtiža' yogo'cho, na' yesyetinjde' da' malen' chesonen'. <sup>25</sup> Le yesacbe'ede' Diosen' nombi'e xbab da' chesone' lo' yichjlažda'ogüen', nach yozozoa xibe' yesonxene' Diosen' na' yesene': "Da' licze zoa Diosen' len bene' quinga."

*Cheyała' gonxencho Diosen' binlo na' bi gonchon nacteze*

<sup>26</sup> Bene' migw, cate' chežagle chonxenle Diosen' quinga gonle: Balle de to da' golle gonxenle Diosen', na' balle de da' gwsed gwlo'e lježle, na' balle de da' ba gož Spiritw che Diosen' le'e, na' balle de gwde gwdele diža' da' güe'le da' bi nsedle, na' yeballe chaclaže'le chixjue'ele bi zejen gwde gwdele dižan' ba gwna bene' lježlen'. Naquen' güen gonle yogo' da' ca' con še gonlen ga gaclenen lježle. <sup>27</sup> Na' še nole güe'lenle Diosen' gwde gwdele diža' da' bi nsedle, le güen', perw do chopzle o še šonzle na' tgüeje tgüejle, na' tena' choj bene' yozejni'ide' bi zejen diža' dan' ba be'le. <sup>28</sup> Na' še nono zoa no yozejni'i bi zeje dižan', bi cheyała' güe'le dižan' zižje gan' ndop nžaglen', con lo' lažda'ole na'zen' güe'lenle Diosen' diža', še ca'. <sup>29</sup> Na' še chixjue'ele bi da' ba gwna Diosen', lecze do chopzle o šonzle chojle chixjue'elen šlac ndop nžagle na' yezica'chle bene' yozozenague' na' yesone' xbab še dan' žalen' naquen' lebze len Xtiža' Diosen' dan' nyoj. <sup>30</sup> Na' še šlac tole choe'le diža', Diosen' gwzejni'ide' yetole to da' chixjue'ele, cheyała' cuezle na' güe'le latje chixjue'e ben' yeto dižan'. <sup>31</sup> Yogo'le guac chixjue'ele da' gož Diosen' le'e, perw gonlen tgüeje tgüejle cont yogo'le šejni'ichle na' gaclenen le'e. <sup>32</sup> Na' le'e chyixjue'ele bi da' ba gwna Diosen', cheyała' chixjue'elen con baten' naquen' güen chixjue'elen. <sup>33-34</sup> Le Diosen' chaclaže' gwsa'le binlo da' chonle caten' chdop chžagle chonxenle' na' bi gonlen nacteze.

Na' caten' chdop chžagle chonxenle Criston', cheyała' gwžonle yesoe' no'ol ca' diža' šlac ndop nžagle, can' chesežone' gate'teze chesedop chesežague' chesonxene'ne'. Cheyała' yesenita' no'ol ca' yozozenague', le can' ža leyna'. <sup>35</sup> Na' še bi da' chesaclaže' no'ol ca' yesenezde', guac yesenabde' bene' čegaque' cate' yesyežin ližgaque', le naquen' da' yela' zto' še no'no'ole güe'le diža' šlac ndop nžagcho.

<sup>36</sup> Le gon xbab, gague le'e gocle nechw bene' gwyejnilaže' xtiža' Criston', na' bi načo nezechle ca' bene' chesedop chesežag ga yoble

chesonxene'ne'. <sup>37</sup> Še nole chaquele chac chyixjue'ele bi da' ba gwna Diosen' o še chaquele chaclen Spiritw che Diosen' le'e len bichle da' chonle, nachen' cheyala' gacbe'ele da' quinga chzoja' le'e naquen da' non Xancho Criston' mandadw goncho. <sup>38</sup> Na' note'teze bene' bi chejle'e še Xancho Criston' bene' cont bzoja' da' quinga, bi zaca' šejle'cho che bite'teze da' že'.

<sup>39</sup> Na' quinga naquen bene' migw, le cuec yichjle gaclen Spiritw che Diosen' le'e cont chixjue'ele bi da' na Diosen', na' bi gwžonle yesoe' bene' gwde gwdele diža' da' chnežjw Spiritw che Diosen' yeso'e. <sup>40</sup> Perw binlo gonle yogo' da' chonle cate' chdop chžagle na' bi gonlen nacteze.

## 15

### *Beban Criston' ladjo bene' guaten'*

<sup>1</sup> Bene' migw, chaclaža' gonle xbab che diža' güen che Criston' da' ba be'lena' le'e. Ba bzenagle chen na' zoachachle chejle'len. <sup>2</sup> Na' nezele šjayzoale len Diosen' še soatezle gwzenagle che diža' güen chen'. Na' še bi gwzenagle chen, bibi zejen da' žale chejle'len'.

<sup>3</sup> Diosen' bzende' neda' da' quinga da' zjanaquen la'zelagüe' da' zejen na' bač gwđixjue'edan' le'e. Criston' bnežjw cuine' gote' cont beque'e xtoła'chon' con can' nyoj Xtiža' Diosen'. <sup>4</sup> Nach bosocuaše'ne', na' beyon ža beyas bebane' ladjo bene' guat ca' con can' nyoj Xtiža' Diosen'. <sup>5</sup> Nach jaylo'elagüe' Pedron' na' gwdechle jaylo'elagüe' yezica'chle postlw ca'. <sup>6</sup> Beyoža' jayezlo'elagüe' gwdele gayo' gayoa bene' to ši'ize, bene' chesonxene' le'. Na' zan bene' ca' ne' zjamban, la'czla' bale' ba gosate'. <sup>7</sup> Nach jayzlo'elagüe' Jacobo. Gwde na' jayzlo'elagüe' yogo' postlw ca'.

<sup>8-9</sup> Bzēbte bedyelo'elagüe' neda', zaca'leba' ca' bi' golje cate' bina' žin ža, le cana' bchi bsaca' bene' ca' chesedop chesežag chesonxene' Criston'. Na' da'nana' chacda' bicze zaca' yososi'e neda' postlw. <sup>10</sup> Perw Diosen' nži'ilaže'de' neda' na' gwleje'nda' naca' postlw che', na' choncha' xšinen' clēl ca' bene' lježa' ca' yezica'chle. Na' nežda' gague chonan' neda', san Diosen' chaclene' neda' cont chonan'. <sup>11</sup> Da'nana' bibi nonen še xtiža' nedan' ba bzēnagle o še xtiža' nochle postlw ca', le toze can' chyixjue'eto che Criston' na' can' nac dan' ba chejle'le chen'.

### *Yesyeban bene' guat ca'*

<sup>12</sup> Yogo' neto' chyixjue'eto' beban Criston' ladjo bene' guat ca'. Da'nana' žbixchen' ža balle bi yesyeban bene' guat ca'? <sup>13</sup> Šaca' naquen diža' li dan' žale bi chosban Diosen' bene' guat ca', zejen bi beban Criston' še ca'. <sup>14</sup> Na' šaca' Criston' bi bebane' ladjo bene' guat ca', bibi zaca' xtižen' da' be'lento' le'e na' bibi zejen da' chejnilaže'lene' še ca'. <sup>15</sup> Ba be'lento' le'e diža' güenlaže' gwnato' Diosen' bosbane' Criston' ladjo bene' guaten' šaca' naquen diža' li dan' žale bi chosbane' bene' ba gosat. <sup>16</sup> Le šaca' bi chosbane' bene' ba gosat, lecze bi bosbane' Criston'. <sup>17</sup> Šaca' naquen da' li Diosen' bi bosbane' Criston', bibi zejen da' chejnilaže'chone' na' bi nacho beque'e xtoła'chon'. <sup>18</sup> Šaca' naquen da' li bi bosbane' Criston', ba gosebiayi' yogo' bene' ba gosat bene' gosejnilaže' Criston' še ca'. <sup>19</sup> Na' šaca' da' zoacho lez šjayzoalencho Criston' cate' yeza'cho yežlio nga naquen da' güenlaže', yeļa' zi' xench chac che chio' chejni'ilaže'cho Criston' clēl ca' che yezica'chle bene' še ca'.

20 Perw na' da' li Diosen' bosbane' Criston' ladjo bene' guat ca', na' da'nan' nezecho žin ža yosbane' yezica'chle bene' chesejnilaže'ne' še ba gosate'. 21 Gwxex yela' goten' yežlio nga da' gwzoo' to bene' bene' da' mal, na' lecze ca'czen' goc, to bene' bene' cont žin ža yebancho ladjo bene' guat. 22 Le gwxe yela' goten' cate' Adanna' bene' da' malen', da'nan' yogo' beṇachen' chesate'. Nach Criston' bene' cont yogo' bene' yesaque' txen len le' yesenite' toli tocane. 23 To tocho yebancho ladjo bene' guaten' cont soalencho Criston' con caten' ba bsi'e xnezena'. Criston' gwžialagüe' bebane' ladjo bene' guat ca' na' cate' yide' da' yoble chio' chejnilaže'chone' lecze yebancho ladjo bene' guat še ba gotcho. 24 Nach te che yežlio nga. Na' Criston' gwñitlagüe' yela' chnabia' che yogo' bene' chesegue'ede' Diosen' na' yeque'e yela' chnabia' che yogo' da' xigüe' ca'. Na' yeyožen' Criston' gone' lo na' Xe' Diosen' yogo' da' nłane' chnabi'e na' yogo' non' chnabi'e. 25 Diosen' bžie' bia' zoa Criston' chnabia'che' ca' yogo' bene' ca' na' bichle da' ca', na' Diosen' gone' cont žin ža cate' gwlej gwšošje' bene' ca' na' bichle da' ca' bi cheson txen len le'. 26 Na' cate' yeyož gwlej gwšošje' yogo' bichle da' bi chon txen len le', nach gwcueze' yela' goten'. 27 Diosen' ba nsi'e xnezen' cont yogo'loł da' zjade zjanaquen lo na' Criston'. Perw bi ṇacho zejen Diosen' naque' lo na' Criston', san Diosen' nsi'e xnezen' cont yezica'chle bene' na' bica'chle da' zjade yesaquen lo na' Criston'. 28 Nach cate' ba ben Diosen' cont yogo' da' zjade ba zjanaquen lo na' Criston', nach Criston' gwlo'e lecze le' naque' lo na' Xe' Diosen'. Can' gac cont yogo' beṇač na' yogo' angl yesache'ede' Diosen' naque' Xangaque', na' lecze yesache'e da' xigüe', beyixe' na' bichle da' zjade.

29 Nita' bene' chesezoe' nis gualaz bene' ba gosat. Na' bibi zejen da' chesone' ca' šaca' bi žin ža yesyeban bene' guat ca'.

30 Na' neto' yogo' ža nita' bene' chesaclaže' yesote' neto' da' choe'to' xtiža' Criston', na' bibi zejen zoa chbezto' ca' šaca' bi yesyeban bene' guat ca'. 31 Bene' migw, choa' diža' li chnia' chbechgüeda' ba chejnilaže'le Xancho Jesucriston', na' lecze ca' choa' diža' li chnia' yogo' ža chzanlaže' cuina' gac bi da' gac čhia'. 32 Guac ṇacho bež znia' ba gwdillena' Efeso nga ga ba gosedabaga'chgua bene' neda'. Na' bibi zejen ba bchejda' yogo' da' ba gosonde' neda' šaca' bi yesyeban bene' guat ca'. Na' šaca' bi yesyeban bene' guat ca', yejni'a goncho can' ža dižan' žan: "Ye'ej gagwtezcho, le gwxezen' gatcho."

33 Bi güe'le latje yesonlede' le'e. Da' li can' ža to diža' da' de, žan: "Bene' chejlen bene' cheson da' mal lecze solao gone' can' chesone'na'." 34 Le yeyon xbab šagüe' na' cuejyichjle xbab mal dan' chonlen', le balle biṇa' šejni'ile che Diosen'. Chnia' ca' da' chaclaža' gaquele zto' che da' malen' chonle.

*Cuerp che bene' yesyeban ladjo bene' guat ca'*

35 Balle ṇabljale nac gac yesyeban bene' guat ca' o nac gac cuerp čhegaquen' cate' yesyebane'. 36 Nčhol' yichjlažda'olen' še chaquele bi gac yesyebane' ladjo bene' guat ca'. Nezecho to to xoa' dao' da' chazcho cheyala' yexinjen cont la' yel dao'. 37 Na' caten' chazcho, bi chazcho yel daon', san chazcho xoa', nach chexinjen cont la' yel daon'. Na' can' chac len bi da' chazcho, con xsen' chazcho na' chla' yag dao' čen. 38 Diosen' chone' cont chla' yag dao' dan' chazchon', bi chla' yag yoble da' bi gozcho. 39 Na' gague toze ca' nac cuerp che chio' beṇač len cuerp che be žia tap ṇi'a na'ba'. Nža' cuerp che beṇač na' nža' cuerp che

be žia xil, na' leceze nža' cuerp che be chesaš lo' nis. <sup>40</sup> Nža' cuerp che be nač, nža' cuerp che beyixe', na' nža' da' ca' chle'echo le'e yaban', gwbiž, bio' na' beljw ca'. Na' nža' yela' xdan che be nač na' che beyixe' ca' chesaš lo' yežlion'. <sup>41</sup> Na' nža' ca' chseni' gwbiž, nža' ca' chseni' bio' na' leceze nža' ca' chseni' to to beljw ca'. <sup>42</sup> Nach cate' yesyeban bene' ca' ba gosat, cuerp chegaquen' bi gaquen ca' cuerp da' gosape' cate' gosebane'. Cuerp chegaque' da' bosocuaše' lo' ban' ba beyožon', perw cuerp cobe chegaquen' gague da' te čen. <sup>43</sup> Bibi zaca' cuerp che bene' guat ca', zjanaquen cuerp šen, na' cheyožon', da'nan' hcuaše'chon lo' ba. Perw bene' gosejnilaže' Criston', cate' yesyebane' ladjo bene' guat ca' yesyeyac cuerp chegaque' da' güen juisyw na' da' gual. <sup>44</sup> Cuerp chegaquen' zjanaquen de bela' chen cate' chosocuašen' perw cate' yesyebane' ladjo bene' guat ca' nža' ba zjanac cuerp chegaquen', le yesyeyaquen cuerp cobe da' yeson con can' ža Spiritw che Diosen'. Nezecho cuerp chechon' da' de na'a naquen de bela' chen, na' leceze cheyala' nezecho žin ža cate' yeyaquen da' cobe na' gonon con can' ža Spiritw che Diosen'.

<sup>45</sup> Xtiža' Diosen' nyojen žan Adán bene' goc bene' nechw gwzoe' gwbane' cani'. Na' na'a zoa Criston' zaca'lebde' ca' Adánna', le Criston' chone' yela' mban toli tocaņe. <sup>46</sup> Na'a cuerp chechon' bi naquen to da' chzenag che Spiritw che Diosen', perw žin ža yeyaquen da' cobe na' gwzenaguen che Spiriton'. <sup>47</sup> Diosen' bene' bene' nechw len bište yo cont gwzoe' lo yežlio nga, perw Xancho Criston' ben' zaca'lebde' ca' bene' nechon' ze'e yaba. <sup>48</sup> Na' chio' be nač, cuerp chechon' naquen ca' cuerp che bene' nechon' da' ben Diosen' len bište yo, da'nan' naccho che yežlio nga. Na' chio' chejnilaže'cho Criston', žin ža cate' cuerp chechon' yayaquen da' cobe can' nac cuerp che Criston' bene' za' yaba. <sup>49</sup> Na'a šlac zoacho yežlion' naccho ca' bene' ben Diosen' len bište yo, perw cate' žin ža šjayzoacho yaban', gaccho ca' Cristo ben' za' yaba.

<sup>50</sup> Bene' migw, chnia' le'e bi gac yežincho yaba gan' zoa Diosen' len cuerp chechon' de bela' chen. Da' te che cuerp checho quinga, da'nan' bi gac šjayzoalenchon len Diosen' toli tocaņe. <sup>51</sup> Chnia' le'e to da' nono gwneze cani', gague yogo'chon' gatcho, perw yogo'chon' yeža' can' gaccho. <sup>52</sup> Bedao'nez, ca' bedaon' chžode' yejlaochon', yeža' can' gaccho cate' cuež trompete che Diosen'. Cuež trompetan' na' yesyeban yogo' bene' ba gosat bene' gosejnilaže' Criston'. Na' cuerp chegaquen' yesyeyaquen da' cobe da' bi yesat na' leceze ca' chio' ne' mbancho yeža' cuerp chechon'. <sup>53</sup> Le cuerp chechon' da' mbancho yežlio nga da' te čen. Naquen da' chat, na' cheyala' yayaquen da' cobe da' bi gat, da' bi gožo' na' da' bi te che. <sup>54</sup> Cate' ba beyac cuerp chechon' da' cobe da' bi gat na' bi te čen, cana' ba goc can' nyoj Xtiža' Diosen' gan' žan: "Diosen' gwzoede' bcueze' yela' goten', na' chone' yela' mban toli tocaņe. <sup>55</sup> Bich soe yela' goten' chio' da' yoble. Gwbatech gatcho šo'cho lo' ba." <sup>56</sup> De yela' got checho na'a le chio' be nač choncho da' mal. Da' neze chio' be nač can' ža ley che Diosen' cheyala' goncho na' bi chzenagcho gonchon, da'nan' chnabia' da' malen' chio'. <sup>57</sup> Choxclen Diosen' gwsele' Xancho Jesucriston' beque'e xtoła' chio' chejnilaže'chone'. Da'nan' bi soe yela' goten' chio', san de yela' mban toli tocaņe checho.

<sup>58</sup> Da'nan' bene' migw chia', chacda' le'e na' chneyoeda' le'e le soačhačh len toze xbab. Na' le gonchgua xšin Xancho', le nezczecho cate' choncho

xšinen' chejnilaže' chone', gague da' chondadzchon'.

## 16

*Beñe' Corinto chosotobe' mechw cont yesaclene' beñe' Jerusalén ca'*

<sup>1</sup> Nach ñia' naquen' gonle cate' gwtoble mechw da' gaclenen beñe' ca' chesejnilaže' Diosen' Jerusalénna'. Le gon can' bena' mandadw yeson beñe' ca' chesedop chesežag chesonxene' Criston' to to yež da' zjachi' distritw Galacia. <sup>2</sup> Yogo' ža dmigw to tole cheyała' cuejle late' güeje mechw según gaca'te' benle gan lagüe' xman. Na' co'ošagüe'le mechon' cont den cate' yida' gan' zoale na' gague za' gwtoblen cate' yedena'a le'e. <sup>3</sup> Nach cate' la'a gan' zoalen', cana' gwzoja' cart da' yesoxe' beñe' ca' chaclaže'le šjasesane' xmechwlen' Jerusalénna'. <sup>4</sup> Na' še chonen byen ša'a, cuina' čhi'a legaque' Jerusalénna'.

*Pablon' chone' xbab šjañe'e beñe' Corinto ca'*

<sup>5</sup> Na' yida' gan' zoale cate' yeyož yedia' Macedonia, le cheyała' šjajna'a beñe' lježcho ca' nita' na'. <sup>6</sup> Na' chacda' yega'anlena' le'e do thio' do čhop bio' o še yega'ana' doxen tiemp zag, nach gaclenle neda' cate' yeza' ša'a gate'teze ša'a. <sup>7</sup> Bi chaclaža' yedena'a le'e na'a, le con teza' še ba za'a, na' chaclaža' soa' sša len le'e cate' yida' še Xancho Diosen' gonšque' latje. <sup>8</sup> Chaclaža' yega'ana' Efeso nga žinch ža gała' ĩni dan' že' Pentecostés. <sup>9</sup> Le beñe' zan že' nga beñe' chesaclaže' yosozenagüe' che Criston' na' lecze že' beñe' zan beñe' bi chesaclaže' chixjue'eda' xtižen'.

<sup>10</sup> Na' še la' Timoteon' gan' zoalen', le gwlebe' na' le gwzenag che' cont bi žebe' gwsed gwlo'ede' le'e, le can' chona' xšin Xancho Diosen', lecz can' chonen'. <sup>11</sup> Ne tole bi cheyała' gonle xbab bibi zaca' da' chsed chlo'ede', san soale güen len le' na' gaclenle' cate' yeze'e cont yeyede' gan' zoa' nga to šagüe' to güen, le chbeza'ne' txen len yezica'chle beñe' lježcho ca'.

<sup>12</sup> Na' ca' nac Apolosen', gota'yoeda'ne' lecze šejlene' Timoteon' gan' zoalen', txen len yezica'chle beñe' lježcho ca' yesaclene' le'. Perw bi chaclaže' šeje' na'a, na' šeje' cate' soe' to latje.

*Yeto čhope diža' da' choe'len Pablon' beñe' Corinto ca'*

<sup>13</sup> Le soa le na' can' chonlen', na' le soa len toze xbab šejnilaže'le Criston'. Bi žeble, san le soačač gonle can' chazlaže' Diosen'. <sup>14</sup> Na' le gague lježle bite'teze da' chonle.

<sup>15</sup> Beñe' migw chia', nezele beñe' ca' že' liž Estéfanos gosaque' beñe' nechw gosejnilaže' Criston' distritw Acayan' na' ba gosaclenchgüe' yezica'chle beñe' lježcho beñe' chesejnilaže'ne'. <sup>16</sup> Da'n'an' chñeyoeda' le gwzenag čhegaque' na' gonle can' chesenen', na' le gwzenag che nochle beñe' cheson xšin Diosen' na' chesaclene' beñe' lježcho ca' can' chesone'na'. <sup>17</sup> Chebeda' ba besela' Estéfanos, Fortunato, na' Acaico gan' zoa' nga. Legaque' ba gosaclene' neda' cont bich chacyaše'da' dan' bi zoale nga len neda'. <sup>18</sup> Ba gosone' cont beyaclaža' can' ba gosoncze' len le'e cana', na' da'n'an' cheyała' güe'cho yela' choxclen čhegaque' che dan' ba gosonen'.

<sup>19</sup> Beñe' ca' chesedop chesežag chesonxene' Criston' doxen distritw Asian' chosoguape' le'e tiox. Na' Aquila na' Priscila na' beñe' ca' chesežag ližgaque' chesonxene' Criston' lecze chosoguapchgüe' le'e tiox. <sup>20</sup> Nach yogo' beñe' lježcho že' nga chosoguape' le'e tiox. Na' cate' chdop chžagle



txen, le gwnopa' na' lježle cate' gwguap lježle tiox cont gacbia' chaque lježle.

<sup>21</sup> Cuincza' neda' Pablo chzoja' late' dao' le'e cart nga chguapa' le'e tiox.

<sup>22</sup> Na' še ne' nchiže balle bi chaquele Xancho Jesucriston', Diosen' gone' cont cuiaye'e toli tocaņe. Xancho Jesucristo, yidšco' da' yoble.

<sup>23</sup> Gaclenšca Xancho Jesucriston' le'e. <sup>24</sup> Chacda' yogo'le da' naccho txen chejnilaže'cho Cristo Jesúsén'. Da' na'zen' žia' le'e.

## **CART GWCHOPE DAN' BZOJ POSTLW SAN PABLO CHE BEÑE' CA' ŽE' CORINTO**

*Postlw Pablo chzoje' bene' chesonxen Jesucriston' ciuda Corinto*

<sup>1</sup> Neda' Pablo naca' postlw che Jesucriston', le can' chaclaže' Diosen'. Chzoja' cart nga che le'e chdop chžagle chonxenle Diosen' lo ciuda Corinto, na' che note'tezechle bene' že' doxen distritw Acaya bene' ba gwlej Diosen' cont zjanaque' lo ne'e. Neda' len bene' migw checho Timoteo chgupto' le'e tiox. <sup>2</sup> Na' chnabeto' Xacho Diosen' na' Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlažda' olen'.

*Da' ca' gwdi gwxaca' Pablon'*

<sup>3</sup> Cheyala' soacho gonxencho Diosen', le naque' Xa Xancho Jesucriston', na' Jesucriston' lecze chonxene' le'. Xacho Diosen' cheyaše' cheži'ilaže'de' chio' na' len' cheyoe'xene' chio' cate' chac bi da' chac checho. <sup>4</sup> Ba cheyoe'xene' neto' len yogo' da' chzaca'zi'to' cont chac cheyoe'xento' yezica'chle bene' cate' bi da' cheseyi chesezaque'. Can' cheyoe'xen Diosen' neto', lecze can' cheyoe'xento' bene'. <sup>5</sup> Leca chyi chzaca'to' can' gwdi gwxaca' Criston', na' ca'cze leca cheyoe'xen Diosen' neto' da' chejnilaže'to' Criston'. <sup>6</sup> Da' zan da' chac cheto' da' chsed chlo'eto' xtiža' Diosen', perw zaca'czen' cont cheyoe'xento' le'e len da' chzaca'zi'le na' chaclenen le'e cont šjazyoale len Diosen'. Na' cheyoe'xen Diosen' neto' cate' bin' chac cheto', cont lecze neto' cheyoe'xento' le'e len bi da' chac chele. Na' cheyoe'xento' le'e cont chzoele cate' chzaca'zi'le can' lecze chzaca'zi' neto'. <sup>7</sup> Chbezto' gwyo gwchejle da' chac chele, le nezeto' caten' chzaca'zi'le can' chzaca'zi' neto', Diosen' lecze cheyoe'xene' le'e can' cheyoe'xene' neto'.

<sup>8</sup> Bene' migw, chaclaža' nezele can' gwdi gwxaca'to' caten' gwzoato' distritw Asia. Gwdi gwxaca'chguato', con bich bi goc gonto' na' bento' xbab gatzeto'. <sup>9</sup> Da' li bento' xbab lo' yichjlažda'oto' ba za' yela' goten'. Na' goc cheto' ca' cont gocbe'eto' bi soeczeto' gwyo gwchejto' dan' chzaca'zi'ton' san cheyala' šejnilaže'to' Diosen' cont gone' chač laže'to', Dios ben' chosban bene' guat ca'. <sup>10</sup> Na' caten' bento' xbab gatzeto' catec da' gosonde' neto', Diosen' bosle' neto' cont bi gotto' na' ne' choslacze' neto' na'a. Na' zoato' lez yoslache' neto' bate'teze. <sup>11</sup> Zoato' lez yoslacze' neto' con še gaclenle neto' yol güižlene' cheto'. Na' še zanle gonle ca', nach lecze zanle güe'le yela' choxclen che' cate' ba goclene' neto'.

*Pablon' gwžede' šeje' ciuda Corinto*

<sup>12</sup> Chbeda' choa' diža' can' chonto', le nezeto' lo' lažda'oto' chonto' güen len le'e do yichj do laže'to' na' lecze len note'tezechle bene'. Bi nacho chonto' güen neče da' nacto' bene' sina', san da' nži'ilaže' Diosen' neto', da'nant' chaclene' neto' chonto' güen len yogo'lol bene'. <sup>13</sup> Cart quinga chzojto' le'e, bi gonle xbab še naquechle zejen, san šejni'ilen con can' nyojen, na' zoa' lez šejni'ilen binlo. <sup>14</sup> Na' zoa' lez žin ža cate' gacbe'eyane' le cont yebele güe'le diža' nacle neto' txen, can' ba chache'ele late' dao' na'a.

Na' cate' žin ža yid Xancho Jesús'en' da' yoble, yebele güe'le diža' nacle neto' txen na' neto' yebeto' güe'to' diža' nacto' le'e txen.

<sup>15</sup> Cana' godca' yedena'a le'e cont da' yechop ni'a soacho txen, le bena' xbab yebele yedena'a le'e. <sup>16</sup> Goclaža' tia' yedena'a le'e caten' gwy'a'a Macedonia na' lecze goclaža' yedia' gan' zolna' cate' beza' Macedonian'. Na' godca' yeyoža' gaclen le neda' yeya'a Judean'. <sup>17</sup> Do laža' godca' gona' ca', gague chona' con can' žan chia' ca' cheson bal bene' bi cheseni laže' Diosen', to chesene' yesone' to da' yesone' na' to chesene' bi yesonen'. <sup>18</sup> Ca' Diosen' chone' con can' že', lecze ca' neto' chnato' do laže'to' cate' chnato' to da' gonto'. <sup>19</sup> Na' lecze Jesucriston' bene' naque' Xi'in Diosen', toz can' naque' bate'teze, na' nac da' li yogo' can' gwnen', con can' gwduxjue'eto' xtižen' len le'e, neda', Silvano na' Timoteo. <sup>20</sup> Na' yogo' da' güen da' ba gwna Diosen' gone', nezecho gonon' da' gwsele' Jesucriston'. Da'n'an' len yela' chaclen che Jesucriston' chonxencho Diosen' che'chone': "Gacšca ca'." <sup>21</sup> Na' Diosen' chone' cont neto' na' le'e zoachachcho chejnilaže'cho Criston'. Na' bene' chio' Spiritw che'na' cont gac goncho xšinen'. <sup>22</sup> Na' lecze zoa Spiriton' lo' yichjlažda'ochon' cont nezecho Diosen' ba gwque'e chio' ca' xi'ine' na' cont nezecho yogo' da' güen da' gwne' gone', žin ža cate' gonon'.

<sup>23</sup> Da' biža' yida' da' yoble Corinto gan' zualen' yedena'a le'e can' gwnia' gona', biža' yida' cont bi yedetila' le'e che da' malen' chonle. Diosen' nombi'e yichjlažda'ogua' na' nezde' choa' diža' li chnia' ca'. <sup>24</sup> Nezetog' gague neto' ye'to' le'e da' ni da' na' šejle'le. Ba zoachachle chejnilaže'le Criston', na' neto' con chaclento' le'e cont soachle mbalazch.

## 2

<sup>1</sup> Ca' goquen' bechoglaža' bi yedena'a le'e, le goche'eda' šaca' bedena'a le'e gocyashe'cho. <sup>2</sup> Na' šaca' bena' cont gocyashe'le, nono zoa no yeyon cont yezoa' mbalaz, le ba bena' cont gocyashe'laže'le še ca'. <sup>3</sup> Bzoja' carten' ca' cont cate' yida' gan' zolna' bich gonle da' mal da' gonon gacyashe'da', le cheyala' gonle cont yebeda'. Na' zoa' lez lecze mbalaz soa le'e cate' gonle soa' neda' mbalaz. <sup>4</sup> Bzoja' le'e do chegüne'laža', da' gwzoachgua' gocyashe'da' che dan' chonlen', na' gwchežchgua' chele. Na' da' bzoja' carten' ca', gague gwzelaža' yegüne'le, san gwzelaža' gache'le leca chacda' le'e.

*Gwne' cheyala' yesyezi'xene' che bene' ben da' malen'*

<sup>5</sup> Da' li gocyashe'da' can' ben bena' ben da' malen', perw gague neda'zen' gocyashe'da'. Yogo'czle ba gocyashe'laže'le late' güeje can' ba goquen'. Chnia' gocyashe'le late' güeje cont bi nia' benche' chio' zi'ch ca' cheyala' nia'. <sup>6</sup> Ndog' nžagle txen gwchoglaole castigw che', na' da' na'zen' cheyala' si'e. <sup>7</sup> Bich güe'ne' castigw, san yezi'xenle che' na' le gon chach laže' cont soede' yela' chacyashe'laže' chen' na' bi cuejyichje' Diosen'. <sup>8</sup> Da'n'an' chneyoeda' le'e le gon cont gache'ede' chaquelene'. <sup>9</sup> Ba bzoja' le'e cana' cont gwnezda' naquen' chonle, še chzenagle chia' len yogo' dan' gwnia' gonle. <sup>10</sup> Na' na'a chaclaža' nezele note'teze bene' chezi'xenle che', lecze neda' chezi'xena' che'. Na' cate' chezi'xena' che bene', še zoa da' cheyala' yezi'xena', chezi'xenan' lao Criston', na' ba bezi'xena' che bena' cont chaclena' le'e. <sup>11</sup> Na' chezi'xencho che bene' cont Satanás dan' chnabia' da' xigüe' ca' bi soen gonon' chio' gan, le nezecho can' chaclažen' siye'czen chio'.

*Pablon' goclaže' yežague' Titon'*

<sup>12</sup> Cate' bžina' Troas gan' gwdixjue'eda' diža' güen che Criston', nachbia' Diosen' ba bene' cont bene' že' na' gosaclače' bosozenague'. <sup>13</sup> Perw benchgua' xbab che bene' migw checho Titon' da' bi bžine' na'. Da'n'an' goša' bene' ca': "Nayežagčo", na' beza' beya'a distritw Macedonian'.

*Zoacho mbalaz da' nombia'cho Criston'*

<sup>14</sup> Choχclden Diosen', none' cont Jesucriston' ba bebeje' chio' lo' na' gwxiyen' na' mbalaz cheche'e chio' soacho len le'. Na' gate'teze zoacho, Diosen' chone' cont chesache'e bene' naquen da' güen juisyw nombia'cho Criston'. <sup>15</sup> Diosen' chebede' choncho cont chesache'e bene' naquen da' güen juisyw yesejnilaže' Criston'. Na' bale' chesejnilaže'ne' na' de yela' mban chegaque' toli tocaņe, na' yebale' bi chesejnilaže'ne' na' chesebiaye'e. <sup>16</sup> Na' bene' ca' chesebiayi' bi chesyebede' can' chonchon', le che'chone' yesebiaye'e. Na' bene' chesejnilaže'ne' chesyebede', le ba goclenchone' cont ba de yela' mban chegaque' toli tocaņe. Perw chio' bi chaccho to gualazcho gwlo'echo bene' ca' güenna' naquen yesejnilaže' Criston'. <sup>17</sup> Bene' zan chosoše'e diža' da' cheso'e che Diosen' cont chesyebe bene' len xtiža'gaque' na' chosonežjue' legaque' mechw. Neto' bi chonto' ca', san do laže'to' choe'to' diža' lao Diosen' da' nacto' Criston' txen, le Diosen' gwsele' neto' choe'to' xtižen'.

### 3

*Da' cobe da' gwna Diosen' gone' cont gaclene' beņachen'*

<sup>1</sup> Bi gonle' xbab chonxen cuinto' choe'to' diža' quinga. Nezele chonto' xšin Diosen' do laže'to', na' bi chyažjen goxe'to' cart cont nezele nac nacto', na' neca chyažjen gwzozle cart da' goxe'to' cate' šejto' ga yoble. <sup>2</sup> Chaqueto' le'e da' gwdixjue'eto' xtiža' Criston' len le'e cont gwyejnilaže'lene'. Na' yogo'ze bene' guac yesele'ede' can' ba boša' yichjlažda'olen' na' guac yesenežde' can' chonto' xšin Diosen'. <sup>3</sup> Gwyejnilaže'le Criston' caten' be'lento' le'e xtižen', na' Spiritw che Diosen' bocoben yichjlažda'olen'. Na' da' nachbia' becobe yichjlažda'olen' zaca'chen ca no cart da' nyoj to le'e yiš o ca ley che Diosen' da' nyoj to le'e yej.

<sup>4</sup> Cheyaxjeto' žato' ca' le Criston' zoe' chaclene' neto' cont nezeto' chonto' can' chazlaže' Diosen'. <sup>5</sup> Nezeto' bi chac bi gonto' to gualazto', na' nezeto' gague neče bi da' ba ben neto' bchoj xšin Diosen' güen, le Diosen' chone' cont chac bite'teze da' chac. <sup>6</sup> Na' Diosen' ba bene' cont chac chyixjue'eto' da' coben' da' gwne' gone' gaclene' chio' beņach. Na' da' coben' bi naquen ca ley che' dan' byoj cani' chzejni'in chio' beņach cuiayi'cho yela' güen da' mal chechon', san na'a Spiritw chen' chonen yela' mban toli tocaņe che chio' chejnilaže'chone'.

<sup>7</sup> Cate' Diosen' bnežjue' da' Moisésen' ley che' dan' byoj le'e yej ta'a ca', bene' cont bene' Israel ca' gosache'ede' ley chen' naquen da' zaca'. Na' cana' catec goctitechgua cho' alao Moisésen', bi goc yesena' bene' Israel ca' cho'alagüen', la'czla' gwdechle bega'a yela' chactiten' šolaže'. Na' ley nan' con bzejni'in beņachen' cuiayi'cho yela' güen da' mal chechon'. <sup>8</sup> Da'n'an' nezecho leca zaca'ch da' chon Spiritw che Diosen' na'a cont gata' yela' mban checho toli tocaņe. <sup>9</sup> Diosen' blo'e yela' zaca' che ley chen' la'czla' bzejni'in chio' beņach si'cho castigw da' bi choncho can' žanna'. Na' zaca'ch xtiža' Diosen' da' de na'a da' chzejni'in cheyone' chio' bene' güen. <sup>10</sup> Da' naquen da' zaca'chgua cani', bičh naquen da' zaca' na'a, le ba de yeto' da' zaca'chgua da' xench. <sup>11</sup> Na' da' blo'e Diosen' yela' zaca' che da'

ben žin šložze cani', cheyała' gacbe'echo leca da' xench zaca' da' coben' da' bi te che.

<sup>12</sup> Na' da' nezeto' gague da' te che da' cobe da' ba gwduxjw Diosen' cont chaclene' benačhen', da'nan' bi chedi'ito' chyixjue'eto' xtižen' sin cbi chžebto'. <sup>13</sup> Da' Moisésen' bcuaše' cho'alagüen' len to lache' bxin cont bene' Israel ca' bi besele'ede' chenit late' güeje yela' chactit che cho'alagüen'. Perw na'a gague hcuaše'to' yela' zaca' che da' chon Diosen'. <sup>14</sup> Bene' Israel gualaž čheto' ca' bi gosejni'ide', ne ža na'aža bi chesezejni'ide' cate' chosolabe' ley dan' byoj cani' gan' nyoj da' ca' gwna Diosen' gone' gaclene' legaque'. Con bene' ca' chesejnilaže' Criston' chesejni'ide' bi zejen. <sup>15</sup> Ža na'aža cate' bene' Israel gualaž čheto' ca' chosolabe' da' ca' bzoj Moisésen', zjanaquen ca to da' ngaše' len legaque' yela' bi chejle' čhegaquen'. <sup>16</sup> Perw note'teze' cate' chesejnilaže' Xancho Criston', da' ca' zjanyoj bich chesaquen ca to da' ngaše' len legaque'. <sup>17</sup> Xancho Criston' naque' toze len Spiritw che Diosen'. Na' cate' ba zoa Spiritw che Xancho' lo' yichjlaždao' bene', bač zoe' binlo len Diosen'. <sup>18</sup> Yogo' chio' chejnilaže'cho Criston', yela' zaca' juisyw che Xancho Criston' bich ngašen' len chio', na' ba zejech cheyaquechcho bene' güen can' nac le', le zoa Spiritw che Xancho Criston' lo' lažda'ochon' chocoben xbab chechon'.

#### 4

<sup>1</sup> Diosen' beyaše' beži'ilaže'de' neto' na' gwleje' neto' cont chyixjue'eto' xtižen'. Da'nan' bi cheche'eto' chyixjue'eton'. <sup>2</sup> Na' bibi chonto' багаše'ze ca no da' nac da' yela' zto'. Bi chonleto' bene' na' neca choša'to' xtiža' Diosen' cont yesybe bene' chosozenag xtiža'ton'. San chle'ecze Diosen' chyixjue'eto' xtižen' con can' naquen cont yogo' bene' yesene xtiža'ton' yesenezde' lo' lažda'ogaquen' choe'to' diža' li. <sup>3</sup> Con bene' ca' ba zjambiyi' yela' bi chejle' čhegaquen', legacze' bi chesejni'ide' diža' güen dan' choe'lento' legaque'. <sup>4</sup> Le bene' bi chesejle' xtiža' Diosen' chosozenague' che Satanás dan' chnabia' da' xigüe' ca' latje da' yosozenague' che Diosen', na' Satanásen' chonen cont nchol' yichjlažda'ogaquen'. Da'nan' diža' güen che Criston' bi chsenin' lo' yichjlažda'ogaquen' ca to be'ni' cont yesenezde' Criston' naque' bene' zaca' juisyw. Cayane' nac yichjlaždao' Diosen' nac yichjlaždao' Criston', na' toz can' chesone'. <sup>5</sup> Na' ca nac diža' da' chyixjue'eto', chyixjue'eton' gague cont gwzenagle che neto', san cont gwzenagle che Jesucriston' ben' naque' Xancho. Na' da' chaqueto' Jesucriston', zoato' chonto' bite'teze da' chaclenen le'e. <sup>6</sup> Na' Dios ben' gwne' gata' be'ni' yežlio nga gan' goc chol', ba gwlo'e be'ni' chen' lo' yichjlažda'ochon' cont nombia'cho Jesucriston' ben' nac bene' zaca' juisyw, na' cate' ba nombia'chone' chache'echo can' nac yela' bene' zaca' che Diosen'.

*Pablo cho'e xtiža' Diosen' lagüe' da' chejnilaže'ne'*

<sup>7</sup> Cuerp checho quinga da' chesat zjazaca'leben ca to che'e nis da' naquen de gona'. Perw Diosen' ba gwlo'e be'ni' chen' lo' yichjlažda'ochon' na'a šlac ne' mbancho len cuerp checho quinga cont gacbe'echo bibi chac goncho še bi gone' yela' guac xen chen' cont gac bi da' goncho. <sup>8</sup> Na' neto', da' zan da' chy chzaca'to', perw bi chbejyichjto' xšin Diosen'. Zan ni'a bi chežellaže'to' nacle gonto', perw nezeto' Diosen' chaclene' neto'. <sup>9</sup> Chosolagšibe' neto', perw Diosen' bi chbejyichje' neto'. Chosoči chososaque' neto', perw Diosen' bi cho'e latje yesote' neto'. <sup>10</sup> Gate'teze

chejto', con yogo' ni'a chosoči chososaca' beñe' neto' na' chesaclaže' yesote' neto' can' gosote' Jesúsén'. Na' Diosen' cho'e latje chac cheto' ca' cont nacbia' zoacze Jesúsén' chaclene' neto' ślac mbanto' len cuerp cheto' quinga. <sup>11</sup> Na' ślac ñe' mbanto', yogo' ža nita'cze beñe' chesaclaže' yesote' neto' lagüe' da' chyixjue'eto' xtiža' Jesúsén'. Na' chac cheto' ca' cont nacbia' zoacze Jesúsén' chaclene' neto' ślac mbanto' len cuerp cheto' quinga da' yesat. <sup>12</sup> Can' chac, tža tža chesaclaže' yesote' neto', san le'e ba de yela' mban chele toli tocañe.

<sup>13</sup> Xtiža' Diosen' nyojen žan: “Chejnilaža' Diosen' na' da'nán' choa' diža' che'.” Na' ca ben' bzoj da'na' gwyejnilaže' Diosen', ca'czen' chejnilaže'to'ne' na' da'nán' choe'to' xtižen'. <sup>14</sup> Le ñezeto' Dios ben' bosban Xancho Jesúsén' ladjo beñe' guat ca' lecze žin ža yosbane' chio' še ba gotcho, na' neto' txen len le'e šjayzoacho gan' zoe'na'. <sup>15</sup> Neche le'e bžaglaoto' yogo'lol' da' ba goc cheto'. Le chaclaže'to' gac zancho gaclenchgua Diosen' chio' cont šejnilaže'cho Xancho Jesúsén', na' lecze gac zancho güe'cho yela' choxcen che' catec beñe' zacan' naque'.

<sup>16</sup> Da'nán' bi chjaxe'que'laže'to'. La'czla' tža tža zej chaxo'ch cuerp cheto' quinga, lecze tža tža Diosen' chocobche' yichjlažda'oto'. <sup>17</sup> Yob te che bite'teze da' dao' da' chžaglaoch yezlio nga. Na' da' ca' chyizaca'cho chesaclenen chio' cont soacho mbalaz juisyoch cate' šjayzoacho len Diosen' toli tocañe, na' lenña' da' zaca'ch ca bite'tezchle. <sup>18</sup> Nachen' bi chi' yichjcho che' da' chle'echo yezlio nga, san chi' yichjcho che' da' bi chle'echo. Le yesede che' da' ca' zjade yezlio nga da' chle'echo, na' da' ca' bi chle'echo, gague da' yesede chegaquen, nita'czen toli tocañe.

## 5

<sup>1</sup> Cuerp chechon' zaca'leben ca to yo'o da' bi chzibia'. Na' ñezecho še ba byinjen, Diosen' ba none' to yo'o güen checho yaban' da' soa toli tocañe; na' lenña' gague naquen to da' ben beñach. <sup>2</sup> Na' ślac ñe' zoacho mbancho yezlio nga, chbežyaše'cho lo' lažda'och zelaže'chguacho šjayzoacho lo' yo'o da' non Diosen' checho yaban'. <sup>3</sup> Chona' xbab cuerp çobe da' gone' zaca'leben ca to xacho da' chyažjen chazcho cate' yežincho yaba. <sup>4</sup> Da' li chio' ñe' chžaglaoch len cuerp checho quinga chbežyaše'cho lo' lažda'ochon'. Gague da' chaclaže'cho gatcho, san chaclaže'cho yeža' cuerp checho quinga da' te chen len to da' soa toli tocañe. <sup>5</sup> Na' Diosen' gwleje' chio' cont šjayzoacho len le' na' gwsele' Spiritw chen' zoan lo' yichjlažda'ochon' cont ñezecho dech da' gone' checho.

<sup>6</sup> Da'nán' bi chacžejlaže'cho, le ñezecho ślac mbancho len cuerp checho quinga bina' šjayzoacho len Xancho Criston'. <sup>7</sup> Na' la'czla' bina' le'echo da' ca' gone' checho, zoacho chejnilaže'chone'. <sup>8</sup> Na' da'nán' bi chacžejlaže'cho, le chaclaže'cho cuejyichjcho cuerp checho quinga cont šjayzoacho len Xancho Criston'. <sup>9</sup> Nachen' zoacho choncho da' chazlaže' cont yebede' chio' ślac ñe' mbancho na' cate' ba gotcho. <sup>10</sup> Le to tocho cheya'la' techo lao Criston' gan' chone' yela' justisen' cont çogbi'en checho na' gone' soacho mbalaz o saca'zi'cho con can' ba bencho ślac mbancho, še bencho da' güen o da' mal.

*Benachen' guac yesenite' binlo len Diosen'*

<sup>11</sup> Na' dan' ñezeto' yogo'cho yodecho cuent lao Xancho Criston' che yogo'lol' da' ba bencho, da'nán' chñeyoeto' beñe' yosozenague' che'. Diosen' ñezde' do laže'to' chñeyoeto' beñe' yosozenague' che', na' zoa' lez

lecze le'e chacbe'ele lo' lažda'olen' zoato' chonton' do laže'to'. <sup>12</sup> Bi nacho chonxen cuinto' da' yoble dan' chnia' ca', san chnia' ca' cont yebele can' chonton' na' nezele naquen' yoži'ile xtiža' bene' ca' chesenelagüe' cheto'. Bene' ca' chesa'laže' da' ba zjansede' na' da' zjanaque' no zjanaque'. Bibi xbab chesone' che can' nac yichjlažda'ogaquen'. <sup>13</sup> Še chaquele chactontto' can' ba benton', le gon xbab bento' con can' gwna Diosen'. Na' še chaquele zoašagüe'cze yichjlažda'oto', le gon xbab chonto' bi da' chonto' cont chaclento' le'e. <sup>14</sup> Leca chaque Criston' chio' na' da'nan' chonto' xšinen'. Na' nezecho toz Criston' bnežjw cuine' gote' neče yogo'cho, na' da' naccho txen len le' guac nacho yogo'cho ba gotcho len le'. <sup>15</sup> Bnežjw cuine' gote' neče yogo' chio' benach, cont soa cuezcho goncho can' chazlaže' na' bich soa cuezcho goncho con ca žan checho. Gote' na' bebane' ladjo bene' guaten' neče chio'. <sup>16</sup> Neto' cate' biña' šejnilaže'to' Criston' goqueto' bibi zaque', le bento' xbab zaca' bene' še no naque' lo yežlio nga o še bi da' de che'. Perw na'a bich chonto' xbaden' ca' che Criston' o che note'teze bene'. <sup>17</sup> Na' note'tezcho še naccho Criston' txen, Diosen' ba bocobe' yichjlažda'ochon'. Na' bich chebecho da' ca' bebecho cana' na' bich choncho can' bencho cana'. Zoacho ca bene' cobe.

<sup>18</sup> Diosen' bozoe' chio' binlo len le' na' bene' cont beyaccho ca bene' cobe cate' gwyejnilaže'cho Criston'. Na' gwlo'e lo na'cho ye'cho bene' can' yesenite' binlo len Diosen'. <sup>19</sup> Ye'cho legaue' Diosen' gwsele' Criston' cont note'teze bene' yesejnilaže' le' yesenite' binlo len Diosen', na' Diosen' bich gone' cuent che da' xinj dan' ba gosone'. Can' cheyala' ye'cho bene' cont yesenite' binlo len Diosen'. <sup>20</sup> Criston' gwsele' chio' ca cuine' na' Diosen' chaclaže' neyoecho bene' ca cuincze Criston' chneyoede' legaue', ye'chone': "Le soa binlo len Diosen'." <sup>21</sup> Criston' bibi da' mal bene'. Perw na' Diosen' bene' cont Criston' gwxaca'zi'e neče xtoła'chon' cont none' chio' bene' güen da' chejnilaže'chone'.

## 6

<sup>1</sup> Neto' chonto' xšin Diosen' txen len le'. Da'nan' chneyoeto' le'e, le gon can' chazlaže' Diosen' cont gwlo'ele naquen to da' zaca'chgua da' beyaše' beži'ilaže'de' chio'. <sup>2</sup> Nyoj can' gwne':

Cate' bžin ža goc da' bžia' bia', cana' bzenaga' chio'.

Na' cate' bžin ža benan', cana'chen' goclena' le'.

Na' dan' nyojen ca' zejen na'a bač bžin žan' chaclen Diosen' benachen', le ža na'aža chnežjue' yela' mban toli tocañe che bene' chesejnilaže' Jesucriston'.

<sup>3</sup> Bi chonto' bite'teze da' gwžon cont bene' bi yesejnilaže'ne', le chaclaže'to' bibi gata' da' yesenelagüe' bene' che xšin Diosen' da' chonto'.

<sup>4</sup> Da'nan' bite'teze da' chonto' chlo'eto' chonto' xšin Diosen' ca cheyala'. Chyo chchejto' cate' chosochi chososaca' bene' neto', cate' chzaca'zi' chzaca'yaše'to', na' cate' za'ac bichle da' mal len neto'. <sup>5</sup> Zoa cate' goseyine' neto', cate' goseyixjue' neto' ližya, na' cate' gosebeque' žaš che xtiža'ton'. Zan las bento' žin gual, na' gwlejto' bišgal na' gwbił gwdonto'.

<sup>6</sup> Na' da' chi' yichjto' chonto' xšin Diosen' can' chazlažen', bitw bi da' yela' zto' chonto'. Chzejni'ito' bene' len yela' chejni'i che Diosen', napt'o yela' chxenlaže' len yogo'loł bene' na' chonto' güen len yogo'lole'. Chonto' con can' chzejni'i Spiritw che Diosen' neto', na' do laže'to' chaqueto' yogo'loł bene'. <sup>7</sup> Zoato' chzejni'ito' bene' diža' li, na' chonto' yogo'loł

da' chonto' len yeł'a' guac che Diosen'. Na' da' zoato' chonto' da' zej to li'cha, chaclenen cont soeto' tillento' da' malen' na' cont bi gwzenagto' che gwxiyen'. <sup>8</sup> Zoato' chonto' xšin Diosen' can' chazlaže' cate' chesonxen bene' neto' na' cate' chesegue'ede' neto', cate' chesene' güen cheto' na' cate' chesene' mal. Choe'to' diža' li, cate' bene' chesejle'e cheto' na' cate' bene' chesacde' chonł'aže'to'. <sup>9</sup> Bał bene' bi chesejle'e chonto' da' zaca', perw yebałe' zjanezde' chonto' da' zaca'. Zan las chonto' xbab gatzto', perw ne' mbanto'. Na' la'czł'a' yogo' da' ca' chac cheto', biña' yesote' neto'. <sup>10</sup> Da' zan da' chac cont gacyaše'to', perw chbeto' lo' lažda'oton'. Nga'anyaše'to', perw chonto' cont bene' zan nite' mbalaz. Na' la'czł'a' bibi de cheto', yogo'loł' bi da' de naquen cheto' da' nacto' Criston' txen.

<sup>11</sup> Le'e bene' Corinto, bačh be'lento' le'e yogo' diža' da' yo'o lo' lažda'oton', le chacchgüeto' le'e. <sup>12</sup> Nži'ilaže'to' le'e, perw le'e bitec nži'ilaže'le neto'. <sup>13</sup> Chata'yoeda' le'e ca chon to bene' len xi'ine', le gaque neda' ca chacda' le'e.

*Spiritw che Diosen' zoan lo' yichjlaždao' chio' chejnilaže'chone'*

<sup>14</sup> Bi cheyał'a' gaccho txen len bene' bi chesejnilaže' Criston'. Še Diosen' ba none' chio' bene' güen len le', bich gac goncho txen len bene' cheson da' malen'. Chio' yo'o be'ni' che Criston' lo' yichjlažda'ochon' bi cheyał'a' goncho txen len bene' bi yo'o be'ni' chen' lo' yichjlažda'ogaque'. <sup>15</sup> Criston' bi chac gone' txen len Satanás dan' chnabia' da' xigüe' ca', na' ca'cze bene' chejnilaže' Criston' bi cheyał'a' gone' txen len bene' bi chejnilaže' Criston'. <sup>16</sup> Nezecho bi gac še' l' gua'a l'saca' da' chesejnilaže' bene' lo' yodao' gan' chejnilaže'cho Diosen', na' ca'cze bi chac soa Diosen' len chio' chejnilaže'chone' še zoa bichle da' chejnilaže'cho. Chac can' gwna Diosen': Soa' len legaque' na' talena' legaque'.

Neda' Dios naca' ben' yesejnilaže' na' legaque' yesaque' yež chia'.

<sup>17</sup> Da'n'an' cheyał'a' goncho can' gwna Xancho Diosen':

Le yechoj len bene' bi chesejnilaže' neda' na' bi gacle toze len legaque'.

Na' bi gonle da' xinjen'.

Nachen' yebeda' soa' len le'e.

<sup>18</sup> Na' gaca' Xale, na' le'e gacle xi'ina'.

Can' ža Xancho Dios ben' nape la'zelagüe yeł'a' guac xen.

## 7

<sup>1</sup> Le'e bene' chacda', ba nezecho can' gwna Diosen' gone' güen len chio'. Da'n'an' cheyał'a' cuejyichjcho bich goncho bite'teze da' xinj da' gwchenen cuerp chechon' o yichjlažda'ochon'. Na' cheyał'a' gapcho Diosen' bala'an gwzenagcho che' tža tža na' šejch gaccho bene' güen can' chaclaže'.

*Ba bža' xbab che bene' Corinto ca'*

<sup>2</sup> Le gaque neto'. Ne tole bibi beneto'. Ne tole bi bzejni'ito' clele, na' ne tole bi gwziye'to'. <sup>3</sup> Gague žia' ca' cont tila' le'e, le can' ba gwnia' cana', chacda' le'e na'a šlac mbancho na' lecz ca' gacda' le'e cate' ba gota'. <sup>4</sup> Nežda' lo' lažda'ogua' gonle can' chazlaže' Diosen', na' chbeda' choelena' bene' diža' ca güenna' chonle. Ba beyacxenł'aža' da' gwnežda' chonle güen, na' zoa' mbalaz la'czł'a' da' zan da' chac chia'.

<sup>5</sup> Cate' bežinto' Macedonian' bibi latje gota' cont yezi'laže'to' len da' gwđi gwxacato'. Gwnita' bene' bosošašlene' neto' na' lecze bžebto' lo' yichjlažda'oto' goqueto' nac gacto'. <sup>6</sup> Na' Dios ben' cheyoe'xene' bene', beyoe'xene' neto' da' bela' Titon'. <sup>7</sup> Na' beyacxenł'aže'to' gague da' bele'e



na'zen' san da' bedeye'e diža' chebede' can' chonlen'. Na' be'e diža' zelaže'le yedena'to' le'e da' yoble. Na' že' chegüine'le che dan' ba goquen' na' chi' yichjle gonle can' gwnian'. Nachen' leca bebede' gwnežda' da' ca'.

<sup>8</sup> Chache'eda' gocyaše'le can' gwnia' le'e carten' bzoja' le'e. Na' gwdechle betinjda' da' bena' cont gocyaše'le, perw na'a bich chetinjda' da' gwseja' carten', le šložzen' gocyaše'le. <sup>9</sup> Chbeda' na'a, le goclenen le'e cont begüine'laže'le che da' xinjen' benle na' betinjele chen, can' goclaže' Diosen'. Na' can' goquen' bi bchojen mal dan' gocyaše'len'. <sup>10</sup> Cate' ba bencho da' xinj, Diosen' chaclaže' yegüine'cho che dan' benchon' na' yetinjchon. Na' chone' yela' mban toli tocañe che chio' chetinje xtoła'chon', na' leca mbalazch soacho še ba betinjecho xtoła'chon'. Perw bene' zan cate' chesegüine'laže' bi chesyetinjde' xtoła'gaquen', nach yesebiaye'e. <sup>11</sup> Chebe Diosen' can' begüine'len', le goclenen gwzelaže'le benle can' gwna Diosen'. Goclaže'le gwlo'ele bich chonle txen len ben' ben da' xinjen', san bža'ale che da' xinjen' benen'. Bžeble yedeyena' le'e castigw na' gwzelaže'le gonle ca' yebeda'. Nach be'le castigw che ben' ben da' xinjen'. Nacia' bich bi xtoła'le de can' benla'. <sup>12</sup> Na' ca' nac carten' bzoja' le'e, gague gwche' yichja' che ben' ben da' xinj na'ze, o che ben' bende' ca', san gwche' yichja' che le'e cont gacbe'ele lao Diosen' ne' chaquele neto' na' ne' chaclaže'le gonle can' che'to' le'e. <sup>13</sup> Na' na'a ba beyacxenlaže'to' da' bzenagle cheto'.

Na' lecze chebechgüeto' ca' mbalaz zoa Titon', le yogo'le benle ga bezoa Titon' binlo len xbab da' yo'o lo' yichjlažda'ogüen'. <sup>14</sup> Goša' Titon' nezda' gonle güen. Na' bi cheto'eda' da' goša'ne' ca', le ca' da' li zjanac yogo' da' chzejni'ito' le'e, lecz ca' da' li bchoj dan' gožto' Titon', na' nacia' be'to' diža' li. <sup>15</sup> Na' ba chacchde' le'e cate' chjayze'ede' da' bzenagle che' na' da' bžeble caten' gwnezele benle da' xinjen'. <sup>16</sup> Da'nan' chebeda' na' nezda' yeyož gonle can' chazlaže' Diosen'.

## 8

### *Besezande' da' gota' chegaque' gosaclene' bene' yoble*

<sup>1</sup> Bene' migw, chaclaže'to' nezele can' ba goclen Diosen' to cuen to cuen bene' ca' chesedop chesežag chesonxene' Criston' to to yež gan' mbane distritw Macedonian'. <sup>2</sup> Gocchgua yela' yaše' yela' zi' chegaque', perw Diosen' bene' cont gwnita'chgüe' mbalaz lo' yichjlažda'ogaquen' na' besyebchgüede' bosotobe' mechw xen cont gosaclene' bene' yoble. <sup>3</sup> Nezda' na' choa' diža' bosonežjochgüe' da' beseyažje bene' yoble la'czla' bibi gota' chegaque', na' con xbab chegaczen' gosone' ca'. <sup>4</sup> Goseneyoede' güe'to' latje yosonežjue' mechw cont yesaclene' bene' ca' chesejnilaže' Diosen'. <sup>5</sup> Na' gosonche' can' bento' xbab yesone', le zgua'tec goson cuingaque' lo' na' Xancho Criston' na' lecze goson cuine' lo' na' neto' dan' gosaclaže'chgüe' yesone' can' chazlaže' Diosen'. <sup>6</sup> Da'nan' ba gota'yoeto' Titon' yeyede' yeto gan' zoale cont gaclene' le'e yeyož gwtoble mechw dan' goclene' le'e gwzolao btoble cana'. <sup>7</sup> Güenchgua chonle chejnilaže'chgüale Criston' na' choe'chgüale xtižen', da' zan da' chejni'ile che Diosen', chonchgüale xšinen', na' chaquechgüele neto'. Lecze le gon güenchgua na' le gwtobe da' cheseyažje bene'.

8 Bi chona' byen gwnežjwle mechon', san chaclaža' gonle xbab še chaquele Diosen' na' še chaque lježle do laže'le can' goson bene' Macedonian' da' chesacde' Diosen' na' lježgaque'. 9 Nezele leca nži'ilaže' Xancho Jesucriston' chio'. Da' chacde' chio' bcua'ane' yogo'loł da' šagüe' da' de che' gan' zoe' len Diosen' na' bide' golje' bene' yaše' yežlio nga, bedeyene' cont yogo' dan' de che' gaquen checho naccho txen len le'.

10 Nachen' gwzejni'ida' can' chacda' naquen güen gonle. Godgüz goclaže'le gaclenle bene' yaše' ca' na' gwzolaole btoble mechon' do yichj do laže'le. 11 Na' chacda' güen yeyož gwtoblen na'a do yichj do laže'le can' gwzolaole, na' gwnežjwle con ca zelao saque'le. 12 Note'tezcho še do laže'cho chaclaže'cho gwnežjwcho bi da' gwnežjwcho, Diosen' yebede' la'czla' late'ze da' de da' gwnežjwchone'. Bi chnabe' gwnežjwchone' da' bi de checho.

13 Bi žia' gonle cont bich bi yega'an chele na' gata' che bene' yoble. 14 Con chaclaža' gata' da' chyažje yogo'le. Šlac na'a de che le'e, cheyała' gaclenle bene' ca' cheseyažjde'. ¿Chixe še gwžin ža cate' gata' chegaque' na' le'e chyažjele? Cana'chen' yesaclene' le'e cont gata' da' chyažje yogo'le. 15 Nach gac can' nyoj Xtiza' Diosen' žan: "Bene' botobe' da' zcha'o, bitw nacho becho'onen che', na' bene' botobe' late'ze, gota'cze da' byažjde'."

#### *Titon' na' bene' lježe' ca'*

16 Choxcen Diosen' bene' cont Titon' zelaže'chgüe' gaclene' le'e con can' zelaža' neda'. 17 Na' cate' goša'ne' yedene'e le'e da' yoble cont gaclenche' le'e, bebede', le to gualaze' bene' xbab yeyede' gaclenche' le'e.

18 Na' chsela'to' yeto bene' lježcho len Titon'. Na' to cuen to cuen bene' ca' chesedop chesežag chesonxen Jesucriston' cheso'e diža' che benga chsela'to', chesene' binlo chyixjue'ede' diža' güen che Jesucriston'. 19 Nachen' lecze gosebeje' le' cont sa'lene' neda' cate' ša'a gan' že' bene' lježcho ca' šjasana' mechw dan' chtobcho. Na' gwnežjwcho mechon' cont gacxen Xancho Jesucriston' na' cont gwlo'ele chbele chaclen bene' lježle. 20-21 Yo'o yichjto' gonto' da' nac güen lao Xancho' na' lao benachen', le mechw xenna', na' bi chaclaže'to' yesene' chonto' clele len len.

22 Na' lecze chsela'to' yeto bene' lježcho len legaque'. Zan ni'a ba ble'eto' chone' xšin Diosen' do yichj do laže' na' na'a leca žan yide' gan' zoalen' da' nezde' zelaže'chgual gonle can' chazlaže' Diosen'. 23 Na' ca nac Titon', chone' xšin Diosen' txen len neda' cont chaclento' le'e. Na' bene' ca' yechope, zjanite' chesone' cont Criston' chaxcene', na' bene' ca' chesedop chesežag chesonxene' Jesucriston' gosebeje' legaque' na' cheseselē' legaque'. 24 Da'nan' chnia' le gon güen len legaque' cont bene' ca' chesonxene' Criston' to to yež yesenezde' chaquele legaque', na' le gwlo'e chonle güen can' gwnato' cate' be'to' diža' güen chele.

## 9

#### *Bosotobe' mechon'*

1 Bi chonen byen gwzoja' le'e nia' cheyała' gwnežjwle mechw da' gaclen bene' chesejnilaže' Criston' ga yoble. 2 Nezda' chaclaže'le gaclenle legaque'. Na' ba be'lena' bene' Macedonia ca' diža' cont yesenezde' le'e zoale distritw Acaya chaclaže'le gaclenle bene' yaše' ca' na' gwzolaole btoble mechon' godgüz. Da'nan' bene' ca' že' zan yež distritw Macedonia lecze ba chesone' ca'. 3 Perw bia'cze chsela' bene' ca' len Titon' cont diža' dan' ba bia' chele catec güenna' chonle bi gaquen ca da' güenlaže'. Chaclaža' yeyož

gwtohle mechua' cont ba den cate' yida'. <sup>4</sup> Le še sa'len no bene' Macedo-  
nia neda' cate' yedena'a le'e da' yoble, na' yeto'eda' chele še bina' gata'  
mechua', na' lecze le'e yeto'ele da' bi benle can' gwnia' gonle. <sup>5</sup> Da'nan'  
godca' güen yesebialao bene' lježcho ca' šone yeside' gan' zoen' cont  
yesacene' le'e yeyož gwtohle mechw dan' gwnale gwnežjwle. Nachen'  
gwnežjwlen do yichj do laže'le, gague gwnežjwche'elen.

<sup>6</sup> Le gon xbab can' chesene': "Bene' chaz late'ze, late'ze chelape', na'  
bene' chaz da' zcha'o, da' zcha'o chelape'." <sup>7</sup> Da'nan' to tole cheya'a'  
gwnežjwle gaca'te' da' chebele gwnežjwle, na' bi gwnežjwche'elen, san  
gwnežjwlen do laže'le, le chebe Diosen' bene' zoa mbalaz chzande' bi da'  
chnežjue'. <sup>8</sup> Diosen' nape' yela' guac cont chaclenchgüe' chio' len bite'teze  
da' chyažjecho. Na' chac chone' cont chata' yogo'lol da' chyažjecho  
bate'teze neche gac gwnežjwcho da' chyažje bene' yoble na' goncho bichle  
da' güen. <sup>9</sup> Quinga nyoj Xtiza' Diosen' che bene' chzande' da' de che', žan:  
Ba bnežjue' da' beseyažje zan bene' yaše'.

Na' bi ganlaže' Diosen' da' güen dan' benen'.

<sup>10</sup> Diosen' chone' cont chata' no xoa' biñ na' bichle da' chazcho; chone'  
cont chata' da' che'ej da' chagwcho. Lecze le' gone' cont gata' bichle  
da' chyažjele na' cont cha'o xenchen, na' gone' cont šejchle gonchle da'  
güen. <sup>11</sup> Bite'teze da' chac chele, Diosen' gone' cont gata' da' zcha'o  
da' gwnežjwle bene' yoble. Nach cate' šjanežjwto' bene' yaše' ca' dan'  
ba btoble, yeso'e yela' choxcen che Diosen'. <sup>12</sup> Le da' gwnežjwle da'  
cheseyažje bene' chesejnilaže' Jesucriston' ga yoble, bene' zan yeso'e yela'  
choxcen che Diosen'. <sup>13</sup> Na' cate' bene' yaše' ca' yesezi'e mechon' chtoble,  
gwlo'en chzenagle diža' güen che Criston' do yichj do laže'le. Nach  
legaue' yeso'e yela' choxcen che Diosen' da' gwseła'le da' zcha'o mechw  
da' gaclenen legaue'. Lecze yeso'e yela' choxcen che' da' chaclenle  
yogo' bene' chesejnilaže' Criston'. <sup>14</sup> Na' do chesacde' le'e yoso'lä güiže'  
Diosen' yeseñabe' gaclenche' le'e, le nachia' ba nži'ilaže'chgua Diosen' le'e.  
<sup>15</sup> Choxcen Diosen' gwsele' Xancho Jesucriston' len chio'. Bibi diža' de  
da' nacho catec zaca' goclenna' da' bene' len chio' gwsele'ne'.

## 10

### *Diosen' gwleje' Pablon' cont bzejni'ide' bene'*

<sup>1</sup> Chesena bal bene' chžeba' tila' le'e cate' zoa' len le'e na' con cate'ze  
zoa' zito' chzoja' cart chdila' le'e. Bi naquen ca', san chneyoeda' le'e  
diža' šagüe' ca' Criston' gwneyoede' bene' diža' šagüe' da' goque' bene'  
xenlaže' na' bene' šagüe'. <sup>2</sup> Chneyoeda' le'e gonle da' güen cont bi tila'  
le'e caten' yedetila' bene' chesacde' chona' con can' žan chia'. <sup>3</sup> Na'  
la'czla' zoato' lo yežlion' na' nacto' benachze, cate' chdillento' da' malen' bi  
chdillenton' ca' benachze. <sup>4</sup> San Diosen' none' neto' yela' guac cont chzoeto'  
chlej chšoštjo' yogo' da' chon gwxiyen', le bi soeto' tillenton' to gualazto'.  
<sup>5</sup> Can' chac, Diosen' chaclene' neto' chonto' cont chosozexjwyichj bene'  
chosozenague' che Criston' na' chesebejyichje' xbab mal chegaquen' na'  
bichle da' cheseza'laže' da' chžonen yesombi'e Diosen'. <sup>6</sup> Na' cate' yeyož  
gata'bia' še yogo'le gwzenagle che Diosen', cana' ngüiato' gonto' castigw  
che nle bi chzenagle che'.

<sup>7</sup> Le gon xbab che dan' chle'ele chonto'. Še nole chaquele nacle txen  
len Criston', le yeyon xbab lecze neto' nacto' txen len le'. <sup>8</sup> Na' bi yeto'eda'  
güe'cha' diža' yelate' can' ba bian', le chebeda' gwseła' Xancho Criston'

neto' cont bzejni'ito' le'e diža' da' goclenen le'e, gague da' bžiayin' le'e. <sup>9</sup> Bi chaclaža' no gacde' še chzoja' cart quinga cont gwšeba' le'e. <sup>10</sup> Bene' ca' chesenelagüe' chia' chesene' cate' zoa' zito' chzoja' cart znia ca che no bene' gwnabia', na' chesene' bi chac bi gona' cate' zoa' len le'e na' bi choa' diža' da' zaca' gwzenagle. <sup>11</sup> Bene' ca' chesenelagüe' chia' cheyała' yesenezde' can' žato' le'e cart da' chzojto' le'e cate' zoato' zito', lecz ca' gonto' cate' yedesoato' len le'e.

<sup>12</sup> Bi chaclaže'to' gonlebeto' bene' ca' chesonxen cuingaque'. Chesacde' güenchgua chesone', le to toe' con chesena' lježe' cont chesene' chesonche' güench clcl ca cheson bene' lježe', na' bibi zejen chesone' ca'. <sup>13</sup> Neto' bi gonxen cuinto'. Con güe'to' diža' che da' ca' goclen Diosen' neto' bento' gan' ba gwsele' neto', le lecze gan' zoalen' ba gwsele' neto'. <sup>14</sup> Da'nan' bi chonlaže'to' cate' choe'to' diža' che da' ba bento' gan' zoalen', le nacto' bene' nechw bzejni'ito' le'e diža' güen che Criston'. Šaca' bi bento' žin gan' zoalen' chonlaže'to' choe'to' dižan' ca', perw benton'. <sup>15</sup> Na' bi güe'to' diža' che da' ben bene' yoble, bi nato' neto' benton'. Zoato' lez šejnilaže'chle Criston' cont gaclenle neto' gonchto' xšin Diosen' gan' zoalen'. <sup>16</sup> Na' chaclaže'to' chixjue'eto' diža' güen che Criston' ga naquen zito'ch ca gan' zoale na'. Chaclaže'to' chixjue'eton' ga nono na' chixjue'eden' cont güe'to' diža' che xšin Diosen' da' ba bento' na' bi güe'to' che da' ba ben bene' yoble.

<sup>17</sup> Bi cheyała' gonxen cuincho, san cheyała' gonxencho Xancho Dios. <sup>18</sup> La'czła' še to bene' ne' chone' güen, bi naquen da' šejle'cho. Perw še Xancho Diosen' ne' chone' güen nachen' nezecho da' li chone' güen.

## 11

### *Pablon' na' bene' ca' cheson cuingaque' postlw*

<sup>1</sup> Chaclaža' gwzenagle yeto chop diža' güen da' gua' che cuina' la'czła' še chaquale naquen diža' da' bibi zaca'. Le gwzenag chia'. <sup>2</sup> Neda' bzejni'ida' le'e xtiža' Criston' da' nechw cont gwyejnilaže'lene', na' Diosen' chone' cont chacda' le'e do yichj do laža'. Na' chaclaža' gaquale toze Criston' cont zaca'le gona' le'e lo ne'e, gacle ca to no'ol güego', no'ole napši'i cuine' da' chacde' toz bene' byo bene' si' le'. <sup>3</sup> Chxožda' yeseziye' bene' le'e cont bich šejnilaže'le Criston' do laže'le na' bich gaquale toz le'. Can' gwziye' bejen' da' no'ole nechon', no'olen' gože' Eva, da' nacha' be xigüe'. <sup>4</sup> Cate' chesela'ac bene' gan' zoale na' chosozejni'ide' le'e che Jesúsen' nža'le can' ba bzejni'ito' le'e, o chosozejni'ide' nža'le che Spiritw che Diosen' o che diža' güen chen', la' chzenagtele chegaque'. Da'nan' chxožda' yeseziye'e le'e. <sup>5</sup> Ba nonle bene' ca' ca postlw chele na' chonxenle legaque'. Na' neda' zaca'cha' ca legaque'. <sup>6</sup> La'czła' bi choa' diža' xdan ca chesoe' legaque', ba ble'eczele yogo' dan' ba bento' na' nezzele chejni'ito' xtiža' Diosen' binlo.

<sup>7</sup> ¿Chaquale malen' bena' bibi laxjua' gwxia' cate' be'lena' le'e diža' güen che Diosen'? Ben cuina' ca to bene' bibi zaca' da' bibi laxjua' gwxia' cont bena' ga zoachle mbalaz. <sup>8</sup> Gwxia' mechw da' goson bene' ca' chesedop chesežag chesonxene' Criston' ga yoble cont be'lena' le'e xtiža' Diosen'. <sup>9</sup> Na' cate' gwzoa' len le'e, la'czła' bi gota' da' byažjda', bi gwñabdan' le'e. Bene' ca' zeya'ac Macedonia gosone' da' byažjda' cont bi benda' le'e zed, na' bate'teze gwbatech gonda' le'e zed gonle da' chyažj chchinda'. <sup>10</sup> Chebeda' chac chnia' bibi gan' chona' chixjue'eda' xtiža' Diosen' len le'e o len bene' že' yež yoble ga mbane distritw Acayan'. Na' can' nezda' chaclen Criston' neda' choa' diža' li, can' nezda' gwbat gonda' le'e zed cont

gonle da' chyažj chçhinda'. <sup>11</sup> Perw gague da' bi chacda' le'e bi gonda' le'e zed. Diosen' ñezde' chacda' le'e.

<sup>12</sup> Na' gonchca' can' chona' bibi laxjua' chzia' cont bi žel bi yosode'e bene' ca' yesene' toz can' chesone' len da' chon neto', le can' chesaclaže' yesene'. <sup>13</sup> Legaque' bi zjanaque' dogualje postlw. Con chosozejni'ide' diža' güenlaže' na' chesonlede' le'e cont gaquele gwseła' Criston' legaque'. <sup>14</sup> Bi yebanele can' chesonen', le ca'czen' chziye' Satanásen' chio', cheyon cuinen ca to angl bene' chactitchgua cont gaquecho naquen to angl güen bene' za' gan' zoa Diosen'. <sup>15</sup> Na' ca'czen' cheson bene' ca' chosozenag çhen, chesonlede' le'e cont gaquele chosozejni'ide' diža' güen. Perw žin ža yesezaca'zi'e toli tocane yela' güen da' mal çhegaquen'.

*Da' ca' gwdi gwxaca' Pablo da' naque' postlw*

<sup>16</sup> Da' yoble žia' le'e, bi gaquele chona' xbab da' bibi zaca' can' chon bene' bi chejni'i. Perw la'czła' še chaquele chona' xbab da' bibi zaca', le gwzenag chia' šlac gua' to çhope diža' güen che cuina'. <sup>17</sup> Gua' diža' güen che cuina' la'czła' ñezda' Xancho Criston' bi be'e diža' güen che cuine'. Guan' ca bene' chon xbab da' bibi zaca', bene' bi chejni'i. <sup>18</sup> Bene' zan cheso'e diža' güen che cuingaque' che bi da' ba gosone' o bi da' ba goc çhegaque', na' ca'czen' gona' neda'. <sup>19</sup> Ba non cuinle bene' sina' na' da'na'ljan' chbele chzenagle che bene' cheson xbab da' bibi zaca'. <sup>20</sup> Chzenagle che bene' ca' ba gosone' le'e ca xmosgaque'. Choe'le latje cheseziye'e le'e cont chnežjwle legaque' bi da' de chele na' chontezle bi da' chesene'. Chesonxen cuingaque' na' chesebaže' le'e cont chzenagle çhegaque', na' bia'cze choe'le latje chosozejni'ide' le'e. <sup>21</sup> Chonljale xbab bžebto' le'e dan' bi beneto' le'e ca'.

Na' da' yoble gua' diža' ca bene' chon xbab da' bibi zaca', le bite'teze diža' güen da' cheyaxje bene' güe'e che cuine' note'teze naque', lecze cheyaxjda' gua' dižan' nac ca' che cuina'. <sup>22</sup> Chesonxen cuingaque' da' gosaljje' gan' že' bene' chesaque' diža' hebreo. Nezczele lecze goljelena' bene' chesaque' diža' hebreo. Na' chesonxen cuingaque' da' zjanaque' bene' Israel. Nezczele lecze bene' Israel neda'. Na' chesonxen cuingaque' da' gosaljje' lo diaža che da' Abraham. Na' ñezczele lecze diaža che da' Abrahanna' neda'. <sup>23</sup> Chesene' Criston' gwsele' legaque' cont yesone' xšine'. Nezczele Criston' gwsele' neda' na' ba bencha' xšinen' ca legaque'. Si'xenle dan' choa' diža' ca bene' chon xbab da' bibi zaca', ca bene' bi chejni'i. Ba bencha' žin gual ca legaque', zan ni'ach ba goseyin justis ca' neda' da' choa' xtiža' Diosen' clcl ca da' ba goc che legaque'. Na' zan ni'ach bene' ca' chesegue'ede' neda' ba goseyixjue' neda' ližya clcl ca dan' ba goc che bene' ca' chosozejni'ide' le'e. Na' zan ni'a ba bela' cbi gota'. <sup>24</sup> Gayo' ni'a goseyin bene' Israel gualaž chia' neda' tašjw de yid togaljechoa ni'a güeje. <sup>25</sup> Šone ni'a bene' justis ca' goseyine' neda' xis. Na' tni'a bosotacue' neda' yej yelate'ze ca gosote' neda'. Na' cate' zya'a yež zito' to lo' barcw, šon ni'a boçhinj nesdaon' barcon', na' cañe bžina' yo biž. Na' lo šon ni'an beyinjenna', tni'a gwdeła' nesdaon' tža tyel. <sup>26</sup> Zan ni'a ba gwya'a yež zito' jatixjue'eda' xtiža' Criston'. Zan ni'a cañe goc gwdia' yegw ca'. Zoa cate' goca' lo na' bene' gwban. Zoa cate' bene' Israel gualaž chia' gosaclaže' yesote' neda', na' zoa cate' bene' bi zjanaque' bene' Israel gosaclaže' yesote' neda'. Na' zan ni'a do lo ciuda, do ga nono bene' že' na' do lo nesdaon' yelate'ze bi gota'. Na' yogo' ža chaš bene' chesonlaže' chesene' zjanaque' chio' txen na' chxožda' yosožiaye'e xšin Diosen' dan' chonan'.

27 Zan ni'a ba bena' xšin Diosen' bented ga jaꝥaque'chgüeda', na' zan ni'a bchejda' bi gwtasa'. Nombi'a yeļa' chbiļ chdon, le zan ni'a bi gota' da' ye'ej gagua'. Na' lecze zan ni'a beyaga' bi gota' xa' da' byažjda'.

28 Da' zanch da' ba gwdi gwxcaca' da' bi choa' diža', na' lecze yogo' ža chi'chgua' yichja' nac chac che le'e chdop chžagle chonxenle Criston' to to yež. 29 Note'tezle cate' bi zoachachle len Criston' o bi chzoele gonle can' chazlaže' Diosen', chacyaše'chgüeda' cacze nacho nedan' chona' ca'. Na' lecze cate' bene' chesego'oyele' le'e cont chonle da' mal, leca chacda' lo' yichjlažda'ogua' na' chža'a dan' ba chonle can' že'na'. 30 Na' da' chonen byen güe'cha' diža' che cuina', nach gua' diža' che da' ca' chlo'en bi chac bi gona' to gualaza'. 31 Dios bene' cheyaļa' gonxencho toli tocañe nežde' choa' diža' li. Len' naque' Xa Xancho Jesucriston' na' chonxen Jesucriston' le'. 32 Na' yeto da' goc chia', cate' gwzoa' ciuda Damasco, bene' goc gobernador šlac gwnabia' rey Aretas bnite' bene' gosape' cho'a puert da' zoa le'e ze'e da' nyechj ciudan' cont yesezene' neda' cate' yechoja'. 33 Perw bene' lježcho ca' gosegüe'e neda' to lo' žome xen na' besyēletje' neda' to cho'a ventan le'e ze'e da' nyechje ciudan' cont bi gosezene' neda'.

## 12

### *Da' ble'edagüe' Pablon'*

1 Bi chazlaža' güe'cha' diža' güen che cuina', san gua' diža' che da' ca' da' ba ble'edagüe'da' na' da' ca' ba bzejni'i Xancho Criston' neda'. 2-3 Ba chejnlaža' Criston' cate' goc chia' quinga ba goc žta' iz. Diosen' bene' neche gwya'a yaban' gan' zoen'. Bi nežda' še gwya'a len cuerp chia', Dios nan' nežde'. 4 Con nežda' bžina' gan' zoa Diosen' na' benda' bene' ca' že' na' cheso'e diža' zaca' da' bi chac nia', diža' zaca' da' bi de latje güe' benač yežlio nga. 5 Šaca' žan gonxen cuina', yejni'a gonxen cuina' che da' ca' ba blo'e Diosen' neda', perw bi žan gonxen cuina' che bi da' ba bena' neda'. Con gua' diža' che da' ca' ba goc chia' da' chosolo'en bi chac bi gona' to gualaza'. 6 Šaca' žan gonxen cuina', da' zan da' güen ba bena' da' gac gua' diža' chen, diža' da' naquen da' li, gague da' güenlaže'. Perw bi gua' diža' che bi da' güen da' ba bena', le bi chaclaža' no gonxench neda' ca' cheyaļa'. Yejni'a yesone' xbab še zaca' con ca' nac da' chesele'ede' chona' na' can' chesende' choa' xtiža' Diosen'.

7 Cont bi ga'laža' che da' ble'edagüe'da' na' da' ba bzejni'i Xancho Criston' neda', Diosen' be'e latje chžaglagua' len to da' zoa cha'an ca' cha'a yeše' lo' cuerp chia' nga, na' leca chaclaže' Satanásen' gacda' tole da' chac chia' ca'. 8 Šone ni'a ba gwñabda' Xancho Criston' yequ'e dan' chžaglagua' len cuerp chian'. 9 Nach Xancho' gože' neda': "Bi yeca'a dan' chžaglaguon', san soacza' gaclena' le'. Lezen da' chyažjdo'. Cate' bi chac bi gono', canan' gacbe'edo' chaclena' le' cont gono' bi da' cheyaļa' gono'." Da'nan' chbeda' güe'cha' diža' che da' ca' chosolo'en bi chac bi gona' še Criston' bi chaclene' neda' len yeļa' guac chen'. 10 Na' da'nan', cont gacxen Criston', chbeda' bite'teze da' chac chia' da' chlo'en chyažjda' gaclene' neda'. Chbeda' cate' chesezi'diža' bene' neda', cate' bi de da' chyažjda', cate' bene' chosolagšibe' neda', na' cate' bichle da' chžaglagua', le cate' chac chia' ca', cana'ch chaclench Criston' neda' len yeļa' guac chen'.

*Pablon' gwche' yichje' che bene' chesonxen Criston' Corinto*

<sup>11</sup> Ba bia' diža' benxen cuina' ca chon bene' bi chejni'i. Le'e cheyała' güe'le diža' chia' naca' bene' zaca', perw bi chonle ca'. Da'nan' benen byen bia' dižan' ca'. Da' juisyw chonxenle bene' ca' ba nonele ca postlw chele. Na' neda' ne late'ze bi chyažjen cont gaca' bene' zaca' ca legaque'. Žia' ca' la'czła' chacbe'eda' bibi zaca' šaca' bi zoa Diosen' len neda'. <sup>12</sup> Ba ble'ele naca' dogualje postlw, le cate' gwzoo' len le'e, Diosen' blo'e zoa yela' guac chen' len neda' na' bene' cont goc bichle da' zaca' yesyebane bene', na' goclene' neda' bchejda' yogo' da' goc chia' šlac bena' xšinen' gan' zoalen'. <sup>13</sup> Toze ca güenna' bena' len le'e na' can' bena' len bene' yež yoble ga chesedop chesežague' chesonxene' Criston', con da' bi bia' latje gonle da' chyažj chchinda'. Le si'xen da' malen' bena' bi benda' le'e zed.

<sup>14</sup> Chaclaža' yida' deña'a le'e da' gwyone ni'a. Na' bi gonda' le'e zed cate' yida'. Bi chaclaža' gonle neda' bi da' de chele, con chaclaža' gwzenagle chia' na' gon cuinle lo na' Criston'. Ca no bidao' bi cheyała' gwnežjwbe' bi da' chyažje xaxna'be', san xaxna'be' cheyała' gwnežjue' da' chyažje lebe', ca'czen' naquen len le'e na' len neda'. <sup>15</sup> Chbeda' chzanda' bite'teze da' de chia' na' lente cuina' cont gaclencha' le'e, la'czła' šlac neda' chaquechda' le'e, le'e bi chaquetecl neda'.

<sup>16</sup> Na' balle, la'czła' chacbe'ele bi benda' le'e zed len da' byažj bchinda', žale gwziya'a le'e. <sup>17</sup> ¿Bi nezele bi gwziya'a le'e cate' gwseła' note'teze bene' ca' ba gwseła' gan' zoale na'? <sup>18</sup> Gwneyoeda' Titon' bedene'le'e na' gwseła' yeto bene' lježcho len le'. ¿Bi nezele bi gwziye' Titon' le'e? Le' len neda', toz can' chonto', na' toz can' chaclaže'to' gaclento' le'e.

<sup>19</sup> ¿Caquele ba bia' diža' quinga cont nezele bibi da' xinj chonto'? Gague da'nan' ba bia' dižan' ca'. Ba gwnia' yogo' da' ba gwnia' cont chaclena' le'e gonchle xbab can' chazlaže' Diosen', le chacda' le'e. Diosen' nezde' yogo' da' ba gwnia' le'e, na' naca' Criston' txen chzejni'ida' le'e. <sup>20</sup> Con chžeba' cate' yedeña'a le'e še gata'bia' bi chonle güen can' chaclaža' gonlen', na' še ba chonle da' mal, bi šo'laže'le can' gona' len le'e. Chacda' chixe še chdile chšašle na' chgue'e lježle o chloc lježle o chazlaže'le gac güen che cuinze. Chixe še chne che lježle, še chchitjle diža', še cha'laže'le o še de da' zed chele. <sup>21</sup> Chžeba' cate' yedyeña'a le'e še gata'bia' zanle biña' cuejyichjle da' malen' ba benle, na' biña' yetinjele che da' yela' zto' chonle, che da' nzoa no xtole, o da' chata'lenle no bene' bi nac bene' chele o no'ole bi nac xo'olle. Na' Diosen' gone' yeto'eda' chele na' yegüine'da' chele še naquen ca'.

## 13

*Pablon' že' gone' castigw che no chon da' malen'*

<sup>1</sup> Na'a gac šone ni'a yedeña'a le'e. Cate' gagwcho xya che note'teze bene', guata'bia' nape' dola' še yotilen can' chesena chope o šone bene' cheso'e diža' can' goquen'. <sup>2</sup> Goša' le'e šlac gwzoo' len le'e caten' bedeña'a le'e da' gwchope, bi yeyaše'da' bene' ca' goson da' xinjen' še bi yesyetinjde', na' gona' castigw che yogo' nochle chon da' xinjen'. Na' da' yoble žia' ca' na'a šlac zoa' zito' len le'e. <sup>3</sup> Chaclaže'le gona' to da' gwlo'en chne Criston' len neda'. Da'nan' gona' castigw che nole chon da' xinjen'. Na' Criston' gwlo'e yela' guac xen che' cont saca'zi'le che da' xinj da' nonle. <sup>4</sup> Na' la'czła' Criston' ben cuine' ca bene' bibi chac gon cate' gosote'ne' le'e yag cruzen', zoe' na'a da' nape' yela' guac xen che Diosen'. Na' lecze neto' nacto' txen

len Criston' ben cuinto' ca beṇe' bibi chac gon, perw gwlo'eto' le'e zoa yela' guac che Diosen' len neto'.

<sup>5</sup> Le gonyane' xbab chelen' še da' li chejnilaže'le Jesucriston'. Nach gacbe'ele zoe' len le'e še da' li chejnilaže'lene'. <sup>6</sup> Na' zoa' lez lecze gacbe'ele zoe' len neto' na' nacto' postlw che'. <sup>7</sup> Choḷ güižto'ne' chele chṇabto' bich bi da' mal gonle, gague cont gacbe'ele zoa Jesucriston' len neto', san cont soale gonle da' güen. Le toze ca nonen še chesacbe'e beṇe' zoe' len neto' o še bi chesacbe'ede'. <sup>8</sup> Na' bibi castigw gonto' le'e še chzenagle diža' li che Jesucriston', con gaclento' le'e, še ca'. <sup>9</sup> Yebet' gonto' ca beṇe' bibi yela' chnabia' nape', con še le'e ba chnabia'le chonle can' cheyala' gonle. Na' zoaczo' choḷ güižto' Diosen' chṇabto' gaclene' le'e gonle doxen can' cheyala' gonlen'. <sup>10</sup> Ba bzoja' da' quinga za' yedena'a le'e cont yetinjele xtoḷa'len' na' bi yažjen gona' znia len le'e. Diosen' gwsele' neda' naca' postlw che' na' beṇe' neda' yela' chnabia' cont gaclena' le'e, gague cont gwžiaya'a le'e.

<sup>11</sup> Beṇe' migw chia', chṇaba' gacšca güen chele. Le cuec yichjele gonyane'le yogo' da' chaclaže' Diosen' gonle. Le gon chač laže'le len bi da' chac chele. Le gac toze len ljež le'e chejnilaže'le Criston', na' le soa binlo tole yetole. Diosen' chacde' chio' na' chone' cont chzoa chbezcho binlo len xbab da' yo'o lo' yichjlažda'ochon', nachen' chṇaba' soaščacze' len le'e. <sup>12</sup> Le gwnopa' na' lježle gwguap lježle tiox cate' chežagle txen, cont gacbia' chaque lježle tole yetole. <sup>13</sup> Yogo' beṇe' ca' chesejnilaže' Criston' do nga chosoguape' le'e tiox.

<sup>14</sup> Na' chnaba' Xancho Jesucriston' gaclenščacze' le'e. Na' Diosen' gonšque' gacbe'echle chacde' le'e, na' gonšca Spiritw che Diosen' cont xbab chele gaquen toze len xbab chen. Da' na'zen' chzoja'.



## CART DAN' BZOJ POSTLW SAN PABLO CHE BENE' GALACIA CA'

*Pablon' chguape' tiox bene' ca' chesonxene' Criston' Galacia*

<sup>1-2</sup> Neda' Pablo chzoja' le'e chdop chžagle chonxenle Criston' yež ca' zjachi' distritw che Galacia. Neda' len yogo' bene' lježcho ca' nite' nga chguapto' le'e tiox. Gague benač gwlej neda' cont gona' xšine', san Jesucriston' txen len Xe' Diosen' ben' bosban le' ladjo bene' guat ca', legaque' gosebeje' neda' cont naca' postlw chegaque'. <sup>3</sup> Na' chnaba' lao Xacho Diosen' len Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlažda'ole. <sup>4</sup> Jesucristnan' bnežjw cuine' neče xtola'chon' cont bich goncho txen len da' malen' chac lo yežlio nga. Bene' ca' le can' gwyazlaže' Xacho Diosen' <sup>5</sup> ben' cheyała' gonxencho toli tocanē. Na' ca'šcaczē goncho.

*Bich bi yeto diža' de da' gac nacho diža' güen che Diosen'*

<sup>6</sup> Diosen' gwleje' le'e cont Xi'ine' Criston' gaclene' le'e. Na' chebanda' can' chonlen' bedao'nez ba chbejyichjle Diosen' na' chzenagle che yeto da' chaquele naquen diža' güen. <sup>7</sup> Perw bi naquen diža' güen. Con nita' bene' chososed chosolo'ede' xtiža' Diosen' clele na' chesone' cont chaczejlaže'le che diža' güen che Criston' dan' bsd blo'eto' le'e. <sup>8</sup> Šaca' neto' chixjue'eto' yeto da' bi naquen diža' güen che Criston', chnabda' Diosen' gone' cont cuiayi'to'. Na' la'czla' to angl bene' za' gan' zoa Diosen' chixjue'ede' yeto da' bi naquen diža' güen che Criston', lecze chnaba' gon Diosen' cont cuiaye'e. <sup>9</sup> Can' ba gwnian', lecze can' žia' da' yoble na'a: še note'teze bene' ba chyixjue'ede' xtiža' Criston' nža'le can' ba nsedlen, chnaba' gon Diosen' cont cuiaye'e toli tocanē.

<sup>10</sup> Chnia' ca' cont na Diosen' chona' güen, gague cont yesena benačen' chona' güen, na' gague cont yebe benačen' neda'. Šaca' chi' yichja' nacle gona' cont yebe benačen' can' chonan', bi chzenaga' che Criston' šaca'.

*Diosen' gwleje' Pablon' na' gwsele'ne' cont goque' postlw*

<sup>11</sup> Bene' migw, che'nda' nezele diža' güen che Criston' dan' ba be'lena' le'e bitw naquen xbab che benač. <sup>12</sup> Gague benačen' bzenden' neda', na' neca nacho benačen' bene' cont gwejni'idan', san cuin Jesucriston' bzejni'ide' neda' diža' güen chen'.

<sup>13</sup> Ba beneczele diža' can' ba bena' cate' ne' na'ogua' costumbr che neto' bene' Israel. Leca bchi bsaca' bene' ca' chesonxene' Criston', goclaza' yesyenite'. <sup>14</sup> Na' gwche'chgua yichja' che costumbr dan' gosa'o da' xozxta'ogua' ca' na' bsdchan' clēl ca zan bene' l gualja' bene' lecze zjanac bene' Israel. <sup>15</sup> Perw cate' biña' galjtia', Diosen' bžie' bia' gona' xšinen'. Gwleje' neda' cont gonan', le nži'ide' neda'. Na' cate' bžin ža ben Diosen' can' gwchoglagüen' gone', <sup>16</sup> nach bene' cont bembia' Xi'ine' Jesús. Na' bzejni'ide' neda' cont chyixjue'eda' xtiža' Jesús'en' len bene' ca' bi zjanac bene' Israel. Na' cate' ben Diosen' ca' len neda' notno gwñabda' gwzejni'ide' neda'. <sup>17</sup> Na' neca gwy'a' Jerusalēnna' cont postlw ca' yososed yosolo'ede' neda', bene' ca' gwlej Diosen' cont chesone' xšine'

cate' neda' za' gonan'. San ła' gwy'a'atia' gan' nzi' Arabia, na' gwdechle beza' Arabia bežina' Damasco.

<sup>18</sup> Na' gocch šon iz gwy'a'a Damascon', nach beza' beya'a Jerusalénna' cont bembia' Pedron' na' jaso'a' len ła' žta'gwbiž. <sup>19</sup> Perw bitw bšaga' yezica'chle postlw ca' san toze Jacobo bene' biše' Xanchon'. <sup>20</sup> Nezece Diosen' da' nga chzoja' naquen diža' ła'.

<sup>21</sup> Nach gwy'a'a yež ca' zjachi' gan' nzi' Siria na' Cilicia. <sup>22</sup> Na' bene' ca' chesedop chesežag chesonxene' Criston' yež ca' zjachi' distritw Judean', legaque' bina' yesombi'e neda' ca hora'. <sup>23</sup> Con ba gosende' chesena bene' čhia': "Ben' bchi bsaque' neto' bich chone' ca'. Ba chyixjue'ede' cheyała' šejnilaže'cho Criston', ła'czła' cana' goclaže' gone' cont nono yesejnilaže' Criston'." <sup>24</sup> Na' bene' Judea ca' chesejnilaže' Criston' gosonxene' Diosen' cate' gosende' can' chonan'.

## 2

### *Yezica'chle postlw gosazlaže' can' chon Pablon'*

<sup>1</sup> Na' gocch žta' iz gwy'a'a Jerusalénna' nach da' yoble gwy'a'a len Bernabén', na' ła'ce gwčhi'a Titon'. <sup>2</sup> Diosen' bzejni'ide' neda' cheyała' ša'a, na' da'nán' gwy'a'a. Na' btoba' bene' ca' zjanaque' blao len bene' ca' chesonxen Criston' Jerusalénna' na' legaže' bzejni'ida' bin' chyixjue'eda' len bene' ca' bi zjanaque' bene' Israel cate' choe'lena' legaque' diža' güen čhe Criston'. Bzejni'ida' legaque' bin' chsed chlo'eda', ła' goclaža' yeseže'zde' cont bi yesene' bibi zaca' dan' chona' na' da' ba bena'. <sup>3</sup> Ca' goquen' bitw chole gosone' byen soa bene' lježa' Titon' señw dan' nzi' circuncisión ła'czła' bi naque' bene' Israel. <sup>4</sup> Goc ca' ła'czła' gwnita' bal bene' gosaque' txen len bene' lježcho ca' Jerusalénna' ca hora', bene' gague do laže' gosejnilaže' Criston', con bedese'ne'e še na'oto' costumbr ca' zjanyoj ła'e ley čhe neto' bene' Israel. Legaque' gosaclaže' yesone' byen ga'oto' costumbr ca', ła'czła' nezecho chebe Diosen' chio' dan' chejnilaže'cho Criston', gague dan' choncho can' ža leyna'. <sup>5</sup> Perw neto' ne late'ze bi bzenagto' čhe legaque', ła' goclaže'to' bi gata' da' gwžon gwzenaguechle diža' güen čhe Criston' da' naquen da' ła'. <sup>6</sup> Na' ca nac bene' ca' gosac bene' blao len bene' ca' chesejnilaže' Criston' Jerusalénna', bitw gosazlaže' gwša'a can' chsed chlo'eda' čhe Criston'. (Žia' ca' ła'czła' bitw bi nonen len neda' še gosaque' bene' blao o še bi gosaque', ła' len Diosen' tozce can' zjazaca' yogo'loł bene'.) <sup>7</sup> Gosacbe'ede' Diosen' ngüe'e lo na' chyixjue'eda' diža' güen čhe Criston' len bene' ca' bi zjanaque' bene' Israel can' ngüe'en lo na' Pedron' chyixjue'eden' len bene' Israel gualaž čheto' ca'. <sup>8</sup> ła' Diosen' ben' chaclene' Pedron' len yela' guac čhen' cont chyixjue'ede' xtiža' Criston' len bene' Israel gualaž čheto', ła'ce'nen' chaclene' neda' len yela' guac čhen' cont chyixjue'eda' xtiža' Criston' len bene' bi zjanaque' bene' Israel.

<sup>9</sup> Can' goquen', Jacobon' len Pedron' len Juanna', bene' zjanacch blao len bene' ca' chesejnilaže' Criston' Jerusalénna', cate' legaque' gosacbe'ede' can' chaclen Diosen' neda' chona' xšinen', nach gosoxe' taca' len taca' Bernabén' cont bosolo'e zjanaque' txen len neto' na' gosazlaže' can' chonto'. ła' gosacde' güencze gonto' xšin Diosen' len bene' ca' bi zjanac bene' Israel na' legaque' yesonen' len bene' Israel gualaž čheto' ca'. <sup>10</sup> Toze dan' gose'e neto' gonto', gaclento' bene' yaše' ca'. Na' da' ła'ce čhi'chgua yichja' chona' ca'.

*Pablon' gwdile' Pedron' gan' nzi' Antioquía*

<sup>11</sup> Na' gwdechle gwy'a gan' nzi' Antioquía. Na' šlac zoa' na' bid Pedron', na' gwdila'ne' can' chone', le bla'alaon chone' da' mal. <sup>12</sup> Cate' za' bžine' Antioquían', gwzomagüe' che'ej chagüe' txen len bene' ca' chesejnilaže' Criston' la'czla' bi zjanaque' bene' Israel; perw gwdechna' cate' besežin bene' Jerusalén ben' gwseła' Jacobon', bich goclaže' ye'ej gagüe' txen len bene' ca' bi zjanaque' bene' Israel. Bžebe' še bi yesena bene' ca' cheson xbab note'teze bene' chejnilaže' Criston' cheyala' soe' señw dan' že' circuncisión. <sup>13</sup> Nach yezica'chle bene' Israel ca' chesejnilaže' Criston' lecze besyebixe' bich gose'ej gosagüe' txen len bene' ca' bi zjanaque' bene' Israel, na' gosego'oyele' Bernabén' cont lencze' bebixe'. Na' gosone' ca' cont yesebe bene' Jerusalén ca' legaque', la'czla' gosenezde' bi naquen mal yese'ej yesagüe' txen len bene' ca' bi zjanaque' bene' Israel. <sup>14</sup> Gocbe'eda' bi chesone' can' cheyala' gon chio' nombia'cho diža' li che Criston'. Na' da'nán' gwdila' Pedron' lao yogo' bene' ca' chesedop chesežag chesonxene' Criston', goša'ne': "Le' naco' bene' Israel, perw ba gwlejšyichjo' costumbr che chio' bene' Israel cont chono' txen len bene' ca' bi zjanaque' bene' Israel. Da'nán' bitw cheyala' gono' byen yeson bene' ca' bi zjanaque' bene' Israel can' nac costumbr che chio' bene' Israel."

*Con bene' chesejnilaže' Jesucriston' zjanaque' bene' güen len Diosen'*

<sup>15</sup> Neto' goljto' nacto' bene' Israel na' bitw goljto' ladjo bene' ca' cbi chesonxen Diosen'. <sup>16</sup> Perw ba nezeto' Diosen' bitw že' nacto' bene' güen len le' neče da' chonto' can' ža ley dan' bzoj da' Moisésen'. Con bene' chesejnilaže' Jesucriston' zjanaque' bene' güen len Diosen'. Da'nán' lencze neto' chejnilaže'to' Criston' cont Diosen' že' cheto' ba nacto' bene' güen lagüe'na'; že' ca' gague neče dan' chonto' can' ža leyna'. Le bi nacho zoa bene' nac bene' güen len Diosen' neče chone' bi da' ža leyna'.

<sup>17</sup> Bal' neto' bene' Israel ba chejnilaže'to' Criston' cont Diosen' none' neto' ca bene' güen. Da'nán' chacbe'eto' toz ca bene' güen da' xinj nacto' len bene' bi zjanac bene' Israel. Perw bi nacho Criston' chone' cont nacto' bene' mal. Leca clelen' cheson bene' xbab še chesacde' ca'. <sup>18</sup> Nezecho bi chyažjen ga'ocho costumbr che da' xozxta'o neto' bene' Israel cont gaccho bene' güen len Diosen'. Na' še ba gwlejšyichjo' costumbr ca' na' yezola'cho yeya'ochon da' yoble, gwlo'elaon naccho bene' güen da' xinj. <sup>19</sup> Ley dan' bzoj da' Moisés ba bzejni'in neda' bi naca' bene' güen len Diosen', le bi chona' can' žanna'. Perw dan' bi gwzoen yeyonen neda' bene' güen len Diosen', da'nán' bich chonxenan', san yo'o yichja' soacza' gwzenaga' che Diosen'. <sup>20</sup> Criston' bnežjw cuine' gote' neče xtolan', na' dan' chejnilaža'ne' da'nán' ba none' neda' ca to bene' guat len da' xinjen' cont bich gonan'. Na' bich zoa' to gualaza', san Criston' zoalene' neda'. Na' dan' chona' na'a chonan' con can' ža' Xi'in Diosen' ben' chejnilaža'. Len' chacde' chio' na' bnežjw cuine' gote' neče chio'. <sup>21</sup> Diosen' nži'ilaže'de' chio' na' da'nán' gwsele' Criston', perw chzoacho to šla'ale dan' bnežjw cuine' gote' še chaquecho naccho bene' güen len le' neče choncho dan' ža leyna', le bitw byažjen bnežjw cuin Criston' neče chio' šaca'.

**3**

*Naccho bene' güen len Diosen' dan' chejnilaže'cho Criston'*

1 Le'e bene' Galacia, nchol yichjlažda'olen'. ¿No gwziye' le'e cont chaquele cheyała' gonxenle costumbr che da' xozxta'oto' ca'? Ba bzejni'yane'da' le'e che dan' got Criston' le'e yag cruzen' neche chio'. 2 Da' ngazen' chnabda' le'e: ¿Zoa Spiritw che Diosen' lo' yichjlažda'ole neche dan' chonle can' ža ley dan' bzoj da' Moisésen'? Bitw naquen ca', san zoan len le'e neche dan' chejnilaže'le Criston'. 3 Spiritw che Diosen' gwyo'on lo' yichjlažda'olen' caten' gwzolao chejnilaže'le Criston'. ¿Da' leca nchol yichjlažda'olen' chaquele chyažjen gonle can' ža leyna' cont yeyož gacle can' chazlaže' Diosen'? 4 Da' zan da' bosochi bososaca' bene' le'e dan' chejnilaže'le Criston'. ¿Na' bixe zacan' byo bchejele len da' ca' še na'a chaquele cheyała' gonle can' ža leyna'? 5 Nezele Diosen' ba bene' Spiritw chen' zoan len le'e na' chone' yela' guac da' chle'ele neche chejle'le xtiža' Criston' dan' bzeneto' le'e, gague chac ca' neche dan' chonle bi dan' ža leyna'.

6 Da' Abrahanna' gwejnilaže' Diosen', na' da'n'an' Diosen' gwne' naque' bene' güen lagüen'. 7 Da'n'an' cheyała' nezele yogo' bene' chesejnilaže' Diosen', Diosen' none' legaque' ca xi'in diaža che da' Abrahanna'. 8 Diosen' bžie' bia' gone' len le'e bi nacle bene' Israel can' chone' len neto' bene' Israel, con note'tezcho chejnilaže'chone' none' chio' bene' güen lagüen'. Da'n'an' Xtižen' dan' nyojen žan gože' da' Abrahanna' diža' güen qui cate' biña' žin ža gaquen': "Dan' chejnilažo' neda' gona' güen len bene' ca' že' yogo' nación." 9 Na' can' naquen, Diosen' chone' güen len bene' ca' chesejnilaže' le' can' bene' güen len da' Abrahanna' ben' gwejnilaže'ne'.

10 Na' note'tez bene' chon xbab gaque' bene' güen len Diosen' lagüe' chone' bi dan' ža ley dan' bzoj da' Moisésen', da' mal juisyw gac che' še ca', le nyoj Xtiža' Diosen', žan': "Da' mal juisyw gac che note'tez bene' še bi nita'teze' yesone' yogoloł can' ža leyna' bate'teze." 11 Na' Xtiža' Diosen' nyojen, žan: "Bene' chesejnilaže' Diosen' zjanaque' bene' güen lagüe', na' da'n'an' guata'cze yela' mban chegaque' toli tocanē." Na' da' žan ca' nezecho bitw že' che note'tezcho naccho bene' güen lagüen' neche choncho bi dan' ža leyna' goncho. 12 Na' leyna' bi žan cheyała' šejnilaže'cho Diosen', san con žan: "Note'teze bene' chon doxen can' ža leyna' gac bane' toli tocanē."

13 Perw Criston' bnitlagüe' xtoła'chon' cont bi gac da' mal juisyw checho dan' bi chzoecho goncho doxen can' ža leyna'. Bnežjw cuine' goc da' mal juisyw che' laz chio'. Goc che' can' nyojen, žan: "Da' mal juisyw chac che note'tez bene' chesote' chosode'ene' le'e yag." 14 Goc ca' cont lencze le'e bi nacle bene' Israel šejnilaže'lene' na' soale mbalaz ca mbalazen' gwzoo da' Abrahanna' dan' gwejnilaže' Diosen'. Nachen' da' chejnilaže'cho Cristo Jesúsēn', Diosen' gwsele' Spiritw chen' zoan len chio' can' gwne' gone'.

*Ley dan' bzoj da' Moisésen' na' dan' gwna Diosen' gone' len da' Abrahanna'*

15 Bene' migw, gwzejni'ida' le'e len da' nga chac yežlio nga: Cate' to bene' chze'e yiš o chone' testament, bi nacho cate' beyož bosochele' can' gwne' gone' cbi gone' can' žanna' o gwzanche' can' žanna', la'czla' naquen to da' chon benachze. 16 Na' ca' nac dan' gož Diosen' Abrahanna' gone' da' güen len le' na' len xi'in diaža che', Xtiža' Diosen' dan' nyojen bi choen' diža' che zan diaža che da' Abrahanna', san choen' diža' che toze', na' zejen Cristo. 17 Na' dan' gož Diosen' Abrahanna' gone' gac da' güen che', chzaca'leben ca to yiš dan' chosoz'a' bene', le Diosen' bitw gwše'e can'

gwne' gone'. Na' ba gwde tap gayoa šichoa iz gož Diosen' da' Abrahanna' gone' gac da' güen che' cate' bene' cont bzoj da' Moisésen' ley chen'. Perw la'czla' Diosen' bnežjue' leyna', bitw nacho cbi chone' can' gwne' gone' len Abrahanna' na' len xi'in diaža che' ca'. <sup>18</sup> Šaca' Diosen' že' con bene' cheson doxen can' ža leyna' zjanaque' bene' güen, bitw chone' da' güen che' xi'in diaža che' da' Abrahanna' can' ba gwne' gone' šaca'. Perw Abrahanna' goque' bene' güen len le' da' gweyjele' gon Diosen' can' gože'ne'.

<sup>19</sup> Še naquen ca' žbixchen byažje ley dan' bzoj da' Moisésen'? Diosen' bnežjuen' da' xoxxta'oto' bene' Israel cate' ba gwde tiemp che' da' Abrahanna' cont gosache'ede' bi chesone' can' non Diosen' mandaw yesone'. Na' bžie' bia' gonen žin šlac biña' yid Criston' ben' gwna Diosen' galje' lo diaža che' da' Abrahanna', na' che' le' be' Diosen' diža' caten' gwne' gone' güen len xi'in diaža che' da' Abraham. Na' ca' nac leyna', Diosen' bene' cont angl ca' bosonežjuen' da' Moisésen'. Na' Diosen' bchine' Moisésen' bzejni'ide' xoxxta'oto' bene' Israel ca' can' žanna'. <sup>20</sup> Perw cate' Diosen' gože' da' Abrahanna' gone' güen che', cuincze' bzejni'ide' da' Abrahanna', na' bi byažjde' bene' yoble gwzejni'ide' le' can' gone'.

#### *Da' chzejni'i leyna' chio'*

<sup>21</sup> Na' bitw cheyala' gaquecho ley dan' bzoj da' Moisésen' chonen clele len da' gwna Diosen' gone' la'czla' leyna' bitw gac yocoben yichjlažda'ochon'. Šaca' gac yocoben yichjlažda'ochon' guac goncho can' ža leyna' nach gaccho bene' güen len Diosen' šaca'. <sup>22</sup> Perw Xtiža' Diosen' dan' nyojen žan yogo'lol benachen' yesezi'e castigw toli tocanē neče xtoła'gaquen', na' con bene' yesejnilaže' Jesucriston' nitlao xtoła'gaque' can' bsi Diosen' xnezen', cont gac güen chegaque' can' gwne' gac che' xi'in diaža che' da' Abrahanna'.

<sup>23</sup> Ca' nac neto' bene' Israel, cate' biña' nezeto' cheyala' šejnilaže'to' Criston', nchoglaon cheto' si'to' castigw toli tocanē dan' nombia'to' leyna' na' bitw chonto' can' žanna'. <sup>24</sup> Len neto' leyna' zaca'leben ca' to bene' chgüia chne'e xi'in bene', da' zan da' chi'ebe' gombe' na' da' zan da' chi'ebe' bi gombe'. Perw na'a ba bid Criston', na' note'tezcho chejnilaže'chone', Diosen' že' naccho bene' güen len le'. <sup>25</sup> Na' dan' ba bid Criston' leyna' bich naquen ca' bene' chgüia chne'e neto' bene' Israel, neto' chejnilaže'to'ne'.

<sup>26</sup> Yogo' chio' chejnilaže'cho Cristo Jesúsén' naccho xi'in Dios. <sup>27</sup> Na' note'tezcho še ba gwzoacho nisen' cont blo'echo naccho txen len Criston', ba chzolao chac yichjlažda'ochon' can' nac yichjlažda'ogüen'. <sup>28</sup> Na' tozecz can' zaca'cho lao Diosen' še naccho bene' Israel o še bi naccho, na' še naccho bene' esclavo o še bi naccho, na' še naccho bene' byo o še naccho no'ole. Yogo'cho ba naccho ca' toze bene' neče dan' naccho txen len Cristo Jesúsén'. <sup>29</sup> Na' dan' naccho txen len Criston', lao Diosen' naccho xi'in diaža che' da' Abraham, na' gon Diosen' güen len chio' can' gwne' gone' len xi'in diaža che' da' Abrahanna'.

## 4

<sup>1</sup> To bene' gwni'a še zoa xi'ine', bi'nan' gac lo' na'be' da' de' che'. Perw na' šlac ne' nache' bidao' bitw nacho mbalazech chac chebe' clel ca' che' to bene' güen žin la'czla' žin ža gac lo' na'be' yogo' dan' de' che' xaben'. <sup>2</sup> Bene' güen žin ca' nite' lo' yo'o chosogüia chesene'ebe' na' chesenabi'ebe' šlac

biṇa' cha'obe' na' šlac žin ža co'o xaben' lo na'be' dan' de čen'. <sup>3</sup> Can' goc len neto' beṇe' Israel šlac biṇa' yid Criston', gwxaca'lebo' ca xi'in beṇe' gwñi'an'. Na' leyna' gwzaca'leben ca beṇe' ca' chesenabia' xi'in beṇe' gwñian' šlac biṇa' žin ža si'be' dan' de če xaben'. <sup>4</sup> Perw cate' bžin ža bžia Diosen' bia' gwseła' Xi'inen' yežlio nga, gwxan to no'ole le'. Na' Xi'in Diosen' lecze benen byen bzenague' če leyna'. <sup>5</sup> Na' len' bedeyene' cont yogo' chio' chejnilaže'chone' ba non Diosen' chio' ca xi'ine' na' zoacho mbalaz dan' nezecho bich chonen byen gonxencho costumbr ca' da' zjanyoj le'e ley če neto' beṇe' Israel.

<sup>6</sup> Na' cont nezecho ba non Diosen' chio' ca xi'ine', ba gwsele' Spiritw čen' dan' lecze naquen Spiritw če Xi'ine' Criston', zoan lo' lažda'ochon'. Na' Spiriton' chaclenen to tocho cont choł güižcho Diosen' che'chone': "Xa". <sup>7</sup> Nachen' dan' ba non Diosen' chio' ca xi'ine' bich cheyała' soacho ca to esclavo len dan' non leyna' mandadw goncho. None' chio' ca xi'ine' na' chone' güen len chio' doxen can' gwne' gone' len xi'in diaža če da' Abrahanna'.

*Pablon' chi' yichje' nac cheson beṇe' ca' chesejnilaže' Criston'*

<sup>8</sup> Cate' biṇa' gombia'le Diosen', gwyejnilaže'le da' ca' bi cheyała' šejnilaže'cho, na' legaquen gosenabian' xbab čele. <sup>9</sup> Perw na'a ba nombia'le Diosen', o še güench nacho Diosen' ba nombi'e le'e. Na' chebančgüeda' čele dan' chebiga'le cosxanle na' da' yoble chonxenle costumbr ca' ca no če da' ye'ej gagwcho, če ža ca', na' če cuerp čechon', na' cho'ele latje chesenabian' xbab čele la'czla' bitw zjazacan' cont yesaclenen chio'. <sup>10</sup> Ba chonxenle costumbr čhe no ža lni, če bio' ca', če tiemp ca' na' če iz ca'. <sup>11</sup> Chžeba' še bich chzenagle čhe dan' ba bsd blo'eda' le'e, le še bich chzenagle čen, ba gwžiai' dan' bena' len le'e.

<sup>12</sup> Beṇe' migw, chata'yoeda' le'e gache'ele costumbr čhe neto' beṇe' Israel dan' zjanyoj le'e leyna' bi yesaclenen le'e lao Diosen' ca chacbe'eda' bi yesaclenen neda' lao Diosen'. Na' caten' bedesoa' len le'e cana', bitw nacho ba benle mal len neda'. <sup>13</sup> Nezecele bega'anlena' le'e da' nechw dan' gocšenda' na' gwdixjue'eda' diža' güen čhe Criston' len le'e. <sup>14</sup> Na' dan' gocšenda' ca hora' zacan' gue'ele neda', perw bitw bgue'ele neda', san do yichj do laže'le bleble neda' ca šale bleble to no angl čhe Dios o ca šale cuin Jesucriston'. <sup>15</sup> Mbalaz gwzoale cate' gwzoa' len le'e cana'. ¿Bixčen' bich chebele xtižan' na'a? Nezda' da' leca goquele neda' bzanele bite'teze da' de čele na' goclaže'le lente cuinle zanele gaclenle neda'. <sup>16</sup> Na' na'a žba chaquele chgue'eda' le'e dan' choe'lena' le'e diža' lin'?

<sup>17</sup> Beṇe' ca' chosod chosolo'ede' le'e na'a leca zjachi' yichjgaque' le'e, perw gague cont yesone' güen len le'e, san cont yesyebeje' le'e bich gonle txen len neto', na' cont cue' yichjle legacze'. <sup>18</sup> Naqueczen güen yesebe' yichj beṇe' le'e bate'teze, gague cate'zen' zoa' len le'e, con še yesone' güen len le'e. <sup>19</sup> Xi'indagua', da' yoble chžaglagua' lo' lažda'ogua' neče le'e can' chžagla'o to no'ole beṇe' chzan, na' bich žaglagua' ca' cate'ch gac yichjlažda'olen' can' nac yichjlaždao' Criston'. <sup>20</sup> Yebechgüeda' šaca' netec na'a zoa' len le'e na' šaca' gac nia' chonle güen, perw leca chacžejlaža' čele.

*Da' Agar na' da' Saran'*

<sup>21</sup> Le'e chaclaže'le gonxenle costumbr čhe neto' beṇe' Israel dan' zjanyoj le'e ley dan' bzoj da' Moisésen' žbiṇa' yenele can' ža dan' nyojen? <sup>22</sup> Žan gwnita' chope xi'in da' Abrahanna' bi' byo, tobe' gwzan to no'ol

ben' goque' esclava che' na' yetobe' gwzan no'ol checze', no'ole nga bi goque' esclava. <sup>23</sup> Na' bin' gwzan no'ole esclavan' goljbe' dan' gwzoalen da' Abrahanna' le', perw bi' gwzan no'ol checze', goljbe' neche Diosen' gože'ne' san no'ol chen' la'czla' naque' no'ol güiž. <sup>24</sup> Na' dan' goc che no'ol ca' chzejni'in chio' che chop dan' gwna' Diosen' gone' cont gaclene' bene' Israel ca'. No'ole esclava ben' le' Agar zaca'lebde' ca ley dan' ben Diosen' mandadw bzoj da' Moisésen'. Bzojen' par da' xozxta'o neto' bene' Israel lo ya'a Sinaí, na' bene' ca' zjazaca'lebde' ca esclavos. <sup>25</sup> Na' doxen nación Israelen' zaca'leben ca da' Agaren' no'ole esclava che da' Abrahanna'. Diosen' bnežjue' da' xozxta'oto' ca' leyna' lo ya'a Sinaín' gan' nzi' Arabia, na' ža na'aža bene' Israel gualaž cheto', bene' guac nacho bene' Jerusalén, ne' zjanaque' ca esclavos neche chesacde' chonen byen yesa'ogüe' costumbr ca' dan' ža leyna'. <sup>26</sup> Perw chio' chejnilaže'cho Criston' naccho txen len yogo' bene' šjaya'aque' yaba gan' zoa Diosen' gan' lecze nzi' ciuda Jerusalén. Na' nezecho bitw chonen byen ga'ocho costumbr ca' dan' ža leyna'. <sup>27</sup> Quinga ža Xtiža' Diosen' dan' nyojen: Bebe no'ole güiž, no'ole cbi chzan, bosya'a yela' chbe chio', le' bina' gaco' bes che yela' sanña'. Chacdo' bi chaque Diosen' le' da' nono xi'ino' zoa, perw nita' zanch xi'ino' clel ca nita' che no'olen' ba gwzan xi'in bene' byon' gwzoalene'.

<sup>28</sup> Bene' migw, xi'in da' Abrahanna' bin' le' Isaac goljbe' neche gož Diosen' Abrahanna' san no'ol chen' la'czla' goque' no'ole güiž. Na' ca'cze chio' chejnilaže'cho Criston', Diosen' none' chio' ca xi'in diaža che da' Abrahanna' bin' goljbe' neche goc dan' gož Diosen' le'. <sup>29</sup> Bi' che da' Agaren', bin' goljbe' neche gwzoalen da' Abrahanna' le', bchi bsaca'be' Isaaquen' bin' ben Spiritw che Diosen' cont gwzan da' Saran'. Ca'cze naquen ža na'aža, bene' ca' chesa'o costumbr ca' dan' ža leyna' chosoči chososaque' chio' chejnilaže'cho Criston'. <sup>30</sup> Na' Xtiža' Diosen' dan' nyojen žan Diosen' gože' da' Abrahanna': "Bebej no'ole esclavan' len bi' chen', le' bitw gwnežjua'be' dan' gwnia' gwnežjua' bi' gwzan no'ol chio'na'." <sup>31</sup> Da'nan' bene' migw, nezecho zaca'lebcho ca xi'in da' Saran', gague ca xi'in da' no'ole esclavan'.

## 5

### *Bi cheyala' yesa'ogüe' costumbr da' bi zjazaca'*

<sup>1</sup> Caten' gwyejnilaže'cho Criston', le' bebeje' chio' lo yogo' da' choncho chaquecho chebe Diosen' chio' lagüe dan' chonchonña'. Da'nan' bi cheyala' yeyonxencho costumbr da' bi zjazacan' len Diosen'.

<sup>2</sup> Neda' Pablo žia' le'e to da' žialao. Še soale señw dan' nzi' circuncišión na'a ba chejnilaže'le Criston', bibi zacan' dan' ba gwzolao chejnilaže'lene' še ca'. <sup>3</sup> Da' yoble žia' le'e, note'teze bene' soe' señw dan' nzi' circuncišión, lecze cheyala' gone' yogo'lol bite'teze dan' ža ley dan' bzoj da' Moisésen'. <sup>4</sup> Na' še chaquele gonle doxen can' ža leyna' cont gacle bene' güen len Diosen', ba chzoale Criston' to šla'ale še can' chaquele, na' bich chonle xbab catequen' nzi'ilaže' Diosen' chio'. <sup>5</sup> Da' chejnilaže'cho Jesucriston' zoa Spiritw che Diosen' lo' lažda'ochon', na' chonen ga chebecho nezecho Diosen' ne' naccho bene' güen len le' cate' yežincho gan' zoe'na'. <sup>6</sup> Ca nac chio' chejnilaže'cho Cristo Jesúsén', bitw bi nonen len Diosen' še ba zoacho señw da' nzi' circuncišión o še cbi zoachon. Le dan' naquen da' žialao xen

len Diosen', soateze soacho šejnilaže'cho Criston' na' gaque lježcho cont gacia' chejnilaže'chone'.

<sup>7</sup> Cana' gwzoale chonle can' chebe Diosen', perw na'a ĺnon' ba ben cont bich chzenagle che diža' ĺi che Diosen'? <sup>8</sup> Dios ben' gwleje' le'e nacle xi'ine', bitw načo le'na' chone' cont chzenagle che diža' yoble. <sup>9</sup> Le gon xbab can' ža diža' nga: "Late'ze levadura chonen cont chas doxen cuazina'." <sup>10</sup> Perw na' zoa' lez gon Xancho Jesucriston' cont gwzenagle chia'. Na' Diosen' gwnežjue' castigw che bene' chon cont chacžejlaže'le, note'teze naque'.

<sup>11</sup> Bene' migw, ca nac neda', šaca' ne' chsed chlo'eda' nia' yogo' bene' byo cheyała' yesezoe' seńw dan' že' circuncišion cont yesenite' binlo len Diosen', bilja chosoči chososaca' bene' Israel gualaž chian' neda' šaca', le can' chososed chosolo'e legaue'. Perw dan' žia' Criston' bnežjw cuine' gote' le'e yag cruzen' cont soacho binlo len Diosen', da'nan' bi chesazlaže' xtižan'. <sup>12</sup> Na' ca nac bene' ca' cheson cont chaquele bilja chebe Diosen' le'e še bi zoale seńon', yebeda' šaca' yesečog cuingaque' yelate'.

<sup>13</sup> Bene' migw, Dios ben' gwleje' chio' cont naccho xi'ine' chaclaže' nezečo bich chonen byen ga'očo dan' ža ley cont soacho binlo len le'. Perw bitw cheyała' goncho bite'teze da' mal dan' ža lažda'ochon' goncho. Dan' cheyała' goncho, cheyała' gaclen lježcho lagüe dan' chaque lježcho točo yetočo. <sup>14</sup> Na' ba zoaczcho choncho yogo'lol can' ža ley na' še choncho can' nyojen žan: "Cheyała' gaque lježcho ca chaque cuinčo." <sup>15</sup> Perw še chacyožlen lježcho o chdillen lježcho, chžiai'cho dan' non Diosen' cont naccho toze.

*Can' goncho še gwzenagcho che Spiritw che Diosen'*

<sup>16</sup> Chnia' le'e to da' zejen, cheyała' soateze soacho goncho can' chaclaže' Spiritw che Diosen'. Na' še goncho ca', bitw gwzenagcho che da' mal dan' yo'o lo' yichjlažda'ochon'. <sup>17</sup> Cate' chzenagcho che da' mal dan' yo'o lo' lažda'ochon', bitw choen' latje gwzenagcho che Spiritw che Diosen'. Na' cate' chzenagcho che Spiritw che Diosen', bi choncho con can' žan chečo. Na' dan' zoa Spiriton' len chio', da'nan' bitw choncho da' mal dan' ža lažda'ochon' goncho. <sup>18</sup> Na' še chzenagcho che dan' chsed chzejni'i Spiritw che Diosen' chio', bich chonxenčo costumbr ca' dan' ža ley dan' bzoj da' Moisésen'.

<sup>19</sup> Nacia'cze bene' ca' chosozenag che da' malen' dan' yo'o lo' lažda'ogaue' chesone' bite'teze da' mal quinga: chesata'lene' no'ol bi zjanac no'ol chegaue' o bene' byo bi zjanac bene' chegaue'; chesebede' chesone' bichle da' yela' zto' len cuerp chegaue'; <sup>20</sup> chesejnilaže' ĺ gua'a ľsaca'; chosozenague' xtiža' bene' ca' chesenelen da' xigüe'; cheseague'e lježe'; bitw nite' binlo len lježe'; chesacxi'a lježe'; cheseloque'; zjachi' yichje' gac güen che cuingacze' sin cbi yesone' xbab nac gac che lježe'; bitw chesone' txen len lježe'; <sup>21</sup> chesezelaže' bi da' de che bene' yoble; chesote' bene'; zjanaue' bene' borrašw; zjalene' no ĺni gan' chac žaš; na' chesone' bichle da' mal dan' zjanac ca da' mal quinga ba gwnia'. Na' da' yoble chnia' le'e can' ba gwnicza', nono yežin yaban' gan' zoa Diosen' chnabi'e še chone' da' xinj ca' zjanac ca'.

<sup>22</sup> Perw na' še chzenagcho che Spiritw che Diosen', goncho yogo' da' quinga: gauečo ljež beňachčo; soacho mbalaz dan' nombia'čo Diosen'; soacho binlo len xbab dan' yo'o lo' yichjlažda'ochon'; gapčo yela' chxenlaže' len ljež beňachčo bite'teze da' chesonde' chio'; goncho güen



len bene' yezica'chle; gaccho bene' šagüe' len yogo'loł bene'; goncho bi da' si' lo na'cho goncho; <sup>23</sup> gaccho bene' gwzexjwlaže'; bitw soacho goncho con can' žan checho. Na' še choncho da' güen can' chaclaže' Spiritw che Diosen', bitw bibi ley de da' nan choncho da' mal. <sup>24</sup> Na' chio' ba naccho txen len Cristo, bich choe'cho latje nabia' da' malen' chio' cont goncho can' žanna'. <sup>25</sup> Spiritw che Diosen' ba bene' yela' mban toli tocañe checho, na' da'nan' cheyala' soacho goncho can' chaclažen'.

<sup>26</sup> Na' bi cheyala' ga'laže'cho gaquecho leca bene' güen naccho, le še goncho ca', chonen cont yeseža'a bene' lježcho chio' na' yesegue'ede' chio'.

## 6

### *Cheyala' gaclen lježcho*

<sup>1</sup> Bene' migw, še to bene' lježchon' ba blažoe' bene' da' mal, chio' chzenagcho che Spiritw che Diosen' cheyala' gaclenchwne' yetinjen' cont yezoe' binlo len Diosen'. Na' cheyala' gwsaca'cho, le xož lecze chio' lažo'cho goncho da' malen'. <sup>2</sup> To tocho cheyala' gaclen bene' lježcho ca' bite'teze da' chesac chegaque', le can' gwna Criston' chaclaže' goncho.

<sup>3</sup> Na' še goncho xbab naccho bene' güen cate' bi naccho, chziye'ze cuinchon' še ca'. <sup>4</sup> To tocho cheyala' goncho xbab še dan' ba benchon' naquen da' güen o da' mal. Na' yebecho še ba bencho da' nac güen, perw bitw goncho xbab güench ba ben chio' clal ca' bene' yoble. <sup>5</sup> Le to tocho choglaos Diosen' checho še bencho güen o še bencho mal.

<sup>6</sup> Še no chsed chlo'e chio' xtiža' Diosen', cheyala' gwnežjwchone' late' bi da' šagüe' da' güen da' de checho.

<sup>7</sup> Bitw güe'le latje no si'ye' le'e, bitw gac gwcuša'e'cho da' choncho len Diosen'. Le še goncho da' mal, gone' cont si'cho castigw; na' še goncho da' güen, gone' cont soacho mbalaz. Can' zeje diža' dan' žan: "Con dan' chazcho, lenna' yelapcho." <sup>8</sup> Ben' chon con can' ža da' mal dan' yo'o lo' lažda'ogüe', gwžin ža cuiaye'e toli tocañe; perw ben' chon can' chazlaže' Spiritw che Diosen', Spiriton' gonen cont bane' toli tocañe. <sup>9</sup> Na' bitw cheyala' yeche'echo goncho da' güenna', le gwžin ža cate' Diosen' gone' cont soacho mbalaz juisyw, con še bi cuejyichjcho choncho can' chaclažen'. <sup>10</sup> Da'nan' cheyala' goncho güen len yogo'loł bene' bate'teze de latje, na' chonchen byen goncho güen len bene' chesejnilaže' Criston' clal ca' len yezica'chle bene'.

### *Yeto chope dan' che' Pablon' legaque'*

<sup>11</sup> Le na'šc letr cha'o quinga, le cuina' chzoja' le'e. <sup>12</sup> Bene' ca' chesacclaže' yesone' byen soale señw dan' že' circuncisión chesacde' yesyebe bene' Israel gualaž cheto' ca' legaque' še ba bosozoe' le'e señon'. Cheseyiljwlaže' nacle yesone' cont nono yosoči yososaca' legaque' da' chesejle'e Criston' bnežjw cuine' neče chio' cate' gote' le'e yag cruzen'. <sup>13</sup> Bene' ca' chesene' cheyala' soale señon' zjachi' yichjgaque' ley dan' bzoj da' Moisésen' perw ne legaque' cbi chesone' can' žanna'. Con chesacclaže' soale señon' cont yesonxen cuingaque' lao bene' Israel gualaž cheton'. <sup>14</sup> Ca' nac neda', bitw gonxen cuina', san gonxena' Xancho Jesucriston' dan' bnežjw cuine' gote' le'e yag cruzen' neče chio'. Bitwbi nonen len neda' še benachen' yesyebede' neda', le neda' bich chebeda' da' ca' chesena benachen'. <sup>15</sup> Na' len chio' chejnilaže'cho Cristo Jesús en' nezda' bibi nonen še zoacho señw dan' že' circuncisión o še bi zoachon, perw zaca'chgua dan' ba bocob

Diosen' yichjlažda'ochon'. <sup>16</sup> Lao Diosen' naccho dogualje bene' Israel še ba chejnilaže'cho Jesucriston'. Na' chnaba' gaclen Diosen' yogo'le ba zoale chzenagle che' cont soa cuezchle binlo len xbab chele, na' lecze chnaba' yeyaše' yeži'ilaže'de' le'e.

<sup>17</sup> Na' ŋa'a chnabšca' bich gonle güedenag len xtižan', le cuerp chia' nga nsan' yiž che dan' bosochi bososaca' bene' neda' neche chyixjue'eda' xtiža' Xancho Jesúsén'.

<sup>18</sup> Bene' migw, chnaba' soašca Xancho Jesucriston' gaclenšque' le'e len xbab dan' yo'o yichjlažda'olen'. Da' na'zen' chzoja' ŋa'a.

## CART DAN' BZOJ POSTLW SAN PABLO ĆHE BEÑE' CA' ŽE' EFESO

*Pablon' bzoje' beñe' chesejnilaže' Criston' ciuda Efeso*

<sup>1</sup> Neda' Pablo naca' postlw ĉhe Jesucriston' con can' gwnalaže' Diosen'. Na' chzoja' le'e zoale Efeso le'e nacle lo na' Diosen' da' chejnilaže'le Criston'. <sup>2</sup> Chñabda' Xacho Diosen' na' Xancho Jesucriston' yesaclene' le'e na' yesone' cont soa cuezle binlo len xbab ĉhelen'.

*Diosen' chaclenchgüe' chio' da' ngode'cho txen len Criston'*

<sup>3</sup> Cheyala' gonxencho Diosen' ben' nac Xa Xancho Jesucriston' na' le' lecze chonxene' Diosen'. Chio' naccho txen len Criston', Diosen' ba beñe' chio' yogo' da' chyažje yichjlažda'ochon' cont šjayzoacho len le' yaban'. <sup>4</sup> Na' da' bnezjw cuin Criston' neĉhe chio', da'nana' Diosen' gwleje' chio' cate' biña' xe yežlion' cont gaccho beñe' laždao' xilaže' na' bibi doła' gapcho lagüen'. <sup>5</sup> Diosen' chacde' chio' cate' biña' soacho. Da'nana' bsi'e xnezen' none' chio' ca xi'ine' con can' gwnalaže', na' da'nana' gwsele' Jesucriston' neĉhe chio'. <sup>6</sup> Cheyala' soaczcho gonxencho Diosen' catec nži'ilaže'de' chio', le gwsele' Jesucriston' ben' chacde' cont le' goclenggüe' chio'. <sup>7</sup> Caten' got Criston', blalj xĉhene' neĉhe da' xinjen' ben chio' chejnilaže'chone'. Da'nana' Diosen' bezi'xene' xtola'chon', le nži'ilaže'chgüede' chio'. <sup>8</sup> Na' chonchgüe' güen len chio', chone' chio' doxen yela' sina' na' yela' chejni'i da' chyažjecho. <sup>9</sup> Na' bzejni'ide' chio' da' gwnalaže' da' nono gwneze cani' da' bžie' bia' gac. <sup>10</sup> Le Diosen' bžie' bia' žin ža cate' yogo' beñe' že' yaba len beñe' že' yežlion' yosozenague' ĉhe Criston' na' yesaque' txen len le'.

<sup>11</sup> Ca nac chio' naccho txen len Criston', Diosen' bsi'e xnezen' none' chio' ca xi'ine' cont gac lo na'cho da' chaclaže' gone' chio'. Na' Diosen' chone' cont chac dan' chsi'e xnezen' na' chone' da' nezde' naquen güen. <sup>12</sup> Cani'te neto' beñe' Israel ba chbezto' yid Criston', le zgua'tec gwlej Diosen' neto' cont gonxento'ne' da' naque' beñe' zaca' juisyw. <sup>13</sup> Na' lecze ca' le'e, cate' benele diža' güen ĉhe Criston' dan' nac da' li na' gwnezele chaclaže' gone' yela' mban ĉhecho toli tocañe, nach gwyejnilaže'lene'. Da'nana' lecze le'e ba nacle txen len Criston', na' Spiritw ĉhe Diosen' bžinen zoan lo' yichjlažda'olen', can' gwne' soan. Na' Spiriton' zoan len chio' cont nezecho ba non Diosen' chio' ca xi'ine'. <sup>14</sup> Lecze zoan lo' yichjlažda'ochon' cont nezecho žin ža gac lo na'cho yogo' da' ca' za' gonĉ Diosen' chio' naccho xi'ine' cate' gone' cuerp cobe ĉhechon'. Na' gonĉhe' chio' da' ca' cont gonxenĉhene' da' naque' beñe' zaca' juisyw.

*Pablon' gwñabe' gwnežjw Diosen' beñe' chesejnilaže'ne' yela' sina' ĉhe'*

<sup>15</sup> Da'nana' cate' benda' diža' can' chejnilaže'le Xancho Jesúsena' na' can' chaquele yezica'chle beñe' chesejnilaže'ne', gwzolagua' <sup>16</sup> choa' yela' choxclen ĉhe Diosen' neĉhe le'e cate' choł güiža' Diosen', na' bi chezi'laža' chona' ca'. <sup>17</sup> Dios ben' chonxen Xancho Jesucriston', ben' nac Xe' na' ben' nac beñe' zaca' juisyw, len' choł güiža'. Na' chñabda'ne' cue' yela' sina' ĉhen' lo' yichjlažda'olen' na' gaclene' le'e cont gombia'chlene'. <sup>18</sup> Na' chñaba' šo' be'ni' ĉhe' lo' yichjlažda'olen' cont nezele bi da' güenna' zoacho

lez gone' len chion' ba gwleje' naccho xi'ine'. Na' chnaba' gone' cont nezele catec güen juisyw nac yogo' da' ca' za' gone' yesaquen che chio' chejnilaže'chone'. <sup>19</sup> Na' lecze chnaba' šo' be'ni' che' lo' yichjlažda'olen' cont nezele leca nape' yela' guac xen cont gaclene' chio' chejnilaže'chone'. Blo'e yela' guac xen juisyw che' <sup>20</sup> cate' bosbane' Criston' ladjo bene' guaten'. Na' gwde bosbane'ne' nach nzoe'ne' cuite' yaban' gan' chesenabi'e txen. <sup>21</sup> Le Criston' chnabia'che' ca note'teze angl. Chnabia'che' ca benach, na' ca da' xigüe', na' ca bi da' chesejnilaže' bene', na' ca note'tezechle chesenabia' na'a na' tiemp da' za' za'. <sup>22</sup> Diosen' ba gwlo'e lo' na' Criston' yogo' bene' na' bica'chle da' zjade cont le' chnabi'e. Na' Diosen' bzoe' Criston' ca Xancho cont chnabi'e yogo' chio' chejnilaže'chone'. <sup>23</sup> Da'n'an' chio' chejnilaže'chone' zaca'lebcho ca to cuerp, na' Criston' zaca'lebe' ca yichj cuerpen'. Guac nacho nya' Criston' neche chio' chejnilaže'chone'. Na' Criston' zoe' chnabi'e doxen.

## 2

### *Diosen' chacde' chio'*

<sup>1</sup> Na'a Diosen' ba bocobe' yichjla'ažda'olen' da' chejnilaže'le Criston'. Cana' gwzoale bentezle da' malen' na' gwdaple dola' lao Diosen'. Da'n'an' gocle ca bene' guat da' bi bzenagle che'. <sup>2</sup> Con gwdaczele benle da' mal can' cheson yezica'chle bene' bi chesejnilaže' Diosen', na' bzenagle che Satanás dan' chnabia' da' xigüe' ca' dan' zjanyechjen benachen'. Na' ža na'aža Satanásen' ne' chnabian' yichjlaždao' bene' bi chosozenag che Diosen'. <sup>3</sup> Na' ca'cze gwzoa yogo'cho, gwzoatezcho bencho bi da' mal can' gwnan checho na' bi da' mal da' gwzelaže' yichjlažda'ochon'. Na' da' bebecho da' malen' lo' yichjlažda'ochon', da'n'an' gwchoglaon checho si'cho castigw che xtoła'chon' toli tocañe, can' gac len yezica'chle bene' bi chosozenag che Diosen'. <sup>4-5</sup> Goccho ca bene' guat len yichjlažda'ochon' da' gwzoacho bentezcho da' malen'. Na' šlac ne' naccho ca', Diosen' leca beyaše' beži'ilaže'de' chio' na' gocchgüede' chio'. Na' lagüe da' nži'ilaže' Diosen' chio', da'n'an' bocobe' yichjlažda'ochon' cate' gweynilaže'cho Criston', na' bene' yela' mban checho toli tocañe. <sup>6</sup> Na' da' bocobe' yichjlažda'ochon', guac nacho bene' len chio' can' bene' len Cristo Jesús'en' cate' bosbane' le' ladjo bene' guat ca'. Na' da' naccho txen len Criston', mbalaz bač zoacho chbezcho len le' na'a can' soacho cate' yežincho yaban' gan' chi'ena'. <sup>7</sup> Diosen' goclene' chio' ca' cont tiempen' za' za' gwlo'echde' catequen' nži'ilaže'chgüede' chio', le gonchgüe' zanch da' güen len chio' naccho txen len Cristo Jesús'en'. <sup>8</sup> Da' nži'ilaže' Diosen' chio', ba bene' yela' mban checho toli tocañe cate' gweynilaže'cho Criston'. Con bene' to goclen, gague neche bi da' güen da' ben chio'. <sup>9</sup> Le Diosen' bi chaclaže' güe'cho diža' o gaquecho bnitlagüe' xtoła'chon' neche bi da' güen da' ba bencho. <sup>10</sup> Diosen' bene' chio' na' cate' gweynilaže'cho Cristo Jesús'en' bocobe' yichjlažda'ochon' cont soacho goncho da' güen. Cate' biña' soacho, bsi'e xnezen cont soacho goncho da' güen.

*Bene' Israel na' bene' bi zjanaque' bene' Israel, Criston' bozoe' legaque' binlo toe'yetoe'*

<sup>11</sup> Da'n'an' le gon xbab can' goc len le'e cana', le'e goljle bi nacle bene' Israel can' nac neto'. Canan' neto' che' lježto': "Chio' zoacho señw da' že' circuncisión", na' che'to' le'e: "Bi zoale señw da' že' circuncisión" (señw da' chosoza bene' Israel gualaž cheto' ca' lo cuerp che bi' byo

dao' ca'). <sup>12</sup> Na' le gon xbab can' gwzoale cana', bi nombia'le Criston', bi nacle nación che Diosen' ca neto' bene' Israel nacto', na' Diosen' bi gwne' gaclene' le'e can' gwne' gaclene' neto' bene' Israel. Bi gwzoale lez šjayzoale len Diosen' na' neca gwyejnilaže'le Diosen' lo yežlio nga. <sup>13</sup> Perw Criston' bnežjw cuine' gosote'ne' na' blalj xchene' neche chio'. Na' na'a da' chejnilaže'lene' ba nacle txen len Cristo Jesús'en'. Na' ba nacle toze len neto' bene' Israel, la'czla' cana' gogle bene' zito' len neto' na' len Diosen'. <sup>14</sup> Cana' neto' bene' Israel na' le'e bi nacle bene' Israel bgue'e lježcho. Perw Criston' ba bene' cont naccho toze na' ba bozoe' chio' binlo tocho yetocho. <sup>15</sup> Caten' bnežjw cuine' gote', bzoe' ca'ale ley da' bzoj da' Moisés'en' len yogo' da' žan cheyala' goncho. Na' bzoen' ca'ale cont bozoe' chio' chejnilaže'chone' binlo tocho yetocho na' beyone' chio' to yež cobe che', chio' naccho bene' Israel lente chio' bi naccho bene' Israel. <sup>16</sup> Da' bnežjw cuine' gote' le'e yag cruzen', zoacho binlo len Diosen', chio' naccho bene' Israel na' chio' bi naccho bene' Israel, na' lecze naccho toze na' bich chgue'e lježcho.

<sup>17</sup> Na' Criston' caten' bide' yežlion' bedeye'e diža', gwne' benachen' guac yesenite' binlo len Diosen', gwdixjue'eden' len le'e bi nacle bene' Israel, le'e bi nombia'le xtiža' Diosen' cana', na' lente neto' nacto' bene' Israel, neto' nombia'to' xtižen'. <sup>18</sup> Le chio' chejnilaže'cho Criston', chio' naccho bene' Israel na' len chio' bi naccho bene' Israel, toz Spiritw che Diosen' chaclenen chio' cont choe'lencho Diosen' diža'. <sup>19</sup> Da'nan' le'e bi nacle bene' Israel bich nacle ca' bene' zito' len Diosen'. San yogo' chio' chejnilaže'cho Criston' ba naccho txen, le Diosen' ba none' chio' ca' bene' lo' yo'o che'. <sup>20</sup> Chio' chejnilaže'chone' zaca'lebcho ca' to yo'o de yej. Na' neto' postlw na' yezica'chle bene' chesole'ne' le'e xtiža' Criston' zaca'lebto' ca' lene yo'ona'. Na' Jesucriston' zaca'lebe' ca' yej squin che yo'ona'. <sup>21</sup> Na' chio' naccho txen len Criston' lecze zaca'lebcho ca' yej da' zjancua' zjangoden' gan' chac yo'o de yeja'. Zjangoden' txen na' zej cha' yo'ona'. Ca'cze chio' naccho txen len Xancho Criston' na' len lježcho, na' naccho ca' to yo'o gan' zoa Diosen'. <sup>22</sup> Le'e txen len neto' na' len note'teze bene' chesejnilaže' Criston' naccho ca' to yo'o gan' zoa Diosen', le zoa Spiritw chen' lo' yichjlažda'ochon'.

### 3

*Diosen' gwleje' postlw Pablon' cont jatixjue'ede' xtižen' len bene' bi zjanac bene' Israel*

<sup>1</sup> Na' da' naquen ca', neda' Pablo choł güiža' Diosen' neche le'e. Dia' ližya nga da' chyixjue'eda' xtiža' Cristo Jesús'en' len le'e bi nacle bene' Israel. <sup>2</sup> Chacda' ba neželjele nži'ilaže' Diosen' neda' na' bsi'e xnezen' chzejni'ida' le'e xtižen'. <sup>3</sup> Ba bzejni'ide' neda' da' nono gwneze, can' ba bzoja' le'e to chope diža' le'e cart nga. <sup>4</sup> Cate' gwlable cart nga gache'ele chejni'ida' da' nono gwyejni'i cana' che Criston'. <sup>5</sup> Cana' Spiritw che Diosen' bi bzejni'in bene' da' nono gwneze che Criston', perw na'a ba bzejni'in neto' postlw che Diosen', na' ba bzejni'in nochle neto' gwleje' cont choe'to' xtižen', neto' nacto' lo' na' Diosen'. <sup>6</sup> Da' nga bzejni'in neto', le'e bi nacle bene' Israel txen len neto' nacto' bene' Israel si'cho da' gwna Diosen' gone' che chio' naccho xi'ine' neche da' chejnilaže'cho Cristo Jesús'en', na' txen naccho ca' toze bene', na' txenna' chaclen Diosen' chio' can' gwne' gone'.

<sup>7</sup> Ła'czł̄a' bitec bi zaca', Diosen' gwleje' neda' len yeł̄a' guac chen' cont chyixjue'eda' diža' güen chen'. <sup>8</sup> Chacda' ne late'ze zaca' ladjo yogo' bene' ba gwlej Diosen' zjanaque' lo ne'e. Bia'cze nži'ilaže'de' neda' na' gwleje' neda' cont chyixjue'eda' len bene' bi zjanac bene' Israel catec da' zan da' güen juisyw gone' len yogo' chio' chejnilaže'cho Criston'. <sup>9</sup> Na' Diosen' gwlo'e lo na' chzejni'ida' yogo'łol̄ bene' da' nžie' bia' gac. Gwzolaoten cate' gwxe yežlion', nono gwneze da' nžie' bia' gac, con toz Diosen' gwneze'de', Dios ben' bene' yogo'łol̄ bene', yogo' beyix̄e' na' yogo' bichle da' de. <sup>10</sup> Le Diosen' nžie' bia' bene' ca' zjanac angl blao che' na' angl gwnabia' zjanita' yaban' yesele'ede' can' chone' len chio' chdop chžagcho chonxencho Jesucriston', cont yesacbe'ede' nape' yeł̄a' sina' len yogo'łol̄ da' chone'. <sup>11</sup> Chone' can' bžie' bia' gone' caten' biñ̄a' xe yežlion', le cani'te bsi'e xnezen' sele' Xancho Jesucriston'. <sup>12</sup> Na' naccho txen len Criston' da' chejnilaže'chone'. Da'n̄an' bi chžebcho Diosen', san chbecho nezecho chac choe'lenchwne' diža'. <sup>13</sup> Nachen' chñeyoeda' le'e bi gacžejlaže'le che da' chac chia' nga chy' chzaca' lagüe da' chyixjue'eda' xtiža' Jesucriston' len le'e. Naquen da' yebele, gague da' gacžejlaže'le.

*Criston' chacde' chio' chejnilaže'chone'*

<sup>14</sup> Na' da' naquen ca', chzoa xiba' chol̄ güiža' X̄a Xancho Jesucriston'. <sup>15</sup> Le' bxi'e yogo' diaža che chio' zoacho yežlio nga na' che bene' že' yaba. <sup>16</sup> Diosen' naque' bene' zaca' juisyw na' nape' la'zelagüe' yeł̄a' guac xen. Nachen' chñabda'ne' gone' ga soa Spiritw chen' lo' lažda'olen' cont soa chach laže'le len yeł̄a' guac chen. <sup>17</sup> Chñaba' soateze soa Criston' len le'e da' chejnilaže'lene'. Na' chñaba' soacze gaquele Diosen' na' gague lježle do yichj do laže'le, <sup>18</sup> cont gac šejni'ile txen len yezica'chle bene' zjanaque' lo na' Diosen' catec chaquechgüe Criston' chio'. Da' xen chaquechgüede' chio', con bi cheyož yedo ca chacde' chio'. <sup>19</sup> Le biñ̄a' šejni'icho catec chaquechgüede' chio'. Na' lecze chñaba' zej gacchle bene' güen doxen can' nac Diosen'.

<sup>20</sup> Na' Diosen' chac chone' yogo'łol̄, na' chone' da' gualch ca da' chñabechone' o da' choncho xbab gone'. Na' chone' cont Spiritw chen' zoan lo' yichjlažda'ochon' chaclenen chio' len yeł̄a' guac chen'. <sup>21</sup> Na' chio' chdop chžagcho chonxencho Criston', cheyał̄a' gonxencho Diosen' na'a na' toli tocañe da' gwsele' Cristo Jesús̄en' neche chio'. Na' can' gonšcaczcho.

## 4

*Naccho toze len yogo' bene' chesejnilaže' Criston'*

<sup>1</sup> Neda' dia' ližya nga da' chyixjue'eda' xtiža' X̄ancho Jesucriston'. Nachen' chñeyoeda' šejšcale gonle güen can' cheyał̄a' goncho da' gwlej Diosen' chio' naccho xi'ine'. <sup>2</sup> Na' chata'yoeda' le'e bi gonxen cuinle, san le gon xbab bitec bi zaca'le; na' gacle bene' šagüe' na' gaple yeł̄a' chxenlaže' len bene' lježle na' le gacde' bite'teze yesone'. <sup>3</sup> Spiritw che Diosen' ba nonen chio' toze da' chejnilaže'cho Criston', na' le gon con ga zelao saque'le cont soacze gonle toze xbab len bene' lježle, le Diosen' ba bozoe' le'e binlo tole yetole. <sup>4</sup> Yogo' chio' chejnilaže'cho Criston' naccho ca toz bene', na' toz Spiritw che Diosen' zoan lo' yichjlaždao' yogo'cho. Na' cate' Diosen' gwleje' chio' cont naccho xi'ine', lecze bene' cont toz can' zoacho lez gone' güen len chio'. <sup>5</sup> Toz Jesucriston' naque' X̄ancho, na' toz can' chejnilaže'chone', na' toz ca zejen cate' chzoacho nis. <sup>6</sup> Na' toz Diosen'

chonxencho ben' nac Xa yogo'cho. Len' chnabi'e yogo'cho, na' chçhine' yong'cho choncho xšinen', na' zoacze' len yogo'cho.

<sup>7</sup> Na' Criston' chaclene' to tocho na' none' çhecho gwde gwdele da' gon to tocho. <sup>8</sup> Da'n'an' nyoj Xtiža' Diosen' žan:

Cate' beyepe' yaban' bebeje' beñe' zan lo na' gwxiyen' cont beçhi'e legaque'.

Na' bi'e che benachen' da' gac gon to toe'.

<sup>9</sup> Na' can' žan: "Beyepe' yaban'", zejen betje' golje' benach yežlio nga na' gwden' gote' bgaše'. <sup>10</sup> Na' ben' betj golje' benach, lecze len' beyepe' yaban' gan' zoa Diosen', na' na'a zoe' chnabi'e doxen. <sup>11</sup> Na' lecze len' none' che balcho naccho postlw, na' none' che balcho chyixjue'echo bi da' ba gwne', na' none' che yebalcho chje'cho diža' güen chen' len beñe' bina' yesenden', na' yebalcho none' checho chgüia chña'cho beñe' chesonxene' le' na' chsed chlo'echo legaque'. <sup>12</sup> Can' chon Criston' cont chio' naccho lo ne'en chac choncho xšinen'. Na' chonchon cont to to chio' naccho toze len le' zejeh gacchcho can' chazlažen'. <sup>13</sup> Diosen' chaclaže' yogo'cho gaccho toze šejnilaže'cho Xi'inen' do yichj do laže'cho na' gombia'chone' binlo. Chaclaže' gacyane'cho can' cheyala' gaccho, na' gaccho beñe' güen can' nac Criston'. <sup>14</sup> Na' še gaccho ca', bich šo'cho xbab ca che to bidao', šejcho qui šejcho ca'ale na'ocho to to yela' chejnilaže' da' chesaljaže' beñe' güenlaže' na' beñe' gwxiye' cont chesonlede' chio'. <sup>15</sup> Na' cheyala' güe'lencho beñe' diža' li, perw gaccho beñe' šagüe' len legaque' cont yesache'ede' le chaquechone'. Goncho ca' cont zejeh gacchcho beñe' šagüe' beñe' güen can' nac Criston' ben' chnabi'e chio'. <sup>16</sup> Cate' to to cuen cuerp chechon' ngoden' na' noxe' lježen len bela' na' len žit na' len beçj bnia ca' da' ncan', na' to to cuenen chesonen ž'in, nach doxen cuerp chechon' chonen žin ca cheyala'. Na' ca'cze chio' chejnilaže'cho Criston' ngode'cho txen cont to tocho goncho da' non Diosen' checho goncho, na' yogo'cho txen zej gacchcho beñe' šagüe' na' zej gaquech lježcho.

*Diosen' ba bocobe' yichjlaždao' chio' chejnilaže'chone'*

<sup>17</sup> Da' nga chnia' le'e, Xancho Criston' none' mandadw gwzejni'idan' le'e: bi cheyala' soacho goncho xbab ca cheson beñe' bi chesejnilaže' Diosen', le bibi zacan'. <sup>18</sup> Ncho l yichjlažda'ogaque'. Na' bi zjanape' yela' mban toli tocañe ca da' non Diosen' chio', neca chesejni'ide' che Diosen', le zjanaque' beñe' güedenag len le'. <sup>19</sup> Bibi zto' zjanombi'e che da' malen' chesone', na' con chesonteze' yogo' yela' zto', na' chesezelaže' yesenite' yesonche' da' malen'. <sup>20</sup> Le'e ba nsedle can' ža Criston' na' nezele bi cheyala' goncho ca', <sup>21</sup> le chacda' ba benele dižan' gwne' lo' yichjlažda'olen', na' neto' lecze ba bzejni'ito' le'e diža' li chen'. <sup>22</sup> Nezele bich cheyala' gwzenagcho che da' malen' da' chzelaže' lažda'ochon' goncho, can' bencho cana' cate' yela' gwzelaže' chechon' ne' chonlen chio' cont bentezcho da' malen'. <sup>23</sup> San na'a cheyala' gwša'cho xbab da' choncho lo' yichjlažda'ochon'. <sup>24</sup> Cheyala' güe'cho latje yocobech Diosen' yichjlažda'ochon' cont soacho goncho da' zej to li can' chon le', na' gaccho beñe' laždao' xilaže' can' chazlaže' le'.

<sup>25</sup> Da'n'an' bich gonlaže'cho, san güe'len lježcho diža' li, le ngode' lježcho naccho ca toze beñe'.

<sup>26</sup> Na' cate' chža'acho bi cheyala' goncho da' xinj. Cheyala' yob yeyacxenlaže'cho na' bich ža'acho do ža. <sup>27</sup> Na' bi güe'cho latje cont Satanás dan' chnabia' da' xigüe' ca' nabian' xbab chechon' cont goncho da' xinj.

28 Na' nole še ba yolaole chbanle, bich cheyała' cuanle. Cheyała' gonle žin da' nac güen len ni'a na'le cont gata' da' gwnežjwle bene' chyažj chchine.

29 Na' bi cheyała' güe'cho bite'teze diža' zban, san güe'cho diža' šagüe' len yogo'lol bene', con can' chyažje to toe' cont gaclenen le'. Goncho ca' cont xtiža'chon' gaquen da' zaca' gwzenag bene'. 30 Na' bi goncho cont yeyaše'laže' Spiritw che Diosen', le Diosen' ba bene' ga zoan lo' yichjlažda'ochon' cont nezecho naccho xi'ine' na' nezecho žin ža yedyexi'e chio'.

31 Cheyała' cuejyichjcho yogo' da' mal, bich gonchon. Bich co'olaže'cho, bich ža'acho, na' bich güe'cho diža' loc diža' lžej. Bi necho che bene', neca gaccho bene' xi'a. 32 San cheyała' gaccho bene' šagüe' na' yeyaše' lježcho tocho yetocho. Na' cheyała' yezi'xen che lježcho bite'tez da' chesonde' chio' con can' bezi'xen Diosen' checho cate' gwyejnilaže'cho Criston'.

## 5

### *Cheyała' goncho can' chon Diosen'*

1 Nachen' cheyała' soacho goncho can' chon Diosen', le naccho xi'ine' na' chacde' chio'. 2 Cheyała' soacho gaque lježcho ca Criston' chacde' chio' na' bnežjw cuine' gote' neche chio'. Na' chebe Diosen' da' bene' ca', can' chebe bene' to da' chła' ziž.

3 Da' naccho lo' na' Diosen' cheyała' gue'echo da' malen'. Gwbatech cheyała' gata'lencho no'ole bi nac no'ol checho o bene' byo bi nac bene' checho o goncho bichle da' nac da' yela' zto' len cuerp chechon'. Na' bi cheyała' selaže'cho da' de che bene'. 4 Bi cheyała' güe'cho diža' da' naquen da' yela' zto' o bite'teze diža' le'e, diža' da' bibi zaca' da' bi nca' xneze, le bi zejen güe'cho dižan' zjanac ca'. San cheyała' soacho güe'cho yela' choxclen che Diosen'. 5 Nita' bene' byo ben' chesata'lene' no'ole bi nac xo'olgaque' na' nita' no'ole ben' chesata'lene' bene' byo bi nac bene' chegaque', na' nita' bene' chesyebede' dan' naquen da' yela' zto'; na' nita' bene' chesezelaže' bi da' de che bene'. Ba nezeczele bene' ca' cheson da' malen' zjanac ca' bi yesyežine' yaban' gan' chnabia' Criston' len Diosen'. (Na' ca nac bene' chesezelaže' bi de che bene', toz ca malen' chesone' len da' cheson bene' chesejnilaže' l gua'a lsacan'.) 6 Bi güe'le latje no siye' le'e len diža' güenlaže'. Diosen' chnežjue' castigw toli tocane che bene' ca' bi chosozenag che', bene' cheson da' mal ca' ba gwnia'. 7 Da'n'an' bi cheyała' gaccho txen len bene' cheson ca'.

8 Cana' nchoł yichjlažda'ochon', perw na'a ba yo'on be'ni' che Xancho Criston', na' cheyała' soacho goncho da' güen can' chaclaže' Diosen' gon chio' nombia'chone'. 9 Na' še ba gwyo'o be'ni' che Criston' lo' yichjlažda'ochon', nach gaccho bene' šagüe' na' goncho da' güen da' zej to licha. 10 Cheyała' gwsedcho cont nezecho can' chaclaže' Xancho Criston' goncho. 11 Bi cheyała' goncho txen len da' malen' cheson bene' ca' zjanchoł yichjlažda'ogaque', le chesone' da' bibi zaca'. San cheyała' gwzejni'icho legaque' da' malen' chesone', 12 le naquen da' cheto'echo güe'cho diža' che da' ca' chesone' do bagaše'ze. 13 Na' cate' be'ni' che Criston' šon' lo' yichjlaždao' bene', nach yesacbe'ede' che bite'teze da' chesone' še naquen da' mal, le be'ni' chen' chzejni'in beñachen' che xbab chegaque' na' bi da' chesone' še naquen güen o še naquen mal. 14 Da'n'an' nyojen quinga che note'teze bene' chon da' malen':



Naco' ca bene' chtas na' ca bene' guat da' bi chzenago' che Diosen'.

Bzenag che' cont Criston' cue'e be'ni' lo' yichjlažda'oguo'.

<sup>15</sup> Nachen' cheyala' soacho na'cho dan' choncho. Cheyala' goncho da' naquen da' sina', gague goncho ca bene' bi chejni'i. <sup>16</sup> Na' yogo' ža cheyala' goncho can' chazlaže' Diosen', le na'a že'chgua bene' chesone' da' malen'.

<sup>17</sup> Bi goncho ca bene' bibi xbab nye'. Cheyala' šejni'icho can' chaclaže' Diosen' goncho cont gonchon. <sup>18</sup> Na' bi cheyala' gaccho bene' borrašw, le bene' chesezožde' chosožiayi' cuine'. San chio' cheyala' güe'cho latje soachgua Spiritw che Diosen' lo' lažda'ochon' nabian' chio' len da' choncho.

<sup>19</sup> Cheyala' gwšaljen lježcho no salmos na' gollen lježcho no himnos o bichle da' ža Spiritw che Diosen' golcho. Na' cheyala' nechon na' golchon do yichj do laže'cho gonxencho Xancho Jesucriston'. <sup>20</sup> Yogo' ni'a cheyala' güe'cho yela' choxcen che Xacho Diosen' che yogo' da' chone' chaclene' chio'. Na' Xancho Jesucriston' zoe' chaclene' chio' cont güe'cho yela' choxcen che'.

*Can' cheyala' soalen bene' lo' yo'o chechon'*

<sup>21</sup> Da' chapcho Diosen' bala'an cheyala' gwzexjw yichjcho gwzenagcho tocho yetocho.

<sup>22</sup> Na' le'e no'ole, le'e nšagna'le, to tole cheyala' gwzenagle che bene' chele, le chzenagle che Xancho Criston' cate' chzenagle chegaque'.

<sup>23</sup> Diosen' nzoe' bene' chele cont zjanacche' blao ca le'e, can' nzoe' Criston' nacche' blao ca chio' chdop chžagcho chonxenchone'. Le chion' guac nacho naccho cuerp che Criston', na' le' none' chio' yela' mban toli tocañe.

<sup>24</sup> Na' ca chio' chonxencho Criston' cheyala' gwzenagcho che', ca'czen' le'e no'ole le'e nšagna'le, to tole cheyala' gwzenagle che bene' chele yogo' bin' chese'e le'e.

<sup>25</sup> Na' le'e bene' byo le'e nšagna'le, to tole cheyala' gague no'ol chelen' con can' chaque Criston' chio' chonxenchwne' na' bnežjw cuine' neche chio' cate' gosote'ne'. <sup>26</sup> Na' cont gwlo'e chio' lo' na' Diosen', beyone' lažda'ochon' xilaže' cate' gwyejle'cho xtižen'.

<sup>27</sup> Na' bene' ca' cont yebede' chio' cate' yežincho lagüen', bibi xtola'cho gata' na' ne bichle da' mal yo'o nyaz lo' yichjlažda'ochon', san gac lažda'ochon' xilaže' lagüen'.

<sup>28</sup> Na' con can' nži'ilaže' Criston' chio', can' cheyala' ži'ilaže' to to bene' byo no'ol chen'. Le'e bene' byo, to tole cheyala' ži'ile no'ol chelen' can' nži'ile cuerp chelen', le nži'icze cuinle cate' chonle ca'.

<sup>29</sup> Nono zoa no chgue'e cuerp che', san yogo'cho nži'icho cuerp chechon' na' chapši'ichon. Na' can' chon Criston' len chio' chonxenchone', nži'ide' chio' na' chapši'e chio'.

<sup>30</sup> Na' chone' ca' da' naccho ca to cuen güeje cuerp chen', ca žit da' yo'e na' ca xpele'. <sup>31</sup> Na' Xtiža' Diosen' nyojen žan: "Da'nan' bene' byo le'e len xaxne'e na' si'e no'olen' gwšagna'lene' le' na' yesaque' toze."

<sup>32</sup> Diža' quinga ba bzoja' naquen to da' nono gwyejni'i cani', perw chnia' naquen to da' chzejni'in chio' chdop chžagcho chonxencho Criston' cont nezecho can' cheyala' soacho len le'. <sup>33</sup> Na' lecze ca' le'e bene' byo le'e nšagna'le, to tole cheyala' gague no'ol chele can' chaque cuinle, na' le'e no'ole nšagna'le, to tole cheyala' gagle bala'an bene' chele.

## 6

<sup>1</sup> Na' le'e bidao', le gwzenag che xaxna'le, le can' cheyala' gon chio' naccho txen len Xancho Criston'. <sup>2</sup> Cate' Diosen' bnežjue' xozxta'oto' ca' ley chen', gwne': "Le gap bala'an xaxna'le." Na' goquen da' nechw da'

bžie' bia' yesone' da' nsa' to da' güen da' gone' len legaque' še yosozenague' chen, gwne': "Le gap bala'an xaxna'le<sup>3</sup> cont gac güen chele na' cont banleşa lo yezlio nga."

<sup>4</sup> Na' le'e nita' xi'inle, le yosgol le yoscha'o bi' chele ca' binlo, diža' šagüe' gwzejni'ile legache' cont yosozenagbe' che Xancho Criston' na' gague con gonle ga yeseža'a yeselocbe'.

<sup>5</sup> Na' le'e mos, le gwzenag che xan žin chelen' do laže'le na' le yeyiljwlaže' naquen' gonle da' yesazlaže' to toe', le lecze chzenagle che Criston' caten' chzenagle chegaque'.

<sup>6</sup> Le gwzenag chegaque' do yichj do laže'le, gague cate'zen' chesene'e can' chonlen', le nacle bene' güen xšin Criston', na' can' chaclaže' Diosen' goncho. <sup>7</sup> Na' cheyala' güe'laže'cho goncho žin che bene' cont yebe Xancho Criston' chio', gague cont yebe bene' nac xan žin na'ze. <sup>8</sup> Goncho ca', le nezecho bite'teze da' güen da' choncho, Xancho Criston' gone' cont žin ža yebi'in güen len chio', chio' naccho esclavos na' len chio' bi naccho esclavos.

<sup>9</sup> Na' le'e nacle bene' xan žin, le gon güen len bene' ca' cheson xšinle. Bitw co'ole legaque' šeb, le Xancho Diosen' zoe' yaban' chna'cze' can' chonlen', na' lecze chna'cze' can' cheson bene' güen žin chelen', na' toz can' chone' len yogo'lol bene' note'teze zjanaque'.

#### *Can' goncho cont Satanásen' bi gonen chio' gan*

<sup>10</sup> Nachen' bene' migw, da' naccho txen len Xancho Criston', cheyala' soachachcho šejnilaže'chone', le nape' yela' guac xen cont chaclene' chio'. <sup>11</sup> Cheyala' gon cuincho gual doxen can' chaclaže' Diosen' goncho, cont soachachcho bi šejle'cho che Satanás dan' chnabia' da' xigüe' ca' cate' chyiljwlažen' siyen' chio'. <sup>12</sup> Le gague bene' nac bela' chenna' chdillencho, san chdillencho da' xigüe' ca', da' ca' besyeyaquen da' mal, na' bichle da' chesenabia' bene' že' yezlio nga bene' nchoj yichjlažda'ogaque' len da' malen'. Chdillencho yogo'lol spiritw mal ca' gate'teze chesašen. <sup>13</sup> Da'nan' cheyala' gon cuincho gual doxen can' chaclaže' Diosen', cont Satanásen' bi soeczen chio' ža cate' tillenen chio'. Na' cate' ba bencho can' chazlaže' Diosen', nach cheyala' soachachcho len le'. <sup>14</sup> Na' cont soachachcho bi siye' Satanásen' chio', cheyala' güe'cho diža' li yogo' ni'a. Na' še goncho ca', gaclenen chio' ca da' chchej soldadon' cho'a li'e. Na' cheyala' goncho da' nac güen yogo' ni'a, le še goncho ca', gwcue'ejen chio' ca xa soldadon' da' naquen de ya hcue'ejen cho'alcho'e. <sup>15</sup> Na' cheyala' soacho probnidw güe'lencho bene' diža' güen che Criston' da' chzejni'in can' guac soacho binlo len Diosen'. Na' še soacho probnidw güe'lenchon bene', gaclenen chio' can' chaclen xel soldadon' le'. <sup>16</sup> Na' da' zejechen ca bichle da' goncho, cheyala' soachachcho šejnilaže'cho Diosen'. Na' še soachachcho šejnilaže'chone', nach gaclenen chio' cont bi gwzenagcho che Satanásen'. Gaclenen chio' ca escudo da' chchin soldadon' chaclenen le', chosolen yi' che flechas ca' da' chesala'ninen zja'aquen gan' zien', na' hcue'ejen le' len da' ca' zja'ac yeseyidjon cuerp chen'. <sup>17</sup> Na' cheyala' yosa'laže'cho Criston' ba bene' yela' mban checho toli tocane, cont gaclenen chio' ca chaclen lapa' de ya da' chchin soldadon'. Na' lecze Xtiza' Diosen' da' ben Spiritw che Diosen' cont nyoen, le gonchgua xbab chen cont gaquen len le'e ca to spada da' chchin soldadon'. <sup>18</sup> Na' do tiemp cheyala' yol güižcho Diosen' nabcho yogo' da' chzejni'i Spiritw chen' chio'. Na' cheyala' gaccho bene' banlaže' na' yol güižchone' sin cbi yeche'echo, nabcho gaclene' yogo' bene'

ba gwleje' cont zjanaque' lo ne'e. <sup>19</sup> Na' le nab gon Diosen' latje gua' xtižen', na' le nab bi žeba' gua' diža' tcho'a gwzejni'ida' bene' diža' güen che Criston' da' nono gwneze cani'. <sup>20</sup> Le Diosen' gwsele' neda' ca gualaze' cont bia' xtižen', na' da'nan' dia' ližya nga. Nachen' le nabe Diosen' gaclene' neda' bi žeba' gua' xtižen' tcho'a can' cheyała' guan'.

*Pablon' chone' chač laže'gaque'*

<sup>21</sup> Chselä' bene' migw checho Tíquico güe'e diža' doxen can' chac cont nezele can' chac chia' na' yogo' da' chona'. Chaquecho Tíquicon' da' naque' txen len chio' chonxencho Criston' na' zoateze' chone' xšin Xancho Criston' can' cheyała' gone'. <sup>22</sup> Nachen' chselä'ne' cont nezele can' chac cheto' na' cont gone' chač laže'le.

<sup>23</sup> Chnaba' lao Xacho Diosen' len Xancho Jesucriston' yesonšque' cont yogo'le chonxenle Criston' soa cuezle binlo len yichjlažda'olen', na' lecze yesonšque' cont yogo'le gaque lježle na' soachachle šejnilaže'lene'. <sup>24</sup> Soašcacze Diosen' gaclene' yogo' bene' chesacde' Xancho Jesucriston' sin chi yesebeze'. Da' na'zen' chzoja'.

## CART DAN' BZOJ POSTLW SAN PABLO CHE BEÑE' CA' ŽE' FILIPOS

*Pablo bzoje' carten' šlac die' ližya*

<sup>1</sup> Neda' Pablo chsela' cart nga txen len bene' lježa' Timoteo. Chopte neto' gwlej Diosen' cont chonto' xšinen', bite'tezen' že'. Na' chzoja' cart nga che yogo' le'e zoale ciuda Filipos, le'e yo'ole lo na' Diosen' lagüe chejnilaže'le Cristo Jesúsen'. Na' le'e nchojle chgüia chna'le bene' lježle chesejnilaže'ne', na' le'e nchojle chonle žin bixjw da' chata' ladjo le'e chdop chžagle chonxen'ne', decze da' nia' le'e len cart nga. <sup>2</sup> Chñabšca' lao Xacho Diosen' na' Xancho Jesucriston' yesaclenšque' le'e na' yesone' cont soa cuezle binlo len xbab da' yo'o lo' yichjlažda'olen'.

*Pablo chñabde' Diosen' gaclene' bene' ca' chesejnilaže' Criston' Filipos*

<sup>3</sup> Yogo' ni'a cate' chjayze'eda' le'e, choa' yela' choxclen che Diosen' ba naccho txen chejnilaže'chone'. <sup>4</sup> Na' yogo' ni'a cate' chol güiža' Diosen', chbeda' chñaba' gaclene' le'e. <sup>5</sup> Na' choa' yela' choxclen chen' naccho txen chejle'cho diža' güen che Jesucriston', gwzolaoten cate' za' gwyejnilaže'ne'. <sup>6</sup> Na' da' nga nežda', Diosen' gwzolağüe' chone' to da' güen lo' yichjlažda'olen' cana', na' gone' cont yeyož yeyac yichjlažda'olen' can' chazlažen' cate' žin ža yid Jesucriston' da' yoble. <sup>7</sup> Da' cheyala'cze gona' xbab chele ca', le chacchğüeda' le'e. Na' nežda' Diosen' ba goclene' le'e can' ba goclene' neda' šlac dia' ližya nga, na' šlac ba gwdixjue'eda' diža' güen che Criston' len bene' bi gosejle'e chen, bzejni'ida' legaque' naquen diža' li. <sup>8</sup> Diosen' nežde' chacchğüeda' yogo'le, le Cristo Jesúsen' chone' cont chacda' le'e. <sup>9</sup> Na' chñabda' Diosen' gonšque' cont gaquechln' na' gaqueche lježle na' lecze šejni'ichle yogo'lol da' chaclaže' Diosen' šejni'ile na' gache'ele bi da' naquech güen gonle cont gaclen lježle. <sup>10</sup> Chñaba' da' ca' cont gache'ele bin' chazlaže' Diosen' gonle, na' lecze cont soacze do laže'le na' bibi doła' gaple cate' žin ža yid Criston' da' yoble. <sup>11</sup> Nach gaclen Jesucriston' le'e gonchguale da' nac güen, na' Diosen' si'e yela' bala'an na' yezica'chle bene' yesonxene' Diosen' can' chonlen'.

*Pablon' chacde' Criston' do yichj do laže'*

<sup>12</sup> Bene' migw, che'nda' nezele yogo' dan' ba goc chia' ba gosaclenen cont bene' zanch gosende' diža' güen che Criston'. <sup>13</sup> Le yogo'lol soldadw gop ca' cheson žin che bene' gwnabia' nga, na' yezica'chle bene' že' do nga zjaņezde' dia' ližya neče choa' xtiža' Criston'. <sup>14</sup> Na' bene' zan bene' lježcho že' nga lecze ba chesejnilaže'chgüe' Xancho Criston' da' ba besele'ede' can' chaclene' neda' šlac dia' ližya nga. Da'n'an' legaque' lecze ba cheseyaxjchde' cheso'e xtiža' Diosen' sin ca' chesežebe'.

<sup>15</sup> Da' li bale' cheseyixjue'ede' xtiža' Criston' da' chesacxi'ede' neda' na' da' chesaclaže' yesacche' blaoch ca neda', perw yezica'chle bene' ca' cheseyixjue'eden' do laže'. <sup>16</sup> Na' bene' ca' to cuen cheseyixjue'ede' xtiža' Criston' cont yesacxen' cuine', gague cheseyixjue'eden' do laže'gague'. Chesone' xbab zoayaša' da' cheseyixjue'eden'. <sup>17</sup> Na' bene' ca' yezica'chle cheseyixjue'eden' lagüe chesacde' Criston' na' chesacde' neda', le zjaņezde' neda' dia' ližya nga neče chzejni'ida' bene' bi chesejle'e diža'

güen che Criston', chape'gaca'ne' naquen da' li. <sup>18</sup> Perw bibi nonen len neda' še cheseyixjue'eden' do laže' o še gague do laže', con chebeda' cheso'e diža' che Criston' da' nac diža' li.

Na' dehcze da' chebeda', <sup>19</sup> le nezda' yechoja' güen len da' quinga chac chia' lagüe dan' chñable gaclen Diosen' neda' na' lagüe dan' zoa Spiritw che Jesucriston' len neda' chonen chaçh laža'. <sup>20</sup> Da'n'an' zoa' lez gaclen Diosen' neda' gua' xtiža' Criston' sin cbi žeba'. Na' la'czla' še soacha' o la'czla' še gata', chaclaža' si' Criston' yela' bala'an' na'a len da' gona' na' len da' gac chia' con can' ba gwxi'e yela' bala'an'. <sup>21</sup> Chzelaža' gacxen Criston' len bite'tez da' chona' šlac ne' mbana', na' lecze nezda' soa' mbalazchgua cate' ba gota', le šjayzoalena'ne'. <sup>22</sup> Perw še soacha' yežlio nga na' goncha' xšin Xancho Criston' cont šanch bene' yesejnilaže'ne', o še gata', bi nezda' non' nac güench. <sup>23</sup> Naquen zdebe nia' non' naquech güen, še soacha' o še gata', le yebeda' gata' na' šjayzoa' len Criston', na' mbalazech soa' neda', še ca'. <sup>24</sup> Perw lecze chona' xbab le'e chyažjele soacha' banča'. <sup>25</sup> Na' da' chache'eda' chyažjele soacha', nezda' soacha' len le'e cont gaclena' soachle mbalaz da' chejnilaže'le Criston' na' soachachle šejnilaže'lene'. <sup>26</sup> Na' cate' yechoja' nga soacha' len le'e da' yoble, yebele güe'le diža' can' ben Cristo Jesúsén' cont bechoja' ližyan'.

<sup>27</sup> Na' bite'teze gac, le soa le gon da' güen can' cheyała' gon chio' ba bzenagcho che diža' güen che Criston'. Le gon ca' cont še yedena'a le'e o še bi yedena'a le'e, con che'nda' yenda' rson chele zoachachle len toze xbab, chonle txen len bene' lježle, na' chonle con ca zelao chzaque'le cont yezica'chle bene' yosozenague' xtiža' Criston' da' ba chejnilaže'le, <sup>28</sup> neca žeble še bi yesone bene' le'e neče chesegue'ede' le'e. Še bi žeble da' yesonde' le'e, gonen cont yesacbe'ede' ba zoa yesebiaye'e toli tocan; lecze gonen cont yesacbe'ede' Diosen' gone' cont šjayzoale len le'. Yogo' da' ca' zjanaquen da' gon Diosen'. <sup>29</sup> Na' Diosen' ba bsi'e xnezen' gacxen Criston', gague lagüe da' chejnilaže'lene' na'zen', san lecze gacxene' da' yosoçi yososaca' bene' le'e neče chejnilaže'lene'. <sup>30</sup> Le'e len neda', toz can' chosoçi chososaca' bene' chio'; na' ba ble'ele can' bchejda' len da' ba gosonde' neda' cana', na' ba nezele can' chac chia' na'a.

## 2

*Criston' chaxene' da' bzande' yela' zaca' che' cont bide' golje' benačh*

<sup>1</sup> Nezda' zoale mbalaz da' chejnilaže'le Criston', nezda' chaclaže'le gonle da' güen lagüe dan' chaque Criston' le'e, nezda' zoa Spiritw chen' len le'e, na' nezda' chaque lježle na' cheyaše'laže'lene' cate' bi da' chesac che'.

<sup>2</sup> Da'n'an' chñeyoeda' le'e, le gon cont yebechgüeda' nezda' lecze yogo'czle nacle toz len lježle, na' yogo'czle toz can' zoale chaquele Criston', toz can' chonle xbab, na' toz can' chaclaže'le gac. <sup>3</sup> Bibi cheyała' goncho cont gac güen che cuinzcho na' bibi goncho cont gacxen cuincho, san cheyała' gwzexjwlaže'cho na' goncho xbab zaca'ch bene' lježcho clal ca chio'. <sup>4</sup> Ne tocho bi cheyała' cue' yichjcho che cuinzcho, san cheyała' cue' yichjcho che dan' gaclenen bene' lježcho ca'.

<sup>5</sup> Cheyała' goncho xbab ca xbab da' ben Cristo Jesúsén'. <sup>6</sup> Le la'czla' naque' Dios, bzande' yela' chnabia' che' na' yela' bala'an' xen che' dan' nape' lagüe da' naque' toz len Xe' Diosen' cont bide' golje' benačh. <sup>7</sup> Bzoe' to šla'ale yogo' da' zaca' dan' gota' che', na' ben cuine' bene' güen xšin Diosen' cate' golje' benačh. <sup>8</sup> Na' ba naque' benačhen' bzexjwlaže'

cont bene' con can' gwna Xe' Diosen'. Bzenague' che' cont bnežjw cuine' gosote'ne' le'e yag cruz ca chesote' bene' malchgua. <sup>9</sup> Da'n'an' Diosen' benxenchgüe' le' na' bsi'e xnezen' cont Jesucriston' naque' Xan beñach, angl, da' xigüe' na' yogo' bichle da' de, na' cont Jesucriston' chn-abia'che' ca note'tezechle. <sup>10</sup> Na' žin ža cate' yogo'lol beñach na' yogo'lol angl ca' yosozoa xibgaque' lao Jesucriston', bene' že' yaba, yežlion' na' gate'tezechle. Na' lecze ca' yeson da' xigüe' ca'. <sup>11</sup> Yogo'lol bene' yo'o biš grasyw yosozexjwyichje' yesene' le' Jesucriston' nape' la'zelagüe yela' gwnabia' xen. Na' Xancho Diosen' gaxcene' cate' yogüe' yesene' ca'.

*Bene' chesejnilaže' Criston' zjazaca'lebbe' ca be'ni'*

<sup>12</sup> Da'n'an' bene' migw, con can' ba gwzoale bzenagle chia' cate' gwzoo' len le'e, ca'czen' chonchen byen gwzenagle chia' na'a bi zoa' len le'e. To tole le gon cont nachbia' Diosen' ba bene' le'e yela' mban toli tocañe, na' le soa cueze gwsaca'le gonle can' chazlaže' Diosen'. Le gon ca' do chžeble, le nezecho bi soecho da' malen' še ba chzenagcho chen. <sup>13</sup> Na' Diosen' chone' cont che'nele gonle can' chazlažen', na' chaclene' le'e chonlen.

<sup>14</sup> Le gon yogo' dan' chazlaže' sin cbi gacyožlen'ne', neca žeše'le che'. <sup>15</sup> Le gon ca' cont yesacbe'e bene' chonle can' chazlaže' Diosen' sin cbi doła' gaple. Bibi da' xinj gonle. Bi gonle ca' cheson bene' laždao' mal ben' chesonchgua cele. Nach gacle ca' to da' chseni' len yezica'chle bene že' yežlio nga, <sup>16</sup> güe'lenle legaque' xtiža' Criston' da' nsa' yela' mban toli tocañe. Še gonle ca', nach cate' yid Criston' da' yoble, yebechgüeda' can' benlen' na' nezda' dan' bžaglagua' bena' xšin Diosen' gan' zoalen', gague bendadzan'na'. <sup>17</sup> Le'e chzane cuinle chonle xšin Diosen' lagüe dan' chejnilaže'lene', na' da'n'an' zaca'leble ca' to beyixe' be ba gosot bene' cont bosozeye'ba' gosonxene' Diosen'. Na' neda', chebeda' chzanda' yela' mban chia' cont gac doxen can' chazlažen', na' da'n'an' zaca'leba' ca' to vino da' chosolalje bene' lao Diosen' cate' chesonxene'ne'. <sup>18</sup> Le yebe len neda' da' chzane cuina' gac da' gac chia', na' le soa mbalaz can' zoa' neda'.

*Timoteo na' Epafrodito*

<sup>19</sup> Zoa' lez gon Xancho Jesús'en' latje yob sela' Timoteo gan' zoalen', le yebechgüeda' yenda' can' ba chonlen'. <sup>20</sup> Le nono nochle zoa bene' sela' bene' chi'chgua yichje' gac güen chele can' chi' yichj Timoteon'. <sup>21</sup> Yezica'chle bene' con zjachi' yichjgaque' che dan' chac chegaque', na' bi zjachi' yichje' can' chaclaže' Jesucriston' gac. <sup>22</sup> Perw nezeceze ca zoacze Timoteon' chone' da' zaca', na' nezele can' ba goclene' neda' cont gwduxjue'eda' xtiža' Diosen' zan yež. Ca bene' chaque xe' zoe' chaclene'ne' len xšinen', can' zoa Timoteon' chaclene' neda'. <sup>23</sup> Da'n'an' zoa' lez guac sela'ne' gan' zoalen' cate' la' nezteda' nac gac chia' nga, <sup>24</sup> na' sela'ne' la'czla' chejli'a gon Xancho Criston' cont lecze neda' yob yedena'a le'e.

<sup>25</sup> Na' lecze chacda' chonen byen yesela' bene' lježcho Epafrodito gan' zoalen', ben' gwseła'le nga cont chaclene' neda' len bi da' chyažjda'. Ba bene' xšin Diosen' txen len neda', na' lecze ba gwdi gwxaca'to' txen. <sup>26</sup> Che'nchgüede' yele'ede' le'e, na' leca da' chacde' gwnezele gocšende'. <sup>27</sup> Na' da' li gocšenchgüede', yelate'ze ca gote', perw Diosen' beyaše'de' le', na' bi nacho toz le' beyaše'de', san lecze beyaše'de' neda' cate' beyone' le', le da' zan da' ba goc chia' na' nyaše'chgua goc chia' šaca' gote'. <sup>28</sup> Da'n'an' zelaže'cha' yesela'ne' gan' zoalen' cont soale mbalaz yežagle da' yoble na'

cont bich soayaše'le che'. <sup>29</sup> Le gwlebe' binlochgua da' naque' txen len chio' chejnilaže'cho Xancho Criston', na' le gon xbab ba bene' to da' zaca', na' lecze ca' le gon xbab che nochle bene' chon can' ba benen'. <sup>30</sup> Le yelate'ze ca gote' da' bzane cuine' goclene' neda' nga len xšin Criston', can' goncze le'e šaca' zoale nga len neda'.

### 3

#### *Soa cuezcho goncho can' chazlaže' Diosen'*

<sup>1</sup> Na' na'a bene' migw, cheyała' soacho mbalaz da' chejnilaže'cho Xancho Criston'. Bi chacda' zed chozoja' che da' ca' ba bzoja', le chyažjen gonchle xbab chen. <sup>2</sup> Le gwsaca' cont bi gwzenagle che bene' ca' chesene' cheyała' soale señw dan' že' circuncióń da' yesechogue' lo cuerp chelen', le zjanaque' bene' zban na' chesyelalde' chesone' da' mal. <sup>3</sup> Le de to señw checho cont nezecho naccho xi'in Dios. Señwna' naquen da' ba ben Diosen' chio' Spiritw chen' cont chaclenen chio' chonxenchone'. Chebechgüecho chejnilaže'cho Cristo Jesúsén', na' bi zoacho lez gata' bichle da' gaclenen chio' lao Diosen', ca no señw da' zoa lo cuerp chechon' o bichle da' goncho. <sup>4</sup> De da' zan da' guac gona' xbab gaclenen neda' lao Diosen' šaca' chacda' yebe Diosen' neda' neche da' ba bena' o nac naca'. Nono zoa no nacho ba benche' da' zan da' yebe Diosen' ca neda'. <sup>5</sup> Le naca' bene' Israel na' golja' lo diaža che da' Benjamín, na' bosozoe' neda' señw che circuncióń to xmanzda'. Na' goljlena' diža' hebreo da' nac xaxna'a bene' chesaque' diža' hebreo. Na' bsedyana' ley dan' bzoj da' Moisésén' con can' chosozejni'i bene' fariseo ca' len. <sup>6</sup> Na' leca gwche' yichja' diža' gole che bene' Israel gualaž chia'. Da'nán' bchi bsaca' bene' ca' chesejnilaže' Criston'. Na' con ga zelao gwzoeda' bzenaga' che yogo' dan' ža ley cheton' cheyała' gonto' o bi cheyała' gonto'. <sup>7</sup> Na' cana' bena' xbab yogo' da' ca' yesaclenen neda' cont yebe Diosen' neda', perw na'a ba chache'eda' bi yesaclenen. Ba bchojyichja' da' ca' cate' gwyejnilaža' Criston', le gocbe'eda' bi yesaclenen neda' lao Diosen'. <sup>8</sup> Na' na'a da' nombi'a Xana' Cristo Jesúsén' naquen da' zaca'chgua len neda'. Bibi zaca' yogo' da' ca' godca' cana' yesaclenen neda' lao Diosen'. Yogo' da' ca' bebeda' cana' ba zjanaquen ca to da' bibi zaca' len neda', na' nonan' ca to beb da' ba gwcho'ona' cont gombia'cha' Criston'. <sup>9</sup> Le zelaže'chgua' gaca' toz len Criston', na' zelaža' na Diosen' naca' bene' güen len le'. Na' nezda' ne' naca' bene' güen len le' da' chejnilaža' Criston', gague lagüe da' chona' bi da' ža ley dan' bzoj Moisésén' cheyała' goncho. Le con bene' chesejnilaže' Criston' none' legaue' ca bene' güen. <sup>10</sup> Chaclaža' gombia'cha' Criston' na' gombi'a yela' guac che' dan' nape' lagüe bebane' ladjo bene' guaten', na' chzanlaže' cuina' saca'zi'a can' gwdi gwxcaca' le'. Na' ca Criston' gote' neche xtolan', chaclaža' gaca' ca to bene' guat len da' malen', bich gonan'. <sup>11</sup> Zoa' chbeza' ca', le cheyljwlaža' nacle gona' cont yečhis yosban Diosen' neda' ladjo bene' guat ca' cate' ba gota'.

#### *Pablo chaclaže' gacyichjlažda'ogüe' can' nac yichjlaždao' Criston'*

<sup>12</sup> Bi nia' bačh nac yichjlažda'ogua' can' cheyała' gaquen, le biña' gaquen can' nac yichjlaždao' Cristo Jesúsén'. Perw chona' con ga zelao saqueda' cont gaguech yichjlažda'ogua' can' nac che le', le ba gwleje' neda' naca' xi'ine'. <sup>13</sup> Bene' migw, nezda' biña' gac yichjlažda'ogua' can' cheyała' gaquen, perw ba bchojyichja' yogo' da' ca' gosac da' zaca' len neda'

cana' na' yogo' bin' ba bena', na' chi' yichja' da' mbalaz da' chbeza' gac. <sup>14</sup> Chona' con ga zelao saqueda' cont Diosen' yebede' neda' cate' yežina' gan' zoen'. Le Diosen' gwleje' neda' cont gac yichjlažda'ogua' can' nac yichjlaždao' Cristo Jesúsen' lagüe da' chejnilaža'ne'.

<sup>15</sup> Na' yogo'cho še ba zej chaccho can' chaclaže' Diosen' gaccho, cheyala' goncho xbaben' ca', na' še yo'ocho bichle xbab yoble, Diosen' gwzejni'iden' chio'. <sup>16</sup> Perw na' cheyala' soaczcho goncho can' ba bzejni'i Diosen' chio'.

<sup>17</sup> Bene' migw, le gon can' chona' neda', na' le na' can' cheson yezica'chle bene' cheson can' ba bzejni'ida' le'e, cont gonle can' chesonen'. <sup>18</sup> Da' yoble žia' can' ba gwnia' zan las, can' zjanita' bene' zan, nachbia' chesegue'ede' Criston' ben' bnežjw cuine' gote' le'e yag cruzen' neče xtola'chon'. Na' chbeža' da' chesone' ca'. <sup>19</sup> Žin ža yesebiayi' bene' ca' toli tocaņe, le chesyebchde' chese'ej chesagüe' clcl ca' yesonxene' Diosen'. Chesaclaže' cheso'e diža' che bi da' yela' zto' da' chesone', na' zjachi' yichje' tloaze da' chac yežlio nga. <sup>20</sup> Perw chio', bich choncho xbab nac lažcho yežlion', le nezecho naquen gan' zoa Xancho Jesucriston' ben' non chio' yela' mban toli tocaņe, na' chbezcho batcan' yide' da' yoble. <sup>21</sup> Na' caten' yide' da' yoble, gone' cont cuerp checho quinga da' bitec bi zaca' yesyeyaquen da' cobe, na' yesaquen leca güen can' ba nac cuerp che le'. Gone' ca', le nape' yela' guac neče gone' cont yogo'lol da' zjade yosozenaguen che'.

## 4

### *Cheyala' soacho mbalaz da' chejnilaže'cho Criston'*

<sup>1</sup> Na' na'a bene' migw, chacda' le'e na' che'nchgüeda' le'e lježcho da' yoble. Chbechgüeda' da' chejnilaže'le Criston', na' zoa' mbalaz neče le'e. Le'e bene' chacda', le soachach šejnilaže'le Xancho Jesucriston'.

<sup>2</sup> Na' chneyoeda' le' Evodia, na' lecze ca' le' Síntique, le soašca binlo na' le gac txen tole yetole da' chejnilaže'le Xanchon'. <sup>3</sup> Na' ca' nac le' bene' lježa', len' beno' xšin Diosen' do yichj do lažo' txen len neda' cana', na' chneyoeda' gacleno' no'ol quinga yesyenite' binlo len lježe' da' yoble, le legaque' ba gosone' xšin Diosen' txen len neda' na' len Clemente na' len yezica'chle bene' lježcho ca', na' zjanyoj la yogo' bene' ca' le'e libr che Diosen' gan' zjanyoj la bene' ba zjanape' yela' mban toli tocaņe.

<sup>4</sup> Le yebe yogo'te ža da' chejnilaže'le Xancho Jesucriston'. Da' yoble žia', le yebe. <sup>5</sup> Le gon cont yogo'lol bene' yesenezde' nacle bene' šagüe', le ba zoa yid Xanchon' da' yoble.

<sup>6</sup> Bi gacle tole bite'teze da' chac chele, san le yol güiž Diosen', nable gaclene' le'e bite'teze da' chac, na' le güe'e yela' choxclen cate' bi da' nabelene'. <sup>7</sup> Nachen' Diosen' gone' soa cuezle binlo len xbab da' yo'o lo' yichjlažda'olen' lagüe da' chejnilaže'le Cristo Jesúsen', cont bi gacle tole. Na' cate' le' ba chone' cont zoa chbezcho binlo len xbab chechon', neca gacbe'echo bixchen' zoachguacho binlo.

### *Cheyala' cue' yichjcho che da' zjanac güen*

<sup>8</sup> Na' da' la'zelagüe dan' chaclaža' neyoeda' le'e bene' migw, cue' yichjle che diža' li, che dan' nac da' zaque', che dan' zej to licha, che dan' bibi da' mal nsa', che dan' naquen binlo, na' che da' zaca' yebecho. Bite'teze da' naquen da' güenchgua na' bite'teze da' chazlaže' Diosen', le cuec yichjle che dan' zjanac ca'.



<sup>9</sup> Da' ca' bzejni'ida' le'e, yogo' dan' benele gwnia' cate' bsed blo'eda' le'e can' cheyała' gonle, na' da' ca' ba ble'ele chona' neda', da' ca' le gon. Na' Dios ben' chon cont chzoa chbezcho binlo len xbab da' yo'o lo' yichjlažda' ochon' soacze' gaclene' le'e.

*Can' gosaclen bene' Filipos ca' Pablon'*

<sup>10</sup> Chbechgüeda' lao Xancho Cristo Jesúsen' da' ba chi' yichjle chaclenle neda' da' yoble. Nežda' gwzoale chonle xbab chia', perw bi benen gaclenle neda'. <sup>11</sup> Na' žia' da' qui gague neče byažjda' da' ca' byažjda', le Diosen' ba bzejni'ide' neda' cont zoa' mbalaz cate' de da' chyažjda' na' cate' bibi de. <sup>12</sup> Ba yolagua' yela' yaše' yela' zi', na' yolagua' yela' šagüe'. Diosen' ba bzejni'ide' neda' cont zoa' mbalaz bite'teze chac chia', cate' de da' che'ej chagua' na' cate' chbił chdona', cate' de bichle da' chyažjda' na' cate' bibi de. <sup>13</sup> Chac chona' bite'teze da' cheyała' gona', le zoa Criston' len neda' chaclene'nda'. <sup>14</sup> Perw benle güen gwseła'le da' goclenen neda' cont naccho txen len dan' chyí chzaca' nga.

<sup>15</sup> Na' le'e zoale Filipos, nezele caten' beyož gwyejle'le diža' güen çe Criston' dan' bia' len le'e, benle txen len neda' cate' beza' distritw Macedonian', gwseła'le da' byažjda', na' nono nochle bene' ca' chesedop chesežag chesonxene' Criston' yež yoble goson ca'. <sup>16</sup> Le cate' ne' zoa' Tesalónica gwseła'le da' byažjda' zan ni'a. <sup>17</sup> Perw gague chzelaža' bi da' gonle neda', san chzelaža' soacze gonle güen cont yebe Diosen' le'e. <sup>18</sup> Ba benle doxen da' cheyała' gonle na' da' zcha'och ca'te' da' cheyała' gonle. Ba decze da' zcha'o chia' na'a. Bibi chyažjda', le ba ben Epafrodito da' gwseła'le chia'. Na' da' gwseła'le zaca'leben ca to yal da' chła' zix da' chzey bxozen' lao Diosen', le Diosen' chebede' can' benlen'. <sup>19</sup> Na' Dios chia' nan' goncze' yogo'te bi da' chyažjele lagüe chejnilaže'le Cristo Jesúsen', le yogo' da' de yo'on lo ne'e. <sup>20</sup> Cheyała' gonxencho Xancho Diosen' toli tocaņe. Can' gonšcaczcho.

*Pablon' zelagüe' bzede' legaque' diža'*

<sup>21</sup> Le gwguap tiox yogo'lol bene' Filipos ca' yo'o lo na' Diosen' da' chesejnilaže' Jesucriston'. Bene' lježcho ca' nita' nga len neda' chguapto' le'e tiox. <sup>22</sup> Na' lecze yogo' bene' Roma quinga ba yo'o lo na' Diosen' chosoguape' le'e tiox, lente bene' ca' cheson žin çe rey ben' nac la'zelagüe' bene' gwnabia' ben' chi' Roma.

<sup>23</sup> Xancho Jesucriston' soašque' gaclenšque' le'e len xbab da' yo'o lo' yichjlažda' olen'. Da' na'zen' chzoja'.

## CART DAN' BZOJ POSTLW SAN PABLO CHE BENE' CA' ŽE' COLOSAS

*Pablon' chzoje' bene' chesonxen Jesucriston' ciuda Colosas*

<sup>1</sup> Jesucriston' gwleje' neda' Pablo cont naca' postlw che', le can' chazlaže' Diosen'. Neda' txen len bene' lježcho Timoteon' chguapto' le'e tiox. <sup>2</sup> Chzoja' le'e zoale Colosas, le'e chejnilaže'le Criston' na' nacle lo na' Diosen'. Chnaba' gaclenšca Xacho Diosen' le'e na' gone' cont soa cuezle binlo.

*Pablo chnabde' Diosen' gaclene' bene' ca' že' Colosasen'*

<sup>3</sup> Yogo' ni'a cate' chol güižto' Dios ben' nac Xa Xancho Jesucriston' choe'to' yela' choxcen che' can' chonlen'. <sup>4</sup> Le ba beneto' diža' can' chejnilaže'le Cristo Jesús'en' na' can' chaquele yogo' bene' ca' yezica'chle zjanaque' lo na' Diosen'. <sup>5</sup> Na' nezeto' chejnilaže'lene' na' chaquele legaque' lagüe da' zoale lez šjayzoale len Diosen'. Caten' gwzoloa bzenagle che xtiža' Diosen' da' naquen da' güen na' da' li, gwejni'ile gac chele ca'. <sup>6</sup> Na' xtiža' Diosen' da' ba bzenagle ba goslasen doxen, na' bene' zan ba chosozenague' chen. Na' legaque' lecze chesone' güen ca gwzoloa le'e chonle caten' gwejni'ile diža' li da' chzejni'in nži'ilaže' Diosen' le'e, na' ne' chonle güen ža na'aža. <sup>7</sup> Chaqueto' Epafras ben' bzejni'ide' le'e xtiža' Criston'. Chone' xšin Diosen' can' chon neto', na' zoateze' chone' can' ža Criston' da' chaclaže' gaclene' le'e. <sup>8</sup> Len' ba gože' neto' ba ben Spiritw che Diosen' cont chaquele Diosen' na' chaquete lježle.

<sup>9</sup> Da'n'an' caten' gwnezeto' ca güenna' chonle, gwzolaoto' yogo' ni'a cate' chol güižto' Diosen' chnabeto'ne' gaclene' le'e. Chnabto' gon Spiritw chen' le'e yogo' cuen yela' sina' na' yela' chejni'i cont nezele nacyanen' chaclaže' gonle. <sup>10</sup> Chnabto' soale gonle can' cheyala' gon chio' nombia'cho Xanchon', cont yebede' yogo' dan' chonle. Na' chnabto' gaclene' gonle zan cuen da' güen na' gaclene' šejch gombialne'. <sup>11</sup> Chnabto' gaclen Diosen' le'e len yela' guac xen che' cont soatezle šejnilaže'lene' na' gapple yela' chxenlaže' bite'tezen' chac. <sup>12</sup> Na' chnabto' soale mbalaz güe'le yela' choxcen che Xacho Diosen', le le'na' ba gwleje' chio' ba naccho lo ne'e cont šjayzoacho len le' gan' yo'o be'ni' juisyw. <sup>13</sup> Bebeje' chio' lo na' gwxiyen' cate' da' chol'en' ne' chnabian' yichjlažda'ochon', na' gwlo'e chio' lo na' Xi'ine' Jesucriston' ben' chacde', cont na'a gwzenagcho che le'. <sup>14</sup> Na' Xi'in Diosen' bnežjw cuine' gote' cont beque'e xtola'chon' na' chezi'xen Diosen' checho.

*Criston' bozoe' chio' binlo len Diosen'*

<sup>15</sup> Criston' naque' cayanen' nac Xe' Dios ben' nono chle'e. Ba zoacze Criston' cate' bina' xe yežlion' na' cate' bina' gata' yogo'lol da' de le'e yaban' na' lo yežlion'. <sup>16</sup> Criston' bene' yaban' na' yežlion', bene' bene' že' yaba na' yežlio, len bica'chle da' zjade yaban' na' yežlio nga. Bene' da' ca' chle'echo na' da' ca' bi chle'echo. Bene' cont nita' angl gwnabia' ca' na' da' ca' besyeyac da' xigüe' ca' na' bichle da' ca' chesenabia' yichjlaždao' bene' ca' bi chosozenag che Diosen'. Na' Criston' bene' cont nita' bene' ca' na' yogo' da' ca' cont gacxene'. <sup>17</sup> Criston' ba zoacze' cate' bina' nita' yogo'lol da' de le'e yaban' na' lo yežlion'. Na' yogo' bite'teze da' zjade zjanaquen con can'

zjanaquen, le Criston' zoacze' chone' cont zjanaquen ca'. <sup>18</sup> Na' Criston' chnabi'e chio' chdop chžagcho chonxenchone'. Len' bxi'e yela' mban toli tocanē che bene' chesejnilaže'ne', na' naque' bene' nechw bebane' ladjo bene' guaten' ben' bich nabia' yela' goten' le'. Da'nan' naque' la'zelaogüe bene' blao na' chnabi'e yogo'lol'bene' na' bica'chle da' zjade. <sup>19</sup> Na' Diosen' chazlaže' dan' nac yichjlaždao' Criston' cayanen' nac yichjlaždao' le' na' dan' nac yela' guac che Xi'ine' Criston' doxen can' nac yela' guac che le'. <sup>20</sup> Na' lecze chazlaže' yozoe' binlo len le' yogo' bene' že' yaban' na' yežlion', le Xi'ine' Criston' bnežjw cuine' blalj xchene' le'e yag cruzen' cont gag yesenite' binlo len le'.

<sup>21</sup> Cana' bi nombia'le Diosen'. Bgue'elne' na' gwzoale benle da' malen'. Perw na'a ba bozoa Criston' le'e binlo len Diosen', <sup>22</sup> le bnežjw cuine' neche chio' caten' gosote'ne'. Na' beyone' lažda'ochon' xilaže' cont bibi doła' gapcho cate' yežincho lao Diosen', na' bibi de da' zaca' yosocuiše' chio' lagüen'. <sup>23</sup> Na' še soacho šejnilaže'cho Criston' na' soačhačcho len toze xbab, na' soateze soacho lez šjayzoacho len Diosen' can' gwzelaže'cho gag checho cate' bzenagcho xtižen' da' nechw, nachen' bibi doła' gapcho cate' yežincho lao Diosen'. Na' diža' güen chen' ba bžinen doxen yežlion' cont benačen' chesenden', na' Diosen' gwleje' neda' Pablo chyixjue'edan'.

*Diosen' gwleje' Pablon' cont bsed blo'ede' bene' chesonxen Criston'*

<sup>24</sup> Da' zan da' chyi chzaca' lagüe da' chyixjue'eda' xtiža' Diosen' len le'e bi nacle bene' Israel. Na' le'e chdop chžagle chonxenle Criston' nacle ca cuerp che'. Na' chbeda' chžaglagua' yogo' da' chaclaže' Criston' žaglagua' da' gaclenen le'e. Na' cate' chžaglagua' neda', guac nacho cuin Criston' chžaglagüe'. <sup>25</sup> Diosen' gwleje' neda' chyixjue'eda' xtižen' len le'e chdop chžagle chonxenle Criston', cont gwzejni'ida' le'e doxen can' zeje xtižen'. <sup>26</sup> Cani' nono na' neze da' güen da' chon Diosen' len bene' chesejnilaže'ne', perw na'a Diosen' ba bzejni'iden' chio', chion' naccho lo ne'e. <sup>27</sup> Diosen' chaclaže' nezecho leca güen juisyw chone' len note'tezcho chejnilaže'chone', la'czla' bi naccho bene' Israel. Cana' nono gwneze gone' da' güen juisyw len note'tezcho, perw na'a Diosen' ba bzejni'ide' chio' zoacze Criston' len chio' chejnilaže'chone' na' da'nan' zoacho lez šjayzoacho len Diosen' gan' yo'ochgua be'ni'. <sup>28</sup> Choe'lena' yogo' bene' diža' che Criston', chata'yoeda' yogüe' yosozenague' che', na' chzejni'ida' yogüe' xtižen' cont yesejni'iden' binlo, le chaclaža' yogo' bene' chesejnilaže' Criston' yesaque' cayanen' chaclaže' Diosen'. <sup>29</sup> Da'nan' chona' con ga zelao choeda' chyixjue'eda' bene' xtižen', na' chaclenchgüe' neda' len yela' guac xen chen'.

## 2

<sup>1</sup> Chaclaža' nezele chonchgua' ga zelao choeda' cont chaclena' le'e na' bene' lježcho že' Laodicea na' yezica'chle bene' lježcho bina' yesele'ede'nda'. <sup>2</sup> Chaclaža' gona' chač laže'le cont yichjlažda'olen' yesaquen toze lagüe da' chaque lježle. Na' chaclaža' nezeyane'le can' cheyla' gonle xbab cont šejni'ile da' ba bzejni'i Diosen' chio' che Criston' da' nono gwneze cani'. <sup>3</sup> Criston' nse'e doxen yela' sina' na' yela' chejni'i che Diosen' cont gwzejni'iden' chio'. <sup>4</sup> Chnia' ca' cont nono siye'e le'e len diža' da' chaquele naquen xdan. <sup>5</sup> Na' la'czla' bi zoa' na'le len le'e, zoa' chona' xbab chele na' chebeda' nezda' chonle can' cheyla' gonle na' zoačhačle chejnilaže'le Criston'.

<sup>6</sup> Na' n̄a'a, con can' ba gwzolaole chejnilaže'le Criston' na' ba nonl̄ene' X̄anle, con can' soačhačhle len le'. <sup>7</sup> Le soačhačh le šejnilaže'ch Criston' can' ba b̄sedlena', cont gacle ca to yag da' ba gwyaz loen sitjw. Na' le soa le güe'chgua yela' choxclen che Diosen' can' chaclene' le'e.

*Criston' ba bocobe' yichjlažda'ochon'*

<sup>8</sup> Le gwsaca' cont nono co'oyele' le'e gwzenagle che diža' sina' che yežlio nga da' naquen da' güenlaže'. Bene' že' yežlion' chosozejni'ide' da' zan da' chesene' cheyała' goncho da' bibi zjazaca', na' bitw chosozejni'ide' che Criston'.

<sup>9</sup> Yichjlaždao' Criston' naquen' cayanen' nac yichjlaždao' Diosa', na' nac yela' guac che Criston' doxen can' nac yela' guac che le'. <sup>10</sup> Na' Criston' chnabia'che' ca note'teze angl blao na' ca note'teze da' x̄igüe', na' chio', da' chejnilaže'chone', bich bi chyažjecho cont soa cuezcho binlo. <sup>11</sup> Na' lecze da' naccho txen len Criston' de to checho da' zaca'leben ca señw da' že' circuncišión, perw bi naquen señw da' bzoa bene' lo cuerp chechon', san da' ba bocob Criston' yichjlažda'ochon' cont da' malen' bich chnabian' chio'. <sup>12</sup> Na' da' gwzoacho nis caten' gwejnilaže'chone', zejen con can' got Criston' neche xtol̄a'chon', lecz ca' chio' ba naccho ca to bene' guat len da' malen' cont bi gonchon. Zejen bgaše'cho can' bgašen', na' lecze zejen bechis bosban Diosen' chio' ladjo bene' guat ca' can' bene' len Criston'. Zejen ca' le chejle'cho Diosen' bosbane' Criston' len yela' guac chen'. <sup>13</sup> Cana' gwxaca'lebcho ca to bene' guat len yichjlažda'ochon' da' bi bzenagcho che Diosen' na' gwzoacho bzenagcho che da' malen'. Nach Diosen' bene' len chio' can' bene' bosbane' Criston' ladjo bene' guat ca', le bocobe' yichjlažda'ochon' na' bezi'xene' xtol̄a'chon'. <sup>14</sup> Bi bencho yogo'lol can' ža ley che Diosen' cheyała' goncho, na' bencho da' žan bi cheyała' goncho. Da'n̄an' gota' xya checho len leyna' na' nchoglaon checho saca'zi'cho toli tocaņe. Perw Criston' bnežjw cuine' bosode'ene' le'e yag cruza' neche doła' xya chechon', na' da'n̄an' nezecho Diosen' ba bn̄itlagüe' xtol̄a'chon'. <sup>15</sup> Criston' cate' gote' le'e yag cruza' beque'e yela' gwnabia' che da' x̄igüe' ca' na' blo'ede' beņachen' ba blej bšošen'.

*Cue' yichjcho che da' ca' zjazacan' len Diosen'*

<sup>16</sup> Bi gwzenagle che bene' ca' chesena chonle mal che'ej chagwle bi da' che'ej chagwle, o bene' chesene' chele da' bi chonle no ža l̄ni, o bene' chesena qui ca' goncho cate' naquen bio' che'eñ, o bene' chesena ža ni ža na' nac ža che Dios. <sup>17</sup> Yogo' da' ca' con bosozejni'in late'lasze che Criston', perw n̄a'a da' bid Criston' bich chyažjecho da' ca', le ba nombia'chone'. <sup>18</sup> Bi gwzenagle še no bene' chzejni'ide' cheyała' gon cuinle ca to da' bibi zaca' cont soale binlo len Diosen', o bene' chzejni'ide' cheyała' gonxenle no angl o gonle bi da' že' ble'edagüede', le bi chebe Diosen' bene' cheson da' ca'. Bene' ca' chosozejni'ide' ca' chesacde' xbab da' chesaljlaže' zaca'chguan, len bitw bi zacan', <sup>19</sup> le bi chosozenague' che Criston'. Perw chio' chdop chžagcho chonxenhone', Diosen' none' cont Criston' chnabi'e chio' ca yichjchon' chnabian' cuerp chechon'. Na' naccho txen len le' na' len bene' lježcho ca to cuen güeje cuerp chechon' ngoden' txen, le xpela'chon' na' bechj bn̄ia' ca' zjanoxen' len con ca non Dios chegaquen.

<sup>20</sup> Chio' naccho txen len Criston', guac nacho Criston' ba none' chio' ca to bene' guat len da' xinjen' cont bi gonchon, ca bene' guaten' goc le' le'e

yag cruzen'. Da'n'an' bi cheyała' gwzenagcho cate' chesena bene' da' zan da' goncho cont soacho binlo len Diosen', le bi naccho bene' che yežlion'. ¿Bixčen' chzenagle che yela' sina' che yežlio nga da' ca' chesene' cheyała' gonle na' da' ca' chesene' bi cheyała' gonle? <sup>21</sup> Chesene': "Bi goxe'le da' nga", "Bi ye'ej gagwle da' na'", "Bi canle da' na'". <sup>22</sup> Na' yogo' da' ca' chesene' bi goxe'cho, bi ye'ej gagwcho na' bi cancho, da' chesede chen cate' chčinchon, na' dan' chesene' cheyała' goncho len da' ca', con xbab chegaczen'. <sup>23</sup> Guacte goncho xbab nac da' sina' da' chesene' cheyała' goncho, na' goncho xbab gaclenen chio' gonxencho Diosen', le chesene' cheyała' gwchi gwsaca' cuincho na' gon cuincho ca to da' bibi zaca'. Perw bibi zejen goncho ca', le bi chaclenen chio' cont bitw gwzenagcho che da' malen'.

### 3

<sup>1</sup> Can' bechis bosban Diosen' Criston' ladjo bene' guat ca', lecze can' bocobe' yichjlažda'ochon'. Da'n'an' cheyała' cuec yichjcho goncho can' chazlaže' Diosen' na' cuec yichjcho gac can' chebe Criston' ben' zoa yaba chnabi'e txen len Diosen'. <sup>2</sup> Na' cheyała' yebecho da' naquen da' zaca' len Diosen', gague da' naquen da' zaca' len benachen'. <sup>3</sup> Le guac nacho Criston' ba none' chio' ca to bene' guat len da' malen' cont da' malen' bich nabian' chio', na' mbancho len Criston' na'a cont naccho txen len Diosen'. <sup>4</sup> Criston' none' chio' yela' mban toli tocañe. Na' cate' le' yide' da' yoble, šjazyoacho txen len le' gan' yo'ochgua be'ni'.

#### *Can' bencho cana' na' can' cheyała' goncho na'a*

<sup>5</sup> Da'n'an' cheyała' cuejyichjcho da' mal da' žan goncho len cuerp chechon' dan' nac che yežlio nga. Bitw gata'lencho no'ole bi nac no'ol checho o bene' byo bi nac bene' checho. Bitw goncho bichle da' yela' zto' len cuerp chechon' neca yebecho bi da' nac da' yela' zto'. Bitw selaže'cho goncho bite'teze da' mal, neca selaže'cho da' zan da' gata' checho, le toz ca malen' nac yela' chzelažen' len da' cheson bene' chesejnilaže' l' gua'a lsaca' ca'. <sup>6</sup> Žin ža cate' Diosen' gone' cont bene' cheson da' ca' yesezaca'zi'e toli tocañe. <sup>7</sup> Le'e lecze gwzoale cana' benle da' mal ca' ba gwnia'. <sup>8</sup> Perw na'a cheyała' cuejyichjle yogo' da' mal. Bitw ža'a lježle, bitw locle, bitw gacle bene' xi'a len lježle, bitw nele che lježle, na' bitw güe'le diža' zban. <sup>9</sup> Na' bich güe'len lježle diža' güenlaže'. Ba gwlejyichjle da' mal da' gwnabia' yichjlažda'olen' cana' na' bich cheyała' gwzenagle chen da' yoble. <sup>10</sup> Ba chzenagcho che Dios ben' ben chio', le ba bocobe' yichjlažda'ochon'. Na' tža tža chzejni'ide' chio' cont zej chacch xbab chechon' can' nac chen'. <sup>11</sup> Na' chio' ba bocob Diosen' yichjlažda'ochon', bibi nonen še naccho bene' Israel o še bi naccho. Bibi nonen še zoacho señw da' že' circuncisión o še bi zoachon, na' bibi nonen še naccho bene' zito', la'czla' še za'cho gan' že' bene' bi chesejni'i, na' bibi nonen še naccho esclavo o še bi naccho. Da' naquen da' zeje, ba chejnilaže'cho Criston' na' len' zoe' len yogo'cho.

<sup>12</sup> Diosen' gwleje' chio' cont naccho lo ne'ena' na' chacde' chio'. Da'n'an' cheyała' yeyaše'cho bene' na' gaccho bene' šagüe' len yogo'lol bene'. Bi cheyała' ga'laže'cho, san gaccho bene' chzexjwlaže' na' gapcho yela' chxenlaže' len yogo'lol bene'. <sup>13</sup> Na' cheyała' gwdecho ca'ale še bi chac checho len bene' lježcho na' yezi'xencho še bi da' ba gosonde' chio', yezi'xencho can' ba bezi'xen žancho Criston' checho. <sup>14</sup> Na' yeto da' zejechen goncho ca yogo' da' ca', cheyała' gaque lježcho, le še chaque lježcho gaclenen

goncho yogo' da' ca' can' cheyała' gonchon. <sup>15</sup> Diosen' gwleje' chio' cont soa cuezcho binlo, na' cheyała' gwzenagcho che Criston' na' gacbe'echo yogo'cho naccho toze cont soa cuezcho binlo. Na' lecze cheyała' soacho güe'cho yela' choxcen che Diosen'.

<sup>16</sup> Cheyała' soacho goncho xbab che xtiža' Criston' na' gwzenagcho chen, na' lecze soacho gwzejni'i lježcho na' neyoe lježcho len doxen yela' sina' che Diosen' cont yogo'cho goncho da' güen. Na' cheyała' gołcho no salmos, no himnos, na' bichle da' ža Spiritw che Diosen' gołcho, na' güe'cho yela' choxcen che Diosen' lo' yichjlažda'ochon'. <sup>17</sup> Na' bite'teze da' goncho na' bite'teze diža' güe'cho, cheyała' nabcho gaclen Xancho Jesúsén' gonchon can' chazlaže', na' güe'cho yela' choxcen che Xacho Diosen' con can' chaclen Xancho Jesúsén' chio' chonchon'.

#### *Can' cheyała' goncho len lježcho*

<sup>18</sup> Le'e no'ole nšagna'le, to tole le gwzenag che bene' chele, le can' cheyała' gon chio' chejnilaže'cho Xancho Criston'. <sup>19</sup> Na' le'e bene' byo nšagna'le, to tole le gague no'ol chele na' bi gonle znia len legaue'. <sup>20</sup> Na' le'e bi' bixjw, le gwzenag che yogo'lol bi da' yesena xaxna'le, le can' chazlaže' Xancho Criston' gonle. <sup>21</sup> Na' le'e nacle xaxna' bi' bixjw, bi gonle cont yeseloc bi' chele ca', le še gonle ga yeselocbe', yesaquebe' zdebe yosozenagbe' chele. <sup>22</sup> Na' le'e chonle xšin bene', le gwzenag yogo'lol can' ža xan žinna' gonle. Bitw gonlele xan žinna' gonle ca bene' chonchgua žin cate'zen' chne'e le'e, san le gon žinna' do yichj do laže'le da' chejnilaže'le Diosen'. <sup>23</sup> Na' bite'teze da' gonle, le gonen do yichj do laže'le cont yebe Xancho Criston', gague contze yebe bene'. <sup>24</sup> Nezczele Xancho Criston' gone' cont yežincho gan' zoen' še soacho goncho can' chazlažen'. Na' zoacho cont goncho con can' ža Xancho Criston'. <sup>25</sup> Na' note'tezcho še bi choncho can' cheyała' goncho, Xancho Diosen' gone' saca'zi'cho neche dan' ba bencho. Na' toz can' chon Diosen' len yogo'lol bene'.

## 4

<sup>1</sup> Na' le'e nacle xan žin, le gon güen na' le gac bene' šagüe' len bene' cheson xšinlen', le nezczele Criston' ben' zoa yaban' naque' Xanle.

<sup>2</sup> Yogo'te ža cheyała' nabcho gaclen Diosen' chio' len da' choncho na' len bichle da' chac checho, na' cheyała' güe'cho yela' choxcen che', na' bi cheyała' güedcho yol güižcho Diosen'. <sup>3</sup> Na' le nabe Xancho Diosen' gone' cont gac güe'lento' bene' xtiža' Criston' da' biña' yesejni'ide', le neche dan' ba bia' xtiže'nan' dia' ližya nga. <sup>4</sup> Na' le nabe Diosen' gaclene' neda' gwzejni'ida' bene' diža' güen che Criston' binlo cont yesejni'iden'.

<sup>5</sup> Cheyała' soacho goncho güen len bene' biña' yesejnilaže' Criston' na'a šlac de latje. <sup>6</sup> Na' cheyała' güe'cho diža' šagüe' diža' da' zejen len yogo'lol bene', na' cheyała' goncho xbab nac yoži'icho xtiža' yogüe'.

#### *Pablo chguape' bene' migw che' ca' tiox*

<sup>7</sup> Bene' lježcho Tíquico ye'e le'e yogo'lol can' chac chia'. Chaquechone', le zoacze' chaclene' neda' can' cheyała' gone' na' chone' xšin Xancho Criston' txen len neda'. <sup>8</sup> Ba gwsela'ne' gan' zalen' cont nezele can' chac cheto' na' cont gone' chach laže'le. <sup>9</sup> Na' txen len le' zeza' bene' lježcho Onésimo ben' nac bene' gualaż chele. Zoacze' chejnilaže' Criston' can' cheyała' gone' na' chaquechone'. Legaue' yese'e le'e yogo' da' ba chac nga.

<sup>10</sup> Aristarco die' ližya nga txen len neda', na' le' chguape' le'e tiox. Na' lecze Marcos ben' nac biše' ljež Bernabé chguape' le'e tiox. Ba gwnia' can' cheyała' gonle güen len le' cate' le'e gan' zoalen'. <sup>11</sup> Nach Jesús ben' lecze le' Justo lecze chguape' le'e tiox. Šonze bene' Israel ca' chesaclene' neda' len da' chona' cont bene' zan yosozenague' che Diosen' na' nabi'e yichjlažda'ogaquen'. Ba gosonchgüe' čhačh laža' can' ba gosaclene' neda'. <sup>12</sup> Nach lecze bene' gualaž chele Epafras chguape' le'e tiox. Chone' xšin Criston' na' yogo' ni'a cate' choł güiže' Diosen' chnabchgüe' gwzejni'i Diosen' le'e yogo' loł da' chaclaže' gonle cont soachachle gonlen na' gacle cayanen' chazlaže' Diosen'. <sup>13</sup> Che'nda' nezele zoateze' choł güiže' Diosen' neče le'e chejnilaže'le Criston' le'e nita'le Colosas, Laodicea na' Hierápolis. <sup>14</sup> Nach Lucas ben' chon rmed, ben' chaquecho, chguape' le'e tiox na' lecze ca' Demas.

<sup>15</sup> Le gwguapšca tiox bene' lježcho ca' že' Laodicea, len Ninfas na' bene' ca' chesedop chesežag chesonxene' Diosen' ližen'. <sup>16</sup> Na' cate' yeyož gwlable cart nga, le gwnežjon bene' ca' chesedop chesežag chesonxene' Diosen' Laodicean' cont yosolaben'. Na' lecze le gwlab dan' gwsela' che bene' Laodicean'. <sup>17</sup> Na' le ye' Arquipo chneyoeda'ne' gwza'lagüe' gone' dolol xšin Diosen' da' gwlo'o Xancho Criston' lo ne'e gone'.

<sup>18</sup> Cuincza' neda' Pablo chzoja' late' dao' da' nga le'e carten'. Bi ganlaže'le can' dia' ližya nga. Diosen' soašque' gaclenšque' le'e. Da' na'zen' chzoja' na'a.

## CART NECHW DAN' BZOJ POSTLW SAN PABLO CHE BEÑE' CA' ŽE' TESALÓNICA

*Pablo bzoje' bene' Tesalónica ca' ben' chesonxene' Jesucriston'*

<sup>1</sup> Neda' Pablo chzoja' le'e chdop chžagle chonxenle Xancho Jesucriston' Tesalónica na' nacle txen len le' na' len Xacho Diosen'. Na' neda' len Silvano na' Timoteo chnabto' lao Xacho Diosen' na' lao Xancho Jesucriston' yesaclene' le'e na' yesone' ca soa cuezle binlo len xbab dan' yo'o lo' yichjlažda'olen'.

*Bene' Tesalónica bosolo'ede' chesejle'e che Jesucriston'*

<sup>2-3</sup> Yogo' ni'a cate' chol güižto' Xacho Diosen' choe'to' yela' choxclen che' par yogo'le. Na' cate' chol güižto'ne' chjayza'laže'to' yogo'lo' da' güen dan' chonle dan' chejnilaže'le Diosen' na' chaquelne'. Na' chjayza'laže'to' can' zoachachle chbezle yid Xancho Jesucriston' yeto. <sup>4</sup> Nezetot' bene' migw, Diosen' chacde' le'e na' ba gwleje' le'e cont nacle lo ne'e. <sup>5</sup> Na' diža' güen da' bzejni'ito' le'e che Jesucriston' gague naquen con to diža'ze. Spiritw che Diosen' goclenen neto' bzejni'ito' le'e len yela' guac chen na' nezetot' diža' dan' bzejni'ito' le'e naquen da' li. Na' nezele can' bento' da' güen ślac gwzoato' len le'e cont gocleno' le'e.

<sup>6</sup> Na' le'e zoale chonle da' güen can' ba ben neto' na' can' ben Xancho Jesucriston'. Bzenagle dan' gwdixjue'eto' le'e che Jesucriston', na' Spiritw che Diosen' chonen cont chbele chzenaglen, la'czla' da' zan da' ba gwdi gwzaca'le dan' ba bzenagle chen'. <sup>7</sup> Na' da' zoale chonle da' güenna', bene' ca' chesejnilaže' Jesucriston' distritw Macedonia na' distritw Acaya ba zjanežde' naquen cheyala' yesone'. <sup>8</sup> Doxen ba bzenele bene' xtiža' Xancho Jesucriston', gague bene' že' Macedonia na' Acaya na'zen'. Na' ca'cze yogo'ze bene' ba zjanežde' can' chejnilaže'le Diosen', na' da'nan' bi chyažjen güe'to' diža' chele. <sup>9</sup> Na' bene' zan cheso'e diža' ca' güen benle len neto' caten' bedena'to' le'e na' cheso'e diža' can' benle gwlejjyichjle cbich chejnilaže'le l' gua'a lsaca' chele ca', san na'a ba chejnilaže'le ben' nac dogualje Dios ben' zoa toli tocaņe. <sup>10</sup> Na' cheso'e diža' can' chbezle yetj Xi'ine' Jesúsen' yaban' yide' yežlio nga yeto, ben' bosban Diosen' ladjo bene' guaten'. Na' dan' chejnilaže'cho Jesúsen' ba bosle' chio' cont bi saca'zi'cho cate' žin ža bene' bi chosozenague' che Diosen' yesale'chgüede' toli tocaņe.

## 2

*Pablon' gwzoe' Tesalónican'*

<sup>1</sup> Bene' migw, le'e nezele dan' bedena'to' le'e goclenchguan le'e. <sup>2</sup> Na' nezele can' gwdi gwzaca'to' cate' gwyejto' Filipos, na' can' gosezi'diža' bene' ca' neto' dan' gwdixjue'eto' che Jesucriston'. Perw Diosen' goclene' neto' cont bi bžebto' gwdixjue'eto' diža' güen che' len le'e la'czla' bene' zan bosožone' chixjue'eton'. <sup>3</sup> Dan' gota'yoeto' le'e gwzenagle che Diosen' bitw nacho bzejni'ito' le'e clele, neca goclaže'to' gonto' da' mal, na' neca bento' xbab gonleto' le'e. <sup>4</sup> San zoato' choe'to' diža' can' chazlaže' Diosen' ben' ba gwleje'nto' par chyixjue'eto' diža' güen che'na'. Na' chyixjue'eton' gague cont yebe bene', san cont yebe Diosen' ben' neze bin' yo'o lo'



yichjlažda'ochon'. <sup>5</sup> Nezele can' bento', ne tni'aze biņa' gwpeto' le'e len xtiža'ton', na' neca benleto' le'e cont gonle cheto' bi da' de chele. Cuiñ Diosen' nezele' can' naquen. <sup>6</sup> Na' neca cheyljwlaže'to' nacle gonto' cont yesonxen bene' neto'. Neca načo chaclaže'to' gonxenle neto', na' neca chaclaže'to' yezica'chle bene' yesone' ca'. Zaca'to' gonto' ga gwzenagle cheto' la fuers da' gwsela' Criston' neto' choe'to' xtiže'na', perw bitw chonto' ca'. <sup>7</sup> Nži'ito' le'e cacze no'ole šagüe' nži'ide' xi'ine' bi' chosgol chosča'ogüe'. <sup>8</sup> Na' dan' chaqueto' le'e, be'lento' le'e diža' güen che Diosen'. Na' gague da' na'zen' bento', lecze bzanlaže' cuinto' bento' ga zelao gwzaque'to' cont goclento' le'e, le chaqueto' le'e. <sup>9</sup> Za'laže'czle bene' migw, cate' gwzoato' len le'e benchguato' žin con ga zelao gwzoeto'. Bento' žin do ža do yel cont cbi bi gastw bzoato' le'e. Can' bento' gwdixjue'eto' le'e diža' güen che Diosen'.

<sup>10</sup> Txenczen' nezele len Diosen' gwzoato' do laže'to' cate' gwzoato' len le'e chejnilaže'le Jesucriston'. Benczto' con can' chazlaže' Diosen' cont ne cono gwna napt'o' dola'. <sup>11</sup> Nezele can' gota'yoeto' le'e gonle da' güen na' can' bento' chačh laže' to tole gonlen. Bento' can' chon to bene' byo len xi'ine'. <sup>12</sup> Bento' mandadw gonle da' güen ca cheyla' gon chio' naccho lo na' Diosen', le ba gwleje' chio' par nabia'cho txen len le' na' par gone' gac da' mba juisyw checho cate' šjayzoacho len le'.

<sup>13</sup> Bate'teze choe'to' yela' choxcen che Diosen' dan' bzenagle xtiže'na' caten' gwdixjue'eton' le'e. Zacbe'ele bi naquen xtiža' benač, san naquen xtiža' Dios dan' choe'to'. Na' xtiža' Diosen' dan' chejle'le chša'an xbab dan' yo'o lo' yichjlažda'olen'. <sup>14</sup> Na' bene' migw, ba goc chele can' goc che bene' chesedop chesežag chesonxene' Jesucriston' zan part Judean'. Bene' Israel gualaž čhegaque' bosochi bososaque' legaque', na' lecze can' bosochi bososaca' bene' gualaž chelen' le'e. <sup>15</sup> Na' bene' Israel ca' gosote' Xancho Jesucriston' con can' gosote' da' bene' gosoe'lene' legaque' xtiža' Diosen' cani'. Na' lecze can' gosone' bosolagšibe' neto'. Na' ža na'aža ne' nite' chesone' da' bi chazlaže' Diosen' na' chesegue'ede' yogo'lol benachen', <sup>16</sup> le chosožone' gwzejni'ito' yezica'chle bene' bi da' cheyla' goncho cont gata' yela' mban checho toli tocañe. Can' chesone' do tiemp chosozanch xtoła'gaquen' na' Diosen' ba chža'achgüe' legaque'.

### *Pablo goclaze' šjayne'e bene' nita' Tesalónica*

<sup>17-18</sup> Na' neto' bene' migw, cate' zoato' ga bi chle'e lježcho, chjayze'eto' le'e. Da'n'an' cate' ba goc sša biņa' le'e lježcho ba chacžejlaže'to' chele na' goclaze'to' yedena'to' le'e. Na' to chop ni'a goda' yida', perw Satanás dan' chnabia' da' xigüe' ca' bi benen latje. <sup>19-20</sup> Chebeto' chonchguale güen na' da'n'an' zoato' lez soachguato' mbalaz cate' yid Xancho Jesucriston' da' yoble, le yebede' bzjeni'ito' le'e cont chzenagle che'. Da' li le'e chonle cont chbet'o' na' cont zoato' mbalaz.

## 3

<sup>1-2</sup> Na' bich gwzoeto' dan' bi chle'e lježchon'. Da'n'an' bechoglaže'to' gwsela'to' bene' lježcho Timoteon' gan' zoalen' na' neto' bega'anto' Atenas. Timoteon' chone' xšin Diosen' na' chone' txen len neto' chyixjue'eto' diža' güen da' chzejni'in bene' che Criston'. Gwsela'to'ne' bedeyata'yoede' le'e bi soayaše'le na' bedeyene' chačh laže'le cont zoačhacle chejnilaže'chle Criston'. <sup>3</sup> Gwsela'to'ne' gan' zoalen' cont ne tole bi gacžejlaže'le bixchen' chy i chzaca'le. Ba nezele chio' chejnilaže'cho Criston' cheyla' saca'zi'cho

lo yežlio nga. <sup>4</sup> Caten' gwzoalento' le'e bzeneto' le'e leca yosoči yososaca' bene' chio'. Na' nezele ba chac can' gwnato'na'. <sup>5</sup> Na' dan' bi gocxenlaža' dan' biña' la' rson chelen', nachen' gwsela' Timoteon' gan' zoalen' cont nezda' še do laže'le chejnilaže'le Criston'. Le bena' xbab godca' še ba gwzoe gwxiyen' benlen le'e. Le še ba benlen le'e, con bendadzeto' xšin Diosen' len le'e še ca'.

<sup>6</sup> Perw na' bela' Timoteon' dan' bide' gan' zoalen' na' be'lene' neto' diža' güen, gwne' zoale chejnilaže'le Criston' na' chaquele yogo'loł bene'. Na' lecze gwne' chjayze'ele neto' na' zelaže'le yežagcho da' yoble lecze can' chaclaže' neto'. <sup>7</sup> Ca'czen' bene' migw, chžaglaoto' na' chyi chzaca'to', perw ba beyacxenlaže'to' gwnezeto' can' zoateze zoale chejnilaže'le Criston'. <sup>8</sup> Da' li ba beyacxenlaže'to' na' zoato' mbalaz dan' zoachachle chejnilaže'le Xancho Criston'. <sup>9</sup> Na' da'nana' leca chbeto' lao Diosen' can' chonle na' leca choe'chguato' yela' choxcen che' can' chonlen'. <sup>10</sup> Leca chol güižto'ne' do ža do yel chnabeto'ne' gone' ga yele'e lježcho da' yoble cont gwzejni'ichto' le'e na' šejchle šejnilaže'chlene'.

<sup>11</sup> Chnabeto' Xacho Diosen' len Xancho Jesucriston' yesone' latje yedena'to' le'e. <sup>12</sup> Na' chnabeto' Xanchon' gone' cont gaquech lježle tole yetole na' gone' ga gaquechle yogo' benachen' con catezen' chaqueto' le'e. <sup>13</sup> Chnabeczeto'ne' gone' cont soachachle šejnilaže'lene' na' gac lažda'olen' xilaže' lao Xancho Diosen' sin cbibi doła' gapple cate' yid Xancho Jesúsena' da' yoble nche'e yogo'loł bene' ba gwlej Diosa' cont zjanaque' lo ne'e.

## 4

### *Pablon' bzejni'ide' can' che'ne Diosen' yesezoa yesebeze'*

<sup>1</sup> Na'a bene' migw, bač bsd blo'eto' le'e gonle can' chazlaže' Diosen', na' bač zoale chonle ca'. Na' can' ža Xancho Jesucriston' chata'yoeto' le'e na' chonto' mandadw šejchle gonchle dan' chazlaže' Diosen'.

<sup>2</sup> Ba nezzele bica' da' ca' bento' mandadw gonle na' zjanaquen con ca' ža Xancho Jesúsena'. <sup>3</sup> Diosen' chaclaže' soatez soacho gaccho bene' laždao' xilaže'. Bi chazlaže' gata'lencho no'ol bi nac no'ol checho o bene' byo bi nac bene' checho. <sup>4</sup> Chaclaže' neze to tole naquen' cheyała' soalen xo'ollen' sin cbi gapple doła' na' gonelene' ca' bene' zaca'. <sup>5</sup> Bitw gonle can' cheson bene' bi zjanombi'e Diosen', con chesezoalene' no'olen' contze yesone' can' chzelaže' lažda'ogaquen'. <sup>6</sup> Ne tole bitw gonle da' bi cheyała' gonle na' siye' bene' lježle na' soalenle no'ol che'. Ba be'czto' diža' bosnise'to' le'e can' gon Xancho Diosen' cont yezaca'zi'chgua bene' cheson bite'tez da' xinjen' zjanac ca'. <sup>7</sup> Diosen' gwleje' chio' cont gaccho bene' laždao' xilaže', gague cont goncho bi da' xinj da' zjanac ca'. <sup>8</sup> Da'nana' note'tez le'e še bi chzenagle che da' qui ba bzejni'ito' le'e, gague xtiža' benachen' chzoale ca'ale, san Diosa' chzoale ca'ale. Len' bene' chio' Spiritw chen' na' Spiriton' naquen laždao' xilaže'.

<sup>9</sup> Bitw chyažjen gwzoja' le'e can' cheyała' gague ljež chio' chejnilaže'cho Jesucriston'. Dios nan' ba bsdde' le'e cont chaque lježle tole yetole. <sup>10</sup> Na' da' li ba chaquele yogo' bene' lježcho ca' nita' doxen Macedonian'. Na' chata'yoeto' le'e bene' migw, le gaquech legaque'. <sup>11</sup> To tole le yeyiljwlaže' bi žin gonle cont soa cuezle binlo can' nonto' mandadw na' bitw tale gwgüia na'le bi cheson bene' yoble. <sup>12</sup> Le gon can' ba gwnia' cont bene' bi zjanaque' t xen len chio' yesacbe'ede' chonle güen, na' lecze cont bibi gac falt še bi dan' chyažj chchinele.

*Can' gac cate' yid Criston' da' yoble*

<sup>13</sup> Bene' migw, chaclaže'to' nezele can' yesac che bene' gosejnilaže' Jesucriston' na' ba gosate'. Chaclaže'to' nezelen cont bi yegüine'le ca cheson bene' bi nita' lez šjasyezoe' len Jesucriston'. <sup>14</sup> Nezecho gosot bene' Jesúsén' na' bebane' ladjo bene' guat ca'. Lecze nezecho Diosen' gone' cont yid Jesúsén' da' yoble nche'e bene' ca' ba gosat con bene' gosejnilaže' le'.

<sup>15</sup> Na' diža' nga chzeneto' le'e naquen dan' non Xancho Jesúsén' mandaw gwzeneto'. Chio' mbancho na'a chejnilaže'chone', še ne' mbancho cate' yide' da' yoble, bitw nacho yobch yežagchone' clél ca bene' ca' ba gosat. <sup>16</sup> Na' ca nac Xancho Jesúsén', cuine' yetje' le'e yaban', na' ne' zizje gone' mandaw yesyeban bene' guaten', na' to angl blaona' ne', na' yenecho cuež trompeta che Diosen'. Nach bene' ca' ba gosat bene' gosejnilaže' Criston', legaque' zgua'tec yesyebane' ladjo bene' guaten'. <sup>17</sup> Na' ca yeyoža', chio' chejnilaže'chone' še ne' mbancho yežlio nga, gon Diosen' cont yeyepcho txen len legaque' le'e yaban' to lo' bejw na' yežagcho Xancho Jesúsén' le'e yaban'. Nach šjayzoacho len le' toli tocañe. <sup>18</sup> Da'nán' le gon čhač laže' lježle tole yetole güe'le diža' can' gaca'.

**5**

<sup>1-2</sup> Bene' migw, bitw chyažjen gwzoja' cont gwzenda' le'e bi ža bi hor yid Xancho Jesúsén' yeto. Nezele con yalzelaže'le žin ža žin hor can' chžin bene' gwban bene' chda šeže'le. <sup>3</sup> Na' šlac chesena bene': "Mba zoacho, bibi chac checho", cate' concze žin ža yesebiaye'e. Can' chac che no'ole cate' yalzelaže' chaque' bes che yela' san, ca'czen' zjalyzelaže' yesebiayi' bene' ca' bi chesejnilaže'ne'. Bitw gac yosoxonje'. <sup>4</sup> Perw chio' bene' migw, bi nchole yichjlažda'ochon', da'nán' bitw gac checho can' chac che bene' chzenyal gwbanna' le'. <sup>5</sup> Diosen' ba bzejni'ide' chio' nombia'chone' na' be'ni' čen' ba chsenin' len chio'; da'nán' bitw nchole yichjlažda'ochon'. <sup>6</sup> Cheyala' gonyane'cho xbab naquen' chaclaže' Diosen' goncho na' nabia' cuincho goncho can' chazlaže'na'. <sup>7</sup> Bene' ca' chi chosozenag che Diosen' zjazaca'lebe' ca bene' zjantas na' ca bene' chesezože. <sup>8</sup> Perw ba bzejni'i Diosen' chio' cont bi goncho can' chesone'na'. Da'nán' cheyala' nabia' cuincho goncho can' chazlažen'. Cheyala' šejnilaže'cho Diosen' na' gague lježcho na' yebecho dan' nezecho šjayzoacho len Diosen'. Še goncho yogo' da' ca' gaccho ca soldaw ben' nyaze' to de ya da' chcue'ejen le' cont bibi chac che' cate' chdile' len bene'. <sup>9</sup> Gague gwlej Diosen' chio' cont saca'zi'cho che xtoła'chon'. Gwleje' chio' cont šejnilaže'cho Xancho Jesucriston' na' šjayzoacho len le'. <sup>10</sup> Na' Jesucriston' bnežjw cuine' neče chio' cate' gosot bene' le' cont šjayzoacho len le' la'czla' še mbancho o še ba gotcho cate' yide' da' yoble. <sup>11</sup> Da'nán' le gonch can' ba chonle, le gon čhač laže' lježle tole yetole na' le gaclench lježle cont soačhačhle šejnilaže'le Jesucriston'.

*Pablon' bzejni'ide' bene' chesejnilaže' Jesucriston' can' cheyala' yesone'*

<sup>12</sup> Chata'yoeto' le'e bene' migw, gape bala'an bene' ca' cheson xšin Xancho Jesucriston' chosogüia chesene'e le'e na' chosozejni'ide' le'e naquen' cheyala' soa cuezle. <sup>13</sup> Gapchualne' bala'an na' gaguechgüele legaque' dan' chesone' xšin Diosen' do laže'. Na' le soa binlo len lježle tole yetole.

<sup>14</sup> Ca'cze bene' migw, le tilé bene' bi chesaclaže' yeson žin, le gon čhač laže' bene' chesacde' zdebe chosozenague' che Jesucriston', na' le gaclen

beñe' biña' yesejni'ide' naquen' cheyała' yesone'. Le soa le gap yela' chxenlaže' len yogo'loł bene'.

<sup>15</sup> Še bi da' mal cheson beñe' len le'e, le gon byen bi yoži'ile da' mal len legaque'. Le yeyiljwlaže' naclen' gonle güen len lježle tole yetole na' len note'tez beñe'.

<sup>16</sup> Do tiemp le yebe. <sup>17</sup> Le soateze le soa le yol güiž Diosen'. <sup>18</sup> Le güe' yela' choxclen che Diosen' bite'tez da' chac chele, le da'nan' chaclaže' gon chio' chejnilaže'cho Cristo Jesúsén'.

<sup>19</sup> Bitw gwžonle gon Spiritw che Diosen' can' chaclažen' gonen len le'e o len beñe' yoble. <sup>20</sup> Bi gwzoale ca'ale dan' chesena beñe' cheso'e diža' dan' ba gož Diosen' legaque'. <sup>21</sup> Na' le gonyane' xbab che yogo'loł diža' da' cheso'e cont soale gwzenagle che da' nac güen. <sup>22</sup> Na' bitw gonle bite'tez da' nac da' mal.

<sup>23</sup> Diosen' chone' ca chzoa chbezcho binlo len xbab dan' yo'o lo' yichjlažda'ochon'. Na' chñabda'ne' gone' cont lažda'olen' gacyanen' xilaže'. Na' lecze gonšque' cont bibi da' mal gonle len yichjlažda'olen' neca len cuerp chelen' cont bibi doła' gaple caten' yid Xancho Jesucriston' yeto. <sup>24</sup> Diosen' ben' ba gwleje' chio' cont naccho xi'ine' chone' con da' že' gone', na' da'nan' gone' cont gac lažda'ochon' xilaže'.

*Pablon' gwnabe' gaclen Diosen' beñe' Tesalónican'*

<sup>25</sup> Beñe' migw, le soa le nab gaclen Diosen' neto'.

<sup>26</sup> Na' cate' chežagle le gwnopa' na' lježle cont nachbia' chaque lježle.

<sup>27</sup> Chona' mandadw gwlable cart nga ga yesene yogo'loł bene' lježcho ca' nita' gan' zalna', le can' chaclaže' Xancho Jesucriston' gonle.

<sup>28</sup> Na' soateze Xancho Jesucriston' gaclenšque' le'e. Da' na'ze chzoja' na'a.

## CART GWCHOPE DAN' BZOJ POSTLW SAN PABLO CHE BEÑE' CA' ŽE' TESALÓNICA

*Pablon' bzoje' bene' Tesalónican' bene' chesonxen Jesucriston'*

<sup>1-2</sup> Neda' Pablo chzoja' le'e chdop chžagle chonxenle Xancho Jesucriston' Tesalónica na' nacle txen len le' na' len Xancho Diosen'. Na' neda' len Silvano na' Timoteo chnabto' lao Xancho Diosen' na' lao Xancho Jesucriston' yesaclene' le'e na' yesone' cont soa cuezle binlo len xbab dan' yo'o lo' yichjlažda' olen'.

*Cate' yid Criston' da' yoble Diosen' gwnežjue' da' yesezaca'zi' bene' bi chosozenag' che'*

<sup>3</sup> Bene' migw, neto' cheyała' soateze soato' güe'to' yela' choxclen che Diosen' che dan' chonlen'. Cheyała' gonto' ca' da' zejle chejnilaže'chle Diosen' na' zej chaquech lježle. <sup>4-5</sup> Da'nan' chbeto' choe'to' xtiža'len' len yezica'chle bene' ba gwlej Diosen' na' chesežague' chesonxene' Jesucriston' ga yoble. Choe'to' diža' ca' güen chonle dan' chycho chejele chejnilaže'le Jesucriston' la'czla' da' zan da' chac chele na' chosoči chososaca' bene' le'e. Da'nan' nezecho Diosen' zejczle to' licha da' nchogbi'e zaca'le par yeyejle yaban' gan' zoe' chnabi'e.

<sup>6</sup> Na' Diosen' zeje' to' licha da' gone' cont yesezaca'zi' bene' ca' chosoči chososaque' le'e. <sup>7</sup> Na' lecze zeje' to' licha da' gwcueze' yogo'te dan' chy chzaca'chon'. Gwcuezen' cate' le'echo yetj Xancho Jesús'en' le'e yaban' len angl' che' ca' bene' zjanse'e yela' guac che'. Yetje' nyechjde' yi' bel. <sup>8</sup> Na' gwnežjue' da' yesezaca'zi' bene' ca' bi zjanombi'e Diosen', na' neca chosozenague' che diža' güen dan' chzejni'in che Xancho Jesucriston'. <sup>9</sup> Legaque' yesezaca'zi'e toli' tocanē. Gwbat šjasyenite' len Xancho Jesucriston' ben' nac bene' zaca' juisyw na' nape' yela' guac xen. <sup>10</sup> Cate' žin žan' yid Jesucriston' da' yoble, chio' chejnilaže'chone' na' naccho lo' ne'e gwlo'echo naque' bene' zaca' juisyw na' yebanecho catec bene' güen naque'. Nacto' txen len le'e da' ba chejle'le che diža' dan' be'lento' le'e.

<sup>11</sup> Da'nan' zoatez zoato' chnabeto' Diosa' gaclene' le'e gonle güen cont yebede' ba gwleje' le'e par nacle xi'ine'. Na' chnabeto'ne' gaclene' le'e len yela' guac chen' cont yeyož gonle yogo' da' güen da' ba gwchoglaole gonle na' len bica'chle dan' che'nele gonle dan' chejnilaže'lene'. <sup>12</sup> Chnabeto' gonle cont Xancho Jesucriston' gacxene', na' le' gone' ga gacxenle txen len le', le' Dios chechon' na' Xancho Jesucriston' nita'cze' chesaclene' le'e.

## 2

*Choj ben' gonchgua güedenag len Diosen'*

<sup>1</sup> Bene' migw, da' yoble chnia' le'e ca' gac cate' yid Xancho Jesucriston' yeto, yotobe' chio' šjazyocho txen len le'. <sup>2</sup> Chneyoeto' le'e bitw gacžejlaže'le o žeble še no yid yedezejni'ide' le'e, ne' Spiritw che Diosen' žan ba bžin ža yid Jesucriston' da' yoble. Na' neca gacžejlaže'le še bi da' yenele o še la' no cart güenlaže' da' chesena bene' gwsela' neto', žan ba bžin ža yid Jesucriston'. <sup>3</sup> Bi güe'le latje no siye' le'e še bi yeseñe' o še bi da' yesone'. Le cate' za' yid Xancho Jesús'en' da' yoble, bene' zan yesase' yesyedabague' Diosen'. Lecze cana' choj to' bene' blao bene' gonchgüe' güedenag len

Diosen'. Benan' ba naquen yeyeje' lo yi' gabilen'. <sup>4</sup> Gague' bene' ya'laže' na' gue'ede' Diosen' na' lec̄ca' gue'ede' bite'tezech da' chesejnilaže' bene'. Na' cui'e lo' yodao' blao gan' chesonxene' Diosen', gon cuine' ca Dios cont yesonxen bene' le'.

<sup>5</sup> ¿Bi za'laže' le' cate' gwzoa' len le'e bzejni'ida' le'e can' gac cate' yid Jesucriston' da' yoble? <sup>6</sup> Na' na'a nezeczle bi dan' chžon choj bene' blao ben' gonchgua güedenag len Diosen', perw cate' ba bžin ža bžin hor, cana' choje'. <sup>7</sup> Ba nita' bene' chesonchgüe' güedenag len Diosen' na'a, perw ne' ngaše' can' chesone'. Na' gwžin ža cate' bich soa dan' gwžon yesyed-abaga'chgüe' Diosen'. <sup>8</sup> Cana'chen' choj bene' blaon' ben' gonchgua güedenag len Diosen'. Nach Xancho Jesús'en' yide' nychjchgüede' be'ni', na' cate' bene' blaon' le'ede' le' nach Xancho'n' güe'e diža' na' ši'en goten le'. Can' gone' yonitlagüe'ne'. <sup>9</sup> Na' cate' choj bene' blaon' ben' gonchgua güedenag len Diosen', Satanás dan' chnabia' da' xigüe' ca' gonen cont gapchgüe' yela' guac, na' gone' da' yesyebane bene' contze gonlede' legaque'. <sup>10</sup> Yogo'te da' mal gone' gonlede' bene' ba naquen yesebiaye'e toli tocañe. Yesebiaye'e da' bi chesejle'e diža' lin', le lenna' zaca' yesejle'e cont gata' yela' mban čhegaque' toli tocañe. <sup>11</sup> Na' da'n'an' Diosen' güe'e latje yeseziye'e legaque' cont yosozenague' diža' güenlaže'. <sup>12</sup> Nach yesezaca'zi'e toli tocañe da' bitw gosejle'e diža' li čhe Xancho'n' san besyebede' da' malen'.

*Diosen' chbeje' bene' na' chone' cont gac šjasyenite' len le' toli tocañe*

<sup>13</sup> Bene' migw, chaque Xancho Jesucriston' le'e. Na' neto' cheyala' soatez soato' güe'to' yela' choxc̄len čhe Diosen' da' gwleje' le'e cate' biña' xe yežlion' cont šjayzoale len le'. Na' cate' gwzolao chejle'le diža' li čhe Diosen' nach gwsele' Spiritw čhen' chonen cont nac̄le bene' laždao' xilaže'. <sup>14</sup> Neče da'n'an' gwlej Diosen' le'e, na' dan' gwyejle'le diža' güen čhe Jesucriston' da' be'lento' le'e, žin ža gon Diosen' cont soale mba juisyw can' zoa Xancho Jesucriston'.

<sup>15</sup> Da'n'an' bene' migw, le soa čhač le gwzenag do yichj do laže'le čhe dan' bzejni'ito' le'e, diža' dan' ba be'lento' le'e na' dan' ba bzojto'. <sup>16-17</sup> Xacho Diosen' chac̄de' chio'. Gague da' te čhe dan' bene' cont beyone'xenlaže'cho, na' zoacho lez gonche' güen len chio', le nži'ilaže'de' chio'. Na' chñabda' cuin Xancho Jesucriston' len Xacho Diosen' yesone' čhač laže'le na' yesaclenšque' le'e cont yogo' da' gonle na' diža' da' güe'le yesaquen güen.

### 3

*Gwnab Pablon' yosol güiže' Diosen' gaclene' le' len bene' lježe' ca'*

<sup>1</sup> Na'a bene' migw, yol güižšcale Diosen' gaclene' neto' cont yob šjadixjue'eto' čhe Xancho Jesucriston' doxen, na' cont bene' yezica'chle yesebede' yosozenague' can' ba ben le'e. <sup>2</sup> Lecze nabšquele Diosen' yosle' neto' lo na' bene' mal bene' cheson clele, le gague yogo' bene' chesejnilaže' Jesucriston'. <sup>3</sup> Xancho Jesucriston' zoatez zoe' chone' can' že' gone', na' gaclene' le'e cont soačhačle šejnilaže'lene'. Na' lecze gwcuas gwcue'eje' le'e len da' malen'. <sup>4</sup> Na' nezeto' chaclencze' le'e cont chonle da' ba bento' mandadw gonle na' cont ni'ta'czle gonlen. <sup>5</sup> Chñabda' Xancho Jesucriston' gone' cont nezele catec chaque Diosen' chio'. Na' lecze chñabda'ne' gone'

cont gwyo gwchejle len da' chyi chzaca'le can' gwzoa Criston' byo bcheje' len da' gwdi gwxaque'.

*Pablon' bene' mandadw yesone' žin*

<sup>6</sup> Bene' migw, chzeneto' le'e can' chon Xancho Jesucriston' mandadw, bi cheyała' gonle txen len note'tez bene' lježchon' bene' bi chesaclaže' yesone' žin, le bi chesone' ca nac da' bsed blo'eto' legaque'. <sup>7</sup> Neto' benczto' žin cate' gwzoato' len le'e, na' da'nan' nezele can' cheyała' gonle. <sup>8</sup> Cuent cheto' güe'ej gwdagwto'. Bžaglaoto' bento' žin do ža do yel cont güe'ej gwdagwto', na' bi gwnabeto' le'e da' byažje bchineto'. <sup>9</sup> Zaca'czto' ša gwnabeto' le'e da' ye'ej gagwto' cate' bento' xšin Diosen' gan' zoalen', perw bi goclaže'to' gonto' ca', le goclaže'to' gwlo'eto' le'e ca cheyała' gonle. <sup>10</sup> Caten' gwzoato' len le'e bžiato' bia' gwnato': "Še no bi gon žin, bi cheyała' gagüe'." <sup>11</sup> Perw na' ba beneto' diža' chesene' bałle bitw bi žin chonle, con chdale chacle diža'. <sup>12</sup> Na' še nole chonle ca', chata'yoeda' le'e na' chona' mandadw gonle can' ža Xancho Jesucriston', bich tale ca', san le yezolaošaze le yeyon žin cont gac si'le da' ye'ej gagwle.

<sup>13</sup> Na' le'e bene' migw, bitw yeche'ele gonle da' güen. <sup>14</sup> Na' še no bene' chon güedenag len dan' ba bzojto' nga, le gon xbab non' chon ca' na' bich gonle txen len le' cont gacde' zto' che dan' chone'na'. <sup>15</sup> Perw bitw gue'elne', san gwzejni'ilne' diža' šagüe', le naque' bene' lježcho.

*Pablon' gwnabde' Diosen' gaclene' bene' Tesalónica*

<sup>16</sup> Na' chnabda' Xancho Jesucriston' ben' chone' cont soa cuzcho binlo len xbab da' yo'o lo' yichjlažda'ochon', gonšcacze' cont soa cuzle ca' yogo'te ža bite'teze da' chac. Len' soašcacze' len yogo'le.

<sup>17</sup> Na' cuincza' neda' Pablo chzoja' late' dao' le'e cart nga chguapa' le'e tiox. Can' choncza' len yogo' cart dan' chselā' cont nacbia' nedan' chselan', le ba nombia'le letr chian' can' chzojan'. <sup>18</sup> Xancho Jesucriston' gaclenšque' yogo'le. Da' na'zen' chzoja' na'a.

## CART NECHW DAN' BZOJ POSTLW SAN PABLO CHE TIMOTEO

*Pablo chzoje' cart che Timoteo*

<sup>1</sup> Neda' Pablo chzoja' cart nga chio' le' Timoteo. Naca' postlw che Jesucriston', le Diosen' len Xancho Jesucriston' gosone' mandadw chona' xšinen'. Dios nan' none' chio' yela' mban toli tocanē na' Xancho Jesucriston' chone' cont zoacho lez šjayzoacho len le' toli tocanē. <sup>2</sup> Chzoja' le' Timoteo, le naco' ca dogualje xi'ina' da' bzejni'ida' le' cont chejnilažo' Criston'. Na' chnablaža' nita' Xacho Diosen' len Xancho Jesucriston' yesyeyaše' yesyeži'ilaže'de' le' na' yesaclene' le', na' yesone' cont soa cuezo' binlo len xbab da' yo'o lo' yichjlažda'oguoñ'.

*Nita' bene' chosozejni'ide' diža' güenlaže'*

<sup>3-4</sup> Caten' gwza'a Efeson' gwya'a Macedonian' gwñeyoeda' le' cont bega'ano' Efeson' neche nita' bal' bene' chosozejni'ide' bene' Efeso ca' diža' güenlaže'. Con bi cheyož yedo chesonchgüe' xbab che diaža che da' xozxta'ocho ca' na' cheso'e zan cuent che legaque'. Na' da' yoble chñeyoeda' le' gono' mandadw bich yosozejni'ide' che da' ca'. Dan' chosozejni'ide' chonen ga yesaczejlaže' bene', na' bi chaclenen yesone' dan' gwlo'o Diosen' lo' na'cho gon chio' ba chejle'cho xtižen'.

<sup>5</sup> Na' gono' mandadw yesone' güen, le' chaclaža' yesenite' yesaque lježe'. Na' cont bibi gwžon yesaque lježe', cheyała' yesaque' bene' laždao' xilaže', cheyała' yesone' dan' nezecho naquen güen yogo' ni'a, na' cheyała' yesejli'e diža' li che Diosen' do yichj do laže'. <sup>6</sup> Bene' ca' chosozejni'ide' diža' güenlaže' bi chesone' ca', na' da'nān' cheso'e diža' da' bibi zaca'. <sup>7</sup> La'czla' chesaclaže' yosozejni'ide' ley dan' bzoj Moisésen', bi chesejni'ide' dižan' cheso'e na' nēca chesejni'ide' da' ca' chesene' cheyała' goncho.

<sup>8</sup> Nezecho ley nan' naquen güen con še gwčhinchon can' cheyała' gwčhinchon. <sup>9</sup> Na' lecze nezecho ley nan' gague chosbagan' bene' cheson da' güen, san chosbagan' bene' cheson da' mal na' bene' cheson güedenag len dan' nonen mandadw goncho. Chosbagan' bene' bi chosozenag che Diosen', na' bene' chesonteze' da' malen', na' bene' bi chesape' Diosen' bala'an' nēca chesonxene'ne', na' bene' chesot no xaxna'gaque', na' len nochle bene' güet bene'. <sup>10</sup> Lecze chosbagan' bene' chesata'lene' no'ole bi nac xo'olgaque' o bene' byo bi nac bene' chēgaque', na' no bene' byo bene' chesata'lenteze' ljež bene' byoe' gualaz no'ole, na' bene' cheseche'xoxje' bene' yoble cont chesote' legaque' chesezi'e mechw, na' bene' ca' chesonlaže', na' bene' ca' cheso'e diža' güenlaže' lao justis, na' note'teze bene' cheson da' zej clele len diža' güen da' ba bzejni'i Diosen' chio'. <sup>11</sup> Na' diža' güen da' ba bzejni'i Diosen' chio' zaca'chguan, na' Dios ben' zoa mba juisyw, le'na' ba gwlo'en lo' na' chyixjue'edan' bene'.

*Pablon' cho'e yela' choxcen che Diosen' na' che Jesucriston'*

<sup>12</sup> Choa' yela' choxcen che Xancho Jesucriston' ben' chon cont chac chyixjue'eda' xtiže'na'. Choxclenen chacde' gona' xšinen' can' chazlaže' na' da'nān' gwleje'nda' gonan'. <sup>13</sup> Gwleje' neda' la'czla' cana' bia' diža' bya' che' na' bgue'eda'ne' na' bchi bsaca' bene' ca' chesonxene' le'. Na' la'czla' bena' ca', Diosen' beyaše' beži'ilaže'de' neda', le' binā' šejnilaža'ne'



ca hora' na' biṇa' gacbe'eda' chona' clele. <sup>14</sup> Nach Xancho Jesucriston' nži'ilaže'chgüede' neda' na' goclene'nda' cont gwyejnilaža'ne', na' na'a chacda'ne' na' lecze chacda' yezica'chle bene'.

<sup>15</sup> Da' nga naquen to diža' li da' zaca' šejle'cho: Jesucriston' bide' yežlio nga cont beque'e xtoła' chio' bene' güen da' xinj. Na' chacda' neda' naca' bene' la'zelagüe gwyanch xtoła'. <sup>16</sup> Na' la'czła' naca' bene' la'zelagüe gwyanch xtoła', Jesucriston' beyaše'de' neda' na' bezi'xene' chia' cont blo'e napchgüe' yela' chxenlaže'. Bene' ca' cont bene' za' za'ac yesache'ede' nape' yela' chxenlaže' xen na' yesejnilaže'ne' na' gata' yela' mban čhegaque' toli tocaṇe. <sup>17</sup> Cheyala' gonxencho Diosen' ben' nac Rey čechon' toli tocaṇe. Gague da' te čhen'. Zoacze' la'czła' bi chle'echone' na' naque' la'zelagüe bene' sina'. Totc le' zaque' gonxencho na' gapchone' bala'an toli tocaṇe. Na' can' gonšcaczccho.

<sup>18</sup> Xi'ina' Timoteo, ben xbab čhe dižan' gosoe' bene' ca' bosozende' le' can' gwna Diosen' chio' cana'. Na' can' ba gose'e le' gono' xšin Diosen', lecze can' chṇeyoeda' le' gonon' do yichj do lažo', la'czła' še gacdo' zdebe gonon'. Soačhačo' šejnilažo' Diosen', na' soatezo' gono' cont nezdo' lo' laždaguo' bibi da' mal chono'. <sup>19</sup> Bał bene' chesonteze' da' malen' la'czła' zjaneztede' lo' lažda'ogüe' bi cheyala' yesonen', na' da'nan' ba gosebejyichje' bich chesejnilaže' Diosen'. <sup>20</sup> Can' goc čhe Himeneo na' čhe Alejandro. Da'nan' ba gwṇabda' Diosen' yesaque' lo' na' Satanás dan' chnabia' da' xigüe' ca', na' gonon con ca chaclažen' len legaque' cont yesache'ede' bi cheyala' yeseneye'e čhe Diosen'.

## 2

### *Dan' cheyala' nabecho Diosen' gone'*

<sup>1</sup> Na' dan' nac da' žialao xen gon chio' chonxencho Diosen': cheyala' nabecho Diosen' gone' bi dan' chyažje chio' lente dan' cheseyažje yogo'lol bene', na' nabechone' gaclene' yogo'lol bene', na' güe'cho yela' choxcen čhe Diosen' che bi da' güen da' chesac čhe yogüe'. <sup>2</sup> Cheyala' nabecho Diosen' gaclene' bene' gwnabia' ca', no rey, no gobernador na' nochle bene' ca' chesenabia', cont soa cuzcho binlo na' bibi gwžon gonxencho Diosen', neca gata' da' gwžon goncho bichle da' cheyala' goncho. <sup>3</sup> Naquen güen nabecho Diosen' gaclene' yogüe' na' naquen da' chazlaže' Diosen', Dios ben' noṇe' chio' yela' mban toli tocaṇe. <sup>4</sup> Le chaclaže' gwnežjue' yela' mban toli tocaṇe čhe yogo'lol bene' na' chaclaže' yesejni'ide' diža' li čhe'. <sup>5</sup> Toz Diosen' zoa bene' zaca' yesonxen yogo'lol bene', na' lecz toz ben' chozoe' chio' binlo len Diosen', le'na' Jesucriston' ben' golje benač. <sup>6</sup> Jesucristw nan' bnežjw cuine' gote' neche da' mal da' goson yogo'lol benač, na' cate' bžin ža Diosen' bžie' bia', cana' bene' cont goseneze benačen' čhe'. <sup>7</sup> Na' Diosen' gwleje' neda' cont naca' postlw čhe' na' cont chyixjue'eda' xtiže'. Choa' diža' li, bi chonlaža', le naca' Criston' txen, gwleje'nda' cont chzejni'ida' bene' ca' bi zjanac bene' Israel diža' li čhe' cont yesejnilaže'ne'.

<sup>8</sup> Na' dan' che'nda' gac gate'teze chesedop chesežague' chesonxene' Diosen', chaclaža' bene' ca' yosoł güiže' Diosen' yesaque' bene' laždao' xilaže' cont yeselis na'gaquen' laogüen' sin cbi yeseže'e bene' o yosošašlene' bene'. <sup>9</sup> Na' ca nac no'ol ca' chesonxen Jesucriston', bi cheyala' yesebec yichjgaque' še nite' xdanchgua, še yosoguale' bga o ret de oro o de perlas dan' naquen da' zaque', še nac yiša' yichjen' xdanchgua, na' še nac

xagaque' da' chzaca' la'ay. <sup>10</sup> San cheyała' yesebec yichjgaque' yesone' da' güen ca' chaclaže' Diosen' yeson yogo' bene' chesejnilaže'ne'. <sup>11</sup> Na' no'ol ca' ľecze cheyała' nite' řize yosozenague' che bene' ca' chososed chosolo'ede' xtiža' Diosen', na' yesone' con da' yese'ene'. <sup>12</sup> Neda' bi chona' latje cont no'ol ca' yosozejni'ide' bene' byo latje lagüe', na' neca chona' latje yesenabi'e bene' byo. Cheyała' yesenite' řize, <sup>13</sup> ľe cate' Diosen' bene' benachen' zgua'tec bene' Adánna' na' gwdechle bene' Evan'. <sup>14</sup> Na' cate' Satanás dan' chnabia' da' xigüe' ca' gwxoayaguen bene' nechw ca', gague gwxoayaguen Adánna', san gwxoayaguen Evan' cont bene' dan' gwna Diosen' bi gone', na' da'nan' beyaque' bene' güen da' xinj. <sup>15</sup> Perw na' ľa'czła' no'ol ca' chesežaglagüe' chesezan xi'ingaque', řin řa řjasyenite' len Diosen' ře zjanite' chesejnilaže'ne' na' ře zjanite' chesacde'ne' na' chesacde' yezica'chle bene', na' ře zjanite' chesone' can' chazlaže' Diosen' len yela' sina' da' ba bnežjue' ľegaque'.

### 3

*Can' yeson bene' ca' yosogüia yesene'e yezica'chle bene' chesonxene' Diosen'*

<sup>1</sup> De to diža' da' zaca' řejle'cho da' řan: "Bene' chesaclaže' yosogüia yesene'e yezica'chle bene' chesonxene' Diosen', chesaclaže' yesone' to da' güen, ře ca'." <sup>2</sup> Na' bene' gwłane' gone' řin dan' nac ca' cheyała' soateze' gone' da' güen yogo' řa sin cbi gone' da' zaca' tilchone'. Cheyała' soa toz no'ol che', na' cheyała' gague' bene' yo'o xbab, na' gague' bene' chnabia' cuine' chone' da' güen, na' gague' bene' chon da' zej toľi cont bene' yoble yesape' ľe' bala'an. Cheyała' yebede' gwlebe' bene' ľiže', na' cheyała' gague' bene' chac chzejni'ide' xtiža' Diosen' binľo. <sup>3</sup> Bene' chzože bi gac gwłane' řinna'. Bi cheyała' gague' bene' yolao chdile chšaše'. Cheyała' gague' bene' řagüe' bene' chon güen len yezica'chle bene', na' bi cheyała' gague' bene' chon znia, neca selaže'chgüe' gone' gan mechw. <sup>4</sup> Na' cheyała' gague' bene' neze can' gone' cont xi'ine' ca' na' nochle bene' nita' ľiže' yosozenague' che' na' yesape' ľe' bala'an. <sup>5</sup> Le ře bi nezde' nac gone' cont xi'ine' ca' yosozenagbe' che' na' yesapbe' ľe' bala'an, bi gac gone' cont bene' chesedop chesežag chesonxene' Diosen' yosozenague' che'. <sup>6</sup> Bi cuejle bene' za' chzolao chejnilaže' Diosen' cont gwgüia ne'e bene' ca' chesonxene' Diosen', ľe bene' coben' xož gonxen cuine' na' tena' Diosen' güe'e ľe' castigw ře gone' ca'. Can' goc che Satanásen' cani'te cate' benxen cuinen na' Diosen' bebejen' gan' zoe'na'. <sup>7</sup> Na' bene' cuejle cheyała' soe' gone' cont bene' ca' bi zjanac txen yesenezde' chone' güen, ľe ře gone' da' malen' yesene' bene' che' na' Satanásen' co'oyelan' ľe' gonche' da' malen'.

*Bene' ca' yeson řin bixjw*

<sup>8</sup> Na' ľecze cate' cuejle bene' yeson řin bixjw da' chata' len bene' ca' chesonxene' Diosen', ľe cuej bene' cheson güen cont gapcho ľegaque' bala'an. Ľecze cheyała' yesaque' bene' chesoe' diža' ľi da' řejle'cho, bene' bi zjayolagüe' chesezožde', na' bene' bi yesezeláže' yeseni'e che xřin Diosen' dan' yesone'na'. <sup>9</sup> Cheyała' yesaque' bene' chesejle'e cayanen' ba bzejni'i Diosen' chio' che Jesucriston' dan' nono gwneze cana', na' bene' cheson da' güen cont yesenezde' ľo' yichjlažda'ogüe' chesone' can' chazlaže' Diosen'. <sup>10</sup> Na' cate' za' cuejle bene' ca' yeson řin bixjwna', ľe na'yaňe' can' chesonen', na' ře gata'bia' chesonen' binľo bibi chesechoe', nachen' cuejle ľegaque'. <sup>11</sup> Na' no'ol ca' yeson xřin Diosen' ľecze cheyała'

yesone' cont gapchone' bala'añ. Bi cuejle no'ole chñie' che bene' o no'ole yolagüe' sožde', san cuejle no'ol ca' yesenite' yesone' can' chazlaže' Diosen'. <sup>12</sup> Na' cate' cuejle bene' byo yeson žin bixjw da' chata' ladjo bene' ca' chesonxene' Diosen', le cuej bene' zoa toze no'ol che', na' bene' chon cont bi' che' ca' na' nochle bene' nita' liže' chosozenague' che'. <sup>13</sup> Le še bene' ca' cheson žin bixjon' yesone' binlo dan' yo'o lo na'gaque' yesone', nach yesejnilaže' chgüe' Jesucriston' sin cbi yesežebe', na' yezica'chle bene' yesape' legaue' bała'añ.

*Da' chejni'icho che Diosen' dan' nono gwñeze cana'*

<sup>14</sup> Chzoja' le' da' quinga da' cheyala' gonle la'czla' zoa' lez yob yida' gan' zon', <sup>15</sup> cont še šeda' ba nezd' nac cheyala' yeson bene' ca' zjanac diaža che Diosen', le chio' chdop chžagcho chonxencho Jesucriston' naccho diaža che Diosen' ben' zoa toli tocañe. Na' chio' chdop chžagcho chonxenchone' yo'o lo na'cho choncho cont chesombia' bene' diža' li che Diosen'. <sup>16</sup> Da' licze da' zaca'chgua dan' ba bzejni'i Diosen' chio'. Cana' nono gwñeze da' quinga dan' bzejni'ide' chio' che Jesucriston', žan: Diosen' bide' golje' beñach, na' Spiritw che Diosen' blo'en naque' bene' güen juisyw. Na' bene' ca' zjanac angl che Diosen' bedeseñe'e le'. Na' bžin ža Diosen' bene' cont beyepe' yaba gan' yo'ochgua be'ni'. Na' bene' ca' cheso'e xtižen' ba goseyixjue'eden' len bene' že' nación zito', na' zan bene' že' lo yežlion' ba chesejle'e che'.

## 4

*Žin ža bal'bene' yesebejyichje' diža' li che Diosen'*

<sup>1</sup> Na' Spiritw che Diosen' ba ben' diža' li cont šejni'icho žin ža cate' bal' bene' yesebejyichje' diža' li che Diosen' dan' chejle'cho na' yesejle'e che bi da' yeson da' xigüe' ca' cont yesexoayaguen legaue'. <sup>2</sup> Da' xigüe' ca' yesonen cont nita' bene' yosozejni'ide' diža' güenlaže' da' siyen' bene', na' bene' ca' yosozejni'ide' diža' güenlažen' bibi yesacde' lo' yichjlažda'ogüe' caten' yeseziye'e bene'. <sup>3</sup> Yosožone' yosošagna' bene' na' yosožone' ye'ej gagwcho bal' yela' guagw, la'czla' Diosen' bene' cont zjade yela' guagw ca' cont chio' chonxencho Criston' na' nombia'cho diža' li čhen' gagwchon na' güe'cho yela' choxcen che'. <sup>4</sup> Yogo' dan' ben Diosen' naquen güen na' bi naquen da' gue'echo, con še güe'cho yela' choxcen che' caten' gagwchon. <sup>5</sup> Na' nezecho guac gagwcho bite'teze yela' guagw, le ba gwna Diosen' naquen güen, na' güe'cho yela' choxcen che' cate' gagwchon.

*Can' gon Timoteo xšin Diosen'*

<sup>6</sup> Ca nac bene' ljež chio' chonxencho Jesucriston', cheyala' gwzejni'ido' legaue' da' quinga ba gwnia' le' cont gacleno' legaue' can' chazlaže' Jesucriston', le gwleje' le' cont gwzejni'ido' bene'. Lecz gonen chachlažo' še gwzejni'ido' bene' xtiža' Diosen' dan' chejle'cho, le naquen to diža' güen, na' ba bzenago' čhen do yichj do lažo'. <sup>7</sup> Bi gwzenago' che diža' güenlaže' dan' chesaljlaže' bene' bi chesonxene' Diosen'. Ben byen soaczo' gono' can' chazlaže' Diosen'. <sup>8</sup> Nezecho cate' chda ni'a na'cho chaclenen cuerp chechon' late'. Perw na' cate' choncho can' chazlaže' Diosen', chaclenchen chio' cont zoa chbezcho binlo na'a na' lecz ca' cate' šjayzoacho len le' toli tocañe. <sup>9</sup> Can' ža to diža' dan' zaca' šejle'cho na' dan' zaca' gwzenagcho čhen do yichj do laže'cho. <sup>10</sup> Na' cont choncho can'

chazlaže' Diosen', da'nan' chonchguacho xšinen' na' chyo chchejlaže' cho cate' chzi'diža' bene' chio', le nezecho Diosen' zoe' toli tocañe na' zoacho lez gone' güen len chio'. Le' chaclaže' gwnežjue' yela' mban toli tocañe che yogo' benač, na' can' nacczen gone' len bene' chesejnilaže' Jesucriston'.

<sup>11</sup> Da'nan' bzejni'i bene' da' ca' ba gwnian' na' ben mandadw yosozenague' che yogo' czen. <sup>12</sup> Bi go'o latje yosozoa bene' le' šla'ale lagüe da' naco' bene' xcuide'. Len xtižo' na' len da' chono' ben güen cont yogo' bene' chesejnilaže' Criston' yesape' le' bala'an. Len xtižo' na' len da' chono' blo'e legaque' ca cheyala' yesacde' Diosen' na' bene' lježgaque', ca cheyala' yesenita' chache' yesejnilaže'ne' na' ca cheyala' yesaque' bene' laždao' xilaže'. <sup>13</sup> Na' na'a šlac biña' yida' da' yoble, gwlec yichjo' gwlabo' Xtiža' Diosen' dan' nyojen len bene' ca' chesedop chesežag chesonxene' Jesucriston'. Na' gwneyoede' yosozenague' chen na' bzejni'ide' bi zejen. <sup>14</sup> Bi gatlažo' dan' gwlo'o Diosen' lo' nao' gono' caten' gosexoa na' bene' blao ca' yichjon', bene' ca' chosogüia chesene'e ljež chio' chonxencho Diosen', bosozende' le' gwlej Diosen' gono' xšinen'.

<sup>15</sup> Cheyala' cuec yichjo' do yichj do lažo' gono' da' ca' gwlej Diosen' le' gono' cont yogo' bene' yesele'ede' zejcho' chono' da' güen. <sup>16</sup> Na' gwsaco' can' soa cuezo' cont soačhačo' gono' con can' chazlaže' Diosen' na' soačhačo' gwzejni'ido' bene' xtiža' Diosen' con can' naquen. Ben ca' cont gaclenen le' na' lecze gaclenen bene' ca' chosozenag xtižon' cont šjayzoalenle Diosen' cate' žin ža.

## 5

### *Can' cheyala' gon Timoteo len yezica' chle bene' chesejnilaže' Criston'*

<sup>1</sup> Še no bene' byo gole chone' bi da' mal, bi tilo'ne', san gwneyoede' cuejyichjen', con ben xbab naque' xao'. Na' še no bene' xcuide' chone' bi da' mal, gwneyoede' cuejyichjen', con ben xbab naque' bene' bišo'. <sup>2</sup> Na' še no no'ol gole chone' bi da' mal, gwneyoede' cuejyichjen', con ben xbab naque' xnao'. Na' še no no'ol xcuide' chone' bi da' mal, gwneyoede' cuejyichjen', con ben xbab naque' bene' zano'. Cheyala' gwsaco' cont gaco' bene' laždao' xilaže' len legaque'.

<sup>3</sup> Chio' chdop chžagcho chonxencho Criston' cheyala' gwnežjwcho da' cheseyaže' no'ol ca' ba gosat bene' čhegaque' še da' li zjanaque' bene' chyažj chchine. <sup>4</sup> Perw še nita' no xi'ingaque' no xesoagaque', bzejni'ide' legaque' cheyala' yosonežjue' da' cheseyaže' no'ol ca', le no'ol ca' ba bososgole' legaque', na' Diosen' chaclaže' yesone' güen len legaque' cont yosolo'e chesejnilaže'ne'. <sup>5</sup> No'ol ca' nono zoa bene' gwnežjw legaque' da' cheseyažjde' na' zjanaque' dogualje güezebe, yesenite' lez gaclen Diosen' legaque' na' do ža do yel yesenite' yesenabde'ne' gaclene' legaque'. <sup>6</sup> Perw no'ol güezeb ca' chesacde' yesone' con ca' žan čhegaque', len Diosen' yichjlažda'ogaquen' naquen ca' che to bene' ba got la'czla' ne' zjambane'. <sup>7</sup> Ben mandadw neče bene' ca' chesedop chesežag chesonxene' Jesucriston' yesone' can' žia' nga na' bibi da' mal yesone' da' zaca' no tile legaque'. <sup>8</sup> Še no bene' bi chaclene' cont gata' da' chyažje bene' zjanac diaža' che', ba bzoe' šla'ale xtiža' Diosen' dan' chejle'cho' chen, na' malech chone' ca' bene' bi chesejnilaže' Jesucriston'. Na' leca da' mal chone' še bi chaclene' bene' lo' yo'o čhe'.

<sup>9</sup> Quinga nezedop no no'ol güezeb ca' cheyala' gwchelo' le'e yiš cont bene' ca' chesedop chesežag chesonxene' Jesucriston' yosogüe'ej

yosoguagüe'ne' na' yosonežjue' bichle da' cheseyažjde'. Cuejle no'ol gol ca' beñe' ba gwde gayon iz, no'ole goc toze beñe' che'. <sup>10</sup> Cuejle con no'ol ca' zjaneže beñe' ba gosonchgüe' da' güen, ca no da' quinga: še bosgole' bi' che' binlo, še blebe' beñe' liže', še goclene' yezica'chle beñe' chesonxene' Diosen', še goclene' beñe' ca' cheseyi chesezaque', o še ba bene' bite'tezechle da' güen.

<sup>11</sup> Beñe' ca' chesedop chesežag chesonxene' Jesucriston' bi cheyała' yesego'o lo na'gaque' yosogüe'ej yosoguague' no'ol güezeb xcuide' ca'. Le no'ol ca', gwžin ža yesaclaže' yosyošagne'e da' yoble, <sup>12</sup> na' yesape' doła' še yesebejyichje' xšin Criston' dan' gosechebe' yesone'. <sup>13</sup> Na' lecze no'ol güezeb xcuide' ca' bi naquen güen gwco'olaochwne' yeselaže' to to liž beñe', cont bi yesaque' beñe' xagüed, na' cont bi yesaque' beñe' güetob diža'. Bi yeselaže' to to liž beñe' yesezi'diže' bi chac, le bi cheyała' yesone' dan' nac ca'. <sup>14</sup> Da'n'an' chaclaža' no'ol güezeb xcuide' ca' yosyošagne'e da' yoble na' yesezanche' cont yosyosgole' xi'ingaque' na' yosogüia yesena' ližgaquen' binlo, na' bi yesone' cont beñe' ca' chesegue'ede' chio' yesene' chesone' da' mal. <sup>15</sup> Chnia' ca' le nita' bał no'ol güezeb xcuide' ca' ba gosebejyichje' Criston' na' chosozenague' che Satanásen'.

<sup>16</sup> Note'tez beñe' chejnilaže' Criston', še nita' no'ol güezeb lo diaža chegaque', cheyała' yosonežjue'ne' da' yese'ej yesagüe' cont bibi da' zed yesone' len beñe' ca' chesedop chesežag chesonxene' Criston'. Nach con no'ol ca' nono zoa yesaclen legaque', legacze' cheyała' yesego'o lo na' beñe' ca' chesedop chesežag chesonxene' Criston'.

<sup>17</sup> Na' ca nac beñe' blao ba zjanchoj chosogüia chesene'e beñe' ca' chesedop chesežag chesonxene' Criston' to to yež, še chesene'e beñe' ca' binlo, da' xen cheyała' yesacxene', na' cheyała' gwnežjwchone' da' yesacbande'. Na' zaca'che' yesacxene' še cheseyixjue'ede' xtiža' Diosen' na' chosozejni'ide' beñe' bi zejen. <sup>18</sup> Cheyała' yesacxene' na' gwnežjwchone' da' yesacbande', le nyoj Xtiža' Diosen' žan: "Bitw gwseyjwle cho'a go'n cont ca gagwba' cate' chlej chšošjba' trigon' neče choj xen'." Na' lecz nyojen žan: "Beñe' güen žin cheyała' si' laxjue'."

<sup>19</sup> Bi gono' cuent cate' no beñe' gagw xya che to beñe' blao beñe' nchoj chgüia chne'e beñe' lježe' chesonxene' Criston' še bi zoa yeto beñe' o yečhope beñe' co' da' bałi. <sup>20</sup> Na' še da' li ba bene' da' malen', cheyała' tilo'ne' lao beñe' ca' chesedop chesežag chesonxene' Criston' cont yezica'chle beñe' ca' yesežebe' yesone' da' malen' nac ca'. <sup>21</sup> Na' toze can' cheyała' gono' len note'teze beñe', bitw nacho bał beñe' gonxenchguachone' na' yebałe' gonchone' nacteze. Na' Diosen' len Xancho Jesucriston' na' len angl beñe' ca' zjanchoj chesone' mandadw che' zjanezde' chona' mandadw gono' yogo' da' ca' ba gwnia' nga. <sup>22</sup> Bitw yob cuejo' beñe' güia ne'e lježe' cont gague leno' gapo' doła' še ben' gwlejon' gone' da' mal. Gwsaco' cont bibi doła' gapo'.

<sup>23</sup> Na' dan' tołize chac li'o, bi ye'ejo' toze nis, san güe'ej late' güeje vino.

<sup>24</sup> Bał beñe' nacbja' chesone' da' mal na' yogo'ze beñe' zjanezde' can' chesonen' la'czła' biña' žin ža yesezi'e castigw chen. Na' bał beñe' chesone' da' malen' dan' ngaše' na' da' bi nacbja', perw žin ža gwlo'elaon. <sup>25</sup> Na' lecz ca' naquen len beñe' ca' cheson da' güen, nacbja' še da' güenna' chesone', na' la'czła' gague nła' da' güenna' chesone', bi nacho yega'ancze багаše'ze dan' chesonen'.

## 6

<sup>1</sup> Na' bene' ca' chesejnilaže' Criston', bene' zjanac esclavos, cheyała' yesacbe'ede' bene' ca' zjanaque' xan žin čhegaquen' zjazaque' cont yosozenague' čhegaque'. Cheyała' yesape' legaque' bala'an cont nono ne yela' ya' čhe Diosen', neca no ne čhe dan' chzejni'ichon'. <sup>2</sup> Bene' ca' zjanac esclavos, še xangaque' lecze chesejnilaže' Criston', bi cheyała' yesone' xbab bi yosozenague' čhegaque' neče zjanaque' txen chesonx-ene' Criston', san nachle cheyała' yesone' žinna' do laže'che' na' cheyała' yesacde' xan žin ca' ca' bene' biše', lagüe zjanaque' txen chesejnilaže' Criston'. Bzejni'i da' ca' ba gwnia' cheyała' yesone' na' gwneyoe bene' yosozenague' čhen.

*Cheyała' soacho mbalaz len da' de čecho*

<sup>3</sup> Nita' bene' chosozejni'ide' xbab čhegacze' na' bi chososed chosolo'ede' diža' li čhe Xancho Jesucriston' dan' ba blo'eda' le', na' chosozejni'ide' clele, chesene' bi chonen byen soacho goncho can' chazlaže' Diosen'. <sup>4</sup> Bene' ca' chosozejni'ide' dan' zej clele chesonxen cuingaque', chesacde' zjanezde' da' zan, len bibi chesejni'ide'. Chosošaše' čhe no diža' o čhe bichle da' bi naquen da' zaque', chesacxi'e lježe', chesacyože' len lježe', chesezi'diža' lježe', na' chesacde' chesacxi'a bene' legaque'. <sup>5</sup> Con bi cheyož chedo chesedił chosošaše', le ba yo'o da' malen' lo' yichjlažda'ogüe' na' bi zjanombi'e diža' li čhe Diosen'. Con chesacde' yososed yosolo'ede' xtiža' Diosen' cont yesaque' bene' gwni'a. Bi gono' txen len ben' cheson ca'. <sup>6</sup> Da' li zoachguacho binlo cate' choncho can' chazlaže' Diosen' na' cate' zoacho mbalaz len bi da' dao' de čecho. <sup>7</sup> Ga'alcho bla'cho yežlion' na' ga'alcho cate' yeza'cho. <sup>8</sup> Na' še de da' čhe'ej chagwcho na' še de xalana'cho da' chyažjecho, cheyała' soacho mba len da' ca'. <sup>9</sup> Bene' ca' chesezelaže' yesaque' bene' gwni'a chosozenague' čhe da' malen' na' cheselažoe' lo' na' gwxiyen'. Chesezelaže' da' zan da' gata' čhegaque' da' yesede čhen, na' da' ca' chesezelaže' chesonen mal len legaque' na' žin ža yesebiaye'e. <sup>10</sup> Bene' chzelaže' mechw nach chzenague' čhe bite'teze da' mal. Na' nita' bene' ba gosebejyichje' diža' li čhe Diosen' dan' chesezelaže' mechon', na' da' zan dan' chosožaglaochgüe' yela' güen da' mal čhegaque'na'.

*Cheyała' cuec yichj Timoteon' gone' xšin Criston'*

<sup>11</sup> Na' ca' nac le' Timoteo, bi gono' can' cheson bene' ca', le Diosen' gwleje' le' cont gono' xšinen'. Cuec yichjo' gono' da' zej to licha, ben con can' chazlaže' Diosen', soachacho' šejnilažo'ne', goque bene', byo bchejlaže' cate' de da' saca'zi'o, na' goc bene' šagüe'. <sup>12</sup> Gwlec yichjo' ben con ga zelao saquedo' cont gono' yogo' dan' chazlaže' Diosen'. Na' bebe dan' šjayzo' len Diosen' toli tocañe, le Diosen' gwleje' le' šjayzo' len le', na' ba bi'o diža' lao bene' zan žo' chejnilažo'ne'. <sup>13</sup> Dios ben' chnežjo yela' mban čhe yogo' benachen', čhe beyixe' ca' na' čhe bica'chle da' zjamban, na' Jesucristw ben' be' diža' li lao Poncio Pilato, gwne' Diosen' gwsele'ne', legaque' zjanezde' chona' mandadw <sup>14</sup> gwzenago' čhe yogo' dan' ba gwnia' le', na' bi go'o latje ten ca'ze, cont bi gono' da' zaca' no tile le'. Bzenag čhe yogo' dan' bena' mandadw gono' žinte ža yid Xancho Jesucriston' da' yoble. <sup>15</sup> Le cate' žin ža gwžia bia' Diosen', nach yide' da' yoble. Toz Dios nan' chnabi'e doxen na' zoachgüe' mba. Len' naque' Rey ben' chnabi'e yezica'chle rey ca', na' naque' Xancho ben' chnabi'e yezica'chle bene'

gwnabia'. <sup>16</sup> Totec Dios nan' bi nacho žin ža gate'. Na' catec yo'ochgua be'ni' gan' zoen', nono gac bigue' gała'ze gan' zoe'na'. Nono zoa yežlio nga bene' ba ble'ede' Diosen' na' nono gac le'e le'. Cheyala' gonxenchone' le chnabi'e toli tocaņe. Na' can' gonšcaczcho.

<sup>17</sup> Na' ca nac bene' ca' chesejnilaže' Criston', bene' zjanac bene' gwñi'a lo yežlio nga, gože' bi yesaque' bene' ya'laže'. Na' yo'o legaque' bi yesone' xbab yesenite' mba lagüe zjanaque' bene' gwñi'a, le yob te che bite'tez da' de chegaque'. Yo'o legaque' yesezoe' lez yesenite' mbalaz len Dios ben' zoe' toli tocaņe. Toga le' chone' chio' yogo' da' güen da' chyažjecho na' da' chbecho. <sup>18</sup> Na' yo'one' yesenite' yesonchgüe' da' güen, yesone' yogo' cuen da' güen can' chazlaže' Diosen', nach lecze yo'one' yesezande' da' de chegaque' cont yesaclene' bene' na' yesebede' yesone' ca'. <sup>19</sup> Še yesone' ca', na' gaquen ca to yela' gwñi'a da' bi te chen, le Diosen' chaclaže' yesaclene' bene', na' gone' cont yesenite' mba cate' šjasyenite' len le' toli tocaņe še yesone' ca'.

*Pablon' chzože' carten'*

<sup>20</sup> Timoteo, gwlecchgua yichjo' che yogo' dan' ba bzejni'i Diosen' le'. Bi gwzenago' che bene' chosošalj diža' da' bibi zaca', ne che dan' chesene bene' dan' bi zej lebe len diža' li che Diosen'. Chesonlaže' chesene' cheso'e diža' sina'. <sup>21</sup> Bene' bosozenague' che dižan' nač ca' ba gosebejyichje' diža' li che Diosen' da' chejle'cho na' bich chesejnilaže'ne'.

Chnabšca' gaclen Diosen' le'. Da' na'zen' chzoja'.

## CART GWCHOPE DAN' BZOJ POSTLW SAN PABLO CHE TIMOTEO

*Pablon' chzoje' Timoteon'*

<sup>1</sup> Neda' Pablo naca' postlw che Jesucriston', le Diosen' gwналаže' gwsele' neda' chyixjue'eda' can' gwne' gone' cont note'teze bene' yesejni-laže' Jesucriston' gata' yela' mban chegaque' toli tocañe. <sup>2</sup> Na' chzoja' le' Timoteo, ba nona' le' ca xi'ina'. Chnaba' lao Xacho Diosen' na' lao Xancho Jesucriston' yesaclenšque' le' na' yesyeyaše'laže'de' le', na' yesonšque' ca so' binlo len xbab da' yo'o lo' yichjlažda'oguoñ.

*Cheyalá' güe'cho diža' che Jesucriston'*

<sup>3</sup> Chonxena' Diosen' do yichj do laža' can' goson da' xozxta'ogua', na' nezda' lo' yichjlažda'ogua' chona' can' chazlaže' Diosen'. Na' yogo' ni'a cate' chol güiža' Diosen', lagüe ža na' šeže'le, choa' yela' choxcen che dan' chonon'. <sup>4</sup> Chjaza'laža' gwchežo' cate' beza' gan' zon', na' zelaža' le'e lježcho da' yoble, le yebechgüeda' še ca'. <sup>5</sup> Na' chona' xbab can' chejnilažo' Diosen' do yichj do lažo' can' zgua'tec goson taguo' Loida na' xna'o Eunice, na' nezda' lecz ca' chono' le' na'a.

<sup>6</sup> Da'nana' chñeyoeda' le' da' yoble, güe'lažo' gono' da' gwlo'o Diosen' lo nao' gono' caten' gwwoa na'ton' yichjon'. <sup>7</sup> Diosen' bene' chio' Spiritw chen' zoan lo' lažda'ochon', na' Spiriton' chaclenen chio' cont bi žebcho, na' chonen chio' yela' guac cont goncho can' chazlaže' Diosen'. Lecze chaclenen chio' cont chaque lježcho na' cont choncho da' zejen na' güe'cho diža' da' zaca'. <sup>8</sup> Da'nana' chñeyoeda' le', bi yeto'edo' chixjue'edo' xtiža' Xancho Jesucriston', na' naca' yeto'edo' chia' la'czla' dia' ližya nga da' chzenaga' che Jesucriston' na' chyixjue'eda' xtižen'. Cheyalá' gono' can' chonan' na' gwyo gwchejlažo' bi da' gac chio' cate' chixjue'edo' diža' güen chen', le zoa Diosen' chaclene' chio' len yela' guac chen'. <sup>9</sup> Diosen' ba none' chio' yela' mban toli tocañe na' gwleje' chio' cont naccho lo ne'en. Na' bene' ca' da' nži'ilaže'de' chio', gague neče bi da' güen bencho. Cate' biña' xe yežlion' bsi'e xneze sele' Jesucriston' cont gaclene' chio'. <sup>10</sup> Na' na'a Diosen' ba blo'e nži'ilaže'de' chio', le ba gwsele' Jesucriston' ben' chon yela' mban chechon' toli tocañe. Na' žin ža gwczuež Jesucriston' yela' goten' na' gone' cont chio' chejle'cho diža' güen chen' šjayzoacho len le' toli tocañe.

<sup>11</sup> Na' Diosen' gwleje' neda' naca' postlw che' na' gwsele'nda' cont chyixjue'eda' diža' güen che Jesucriston' na' chsed chlo'eda' bene' bi zjanac bene' Israel. <sup>12</sup> Na' dan' chona' ca', chžaglagua' da' quinga chac chia', perw bi cheto'eda' chen, le nombi'a Diosen' ben' chejnilaža'. Ba ben cuina' lo ne'e, na' nezda' nape' yela' guac gone' cont ne' soačhača' šejnilaža'ne' caten' žin ža yid Jesucriston' da' yoble.

<sup>13</sup> Soačhačo' gwzejni'ido' bene' diža' zaca' can' ba bendo' chzejni'idan', na' soatezo' šejnilažo' Jesucriston' na' gacdo'ne' do yichj do lažo'. <sup>14</sup> Be' latje gaclen Spiritw che Diosen' le' cont soatezo' gwzejni'ido' bene' diža' li da' bsd blo'eda' le'e, le zoa Spiriton' lo' lažda'ochon'.

<sup>15</sup> Neždo' Figelo na' Hermógenes len yezica'chle bene' migw chia' ca' že' distritw che Asia ba gosebejyichje'nda'. <sup>16</sup> Na' chnaba' gaclenšca Xancho Diosen' Onesíforo len bene' lo' yo'o che', le bi beto'ede' chia' da' dia' ližya



nga, san zan ni'a bedetipe' laža' nga. <sup>17</sup> Cate' bide' Roma nga, bene' byen beyiljue' neda' con cate'ch beželde'nda'. <sup>18</sup> Neздо' lecze da' zan bene' goclene' neda' cate' gwzoa' Efeso. Chnaba' lao Xancho Diosen' gacšca güen che' cate' žin ža yid Xancho Jesucriston' da' yoble.

## 2

### *Cheyała' gwyo gwčhejcho len da' saca'zi'cho*

<sup>1</sup> Xi'indagua', chnaba' soačhacho' šejnilažo' Jesucriston' lagüe' da' nži'ilaže'de' le'. <sup>2</sup> Na' yogo' da' ba bendo' gwdixjue'eda' lao bene' zan, da' ca' bsed blo'en bene' yosozenag čhen do yichj do laže'gaque', bene' ca' guac yosozejni'iden' bene' yoble.

<sup>3</sup> Na' byo bčhej len da' saca'zi'o šlac chono' xšin Jesucriston'. Goc ca to soldadw bene' bi chžeb bi gac che'. <sup>4</sup> Nezecho bene' zej yela' soldadon' bi chac gon xšine' šlac zeje' lao gwdila', san chbejyichjen' cont gone' bin' ža ben' nac xan soldadw ca'. <sup>5</sup> Na' nezecho bene' chja'ac lo güitj cheyała' yesone' cayanen' ba bosoxi'e yesone' cate' yeseyitje', cont gac yesezi'e da' yesone' gan. <sup>6</sup> Na' leze nezecho bene' chelale chone' žin yix'e chzi'e da' nechw da' chbia lao coseš čhen'. <sup>7</sup> Ben xbab che da' quinga ba gwnia' le', na' Xancho Jesucriston' gaclene' le' šejni'ido' yogon'.

<sup>8</sup> Ben xbab che Jesucristw ben' beyas bebane' ladjo bene' guaten', ben' nac xi'in diaža che da' rey Davin'. Che len' chzejni'ida' cate' chyixjue'eda' diža' güen che'. <sup>9</sup> Na' da' chyixjue'eda' diža' güen čhen' chosoči chososaque'nda' na' dia' ližya nga ca to no bene' mal juisyw. Perw nežda' bibi gac yesone' cont bi gas laje xtiža' Diosen' lo yežlion'. <sup>10</sup> Da'n'an' chzanlaže' cuina' gac bi da' gac chia' lagüe' da' chyixjue'eda' xtiža' Diosen', le chaclaža' yezica'chle bene' ba gwleje' cont gata' yela' mban čhegaque' toli tocanē yesejnilaže' Jesucriston', na' žin ža šjasyezoe' len le' toli tocanē gan' chac da' güen juisyw. <sup>11</sup> Diža' quinga zjanaquen da' li:

Še chejnilaže'cho Criston' ben' got neče xtoła'chon',  
chio' lecze naccho ca to bene' guat len da' xinjen' cont bich gonchon.  
Na' con can' bosban Diosen' Criston' ladjo bene' guaten',  
lecze ca' bocobe' yichjlaždao' chio' cont šjayzoacho txen len le'.

<sup>12</sup> Na' še soačhachcho šejnilaže'chone' bite'teze chac čhecho, lecze gone' cont nabia'cho txen len le'.

San še cuejyichjcho Criston', lecze le' cuejyichje' chio'.

<sup>13</sup> Na' la'czla' še chio' bi goncho can' gwnacho goncho,  
Diosen' zoe' chone' con da' ba gwne' gone',  
le Diosen' bi gac gwše'e da' ba nžie' bia' gone'.

### *Ben' chon xšin Diosen' binlo*

<sup>14</sup> Bi go'o latje yesanlaže' bene' ca' chesejnilaže' Jesucriston' da' ca' ba bzejni'ida'. Na' yosnisdo' legaque' naquen mal len Xancho Diosen' yesedił yosošašlen lježe' che bize diža'. Bibi zejen yesone' ca', le cate' bene' chesende' chesedił chosošaše', chonen cont bi yesejle'e che xtiža' Diosen'. <sup>15</sup> Ben con ga zelao saque'do' cont yebe Diosen' can' chonon' na' cont bi gacdo' zto' lagüen' can' chono' xšinen'. Gwsed gwlo'edo' xtižen' to liča. <sup>16</sup> Bi gono' txen len bene' chesoe'chgüe' bite'teze diža' da' bibi zaca', diža' da' bibi zejen len Diosen', le dižan' zjanac ca' chziyen' bene' yesonche' da' mal. <sup>17</sup> Dižan' nac ca' chžiyin' bene' ca to yižgüe' mal. Can'

ba goc che Himeneo na' Fileto, <sup>18</sup> gosebejyichje' diža' li da' chzejni'in che Criston'. Chososed chosolo'ede' chesene' bi soacho lez žin ža yebancho ladjo bene' guaten, le chesene' ba gwde che da' ca'. Na' bał bene' ba chesejnilaže' Criston' chesacžejaže' na'a neče xtiža' bene' ca'. <sup>19</sup> San chio' zoachacho chzenagcho diža' li che Criston' na' Diosen' chone' cont bi chbejyichjchon. Da'nan' zaca'lebcho ca to lene yo'o da' nac da' gual. Na' nyojczye Xtiža' Diosen' žan: "Diosen' nezde' no bene' zjajo'o lo ne'e." Na' leczye nyojen žan: "Note'tez bene' že' chejnilaže' Xancho Diosen', cheyała' cuejyichje' bich gone' da' mal."

<sup>20</sup> Nezecho to liž bene' gwni'a de no tas platw na' no yeso' xguag de oro de plata da' zjazaca'chgua. Lecze de yeso' xguag de gona', na' de no batia na' bichle de yag da' chesonen žin da' bitec zjazaca'. <sup>21</sup> Can' naquen len chio', note'tezcho še cuejyichjcho da' malen', nach Xancho Diosen' gwčhine' chio' neče goncho da' zan da' güen da' chaclaže' goncho. Na' še goncho ca', saca'lebcho ca to tas o to xguag de oro da' zaca'chgua.

<sup>22</sup> Na' ca nac le', cheyała' cuejyichjo' bite'teze da' mal da' chzelaže' lažda'oguo'n gono', da' ca' chesezelaže' note'teze bene' güego' yesone'. Beyiljwlaže' nac gono' cont gaco' bene' güen len Diosen' na' cont soachacho' šejnilažo'ne', cont gacdo' Diosen', na' cont soa cuezo' binlo len bene' lježo' ca'. Ben ca' txen len yogo' bene' chesenab goclen lao Xancho Diosen', bene' zjanac bene' laždao' xilaže'. <sup>23</sup> Bi gono' txen len bene' bi chesejni'ide', bene' chosošaše' cheso'e diža' da' bibi zejen, le xtiža'gaquen' chonen ga chesacyož bene'. <sup>24</sup> Chio' choncho xšin Diosen' bi cheyała' tile gwšašlencho bene'. Cheyała' gaccho bene' šagüe' len yogo'ze bene', cheyała' nezecho naquen' gwzejni'icho legaque' che Diosen', na' cheyała' gapcho yela' chxenlaže' len legaque'. <sup>25</sup> Na' cate' güe'cho consejw che bene' bi chesaclaže' yosozenague' diža' li che Criston', cheyała' güe'lencho legaque' diža' šagüe', na' cuezcho gaclen Diosen' legaque' yosoša' xbab chegaquen' cont yosozenague' che diža' li chen'. <sup>26</sup> Can' goncho cont Diosen' gwnežjue' legaque' to xbab šagüe' na' yesyechoje' lo na' Satanás dan' chnabia' da' xigüe' ca', le chonen cont nite' chesone' con can' chazlažen'.

### 3

*Naquen' yeson bene' cate' ba zoa yid Xancho Jesucriston' da' yoble*

<sup>1</sup> Na' che'nda' šejni'ido' da' nga, cate' žin ža ba zoa yid Xancho Jesucriston' da' yoble, da' zan da' mal gac. <sup>2</sup> Bene' zan yesonxen cuingaque', na' zane' yesebec yichje' gata' da' zcha'o xmechwgaque'. Zane' yeso'e diža' ca güenna' chesone' na' yesaque' bene' ya'laže'. Yeseneye'e che Diosen'. Bi yosozenague' che xaxna'gaque'. Bi yeso'e yela' choxcen che Diosen' na' bi yesape' le' bala'an. <sup>3</sup> Bi yesacde' bene', bi yesyezi'xen che lježe', yesene' mal che bene' yoble, con yesontezze' bite'teze da' mal da' žan chegaque', yesacchgüe' bene' znia, na' yesegue'ede' bite'tez da' nac da' güen. <sup>4</sup> Yosode lježgaque' lo na' bene' chesegue'ede' legaque', bi yesezebe' yesone' bite'ze da' mal, yesone' xbab zjazaca'chgüe', na' yesaclaže' yesone' con da' chpe legacze' na' bi yesaclaže' yesone' xbab che Diosen'. <sup>5</sup> Lecze da' zan da' yesone' cont yesaque' bene' chesonxenchgüe' Diosen', perw bi soa yela' guac che Diosen' len legaque'.

Bi gono' txen len bene' ca' cheson da' ca' ba gwnian'. <sup>6</sup> Bene' ca' cheson ca' chja'aque' liž no'ole bene' chesejle'daze', na' chesonlede' legaque' len

diža' da' cheso'e. No'ol ca' zjادهgua xtoła'gague', le chesonteze' da' mal can' ža lo' lažda'ogaquen'. <sup>7</sup> No'ol ca' chosozenague' che note'teze' že' gwzejni'ide' legaue', perw na' bi chžin ža yesejni'ide' diža' li che Diosen'. <sup>8</sup> Cani'te da' Janes na' da' Jambres besegue'ede' Moisésen' na' bi gosaclaže' yosozenague' diža' li da' be'len da' Moisésen' legaue', na' ca'czen' nita' bene' gwxiye' na'a chesegue'ede' diža' li che Diosen'. Nčhol yichjlažda'ogaue' yela' güen da' mal čhegaquen', na' gague da' li chesejnilaže' Diosen'. <sup>9</sup> Bi gac yesonlede' bene' sša, le yob gac čhegaue' can' goc che da' Janes na' da' Jambres, žin ža cate' yezica'chle bene' yesacbe'ede' chosozejni'ide' clele yela' bi chejni'i čhegaue'.

*Consejw da' zelagüe' da' bnežjw Pablon' Timoteon'*

<sup>10-11</sup> Na' le' Timoteo, nezczedo' can' ba bzejni'ida' le' na' can' zoa' chona' da' güen. Nezdó' chi' yichja' gona' yogo'lol da' ža Diosen'. Nezdó' zoačhača' chejnilaža' Diosen' bite'tez da' chac čhia'. Na' nezdó' napa' yela' chxenlaže' len ljež beňacha' na' zoacza' chacda' legaue'. Nezdó' bi chbejyichja' xšin Diosen' da' chona', la'czla' da' zan da' ba bosochi bososaca' bene' neda'. Na' nezdó' da' ca' gosonde' neda' cate' gwzoa' ciuda Antioquia na' cate' gwya'a yež Iconio len yež Listra, na' can' gwdi gwxaca'. Na' nezdó' Xancho Jesucriston' bosle' neda' lo yogo' da' ca' da' goc čhia'. <sup>12</sup> Da' li yesenita' bene' yosochi yososaue' note'tez chio' chejnilaže'cho Cristo Jesúsén', chio' chi' yichjcho chzenagcho che'. <sup>13</sup> Bene' mal bene' güexoaayag ca' šja'acze' yesonche' da' xinjen', yeseziye'e bene' na' lecze yesejle'e che diža' güenlaže' da' yesoe' bene' yoble.

<sup>14</sup> Na' le' Timoteo, cheyala' soačhačo' gwzenago' che da' ca' chejni'ido' che Criston'. Nezdó' naquen diža' li, le bzejni'iton' le'. <sup>15</sup> Cate' nactio' bidao' ba nombi'o Xtiža' Diosen' da' nyojen. Na' Xtiže' nan' chzejni'in chio' cheyala' šejnilaže'cho Cristo Jesúsén' cont gata' yela' mban čhecho toli tocañe. <sup>16</sup> Cuin Diosen' bzejni'ide' bene' ca' bosozoj Xtižen' cont bosozoje' xbab čhen'. Da'nan' doxen Xtiža' Diosen' dan' nyojen zaca'chguan da' chzejni'in chio' che Diosen', chdižen chio' cate' choncho da' xinj, na' chzejni'in chio' nac goncho cont na' Diosen' choncho da' güen. <sup>17</sup> Na' chio' chejnilaže'cho Diosen', Xtižen' chzejni'in chio' yogo'lol da' cheyala' nezecho cont soačo goncho yogo' da' güen.

## 4

<sup>1</sup> Yid Xancho Jesucriston' da' yoble cont gone' yela' justis che yogo' benach, bene' ne' zjamban lente bene' ba gosat, na' caten' yide' da' yoble nach solao nabi'e yežlio nga. Na' Timoteo, Diosen' len Xancho Jesucriston' zjanežde' chona' mandadw gono' da' quinga: <sup>2</sup> Čixjue'edo' xtiža' Diosen' cate' nlatjo' na' cate' chacdo' bi nlatjo'. Be'len bene' diža' cont yesenežde' chesone' da' xinj, gwdił legaue' che da' malen' chesone' cont yesyetinjen', na' gwđap yela' chxenlaže' bzejni'ide' da' cheyala' yesone'. <sup>3</sup> Gwžin ža cate' bi yesaclaže' bene' yosozenague' xtiža' Diosen' da' chzejni'icho da' naquen da' li, na' yosotobe' bene' yosozejni'ide' legaue' diža' yoble da' yesazlaže' legacze'. <sup>4</sup> Yesebejyichje' bich yosozenague' che diža' lin' na' yosozenagche' che diža' da' chesaljlaže' bene'. <sup>5</sup> Perw ca' naco' le', cheyala' gaco' bene' yo'o xbab, na' gwđap yela' chxenlaže' len yogo'te da' sacazi'o, na' soatezo' go'o diža' güen che Jesucriston' do yichj do lažo'. Ben yogo' da' gwlo'o Diosen' lo nao' gono'.

<sup>6</sup> Na' ca nac neda', ba zoa yesote' neda', da' li ba chžin ža šjayzoa' len Diosen'. <sup>7</sup> Na' chebeda' guac nia' do yichj do laža' ba gwdilla' da' chgue'e Diosen'. Ba bena' yogo'lo' da' gwlo'o Diosen' lo na' gona' na' ba gwzoačhača' chejnilaža' Jesucriston' na' ne' zoačhačza'. <sup>8</sup> Na' cate' šjayzoa' len Diosen', gone' cont soa' mba da' bena' güen šlac mbana'. Xancho Jesucriston' zeje' to licha, na' cate' žin ža čhoglagüe' nac gac čhe yogo'lo' bene', gague neda'zen' gone' soa' mba, san yogo' nochle bene' chesyebede' chesebeze' baten' yide' da' yoble, lecze gone' cont legaque' yesenite' mba.

*Da' chaclaže' Pablon' gon Timoteon'*

<sup>9</sup> Ben byen con ga zelao saque'do' yob yido' nga. <sup>10</sup> Ben ca', le Demas ba gwlejjyichje'nda' na' ba zjayde' yež Tesalónica da' chi'chgua yichje' bin' gata' čhe' lo yežlio nga. Na' Crescente ba zeje' Galacia na' Titon' ba zeje' Dalmacia. <sup>11</sup> Yetoga Lucas nga'anlen neda' nga. Na' čhe'šco' Marcos cate' yido', cont gaclene' neda' len xšin Dios da' chona'. <sup>12</sup> Ca nac Tíquicon', ba gwse'la'ne' ciuda Efeso. <sup>13</sup> Na' chaclaža' goxo' xadon čhia' da' bocua'ana' yež Troas liž Carpo cate' yido', na' lecze goxo' libr ca', na' da' žialaoch goxo' yid ca' da' ba zjanyoj.

<sup>14</sup> Alejandro bene' güečhač yan' ba benchgüe' mal len neda'. Xancho Diosen' gwnežjue' le' castigw čhe da' malen' bene'. <sup>15</sup> Na' gwsaco' len le', le chonchgüe' clele len xtiža' Diosen' da' chyixjue'echo.

<sup>16</sup> Cate' bosodie' neda' lo na' justis ca' da' nechw, nono gwzoa no gaclen neda', yogo' bene' ca' goda' yesaclen neda' gosebejjyichje'nda'. Diosen' yezi'xene' čhegaque' da' bi gosaclene'nda'. <sup>17</sup> Bia'cze Xancho Jesucriston' gwzoalene' neda' na' goclenchgüe' neda' cont bia' xtižen' len yogo' bene' ca' že' na', bene' bi zjanac bene' Israel. Na' bosle' neda' lo na' yela' gotten'. <sup>18</sup> Na' nezda' yoslacze Xancho Jesucriston' neda' lo yogo' da' mal da' gac čhia', na' guaclencze' neda' šlac žin ža šjayzoalena'ne' gan' zoe' chnabi'e. Čheya'la' gonxenchwne' toli tocaņe. Can' gonščaczcho.

*Pablo chguape' tiox yeto čhope' na' chnablaže' gaclen Diosen' legaque'*

<sup>19</sup> Gwguapšco' tiox Prisca na' Aquila na' lecz ca' bene' lo' yo'o čhe Onesíforo. <sup>20</sup> Erasto bega'ane' ciuda Corinto, na' bocua'ana' Trófimo yež Mileto, le gocšende'. <sup>21</sup> Ben con ga zelao saque'do' cont yido' cate' za' žin tiemp zag. Eubulo, Pudente, Lino, Claudia na' len yezica'chle bene' chesejnilaže' Jesucriston' nga chosoguape' le' tiox.

<sup>22</sup> Čhnaba' soašca Xancho Jesucriston' len le' na' gaclenšca Diosen' yogo'le. Da' na'zen' chzoja'.

## CART DAN' BZOJ POSTLW SAN PABLO CHE TITO

### *Pablon' bzoje' cart nga*

<sup>1</sup> Neda' Pablo chona' xšin Diosen' na' naca' postlw che Jesucriston' cont gaclena' bene' ca' gwlej Diosen' yesejnilaže'ne', cont yesenezde' can' ža diža' li che Diosen'. Na' diža' li chen' chzejni'in can' goncho da' chazlaže', <sup>2</sup> na' chzejni'in zoacho lez šjayzoacho len Diosen' toli tocanē. Za' xe yežlion' Diosen' gwne' bene' yesejnilaže' le' šjasyenite' len le' toli tocanē, na' Diosen' bi chonlaže' bite'teže da' že'. <sup>3</sup> Na' na'a ba chac da' bžie' bia' gac da' ba chzejni'ida' bene' xtižen', le Dios ben' none' yela' mban checho toli tocanē gwlo'e lo na' chyixjue'eda' bene' xtižen'. <sup>4</sup> Chzoja' le' Tito, naco' ca dogualje xi'ina' da' bzejni'ida' le', na' naccho txen chejnilaže'cho Jesucriston'. Xacho Diosen' na' Xancho Jesucriston' ben' none' yela' mban checho toli tocanē yesaclenšque' le'e na' yesyeyaše'de' le'e na' yesone' cont soa cuezle binlo len xbab chelen'.

### *Da' chon Titon' gan' nzi' Creta*

<sup>5</sup> Cate' bocua'ana' le' gan' zoa yežlio da' nzi' Creta dan' chi' lo nisaon', gwnia' gwzožo' gono' dan' chona' cate' gwzoa' na', to to yež cuejo' bene' blao bene' yosozejni'i na' yosogüia yesene'e yezica'chle bene' chesejnilaže' Jesucriston'. <sup>6</sup> Na' še zoa bene' zoacze' chone' da' güen cont bibi de da' yosode'e bene' yesene' da' xinjen' chone', še naque' bene' zoa toz no'ol che', še xi'ine' ca' chesejnilaže' Criston', na' še bi zjanaque' bene' chesyedabaga', san chosozenague' cont bi zjalaže' chesone' da' xinj, ca bene' nac ca' cheyala' cuejo' güia na' lježe'. <sup>7</sup> Cate' cuejo' bene' co' Diosen' lo ne'e güia ne'e yezica'chle bene' chesejnilaže' Jesucriston', cuejo' bene' zoacze' chone' güen. Bi cuejo' bene' ya'laže', bene' naque' bene' loc, na' bene' borrašw. Bi cuejo' bene' chebede' cueque' žaš, na' neca cuejo' bene' zelaže' gone' da' xinj cont gone' gan mechw. <sup>8</sup> Bene' cuejo' cheyala' gaque' bene' chbede' chlebe' bene' zito' ližen'. Cheyala' gaque' bene' zoateze' chone' da' güen na' bene' chon xbab, bene' chon da' zej to licha, bene' chon da' chazlaže' Diosen' na' bene' chon con ga zelao chzaque'de' cont chone' bi da' ža Diosen'. <sup>9</sup> Cheyala' gaque' bene' zoachache' do laže' chzenague' diža' li che Diosen' da' bzejni'ida' cont gac gwzejni'ide' bene' yoble diža' güenna', na' gone' chachlaže' cont yesenite' yesejle'e da' naquen da' li, na' gac gwlo'ede' bene' ca' chesene' contr diža' li che Diosen' cont yesenezde' clelen' chesone'.

<sup>10</sup> Chnia' gono' ca', le nita' bene' zan bene' Israel gualaž chia' na' yebał bene' yoble chesene' zjanaque' chio' txen, perw bi chosozenague' che Diosen'. Bibi zaca' xtiža'gaque' da' chosozejni'ide', con chesonlede' bene'. <sup>11</sup> Na' da' zjachi' yichjgaque' yesone' gan mechw, da'nana' chosozejni'ide' da' zej clele. Cheyala' gonle cont yesenite' šize bich yosozejni'ide' diža' güenlažen', le clelen' chesone'. Na' bene' zan len bene' lo' yo'o chegaque' chesacžejlaže' che xtiža' Diosen' neche xtiža'gaquen'.

<sup>12</sup> Cana' gwzoa to bene' gwneya'a, goque' bene' Creta, na' gwne' che bene' gualaž che' ca': "Bene' Creta bate'teže zjanaque' bene' güenlaže' na' zjanaque' ca bež znia' yela' güen da' xinj chegaquen'. Lecze zjanaque' bene' lia na' bene' xagüed." <sup>13</sup> Na' da' li can' gwnen'. Da'nana' tilo'

legaque' che da xinj'en' chesonen' cont nita' chache' yesejle' e xtiža' Criston'.  
 14 Gono' ca' cont bich yosozenague' che diža' güenlažen' chesaljaže' beñe' Israel gualaž chia' ca', na' neca yosozenague' che nochle beñe' ba gosebejyichje' diža' li che Diosen'.

15 Diosen' ba none' yichjlažda' ochon' xilaže', na' ne da' chagwcho ne da' choxe'cho bi chžonen gac yichjlažda' ochon' xilaže'. San ca nac beñe' yichjlaždao' mal ca', beñe' bi chesejnilaže' Criston', bibi de da' naquen da' xilaže' len legaque'. Chesone' xbab mal, na' bibi de cheseza' laže' cate' chesone' da' xinj'en'. 16 Chesene' zjanombi'e Diosen', perw nacia' bi zjanombi'ene', le chesonteze' da' xinj'en'. Chesone' da' chgue'e Diosen'; zjanaque' beñe' güedenag len xtižen' na' bi chesac yesone' da' güen.

## 2

*Xtiža' Diosen' da' chsed chlo'echo beñe' naquen güen*

1 Na' le', cheyała' gwzejni'ido' beñe' yesone' can' ža diža' li che Diosen'.  
 2 Bzejni'i beñe' byo gol ca' bi yesezožde', san yesenite' cont beñe' yezica'chle yesape' legaque' bala'an. Bzejni'i legaque' to toe' cheyała' yesenabia' cuine' cont yesenite' yesone' da' güen, na' bzejni'i legaque' cheyała' yesenita'chache' yesejnilaže' Diosen'. Cheyała' yesacde' beñe' na' yesape' yela' chxenlaže' bite'teze da' chac. 3 Lecze ca' bzejni'i no'ol gole ca' cont yesenite' yesonxene' Diosen', na' bi yeseñe' che beñe', neca yesezožde'. Cheyała' yesenite' yesone' da' güen cont yesezeze beñe' yezica'chle can' cheyała' yesone'. 4 Na' no'ol gol ca' cheyała' yosozejni'ide' no'ol xcuide' ca' yesenite' binlo len beñe' che to toe' na' yesacde' legaque' len bi' chegaque' ca'. 5 Na' yosozejni'ide' legaque' cont to toe' yesenabia' cuine' na' yesone' da' zaca' yesone' cont yesaque' beñe' laždao' xilaže' len yogo' da' chesone', na' yosogüia yesena' ližgaque' binlo, yesaque' beñe' šagüe' na' yosozenag to toe' che beñe' chegaque'. No'ole xcuide' ca' cheyała' yesone' güen can' ba gwñian' cont nono ne mal che xtiža' Diosen'.

6 Na' lecze cheyała' neyoedo' beñe' byo xcuide' ca' cont to toe' yesenabia' cuine' na' yesone' da' cheyała' yesone'. 7 Na' le', bite'teze da' gono', ben con da' nac güen cont yesacbe'e beñe' yoble naquen' cheyała' yesone'. Cate' chsed chlo'edo' beñe', bzejni'i legaque' do lažo', benen cont nacia' chapo' Diosen' bala'an. 8 Bsed blo'e diža' li cont nono na xtižon' naquen mal. Na' še soatezo' gwsed gwlo'edo' diža' li, nachen' beñe' ca' chesexi'a chio' yesyeto'ede' da' bi chesyěželde' bi da' mal yeseñe' checho.

9 Gož beñe' güen žin ca' yosozenague' che xangaquen' na' yesone' bite'teze da' yese'ene' sin cbi yosyoži'e xtiža'gaquen'. 10 Bi yesebane' bi da' de che xangaquen', san yesenite' do laže' cont yezica'chle beñe' yesele'ede' chesone' güen na' yesacbe'ede' güenna' nac xtiža' Diosen', Dios ben' none' yela' mban checho toli tocañe.

11 Diosen' nži'ilaže'de' chio' beñach na' ba blo'e chaclaže' gone' yela' mban toli tocañe che yogo'cho. 12 Na' da' none' ca' chzejni'in chio' cheyała' cuejyichjcho yogo' da' choncho da' bi chazlaže' na' yogo' da' chzelaže'cho gata' checho o da' chzelaže'cho goncho da' bi naquen güen lagüen'. To tocho cheyała' soa cuezcho nabia' cuincho cont goncho da' nac da' zaca'. Na' cheyała' goncho da' zej to licha; na' cheyała' soacho gonxencho Diosen' yežlio nga. 13 Le šlac zoacho yežlio nga zoacho mbalaz nezecho žin ža yid Jesucriston' da' yoble nse'e be'ni' juisyw. Naque' Dios checho ben' chonxencho na' ben' none' yela' mban checho toli tocañe, na' zaca'chgüe'.

<sup>14</sup> Len' bnežjw cuine' neche chio' cate' gosote'ne' cont bnitlagüe' xtoła'chon', na' beya' beyibe' yichjlažda'ochon' len da' malen' cont none' chio' ca xi'ine'. Na' bene' ca' cont yebecho goncho da' güen.

<sup>15</sup> Can' cheyala' gwzejni'ido' bene'. Na' cheyala' gono' chach laže' yesone' da' güen na' tilo' bene' cheson da' xinj, le Diosen' ba gwsele' le' na' ba bene' le' yela' chnabia' cont gwzejni'ido' legaque'. Bi go'o latje yosozeo' le' to šla'ale.

### 3

#### *Can' cheyala' gon chio' chejnilaže'cho Jesucriston'*

<sup>1</sup> Da' yoble yozzendo' bene' chesejnilaže' Jesucriston' cheyala' yosozejwyichje' yosozenague' che justis ca' na' che bene' gwnabia' čhegaque' ca' na' bate'teze cheyala' yesone' da' güen. <sup>2</sup> Yozzendo' legaque' bi cheyala' yesene' mal che note'teze bene'. Bi cheyala' yesedił yosošaše', san cheyala' yesaque' bene' šagüe' na' yesape' yela' chxenlaže' len yogo'lol bene'.

<sup>3</sup> Chio' lecze bi gwzejni'icho cana' na' bencho güedenag len Diosen'. Gwyejle'cho diža' güenlažen' na' bentezcho bi da' xinj da' gwzelaže' lažda'ochon'. Gwdacho bencho con da' bebecho. Gwzoacho bxi'a lježcho. Besegue'e bene' chio' na' bgue'e lježcho. <sup>4</sup> Perw bžin ža Dios ben' none' yela' mban checho toli tocañe blo'ede' chio' catec bene' šagüe' naque' na' catec chacde' chio' benach. <sup>5</sup> None' chio' yela' mban toli tocañe gague neche bi da' güen benchon', san da' beyaše'de' chio'. Nachen' beya' beyibe' yichjlažda'ochon' len da' malen' cate' gwzolao chejnilaže'chone', na' Spiritw čhen' bocoben yichjlažda'ochon'. <sup>6</sup> Diosen' gwsele' Spiritw čhen' zoan lo' yichjlažda'ochon' chaclenchguan chio', le Jesucristw ben' none' yela' mban checho toli tocañe gwñabde'ne' selen'. <sup>7</sup> Na' ca' ba beyaše' beži'ilaže'de' chio' cont beyone' chio' bene' güen lagüen' na' cont soa cuezcho nezecho žin ža šjayzoacho len le' toli tocañe.

<sup>8</sup> Da' ca' ba gwnia' nga zjanaquen da' li, na' gono' byen yosozenag bene' ca' gwzejni'ido' čhen. Le bene' ca' ba chesejnilaže' Diosen' cheyala' yesebec yichjgaque' yesone' da' güen. Na' da' quinga ba gwnia' zjazaca'chguan na' yesaclenen note'teze bene'. <sup>9</sup> Perw bi gono' txen len bene' chesedił chosošaše' che bize diža' da' bi zejen. Na' bi cuec yichjo' che diaža che da' xozxta'ocho ca'. Bi gono' txen len bene' chesedił chosošaše' che bi zejen dan' nyoj le'e ley da' bzoj da' Moisésen', le da' chesone' ca' bi chaclenen bene' na' bi naquen da' zaca'.

<sup>10</sup> Na' bene' ca' cheson cont bene' ca' chesedop chesežague' chesonxene' Jesucriston' chesechoje' chople, neyoedo' legaque' bich yesone' ca'. Na' še ba gwneyoedo' legaque' to chope ni'a na' bi chosozenague', yebejo' legaque' ca'ale. <sup>11</sup> Le da' bi chosozenague' nachen' nezecho zjambiaye'e na' zjanape' doła' che da' xinjen' chesone'.

#### *Can' cheyala' gon Titon'*

<sup>12</sup> Cate' selä' Artemas o Tíquico gan' zon', ben con ga zelao saque'do' cont yido' yežagcho lo' ciuda Nicópolis, le ba bechoglaža' yega'ana' na' tiemp zag. <sup>13</sup> Na' ben yogo' da' gac gono' par gacleno' Zenas ben' nsed ley, na' Apolos, cate' yesa'aque' gan' zon' cont bibi yeseyažjde' chanez. <sup>14</sup> Bene' lježcho ca' chesejnilaže' Criston' cheyala' yesoe'laže' yesone' da' nac güen na' yesaclene' bene' chyažj chčhine. Le cheyala' gaccho bene' chon da' zaca'.

*Beṇe' ljež Pablon' chosoguape' Titon' tiox*

<sup>15</sup> Yogo' beṇe' cheson xšin Diosen' txen len neda' nga chosoguape' le' tiox. Na' chṇaba' gwguapšco' tiox beṇe' ca' zoaleno' na', beṇe' ca' chesacde' chio' da' naccho txen chejnilaže' cho Criston'. Diosen' gaclenšque' yogo'le. Da' na'zen' chzoja'.



## CART DA' BZOJ POSTLW SAN PABLO CHE FILEMÓN

*Pablo chzoje' carten'*

<sup>1</sup> Neda' Pablo dia' ližya nga da' chyixjue'eda' xtiža' Cristo Jesúsen'. Chzoja' le' Filemón, na' txen len bene' lježcho Timoteon' chguapto' le' tiox. Chaqueto' le' da' naccho txen choncho xšin Diosen'. <sup>2</sup> Na' lecze chguapto' tiox bene' ca' chesedop chesežague' chesonxene' Jesucriston' ližo'. Na' le' Apia, naco' ca' bene' zanto', na' le' Arquipo, chono' neto' txen choncho xšin Diosen', lecze chguapto' le'e tiox. <sup>3</sup> Chñabeto' Xacho Diosen' na' Xancho Jesucriston' yesaclenšque' le'e na' yesone' cont soa cuezle binlo len xbab chelen'.

*Filemónna' chejnilaže' Jesucriston' na' chacde' bene' lježe'*

<sup>4</sup> Na' le' Filemón, yogo' ni'a cate' chjayze'eda' le' šlac chol güiža' Diosen', choa' yela' choxclen che' can' ba chono'. <sup>5</sup> Ba benda' diža' can' chejnilažo' Xancho Jesucriston' na' can' chacdo' lježcho bene' lecze chesejnilaže' Jesucriston'. <sup>6</sup> Na' chñaba' gaclen Diosen' bene' ca' ba gosejnilaže' Jesucriston' lagüe be'leno' legaque' diža' can' chejnilažo'ne'. Chñaba' gaclene' legaque' cont yesache'ede' yogo' da' güen juisyw da' chon Diosen' lo' yichjlaždao' chio' chejnilaže'chone'. <sup>7</sup> Bene' migw, leca chbeda' na' chac chach laža' nezda' chacghüedo' bene' lježcho ca' chesejnilaže' Jesucriston', le chacleno' legaque' cont ñita'che' mbalaz.

*Gwnabe' yezi'xen Filemónna' che Onésimo*

<sup>8-9</sup> Dan' chacdo' Criston' na' chacdo' bene' lježo' ca', da'nana' chñeyoeda' le' gono' to da' chaclaža' gono'. Da' naca' postlw che Criston' guac gona' byen gono' da' gwžia' bia' gono' šaca' žan gwčhina' yela' chnabia' da' yo'o lo' na'. Perw bi žan gona' ca'. Neda' Pablo ba naca' bene' gole' na' lecze ña'a ba dia' ližya nga da' chyixjue'eda' xtiža' Jesucriston'. <sup>10</sup> Na' chñaba' goclen laguon' par Onésimo ben' ba nona' ca' xi'ina'. Le šlac dia' ližya nga bsd blo'eda'ne' cont chejnilaže' Jesucriston'.

<sup>11</sup> Cana' bi goque' mos güen chio', san ña'a ba naque' mos güen chio' na' lecze ca' chia' neda'. <sup>12</sup> Ba chezsela'ne' laguo', na' chñeyoeda' le' yolebo'ne' na' yezi'xeno' che', le leca chacda'ne'. <sup>13</sup> Zelaža' yega'anlene' neda' cont gaclene' neda', gone' da' cheyala' gono' šlac dia' ližya nga da' chyixjue'eda' xtiža' Jesucriston'. <sup>14</sup> Perw bi chaclaža' nabda'ne' bi gone', le naquen chio' le' ñao' nac gone', cont do lažo' gono' bi da' güen da' gono' na' gague gončhi'on. <sup>15</sup> Diosen' be'e latje beza' Onésimon' ližon' šlož cont soale txen toli tocañe. <sup>16</sup> Na' ña'a bich naque' mos chio' na'ze san naque' ca' bene' bišo' da' naque' txen len chio' chejnilaže'cho Xancho Jesucriston'. Leca chacda'ne', na' le' cheyala' gacchdo'ne', gague con ca' chacdo' note'teze benach, san can' chacdo' bene' lježo' chesejnilaže' Xancho'.

<sup>17</sup> Da'nana' še da' li' naccho txen chejnilaže'cho Jesucriston', yolebo'ne' cacze chlebo' neda' cate' chedena'a le'e. <sup>18</sup> Na' še bi da' mal bende' le' o še bi da' chale' chio', neda' chixjuan'. <sup>19</sup> Cuincza' neda' Pablo chzoja' da' nga, neda' chixjua' bi da' chale'. Na' bibi chnia' che da' chalo' le' chia' neda' da' ba de yela' mban chio' toli tocañe. <sup>20</sup> Bene' migw, da' chaquecho Xancho

Jesucriston' chaclaža' gono' dan' chnaba' nga ca to goclen chia'. Benšca ca soa' mbalaz, le naccho txen len Criston'.

<sup>21</sup> Zoa' lez gwzenago' chia' na' goncho' güen clel ca dan' žia' le', da'nān' chzoja' le'. <sup>22</sup> Na' yeto da' chnaba', chaclaža' yedesoā' ližon' cate' yida' gan' zoalen'. Le zoa' lez yob gac yedyena'a le'e can' chnable lao Diosen' cate' choḷ güižlene'.

*Bene' ca' nita' len Pablon' chosoguape' Filemónna' tiox*

<sup>23</sup> Epafraš die' ližya nga txen len neda' da' chyixjue'ede' xtiža' Cristo Jesúsen'. Na' le' chguape' le'e tiox. <sup>24</sup> Na' lecz ca' bene' ca' chesaclene' neda' len xšin Diosen' nga, Marcos, na' Aristarco, na' Demas, na' Lucas, chosoguape' le'e tiox.

<sup>25</sup> Xancho Jesucriston' soašque' len le' gaclenščacze' le'. Da' na'zen' chzoja'.

## CART DAN' NYOJ CHE BENE' HEBREO CA'

*Diosen' gwsele' Xi'ine' cont be'lene' benachen' diža'*

<sup>1</sup> Cani' Diosen' be'lene' da' xozxta'ocho ca' diža' len bene' gwsele' goso'e xtižen'. Zan las gosoe' da' bene' ca' xtižen' na' nža'te ca goso'en to toe'. <sup>2</sup> Perw na'a ba zoa žin ža yeyož yežlion' na' Diosen' ba be'lene' chio' diža' dan' gwsele' Xi'inen' bedezejni'ide' chio'. Na' Xi'in Dios nan' bene' yaba na' yežlio nga len yogo' bichle da' de nga na' gate'teze. Na' bengaquen' con can' gwnalaže' Diosen'. Na' gwžin ža gac lo na' Xi'in Diosen' yogo' benač, beyixe', na' bica'chle da' bene'. <sup>3</sup> Na' Xi'in Diosen' chlo'e catec bene' zaca' nac Diosen', le cayane' nac yichjlaždao' Xe' Diosen' nac yichjlažda'ogüen'. Na' Xi'in Diosen' chone' cont yaban', yežlion' na' da' ca' chle'echo le'e yaban' na' yežlion' chesonen žin, le nape' yela' guac cont chac con can' že'. Len' bzanlaže' cuine' gote' cont bexi beyach chio' len xtoła'chon'. Na' beyož bene' ca' beyepe' yaban' zjaychi'e cuit Xe' Diosen' ben' nac bene' zaca' juisyw na' chnabi'e txen len le'.

*Xi'in Diosen' zaca'che' ca angl ca'*

<sup>4</sup> Naque' bene' zaca'chgua ca angl ben' cheson žin che Diosen', na' Diosen' bene' cont leca ba chacxenche' ca angl ca'. <sup>5</sup> Diosen' biña' ye'e ne to angl ca dan' gože' Xi'inen', gože'ne':

Len' naco' Xi'ina';

na'aža ba blo'a zoaczo'.

Na' biña' güe'e diža' che note'teze angl can' bi'e diža' che Xi'inen', gwne':

Neda' gona' cont gacbia' naca' Xe',

na' gona' cont gacbia' naque' Xi'ina'.

<sup>6</sup> Na' da' nac Xi'in Diosen' la'zelagüe bene' zaca', da'nan' cate' Diosen' gwsele'ne' yežlio nga gwne':

Yogo'lol angl chia' cheyala' yesonxene' le'.

<sup>7</sup> Na' che angl ca' gwne':

Chona' cont angl chia' ca' bene' chesone' žin chia' chesaque' ca be' dan' chečj na' chesaque' ca yi' bel.

<sup>8</sup> Perw che Xi'inen' be'e diža', gwne':

Len' naco' Dios na' nabi'o toli tocañe.

Na' leca güen chnabi'o, chono' con da' zej to licha.

<sup>9</sup> Chebedo' da' zej to licha na' chgue'edo' da' malen'.

Da'nan' neda' Dios ben' chonxeno' ba bena' cont zoacho' mbalazech ca note'teze bene'.

<sup>10</sup> Na' da' yoble gozna Diosen' che Xi'inen':

Xana' Dios, beno' yežlion' ža gwlaste,

na' yogo' da' chle'echo le'e yaban' lecze le' benon'.

<sup>11-12</sup> Na' gwžin ža cate' te che yogo' dan' chle'echo le'e yaban' na' lo yežlion', perw le' bi te chio'; soaczo' toli tocañe.

Na' gwša'a le'e yaban' na' yežlion' ca to bene' chša' xe' cate' ba beyoen na' chaze' yeton.

Na' le'e yaban' na' yežlion', gono' len len can' chon to bene' cate' chotob xe'. Perw le', tozecz can' gaco' toli tocañe, gwbat žin ža te chio'.

<sup>13</sup> Diosen' biña' ye'e ne to angl ca dan' gože' Xi'inen', gože'ne':

Gwche'edo' cuita' nga nabi'a'cho txen,

na' gona' cont yogo' no chesegue'e le' yosozexjw yichje' yosozenague' chio'.

<sup>14</sup> Na' ca nac angl ca', yogue' zjanaque' bene' cheson xšin Diosen', na' chsele' legaue' chesaclene' chio' ba gwleje' šjayzoacho len le'.

## 2

*Cheyala' gwzenagcho che Diosen' cont yeque'e xtoła'chon'*

<sup>1</sup> Na' da' nac Xi'in Diosen' bene' zaca'ch ca angl ca', do yichj do laže'cho cheyala' gwzenagcho xtižen' da' ba benecho. Le še bi gwzenagcho chen do yichj do laže'cho, guanlaže'chon na' cuejyichjchon. <sup>2</sup> Diosen' goclaže' yosozenag da' xozxta'ocho ca' che ley che' dan' goseyixjue'e angl ca'. Da'n'an' Diosen' bnežjue' castigw da' cheyala' si' to toe' bate'tez bi bosozenague' chen, con ca nac da' mal da' gosone'. <sup>3</sup> Gague da' yelacho bi si'cho castigw še bi gwzenagcho xtiža' Xancho Jesúsen' da' gwđixjue'ede' že' chaclaže' gone' yela' mban checho toli tocane. Da' zaca'chgua da' ben Xancho Jesúsen' cont gata' yela' mban checho toli tocane. Cuine' gwđixjue'eden' da' nechw, na' bene' ca' gosodalen le' bosolo'ede' chio' le naquen da' li. <sup>4</sup> Diosen' bene' cont gosone' da' zaca' yebanecho, na' bnežjue' legaue' zan yela' guac, na' Spiritw chen' benen cont gosone' da' zan da' güen len yela' guac chen. Na' yogo' da' ca' goc con can' gwñalaže' Diosen'. Na' Diosen' bene' ga gosac da' ca' cont nezecho xtiža' Xancho Jesuscriston' naquen da' li.

*Jesucriston' goque' can' nac chio' beñach*

<sup>5</sup> Na' gague angl can' yesenabia' cate' žin ža gata' yežlio cobe dan' choe'cho diža' chen. <sup>6</sup> Na' de late' Xtiža' Diosen' gan' nyoj diža' da' be'len to bene' Diosen', gwne':

¿Bixchen' nži'ilažo' neto' beñach? le bitec bi zaca'to'.

Na' ¿bixchen' chi' yichjo' chacleno' neto'?

<sup>7-8</sup> Beno' cont beñachen' zjanaque' blaο, na' con angl ca'ze zjanaquech blaο ca beñach.

Na' beno' cont beñachen' naque' bene' zaca' na' cont chaxene'.

Beno' cont yogo'lol da' zjade yesaquen lo na' beñach, na' len yogo'lol beyixe' yesacba' lo na'gague'.

Na' da' ben Diosen' cont yogo'lol da' de yesaquen lo na' beñachen' na' yogo' beyixe' yesacba' lo na'gaquen', bibi bocua'an' Diosen' da' bi gwlo'e lo na' beñachen', la'czla' na'a biña' le'echo yesac yogon' na' yogo'ba' lo na' beñachen'. <sup>9</sup> Perw yogo'lol ba yo'ocze lo na' Jesúsen', la'czla' šlac gwzoe' yežlio nga angl ca' gosacche' blaοch ca le'. Perw na'a da' bzanlaže' cuine' gote', da'n'an' Diosen' bene' cont chaxenche' ca legaue' na' cont nacbia' naque' bene' zaca' juisyw. Le da' nži'ilaže' Diosen' chio' beñach, da'n'an' bžie' bia' got Jesúsen' cont gac yeque'e xtoła' to to beñach.

<sup>10</sup> Diosen' bene' beñach, bene' beyixe' ca' na' bite'tezechle da' zjade cont chaxene'. Na' Diosen' chaclaže' bene' zan yesaque' xi'ine' na' šjasyezoe' len le' gan' yo'ochgua be'ni', na' güenna' bene' bžie' bia' gwxcaca'zi' Jesúsen' cont gac gone' yela' mban toli tocane che chio' beñach. <sup>11</sup> Jesúsen' ba gwlo'e chio' lo na' Diosen' na' txen len Jesúsen' naccho xi'in Dios. Da'n'an' bi cheto'e Jesúsen' ne' naccho biše' lježe'. <sup>12</sup> Quinga gwna Jesúsen' gože' Diosen':

Gwzejni'ida' bene' biše' lježa' ca' can' nac yichjlažda'oguoñ',

na' txen len bene' ca' zjandop zjanžag chesonxene' le' goła' gonxena' le'.

13 Nach Jesúsen' gwne':

Neda' soacha' šejnilaža' Diosen'.

Nach da' yoble gozne':

Nga zoa' txen len bene' ca' gwlo'o Diosen' lo na', bene' ca' ba gwque'e ca xi'ine'.

14 Chion' ba gwca'a Diosen' ca xi'ine' naccho bene' bela' chen, na' da'nan' Jesúsen' lecze golje' goque' bene' bela' chen cont bnežjo cuine' gosote'ne'. Na' da' got Jesúsen', da'nan' gwzoede' bzoe' šla'ale Satanás dan' chnabia' da' xigüe' ca' na' dan' chonen yela' got che benachen'. 15 Jesúsen' bene' cont bich chžebcho gatcho, can' chesežeb yezica'chle benačh šlac de yela' mban čhegaque', chesežebe' yesate'. 16 Jesúsen' bide' yežlion', gague cont gaclene' angl ca', san cont goclene' chio' naccho xi'in diaža čhe da' Abrahanna'. 17 Na' da'nan' benen byen goc Jesúsen' doxen can' nac chio' benačh cont naque' bžoz blao čhecho lao Diosen'. Na' bnežjw cuine' bnitlagüe' xtola'chon' na' zoe' cheyaše'de' chio' con can' chazlaže' Diosen'. Na' da' bnežjw cuine' bnitlagüe' xtola'chon', zaca'lebde' ca bžoz blao čhe nación Israel čhechon' ben' gwyej lao Diosen' bežue' chen čhe beyixe' cont gwnabe' yezi'xen Diosen' xtola'gaquen'. 18 Na' da' bžaglao Jesúsen' cate' gwlo'oyela' gwxiyen' le' gone' da' mal, perw bibi da' mal bene', da'nan' nežde' naclen' gaclene' chio' cate' chgo'oyela' gwxiyen' chio' goncho da' mal.

### 3

#### *Jesúsen' zaca'che' ca da' Moisésen'*

1 Bene' migw, Diosen' ba gwleje' chio' naccho lo ne'e, na' cheyala' goncho xbab čhe Cristo Jesús ben' gwsele'. Naque' bžoz blao čhecho na' ben' chejnilaže'cho. 2 Jesúsen' bene' cayanen' gwna Dios ben' gwsele' le' šlac gwde' yežlion', ca'cze ben da' Moisésen' cate' le' goclene' da' xozxta'ocho ca' can', bene' ca' gosac diaža čhe Dios. 3 Perw Jesúsen' zaca'che' ca da' Moisésen', le' len' bxie' diaža čhe Diosen', na' da' Moisésen' naque' con to bene' za' lo diaža čhe Diosen'. 4 Gwnita' benačh bene' bxie' to to diaža yežlio nga, san ca nac Diosen', len' bxie' yogo'te da' zjade. 5 Da' Moisésen' goque' ca xmos Diosen' cate' bene' con can' gwna Diosen' cont goclene' da' xozxta'ocho bene' ca' gosaque' diaža čhe Diosen'. Na' da' Moisésen' be'e diža' čhe da' za' gac da' za' čhixjue'e Diosen' benachen' ca tiempa'. 6 Perw Criston' bi goque' ca to mos dan' gwzoe' bene' can' gwna Diosen', san da' naque' Xi'in Diosen' da'nan' bene' can' gwnen', na' naque' Xan yogo' chio' naccho diaža čhe Diosen'. Na' da' li naccho diaža čhe Diosen' še zoačhačhcho chejnilaže'chone' na' chebecho nezecho gac güen čhecho.

#### *Guac soacho mbalaz len Diosen'*

7 Da'nan' cheyala' gwzenagcho can' ža Spiritw čhe Diosen' len da' nga da' nyojen, žan:

Še Diosen' nie' le'e na'a,

8 bi gonle güedenag can' goson da' xozxta'ole can' cate' besyedabague' Diosen' latje daš gan' chesaše'.

9 Nach Diosen' gwne':

Bi gosejle'e še leda' dan' goša' legaque' gwnežjua' da' yezezaca'zi'e neče xtola'gaquen'.

Bi gosejle'e čhia' cate' gosaše' latje dašen', la'czla' čhoa iz besele'ede' can' bena' len legaque'.

10 Da'nān' bža'a beṇe' ca' gwnitan' na' gwnia':

“Yogo' las chesejle'e diža' güenlaže',

na' bi chosozenague' chia' cont yesone' can' chazlažan'.”

11 Nachen' bža'a legaque' na' da' baḷi gwlo'a gwnia':

“Gwbat nite' mbalaz yesyezi'laže' can' chezi'laža' neda'.”

12 Beṇe' migw, bi güe'le latje ṇabia' da' malen' yichjlažda'ole na' gonen cont cuejyichjle bich šejnilaže'le Diosen' ben' zoa toḷi tocaṇe. 13 Na' šlac ṇa'a ṇe' decze latje gwzenagcho che Diosen', le ṇeyoe lježle tža tža cont ṇe tole bi gonle xbaben' clele, gaquele bibi nonen gontezle da' xinj. 14 Da' ḷi naccho Criston' t xen še ṇe' zoacho chejnilaže'chone' cate' žin ža gatcho, con can' gwzolacho chejnilaže'chone'.

15 Nyoj Xtiža' Diosen' che chio', žan:

Še Diosen' ṇie' le'e ṇa'a,

bi gonle güedenag can' goson da' xozxta'ole cani' cate' besyedabague' Diosen'.

16 Na' da' žan ca', choen' diža' che da' xozxta'ocho ca' bebej da' Moisésen' nación gan' nzi' Egipto. Gosende' can' gož Diosen' legaque', perw bi bosozenague', besyedabague' Diosen'. 17 Da'nān' choa iz Diosen' bže'e legaque' ṇeche gosone' da' xinjen', na' gosat ben' besyedabague' Diosen' šlac ṇe' zjalaže' latje dašen'. 18 Na' legaque', da' bi bosozenague' che Diosen', da' baḷi gwlo'e, gwne' bi güe'le latje yesenite' mbalaz yesyezi'laže' can' chezi'laže' Diosen'. 19 Na' nacbia' da' bi gosejle'e che Diosen', da'nān' bi goc nite' mbalaz yesyezi'laže' can' chezi'laže' le'.

## 4

1 Na' ca' ṇezecho lecze ṇeche chio' Diosen' gwne' beṇe' yesejle' xtiže' yesenite' mbalaz yesyezi'laže' can' chezi'laže' le'. Da'nān' cheyala' gwsaca'cho cont bi goncho güedenag len le'. 2 Chio' ba benecho diža' güen cont gac soacho mbalaz ca' diža' dan' gosene da' xozxta'ocho ca' cani', perw diža' da' gosende' bi goclenen legaque', le bi gosejle'en. 3 Na' chio', še chejle'cho da' ža Diosen', ba zoacho mbalaz chezi'laže'cho can' chezi'lažen'. Na' nyoj da' gwne' che da' xozxta'ocho ca', žan:

Nachen' bža'a legaque' na' gwlo'a da' baḷi, gwnia':

“Gwbat nite' mbalaz yesyezi'laže' can' chezi'laža' neda'.”

Na' ṇezecho Diosen' gwzolaḡüe' chezi'laže' cate' beyož bxie' yaban' na' yežlion' na' bichle da' bene' ža gwlaste. 4 Na' zoa late' gan' nyoj Xtiža' Diosen' can' bene' ža gažen', žan:

Xop ža ben Diosen' yaban', na' bichle da' bene' cate' bxie' yežlion'.

Na' bžin ža gaže, bich bi bene', con gwzoe' mbalaz bezi'laže'.

5 Na' lecze nyojen can' gwne', žan:

Gwbat nite' mbalaz yesyezi'laže' can' chezi'laža' neda'.

6 Na' ṇe' naquen da' ḷi baḷ beṇe' yesejle'e xtiža' Diosen' na' nite' mbalaz yesyezi'laže' can' chezi'laže' le', na' beṇe' ca' gosende' diža' güen chen' cani' bi gosejle'en, na' bi goc yesenite' mbalaz yesyezi'laže' yeḷa' güedenag chegaquen'. 7 Na' gwdechle gwne' Diosen' da' yoble gwne': “Na'a guac nita'le mbalaz yezi'laže'le.” Na' bene' cont da' rey David bzoje' da' nga, žan:

Še Diosen' ṇie' le'e ṇa'a,

bi gonle güedenag.

8 Da' Josué gw̄chi'e da' x̄ozxtao' chio' beñe' Israel gan' gosezi'e yežlion' da' bnežjw Diosen' legaque', perw bi bene' cont yesenita' beñe' ca' mbalaz yesyezi'laže'. Da'n'an' Diosen' be'e diža' gwdele, gwne' gwžin ža yesenite' mbalaz yesyezi'laže'. 9 Na' da'n'an' beñe' ba gwlej Diosen' cont yesaque' lo ne'e, legaque' guac yesenite' mbalaz yesyezi'laže' ca' mbalazen' gwzoa le' cate' gwzologüe' chezi'laže'. 10 Na' beñe' ca' ba nita' mbalaz chesyezi'laže' can' chezi'laže' Diosen', bich chesone' can' ža xbab čhegaquen', san chesone' can' ža Diosen'. Da'n'an' žacho zjanite' mbalaz chesyezi'laže' can' zoa Diosen' mbalaz chezi'laže' da' beyož bxie' yogo' da' zjade. 11 Da'n'an' cheyala' güe'laže'cho šejle'cho xtiža' Diosen' do yichj do laže'cho cont soacho mbalaz yezi'laže'cho can' chezi'laže' Diosen' na' cont bi cuiayi'cho can' gac čecho še goncho güedenag len xtižen' can' goson da' x̄ozxta' ocho ca'.

12 Xtiža' Diosen' chazen lo' yichjlaždao' beñe' chesenden' na' chaclenen beñe' chosozenag čhen. Na' zaca'leben ca to spada da' nlachgua chop la'a. Perw chonch Xtiža' Diosen' ca to spada, le chlo'en chio' še chzenagcho čhe Diosen' o še čhe cuincho, na' chzejni'in chio' čhe xbab da' yo'o lo' yichjlažda'ochon' na' len yogo' da' chzelaže'cho še naquen güen o naquen mal. 13 Bibi de da' bi neze nle'e Diosen', ne to beñach, angl, da' xigüe' o bi da' zjade. Diosen' nežde' yogo'te da' yo'o lo' yichjlažda'ochon'. Na' gwžin ža nabyožde' chio' čhe yogo'te da' ba bencho.

### *Jesúsen' naque' b̄xoz gwnabia' čecho*

14 Jesús ben' naque' Xi'in Diosen' ba beyepe' yaban' na' zoe' gan' zoa Diosen'. Na' naque' b̄xoz blao čecho beñe' la'zelagüe zaca'. Da'n'an' cheyala' soačhačcho šejnilaže'chone' can' ba be'cho diža' goncho. 15 Jesúsen' ben' nac b̄xoz blao čechon' chacbe'ede' bi da' naquen zdebe len chio', le gwxiyen' goclažen' co'oyelan' le' gone' da' mal, na' bžaglagüe' cayanen' chžaglao chio', perw bibi da' mal bene'. 16 Na' dan' zoe' naque' b̄xoz blao čechon' ben' cheyaše'de' chio', da'n'an' cheyala' yoł güižcho Diosen' gan' chi'e chnabi'e, na' bi žebcho güe'lenchone' diža', nabečhone' yezi'xene' čecho na' gaclene' chio' bate'teze chacbe'echo chyažjecho gaclene' chio', le nži'ilaže'de' chio'.

## 5

1 Yogo' beñe' ca' ba gosaque' b̄xoz blao čhe nación Israel čechon' gosac lo ne'e šjasesane' bi da' šjasesane' lao Diosen' na' gosote' beyixe' bosolalje' xčhengacha' cont Diosen' bezi'xene' xtoła' da' x̄ozxta' ocho ca'. 2 Na' b̄xoz ca' gosape' yela' chxenlaže' len beñe' biña' yesejni'i can' cheyala' yesene' na' len beñe' ba n̄xoayag da' malen' legaque', le lecze beñach beñe' güen da' xinj legaque'. 3 Da'n'an' benen byen b̄xoz ca' gosote' beyixe' na' bosolalje' xčhemba' cont gosenabe' yezi'xen Diosen' xtołen' lente xtoła' yezica'chle beñe'.

4 Na' ne to b̄xoz ca' bi benxen cuine' n̄eca gwlej cuine' cont gaque' b̄xoz blao, san Diosen' gwleje' to toe' gosaque' b̄xoz blao can' gwleje' da' Aarón. 5 Na' ca'cze goc len Criston', bitw beyiljue' nac gone' cont gacxene', n̄eca gwlej cuine' cont naque' b̄xoz blao čecho, san Diosen' gwleje'ne' na' gože'ne':

Len' naco' Xi'ina',

na'aža ba bena' cont nachia' zoaczo'.

6 Na' ga yoble nyoj yeto da' gwne':

Naco' bꝛoz toli tocaṇe can' nac bꝛoz ben' le' Melquisedec.

<sup>7</sup> Na' Criston' šlac gwzoe' yežlion' boḷ güiže' Xe' Diosen' ben' nape' yeḷa' guac cont yosle' le' bi gate', gwṇe' zižje na' gwcheže' gwṇabe' gaclene' le'. Na' da' bzexjw yichj Criston' bene' con can' gwna Xēn', na' Xe' Diosen' bzenague' na' goclene'ne' cont bi bžebe' yeḷa' goten'. <sup>8</sup> Na' la'czla' Criston' naque' Xi'in Dios, bžaglagüe' yogo'loḷ da' ca' goc che' cate' bzenague' che Diosen' cont gwejni'ide' can' chac che chio' beṇačh. <sup>9</sup> Na' beyož goc che' yogo'loḷ da' goclaže' Diosen', nach ba guaque' gwnežjue' yeḷa' mban toli tocaṇe che yogo'bene' yosozenague' che'. <sup>10</sup> Can' naquen, Diosen' gwleje' le' cont naque' bꝛoz blao checho, na' naque' ca bꝛoz Melquisedec.

*Gwsaca'cho cont bi cuejyichjcho xtiža' Diosen'*

<sup>11</sup> Na' ṇe' de da' zan da' chaclaža' ṇia' le'e che da' ngan', perw naquen zdebe ṇian' ca šejni'ilen, le bich chebele šejni'ilen. <sup>12</sup> Ba goḷe' gwzejni'ile bene' xtiža' Diosen', perw gualaz da' gonḷe ca', chyažjele no yozejni'i le'e da' yoble da' ca' bsdle da' nechw. Da'nān' zaca'leble ca to bidao' biṇa' gac gagw na' con chaže'be'. <sup>13</sup> Na' bene' zjanac ca to bidao' ṇe' chaže', biṇa' yesejni'ide' xtiža' Diosen' binḷo cont yesone' da' zej to licha len Diosen'. <sup>14</sup> Na' dan' ža xtiža' Diosen' da' naquech zdebe, zaca'leben ca yeḷa' guagw da' chagw bene' gole. Na' bene' chesejni'i lenṇa' chesacbe'ede' še to da' yesende' o to da' yesone' naquen güen o naquen mal, le ba zjayolagüe' chosozenague' che Diosen'.

## 6

<sup>1-2</sup> Cana' betinjecho xtoḷa'chon', gwejnilaže'cho Criston', na' bsdcho diža' güen che'. Goccho ca to bene' guat len yichjlažda'ochon' neche da' choncho da' xinj, perw ba betinjecho xtoḷa'chon' ṇa'a. Bich chyažjen yezolaocho šejnilaže'cho Diosen'. Bich chyažjen gwsedchcho che dan' chesezoa bene' nis o che dan' chꝛoa na'cho yichj bene' na' chṇabcho gaclen Diosen' legaque'. Bich chyažjen gwsedchcho can' gac cate' yečhis yosban Diosen' bene' guat ca' o caten' chogbi'en yezezaca'zi' bene' ca' ba goson da' xinj. Ba nsedcho da' ca', na' ṇa'a bač cheyaḷa' gwsedcho xtiža' Diosen' da' nach zdebe cont gacch yichjlažda'ochon' can' nac yichjlaždao' Criston'. <sup>3</sup> Lenṇa' goncho ṇa'a še Diosen' gonšque' latje.

<sup>4</sup> Nita' bene' ba gwoyo' be'ni' che Criston' lo' yichjlažda'ogaque', na' ba chesacbe'ede' can' nac yeḷa' mban da' choṇ Criston', na' ba zoa Spiritw che Diosen' lo' yichjlažda'ogaque'. <sup>5</sup> Ba zjaṇezde' xtiža' Diosen' naquen güen na' ba zjanombi'e yeḷa' guac che Diosen' da' za' gwlo'echde' beṇačhen'. <sup>6</sup> Na' še žin ža bich yesejnilaže' Criston' na' yesebejyichje' xtižen', bich gac yesyetinjide' che dan' ba gosebejyichje'ne', le lo' yichjlažda'ogaque' chesone' txen len bene' ca' bosode'e Xi'in Diosen' le'e yag cruzen', na' chesone' cont nochle bene' yesegue'ede' le'. <sup>7</sup> Cheyaḷa' gac yichjlažda'ochon' ca to yežlio güen gan' chesaz bene'. Cheyož chac yejon' zan ṇi'a, nach chac cosešen'. Na' chata' dan' cheseyažje bene' chesazen'. Na' nacbia' Diosen' chebede' yežlion' nac ca'. <sup>8</sup> Bi gaccho ca to yežlio gan' chla' yag yeše' na' bichle yiḷe' da' nono chagw. Yežlion' nac ca' bibi zacan', na' ba zoa cuejyichj xanēn len na' yiḷe' da' chla' lagüen žin ža šeyen.

*Nezecho šjayzoacho len Diosen'*

<sup>9</sup> Le'e bene' migw, chacda' le'e, na' la'czla' ba bia' dižan' ca', nežda' bilja gonḷe can' cheson bene' chesebejyichje' xtiža' Diosen'. Chacda' gonḷe güen



da' ba gwlej Diosen' le'e cont šjayzoale len le'. <sup>10</sup> Diosen' zeje' to licha, na' bi ganlaže' can' ba benle xšinen' na' can' ne' chonlen na'a chaclenle yezica'chle bene' chesejnilaže'ne'. Na' chonle ca' da' chaquele Diosen'. <sup>11</sup> Na' chaclaža' to tole soatezle gonchle ca' do yichj do laže'le šlac biña' žin ža gatle, cont nezele šjayzoale len Diosen'. <sup>12</sup> Chaclaža' bi gacle bene' xagüed len da' ža Diosen'. Na' chaclaža' gonle can' ba goson bene' zan bene' gosenite' gosejnilaže' Diosen' cani', gosejle'e gon Diosen' can' gože' legaque' gone', na' gosape' yela' chxenlaže' cate'ch bžin ža benen'.

<sup>13</sup> Cate' Diosen' gože' da' Abraham xi'in diaža che' yesaque' bene' zan, bzoa cuine' gwlo'e da' baļi gac can' gwnen', le nono zoa bene' napch yela' gwnabia' ca Diosen'. <sup>14</sup> Gwne': "Da' li goncza' cont gac güen chio' na' cont yesac xi'in diaža chio' bene' zan." <sup>15</sup> Na' Abrahanna' gwdape' yela' chxenlaže' šlac gwleze', nach bžin ža gwzolao chac can' gwna Diosen'. <sup>16</sup> Benachen' zjayolagüe' chosozoe' Diosen' cue'e da' baļi che bi dan' chesene', le Diosen' chnabia'che' ca legaque'. Chesone' ca' cont bene' ca' chesacyože' len legaque' yesejle'e na' yesyeyacxenlaže'. <sup>17</sup> Na' Diosen' bzoa cuine' cue'e da' baļi cont neze bene' ca' zjanac xi'in diaža che da' Abrahanna' gague da' te che dan' gwne' gonen'. <sup>18</sup> Diosen' bene' chope da' qui: gwne' can' gone' na' lecze bzoa cuine' cue'e da' baļi gac can' gwnen', na' gague da' te bi gac can' gwnen'. Chaclaže' chio' ba betinje xtoļa'chon' yebecho nezecho šjayzoacho len le'. Na' Diosen' bi chac güe'e diža' güenlaže'. <sup>19-20</sup> Na' da' nezecho šjayzoacho len Diosen', bi soa xbab chechon' quile ca'le. Jesús'en' ba gwžialagüe' gwyo'e gan' zoa Diosen' gan' nono benach goc šo', na' bene' cont chio' gac šo'cho. Le naque' bχoz blao checho toļi tocaņe, na' naque' ca bχoz Melquisedec.

## 7

### *Jesús'en' naque' ca bχoz Melquisedec*

<sup>1</sup> Na' Melquisedequen' goque' rey na' gwnabi'e gan' nzi' Salem, na' Dios ben' nac la'zelagüe bene' blao gwleje' le' cont goque' bχoz. Na' goquen' Abrahanna' zeze'e lao gwdile gan' bene' gan gayo' rey, na' Melquisedequen' jašague'ne' na' gwdixjue'ede' gac da' güen che da' Abrahanna'. <sup>2</sup> Ca horen' Abrahanna' zeze'e zonse'e yogo'loļ da' jaytobe' da' bene' gan lo yela' gwdilen', na' gwlequen' ši cuen na' bnežjue' to cuen che bχoz Melquisedequen'. Na' Melquisedec zejen diža' "rey bene' zej to licha". Na' goque' rey che bene' zjanite' binlo, le Salem gan' gwnabi'e zejen diža' "zjanite' binlo". <sup>3</sup> Bi nyojen še no goc da' xaxna' Melquisedequen'. Neca nyojen še no goc xoxzta'ogüe', na' neca nyojen baten' golje' na' baten' gote'. Da'n'an' žacho Melquisedequen' zaca'lebde' ca Xi'in Dios ben' zoa toļi tocaņe naque' bχoz checho, le bi golje Melquisedequen' lo diaža che nochle bχoz, na' neca gwzooa nochle bene' lo diaža che' bene' tie' gwłane' xlatje'.

<sup>4</sup> Le gon xbab catec bene' blao goc bχoz Melquisedequen'. Da'n'an' da' xoxzta'ocho Abrahanna' gwleje' to cuen lo ši cuen da' ca' jaytobe' lo na' rey ca' na' bnežjuen' bχoz Melquisedequen'. <sup>5</sup> Na' da' xoxzta'ocho bene' ca' gosaljē lo diaža che da' Leví, ben' besyeyale' gosaque' bχoz che nación Israel chechon', gosone' con can' nyojen le'e ley da' bzoj Moisés, na' bosochixjue' to cuen lo ši cuen yogo' bi da' gota' che yezica'chle bene' gualaž chegaque' ca'. Na' yogo'cze' gosaque' diaža che da' Abrahanna', bχoz ca' na' bene' yezica'chle. <sup>6</sup> Perw Melquisedequen' la'czla' bi golje'

lo diaža che da' Leví, Abrahanna' bnežjue'ne' to cuen lo ši cuen da' ca' jaytobe', na' Melquisedequen' gwnabde' Diosen' gac güen che da' Abrahanna' ben' gwna Diosen' yesac xi'in diaža che' bene' zan. <sup>7</sup> Na' nezecho bene' chac chñabde' Diosen' gac güen che bene' yoble zaca'che' ca ben' gac che' da' güenna'. <sup>8</sup> Na' bene' ca' zjanac b̄xoz can' ža ley dan' bzoj Moisésen' chesezi'e to cuen güeje lo ši cuen yogo' bi da' de che bene' Israel gualaž chechon', na' b̄xoz ca' zjanaque' con ljež benačho bene' chesat. Na' che b̄xoz Melquisedequen' ben' gwxi' to cuen lo ši cuen da' jaytob da' Abrahanna', Xtiža' Diosen' choen' diža' che' ca to bene' ne' zoacze. <sup>9-10</sup> Na' da' bnežjo Abrahanna' le' da' ca', guac n̄acho da' Leví bnežjue' Melquisedequen' to cuen güeje lo ši cuen da' ca', le gwdechle Levín' golje' lo diaža che da' Abrahanna', na' Leví nan' goque' xozxtao' bene' ca' gosac lo na'gaque' bosotobe' da' ca' bosonežjo bene' Israel gualaž checho ca' che Diosen'.

<sup>11</sup> Na' Diosen' bnežjue' bene' Israel gualaž checho ca' ley chen' cani' cont benen žin txen len da' goson b̄xoz ca' bene' gosalje' lo diaža che da' Levín'. Perw b̄xoz ca' bi goc yesone' cont yichjlaždao' benačen' yesaquen xilaže' len Diosen'. Da'nan' byažjecho bid Jesúsén' naque' b̄xoz checho toli tocañe, na' le' naque' ca' b̄xoz Melquisedequen', gague ca da' b̄xoz Aarón. <sup>12</sup> Na' cont goc zoa Jesúsén' naque' b̄xoz chechon', byažjen bža' ley da' nonen mandadw non' gac b̄xoz. <sup>13</sup> Le Xancho Jesúsén' ben' nac b̄xoz chechon' bi golje' lo diaža che da' Leví, na' noch no na' choj lo diaža che Jesúsén' bene' naque' b̄xoz. <sup>14</sup> Nezczecho Xancho Jesúsén' golje' lo diaža che da' Judá, na' da' Moisésén' bi bzoje' le'e leyna' ga nan bene' galje' lo diaža che da' Judán' guac yesaque' b̄xoz.

<sup>15</sup> Na' nacbia' ba bža' leyna', le ba zoa Jesúsén' naque' b̄xoz cobe chechon' na' naque' ca' b̄xoz Melquisedequen'. <sup>16</sup> Bito golje' lo diaža che da' Leví can' gosac b̄xoz ca' bene' goson žin can' ža ley da' bzoj da' Moisésén', san naque' b̄xoz da' bi gwzoe yela' goten' le' na' zoe' toli tocañe. <sup>17</sup> Quinga nyoj da' gwna Diosen' che', žan:

Naco' b̄xoz toli tocañe, can' nac b̄xoz ben' le' Melquisedec.

<sup>18</sup> Na' b̄xoz ca' gwna Diosen' nita' cana', bich nžie' bia' nite' na'a, le dan' bžia bia' leyna' yesone' bi goc yeca'an xtoła' benačen' to ši'i. <sup>19</sup> Na' leyna' lecze bi goc gonen cont yesac yichjlaždao' benačen' xilaže' len Diosen'. Perw na'a ba chaquech güen checho, le ba zoa b̄xoz checho bene' ba beca'a xtoła'chon' to ši'i cont zoacho binlo len Diosen' na' chac chñelenchone'.

<sup>20</sup> Na' cont nezecho Jesúsén' naque' b̄xoz checho, Diosen' bzoa cuine' gwlo'e da' bałi le soacze Jesúsén' gague' b̄xoz chechon'. <sup>21</sup> Bene' ca' gosaque' b̄xoz can' bzoj da' Moisésén', Diosen' bitw bzoa cuine' cue'e da' bałi cont šejle'cho zjanaque' b̄xoz. Perw nyoj can' gože' Jesúsén', žan:

Diosen' bzoa cuine' gwlo'e da' bałi na' bi gwše'e can' ba gože'ne' gone':

“Naco' b̄xoz toli tocañe can' nac b̄xoz ben' le' Melquisedec.”

<sup>22</sup> Na' da'nan' zoa Jesúsén' chone' cont nezecho Diosen' gaclene' chio' toli tocañe can' gwne' gone'. Na' can' za' gwne' gaclene' chio' na'a, zaca'chen ca da' gože' da' xozxta'ocho ca' cani'. <sup>23</sup> Na' bene' ca' gosaque' b̄xoz can' ža ley dan' bzoj da' Moisésén', gosaque' bene' zan, le cate' gosat tgüeje tgüeje', la' benita'te bene' yoble. <sup>24</sup> Perw Jesúsén' zoe' toli tocañe, na' da'nan' naque' b̄xoz checho toli tocañe. <sup>25</sup> Da'nan' chac chone' yela' mban toli tocañe che chio' chñabcho yezi'xen Diosen' checho, le zoacze toli tocañe chñabe' goclen lao Diosen' che chio' chejnilaže'chone'.

<sup>26</sup> Na' Jesúsen' nacyane' bene' chyažjecho gaque' b̄xoz blao checho cont gaclene' chio', le naque' bene' laždao' xilaže'. Bibi da' xinj none' na' neca none' bi xbab mal, con bibi doła' nape'. Nža'le naque' len beñach bene' cheson da' xinj. Jesúsen' ba beyepe' zoe' gan' zoa Diosen', na' chnabi'e txen len le'. <sup>27</sup> Nža'le naque' len b̄xoz blao ca' gosenita' cani'. Legaue' tža tža byažjen gosote' beyixe' bosolalje' xchemba' cont gosenabe' bezi'xen Diosen' xtola'gaue', na' gwdechle gosote' beyixe' yoble bosolalje' xchemba' cate' gosenabe' bezi'xen Diosen' xtola' yezica'chle bene' Israel gualaž checho ca'. Perw Jesúsen' šni'aze bnežjw cuine' neče xtola' beñachen' cate' gosote'ne' le'e yag cruzen', na' bi byažjde' gote' beyixe' can' goson b̄xoz ca' tža tža neče xtola'gaue' na' neče xtola' bene' yezica'chle. <sup>28</sup> Bene' gosac b̄xoz blao can' ža ley da' bzoj da' Moisésen' gosaque' bene' güen da' xinj can' zjanac yezica'chle bene'. Na' cate' ba goc zan iz bzoj Moisésen' leyna', Diosen' bzoa cuine' gwlo'e da' bałi zoacze Xi'ine' Jesúsen' naque' b̄xoz blao checho. Na' Xi'ine' Jesúsen' zoacze tołi tocanē na' nac yichjlaždagüen' cayanen' chazlaže' Diosen'.

## 8

*Jesúsen' bene' cont gwzolao chac da' cobe da' gwna Diosen' gone' cont gaclene' chio'*

<sup>1</sup> Da' nga zejehen lao yogo' da' ba gwnia': zoa b̄xoz blao chechon' ben' nac cayanē' chazlaže' Diosen', na' ba chi'e yaban' chnabi'e txen len Diosen' ben' nac la'zelagüe bene' zaca'. <sup>2</sup> Chone' žin gan' zoa Xancho Diosen', gague lo' yo'o dan' goson beñach cont yesonxene' le'. <sup>3</sup> Na' yogo' b̄xoz blao che bene' Israel gualaž chechon' nite' chosonežjue' Diosen' bi da' chosonežjue'ne' na' chesote' beyixe' chosolalje' xchemba' lao Diosen'. Na' dan' nac Jesúsen' b̄xoz blao checho, benen byen bnežjw cuine' blalj xchene' neče xtola'chon'. <sup>4</sup> Na' šaca' ne' zoe' yežlio nga bi naque' b̄xoz, le nita' b̄xoz che bene' Israel gualaž chechon' chjasesane' bi da' chjasesane' lao Diosen' con can' ža ley dan' bzoj da' Moisésen'. <sup>5</sup> Na' bene' ca', chesone' bi da' chesone' lo' yodao' da' naquen ca' l' gua'a lsaca' che yaban' gan' zoa Diosen'. Na' nezecho naquen ca' l' gua'a lsaca' che yaban' gan' zoa Diosen', le cate' za' gon Moisésen' yodao' dan' chacte chedobe gan' goson b̄xoz ca' žin che Diosen' cani', Diosen' gože'ne': "Yogo' da' ba gwnia' gonle, le gonen cayanen' blo'eda' le' caten' gwzoacho lo' ya'an." <sup>6</sup> Na' da' chon Jesúsen', da' xen zaca'chen ca' da' cheson b̄xoz che bene' Israel gualaž chechon', na' can' gwna Diosen' gaclene' chio' lagüe da' bnežjw cuin Jesúsen' neče xtola'chon', lecze da' xen zaca'chen ca' dan' gože' da' xozxta'ocho ca' cani'.

<sup>7</sup> Le Diosen' gože' da' xozxta'ocho ca' gac güen chegaque' še yesone' can' ža ley chen', perw bi bosozenague', na' da'n'an' byažjen gwđixjue' to da' cobe. <sup>8</sup> Na' Diosen' bi bebede' legaue', san gwne':

Gwžin ža cate' nia' to da' cobe da' gona' gaclena' le'e nacle xi'in diaža che bene' ca' gosenite' Israel,

na' len le'e nacle xi'in diaža che bene' ca' gosenite' Judá.

Neda' naca' Xanle Dios žia' ca'.

<sup>9</sup> Nža' can' goša' da' xozxta'ole gona' gaclena' legaue' cani',

bži'ilaže'da' legaue' na' bena' cont besyechoje' lo' na' bene' nación Egipto.

Legaue' bi gosone' can' goša'ne' cont gac güen chegaque'.

Na' da'n'an' gwleza' bich goclena'ne', neda' Xanle Dios žia' ca'.

10 Na' quinga gona' gaclena' xi'in diaža che le'e nacle beñe' Israelen' cate' žin ža:

Neda' Xanle Dios gona' cont šo' yichjgaque' da' nona' mandadw yesone', na' gona' cont yesyebeden' lo' yichjlažda'ogaquen', na' toza' neda' yesejnilaže', na' legaque' yesaque' nación chia'.

11 Na' bi yažjen yosozejni'i lježe' cont yesombi'e neda', neca yažjen yosozejni'i no beñe' biše' lježe', le cana' yogo'lole' yesombi'e neda', bi' bixjw lente beñe' nac beñe' gole.

12 Canan' yezi'xena' xtoła'gaquen', na' bich gona' cuent še bi da' malen' ba gosonen'.

13 Na' Diosen' be'e diža' che da' cobe da' gwne' gone' gaclene' nación chechon', na' da'nan' nezecho ba bzoe' to šla'ale da'na' gože' da' xoxzta'ocho ca' cani'. Na' da' gole da' ba bzoe' to šla'ale ba zoa yeniten.

## 9

*Yodao' da' zoa yežlion' na' dan' zoa yaba gan' zoa Diosen'*

1 Cani' Diosen' gože' da' xoxzta'ocho ca' gaclene' legaque' na' gac güen chegaque' še yesone' can' ža ley chen'. Na' šlac ne' chon žin da' nechw da'na' gože' legaque' cani', Diosen' bžie' bia' nacle yesonxene' le' na' nacle yesone' yodao' gan' yesonxene' le' yežlio nga. 2 Gosone' yodao' da' nsan' čhope cuart. Na' lo' cuart nechon' bosozoe' to candler na' to mes gan' bosocue'e yetextil da' naquen che Dios. Na' cuartna' bososi'en Latje che Dios. 3 Na' bosozie' to lache' lo' yo'ona' cont bchojen čhope cuart, na' cuart gwchopen' bososi'en Latje ga Zoa Dios. 4 Na' lo' cuart gwchopen' bosozie' yeto mes de oro gan' bosozeye' yal. Na' goseyixjue' to caj da' bosoguazje' oro doxenen. Na' lo' cajen' gosegüe'e to yeso' de oro gan' gosegüe'e late' yela' guagw da' nzi' maná, na' gosegüe'e carrot che da' Aarón dan' bexeje. Lecze lo' caj nan' gosego'ošagüe' yej ta'a ca' gan' byoj yogo' dan' bžia bia' Diosen' yesone' cont gaclene' legaque'. 5 Na' cože' cajen' bosonite' čhope l' gua'a lsaca' beñe' gosone' ca angl beñe' bososi'e querubines, cont nacbia' zoa Diosen' gan' žia cajen' na' naque' beñe' zaca' juisyw. Na' cože' cajen' ladjo angl ca' gan' nžiljo xilgaquen', bosoži'e xchen beyixe' cate' gosenabe' yezi'xen Diosen' xtoła' beñe' Israel gualaž checho ca' to to iz. Perw bi chonen byen güe'cho diža' na'a doxen can' goca'.

6 Na' beyož gosone' yodaon' na' bosonite' yogo' da' ca' lo'enna', nach yogo' ža bžox ca' goso'e lo' cuart nechon' na' gosone' can' bžia bia' Diosen' gosone' gosonxene' le'. 7 Na' cuart gwchopen', toz bžox blao goc gwyo'e lo'enna' tni'a tgüiz. Na' cate' gwyo'ena' benen byen bežoe' chen che beyixe' bži'en lo' cajen' cont Diosen' bezi'xene' xtole' na' bezi'xente' xtoła' yezica'chle beñe' Israel gualaž checho neče da' xinj da' gosone' sin cbi gosacbe'ede'. 8 Na' da' bi de lsens šo' nochle beñe' lo' cuart gwchopen', Spiritw che Diosen' chzejni'in chio' biña' gac šo' benačen' gan' nac latje ga zoa Diosen' šlac ne' chon žin yodao' nechua' lo' yežlion'. 9 Na' yodaon' len yogo' da' cheson bžox ca' lo'enna' chlo'en chio' zoacho na'a can' chac yaban' gan' zoa Diosen'. Na' la'czla' da' zan chesoe' beñe' Diosen' na' be zan beyixe' chesote' chesonxene' le', bibi yela' guac zjansa' da' ca' cont yesenezde' bibi doła' zjanape' len Diosen'. 10 Na' da' ca' cheson beñe' gualaž chechon' lo' yodaon' naquen costumbr che no nis yela' guagw, no

beyixe' chesote', na' nacle cha' chyib cuingaque', na' bichle da' zjazacan' par cuerp chegaque' na'ze. Na' ba gosonen žin šlac Diosen' biṇa' gwše'e costumbr ca' len da' coben'.

<sup>11</sup> Na' na'a Criston' naque' bṅoz blao checho na' ba bžin ža bṅie' costumbr güen ca'. Na' zoe' yaban' naque' bṅoz checho lao Diosen', na' gan' zoen' zaca'chen ca' yodao' da' goson beṇachen' yežlio nga. <sup>12</sup> Na' bi beṅoe' chen che no šib no goṇ dao' cate' gwyo'e gwnabe' cont Diosen' bezi'xene' xtoḷa'chon', san da' bnežjw cuine' gosote'ne' na' blalj xchene' neche xtoḷa'chon' tṇi'aze le'e yag cruzen', da'nān' goc gwyo'e gan' zoa Diosen' na' ba beque'e xtoḷa'chon' toli tocanē. <sup>13</sup> Na' ley da' bzoj da' Moisésen' nyojen žan da' zan da' cheson beṇe' da' chonen cont bi chesaque' xilaže' len Diosen'. Na' cont yesyeyaque' xilaže' len Diosen' da' yoble, chyažjen gwže'e bṅozen' legaque' xchen no šib no goṇ na' nchixen len da' chega'an cate' chosozeye' to vaca' dao'. <sup>14</sup> Na' xchen Criston' da' bedelalje' neche xtoḷa'chon' zaca'chen ca' xchen beyixe' ca', le xchenen' cheyonen' yichjlažda'ochon' xilaže' len da' xinj da' ba bencho. Da'nān' bich nchoglaon checho gatcho neche xtoḷa'chon', san soaczcho gonxencho Diosen' ben' zoa toli tocanē. Spiritw che Diosen' goclenen Criston' bnežjo cuine' beque'e xtoḷa'chon', na' bibi xtoḷa' Criston' gota'.

<sup>15</sup> Criston' bedelalj xchene' cont gwzolao chac da' coben' dan' gwna Diosen' gone' cont soacho binlo len le'. Na' ba bṅie' da' coben' cont balteze beṇe' ba gwlej Diosen' šjasyenite' len le' toli tocanē. Na' da' got Criston' bedelalj xchene', da'nān' gwnitlao xtoḷa' beṇe' ca' gosejnilaže' Diosen' šlac ne' chon žin dan' gwdixjue' da' nechw dan' gwne' gone' cont chio' beṇe' Israel soacho binlo len le'. <sup>16</sup> Cate' to beṇe' ba bene' testament, cate'ch ba gota'bia' ba got bena' ben' testamenta', cana'ch gac can' žanna'. <sup>17</sup> Le to testament bi gac can' žan šlac ne' mban ben' ben len. Cate'ch ba gote' canan' gac can' žanna'. <sup>18</sup> Na' goc ca' len da' nechon' da' gož Diosen' da' xoxxta'ocho ca' gone' gaclene' legaque'. Da'nān' bžie' bia' bosolalje' xchen beyixe' cont gwxen. <sup>19</sup> Cate' da' Moisésen' beyož be'lene' da' xoxxta'ocho ca' diža' che yogo' dan' bžia' bia' Diosen' yesone' can' ža ley chen', nach Moisésen' bži'e legaque' xchen goṇ dao' na' xchen šib dao' na' nis. Bži'e legaque' da' ca' len late' yiša' xa xila' da' mben color xna' na' len to xis yixe' dao' da' nzi' hisopo. Lecze bži'en lao libren' gan' nyoj ley chen'. <sup>20</sup> Na' da' Moisésen' gože' legaque': "Chen ni ben Diosen' mandadw gwžia' le'e cate' gože' chio' nac goncho cont gaclene' chio' gac güen checho can' gwnen'." <sup>21</sup> Na' lecz ca' bene' bži'e chenna' yodaon' na' yeso' ša' ca' bosochine' gan' gosonxene' Diosen'. <sup>22</sup> Ley dan' bzoj Moisésen' nžian bia' gwže'e bṅozen' chen lo yogo'ze bi da' chosochine' cont yesyeyaquen xilaže' lao Diosen'. Na' leyna' lecze žan še biṇa' lalj chen, Diosen' bi yezi'xene' xtoḷa' beṇachen'.

*Criston' gote' blalj xchene' cont beque'e xtoḷa' beṇe' chesejnilaže'ne'*

<sup>23</sup> Can' goc benen byen bosoži'e xchen beyixe' lo' yodaon' na' lo da' ca' bosochine' yodaon' cont gosonen žin lao Diosen', na' yodaon' naquen con to l' gua'a lsaca' da' chzejni'in can' nac yaban'. Perw da' de yaban' byažjen to chen da' zaca'ch. <sup>24</sup> Na' gan' gwyo'o Criston' gague naquen to yodao' da' naquen con to l' gua'a lsaca' cont nezecho can' nac yaban'. Le' beyepe' yaban' na' gwyo'e gan' zoa Diosen' cont chne' gualaz chio' lagüen'. <sup>25</sup> Bṅoz blao che beṇe' Israel gualaz checho ca' cheso'e yodaon' tṇi'a tgüiz gan' nzi' Latje gan' Zoa Dios na' chosoži'e chen che beyixe', perw Criston' bi bnežjw cuine' zan ni'a gosote'ne'. Tṇi'aze blalj xchene' neche xtoḷa' beṇachen'.

26 Šaca' byažjen blalj xchene' zan ni'a, ba gote' zan ni'a gwzolaon cate' gwxete yežlion', perw bi benen byen gac che' ca'. Bedelalj xchene' tni'aze cate' gwna Diosen' ba bžin ža che', cont chac cheque'e xtoła' beṇačh. 27 Na' can' chac che beṇačhen', žin ža gat to toe' na' te yesate' nach na Diosen' che to toe' še yesezaca'zi'e o še yesenite' mbalaz. 28 Na' can' yesat beṇačhen' tni'aze, ca'cze bnežjw cuin Criston' tni'aze gosote'ne' cont chac cheque'e xtoła' beṇačhen'. Nach žin ža yide' da' yoble perw gague cont yeque'e xtoła' beṇačhen', san cont yeče'e bene' ca' chesebeze' batcan' yide' nach nite' mbalaz len le'.

## 10

1 Ley da' bzoj da' Moisésen' len costumbr da' nžian bia' goncho cate' gonxencho Diosen' bzejni'in chio' late'lasze che da' güen da' ba chac checho na'a ba bid Criston'. Perw leyna' bi goc yocoben yichjlaždao' bene' ca' gosejnilaže' Diosen' la'czla' gosote' beyixe' yogo' iz. 2 Šaca' yichjlažda'ogaque' beyaquen güen cate' gosote' beyixe' ca' na' cate' bžoz ca' bosožie legaque' xchemban' neče xtoła'gaquen', ba gwnitlao xtoła'gaquen' to ši'ize šaca', na' bich bi yesacde' lo' yichjlažda'ogüen' che da' xinjen' chesonen'. 3 Perw da' chesote' beyixe' ca' na' bichle da' chesone' neče xtoła'gaquen' to to iz, bi chac yesanlaže' zjanape' doła'. 4 Le xchen no go'n dao' no šib dao' bi gac yeca'an xtoła' beṇačh.

5 Da'n'an' cate' Criston' bide' yežlio nga gože' Diosen': Dan' chesote' beyixe' na' dan' chjasesane' bichle da' chjasesane' laguo', gague da' can' zelažo'. Zelažo' gwnežjw cuina' gona' can' chazlažo', le da'n'an' beno' cont golja beṇačh.

6 Da' chesote' beyixe' chosozeye'ba' laguo' na' yogo' da' ca' chesone' cont yezi'xeno' xtoła'gaquen', gague da' can' chbedo'.

7 Da'n'an' gwnia' can' nyoj le'e libr gan' žan: "Dios chia', za'a nga zedeyena' con can' chazlažo'."

8 Zgua'tec Criston' gože' Diosen': "Dan' chesote' beyixe' na' dan' chjasesane' bichle da' chjasesane' laguo', na' dan' chosozeye' beyixe' cont yezi'xeno' xtoła'gaquen', gague da' can' zelažo' na' gague da' can' chbedo'", la'czla' leyna' nžian bia' yogo' da' ca'. 9 Nach Criston' gože' Diosen': "Za'a nga zedeyena' con can' chazlažo'". Da'n'an' nezecho ba bzoe' to šla'ale dan' bžie' bia' gotcho beyixe' cont yezi'xene' xtoła'chon', na' gualaz len, blalj xchen Criston' cont beque'e xtoła'chon'. 10 Na' da' ben Jesucriston' con can' gwyazlaže' Diosen' cate' bnežjw cuine' gosote'ne' tni'aze cani', da'n'an' ba beyac yichjlažda'ocho xilaže' lao Diosen', chio' chejnilaže'chone'.

11 To to bžoz che bene' Israel gualaž checho ca' con nita'cze' chesotcze' beyixen' tža tža na' chosoži'e xchemba' can' ža leyna' cheyala' yesone', la'czla' xchen beyixen' bi gac yeca'an xtoła' beṇačhen'. 12 San Criston' tni'azen' bnežjw yela' mban che' na' zaca'czen cont yeca'an xtoła' beṇačhen' toli tocaṇe. Na' beyož bnežjw cuine' zjajchi'e gan' chnabi'e txe len Diosen'. 13 Na' zoe' chbeze' žin ža yosozexjw yichj yogo' bene' chesegue'e le' na' yosozenague' che'. 14 Na' da' bnežjw cuin Criston' tni'aze cani', bene' cont chio' naccho lo' na' Diosen' beyac lažda'ocho' xilaže' toli tocaṇe. 15 Na' Spiritw che Diosen' lecze benen cont nezecho naquen ca', le nyojen, žan:

16 Quinga gona' gaclena' legaque' cate' žin ža,

gona' cont šo' yichjgaque' da' nžia' bia' yesone',  
na' gona' cont yesyebeden' lo' yichjlažda'ogaquen',  
can' ža Xancho Diosen'.

17 Na' nyoj yeto da' ža Spiritw che Diosen', žan:

Na' bich gona' cuent še bi da' malen' ba gosonen' o še bi xtoła'gaque' ba gota'.

18 Na' cate' ba gwnitlao xtoła'chon' bich chyažžen gotcho no beyixe' neche xtoła'chon'.

*Cheyała' soacho gonxencho Diosen' neca žebcho*

19 Bene' migw, nezecho gac šo'cho gan' zoa Diosen' neca žebcho, le Jesucriston' blalj xchenen' na' beque'e xtoła'chon'. 20 Guac nacho gwsaljue' to nez cobe, to da' chonen chio' yela' mban toli tocañe, le da' bnežjw cuine' gote' neche chio', guac šo'cho gan' zoa Diosen' na' bich naquen ca part yodaon' da' ngaše' len lache' da' ze gan' nono gac šo'. 21 Na' zoa bxoz blao chechon' naque' bene' zaca'chgua, na' naque' Xan yogo' chio' gwlej Diosen' cont chejnilaže'chone'. 22 Da'nan' cheyała' soacho gonxencho Diosen' do yichj do laže'cho neca žebcho, na' cheyała' soacho šejle'cho xchen Jesucriston' ba beca'an xtoła'cho, le nezecho ba gwzoachon' nis da' chejnilaže'chone'. 23 Na' can' gwzolaacho be'cho diža' gwnacho šjayzoacho len Diosen', ca'cze cheyała' goncho bate'teze, na' da' li šjayzoaczcho len Diosen', le zoacze' chone' con can' gwnen'. 24 Lecze cheyała' yeyilwlaže'cho nacle gaclen lježcho cont gaquech lježcho tocho yetocho na' gonchcho da' güen. 25 Na' bi cuejyichjcho da' chdop chžagcho txen chonxencho Diosen' ca chesebejyichj bal bene'. Cheyała' neyoe lježcho soaczcho šejnilaže'cho Criston', na' gonchcho ca' na'a ba nacia' ba zoa te che yežlion'.

26 Še ne' chontezechcho da' xinj la'czla' ba nombia'cho diža' li che Criston', bibi de bichle da' gon žin cont nitlao xtoła'chon'. 27 Na' cheyała'cze žebcho gon Diosen' cont saca'zi'cho še ca', na' yeyejcho lo yi' gabilen' gan' cuiayi' yogo' bene' chesegue'e Diosen'. 28 Cani' da' xozxta'ocho ca' gosote' note'teze bene' bi bzenague' che ley da' bzoj da' Moisésen', bi besyeyaše'de' legaque', con še gwnita' chope o šone bene' toz can' gosote' diža' che da' xinjen' none'. 29 Na' da' mal juisyoch gac che chio' še gue'echo Xi'in Diosen' na' gaquecho bibi zaca' xchen Criston' da' blalje' cont beque'e xtoła'chon' na' še necho che Spiritw che Dios ben' nži'ilaže'de' chio'. Le da' blalj xchen Criston' gwzolao chac da' cobe da' gwna Diosen' gone' gaclene' bene' yesejnilaže'ne'. 30 Nombia'cho Diosen' na' nezecho len' gwne': "Neda' yoži'a che da' mal da' chesone' na' neda' gona' cont yezezaca'zi'e." Na' lecze nyojen žan: "Xancho Diosen' chogbi'e nac gac che bene' ca' ba gwque'e ca xi'ine'." 31 Na' leca naquen da' žebcho še cuejyichjcho Diosen' ben' zoa toli tocañe, le gone' cont saca'zi'cho toli tocañe.

32 Perw le šjayza'laže' can' bchejele da' zan da' gwdi gwxaca'le cate' beyož gwoyo' be'ni' che Criston' lo' yichjlažda'olen'. 33 Tgüeje gozezi'diže' le'e lao yogo' bene' yež na' tgüeje cate' gosotlate' le'e na' bichle da' bosochi bososaque' le'e, na' da' juisyw da' goquele cate' gosonde' bene' lježle ca'. 34 Beyaše'le bene' lježcho ca' bene' gosata' ližya na' goclenle legaque', na' gwzoale mbalaz la'czla' bene' besegue'e le'e goseque'e bi da' gota' chele, le nezele de da' zaca'ch chele yaban' da' bi te chen. 35 Da'nan' bi cuejyichjle da' chejnilaže'le Diosen', neca žeble, le žin ža cate' soachguale mbalaz.

<sup>36</sup> Cheyała' gwyo gwčhejle cont yeyoż gonle yogo'loł da' chnalaže' Diosen', na' tena' gone' cont soale mbalaz toli tocaņe can' gwne'. <sup>37</sup> Can' nyoj Xtiža' Diosen', žan:

La' žinte ža yid ben' seła' gan' zoalen', bich šede'.

<sup>38</sup> Na' xi'ina' beņe' zjanac beņe' güen len neda' yesata' yela' mban čhe' toli tocaņe da' chesejnilaže' neda'.

Na' še bich yesejnilaže' neda', bich yebeda' legaque'.

<sup>39</sup> Perw chio' bi naccho ca bene' ca' bich yesejnilaže'ne', beņe' yesebiayi'. Chio' zoaczcho chejnilaže'chone' na' šjayzoacho len Diosen' toli tocaņe.

## 11

### *Da' chejnilaže'cho Diosen' naquen to da' zejen*

<sup>1</sup> Še chejnilaže'cho Diosen' nezecho gac da' güen da' chbezcho gac, na' nezecho gon Diosen' gac can' že' da' bina' le'echo. <sup>2</sup> Bał beņe' gwlas ca' bebe Diosen' legaque' da' gosejnilaže'ne'.

<sup>3</sup> Da' chejnilaže'chone' chejle'cho con gwņie' na' goc yaban' len yežlion'. Na' bibi bčhine' da' le'echo cate' bene' yogo' da' ca' chle'echo.

<sup>4</sup> Cani' da' xozxta'ocho Abel gwyejnilaže' Diosen' na' da'nan' bnežjue' Diosen' to da' gocch da' güen ca da' bnežjw beņe' biše' Caín. Na' dan' bebe Diosen' dan' bnežjw Abelen' le', da'nan' gwņeze Abelen' naque' beņe' güen len Diosen'. Na' la'czła' ba got Abelen', da' gwzoe' gwyejnilaže' Diosen', naquen ca to da' chņeyoen chio' soaczcho šejnilaže'cho Diosen'.

<sup>5</sup> Na' ľecze da' xozxta'ocho Enoc gwzoe' gwyejnilaže' Diosen', na' da'nan' Diosen' bezi' beque'ene' šlac ne' mbane'. Bi gote', con noch no ble'e le'. Na' nyoj Xtiža' Diosen', žan Diosen' bebede' Enoquen' šlac gwzoe' yežlion'.

<sup>6</sup> Na' Diosen' bi chebede' note'teze beņe' bi chejnilaže'ne'. Le note'tez beņe' yoł güiže' Diosen' cheyała' šejle'e zoacze Diosen' na' šejle'e gwnežjue' yela' mban toli tocaņe čhe note'tez beņe' ņabden' le' do yichj do laže'.

<sup>7</sup> Na' ca nac da' Noé, ľecze gwyejnilaže' Diosen', na' cate' Diosen' bosnide' le' can' za' gac, gwyejle' Noén' can' gož Diosen' le', na' do bžebe' bene' to barcw gan' gwyo'e len beņe' lo' yo'o čhe' ca' cont bi gosate' lo nisen'. Na' da' gwyejle' Noén' can' gwna Diosen', blo'ede' yezica'chle beņe' že' na' zjanape' doła' da' bi bosozenague' čhe Diosen'. Na' ľecze da' gwyejnilaže' Diosen', goc gwna Diosen' naque' beņe' güen len le'.

<sup>8</sup> Da' Abrahanna' ľecze gwyejnilaže' Diosen'. Da'nan' bzenague' cate' boł güiž Diosen' le' na' gože'ne' šeje' ga de to yežlio zito' da' gaquen čhe'. Na' gwyeye' la'czła' bi nombi'e latjen'. <sup>9</sup> Na' Abrahanna', da' gwyejnilaže' Diosen' jasoe' laž beņe' zito' da' gwna Diosen' gac čhe' na' gac čhe xi'in diaža čhe'. Gwzoe' lo' yo'o de lache'ze na' ľecz lo' yo'o de lache'ze gwnita' xi'ine' Isaaquen' na' xi'in xesoe' Jacob beņe' ľecze gož Diosen' gac yežlion' čhegaque'. <sup>10</sup> Abrahanna' gwzoe' gwleze' ca' lo yežlion', le gwņezde' žin ža šjayzoe' gan' zoa Diosen' gan' naquen to ciuda güen da' bi te čhen, ciuda da' ben Diosen'.

<sup>11</sup> Na' Saran' no'ol nac no'ol čhe Abrahanna', la'czła' naque' beņe' güiž na' naque' beņe' gole par soa xi'ine', Diosen' bene' to yela' guac cont gwzoe' xi'ine', le gwyejle'e gon Diosen' con can' gwne' gone'. <sup>12</sup> Ca' goquen' gwzoe' bi' čhe da' Abrahanna' la'czła' goque' beņe' gole par soa xi'ine', nachen' xi'in diaža čhe' gosaque' beņe' zan can' zjanac beljw ca' na' can' nac yox da' čhi' cho'a nisaon' da' nono chac gwlab.



<sup>13</sup> Yogo' bene' ca' ne' chesejnilaže' Diosen' cate' bžin gosate'. Na' la'czła' biŋa' gac lo na'gaque' dan' gože' legaque' gac čhegaquen', bi gosacžejlaže', san gwnit' mbalaz gosejle'e gwžin ža gon Diosen' can' gwnen'. Goso'e diža' zjanaque' ca bene' zito' len bene' že' lo yežlion' na' bibi lažgaque' de lo yežlion'. <sup>14</sup> Na' da' goso'e diža' bibi lažgaque' de yežlion', nachia' gosezelaže' yesyežine' ga yoble gan' gac lažgaque'. <sup>15</sup> Šaca' gosone' xbab čhe yežen' gan' gosalj'en' naquen lažgaque', gota' latje jaya'aque' šaca', perw bi gosone' xbab'en' ca'. <sup>16</sup> Gosezelaže' yesyežine' yaban', le gosejle'e na'len' nac lažgaque', na' gosenezde' nacchen güenč ca yežlion'. Da'n'an' Diosen' bi cheto'ede' čhegaque' že' naque' Dios ben' chesonxene', na' ba benšagüe' to ciuda gan' zjanite'.

<sup>17</sup> Na' Abrahanna' da' gwyejnilaže' Diosen' da'n'an' bzenague' cate' Diosen' bene' le' prueba gože'ne' cheyala' got xi'ine' Isaaquen' lao Diosen' cont gonxene'ne'. Ba zoa gote' xi'in'en' la'czła' gwnezde' Diosen' gože'ne': <sup>18</sup> "Gona' cont nita' xi'in diaža čhio' bene' yesac xi'in diaža čhe Isaaquen'." <sup>19</sup> Da' Abrahanna' bechoglaže' gote'be', le gwnezde' Diosen' chac chosbane' bene' guat. Perw na' Diosen' bi be'e latje gote'be'. Da'n'an' guac nacho bosbane'be' ladjo bene' guaten', la'czła' gague gotbe'.

<sup>20</sup> Gwdechle Isaaquen' gwyejnilaže' Diosen'. Da'n'an' gwŋabde' Diosen' gone' güen len xi'ine' Jacob na' Esaú. <sup>21</sup> Lecze da' Jacoben' gwyejnilaže' Diosen'. Da'n'an' cate' ba zoa gate', gwŋabde' Diosen' gone' güen len xi'in xesoe' ca' bin' gosac xi'in da' José. Na' bcheque' yichje' benxene' Diosen' nčhiše'teze' carrot čhe'. <sup>22</sup> Na' da' Josén' gwyejnilaže' Diosen', na' gwyejle'e žin ža yesyechoj bene' gualaž čhe' ca' Egipton' can' gwna Diosen'. Nachen' cate' ba zoa gate' bžie' bia' yesyeyo'e žit beŋat čhen' cate' yesyeya'aque'.

<sup>23</sup> Cate' golje da' Moisésen', da' leca gosejnilaže' xaxne'en Diosen', bi besežebe' yesyedabague' dan' bžia bia' reyen' yesone', gwne' cheyala' yesote' bi' byo čhegaque' ca'. Šone bio' bosocuaše'be' ližgaquen', le gosacde' nacchguabe' xdan. <sup>24</sup> Nach bi' no'ol čhe rey beque'ebe' bosča'ogüe'be'. Perw cate' ba gwcha'o da' Moisésen' bžone' yesone' le' ca' xi'in bi' no'ol čhe rey čhe Egipton', le gwyejnilaže' Diosen'. <sup>25</sup> Da'n'an' gwyazlaže'čhe' bžaglagüe' txen len bene' gualaž čhe' ca' yogo' dan' bososaca'zi' bene' Egipto ca' legaque', cl'el ca' gone' txen len bene' Egipto ca', le gocbe'ede' yob te čhe yela' chebe čhe da' xinj ca' cheson legaque'. <sup>26</sup> Goclaže' bžaglagüe' can' bžaglao Criston' cont bene' can' gwyazlaže' Diosen', bi gwzelaže' gac čhe' yogo' yela' gwni'a da' de čhe bene' Egipto ca', le gwnezde' gwžin ža gon Diosen' cont soe' mbalaz. <sup>27</sup> Na' da' gwyejnilaže' Diosen', bi bžebe' rey cate' bžin ža besyechoje' Egipton' la'czła' reyna' bža'achgüe' legaque', con gwzoacze' bzenague' čhe Diosen'. Gwnezde' zoacze Diosen' la'czła' bi chle'echone'.

<sup>28</sup> Nach Moisésen' da' gwyejnilaže' Diosen' bžie' bia' da' xozxta'ocho ca', bene' že' to to yo'o gosote' to xila' dao' na' bosoži'e xčhemban' ližgaquen', cont angl bene' nsa' yela' got bibi goc gonde' bi' byo nechw lo' to to yo'o. <sup>29</sup> Na' da' xozxta'ocho ca' gwnita' cani', da' gosejnilaže' Diosen' da'n'an' Diosen' bene' cont Nisdao' Xnan' goquen čhople, na' bla' yo biž gacholen cont goc goselaguen'. Perw bene' Egipto ca' cate' gosaclaže' leze yeselague' nisdaon', bocuaše' nisa' gan' chesedien', na' gosate' gose'eje' nisen'.

<sup>30</sup> Lecze da' gosejnilaže' da' xozxta'ocho ca' Diosen', da'n'an' Diosen' bene' cont bebix ze'e da' gwyečhj doxen ciuda Jericó cate' gan' gosečhje' ze'en yogo' ža lao gaže ža. <sup>31</sup> Na' da' no'olen' le' Rahab, no'olen' goque'

no'ol zle', lecze gwyejnilaže' Diosen', na' da'nan' bi gwžiaye'e txen len yezica'chle bene' Jerico bene' bi bosozenague' che Diosen', le blebe' chop da' xozxta'och ca' ližen' cate' jasegüia jasene'e lažen'.

<sup>32</sup> Ba gwnita'ch bene' zan bene' gosejnilaže' Diosen', perw bi de tiemp gua' diža' che da' ben' gože' Gedeón, che da' ben' gože' Barac, che da' ben' gože' Sansón, che da' ben' gože' Jefté, che da' rey David, che da' Samuel, na' che yezica'chle bene' gosoe'xtiža' Diosen' cani'. <sup>33</sup> Da' gosejnilaže' Diosen' besechoje' gosone' gan cate' gosedile' len no rey, na' bale' gosaque' bene' gwnabia' na' gosone' byen goson bene' yoble da' güen, yebale' besele'ede' ben Diosen' bi da' güen da' gwne' gone' len legaque', yebale' Diosen' bene' cont bež znia bi gosagwba' legaque' na' bi gosoneba' legaque' zi' cate' gosegüe'e legaque' gan' že'ban'. <sup>34</sup> Lecze da' gosejnilaže' Diosen', bale' bi goseye' cate' bene' bosozale' legaque' lo' yi', yebale' besyele' cate' bene' gosacłaže' yesote' legaque' len spada, yebale' beyon Diosen' legaque' bene' gual cate' bich zjanale', yebale' goclene'ne' gosaque' soldadw gual cont gosone' gan cate' soldadw bene' zito' gosedillene' legaque'. <sup>35</sup> Na' gwnita' no'ol ca' da' gosejnilaže' Diosen' da'nan' Diosen' bosbane' no bene' lo' yo'o chegaque' ladjo bene' guat ca'.

Na' gwnita' bene' yoble, da' gosejnilaže' Diosen' da'nan' gosate', bi gosacłaže' yesyele' lo' na' bene' mal ca'. Gosoe' latje bosochi bososaque' legaque', le gosenezde' gwžin cate' Diosen' yechis yosbane' legaque' ladjo bene' guat ca' cont yesenite' len le'. <sup>36</sup> Gwnita' yebał bene' leca gosezi'diža' bene' legaque' na' leca goseyine' legaque', na' bosochije' legaque' gden na' goseyixjue' legaque' ližya. <sup>37</sup> Na' bene' ca' besegue'e legaque' gosote' legaque', bale' bosochele' legaque' yej, yebale' bosozoxje' cuerp chegaquen' len sier, yebale' gosote' len spada. Na' bał bene' ca' gosejnilaže' Diosen' benen byen gosaše' yixe' zjanyaze' no xa xila' no xa šib. Bibi gota' chegaque', leca nyaše' gosac chegaque' catec bosochi bososaca' bene' legaque'. <sup>38</sup> Gosaš goselaže' do latje daš, do ya'adao', do ga ze bloj na' ga zoa no liž beyixe'. Yogo' da' ca' goc che bene' ca' gosejnilaže' Diosen', la'czla' zjazaca'chgüe' na' bene' že' yežlio nga bi zjazaque' yesenite' txen len legaque'. <sup>39</sup> Diosen' bebede' yogo' bene' ca' da' gosejnilaže' le', perw šlac gosenite' bina' gone' yogo' da' güen da' gwne' gone' che xi'in diaža che da' Abrahanna'. <sup>40</sup> Le goclaže' gone' ga gac che chio' zoacho na'a yogo' da' güen da' gwne' gone', cont txen len bene' ca' gosejnilaže'ne' cani', yeyož gaccho can' chazlažen'.

## 12

### *Cheyała' soacho goncho xbab che Jesúsen'*

<sup>1</sup> Nezecho ba gwnita' bene' zan gosone' da' güen neche da' gosejnilaže' Diosen', na' dan' gosonen' chzejni'in chio' can' cheyała' goncho. Da'nan' cheyała' gwzoacho ca'ale še bi da' chžonen goncho can' chazlaže' Diosen' na' cuejyichjcho bi da' xinj da' choncho, le da' xinjen' chziye'czen chio'. Na' cheyała' soatezcho goncho can' ža Diosen' sin cbi yeche'echo. <sup>2</sup> Jesúsen' bene' cont gwzolao chejnilaže'cho Diosen' na' gaclene' chio' cont soaczcho šejnilaže'chone' yežintecho gan' zoe'na'. Na' cheyała' soacho goncho xbab ca' Jesúsen' byo bcheje' len da' gwdi gwxaque' cate' gosote'ne' le'e yag cruzen'. Bi bžone' yesonde' le' da' zan da' naquen da' zban juisyw, le gwnezde' za' gon Diosen' cont soe' mbalaz len le'. Na' na'a Jesúsen' ba chi'e chnabi'e txen len Diosen'.

<sup>3</sup> Cheyala' goncho xbab can' byo bchejlaže' Jesúsen' len yogo' da' ca' gosone bene' mal ca' le' na' bene' can' gwna Diosen'. Na' ca'cze cheyala' gwyo gwchejlaže'cho goncho can' chazlaže' Diosen' la'czla' še chaquechon zdebe; bi cheyala' yeche'echo. <sup>4</sup> Da' zan da' ba bžaglaole chdillenle da' malen', perw bina' lalj xchenle na' bina' yesote' le'e. <sup>5</sup> ¿Ba gonlaže'le can' ža Diosen' chneyoede' chio' can' chon bene' chneyoe xi'ine'? Nyoj xtiže'na', žan:

Xi'indagua', bi gacdo' bibi zejen da' chnežjo Xancho Diosen' le' da' saca'zi'o' cate' chono' bi da' xinj,  
na' bi gaco' tole cate' chdile' le'.

<sup>6</sup> Le Xancho Diosen' chzejni'ide' yogo' bene' chacde',  
na' chnežjue' da' saca'zi' yogo' bene' ba gwque'e ca xi'ine' cate' chesone' da' xinj.

<sup>7</sup> Cheyala' gwyo gwchejlaže'cho cate' Diosen' chone' chio' da' saca'zi'cho, le chonde' chio' ca benachen' chonde' xi'ingaque'. Le yogo'ze bidao' chnežjo xaben' lebe' castigw cate' chontezbe' da' xinj. <sup>8</sup> Na' še bi chon Diosen' da' saca'zi'cho cate' chontezcho da' xinjen', zeje diža' bi naccho xi'ine', le yogo' bene' ba gwque'e ca xi'ine' chnežjue' da' yesezaca'zi'e cate' chesontez' da' xinjen'. <sup>9</sup> Yogo' xaxna'cho bososgole' chio' yežlio nga na' gosone' castigw checho cate' bi da' xinj bencho, na' nezecho ca'cze cheyala' yesone'. Nacchxe cheyala' gwzenagcho che Xacho Diosen' bite'teze da' chzejni'ide' chio', cont šjayzoacho len le' toli tocanē. <sup>10</sup> Na' xaxna'chon' to chop izzen' šlac bososgole' chio' gosone' castigw checho con ca gosaclaže'. San Diosen' nezde' bi da' nac güen par chio', na' chdile' chio' na' chone' da' saca'zi'cho cont gaclenen chio' soacho goncho da' güen na' gac lažda'ochon' xilaže' can' nac lažda'ogüen'. <sup>11</sup> Na' bite'tez da' chyi chzaca'cho, šlac chaquen bi chazlaže'chon, perw cate' ba gwden chaclenen goncho da' zej to licha na' chaclenen soacho binloch len xbab da' yo'o lo' yichjlažda'ochon'.

*Diosen' gone' da' saca'zi'cho še bi gwzenagcho che'*

<sup>12</sup> Da'nan' le soa le gon can' chazlaže' Diosen' sin chi yeche'ele. <sup>13</sup> Le soa le gon da' güen cont gaclenle bene' ca' ne' chesacžejlaže' naquen' yesone' cont legaque' yosozenagche' che Diosen' na' bi yesebejyichje' xtižen'.

<sup>14</sup> Le yeyiljwlaže' nacle gonle soale binlo len yogo'cze bene', na' le gwzenag che Diosen' cont gac lažda'olen' xilaže', le nono yežin gan' zoa Diosen' še bi nac lažda'ogüen' xilaže'. <sup>15</sup> Le gaclen lježle cont ne tole bi ganlaže'le catequen' nži'ilaže' Diosen' chio', le cate' chzola'ochoncho güedenag len Diosen', bedao' chcha'o chxenen na' guacte gonen cont bene' zan yesonche' da' xinj. <sup>16</sup> Bi gata'lenle bene' byo bi nac bene' chele o no'ole bi nac no'ol chele. Na' bi gue'ele da' naquen da' zaca' len Diosen' can' ben da' bene' gože' Esaú, ben' bše'ede' to platw yela' guagw da' cheyala' gwnežjo Diosen' le' dan' golje' goque' bene' nechw. <sup>17</sup> Nezele gwdechle goclaze' yeyac lo ne'e da' bdie' lo na' bene' biše', perw bich bi goc bi gone' cont yeyaquen lo ne'e la'czla' gwcheže' catec gwzelažen'.

<sup>18</sup> Nža'le chac che chio' na'a na' can' goc che da' xozxta'ochon cani' cate' Diosen' bnežjue' legaque' ley chen'. Cate' betje' lo ya'a Sinai gwyechj yi' bel ya'ana', gwxoan žen, beyaquen chol, na' gwyechjchgua be'. <sup>19</sup> Gosende' gwchež to trompeta, na' gosende' be' Diosen' diža' len legaque'. Na' besežebchgüe' na' gosata'yoede' Moisésen' bich güe'len Diosen' legaque' diža'. <sup>20</sup> Besežebchgüe', le Diosen' ba gožle' legaque' še noe' yesebigue'

lo ya'an cheyała' yesote'ne' yosochele'ne' yej, na' lecz ca' yesone' še len beyixe'. <sup>21</sup> Da' zaca' žebcho goc lo ya'an, lente da' Moisésen' gwne': "Łeca chaž chžeba' can' chaquen'."

<sup>22</sup> Perw chio' chejnilaže'cho Criston' ba naccho txen len Diosen' ben' zoa toli tocaŋe na' len yogo' angl che' beŋe' že' yaban' chesonxene'ne', beŋe' zjanaque' beŋe' zan juisyw. Da'n'an' guac nacho ba gwbiga'cho lo ya'a Sión dan' lecze nzin' ciuda Jerusalén da' chi' yaba gan' zoa Diosen'. <sup>23</sup> Na' naccho txen len yogo' lołte beŋe' chesedop chesežag chesonxene' Jesucriston' gate'teze, beŋe' zjanyoj lagaque' le'e libr che Diosen' da' de yaban'. Na' yogo' chio' chejnilaže'chone' zaca'lebcho ca bi' nechw to lo' yo'o, bi' chzi' byen che xaxna'be', le si'cho da' güen da' gon Diosen' chio'. Na' naccho txen len Diosen' beŋe' choglaogüen' che yogo' beŋač še de xtoła'gaque'. Lecze naccho txen len beŋe' ca' ba gosat, beŋe' gosaque' beŋe' güen lao Diosen' da' gosejnilaže'ne', na' na'a ba beyož zjanacyane' can' chaclaže' Diosen'. <sup>24</sup> Na' naccho txen len Jesús ben' blalj xchene' cont gwzolaoc chac da' coben' da' gwna Diosen' gone' gaclene' beŋachen'. Na' blalj xchenen' cont ba bñitlaoc Diosen' xtoła' chio' chejnilaže'chone'. Da'n'an' xchen Jesús'en' zaca'chen ca xchen da' Abelen' da' gwłalj caten' betw beŋe' bišen' le'.

<sup>25</sup> Da' mal juisyw še goncho güedenag len Diosen' cate' chŋe' chio'. Bene' cont gosezaca'zi' da' xozxta'ocho ca' cate' gosone' güedenag len xtižen' da' gwŋelene' legaque' lo yežlion' cani', na' gonche' da' saca'zi' chio' še goncho güedenag len xtižen' da' choe'lene' chio' lo' lažda'ochon' zoe' yaba na'ate. <sup>26</sup> Łeca gwxo' cate' Diosen' betje' lo ya'a Sinaín' cont be'lene' da' xozxta'ocho ca' diža'. Na' na'a ba gwne': "Gwžin ža cate' gona' xo' yežlion' da' yoble, perw gague yežlio na'zen', san lente yogo' da' chle'echo le'e yaba." <sup>27</sup> Na' da' gwne' gone' xo' da' yoble, zejen te che yogo' da' ca' ben Diosen' da' chle'echo, perw bi te che Diosen' na' che yogo' da' güen da' chone' da' bi chle'echo. <sup>28</sup> Da'n'an' cheyała' güe'cho yela' choxclen che Diosen' da' gone' cont šjayzoacho mbalaz txen len le' gan' chnabi'e, na' gague da' te che da' güen da' gac checho len le'. Nach lecz cheyała' gacbe'echo beŋe' zaca'chgua nac Diosen' cont gonxenchone' do yichj do laže'cho can' chazlažen'. <sup>29</sup> Cheyała' gwzenagcho chen', le Dios chechon' leca chgue'ede' da' malen', na' sele' lo yi' gabil beŋe' ca' bi yesyetinjde' che da' xinjen', da'n'an' zaca'lebde' ca yi' bel.

## 13

### *Da' chazlaže' Diosen' goncho*

<sup>1</sup> Bitw gwsanle gague lježle, le yogo'cho chejnilaže'cho Jesucriston' naccho ca biše' lježcho. <sup>2</sup> Na' bi ganlaže'le cheyała' gwleble beŋe' za'ac zito' ližlen' beŋe' chesejnilaže' Jesucriston'. Bał xozxta'ocho ca' cate' bosolebe' beŋe' zito' ližgaquen' bosolebe' angl beŋe' gwseła' Diosen' ŋeca gosacbe'ede'.

<sup>3</sup> Cheyała' gonle xbab che beŋe' lježcho ca' chesata' ližya cont gaclenle legaque'. Na' cheyała' gonle xbab can' gałe'le šaca' chac chele can' chac che beŋe' ca'. Na' bi ganlaže'le beŋe' lježcho bi da' chosoči chososaca' beŋe' legaque', le šlac ŋe' mbancho, cuerp chechon' guac saca'zin' da' quinga. Na' cheyała' gonle xbab can' gałe'le šaca' chac chele can' chac che beŋe' ca'.

<sup>4</sup> Na' le'e nšagna'le, yogo'le le soa do laže'le len no'ol chele o bene' chele na' bi talenle bene' yoble, le Diosen' gone' saca'zi' bene' chesata'lene' no'ole bi zjanac no'ol chegaque' o bene' byo bi zjanac bene' chegaque'.

<sup>5</sup> Bi cheyała' selaže'cho mechon', san cheyała' soacho becho bi da' dao' da' de checho, le Diosen' ba gwne' che to tocho: "Bi ganlaža' le' na' bi cuejyichja' le'." <sup>6</sup> Da'n'an' bibi de da' žebcho, na' to tocho guac nacho: Xana' Diosen' zoe' chaclene' neda'. Bi žeba' bi da' gone benachen' neda'.

<sup>7</sup> Le šjayze'e bene' gwnita' bosozejni'ide' le'e xtiža' Diosen'. Le gon xbab can' gosone' cont yogo'ze bene' gosache'ede' gosenite' gosejnilaže' Diosen', na' le nita' le šejnilaže' Diosen' can' gosonen'.

<sup>8</sup> Na' can' nac yichjlaždao' Jesucriston' nej nase, ca'czen' naque' ža na'aža, na' ca'czen' gaque' toli tocañe. <sup>9</sup> Bi güe'le latje yeseziye' bene' le'e len bi diža' yoble da' chosozejni'ide', le nža' xen can' chososed chosolo'e bale'. Da' chon Diosen' lo' lažda'ochon' neche da' nži'ilaže'chgüede' chio', lenna' chaclenen chio', gague da' ca' chesena bene' cheyała' ye'ej gagwcho. Na' ca nac da' ca' chesene' cheyała' ye'ej gagwcho cont yebe Diosen' chio', bina' yesaclenen bene' ca' chesene' cheyała' gagwchon, na' neca gaclenen chio'.

<sup>10</sup> Xancho Jesucriston' bnežw cuine' gosote'ne' neche chio', na' da' chejnilaže'chone' ba gwnitlao xtoła'chon'; perw bene' ca' ne' chosolalje' xchen beyixe' na' chosozeye'ba' cate' chesenabe' yezi'xen Diosen' chegaque', da' got Jesucriston' bi chaclenen legaque'. <sup>11</sup> Nezecho tñi'a tğüiz bene' nac bxož blao che bene' Israel gualaž checho ca' chesote' beyixe' na' chjasesane' xchemba' lo' yodao' gana' nzi' Latje ga Zoa Dios cont chñabde'ne' yezi'xene' xtoła' yogo'lol' gaque'. Nach yezica'chle bxož ca' chosozeye' cuerp che beyixe' ca' cho'a yežen'. <sup>12</sup> Na' ca ca'le goc che Jesús'en' dan' gosote'ne' cho'a ciuda Jerusalénna' cate' bnezjw cuine' cont beque'e xtoła'chon' len xchene' dan' blaljen'. <sup>13</sup> Da'n'an' cheyała' šejnilaže'cho Jesús'en' na' cuejyichjcho costumbr gol ca', la'czla' yesegue'e bene' chio' da' choncho ca'. <sup>14</sup> Gate'tez zoacho lo' yežlio nga da' te chen, perw chbezcho šjayzoalencho Diosen' lo' ciuda da' bi te chen. <sup>15</sup> Da' ba beca'a Jesucriston' xtoła'chon' cheyała' güe'cho yela' choxcen che Diosen' yešlale mbancho, gonxenchone' len xtiža'chon'. Lenna' da' chaclaže' Diosen' güe'chone'. <sup>16</sup> Na' cheyała' soacho goncho da' güen na' cheyała' gwnežjwcho con gaca'te da' saque' gwnežjwcho gaclencho bene' bi de chegaque', le chazlaže' Diosen' cate' chonxenchone' choncho ca'.

<sup>17</sup> Le gwzenag che bene' chososed cheselo'ede' le'e xtiža' Diosen' na' le güe' latje yesene' naquen' gonle, le chosogüia chesene'e le'e cont chesaclene' le'e len yichjlažda'olen', na' legaque' cheyała' yosyodie' cuent lao Diosen' še naquen' ba gosone'. Le gwzenag chegaque' cont yesyebede' na' cont da' chesone' bi gaquen to da' zdebe, le še gonle güedenag len legaque', bibi da' güen chga'an' chele še ca'.

<sup>18</sup> Le nab cont gaclen Diosen' neto'. Nezeto' chonto' can' chazlaže' Diosen' na' chaclaže'to' gonto' con da' naquen güen. <sup>19</sup> Na' leca chata'yoeda' le'e yol güižle Diosen' nable yob gac yidcha' gan' zoalen'.

*Chnabe' gaclen Diosen' legaque'*

<sup>20</sup> Na' na'a zoa Diosen' chone' cont zoa chbezcho binlo len xbab da' yo'o lo' yichjlažda'ochon'. Len' bečhis bosbane' Xancho Jesucriston' ladjo bene' guat, le da' blalj xchenen' le'e yag cruzen' gwzolao chac da' cobe da' gwna

Diosen' gone' gaclene' beṇe' yesejnilaže'ne'; na' gague da' te che dan' gwne' gonen'. Na' da' nži'ilaže' Xancho Jesucriston' chio', zaca'lebde' ca to beṇe' güeye' xila' beṇe' chon da' güen juisyw len be che' ca'. <sup>21</sup> Na' chṇabda' Diosen' gaclene' le'e bite'tez da' chyažjele cont soale gonle yogo'te da' güen can' chazlažen', na' gone' cont gac yichjlažda'ochon' cayanen' chaclaže' lagüe da' nombia'cho Jesucriston'. Le gonxen Jesucriston' toli tocanē. Na' ca' gonšcaczcho.

<sup>22</sup> Beṇe' migw, chṇabšca' bi gaquele zed da' ba bzoja' le'e chṇeyoeda' le'e nga, le bitec naquen da' toṇe. <sup>23</sup> Na' chzenda' le'e beṇe' migw checho Timoteon' ba bechoje' ližyan' na' chbeza'ne' nga. Na' še yob yele'e nach chi'ane' cate' yedēna'a le'e.

<sup>24</sup> Ca nac neda', chguapa' tiox beṇe' blao ca' chosozejni'ide' le'e na' chosogüia cheseṇe'e le'e, na' lecze chguapa' tiox yogo' nochle beṇe' chesejnilaže' Diosen'. Beṇe' lježcho ca' za'ac Italia lecze chosoguape' le'e tiox.

<sup>25</sup> Diosen' gaclenšque' le'e. Da' na'zen' chzoja'.

## CART DAN' BZOJ SANTIAGO

*Santiagoŋ' chguape' tiox bene' ca' zjanaslas zan yež*

<sup>1</sup> Neda' Santiago naca' bene' güen žin che Diosen' na' che Xancho Jesucriston'. Chguapa' le'e tiox, le'e nacle šižiŋw cue' xi'ŋ diaža che da' Israel, le'e chejnilaže'le Jesucriston' na' naslasle yežlion'.

*Nac nezecho can' che'ne Diosen' goncho*

<sup>2</sup> Bene' migw, cheyała' yebechgüecho cate' chac bite'teze da' chac checho. <sup>3</sup> Cate' chac bi da' chac checho chonen chio' prueba še gončhačlaže'cho šejnilaže'cho Diosen'. Na' nezecho cate' chončhačlaže'cho chejnilaže'chone', chaclenen chio' cont gapchcho yela' chxenlaže' len bite'teze da' chac checho. <sup>4</sup> Na' da'nan' cheyała' gaple yela' chxenlaže' bite'teze dan' chac chele na' gončhačlaže'le šejnilaže'le Diosen' cont gacle can' chaclaže' le'.

<sup>5</sup> Note'tezcho cate' bi nezecho naquen' chaclaže' Diosen' goncho, cheyała' nabechone' gwzejni'iden' chio', na' gwzejni'iczeden'. Le chebede' chaclene' chio', na' bitw chdile' chio' cate' chnabechone' gaclene' chio'. <sup>6</sup> Perw cate' chnabechone' gwzejni'ide' chio', cheyała' šejle'cho chzenagcze' chechon' na' bitw gacžejlaže'cho. Bena' chacžejlaže' še chzenag Diosen' che', zaca'lebde' ca nisdao' dan' chas chata' cate' chečj be' lagüen' na' chjatan' nile na'le. <sup>7</sup> Ben' chacžejlaže' še chzenag Diosen' che', bitw cheyała' soe' lez gwnežjw Diosen' le' bite'teze da' chnabe'. <sup>8</sup> Na' ben' chon ca' bitw nezde' bi xbab chone', con šayičj šayen chaque' len bite'teze dan' chonen'.

<sup>9</sup> Na' bene' migw, le'e chejnilaže'le Diosen', še nole nacle bene' yaše', le soa mbalaz, le nacle bene' zaque' len Diosen'. <sup>10</sup> Na' bene' migw, še nole nacle bene' gwñi'a, le soa mbalaz dan' ba chacbe'ele lao Diosen' bitw zaca'chle clal ca yezica'chle bene'; na' yob te che yela' gwñi'an' can' chde che yej ca' zjaze yiže'. <sup>11</sup> Cate' chna'chgua gwbižen' chesecuađ yiže' ca', na' cheseyiŋ laga' che yejen' na' bich chosolo'en xdan. Can' chac len yej ca', lecze can' gac len bene' gwñi'a ca', yeyol yenite' lao xšinen'.

*Cheyała' soateze soacho šejnilaže'cho Jesucriston' bite'teze dan' chac checho*

<sup>12</sup> Še chy chčejlaže'cho len da' chac checho na' chončhačlaže'cho chejnilaže'cho Diosen', nachen' leca mbalaz zoacho. Na' cate' te dan' chyi chzaca'chon', Diosen' gone' cont bancho len le' toli tocaŋe can' gwne' ban yogo'cho chaquechone'. <sup>13</sup> Na' note'tezcho cate' žan goncho da' malen', bitw gac nacho Dios nan' chgo'oyeje' chio' goncho da' malen', le Diosen' bitw chgo'oyeje' bene' yesone' da' mal. Lecze ca' le', bitw bi de da' chgo'oyela' le' cont gone' da' malen'. <sup>14</sup> Yela' chzelaže' checho dan' yo'o lo' yichjlažda'ocho chonen cont chzelaže'cho choncho da' mal. <sup>15</sup> Na' še ba choncho can' ža yela' chzelaže' dan' yo'o lo' yichjlažda'ochon' na' zoacho choncho da' malen', nach gwžin ža cate' cuejyichj Diosen' chio' na' bitw šjayzoacho len le'.

<sup>16</sup> Bene' migw, bitw siye' cuinle gonle xbab Dios nan' chgo'oyeje' le'e cont gonle da' malen'. <sup>17</sup> Dios ben' zoa yaba, le'na' chsele' da' güen da' chac checho na' da' de checho. Xacho Dios ben' ben gwbiž, bio' na' beljw ca'

cont chososenin' len chio', chone' cont gac güen checho, na' bitw chše'e ca chone' len chio', bia'cze zoacze' chone' güen. <sup>18</sup> Gwyazlaže' Diosen' bocobe' yichjlažda'ochon' cate' gwyejle'cho che diža' li chen'. Na' ba bocobe' yichjlažda'ochon' cont žialaocho len bene' nechw ca' chesejnilaže'ne'. Na' da' ba bocobe' yichjlaždao' chio', nezecho za' gone' ca' len bene' zan.

### *Can' goncho cont yebe Diosen' chio'*

<sup>19</sup> Bene' migw, nezele cheyała' yebecho gwzenagcho che diža' güen, na' cheyała' goncho xbab cate' za' necho, na' neca la' ža'atecho. <sup>20</sup> Cate' chža'acho, bitw chac goncho güen can' chaclaže' Diosen' goncho. <sup>21</sup> Da'nan' cheyała' cuejyichjcho yogo'loł da' xinjen' ba benchon' na' yogo'loł da' chgue'e Diosen' da' gwcha'o gwxenen lo' yichjlažda'ochon' cate' bina' šejnilaže'chone'. Cheyała' gwzexjw yichjcho na' gwzenagcho diža' li che Diosen' dan' ba yo'o lo' yichjlažda'ochon', cont gata' yela' mban checho toli tocanē.

<sup>22</sup> Na' cheyała' goncho dan' ža diža' li che Diosen' goncho, gague con yenezcho can' žanna'. Le še con chenecho can' žanna' na' bi chonchon, chziye'ze cuincho še ca'. <sup>23</sup> Ben' chene diža' li che Diosen' na' bi chone' can' žanna', zaca'lebde' ca to bene' chna' cho'alagüen' lo spejw, <sup>24</sup> le con chne'e can' nac cho'alagüen' na' cate' ba beyož gwne'en la' cheyanlažtie' can' naquenna'. <sup>25</sup> Perw bene' zoacze' chzenague' xtiža' Diosen' do yichj do laže' na' chone' can' žanna' sin cbi yeyanlažen', benan' soe' mbalaz, le xtiža' Diosen' chaclenen le' bite'tez da' chone'.

<sup>26</sup> Note'tezcho še choncho xbab choncho can' chazlaže' Diosen', perw bi chnabia' cuincho cont bi necho diža' mal, chziye'cze cuincho še ca'. Le še xtiža'chon' bi naquen güen lao Diosen', bitw chebede' bite'tez dan' choncho še ca'. <sup>27</sup> Še goncho can' chebe Xacho Diosen', gaclencho no'ole güezeb ca' na' bi' güezeb ca' še bi dan' cheseyažjde', na' cuejyichjcho bich goncho da' xinj dan' cheson bene' ca' bi zjanombia' Diosen'.

## 2

### *Toze can' cheyała' goncho len yogo' bene'*

<sup>1</sup> Bene' migw, Xancho Jesucriston' naque' la'zelagüe bene' zaca', na' še chejnilaže'chone', toze can' cheyała' goncho len note'teze bene', bitw nacho balze bene' gonxenchguachone' na' yebale' gonechone' nacteze.

<sup>2</sup> Še yesela' chope bene' gan' chdop chžagcho chonxencho Jesucriston', na' toe' naque' bene' gwni'a na' nyaze' lache' šagüe' lache' xdan, na' ngo'o xbenen' to niy de oro, na' ben' yeto naque' bene' yaše' na' nyaze' lache' de'exo', toze can' cheyała' goncho len chope'. <sup>3</sup> Bitw naquen güen še gonxencho bene' gwni'a na'ze na' ye'chone': "Gwche'edo' lo yag siy nga ga nac binlo", na' ye'cho bene' yaše'na': "Gwzechateze do dan' na'le", o še ye'chone': "Gwche'etezdo' lo yo". <sup>4</sup> Bitw naquen güen lao Diosen' še cuinzcho choglaochon nacho noen' zaque' na' noen' bi zaca'. Xbab chechon' naquen da' mal še goncho ca'.

<sup>5</sup> Bene' migw, Diosen' ba gwleje' zan bene' yaše' zjanaque' xi'ine' na' chesejnilaže'chgüe' le'. Na' yesenite' mbalaz cate' yesyežine' gan' zoen' chnabi'e, can' gwna Diosen' gac che note'teze chio' chaquecho le'. <sup>6</sup> Perw na' chonle bene' yaše' ca' ca' bene' bibi žjazaca'. Na' bene' gwni'a ca' chongaclene' ca' bene' zjazaca'chgua; len legaquen' chosoči' chososaque'



le'e na' cheseche'xoxje' le'e lao justis ca'. <sup>7</sup> Lecze legaquen' chosožie' yela' ya' che Jesucriston' ben' naccho txen, ben' naque' bene' zaca'.

<sup>8</sup> Ley dan' nac da' žialao lao yogo' da' ca' nyela' le'e Xtiža' Diosen' žan: "Le gague ljež benačle ca chaque cuinle." Še da' licze chonle can' žanna' choncze güen. <sup>9</sup> Perw ley che Diosen' chhoglaon chele naple doła' še chonxenle bał bene' na' yebale' chongaclene' ca bene' bibi zaca'. <sup>10</sup> Can' naquen, note'teze bene' zoe' chone' dołol can' ža leyna', perw na' še ba gwchoe' to da' dao', len doxen leyna' chape' doła' še ca'. <sup>11</sup> Diosen' ben' gwna: "Bitw gata'lenle no'ole bi nac no'ol chele o bene' byo bi nac bene' chele", leecen' gwne': "Bi gotle bene'". Na' la'czla' bitw chata'lencho no'ole bi nac no'ol checho o bene' byo bi nac bene' checho, še ba naccho bene' güet bene', bia'cze napcho doła' len leyna'. <sup>12</sup> Xtiža' Diosen' chaclenen chio' cont bi gwzenagcho che da' malen'. Na' cheyala' güe'cho diža' güen na' soacho goncho bichle can' žanna', le Diosen' gone' da' saca'zi'cho še bi choncho can' žanna'. <sup>13</sup> Diosen' gwnežjwchgüe' da' saca'zi' bene' ca' bi chesyeyaše' chesyezi'ilaže'de' ljež benače'. Perw bene' ca' chesyeyaše' chesyezi'ilaže'de' ljež benače', Diosen' yeyaše' yeži'ilaže'de' legaque'.

*Bitwbi zejen še con žacho chejnilaže'cho Jesucriston'*

<sup>14</sup> Bene' migw, še to bene' že' chejnilaže' Jesucriston' perw bi chone' da' nac güen, bitwbi zejen že' ca'. Bitw chaclenen le' cont gata' yela' mban che' toli tocane še con žaze' ca'. <sup>15</sup> Bał bene' lježcho bene' chesejnilaže' Jesucriston' bi de da' yese'ej yesagüe' na' bi de xałana'gague'. <sup>16</sup> Na' še bitw gaclenchone' len dan' cheseyažjde', še con ye'chone': "Le šjaya'ac to šagüe' to güen na' Diosen' gaclene' le'e cont želele dan' chyažjelen'", bitwbi zejen dan' con načo ca'. <sup>17</sup> Da'nan', še con žacho chejnilaže'cho Jesucriston' perw bitw choncho da' nac da' güen, bitwczze bi zejen dan' žacho chejnilaže'chonen'.

<sup>18</sup> Nita' bene' chesene' guac yesejnilaže' Jesucriston' la ca yesone' da' nac da' güen. Na' lecze nita' bene' chesene' še chejnilaže'cho Jesucriston' cheyala' goncho da' nac güen. Na' žia' le'e, še načo chejnilaže'cho Jesucriston' perw bitw choncho da' güen, bitw nacbia' še chejnilaže'chone'. Perw še da' li chejnilaže'chone' nach soacho goncho da' güen na' yesacbe'e bene' le chejnilaže'chonen'. <sup>19</sup> Chejle'cho toze Diosen' zaque' gonxenchone', na' ca'czen' cheyala' šejle'cho. Perw gague da' ca'zen' cheyala' goncho. Da' xigüe' ca' lecze chesejlen' toze Diosen' naque' bene' zaca' na' chesexizen chesežeben. <sup>20</sup> Chnecho diža' da' bi zejen še con žacho chejnilaže'cho Jesucriston' na' bitw choncho da' güenna', le bi gaclenen chio' še con žazcho chejnilaže'chone'. <sup>21</sup> Da' xoxxta'ocho Abrahanna' blo'e le gwejnilaže' Diosen' dan' bzenague' che Diosen'. Da'nan' bzande' xi'ine' Isaaquen' gote'be' cont gonxene' Diosen'. Na' dan' bzenague' che Diosen', da'nan' Diosen' gwne' che' le naque' bene' güen len le'. <sup>22</sup> Na' nezecho can' ben da' Abrahanna', gague con gwejnilaže'ze Diosen', san lecze bzenague' che'. Na' dan' bene' ca' blo'e le gwejnilaže' Diosen'. <sup>23</sup> Da'nan' goc can' nyoj Xtiža' Diosen' che', žan: "Abraham gwejnilaže' Diosen' na' da'nan' Diosen' gwne' naque' bene' güen len le'." Na' lecze nyojen che Abrahanna' goque' bene' xmigw Dios.

<sup>24</sup> Can' naquen, gague dan' žacho chejnilaže'cho Dios nan' že' naccho bene' güen len le', san dan' chzenagcho che', da'nan' že' naccho bene' güen len le'. <sup>25</sup> Na' da' Rahab goque' no'ole zle' no'ol con gwej len note'teze

beñe' byo, perw bzenague' che Diosen' cate' blebe' beñe' ca' chope jasegüia jasene'e laže'na'. Na' blo'ede' legaue' yetole nez ga jaya'aque' cont bi jasyexen soldadw che rey legaue'. Na' dan' goclene' beñe' ca', blo'e gwyejnilaže' Diosen'. Na' gwna Diosen' naque' beñe' güen len le'.<sup>26</sup> Quinga naquen: Še to beñe' bich nye'e biš grasyw, nacbia' naque' beñe' guat. Ca'czen' naquen, še bitw choncho da' güen nacbia' bitw chejnilaže'cho Diosen' la'czla' žacho chejnilaže'chone'.

### 3

#### *Choncho da' xinj len xtiža'cho*

<sup>1</sup> Beñe' migw, nezecho neto' chsed chlo'eto' beñe' yoble xtiža' Diosen' saca'zi'chto' še bi gonto' can' žanna'. Da'nan' žia' le'e, gague la' si'te lo na'le gwsed gwlo'ele beñe' yoble xtiža' Diosen'. <sup>2</sup> Zan ni'a yogo'cho choncho da' xinj. Perw še to beñe' bitw chone' da' xinj len xtiže'na', nacchgüe' beñe' güen na' gwzoeczde' nabie' doxen cuerp chen' še ca'. <sup>3</sup> Caten' chgo'ocho freno cho'a cabayw ca' cont yosozenagba' checho, na' šja'acba' con gate'teze chaclaže'cho šejlenchoba'. <sup>4</sup> Na' lecze beñe' ca' chososa' barcw xen ca' chosochine' yag da'oze dan' chosose'eden' cont chejen con gate'teze chesende', la'czla' še chžiga' to be' gual legaquen'. <sup>5</sup> Ca'czen' naquen len lože'chon'. Toze da' dao' rizen' naquen lao cuerp chechon', perw chac chñelenchon diža' da' zjazaca'. Na' ca' nac to yi' dao' riz, guac gwzeyen to ya'adao' xen, ca'czen' naquen len lože'chon' cate' chñelenchon diža' mal. <sup>6</sup> Lože'chon' naquen to da' chnabia' chonchguan da' xinj juisyw lao doxen cuerp chechon'. Lože'chon' naquen ca' to yi' beļ da' chla'an chca'an nile na'le chzeyen bite'teze da' de, le še cae'cho diža' malen' chyaļa'ch yogo'loļte da' xinj dan' chonchon', na' chonen cont zoacho chonchguacho da' xinj yešlale mbancho. Na' che gwxiyen' chzenagcho caten' choe'cho diža' mal ca'. <sup>7</sup> Chac chnabia'cho yogo'te beyixe', be žia tap ni'a na', be žia xil, be chda nxobe le'e, na' be ca' že' lo' nis. Ba gwnita' beñe' gosenabi'eba'. <sup>8</sup> Perw ne to chio' bitw soečo lože'chon' cont bi güe'lenchon diža' mal. Con zoacho choe'cho diža' malen', na' diža' mal dan' choe'chon' zaca'leben ca' venen che to beļ znia. <sup>9</sup> Len xtiža'chon' chonxencho Dios ben' naque' Xacho. Na' lecze len xtiža'chon' chžiacho yeļa' ya' che ljež beñachcho beñe' ca' ben Diosen' can' nac le'. <sup>10</sup> Na' cho'acho na' chchoj diža' šagüe' cate' chonxencho Diosen' na' lecze chchoj diža' mal cate' chžiacho yeļa' ya' che ljež beñachcho. Beñe' migw, bitw choncho ca' cheyaļa' goncho. <sup>11</sup> Nezecho ga' chal nis bitw žia nis sia na' nis zbapj toz bej. <sup>12</sup> Na' lecze ca' beñe' migw, nezecho to yag yixgüigw bitw chbian frut dan' nzi' aceituna, na' neca yag uvas chbian yixgüigw. Na' lecze ca' ga' chal nis, bitw chchoj nis sia to bej ga' žia nis zbapj.

#### *Can' goncho še Diosen' ba beñe' chio' yeļa' sina' chen'*

<sup>13</sup> Še note'tezle žale nacle beñe' sina' na' chejni'ile xtiža' Diosen', cheyaļa' gonle yogo'loļ can' chazlaže' Diosen'. Cheyaļa' gonle da' güen sin cbi gonxen cuinle cont nacbia' nacle beñe' sina'. <sup>14</sup> Perw še chgue'e lježle na' chzelaže'le gacchle beñe' blaoch ca' beñe' lježle, bitw cheyaļa' nale nacle beñe' sina', le con chonlaže'len' še ca'. <sup>15</sup> Na' še chgue'e lježle na' chzelaže'le gacle beñe' blaoch ca' beñe' lježle, bitw nacle beñe' sina', san xbab chelen' zan' che Satanás dan' chnabia' da' xigüe' ca', na' con chonle da' xinjen' can' ža lažda'olen' na' can' cheson beñe' ca' bi zjanombia'

Diosen'. <sup>16</sup> Še chgue'e lježcho na' chzelaže'cho gaccho bene' blaoch ca legaque', bitw zoacho binlo len legaque' še ca', na' choncho yogo'te da' xinj. <sup>17</sup> Cate' Diosen' chone' chio' yela' sina' chen', chaclaže'cho goncho yogo' da' nac da' güen. Chaclaže'cho soacho binlo len lježcho na' naccho bene' xenlaže' na' chzexjw yichjcho cont chzenag che lježcho. Na' lecze cheyaše' cheži'ilaže' lježcho na' choncho da' güen len legaque', na' toz ca choncho len note'tez bene'. Na' bite'tez da' choncho, chonchon do laže'cho. <sup>18</sup> Nach še chebecho yesezoa yesebez bene' binlo na' chaclencho bene' yezica'chle cont yesezoa yesebeze' binlo, na' chaclenen cont yeson bene' da' güen.

## 4

### *Bitw gac goncho can' cheson bene' bi zjanombia' Diosen'*

<sup>1</sup> Chdile chšašlen lježle, na' chonle ca' dan' yo'o nyaz da' malen' yichjlažda'olen' na' chnabian' le'e cont chonle con ca žan chele. <sup>2</sup> Chzelaže'chguale bi da' gata' chele na' chdile chšašlen lježle na' chaclaže'tele gotle bene' cont gata' chele dan' chzelaže'len'. Perw bitw gata' dan' che'nelen' lagüete chonle da' xinj na' bi chñabele Diosen' gone' cont gata' dan' chyažjelen'. <sup>3</sup> Na' cate' chñabele Diosen' gone' cont gata' bi dan' gata' chele, bitw chonen', le con che'nele gata' dan' chzelaže'le lo' lažda'olen' cont gonle con nacteze žan chele. <sup>4</sup> Na' da' chzenagle che dan' ža xbab chelen' na' chonle can' chzelažen'na', chonle txen len bene' ca' bi zjanombia' Diosen', na' chonle contr Diosen'. Na' note'tezcho še chaclaže'cho goncho txen len bene' mal ca', choncho contr Diosen' na' bich chaquechone' ca cheyała'. Zaca'lebcho ca to no'ole nzoa xto, no'ole ben' bich chacde' bene' che'. <sup>5</sup> Chonljale xbab Xtiza' Diosen' bitw bi zacan' gan' nyojen žan: "Spiritw che Diosen' dan' zoan lo' lažda'ochon' chzelaže'chguan gwzenagcho che toz Diosen'." <sup>6</sup> Diosen' chaclenchgüe' chio' cont chzenagcho che toz le'. Da'nan' nyoj Xtiza' Diosen' žan: "Diosen' chone' contr bene' ca' chesonxen cuingaque', perw chaclene' bene' ca' chesache'ede' bi chosozenague' che' ca cheyała'." <sup>7</sup> Da'nan' cheyała' gon cuincho lo' na' Diosen' na' gwyo gwchejlaže'cho bi gwzenagcho che Satanásen'. Še goncho ca', gwcuaseczen ca'ale. <sup>8</sup> Le soa le yol güiž Diosen', nach soe' gaclene' le'e. Cheyała' cuejyichjle da' xinj da' chonle. Na' še chonle xbab guac gonxencho Diosen' na' gontezcho can' ža lažda'ochon', clelen' chonle xbabnen' še ca', na' cheyała' güe'le latje yeyon Diosen' yichjlažda'olen' xilaže'. <sup>9</sup> Bi cheyała' yebele, san cheyała' yegüine'le neche da' xinjen' ba benlen' na' yeto'ele chen. <sup>10</sup> Cheyała' gwzexjw yichjle lao Xancho Diosen', nach Diosen' gone' cont gacxenle.

### *Bi cheyała' nacho che lježcho nape' doła'*

<sup>11</sup> Bene' migw, bi cheyała' nelocho che lježcho. Ben' chnelagüe' che lježe' o chosbagede' lježe', benan' chne' che ley che Diosen' na' chzoe' leyna' ca'ale. Na' nezecho ben' chon ca' bi chzenague' che leyna'. Na' dan' chon cuine' ca bene' zaque' cont že' che bene' lježe' nape' doła', chone' ley che Diosen' ca to da' bibi zaca'. <sup>12</sup> Toz Dios nan' gwdixjue' leyna', na' toz le'na' zaque' choglagüe' che to tocho še napcho doła'. Na' toz le' zaque' gone' cont bi šjaya'ac bene' lo' yi' gabilen', na' lecze zaque' cont yesele' bene' lo' yi' gabilen'. Perw chio' bitw zaca'cho nacho che bene' lježcho zjanape' doła'.

### *Bitw nezecho bin' gac gwxe güiž*

<sup>13</sup> Na' le gwzenag da' nga: Baŕle ch̄chogbia'len ŕejle to ga ŕejle gonle negosyw cont gonle gan. Na' chbejle to ŕa cate' ŕejle na' ch̄chogbia'len yega'anle na' tgüiz, <sup>14</sup> neca chacbe'ele bi nezecho bin' gac checho o nac goncho gw̄xe güizj. Yela' mban chechon' zaca'leben ca to bejw, le bejon' ŕlozche chle'echon na' cheyasen. <sup>15</sup> Cheyala' n̄acho: "ŕe Xancho Diosen' gone' latje bancho, na' goncho to da' goncho." <sup>16</sup> Perw da' xinjen' choncho ŕe chonxen cuincho ch̄ziacho bia' naquen' goncho sin cbi nabecho Diosen'. <sup>17</sup> Na' ŕe nezecho cheyala' goncho da' nac güen na' bi chonchon, napcho doŕa' lao Diosen'.

## 5

*Da' malchgua gac che bene' gwñi'a ca' bene' bi chosozenag che Diosen'*

<sup>1</sup> Na' ca nac le'e bene' gwñi'a, le'e bi chzenagle che Diosen', le soayaŕe' na' le cuez̄yaŕe', le leca za' saca'zi'le. <sup>2</sup> Lao Diosen' dan' de chele naquen ca to da' ba chbiayi', na' lache' ŕagüe' chelen' naquen ca to da' ba chle'e beŕzila'. <sup>3</sup> Na' mechw chelen' dan' nac de oro na' de plata, len Diosen' naquen ca to da' ba chzen x̄che'en. Da'n̄an' žin ŕa žaglaochgualo lo yi' gabilen'. Ba gwche' yichjle tlaoze btoble da' ŕcha'o xmechwlen', la'czla' ba zoa gon Diosen' da' saca'zi'le. <sup>4</sup> Cheyala' gonle xbab can' benle len bene' güen žin chele ca', bene' yaŕe' ca' besyelap coseŕ chelen'. Benlele legaue' dan' bitw gw̄dixjwlene' ca cheyala'. Na' dan' bi bnežjwle laxjwgaquen' ca cheyala', chlo'en nacle bene' güen da' xinj. Diosen' chzenague' che bene' güen žin ca' dan' chesyegüine'de', Dios ben' nape la'zelagüe yela' guac xen. <sup>5</sup> Zoatezle che'ej chagwŕagüe'le na' chonditjele dan' de chele chonle con ca žan chele, na' bi chacbe'ele ba zoa gon Diosen' da' saca'zi'le. Na' lagüe dan' chonle ca', zaca'leble ca to beyix̄e' ben' chgüe'ej chguagwŕagüe'cho cont ba chaŕe'ba' cate' žin ŕa gotchoba'. <sup>6</sup> Na' gan' chi'le chonle yela' justisen', ba gw̄choglaolen yesote' bene' goson da' güen, bene' bibi gosonde' le'e.

*Cuezcho batcan' yid Xancho Jesucriston' da' yoble na' yol güiz̄cho Dios*

<sup>7</sup> Ca nac le'e bene' migw, le gape yela' chxenlaže' len dan' chy chzaca'le, le ba zoa yid Xancho Jesucriston' da' yoble. Bene' ca' chesaz, chesenite' chesebeze' coseŕen', le coseŕen' naquen da' zaca'. Na' chesape' yela' chxenlaže' chesebeze' chde tiemp yejon', le cate' chbeze yejon', cana'chen' chosyotobe' coseŕen'. <sup>8</sup> Da'n̄an' bite'teze dan' chy chzaca'le, cheyala' gaple yela' chxenlaže' na' gonchachlaže'le ŕejnilaže'le Xancho Jesucriston', le ba zoa yide' da' yoble. <sup>9</sup> Bene' migw, bitw yosbaga' lježle ŕe bin' chac chele. ŕe bin' yosbaga' lježle, ba zoa yid Xancho' da' yoble na' choglagüen' chele nape doŕa'. <sup>10</sup> Le gon xbab che da' bene' ca' goso'e xtiža' Xancho Diosen' cani'. Leca bosochi bososaca' bene' legaue', perw bia'cze bosoyo bosochije', can' cheyala' gonle. <sup>11</sup> Da' li mbalaz bene' ca' gwñita'teze' gosonchachlaže' gosejnilaže' Diosen' la'czla' besežaglagüe'. Na' ba benele xtiža' da' Job can' benchachlaže' gweyjnilaže' Diosen', la'czla' da' zan da' gw̄di gwxaque'. Perw na' cate' gwde dan' gw̄di gwxaquen', Diosen' bene' cont gwzoache' mbalazch clel can' gwzoe' cani'. Can' nac Diosen', leca chazlaže' chaclene' chio', na' leca cheyaŕe' cheži'ilaže'de' chio'.

<sup>12</sup> Bene' migw, da' naquen da' žialao, gwbat gwzoale no co' da' baŕi che bite'teze. Bitw nale yaban' co'on da' baŕi choe'le diža' li, neca nale yežlio

nga co'on da' ba<sub>li</sub> choe'le diža' li, nēca bite'tezechle. Cheya<sub>la</sub>' güe'cho diža' li da' šejle' bene' cont Diosen' bi choglagüen' checho saca'zi'cho.

<sup>13</sup> Note'tezcho cate' chac bi da' chac checho, cheya<sub>la</sub>' yo<sub>l</sub> güižcho Dios. Na' note'tezcho cate' zoacho mbalaz, cheya<sub>la</sub>' go<sub>l</sub>cho gonxenchone'.

<sup>14</sup> Note'tezcho cate' chacšenecho, cheya<sub>la</sub>' gaxcho bene' ca' gwlejcho cont chosogüia chesene'e chio' chdop chžagcho chonxencho Jesucriston'.

Na' yosotope' yichjcho late' set, na' yoso<sub>l</sub> güiže' Dios, yesenabe' yeyaquecho len yē<sub>la</sub>' guac che Xancho Jesucriston' lagüe' da' chejnilaže' chone'.

<sup>15</sup> Na' chio', cate' cho<sub>l</sub> güižcho Xancho Diosen', cheya<sub>la</sub>' šejle'cho le chzenagcze' checho cont yeyone' ben' chacšenēn', na' še ba bene' da' xinj, güezi'xencze Xanchon' che'.

<sup>16</sup> Da'nān' cheya<sub>la</sub>' xoadola'cho lao bene' lježcho na' yo<sub>l</sub> güižcho Dios tocho yetocho cont ca' yezoacho güen še bin' chac checho.

Na' še naccho bene' güen len Diosen', Diosen' chzenagcze' checho cate' cho<sub>l</sub> güižchone' na' chone' da' zan da' güen dan' chnabechone' gone'.

<sup>17</sup> Le gon xbab che Elías ben' be' xtiža' Diosen' cani'te. Goque' benač cayanen' nac chio'.

Na' cate' bo<sub>l</sub> güiže' Diosen' do yichj do laže' gwñabe' bi gac yejw, na' Diosen' bzenague' che' na' bitw goc yejon' lao šon iz yogašjo.

<sup>18</sup> Na' yetni'a cate' bo<sub>l</sub> güiže' Diosen' gwñabde'ne' sele' yejon' da' yoble, nach Diosen' gwselen'. Na' goc coseš che bene' ca' da' yoble.

<sup>19</sup> Bene' migw, cate' to bene' lježcho ba gwlejyichje' dan' nac da' li dan' bzejni'i Diosen' chio', cheya<sub>la</sub>' gaclenchone' cont yetinjde' xto<sub>le</sub>'na'.

<sup>20</sup> Chaclaža' nezele, cate' choncho cont note'teze bene' chetinjde' xto<sub>le</sub>'na', chaclenchone' cont chosla Diosen' le' lo yi' gabil, le chezi'xene' xto<sub>le</sub>'na' la'czla' še naquen da' zan. Da' na'zen' chzoja' na'a.

## CART NECHW DAN' BZOJ POSTLW SAN PEDRO

*Pedro chzoje' cart nga che bene' ca' zjanaslas chesejnilaže' Criston'*

<sup>1</sup> Neda' Pedro naca' postlw che Jesucriston'. Na' chzoja' cart nga che le'e chejnilaže'le Jesucriston', le'e naslasle distritw ca' gan' nzi' Ponto na' Galacia na' Capadocia na' Asia na' Bitinia. Chio' chejnilaže'cho Jesucriston' naccho ca bene' zito' len yezica'chle bene' že' yežlio nga. <sup>2</sup> Con can' bsi'e xnezen' gwłalte, Xacho Diosen' gwleje' chio' cont Spiritw chen' bocoben yichjlažda'ochon' na' gwlo'on chio' lo na' Diosen'. Bene' ca' cont chzenagcho che Jesucriston' na' cont Jesucriston' zoacze' cheyone' lažda'ochon' xilaže' dan' blalj xchenen' neche chio' le'e yag cruzen'. Chnaba' soacze Diosen' gaclenchgüe' le'e na' soacze' gone' cont soa cuezle binlochgua len xbab chelen'.

*Zoacho lez šjayzoacho len Diosen'*

<sup>3</sup> Cheyala' gonxencho Diosen'. Le' naque' Xa Xancho Jesucriston', na' Xancho Jesucriston' lecze chonxene' le'. Leca cheyaše' cheži'ilaže' Diosen' chio', na' da'nan' bocobe' yichjlažda'ochon' na' bene' cont zoacho lez šjayzoacho len le', le Jesucriston' beyas bebane' ladjo bene' guat ca'. <sup>4</sup> Na' Diosen' gone' ga gac da' güen checho, to da' mbachgua da' bi yenit neca te chen, to da' ngo'ošagüe' cont gaquen checho cate' yežincho yaban'. <sup>5</sup> Na' Diosen' len yela' guac xen chen' chcuas chcue'eje' chio' len da' malen' lagüe chejnilaže'chone'. Chone' ca' šlac biņa' žin ža le'echo da' mba da' gone' gac checho caten' šjayzoacho len le'.

<sup>6</sup> Da'nan' zoachguale mbalaz la'czla' chonen byen da' zan da' chyi chzaca'le šlož güje na'a. <sup>7</sup> La'czla' da' te che oron', benachen' chosozeyen' cont chesybeje' bi da' nchixen da' bibi zaca'. Na' ca'cze zaca'lebe dan' choe' Diosen' latje chac chele, chaquen cont gwlo'ele še da' li chejnilaže'lene' cate' chac bi da' mal chele. Na' še soatezle šejnilaže'lene', leca zaca'chen clcl ca no oro. Nach cate' Jesucriston' yide' da' yoble Diosen' güe'e diža' ne' benle güen na' gone' le'e yela' bala'añ xen na' gone' soale txen len le' gan' yo'ochgua be'ni'.

<sup>8</sup> Chaquele Jesucriston' la'czla' biņa' le'elne'. Na' la'czla' bi chle'elne' na'a, chejnilaže'lene'. Da'nan' zoale mbalaz juisyw. Na' catec mbalaz zoale con bi chac gwzejni'ile bene' cayanen' chebele. <sup>9</sup> Na' da' chejnilaže'le Jesucriston', žin ža šjayzoale len Diosen'.

<sup>10-11</sup> Da' bene' ca' goso'e xtiža' Diosen' cani' gosene' yeyaše' yeži'ilaže' Diosen' chio' zoacho na'a. Spiritw che Criston' gwzoan len legaque' bzejni'in' legaque' yid Criston' yežlion' na' saca'zi'e na' yeyoža' gwlo'e Diosen' naque' bene' zaca' juisyw. Da'nan' bososedyañe' na' besyeyiljwyože' non' seļa' Diosen' gaclene' chio' na' batcan' yide'. <sup>12</sup> Na' Diosen' bzejni'ide' legaque' che da' ca' bosozoje' cont gosenezde' gaquen che chio' zoacho na'a na' gague che cuingaque'. Na' na'a Spiriton' dan' za' gan' zoa Diosen' ba benen cont gwnita' bene' goseyixjue'ede' le'e diža' güen che Criston', na' diža' güen chen' naquen lebe len dan' bosozoj da' bene' ca' goso'e xtiža' Diosen' cani'. Na' lente angl che Diosen' chesezelaže' yesejni'ide' naquen' chaclen Diosen' chio'.

*Cheyalā' gac lažda'ochon' xilaže' len yogo' da' choncho*

<sup>13</sup> Da'nan' cheyalā' soale len toze xbab na' gonle con ga zelao saque'le cont gonle can' chazlaže' Diosen'. Cheyalā' soale yebele gon Diosen' gacchgua mba chele caten' yid Jesucriston' da' yoble. <sup>14</sup> Na' da' nacle xi'in Dios cheyalā' gwzenagle che', na' bich gwzenagle che da' malen' can' gwna lažda'olen' gonle cana' cate' biņa' šejni'ile che Diosen'. <sup>15</sup> Dios nan' ba gwleje' chio' naccho xi'ine', na' le' naque' bene' laždao' xilaže'. Na' con ca nac le' bene' laždao' xilaže', lecze can' cheyalā' gaccho bene' laždao' xilaže' len yogo' da' choncho. <sup>16</sup> Le Xtiža' Diosen' nyojen žan: "Cheyalā' gacle bene' laždao' xilaže', le neda' Dios naca' bene' laždao' xilaže'."

<sup>17</sup> Chio' chol güižcho Diosen' che'chone': "Xato' Dios". Na' Diosen' chchoglagüen' che to to chio' beňach še nocho napcho doła' ca nac da' choncho, na' toz can' chone' len note'tezcho. Da'nan' cheyalā' žebcho goncho da' bi chazlaže' Diosen' šlac zoacho yežlio nga. <sup>18</sup> Nezecho Diosen' ba bebeje' chio' lo da' ca' bosozejni'i da' xozxta' ocho ca' chio' da' bibi zaca'. Na' nezecho ca nac no mechw de plata o de oro na' bichle da' ca' chesede čhen, bi goc yesyebejen chio' lo da' ca' choncho da' bibi zaca'. <sup>19</sup> San byažžen gwsela' Diosen' Criston' blalj xčhene' da' zaca'chgua. Na' le' bnežjw cuine' gote' cont bebeje' chio' lo da' ca' bibi zaca'. Na' Criston' zaca'lebe' ca to xila' dao' be bibi yižgüe' da', be bibi naqueba'. Ben' nac ca' gosot bene' Israel gualaž četon' cont bezi'xen Diosen' xtoła'gague'. <sup>20</sup> Za' xe yežlion' Diosen' gwleje' Criston' cont bnežjw cuine' neče xtoła'chon'. Na' Diosen' gwsele'ne' nga na'a ba zoa te che yežlion' cont chaclene' chio'. <sup>21</sup> Na' Criston' chone' cont zoacho chejnilaže'cho Diosen'. Na' Dios nan' bosbane' Criston' ladjo bene' guaten' na' blo'e nac Xi'ine' Criston' bene' zaca' juisyw. Nachen' zoacho chejnilaže'cho Diosen' na' zoacho lez gon Diosen' güen len chio'.

<sup>22</sup> Na' da' chaclen Spiritw che Diosen' chio', ba chzenagcho diža' li che Diosen' na' choncho can' že'. Da'nan' ba beyac lažda'ochon' xilaže', na' da'nan' do laže'cho ba chaquecho yezica'chle bene' chesejnilaže' Jesucriston'. Na' ca'cze cheyalā' goncho, cheyalā' gague lježcho do yichj do laže'cho, gague gaguechone' de diža'ze. <sup>23</sup> Xaxna' chio' zoacho yežlio nga zjanaque' bene' chesat, perw gague neče da' goljcho len legaque' naccho xi'in Dios, san naccho xi'ine' da' bocobe' yichjlažda'ochon' cate' gwyejle'cho xtižen'. Na' xtižen' zoan toli tocaņe, gague da' te čhen. <sup>24</sup> Chac can' nyojen, žan:

Yogo' beňach chesede che' ca chesede che no yixe' dao',  
na' yogo' da' chebe beňachen' yežlio nga da' chesacde' zaca'chguan,  
zaca'leben ca yej da' žia yixe'.

Chesebiž yixe' ca' na' chesecvad chesebiž yej da' zjažia yixe'.

<sup>25</sup> Perw xtiža' Diosen' zoan toli tocaņe, gague da' te čhen.

Na' xtiže' nan' diža' güen da' ba gwduxjue'eto' len le'e.

**2**

<sup>1</sup> Da'nan' cheyalā' cuejyichjcho yogo' bite'teze da' xinj da' choncho. Bi gonlaže'cho, bi goncho contze yesaque' bene' naccho bene' güen, bi xi'acho bene', bi necho diža' mal che bene'. <sup>2</sup> Na' ca bi' che'eñ dao' žan yesaže'be' xiže'gacbe', can' cheyalā' selaže'cho yenecho xtiža' Diosen', le naquen da' güenchgua, na' cate' chzenagchon chaclenen chio' cont

choncho can' cheyała' gon chio' ba de yela' mban checho toli tocañe. <sup>3</sup> Le ba chache'echo ña'a Xancho Criston' naque' bene' šagüe'.

*Criston' zaca'lebde' ca to yej squin che yo'o*

<sup>4</sup> Cheyała' gwzenagcho che Xancho Jesucriston' ben' chon chio' yela' mban toli tocañe. Bene' zan chesegue'ede' le' la'czła' Diosen' gwleje'ne' cont chaclene' chio' na' zaca'chgüe' len Diosen'. Da'nan' Jesucriston' zaca'lebde' ca to yej güen da' gwlej bene' cont gaquen yej squin ližen', perw bene' goson žinña' bi gosazlažen' na' gosebequen' šla'ale. <sup>5</sup> Na' chio' napcho yela' mban da' chejnilaže'cho Jesucriston'. Da'nan' yogo'cho txen zaca'lebcho ca yej ca' da' zjancua' zjangoden' gan' chac yo'o de yejen'. Na' zaca'lebcho ca' liž Diosen' dan' zoe' len chio'. Lecze zaca'lebcho ca bxož bene' žjanac lo na' Diosen', le naccho lo na' Diosen' na' chaclen Jesucriston' chio' cont zoaczcho chonxencho Diosen' con can' chazlaže'. <sup>6</sup> Na' Xtiža' Diosen' nyojen, žan:

Sela' to bene' ciuda Sión na' zaca'lebde' ca to yej da' zaca' da' gwlej bene' cont gaquen yej squin liže'.

Na' note'teze ben' šejnilaže' le', gwbatech yetinjde' da' gwyejnilaže'ne'.

<sup>7</sup> Nach len chio' chejnilaže'chone', Jesucriston' naque' leca bene' zaca'. San bene' bi chesejnilaže'ne', nyojczye da' nga chegaque', žan:

Yej da' bi gosaclaže' bene' güen yo'o ca' yosočhine',

len ba naquen yej squin.

<sup>8</sup> Na' lecze ca' žan:

Zaca'lebde' ca to yej da' chčhego' bene' na' ca to yej da' chgo'o ñi'e na' chjasebixe'.

Nyojen žan chesechegüe' le bi chosozenague' xtiža' Diosen'; na' Diosen' bžie' bia' yesac chegaque' ca'.

*Chio' chejnilaže'cho Diosen' naccho xi'ine'*

<sup>9</sup> Na' chio', Diosen' ba gwleje' chio' cont chejnilaže'chone'. Na' len Diosen' naccho ca rey na' ca bxož. Gwleje' chio' cont naccho nación che', na' nactecho diaža' che', le chaclaže' chixjue'echo catec da' güen juisyw chone'. Le'na' bebeje' chio' lo da' malen' bencho na' gwlo'e be'ni' xen chen' lo' yichjlažda'ochon' cont soacho goncho da' güen. <sup>10</sup> Cana' le'e bi gwyejnilaže'le Diosen' na' bi gogle nación che', perw ña'a ba nacle nación che'. Cana' biña' yeyaše'de' le'e, san ña'a Diosen' ba beyaše' beži'ilaže'de' le'e.

*Cheyała' goncho can' chazlaže' Diosen'*

<sup>11</sup> Chacda' le'e bene' migw, na' chñeyoeda' le'e le gon xbab le yežlio nga bi naquen laže. Da'nan' bitw gonle bite'teze da' xinj da' žan gonle len cuerp chelen', le še gonlen, gwžonen soa yichjlažda'olen' binlo len Diosen'. <sup>12</sup> Le soa le gon da' güen cont bene' ca' bi chesejnilaže' Diosen' yesele'ede' da' güen da' chonle, na' la'czła' ña'a chesezi'diže' le'e chesene' chonle clele, žin ža yesele'ede' chonle da' güen na' yesonxene' Diosen' cate' žin ža chogbi'en nac gac che to toe'.

<sup>13</sup> Da' chejnilaže'le Xancho Criston', le gwzenag che yogo' bene' ba bosozoa benachen' cont yesenabi'e le'e. Le gwzenag che rey ben' chnabia' doxen gan' zoachon', <sup>14</sup> na' lecze le gwzenag che bene' gwnabia' ca' chsela' reyen'. Le nac lo na'gaque' yesone' castigw che bene' ca' cheson da' xinj na' yesonxene' bene' cheson can' cheyała' yesone'. <sup>15</sup> Diosen'



chaclaže' goncho da' güen cont bene' ca' bi chesejni'i che', ben' zjanchoł yichjlažda'ogaque', bi žel diža' da' yesene' yosocuiše' chio'.

<sup>16</sup> Cheyała' soa cuezcho mbalaz da' bich yo'ocho lo na' gwxiyen', perw bi goncho xbab guacte goncho bi da' xinj. San cheyała' soa cuezcho mbalaz da' yo'ocho lo na' Diosen', na' yo'ocho lo ne'en cont goncho con dan' chazlaže' goncho. <sup>17</sup> Cheyała' gapcho bala'an yogo'lol bene'. Na' cheyała' gaque bene' lježcho bene' chesonxene' Jesucriston'. Cheyała' žebcho goncho da' bi chazlaže' Diosen'. Na' cheyała' gapcho bene' gwnabia' chechon' bala'an.

*Criston' byo bcheje' dan' gwxaca'zi'ena'*

<sup>18</sup> Le'e chonle žin che bene', le gwzenag che xan žin chele da' chaple legaue' bala'an. Gague tloaze gwzenagle che xan žin chelen' še zjanaue' bene' šagüe' bene' yo'o xbab, san lece le gwzenag chegaue' še zjanaue' bene' znia. <sup>19</sup> Še bibi da' mal nonle na' bia'cze chosoči chososaue' le'e, chebe Diosen' chyo chchejle len da' chesonde' le'e lagüe nezele chaclaže' Diosen' goncho ca'. <sup>20</sup> Perw bibi zacan' še ba benle bi da' xinj na' chyo chchejle cate' chesebaže' le'e. San še chosoči chososaue' le'e cate' chonle da' güen na' chyo chchejle len da' chesonde' le'e, nachle chebe Diosen' le'e. <sup>21</sup> Le Diosen' gwleje' chio' cont gwyo gwchejcho len bi da' yosoči yososaca' bene' chio', na' Criston' gwxaca'zi'e neche chio' na' byo bchejde' len da' goc che' cont nezecho ca'czen' cheyała' goncho. <sup>22</sup> Bibi da' xinj ben Criston', ne to diža' güenlaže' bi be'e. <sup>23</sup> Cate' gosezi'diža' bene' le', bi boži'e dižan' nac ca' len legaue'. Na' cate' bosochi bososaue'ne', bi gwne' yebi'e mal len legaue'. Ben cuine' lo na' Diosen', le gwnezde' Diosen' chogbi'en yesezaca'zi' bene' ca' con can' cheyała' gac chegaue'. <sup>24</sup> Criston' bnežjw cuine' neche xtoła'chon' cate' gosote'ne' le'e yag cruzen'. Da'n'an' cheyała' cueyichjcho da' xinjen' choncho na' soacho goncho da' güen. Gwxaca'zi'e cont bozoe' chio' binlo. <sup>25</sup> Goccho ca xila' be gosaczeje, perw na'a ba nacho ca be yo'o lo na' xamba' cont chyoeba', le Criston' chgüia chne' chio' na' yo'o lo ne'e lažda'ochon' chcuas chcue'ejen' len da' malen'.

### 3

*Can' cheyała' yeson bene' zjanšagna'*

<sup>1</sup> Na' lece le'e no'ole nšagna'le, to tole cheyała' gwzenagle che bene' chele. Bale' bina' yosozenague' xtiža' Diosen', na' še gwzenagle chegaue', yesacbe'ede' xtiža' Diosen' naquen da' güen la'czla' bibi ye'ln'e'. Na' yosozenague' che Diosen' <sup>2</sup> cate' yesele'ede' chaple legaue' bala'an na' chi' yichjle soa cuezle cont lažda'olen' gaquen xilaže' len Diosen'. <sup>3</sup> Na' le'e no'ole, bi nacho naquen da' žialao gon cuinle xdan yopa'a no yichjle, gwguala' yenle no bga', gwguala'le no ret, co'ole no niy de oro, na' chazle lache' šagüe'. <sup>4</sup> Dan' nac da' žialao, gac lažda'olen' güen, la'czla' nono chle'e len. Zaca'chguan len Diosen' gaccho bene' nexjwlaže' na' bene' xenlaže', le bi te che yichjlažda'ochon'. <sup>5</sup> Gosenita' no'ole cani' no'olen' gosejnilaže' Diosen' na' goson cuine' lo ne'e. Legaue' gosaue' bene' nexjwlaže' na' bene' xenlaže' na' bosozexjwyichje' cont gosone' bin' gwna bene' che to toe'. <sup>6</sup> Da' Sara, no'ol che da' xozxta'oto' Abrahamna', gwzoe' bzenague' che bene' che' na' gože'ne': "Xana". Na' le'e še soatezle gonle da' güen na' bi žeble, nach yesena bene' nacle xi'in da' Saran' lagüe chonle can' benen'.

7 Na' le'e bene' byo nšagna'le, ľecze cheyaľa' gacle bene' šagüe' len no'ol chele na' gaplene' bala'aň, ľe bi zjanaque' bene' gual can' nac chio' bene' byo. Na' ľecze can' ba nži'ilaže' Diosen' chio' na' none' chio' yela' mban toli tocaňe, ca'tezeigen' ba none' len ľegaque'. Nachen' cheyaľa' goncho güen len ľegaque' cont bibi gwžon gwzenag Diosen' checho cate' chol güižchone'.

*Can' goncho še yosochi yososaca' bene' chio' la'czľa' choncho da' güen*

8 Yogo'cho cheyaľa' goncho toze xbab na' cheyaľa' yeyaše'cho ľo' lažda'ochon' še bi da' chac che bene' ľježcho. Cheyaľa' gague ľježcho do laže'cho ca bene' biše' ľježcho, na' cheyaľa' gaccho bene' šagüe' len bene' ľježcho na' bi gon cuincho bene' xen. 9 Še bi da' mal cheson bene' len chio', bi načo ľecze da' mal yebi'icho len ľegaque'. Na' še bene' chesezi'diže' chio', bitw yoži'icho dižan' nac ca' len ľegaque', san načo gac da' güen čhegaque'. Ľe Diosen' ba gwleje' chio' cont goncho ca' na' cont gone' latje soacho mbalaz. 10 Goncho ca' ľe nyojen, žan:

Bene' chaclaže' soa cueze' mbalaz,  
cheyaľa' gwsaque' bich güe'e bite'teze diža' mal,  
na' gwsaque' bich güe'e bite'teze diža' güenlaže'.

11 Cheyaľa' cuejyichje' yogo' da' mal na' gone' da' güen.

Cheyaľa' cuec yichje' gone' con ga zelao saque'de' cont soe' binľo len bene' ľježe'.

12 Ľe Xancho Diosen' chgüia chňe'e bene' ca' cheson da' zej to ľicha, na' chzenague' čhegaque' cate' chosoľ güiže'ne'.

San bene' ca' cheson da' xinj, Diosen' ngüie' gone' cont yesezaca'zi'e.

13 Na' nono zoa no gone chio' mal še zoatezcho choncho da' güen do yichj do laže'cho. 14 Na' la'czľa' še tgüej cate' yosochi yososaca' bene' chio' lagüe choncho da' zej to ľicha, Diosen' gone' soacho mbalaz. Na' bi cheyaľa' žebcho bene', neca gacžejlaže'cho. 15 San cheyaľa' gonxencho Criston' ľo' lažda'ochon', ľe naque' Xancho. Na' bate'teze cheyaľa' soacho probnidw cont yoži'icho xtiža' bene' še yeseňabde' chio' bixčen' zoa-cho lez šjayzoacho len Diosen' toli tocaňe. Na' cheyaľa' gapcho ľegaque' bala'aň na' güe'lenchone' diža' šagüe'. 16 Tža tža cheyaľa' goncho cont nezecho ľo' yichjlažda'ocho bibi doľa' napcho len Diosen'; nachen' cate' yesezi'diže' chio' da' chejniłaže'cho Criston', yesacbe'ede' ľe choncho güen na' yesacde' zto'. 17 Yejni'a saca'zi'cho neče choncho da' güen, še can' chaclaže' Diosen' gac checho, clal ca saca'zi'cho neče choncho da' xinj.

18 Ľe Criston' ľecze gwdi gwxaque'. Ľa'czľa' gwyejczje' to ľicha len Diosen', bnežjw cuine' gote' neče xtola' beňach tni'aze, na' da' bene' ca' zaca'czen' toli tocaňe. Gote' cont ba bozoe' chio' binľo len Diosen'. Perw la'czľa' gosote'ne', beyas bebane' ladjo bene' guaten', dan' ne' zoa spiritw čen'.

19 Na' len Spiritw čen' gwyeje' jatixjue'ede' xtiža' Diosen' len bene' ca' ba zjanyeyw gan' yesezaca'zi'e toli tocaňe. 20 Ľegaque' bi bosozenague' čhe Diosen' ža gwłaste, la'czľa' gwđape' yela' chxenlaže' len ľegaque', gwleze' yosozenague' šlac da' Noén' bene' to barcw xen. Na' to čopga bene' goso'ľo' barcon' na' bi gosebiaye'e ľo' nisen', con xono'gue' besyela.

21 Na' dan' goc ca' cani' zaca'leben can' ba gwzoacho nisen' lagüe dan' ba de yela' mban checho toli tocaňe. Na' gague gwzoacho nisen' cont beyaccho xilaže' len cuerp chechon', san gwňabecho Diosen' beyone' lažda'ochon' xilaže' cont nezecho bibi doľa' napcho. Na' ba nac lažda'ochon' xilaže' na'a lagüe beban Jesucriston' ladjo bene' guaten'. 22 Na' na'a Jesucriston' ba beyepe' yaban' gan' chnabi'e txen len Diosen', na' chosozexjw

yichj yogo' angl na' yogo' nochle no nape yela' chnabia' chosozenague' che'.

## 4

### *Diosen' none' da' gon to tocho cont chaclen lježcho*

<sup>1</sup> Criston' goque' bene' bela' chen na' gwxcaca'zi'e yežlio nga, da'nan' chio' cheyala' gonchachlaže'cho bi gacžejlaže'cho cate' saca'zi'cho. Goncho ca', le cate' ba gwzaca'zi'cho chaclenen bich chzenagcho che da' malen'. <sup>2</sup> Na' še bi chzenagcho che da' malen' šlac ne' mbancho, nach soa cuezcho bi goncho da' mal da' žan gon chio' benač, san soa cuezcho goncho con can' chazlaže' Diosen'. <sup>3</sup> Cana' gwzoale benle con can' cheson bene' bi chesejnilaže' Diosen'. Benle da' nac yela' zto', benle bite'teze da' mal da' gwzelaže' lažda'olen', gwzožele, benle no žaš len lni chelen' na' güe'ejchgual, na' gwwejnilaže'le l gua'a lsaca' da' ca' gwna Diosen' bi cheyala' šejnilaže'chon. <sup>4</sup> Na' bene' ca' ne' cheson ca' chesyebande' bich chonle txen len legaque' can' chesaše' chosožiyi' cuingaque', nach chesezi'diže' le'e. <sup>5</sup> Perw žin ža cate' Diosen' nabyožde' legaque' che yogo'lol da' ba gosone', Dios ben' chbeze' chogbi'en nac gac che bene' zjamban len bene' ca' ba gosat. <sup>6</sup> Le da'nan' gwsele' bene' goseyixjue'ede' diža' güen che' len bene' ba gosat can' goseyixjue'eden' len chio'. Diosen' goclaže' yesenite' mbalaz toli tocaņe' can' zoa le', la'czla' nchoglagüen' de yela' got che yogo' benač yežlio nga.

<sup>7</sup> Ba zoa te che yežlion'. Da'nan' cheyala' soacho len toze xbab na' goncho byen goncho can' chazlaže' Diosen' cont bibi gwžon soacho yol güižchone'. <sup>8</sup> Na' da' nac da' žialaoch, cheyala' gaque lježcho do yichj do laže'cho, le cate' chaque lježcho chezi'xencho chegaque' bite'teze da' chesonde' chio'. <sup>9</sup> Na' cheyala' gwlebcho bene' lježcho cate' yeside' ližchon' sin cbi bixjwcho. <sup>10</sup> Con can' ba goclen Diosen' to tocho da' none' chio' grasyw che bi da' chac choncho, can' cheyala' gaclen lježcho len dan' choncho. Cheyala' gwčhincho bite'teze grasyw da' non' Diosen' chio' con can' chaclaže' gwčhinchon, le nža' nža'te da' none' che to tocho choncho. <sup>11</sup> Še Diosen' ba none' checho chixjue'echo xtižen', le xtiže' na'žen' cheyala' chixjue'echo. Na' še ba none' checho gaclencho bene', cheyala' gaclenchone' do yichj do laže'cho, le Diosen' chone' cont chac chaclenchone'. Cate' bi da' goncho, gonchon ca gacxen Diosen' da' gwsele' Jesucriston' len chio'. Zaca'cze' gonxenchone' toli tocaņe' na' zaca'cze' nabi'e toli tocaņe. Can' gacšca.

### *Guata' da' saca'zi' chio' chejnilaže'cho Criston'*

<sup>12</sup> Chacda' le'e bene' migw, na' chaclaža' bi yebanele can' chac chelen' chosoči chososaca'chgua bene' le'e. Bi naquen da' yebanele, san gwlo'en še da' li chejnilaže'le Diosen'. <sup>13</sup> Cheyala' yebele caten' chzaca'zi'le da' chejnilaže'le Criston', le chac chele can' goc che Criston' caten' gwxcaca'zi'e. Le yebe caten' chzaca'zi'le cont lecze yebele na' soale mbalaz cate' žin ža le'ele yid Criston' ben' nac bene' zaca' juisyw. <sup>14</sup> Mbalaz chac chele na'a cate' chesezi'diža' bene' le'e da' chejnilaže'le Criston', le Spiritw che Dios ben' nac bene' zaca' juisyw zoan chaclenen le'e. Bene' ca' chosoči chosoaque' le'e chesene' mal che Criston', san le'e chonxenle'. <sup>15</sup> Na' še saca'zi'le, yejni'a gaquen neche chonle da' güen, gague neche da' betwle bene' o gwlanle da' de che bene' o benle

bichle da' xinj o blaže' chele len bi da' chac che bene'. <sup>16</sup> Le še saca'zi'le neče chejnilaže'le Criston', bi cheyala' gaquele zto' can' chac chele, san cheyala' gonxenle Diosen' da' ba chejnilaže'lnē'.

<sup>17</sup> Ba bžin ža Diosen' ba chone' cont chyi chzaca' chio' naccho xi'ine' neče bi da' xinj da' choncho. Na' dan' chone' ca' zgua'tec len chio' naccho ca bene' lo' yo'o che', nezecho leca gwnežjwche' da' yesezaca'zi' bene' ca' bi chosozenag diža' güen chen'. <sup>18</sup> Na' ca nac bene' zja'ac to licha, nachguaze yesyele' bi yesezaca'zi'e toli tocanē, nach bene' bi chesejnilaže' Diosen' na' chesonteze' da' xinj, gague bi de da' yosla legaque'. <sup>19</sup> Da'nan' cate' chsi' Diosen' xnezen' chyi chzaca'cho, cheyala' soacho gonczcho da' güen na' gon cuincho lo na' Diosen', le len' bene' chio' beñač na' zoacze' chaclene' chio'.

## 5

### *Can' cheyala' gon chio' chejnilaže'cho Criston'*

<sup>1</sup> Na'achen' de da' nia' le'e nchojle cont chgüia chña' ljež le'e chejnilaže'le Criston'. Neda' lecze nchoja' chona' ca'. Ble'eda' gwxaca'zi' Criston' na' choe'lena' bene' diža' can' goquen', na' lecze nezda' žin ža šjayzoa' len le' gan' yo'ochgua be'ni' ca le'e šjayzoalen'ne'. <sup>2</sup> Le güia na' bene' ba gwlo'o Diosen' lo na'le güia na'le, ca no xan xila' chgüia chne'e xila' che' ca'. Le gonen do yichj do laže'le can' chazlaže' Diosen', gague gonlen žan ca žan, nēca gonlen cont gonle gan mechw, san le yebe gonlen. <sup>3</sup> Na' ca nac bene' ca' güia na'le, bi gonle znia cont yosozenague' chele, san soatezle gonle da' chazlaže' Diosen' cont yesele'ede' can' chonlen', na' yesacbe'ede' lecze can' cheyala' yeson legaque'. <sup>4</sup> Xancho Jesucriston' zaca'lebde' ca to bene' güeyoe' xila' bene' chnabi'e nochle güeyoe' xila'. Na' cate' yide' da' yoble, cana'ch gone' soale mbalaz juisyw še ba benle xšin Diosen' can' cheyala', na' gague da' te che yela' zoa mbalaz chelen' ca chde che no premio da' chesone' yežlio nga.

<sup>5</sup> Nach lecze ca' le'e bene' xcuide', cheyala' gwzexjw yichjle gwzenagle che bene' ca' ba zjanchoj ben' chosogüia chosone'e le'e. Na' yogo'le le gwzexjw yichjle cont gwzenag che lježle, le:

Diosen' chdillene' bene' zjanac ya'laže',  
san chaclene' bene' chosozexjwlaže' lagüen'.

<sup>6</sup> Cheyala' gwzexjw yichjcho gwzenagcho che Dios ben' nape yela' guac xen, cont žin ža gone' ga gacxencho. <sup>7</sup> Na' cheyala' gwcua'a'ncho yogo'lol da' chi' yichjcho chen lo na' Diosen', le len' chgüia chne'e chio'.

<sup>8</sup> Cheyala' goncho byen goncho da' nac da' zaca', na' cheyala' gwsaca'cho cont Satanás dan' chnabia' da' xigüe' ca' bi co'on chio' to lo nez mal, le chgue'en chio' na' cheyiljwlažen' nac gonen gwžiyain' chio', ca to bež znia chosya'aba' chdaba' chiyiljwba' be gagwba'. <sup>9</sup> Cheyala' soačhačcho bi gwzenagcho che Satanásen' na' soačhačcho šejnilaže'cho Jesucriston', le nezecho bene' lježcho ca' chesejnilaže'ne' gate'tezechle lo yežlion' lecze chesezaca'zi'e can' chac che chio'. <sup>10</sup> Perw cate' ba gwde da' chyi chzaca'cho šlož dao' na'a, cuin Diosen' gone' cont gacch yichjlažda'ochon' can' chazlažen', cont šejnilaže'chchone', cont soecho gonchcho can' chnalažen', na' cont soacho len toze xbab. Dios na' nži'ilaže'de' chio' na' chaclene' chio' bite'teze da' chac checho, na' ba gwleje' chio' chejnilaže'cho Criston' cont šjayzoacho txen len le' gan'

yo'ochgua be'ni'. <sup>11</sup> Cheyała' soacho gonxenchone' toli tocaṇe da' naque' beṇe' zaca' juisyw, na' ṇabia'che' ca note'tezechle. Can' gonščaczcho.

*Pedron' chguape' tiox bene' ca' yosolab carten'*

<sup>12</sup> Beṇe' migw checho Silvano, ben' chacda', zoateze' chone' can' cheyała' gone', na' ba bzoje' xtiža' le'e cart dao' nga. Na' le'e cart nga chṇeyoeda' le'e soaczle gonle da' güen na' chzejni'ida' le'e Diosen' ba goclene' le'e cont ṇezele da' li nži'ilaže'chgüede' le'e. Da'nan' cheyała' soaczle šejnilaže'lnē'.

<sup>13</sup> Beṇe' ca' ba gwlej Diosen' cont chesedop chesežague' chesonxene' Jesucriston' lo ciuda Roma nga chosoguape' le'e tiox, ciudan' da' nsi'a Babilonia. Na' lecze Marcos ben' nona' ca xi'ina' chguape' le'e tiox. <sup>14</sup> Cate' chdop chžagle txen le gwnopa' na' lježle cate' gwguap lježle tiox cont gacbia' chaque lježle.

Na' chṇaba' yogo'le chejnilaže'le Criston' soa cuezle binlo len xbab da' yo'o lo' yichjlažda'olen'. Da' na'zen' chnia'.

## CART GWCHOPE DAN' BZOJ POSTLW SAN PEDRO

*Pedron' bzoje' cart nga che bene' chesonxen Jesucriston'*

<sup>1</sup> Neda' Simón Pedro chona' xšin Jesucriston', na' len' gwsele' neda' naca' postlw che'. Chzoja' le'e ba chejnilaže'le Jesucriston' can' chon neto'. Jesucriston' naque' Dios ben' chonxencho na' none' yela' mban checho toli tocanē le zejzce' to licha. Na' da' zaca'chguan chejnilaže'chone'.

<sup>2</sup> Chnaba' gaclenchgua Diosen' le'e na' gone' cont leca soa cuezle binlo len xbab chelen' lagüe nombia'lne' na' nombia'le Jesús ben' nac Xanchon'.

*Can' cheyala' gon chio' chejnilaže'cho Jesucriston'*

<sup>3</sup> Dan' nap Diosen' yela' guac xennan', ba none' chio' yogo' da' chyažjecho cont de yela' mban checho toli tocanē na' cont goncho can' chazlažen'. None' chio' da' ca' lagüe nombia'cho Criston', na' Criston' ben' gwleje' chio' naque' bene' zaca' na' bene' šagüe'. <sup>4</sup> Na' da' naque' bene' zaca' bene' šagüe', da'nan' ba gwne' gaclene' chio' na' gone' da' güen juisyw len chio'. Na' zaca'chguan da' gwne' ca', le da' chaclene' chio' can' gwne', da'nan' yichjlažda'ochon' chesyeyaquen güen can' nac yichjlažda'ogüen', na' chac chbejyichjcho da' mal da' chžiyin' bene' bi chesejnilaže' Diosen', lagüe chesone' con ca' žan chegaque'. <sup>5</sup> Na' da'nan' chio' chejnilaže'cho Jesucriston' cheyala' goncho con ga zelao saque'cho cont gonchcho da' güen, na' cont šejni'ichcho. <sup>6</sup> Na' cheyala' goncho con ga zelao saque'cho cont bi nabia' da' malen' chio'. Cheyala' soachachcho šejnilaže'cho Diosen' caten' chyi chzaca'cho, na' cheyala' soaczcho gonxenchone'. <sup>7</sup> Na' cheyala' ži'icho bene' lježcho ben' chesejnilaže' Jesucriston', na' lecze cheyala' gaquecho yogo'ze bene'. <sup>8</sup> Le še zejcho chonchguacho yogo' da' ca', nachen' gaccho can' cheyala' gac chio' nombia'cho Xancho Jesucriston', na' xšinen' da' goncho chojen güen. <sup>9</sup> Na' note'tez bene' bi chon da' ca' ba gwnia' cheyala' goncho, nchol yichjlažda'ogüe' na' bina' šejni'šagüe'de' can' cheyala' gone'. Chlo'en ba gonlaže' ba beya' beyib Diosen' lažda'ogüe' len da' xinjen' bene' cana'. <sup>10</sup> Da'nan' bene' migw, cheyala' gonchcho con ga zelao saque'cho cont nezecho da' li ba gwlej Diosen' chio' cont šejnilaže'chone' na' ba bsi'e xnezen' gwque'e chio' ca' xi'ine'. Na' še goncho ca', gwbat cuiayi'cho, <sup>11</sup> na' mbalazchgua gwleb Diosen' chio' cate' šjayzoacho len Xancho Jesucriston' gan' chnabi'e toli tocanē, Jesucristw ben' none' yela' mban checho toli tocanē.

<sup>12</sup> Da'nan' ba gwchoglaža' yogo' ni'a güe'lena' le'e diža' che da' ca' ba gwnia' le'e cont šjayze'ele, la'czla' ba nezele can' gwnian' na' zoachachle chejnilaže'le diža' li che Diosen' dan' nombia'le. <sup>13</sup> Nan' chacda' šlac ne' mbana' cheyala' gona' cont šjayze'elen. <sup>14</sup> Le nezda' yob žin ža gata', con can' ba bzejni'i Xancho Jesucriston' neda'. <sup>15</sup> Da'nan' gona' con ga zelao saque'da' cont šjayze'ele can' gwnia' che da' quinga cate' ba gota'.

*Postlw ca' besele'ede' cate' Diosen' blo'ede'yela' zaca' che Criston'*

<sup>16</sup> Ca' nac da' bzejni'ito' le'e che yela' guac che Xancho Jesucriston' na' che dan' yide' da' yoble, bi nacho naquen diža' da' goljlaže' neto' postlw, le ble'eto' len yejlaoto' cate' Diosen' blo'e yela' zaca' che Jesucriston'.

17 Ble'eto'ne' cate' Xacho Diosen' bnežjue'ne' yela' bala'an xen na' cate' Dios ben' nac bene' zaca' juisyw bene' cont gwyechje' be'ni' juisyw na' gože'ne': "Benga Xi'ina' ben' chacda' na' chbe chezaquelaže'chgüeda' che'." 18 Neto' beneto' can' gwna Dios ben' zoa yaba be'e diža' che', le gwzoato' lo ya'ana' len Xancho Jesucriston' caten' goc ca', ya'a dan' gwlej Diosen' cont goc ca' lagüen.

19 Napcho Xtiža' Diosen' dan' bosozoj bene' ca' goso'e xtižen' cani' na' nezecho naquen da' li. Na' güen gonle še gwzenagle che dan' bosozojen', le gwswenin' lo' yichjlažda'olen' ca to yi' da' chseni' ga nac chol. Bi cheyała' yeche'echo gwzenagcho chen tža tža šlac žin ža yid Criston' da' yoble na' co'ochē' be'ni' chen' lo' yichjlažda'ochon'. Na' dan' yide'na' zaca'leben ca dan' chla' beljw xsilen' cate' cheni'. 20 Na' naquen da' žialao xen šejni'icho da' nga: diža' dan' bosozoj bene' ca' goso'e xtiža' Diosen' cani', ne tozen bi gac šejni'ichon to gualazcho, 21 le ne toz da' ca' bosozoje' bi zan' che xbab chegacze'. San bene' gosaque' lo na' Diosen' gosenie' dan' gož Spiritw che Diosen' legaque' na' bosozojen'.

## 2

### *Bene' ca' chosozejni'ide' xtiža' Diosen' clele*

1 Cani' lecze besechoj bal' bene' gualaž cheto' bene' gosonlaže' gosene' cheseyixjue'ede' xtiža' Diosen', na' ca'czen' yesenita' bene' yosozejni'ide' le'e diža' güenlaže' gwxe güižj. Na' yeseyljwlaže' nacle yesone' cont yosozejni'ide' le'e diža' güenlaže' da' gwžiyain' le'e sin cbi gacbe'ele. Yosozoe' Xancho Jesucriston' to šla'ale, ben' bnežjw cuine' cont gata' yela' mban checho toli tocanē. Perw žin ža yesebiaye'e yalzelaže'. 2 Bene' zan yosozenague' chegaque' na' yesone' da' xinj dan' nac da' yela' zto' can' yeson legaque'. Na' neche yesone' ca', yesenita' bene' yesene' bibi zaca' diža' güen che Diosen' da' chlo'en chio' dogualje nez güenna'. 3 Na' bene' güenlaže' ca' yesezelaže' yeseque'e xmechwle. Da'n'an' yosozejni'ide' le'e diža' da' yesaljlaže' cont gwnežjwle legaque' mechw. Perw cani'te Diosen' ba nžie' bia' yesebiaye'e.

4 Nezecho Diosen' bi bezi'xene' che angl ca' cate' gosone' da' xinj, san gwsele' legaque' lo yi' gabilen' gan' nac leca chol, na' zjanite' zjancheje' gden šlac žin ža gone' yezezaca'zi'e toli tocanē. 5 Neca bezi'xen Diosen' che bene' ca' že' lo yežlion' bene' bi bosozenag che' caten' gwzoo da' Noé. Gwsele' yejw sio' juisyw da' bžiyain' legaque'. Na' Noen' gwzoe' gwduxjue'ede' can' cheyała' yesone' da' zej to licha. Da'n'an' Diosen' bosle' le' len yegaže bene' lježe'. 6 Na' Diosen' lecze bechoglaže' bžiyai'tecze' ciuda Sodoma len ciuda Gomorra cani' yela' güen da' xinj che bene' ca' že'na'. Bzeye' ciuda ca' na' yešinga de bega'an. Na' bene' ca' cont chosnisdē' bene' za' za'ac gwnežjue' castigw chegaque' še bi yosozenague' che'. 7 Na' cate' Diosen' bžiyae'e ciuda ca', bosle' ben' le Lot ben' goc bene' güen len le', le Loten' gocchgüede' zi' lo' lažda'ogüe' che da' yela' zto' goson bene' mal ca' že' ciuda ca'. 8 Loten' goque' bene' güen na' bžaglagüe' lo' lažda'ogüe' tža tža ble'ede' goson bene' ca' da' bi cheyała' yesone' na' bende' diža' che da' malen' gosone'. 9 Can' naquen, Xancho Diosen' nezde' nac gone' yosle' chio' chejnlaže'chone' lao da' ca' yesonen' cuejyichjchone', na' nezde' nac gone' cont bene' ca' bi zjanac bene' güen len le' yesenite' yesezaca'zi'e na'a na' cate'ch žin ža chogbi'en yesezaca'zi'e toli tocanē.

<sup>10</sup> Diosen' gwnežjwchgüe' da' yesezaca'zi' beñe' ca' chesonteze' da' yela' zto' can' chesezelaže' lažda'ogaquen' yesone' len cuerp čhegaquen'. Beñe' ca' bi chesape' Xancho Diosen' bala'an cont yosozenague' čhe'. Bitw chesežebe' chesone' con bi žan čhegaque', na' neca chesežebe' chesezi'diže' no angl beñe' zaca' na' no da' xigüe'. <sup>11</sup> San ca nac angl čhe Diosen', zjanaque' beñe' gualch ca chio' beñač na' zjanapche' yela' chnabia' xench ca chio', perw legaque' bi cheseyaxjde' yesezi'diže' no beñe' zaca' na' no da' xigüe', san cheso'e diža' šagüe' chosocuiše' beñe' ca' na' len no da' xigüe' lao Xancho Diosen'.

<sup>12</sup> Beñe' ca' chosozejni'ide' diža' güenlažen', chesezi'diže' da' ca' bi chesejni'ide'. Zjanaque' ca beyixe' be bi chesejni'i. Le beyixen' con nsi' Diosen' xnezen' chesaljšba' na' chesenita'ba' cont yesezen beñačen' legacba' na' yesote'ba'. Na' ca'cze yesebiayi' beñe' ca' chosozejni'i diža' güenlažen', <sup>13</sup> yesezaca'zi'e da' chosoči chososaque' beñe' yoble. Chesa-zlaže' chesaše' chese'ej chesagw˘atteze' tža tža. Na' cate' chesedobe' txen len le'e cont che'ej chagwle, bi chesacde' zto' da' chesezožde' na' chesagw˘ate' catec chziye' da' malen' legaque'. Da'n'an' zjazacalebde' ca to da' bzigüe' da' dope to lo lache' šiš o ca to yiž xen da' žia cho' alao beñe'.

<sup>14</sup> Bate'teze chesele'ede' no'ole, chesezelaže' yesata'lenteze' legaque', na' bi chjasexaque'de' len da' xinjen' chesonen'. Chese'go'oyele' beñe' biña' yesenita'čache' len Jesucriston' cont yesone' da' xinjen' txen len legaque'. Beñe' ca' chosozejni'i diža' güenlažen' ba zjayolagüe' chesezelaže' bi de čhe beñe'. Diosen' leca chgue'ede' yogo' da' chesone'. <sup>15</sup> Le ba gosebejyichje' xnez Diosen' da' zej to licha. Na' ba goseque'e nez malen' can' ben da' Balaam ben' be' xtiža' Diosen' cani', ben' nac xi'in da' Beor. Balaanna' gwzelaže' yeseyixjue'ne' len mechw cont nabe' gac da' mal čhe beñe' Israel. <sup>16</sup> Na' Diosen' bene' cont xpurren' be bi chac chneba' gw˘neczba' ca to beñač na' gwdilba' le' čhe yela' tont čhen', gožba' le' cueze' bich gone' da' xinjen' nac ca'.

<sup>17</sup> Beñe' ca' chosozejni'ide' diža' güenlažen' zjazacalebde' ca bej gan' bibi nis žia na' ca bejw da' nžiga' to be' gual. Ba nchoglaon čhegaque' yesezaca'zi'e gabil toli tocañe ga nacchgua čol. <sup>18</sup> Le chesoe'chgüe' diža' chesonxen cuingaque' na' chese'go'oyele' beñe' za' besyechoj lo da' xinjen' cont da' yoble yesonteze' da' yela' zto' da' chesezelaže' yesone' len cuerp čhegaquen' can' chesoncze beñe' ca'. <sup>19</sup> Beñe' ca' chosozejni'ide' diža' güenlaže' chese'e legaque' guac yesenite' mbalaz yesone' bite'ze žan čhegaque', la'czla' zjanaque' ca to esclavo len da' nac da' yela' zto'. Le note'tezcho naccho ca to esclavo len da' xinjen' cate' choncho con can' žan goncho. <sup>20</sup> Na' beñe' ba zjanombi'e Xancho Jesucriston' ben' none' yela' mban čecho toli tocañe, ba besyechoje' lo' da' xinj ca' dan' nac da' yela' zto' dan' gosone' cate' biña' yesombi'ene', na' še soe da' xinjen' legaque' na' da' yoble yeso'e latje nabian' legaque' cont yesončen', da' malch gac čhegaque' clcl ca caten' biña' yesyechoje' lo da' xinjen' da' nechua'. <sup>21</sup> Jejni'a šaca' bi gosombi'e xnez Diosen' da' zej to licha clcl ca gosebejyichje' nez güen da' nžia bia' Diosen' šejlencho. <sup>22</sup> Ba goc čhegaque' can' ža to diža' li žan: "Beco'na' cheyagwba' dan' ba beyebba' na' cošen' cate' bač bguazjchoba' cheyo'oba' lo gonan' da' yoble."

### 3

*Yid Jesucriston' da' yoble*



<sup>1</sup> Beñe' migw chia', chacda' le'e, na' da' nga naquen cart gwchope da' chzoja' le'e. Na' ba bzoja' chopten da' chaclaža' gonle xbab che diža' güen da' ba nombia'le. <sup>2</sup> Le šjayze'e diža' da' bosozoj beñe' ca' gosac lo na' Diosen' ben' gos'o e xtižen' can'i. Na' lecze le šjayze'e dan' nžia bia' Xancho Jesucriston' goncho, Jesucristw ben' none' yela' mban checho toli tocañe. Lenña' diža' da' ba bzejni'i neto' postlw le'e.

<sup>3</sup> Naquen da' žialao šejni'ile da' nga. Na'a ba zoa te che yežlion', na' yesechoj beñe' yesonle' che xtiža' Diosen' na' yesenite' yesone' con can' ža xbab mal chegaquen'. <sup>4</sup> Na' yesonle' che Diosen' yesene': "žBatxen' gac can' gwna Diosen' yid Criston' da' yoble? Bi naquen da' šejle'cho, le toz can' chac ža na'aža lecze can' goc cate' gwnita' da' xozxta' ocho ca', na' lecze ca'czen' goc caten' gwxe yežlion'." <sup>5</sup> Beñe' chesena ca' bi chesaclaže' yesone' xbab can' ba ben Diosen'. Caten' gwxe yaban' na' yežlion', con gwne' yesaquen na' goc can' gwnen'. Gocxe yežlion' lao nisdao' da' nyechj mbi'in doxen, na' bchine' nisen' cate' benen'. <sup>6</sup> Nach bžin ža cate' da' ca' bene' bžiaye'en len yejw sio' juisyw da' goc cate' bexoa nisen' lo yežlion'. <sup>7</sup> Na' Diosen' lecze ba bžie' bia' yaban' na' yežlion' ne' zjanitan' can' zjanaquen na'a cate' žin ža gac juisyw. Cana' yeseyen cate' gone' yesezaca'zi' beñe' mal ca' toli tocañe.

<sup>8</sup> Na' le'e beñe' migw chia', chacda' le'e, na' che'nda' bi ganlaže'le da' nga, len Xancho Diosen' toz ca' nac to ža o to mil iz, bi naquen sša len le'. <sup>9</sup> Bał beñe' chesacde' ba chže Xancho Diosen' da' biña' yid Jesucriston' da' yoble can' gwne' yide'. Perw bi nacho chžede', san da' nape' yela' chxenlaže' len chio' beñach na' chbeze' da' bi chaclaže' cuiayi' note'tezcho. Chaclaže' yogo'cho yetinje xtoła'chon'.

<sup>10</sup> Na' Xancho Jesucriston' yide' da' yoble cate' bi nane'laže' beñe', can' chac cate' cho'o gwban liž beñe' šeže'le. Nach gac to sšag xen, na' te che yogo' da' ca' chle'echo le'e yaban', na' yogo' da' de le'e yaban' cuiayin' lo yi' gual, na' yežlion' na' da' de lagüen lecze yeseyen.

<sup>11</sup> Na' da' nezecho yesyenit yogo' da' ca' can' ba gwnia', cheyała' gon cuincho lo na' Diosen' na' soaczcho gonxenchone' do yichj do laže'cho. <sup>12</sup> Na' cheyała' soa cuzcho batcan' žin ža gon Diosen' gac juisyw, na' goncho cont yob gaquen. Žana' šey le'e yaban' na' da' ca' chle'echo le'e yaban' yesyeyonan' lo yi' gual na' yesyeniten. <sup>13</sup> Perw chio' zoacho lez le'e yaban' na' yežlion' yesyeyaquen da' cobe can' ba gwna Diosen', na' con beñe' cheson da' güen da' zej to liča yesenita' cana'.

<sup>14</sup> Da'nan' beñe' migw chia', šlac chbezcho gac da' ca', cheyała' goncho con ga zelao saque'cho cont soacho binlo len Diosen' cont bibi doła' de da' gwchenen yichjlažda'ochon'. <sup>15</sup> Na' cheyała' gacbe'echo nape Xancho Diosen' yela' chxenlaže' len chio' beñach cont gwzenagcho che' na' gone' yela' mban checho toli tocañe. Lecze can' ba bzoj postlw Pablon' checho ben' chaquecho, cho'e dižan' len yela' sina' da' bnežjw Diosen' le'. <sup>16</sup> Na' yogo' cart che' ca' chesoen' diža' che da' quinga ba bzoja', la'czla' bzoje' bał da' nac zdebe šejni'icho. Na' beñe' biña' yesejni'i xtiža' Diosen' binlo na' biña' yesezoachache' yesejni'laže'ne' chesejni'ide' da' ca' clele, can' chesone' len bichle Xtiža' Diosen' da' nyoj, na' da'nan' zjangüe'e nez da' gwžiajin' legaque'.

<sup>17</sup> Chacda' le'e beñe' migw chia', na' ba nezele da' ca' ba bzoja' le'e. Na' le gwsaca' cont bi šejle'le xtiža' beñe' bi chosozenag che Diosen', beñe' cheson da' zej clele, san le soachach le gwzenag che Diosen'. <sup>18</sup> Na' zej

gacbe'echle catec chaque Xancho Jesucriston' le'e na' zej gombia'chne', Jesucristw ben' nonē' yeḷa' mban checho toḷi tocaṇe. Cheyaḷa' soacho gonxenchwne' ṇa'a na' toḷi tocaṇe. Can' gonšcazcho.

## CART NECHW DAN' BZOJ POSTLW SAN JUAN

*Jesucriston' chenezjue' yela' mban toli tocane che bene chesejnilaže'ne'*

<sup>1</sup> Chyixjue'eda' le'e che ben' nzi' Xtiža' Dios, ben' chenezjue' yela' mban toli tocane che bene' chesejnilaže'ne'. Ba zoacze' caten' gwxe yežlion'. Neto' postlw bzenagto' xtižen', ble'eto'ne' na' gwdanto'ne'. <sup>2</sup> Len' golje' benach' na' ble'eto'ne' na' choe'to' diža' žato' mbancze'. Chyixjue'eto' le'e ba zoacze' len Xacho Diosen' caten' gwxe yežlion' na' bedesoalene' chio' benach. <sup>3</sup> Chyixjue'eto' le'e che bena' ble'eto' na' che bena' bzenagto' xtižen' cont gonle neto' txen. Na' ca nac neto', da' li ba nacto' txen len Xacho Diosen' na' len Xi'ine' Jesucriston'. <sup>4</sup> Chzojto' le'e cart nga cont soale yebechgüele.

*Diosen' naque' la'zelagüe bene' güen*

<sup>5</sup> Neto' bzenagto' be' Jesucriston' diža' che Xe' Diosen' na' chyixjue'eton' le'e, bzejni'ide' gwne' Diosen' naque' ca to be'ni' da' naque' la'zelagüe bene' güen bene' laždao' xilaže'. Bibi da' xinj none'. <sup>6</sup> Na' še žacho choncho txen len Diosen' šlac choncho da' xinjen', con chonlaže'cho. Dan' chonchon' bi zejen to li. <sup>7</sup> Diosen' naque' la'zelagüe bene' güen bene' laždao' xilaže'. Na' še chio' zoacho choncho da' güenna' can' zoa Diosen' chone' da' güenna', nachen' naccho txen tocho yetocho na' yichjlažda'ochon' chega'anen xilaže' lagüete Xi'ine' Jesucriston' blalj xchene' cont beque'e yogo'lol xtoła'chon'.

<sup>8</sup> Še žacho bibi xtoła'cho de, chziye'ze cuinchon' na' bi choe'cho diža' li. <sup>9</sup> Perw na' še chxoadola'cho lao Diosen', chezi'xene' doła' chechon' na' chnitlagüe' yogo'te da' xinj da' choncho, le chone' con can' že' na' chone' da' zej to li. <sup>10</sup> Še žacho bibi da' mal na' goncho, choncho Diosen' ca to bene' güenlaže' na' biña' šejle'cho diža' li čhen'.

## 2

*Criston' chnabe' gaclen Xacho Diosen' chio'*

<sup>1</sup> Xi'inda'ogua', chzoja' le' cart nga cont cbi gonle da' xinj. Perw na' še no chio' goncho da' xinjen', zoa Jesucriston' ben' chon da' zej to li na' chnabe' yezi'xen Xacho Diosen' checho. <sup>2</sup> Jesucriston' blalj xchene' neche xtoła'chon' cont yozoe' chio' binlo len Diosen', na' gague neche xtoła' chio'zen' blalj xchene' san neche xtoła' yogo'lol benach.

<sup>3</sup> Na' še choncho can' ža Diosen' nachen' guac nacho ba nombia'chwne'. <sup>4</sup> Na' še žacho ba nombia'chwne' na' bi choncho can' že'na', naccho bene' güenlaže' na' diža' li che Diosen' biña' šon' yichjlažda'ochon'. <sup>5</sup> Ba chaquecho Diosen' ca cheyała' gaquechone' še choncho con can' že'na', na' še ba choncho ca', nezecho ba nacchone' txen. <sup>6</sup> Na' note'tezcho še žacho naccho Diosen' txen, cheyała' soacho goncho da' güen can' ben Jesucriston'.

*Dan' ža Diosen' cheyała' goncho*

<sup>7</sup> Le'e bene' chacda', dan' chzoja' nga chona' mandadw naquen' gonle, bi naquen to da' cobe. Naquen to da' gole dan' gwnezele caten' gwzolaole

chejnilaže'le Jesucriston', le naquen diža' da' ba benele. <sup>8</sup> Na' dan' chona' mandaw naquen' gonle, bia'cze naquen ca to da' cobe, le ba bla' diža' güen che Criston' len benachen' na' ba chzolao chde che yogo' da' ca' da' chgue'e Diosen'. Na' dan' chona' mandaw gonle, Criston' ba blo'ede' naquen da' zaque' na' lecz le'e ba chlo'ele naquen da' zaque'.

<sup>9</sup> Note'tezcho la'czla' žacho ba noncho Diosen' txen, bi naquen ca' še chgue'e lježcho; nac chol' lo' lažda'ochon'. <sup>10</sup> Note'tezcho še chaque lježcho nachen' da' li ba noncho Diosen' txen na' bibi de da' yoslažon' chio' lo' da' xinjen'. Lo' yichjlažda'ochon' ba naquen ca to da' yo'o be'ni'. <sup>11</sup> Na' note'tezcho še chgue'e lježcho nac chol' lo' lažda'ochon' na' zejcho ca to bene' lchol' bene' bi chache'e galen' yeque'e, le bi chache'echo can' cheyala' goncho.

<sup>12</sup> Ba bzoja' da' quinga par le'e xi'inda'ogua', le Diosen' ba bezi'xene' chele dan' chejnilaže'le Jesucriston' do yichj do laže'le. <sup>13</sup> Ba bzoja' da' quinga par le'e bene' gole, le ba nombia'le Jesucriston' ben' ba zoa cate' gwxe yežlion'. Ba bzoja' da' quinga par le'e bene' güego' chaban, le bač gwzoele bi chzenagle che Satanás dan' chnabia' da' xigüe' ca'.

Ba bzoja' da' quinga par le'e xi'inda'ogua' da' ba nombia'le Xacho Diosen'. <sup>14</sup> Ba bzoja' da' quinga par le'e bene' gole, da' ba nombia'le Jesucriston' ben' ba zoacze cate' gwxe yežlion'. Lecz ca' ba bzoja' da' quinga par le'e bene' güego' chaban da' ngo'o yichjle xtiža' Diosen' na' da'nan' ba gwzoele bi chzenagle che Satanásen'.

<sup>15</sup> Bi selaže'le gacle toze len bene' ca' bi chosozenag che Diosen', na' neca selaže'le gonle can' chesonen'. Note'tezcho chzelaže'cho goncho can' chesonen', bi chaquecho Xacho Diosen'. <sup>16</sup> Bene' bi chosozenag che Diosen' chesone' da' mal dan' chzelaže' lažda'ogaquen', na' chesezelaže' bi dan' chesele'ede', na' lecz ca' chesa'laže'. Na' yogo' da' ca' chesone' bi naquen che Xacho Diosen', naquen che da' mal dan' de yežlio nga. <sup>17</sup> Na' da' te che yežlio nga len da' ca' chesezelaže' bene' ca' bi chosozenag che Diosen'. Perw še chio' choncho can' chazlaže' Diosen', soaczcho len Diosen' toli tocane.

*Nezecho bin' nac da' li*

<sup>18</sup> Xi'inda'ogua', ba zoa žin ža te che yežlio nga. Neto' ba bzeneto' le'e gwžin ža yid ben' gonchgua contr Criston', na' na'a bene' zan ba za'aque' chesone' contr Criston'. Da'nan' nezecho ba zoa žin ža te che yežlion'. <sup>19</sup> Ladjio chio' besechoj bene' ca' chesegue'ede' Criston'. Gague do laže' gosone' txen len chio' chejnilaže'chone'. Le šaca' do laže' gosone' txen len chio', ne' nite' chesonche' chio' txen še ca'. Na' dan' bač besyechoje' nacbia' bi zjanaque' chio' txen.

<sup>20</sup> Criston' ba bene' chio' Spiritw che Diosen' na' da'nan' yogo'cho nezecho can' ža diža' li che Diosen'. <sup>21</sup> Chzoja' le'e da' nga le bač nombia'le diža' li che Diosen', gague nacho bi nombia'lenna', na' lecz ca' nezele ne toz diža' güenlaže' ca nchixe diža' li che'na'.

<sup>22</sup> Bene' güenlaže' ben' ža Diosen' bi gwsele' Jesucriston' golje' benach. Ben' že' ca' chgue'ede' Criston', le chzoe' Xacho Diosen' to šla'ale len Xi'ine' Criston'. <sup>23</sup> Na' note'tez bene' cho'e diža' že' Diosen' bi gwsele' Jesucriston', bitw zoa Xacho Diosen' len le'. Perw note'tez bene' cho'e diža' že' Diosen' gwsele' Jesucriston', zoacze Xacho Diosen' lente Xi'ine' Jesucriston' len le'.

<sup>24</sup> Le soa le gwzenag che da' ca' ba bzeneto' le'e caten' gwzolaotele chejnilaže'le Criston'. Na' še soatezle gwzenaglen, nachen' soatezle len

Xacho Diosen' na' len Xi'ine' Jesucriston'. <sup>25</sup> Na' da' gwna Jesucriston' gone' checho, gone' yela' mban toli tocanē.

<sup>26</sup> Ba bzoja' le'e da' nga bia' diža' che bene' ca' chesaclaže' yesonlede' le'e. <sup>27</sup> Na' Jesucriston' ba bene' chio' Spiritw che Diosen' zoan lo' lažda'ochon' chzejni'in chio' yogo'lol dan' cheyala' nezecho che cuine'. Na' Spiritw che Diosen' choen' diža' li, bi chonlažen'. Na' dan' zoan chzejni'in chio', bi chyažjecho nochle gwzejni'i chio' bi dan' nac da' li. Da'n'an' le gwzenag dan' bzejni'i Spiriton' le'e na' le soa len Jesucriston'.

<sup>28</sup> Na' na'a xi'inda'ogua', cheyala' soatezcho gwzenagcho che Jesucriston' cont bi žebcho cate' yide' da' yoble na' cont bi yeto'echo na' cont bi nan gwcuase'chone' cate' le'echo ba ble'e. <sup>29</sup> Na' nezecho Criston' zeje' chone' con can' cheyala' gone', lecze ca' nezecho yogo'czecho še zejcho choncho can' cheyala' goncho naccho xi'in Dios.

### 3

#### *Naquen' goncho še naccho xi'in Dios*

<sup>1</sup> Le gon xbab catec chaquechgüe Xacho Diosen' chio' da' chne' naccho xi'ine', na' da' licze xi'ine' chio'. Bene' bi chesejnilaže' Diosen' bi chesejni'ide' naccho xi'in Dios, le bi chesacbe'ede' non' nac Diosen'. <sup>2</sup> Xi'inda'ogua', chio' chejnilaže'cho Jesucriston' bačh naccho xi'in Dios. Na' biña' gata'bia' nac gaccho. Con nezecho caten' Jesucriston' yide' da' yoble canan' le'echwne' can' naque' na' yeyac yichjlažda'ochon' can' nac yichjlaždao' le'. <sup>3</sup> Na' note'tezcho še zoacho lez gaccho can' naquen', soacho gwsaca'cho cont lažda'ochon' gaquen xilaže', le nezecho laždao' Jesucriston' naquen xilaže'.

<sup>4</sup> Note'tez bene' zoe' chone' da' xinjen' chone' clele len ley che Diosen', le cate' choncho da' xinj choncho clele len da' ba bžie' bia' goncho. <sup>5</sup> Nezczecho Jesucriston' bide' yežlio nga cont beque'e xtoła' chio' benačh, na' ca' nac Jesucriston', le bibi da' xinj none'. <sup>6</sup> Na' še chio' zoacho chzenagcho che', bi zoacho choncho da' xinj, san še zoacho choncho da' xinjen', biña' šejni'icho che' na' biña' gombia'chone'. <sup>7</sup> Xi'inda'ogua', bi güe'le latje no siye' le'e, še choncho da' güen can' cheyala' goncho, zejcho to licha can' zej Jesucriston'. <sup>8</sup> Na' še zoacho choncho da' xinj, naccho xi'in Satanásen', le Satanásen' zoaczen chonen da' xinj cate' gwxcete yežlion'. Na' bid Xi'in Diosen' yežlio nga par gwxcetze' dan' chon Satanásen'.

<sup>9</sup> Note'tezcho še Diosen' ba gwque'e chio' ca' xi'ine' bi zoacho choncho da' xinj, le ba bocobe' yichjlažda'ochon' na' bich žan goncho da' xinjen' da' zoa Diosen' len chio'. <sup>10</sup> Na' da' nga chlo'en non' nac xi'in Diosen' na' non' nac xi'in Satanásen': note'tezcho še bi zoacho choncho da' güen, bi naccho xi'in Dios, na' lecz ca' note'tezcho še bi chaque lježcho, bi naccho xi'in Dios.

#### *Cheyala' gaque lježcho*

<sup>11</sup> Na' da' nga ba beneczecho cate' gwzolaacho chejnilaže'cho Jesucriston': cheyala' gaque lježcho tocho yetocho. <sup>12</sup> Bi gaccho ca' goc da' Caín, goque' xi'in Satanásen' na' beyote' bene' biše'. ¿Nezele bichen' betue' le'? Betue' le' le gwzoe' bene' da' xinj na' bene' bišen' gwzoe' bene' da' güen.

<sup>13</sup> Da'n'an' xi'inda'ogua', bi yebanele cate' bene' ca' bi chosozenag che Diosen' chesegue'ede' le'e. <sup>14</sup> Nezecho bich mbiayi' yichjlažda'ochon', san ba de yela' mban checho toli tocanē le ba chaque lježcho. Na' še bi chaque lježcho, ne' mbiayi' yichjlažda'ochon'. <sup>15</sup> Note'tezcho še chgue'e lježcho, lao

Diosen' naccho bene' güet bene'. Na' nezecho bene' güet bene' bi de yela' mban che' toli tocanē. <sup>16</sup> Bzane cuin Jesucriston' neche chio' gosote'ne' dan' leca chacde' chio', da'nan' nezecho can' cheyala' gaque lježcho. Na' ca'cze chio' cheyala' zane cuincho gatcho cont gaclen lježcho še chonen byen. <sup>17</sup> Na' cate' de da' de checho na' nezecho bene' lježcho chyažjden', še bi cheyaše' chone' bi gac nacho chaquecho Diosen'. <sup>18</sup> Xi'inda'ogua', bi cheyala' gaque lježcho de diža'ze. Cheyala' gaque lježcho do yichj do laže'cho na' soacho gaclen lježcho.

*Nac goncho cont bi žebcho Diosen'*

<sup>19</sup> Na' nezecho naccho txen len Dios ben' choe' diža' li še chaque lježcho can' gwnia'na', na' še goncho ca', na' gacbe'echo zoacho binlo len Diosen'. <sup>20</sup> Na' še zoa cate' choncho xbab bi zaca'cho par na Diosen' xi'ine' chio', Diosen' zaca'che' ca' xbab chechon' na' nezde' yogo'lol. Da'nan' cheyala' gwzenagcho can' žen', gaque con can' ža xbab chechon'. <sup>21</sup> Le'e bene' chacda', še lo' yichjlažda'ochon' chacbe'echo bitw napcho doła', nachen' bich chžebcho Diosen'. <sup>22</sup> Na' bite'tez dan' chnabechone' chonczen', le choncho da' nžie' bia' goncho na' can' chaclažen'. <sup>23</sup> Na' da' nga Diosen' nžie' bia' goncho, šejnilaže'cho Xi'ine' Jesucriston' do yichj do laže'cho na' gaque lježcho tocho yetocho, con can' nžie' bia'. <sup>24</sup> Na' še choncho can' nžie' bian', nach zoacho len Diosen' na' Diosen' zoe' len chio'. Na' quinga nezecho Diosen' zoe' len chio': ba bene' chio' Spiritw chen' zoan lo' lažda'ochon.

## 4

*Spiritw che Diosen' na' dan' chon contr Criston'*

<sup>1</sup> Le'e bene' chacda', bi šejle'le che yogo' bene' chesene' cheso'e diža' dan' gož Spiritw che Diosen' legaque', san le gone' prueba še xtiža'gaquen' naquen da' bzejni'i Dios o še cbi naquen. Le gone' prueba, le ba chaš bene' zan bene' chesonlaže' chesene' cheseyixjue'ede' dan' gož Diosen' legaque'. <sup>2</sup> Na' quinga guac nezecho še Spiritw che Diosen' bzejni'in legaque' dižan' cheso'e: yogo' bene' cheso'e diža' chesene' Jesucriston' naque' Dios golje' benach, nezecho yo'o Spiritw che Diosen' lo' yichjlažda'ogüe'. <sup>3</sup> Na' bene' cheso'e diža' chesene' Jesucriston' bi naque' Dios golje' benach, nezecho Spiritw che Diosen' bi yo'on lo' yichjlažda'ogüe'. Bene' ca' cheso'e diža' da' chonen contr Criston'. Na' ba bzeneto' le'e yid da' gon contr Criston' na' na'a ba blan' chonen contr le'.

<sup>4</sup> Xi'inda'ogua', ba nacle Diosen' txen na' da'nan' bi chejle'le che bene' güenlaže' ca'. Chzoele cbi chejle'le chegaque' neche da' yo'o Spiritw che Diosen' lo' lažda'olen' chzejni'in le'e, na' Spiriton' chnabia'chen ca' Satanásen' dan' zoa len bene' ca' bi chosozenag che Diosen' yežlio nga. <sup>5</sup> Bene' ca' bi chosozenague' che Diosen' cheso'e diža' che dan' chac yežlio nga, na' da'nan' bene' lježe' ca' chosozenague' chegaque'. <sup>6</sup> Ca' nac chio', ba naccho Diosen' txen. Da'nan' yezica'chle bene' chosozenague' che Diosen' lecz chosozenague' xtiža'chon'. Na' bene' ca' cbi zjanaque' Diosen' txen bi chosozenague' diža' chechon'. Can' chac nezecho no bene' yo'o Spiritw che Diosen' lo' lažda'ogüe' chzejni'in le' diža' li na' no bene' chzenague' diža' güenlaže' dan' chzejni'i Satanásen' le'.

*Diosen' chacde' benach*

<sup>7</sup> Le'e bene' chacda', cheyała' soacho gaque lježcho tocho yetocho, le Diosen' zoacze' chone' cont chaque lježcho. Na' note'tezcho še chaque lježcho nachen' nacia' naccho xi'in Dios na' nombia'chone'. <sup>8</sup> Na' note'tezcho še bi chaque lježcho bi nombia'cho Diosen', le chio' bi choncho can' chonen'. Len' zoacze' chacde' benachen', le con can' nac yichjlažda'ogüe'. <sup>9</sup> Dan' ben Diosen' bzejni'ide' chio' can' chacde' chio', gwsele' laye'e Xi'ine' yežlio nga cont note'tezcho bancho toli tocane še chejnilaže'chone' do yichj do laže'cho. <sup>10</sup> Bi goquecho Diosen'; lelen' godce' chio' na' gwsele' Xi'ine' Jesucriston' cont bnitlagüe' xtoła'chon'.

<sup>11</sup> Le'e bene' chacda', dan' chaque Diosen' chio' lecz ca' cheyała' gaque lježcho tocho yetocho. <sup>12</sup> Nono zoa bene' ba ble'ede' Diosen'. Perw na' še zoacho chaque lježcho tocho yetocho, nacia' Diosen' zoacze' len chio' na' ba chaquechone' can' cheyała' gaquechone'. <sup>13</sup> Nezecho zoacho len Diosen' na' le' zoacze' len chio' da' ba gwsele' Spiritw chen' zoan lo' yichjlažda'ochon'. <sup>14</sup> Na' neto' postlw ba ble'eto' na' choe'to' diža' nezeto' gwseła' Xacho Diosen' Xi'inen' cont gwnitlagüe' xtoła' note'tez bene' šejnilaže' le'. <sup>15</sup> Na' note'tezcho še chejle'cho na' choe'cho diža' žacho Jesucriston' naque' dogualje Xi'in Dios, Diosen' zoe' len chio' na' lecz zoacho txen len Diosen'.

<sup>16</sup> Chio' ba nezecho na' chejle'cho chaque Diosen' chio'. Diosen' zoacze' chacde' benachen', le con can' nac yichjlažda'ogüe'. Na' note'tezcho še zoacho chaquecho Diosen' na' lecze zoacho chaque lježcho, nachen' zoacho len Diosen' na' le' zoacze' len chio'. <sup>17</sup> Diosen' zoacze' chaclene' chio' cont chaquechone' can' cheyała' gaquechone' na' chaque lježcho can' cheyała' gaque lježcho, na' Diosen' chone' ca' cont bi žebcho cate' žin ža gone' yela' justis che yogo' benach. Na' bi žebcho še zoacho chaque lježcho yežlio nga can' chon Jesucriston'. <sup>18</sup> Še chaquecho Diosen' ca cheyała', bibi de da' žebcho. Caten' chžebchon' naquen ca to castigw len chio', na' še ne' chžebcho biña' gaquecho Diosen' can' cheyała' gaquechone'.

<sup>19</sup> Chio' chaquecho Diosen' le len' godce' chio' da' nechw. <sup>20</sup> Note'tezcho še chgue'e lježcho, la'czla' žacho chaquecho Diosen', bi chonlaže'chon'. ¿Nacxe goncho gaquecho Diosen' ben' bi chle'echo še bi chaque lježcho bene' chle'etecho? <sup>21</sup> Na' ba bene' mandadw can' cheyała' gon chio' chaquechone', že' lecz cheyała' gaque lježcho.

## 5

### *Gwcuascho da' malen'*

<sup>1</sup> Note'tez chio' naccho xi'in Dios še chejle'cho Diosen' gwsele' Jesucriston' cont nabi'e. Na' še chaquecho Xacho Diosen', lecz can' gaque lježcho, le lecz xi'in Dios bene' lježchon'. <sup>2</sup> Cate' chio' zoacho chaquecho Diosen' na' choncho da' bžie' bia' goncho, nezecho lecze zoacho chaquecho yezica'chle xi'in Dios. <sup>3</sup> Še chaquecho Diosen', choncho can' nžie' bia' goncho. Na' dan' nžie' bia' goncho, bi naquen zdebe gonchon. <sup>4</sup> Note'tezcho še ba bocob Diosen' yichjlažda'ochon', ba chzoecho chcuascho da' xinj dan' de yežlio nga. Na' dan' chejnilaže'cho Jesucriston', da'nan' chzoecho chcuascho da' xinjen' dan' de yežlion' bi chonchon. <sup>5</sup> Na' noch no chzoede' chcuase' da' xinj dan' de yežlio nga san bene' ca' chesejle'e Jesucriston' naque' dogualje Xi'in Dios, legaquen' chesezoede' chosocuase' da' xinjen'.

*Diosen' cho'e diža' že' Jesucriston' naque' dogualje Xi'ine'*

<sup>6</sup> Quinga ben Jesucriston' šlac bide' yežlio nga, bnežjw cuine' gwzoe' nis na' blalj xchene'. Bi ņacho con gwzoaze' nis, san lecz blalj xchene'. Na' Spiritw che Diosen' choen' diža' bene' ca', na' Spiriton' choen' pur diža' li. <sup>7</sup> Na' nita' šone bene' chesegüe'e da' balj yaban' cheso'e diža' che Jesucriston': Xacho Diosen', len Jesucriston' ben' nzi' Xtiža' Dios na' len Spiritw che Diosen'. Na' toz can' cheso'e diža' che Jesucriston'. <sup>8</sup> Lecz de šone da' chesego'on da' balj chesoen' diža' che Jesucriston' yežlio nga: Spiritw che Diosen', na' dan' gwzoe' nis na' dan' blalj xchene'. Na' toz ca chesoen' xtižen'. <sup>9</sup> Chejle'cho xtiža' benachen', na' nacch xtiža' Diosen' da' zaca'ch, na' Diosen' ba bi'e diža' che Xi'ine' Jesucriston'. <sup>10</sup> Na' še chejle'cho Jesucriston' naque' dogualje Xi'in Dios, nezecho lo' lažda'ochon' xtiža' Xacho Diosen' dan' bi'e che' naquen da' li. Na' še bi chejle'cho che Diosen', chonchone' ca to bene' gūenlaže' da' bi chzenagcho diža' dan' cho'e che Xi'ine'na'. <sup>11</sup> Na' xtiža' Diosen' chzejni'in chio' guata' yela' mban che benachen' toli tocaņe še yesejnilaže' Xi'ine' Jesucriston'. <sup>12</sup> Quinga naquen, de yela' mban checho toli tocaņe še chejnilaže'cho Jesucriston', na' bi de yela' mban checho toli tocaņe še bi chejnilaže'chone'.

*Can' beyož cart nga da' bzoj Postlw San Juan*

<sup>13</sup> Ba bzoja' le'e cart nga, le'e chejnilaže'le Xi'in Diosen', cont nezele de yela' mban chele toli tocaņe.

<sup>14</sup> Na' bitw chžebcho chol gūižcho Diosen', le nezecho chzenague' checho cate' chņabcho lagüen' da' chazlaže'. <sup>15</sup> Na' cate' nezecho chzenague' checho bite'tez dan' chņabechone', lecz nezecho gone' da' ca' ba gwņabechone'.

<sup>16</sup> Na' še chache'echo bene' lježcho chone' bi da' xinj da' bi zaca' sela' Diosen' le' lo yi' gabil, cheyala' nabecho Diosen' gaclene' le' cont yezoe' binlo len Diosen' da' yoble. Da' xinj da' cheson bal bene' zacan' sela' Diosen' legaque' lo yi' gabil. Bi žia' nable gaclen Diosen' bene' ca'. <sup>17</sup> Napcho doļa' še choncho bite'tez da' xinj, perw gague yogo' da' xinj dan' chonchon' sela' Diosen' chio' lo yi' gabilen'.

<sup>18</sup> Nezecho še ba bocob Xacho Diosen' yichjlažda'ochon' bi zoacho choncho da' xinjen' le zoa Jesucriston' ben' nac Xi'in Diosen' chcuase' chio' len dan' chon Satanásen', na' da'nan' bi soen gwžiyain' chio'.

<sup>19</sup> Lecz nezecho Diosen' zoe' len chio', perw bene' ca' bi chosozenague' che', Satanásen' chnabian' yichjlažda'ogaquen'.

<sup>20</sup> Na' nezecho ba bid Xi'in Diosen', na' ba bzejni'ide' chio' cont nombia'cho Xe' ben' nac dogualje Dios. Nach zoacho toz len ben' nac dogualje Dios dan' zoacho toz len Xi'ine' Jesucriston'. Len' naque' dogualje Dios na' chnežjue' yela' mban toli tocaņe che bene' chejnilaže' le'. <sup>21</sup> Xi'inda'ogua', gague nochle šejnilaže'le san ben' nac dogualje Dios. Da' na'zen' chzoja'.



## CART GWCHOPE DAN' BZOJ POSTLW SAN JUAN

*Chio' nombia'cho diža' li che Diosen' cheyała' gaque lježcho*

<sup>1</sup> Neda' naca' beñe' gole blao, na' chzoja' le' no'ole, len' ba gwlej Diosen' chzenago' xtižen', na' len xi'ino' ca'. Da' li chacda' le'e, na' gague nedaze' san lencze' yogo' beñe' yezica'chle beñe' zjanombia' diža' li che Diosen' chesacde' le'e. <sup>2</sup> Chaqueto' le'e da' yo'o diža' li che Diosen' lo' lažda'ochon' na' soan lo' lažda'ochon' gaclenen chio' toli tocañe. <sup>3</sup> Xacho Diosen' na' len Xi'ine' Xancho Jesucriston' yesaclene' le'e, yesyeyaše' yesyeži'ilaže'de' le'e na' yesone' cont soa cuezle binlo len xbab dan' yo'o lo' yichjlažda'olen', le ba nombia'le diža' li che Diosen' na' ba chaque lježle tole yetole.

<sup>4</sup> Leca gwbeda' cate' gwñezda' bał bi' chio' ca' ba nita'be' chesombe' can' ža diža' li che Xacho Diosen' can' bžie' bia' goncho. <sup>5</sup> Dan' cheyała' goncho, no'ole, cheyała' soacho gaque lježcho tocho yetocho. Na' dan' žia' goncho ca', bi naquen to da' cobe; naquen dan' ba bzeneto' le'e caten' gwzolaole chejnilaže'le Jesucriston'. <sup>6</sup> Še chaquecho Diosen' goncho da' nžie' bia'. Na' ñezele nžie' bia' gaque lježcho, le cate' gwzolaole chejnilaže'le Jesucriston' bzejni'ito' le'e cheyała' gaque lježcho.

*Chas beñe' chesonlede'*

<sup>7</sup> Beñe' zan chesaše' lo yežlion' chosozejni'ide' clele, le cheso'e diža' che Jesucriston' chesene' bi naque' Dios ben' bide' golje' beñach. Note'tez beñe' chon ca' naque' beñe' gwxiye' na' chone' contr Criston'. <sup>8</sup> Bi gwzenagle xtiža'gaque' san le soa le gon cont Diosen' gac gone' soale mbalaz juisyw da' chonle can' chazlaže' gonle.

<sup>9</sup> Note'tezcho še chzoacho ca'ale dan' bsed blo'e Criston' cont chzenagcho bichle diža' dan' chzejni'i beñe' chio', bi zoa Diosen' len chio' še ca'. Na' note'tezcho še zoacho chzenagcho che dan' bsed blo'e Criston', Xacho Diosen' len Xi'ine' Criston' nite' len chio'. <sup>10</sup> Na' še no beñe' yide' gan' zوالen' chaclaže' gwzejni'ide' le'e da' bi nac xtiža' Criston', bi gwleblene' ližlen' na' bi gwguaplene' tiox. <sup>11</sup> Cheyała' gonelene' ca', le še gwlebelene' zejen txen chonlenine' da' xinjen'.

*Goclaže' šjane'e legaque'*

<sup>12</sup> De da' zan da' nia' le'e perw bich chaclaža' gwzojan' le'e yiš. Zoa' lez yida' gana' zoale na' güe'lena' le'e diža' cho'a cont soacho mbalaz juisyw.

<sup>13</sup> Xi'in no'ole bilon', no'ole ben' lecze gwlej Diosen' cont chzenague' che', chosoguape' le'e tiox. Da' na'zen' chzoja' na'a.

## CART GWYONE DAN' BZOJ POSTLW SAN JUAN

*Postlw San Juanna' cho'e diža' güen che ben' le Gayo*

<sup>1</sup> Neda' naca' bene' gole blao, na' chzoja' cart nga par le', xmigua' Gayo. Da' li chacda' le'.

<sup>2</sup> Bene' migw, chnaba' lao Diosen' gac güen chio' na' so' güen ca güenna' ba zoa lo' yichjlažda'oguo'. <sup>3</sup> Leca bebeda' cate' besela'ac to chope bene' lježcho goso'e diža' can' zoaczo' chono' güen da' chzenago' diža' li che Diosen' do yichj do lažo'. <sup>4</sup> Len neda' le'e nacle ca xi'ina', na' bich bi de da' chbechda' ca chbeda' chnezda' chzenagle diža' li che Diosen' do yichj do laže'le.

<sup>5</sup> Bene' migw, chono' güen dan' chacleno' bene' lježcho ca' bene' zjanac bene' zito'. <sup>6</sup> Legaque' ba goso'e diža' len neto' chdop chžagto' nga chonxento' Jesucriston' can' bži'ido' legaque'. Na' cate' yesele'e da' yoble güe'sco'ne' bi dan' yeseyažjde' cont yesyegüe'e nez da' yoble, le legaque' chesone' xšin Diosen'. <sup>7</sup> Ba gosa'ac laže' cont cheso'e xtiža' Criston' na' bibi goclen chesezi'e che bene' ca' bi chesejle'e che Criston'. <sup>8</sup> Da'nan' cheyaļa' gwlelcho bene' ca', gaclenchwne' na' gonchone' txen cont yesombia' bene' diža' li che Diosen'.

*Diótrefes chone' da' mal*

<sup>9</sup> Bač bzoja' le'e chdop chžagle chonxenle Jesucriston', perw na' Diótrefes chaclaže' gague' la'zelaoze bene' blao len le'e na' bi chzenague' cheto'. <sup>10</sup> Da'nan' caten' yida' dezna'a le'e na' yapa'ne' che yogo' dan' chone' contr neto' na' diža' güenlaže' dan' chne' cheto'. Na' gague' da' na'zen' chone', lecz bi chlebe' bene' lježchon' liže' bene' za'ac zito', na' cate' no le'e chaclaže'le gwleble legaque' ližlen' nach chžone' gonle ca', na' chbeje' le'e ladjo lježle chdop chžagle chonxene' Jesucriston' cate' chleble legaque'.

<sup>11</sup> Bene' migw, bi gono' txen len bene' ca' cheson da' xinjen', san ben txen len bene' ca' cheson da' güen. Note'tez bene' zoateze' chone' da' güen, nacbia' nombi'e Diosen', na' note'tez bene' zoateze' chone' da' xinjen', nacbia' biņa' gombi'e Diosen'.

*Demetrion' chone' da' güen*

<sup>12</sup> Yogo'ze bene' cheso'e diža' güen che Demetrio na' nacbia' zejlene' diža' li che Diosen'. Lencze neto' choe'to' diža' žato' chone' da' güen, na' nezele choe'to' diža' li.

*Can' beyož carten'*

<sup>13</sup> Dech da' zan da' gocda' nia' le'e, perw bich chaclaža' gwzozjan' le'e yiš. <sup>14</sup> Zoa' lez yob yežagcho cont güe'cho diža' cho'a cate' soacho txen.

<sup>15</sup> Soago' binlo len xbab dan' yo'o lo' yichjlažda'oguo'. Bene' migw chion' nita' nga chosoguape' le' tiox. Na' chnaba' gwguapšco' tiox to to bene' migw cheto' ca' nita' gan' zوالen'. Da' na'zen' chzoja' na'a.

## CART DAN' BZOJ SAN JUDAS

*San Judas chzoje' bene' ca' zjanaque' lo na' Diosen'*

<sup>1</sup> Neda' Judas naca' bene' güen žin che Jesucriston', na' naca' bene' biše' Jacobo. Chzoja' le'e ba gwlej Xacho Diosen' cont nacle lo ne'en nach zoale chcuas chcue'ej Jesucriston' le'e len da' malen'. <sup>2</sup> Chnaba' gon Xacho Diosen' cont gache'echle cheyaše' cheži'ilaže' chgüede' le'e, na' gone' cont soa cuezechle binlo len xbab da' yo'o lo' yichjlažda'olen', na' gone' gache'echle chacchgüede' le'e.

*Bene' ca' chososed chosolo'ede' diža' güenlaže'*

*(2 Pedro 2:1-17)*

<sup>3</sup> Bene' migw, chacda' le'e, na' ba goclaže'chgua' gwzoja' le'e gwzejni'ida' le'e can' ben Xancho Jesucriston' cont de yela' mban checho toli tocanē. Perw na'a ba chonen byen chzoja' chneyoeda' le'e soachachle šejle'le diža' li che Diosen' da' bzejni'ide' chio' to ši'ize, chio' naccho lo ne'en. <sup>4</sup> Nita' bal bene' cheseziye'e cont chaquele zjanaque' le'e txen. Bi chosozenague' che Diosen', san chesene' da' nži'ilaže' Diosen' chio' guacte goncho bite'teze da' yela' zto' len cuerp chechon', le chezi'xencze' checho. Na' chosozoe' to šla'ale toz ben' nac dogualje Dios ben' cheyla' yosozenag yogo' benachen' che', na' len Xancho Jesucriston'. Cana'te byoj Xtiža' Diosen' žan bene' cheson ca' yesežaglaochgüe' neche xtoła'gaquen'.

<sup>5</sup> Na' la'czla' ba gwnezele yogo' can' goquen', chaclaža' gona' cont šjayza'laže'le Xancho Diosen' bosle' da' xoxxta'o neto' bene' Israel lo na' bene' Egipto ca', perw gwdechle bžiaye'e balteze' bi gosejle'e che'. <sup>6</sup> Na' zan angl bi gosazlaže' yesone' da' gwlo'o Diosen' lo na'gaque' yesone', san gosaclaže' yesacche' bene' blaoch. Nachen' besyechoje' gan' bžia Diosen' bia' yesenite'. Nach Diosen' gwsele' legaque' gan' nacchgua chol, na' zjancheje' gden toli tocanē cont yesezaca'zi'e cate' žin ža gac juisyw. <sup>7</sup> Na' lecze ca' bene' gwnita' ciuda Sodoma na' ciuda Gomorra len yezica'chle ciuda ca' zjanyechj zjambi'in legaquen, gosonchgüe' da' nac yela' zto' len cuerp chegaquen', le gosatalene' ljež bene' byogaque' gosone' le' ca xo'ole' cont gosone' da' yela' zto' len legaque'. Nach Diosen' gwsele' yi' da' bzeyen ciuda ca' gosebiayi'tecczen'. Na' da' bene' ca', chosnisde' chio' benach gata' castigw lo yi' gabil toli tocanē che bene' bi yosozenag che'.

<sup>8</sup> Na' bia'cze bene' ca' chososed chosolo'ede' le'e diža' güenlaže', zjanite' chesone' da' mal na' chesene' besele'edagüede' nac güen dan' chesonen'. Chesone' da' yela' zto' len cuerp chegaquen' bi chesaclaže' yosozenague' che Xancho Diosen', na' chesezi'diže' angl ca' bene' zjazaca'chgua. <sup>9</sup> Perw nža'le cheson angl che Diosen', le cani' gwzooa to tiemp cate' angl blao ben' le Miguel gocyože' len Satanás dan' chnabia' da' xigüe' ca' da' goclažen' yeyoan' cuerp che da' Moisésen'. Na' la'czla' Miguelen' naque' angl blao che Diosen', bi beyaxjde' si'diže' Satanásen', san con gožen': "Xanto' Diosen' tile' le'." <sup>10</sup> Perw bene' quinga chesezi'diže' bite'teze da' bi chesejni'ide'. Na' chesonteze' da' ca' ža cuerp chegaquen' yesone', ca cheson beyixe' be bi chesejni'i, na' da' ca' chesonen' chosožiayin' legaque'.

<sup>11</sup> Nyaše'chgua gac chegaque'. Zjanite' chesegue'e lježgaque' can' ben da' Cain, na' lecze chesoe'laže' chesone' da' mal cont yesone' gan mechw

can' ben da' Balaam. Chesone' güedenag len bene' ca' gwlej Diosen' cont chesenabi'e legaque' cacze güedenag ben da' ben' gože' Coré cani', na' can' gwziayi' da' Corén' neče yela' güedenag chen', lecz ca' yesebiaye'e. <sup>12</sup> Na' cate' le'e che'ej chagwle txen cont chlo'ele chaque lježle, legaque' chesagwxatteze' con nacteze žan chegaque' na' chese'ejchgüe' gualaz da' yesone' güen len bene' lježe'. Na' da' bibi zaca' can' chesone', da'n'an' zjazaca'lebde' ca bzigüe' da' dope to le'e lache' šiš, na' lecze zjazaca'lebde' ca bene' güeye' xila' bene' chna' cuine' na' bi chne'e xila' ca'. Lecze zjazaca'lebde' ca bejw da' nžiga' be' da' bi cheyaquen yejw, na' ca to yag xen da' bibi chbian cate' ba bžin tiemp cuian, na' gualaz da' cuian chbižen na' chbixen lo yo. <sup>13</sup> Na' neče yela' zton' cheson bene' ca', zjazaca'lebde' ca nisdao' da' chas chata' na' checho'onen bžina' ga nac lo yo cho'a nisaon'. Na' zjazaca'lebde' ca beljw da' bich zjažian xišne'en gan' cheyala' yesebian, le Diosen' bžie' bia' yesezaca'zi'e toli tocaņe gan' nac leca chol.

<sup>14</sup> Gwzolaon cate' gwzoda da' Adán bžinten cate' gwzoda da' Enoc goc gaže dia che Adánna'. Na' Enoquen' lecze be'e diža' da' bzejni'i Diosen' le' che bene' ca' chososed chosolo'ede' diža' güenlaže', cate' gwne': "Ble'eda' za' Xancho Diosen' len angl zan juisyw che' ca' <sup>15</sup> cont chogbi'en yesezaca'zi' yogo' bene' zjanape' dol'a. Yogo' bene' ca' bi bosozenag che' yesezaca'zi'e toli tocaņe neče da' gosone' da' mal juisyw yela' güedenag chegaquen' na' neče da' gosone' diža' ya' che'." <sup>16</sup> Na' ca nac bene' ca' chososed chosolo'ede' le'e diža' güenlaže', bate'teze chesežeše' che Diosen', na' bibi chesazlaže'. Con chesonteze' bite'teze žan chegaque'. Len xtiža'gaquen' chesonxen cuingaque' na' chosopede' bene' yoble cont yesone' gan' mechw o cont yesaclen bene' legaque'.

*San Judas che'e bene' chesonxen Jesucriston' can' cheyala' yesone'*

<sup>17</sup> San le'e bene' migw, bene' chacda', cheyala' šjayze'ele diža' nga gosena postlw ca' bene' ca' gwlej Xancho Jesucriston'. <sup>18</sup> Gosene': "Tiempen' cate' ba zoa yid Xancho Jesucriston', nita' bene' bi yesejle' che Diosen' na' yesone' che' na' yesonteze' con da' žan chegaque' da' nac yela' zto'." <sup>19</sup> Na' na'a bene' ca' chesone' cont le'e chejnilaže'le Criston' bi chonle toze xbab, san nža' nža'te ca žale. Chesone' xbab che da' chnalaže' cuerp chegaque', le bi yo'o Spiritw che Diosen' lo' yichjlažda'ogaquen'.

<sup>20</sup> Perw le'e bene' migw, chacda' le'e, na' chņeyoeda' le gonchach laže'le cont soachachle šejle'le diža' li che Diosen' da' zaca'chgua. Na' le yol güiž Diosen' ye'ln'e' da' chzejni'i Spiritw chen' le'e. <sup>21</sup> Na' le soa le gon cont gacbe'ele chaque Diosen' le'e. Na' da' cheyaše' cheži'ilaže' Xancho Jesucriston' chio', gone' cont šjayzoalenchone' toli tocaņe. Da'n'an' le soa le cueze batcan' gone' ca'.

<sup>22</sup> Baļ bene' chesaczejlaže' še cheyala' yesone' can' ža Diosen'. Le gwzejni'i legaque'. <sup>23</sup> Na' bene' ca' ba chesezolagüe' chosozenague' che diža' güenlažen', le gon con ga zelao saca'le cont yesyechoje' lo nez malen' na' le co'o legaque' nez güenna'. Na' yebaļ bene' chesonchgüe' da' xinj, na' lecze cheyala' yeyaše'cho legaque', perw do chaž chžebcho, do chgue'echo dan' chesonen' na' cheyala' gwsaca'cho cont bi goncho txen len da' xinjen' chesonen'.

*Judasen' chonxene' Diosen'*

24-25 Cheyała' gonxencho toz Dios ben' zaca' gonxencho, ben' nonē' yela' mban checho toli tocanē. Dios nan' naque' bene' sina' juisyw. Chac chone' cont bi lažo'cho goncho da' xinj, na' chac chone' cont bibi xtoła'cho gata' cate' yežincho lagüen' gan' yo'ochgua be'ni'. Leca yebecho cana'. Diosen' naque' la'zelagüe bene' zaca' bene' blao, na' zaque' chnabi'e doxen. Naque' Xan yogo' benač na' yogo' bica'chle da' de. Len' gocxene' cate' biña' xe yežlion' na' cheyała' gonxenchone' toli tocanē dan' gwsele' Xancho Jesucriston' chaclene' chio'. Ca'šca gac. Da' na'zen' chzoja'.

## JESUCRISTON' BZEJNI'IDE' SAN JUANNA' CHE DA' CA' ZA' GAC

*Diosen' bzejni'ide' Jesucriston' diža' quinga*

<sup>1</sup> Diosen' bzejni'ide' Jesucriston' diža' quinga cont le' gwlo'ede' bene' ca' chesejnilaže'ne' can' ba zoa gac. Nach ba gwsele' to bene' nac angl che' cont bzejni'iden' neda' Juan, neda' naca' ben' chon xšine'. <sup>2</sup> Na' chzoja' diža' li che yogo' da' ba ble'eda', na' nezda' da' li gwna Diosen' gac quinga, le Jesucriston' bzejni'iden' neda'.

<sup>3</sup> Mbalaz bene' ca' yosolab da' nga chzoja' da' bzene Diosen' neda' na' bene' ca' yesende' yosolab bene' yoble len, še da' li yosozenague' chen, le ba zoa gac can' žanna'.

*Juanna' chzoje' bene' ca' chesonxen Jesucriston' yež ca' gaže*

<sup>4</sup> Neda' Juan chzoja' le'e nita'le gaž yež che Asia chdop chžagle chonxenle Jesucriston'. Diosen' len Spiritw chen' yesenita'sque' yesaclene' le'e na' yesone' soa cuezle binlo len xbab chelen', Dios ben' ba zoacze' cate' biña' xe yežlion', na' soacze' toli tocañe. Na' Spiritw che Diosen' naquen ca gaže spiritw na' zoan lao Diosen' gan' chi'e chnabi'e. <sup>5</sup> Na' Jesucriston' lecze soa'sque' gaclene' le'e na' gone' soa cuezle binlo. Jesucriston' naque' ben' cho'e diža' li che Diosen'. Naque' bene' nechw bebane' ladjo bene' guaten' ben' bich nabia' yela' goten' le'. Na' le' chnabi'e yogo' nochle bene' gwnabia' že' yežlio nga. Dan' chacde' chio' bnežjw cuine' gosote'ne' na' blalj xchene' cont bnitlagüe' xtoła'chon'. <sup>6</sup> Nach ba gwleje' chio' cont nabia'cho txen len le' ca no rey na' cont soacho gonxencho Diosen' ca no bxož, Dios ben' nac Xe' na' lecze naque' ben' chonxene'. Cheyała' gonxen-chone' toli tocañe, le zoacze' chnabi'e toli tocañe. Can' gonščacžcho.

<sup>7</sup> Jesucriston' yide' da' yoble to lo' bejw, na' yogo' loł bene' yesele'ede' le', lente bene' ca' gosot le'. Na' bene' ca' že' to to latje lo yežlion', yesebežyaše' cate' yesele'ede' le'. Can' žia', na' can' gacšca.

<sup>8</sup> "Neda' naca' Dios ben' ben' yežlion' len yogo' bichle da' de, na' naca' ben' gon cont te chen. Da'nana' zaca'lebda' ca letr nechw da' nzi' A na' letr bzebe da' nzi' Z." Can' ža' Xancho Dios ben' nape' yela' guac xen juisyw, ben' ba zoacze' cate' biña' xe yežlion' na' soacze' toli tocañe.

*Juan ble'edaogüede' leca bene' zaca' juisyw nac Criston'*

<sup>9</sup> Neda' Juan naca' bene' lježle dan' naccho txen chzenagcho che Jesús'en' cont Diosen' chnabi'e yichjlažda' ocho, na' toz can' chosoči chososaca' bene' chio' neche xtižen', na' txen chaclen Jesucriston' chio' cont chyo chčhejcho len yogo' da' chac checho. Da' ba gwduxjue'eda' xtiža' Diosen' na' ba bia' diža' che Jesucriston', da'nana' gosezene' neda' na' gosesele' neda' pres gan' že' Patmos dan' nac to yežlio dao' lo' nisdaon'. <sup>10</sup> Na' to ža' dmigw Spiritw che Diosen' benen cont ble'edaogüeda', na' benda' Jesucriston' chñe' cožan' zižjehgua ca ga chbež trompeta. <sup>11</sup> Na' gože' neda':

—Neda' naca' ben' ben' yežlion' len yogo' bichle da' de, na' naca' ben' gon cont te chen. Da'nana' zaca'lebda' ca letr nechw da' nzi' A na' letr bzebe da' nzi' Z. Bzoj to le'e yiš da' quinga le'edo', na' seļon' lao bene' ca' nita' gaž yež che Asia chesedop chesežague' chesonxene' neda', yež ca' zjanzi'

Efeso, na' Esmirna, na' Pérgamo, na' Tiatira, na' Sardis, na' Filadelfia na' Laodicea.

<sup>12</sup> Na' gwyechja' gwña'a non' chne na' ble'eda' gaže candeler de oro. <sup>13</sup> Na' gachol' candeler ca' gaže, ble'eda' to bene' nac ca to benach' perw gocbe'eda' bi naque' benachze. Nyaze' to lache' ton' da' bžinte lo ni'e na' nchey cho'alcho'en ca to bant de oro. <sup>14</sup> Na' yiša' yichjen' naquen da' šiš ca xa xila' o ca no beye'. Na' yejlagüen' gosactiten ca to yi' da' čala'niñ. <sup>15</sup> Ni'e ca' ble'edan' ca to de bronce da' nłachgua cate' naquen ya'alj xoan lo yi'. Na' ši'en nenen zižjehgua ca chziž yegw cate' dechgua nis. <sup>16</sup> Na' noxe' gaže beljw len ne'e lıchan' na' lo' cho'en chchojen ca to spada da' nła chop la'an. Na' cho'alagüen' goctiten ca gwbiž cate' chña'chguan.

<sup>17</sup> Na' cate' ble'eda'ne' gwbiža' xni'en gottia' šlat. Nach bli' ne'e lıchan' gwxoen' yichja' na' gože'nda':

—Bi žebo'. Neda' naca' ben' ben yežlion' len yogo' bichle da' de, na' naca' ben' gon cont te čen. <sup>18</sup> Naca' ben' nsa' yeła' mban. Cana' gota' perw bebana' ladjo bene' guat na' zoacza' toli točane. Na' naquen lo na' nıa' bat yesat to to bene' na' nac gac čhegaque' cate' bach gosate'. <sup>19</sup> Na' na'a bzoj diža' čhe da' ca' ba ble'edo' na' diža' čhe da' ca' chac na'a na' diža' čhe da' ca' za' gac. <sup>20</sup> Na' da' nono na' neze čhe beljw ca' gaže dan' noxa' na' čhe candeler de oro ca' gaže, zejen quinga: beljw ca' zejen gaže bene' ca' cheso'e xtiža' len gaže cuen bene' ca' chesedop chesežag chesonxene' neda' gan' nzi' Asia. Na' candeler ca' gaže zejen gaž cuen bene' ca' chesonxen neda'.

## 2

*Da' gwna Jesucriston' čhe bene' ca' chesonxen le' lo ciuda ca' gaže: Da' gože' bene' Efeso ca'*

<sup>1</sup> 'Bzoj ben' choe' xtiža' len bene' ca' chesedop chesežag chesonxene' neda' lo ciuda Efeson', yo'one' neda' noxa' beljw ca' gaže len na' lıchan' na' chda' gachol' candeler de oro ca' gaže, na' yo'one' nedan' chapa'ne' diža' quinga: <sup>2</sup> "Neze nle'eda' ca güenna' chonle, can' chčhejlaže'le zoale chonchguale xšinan'. Nezda' bi chleble bene' cheson da' xinj, le ba ble'ele can' cheson bene' güenlaže' ca' chesene zjanaque' postlw na' chache'ele bi zjanaque' dogualje postlw. <sup>3</sup> Ba byo bčhejle len yogo' dan' ba goc čhele na' ba benchguale xšinan' na' bi jažaque'laže'le. <sup>4</sup> Perw da' nga bi chazlaža' can' chonle, da' bich chaquele neda' can' goquele neda' cana'. <sup>5</sup> Da'nan' le gon xbab can' gwzoale goquele neda' na' can' gwzoale bzenagle čhia' na' yetinje xtoła'le cont da' yoble gonle güen can' benle cana'. Na' še bi yetinjele xtoła'len', yedeyena' cont bich gacle candeler čhia'. <sup>6</sup> Perw la'czla' bi chontecle güen, chebeda' chgue'ele da' xinj da' cheson bene' ca' zjanzi' nicolaıtas, bene' ca' chesene' guac gontezechle da' xinj, le neda' lecze chgue'eda' can' chesonen'. <sup>7</sup> Le'e žia nagle da' chene, le gwzenag čhe da' nga ža Spiritw čhe Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', neda' goña' da' gagwle da' chbia lo yag yeła' mban da' zoa latje xdan čhe Diosen'."

*Da' gože' bene' Esmirna ca'*

<sup>8</sup> 'Na' na'a bzoj ben' choe' xtiža' len bene' ca' chesedop chesežag chesonxen neda' ciuda Esmirna, yo'one' naca' ben' ben yežlion' na' len yogo' bichle da' de na' ben' gon cont te čen, ben' lecze gote' na' bebane' ladjo bene' guat ca', na' yo'one' nedan' chapa'ne' diža' quinga: <sup>9</sup> "Neze

nle'eda' ca güenna' chonle. Nezda' chyi chzaca'le. Nezda' nacchgualé bene' yaše', la'czla' de chele da' zaca'ch clel ca yela' gwñi'an'. Na' ca nac bene' Israel bene' ca chesene' ba gwlej Diosen' legaue' cont gone' güen len legaue', nezda' bale' cheseñie' yela' ya' chele. Perw bi gwleje' ben' cheson ca', le bi cheseñilaže'ne', san zjanaue' dapa' txen chosozenague' che Satanás dan' chnabia' da' xigüe' ca'. <sup>10</sup> Bi žeble da' ca' za' gac chele, le Satanásen' gonen cont yeseyixjue' balle ližya cont gata'bia' še soen gonen cuejyichjle xtižan'. Na' lo to chope ža yosoči yososaue' le'e. Le soateze le gwzenag chia' la'czla' še yesote' le'e, na' gona' cont banle len neda' toli tocañe. <sup>11</sup> Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', bi gac chele can' yesac che bene' yesezaca'zi' toli tocañe dan' žacho yela' got gwchope."

*Da' gože' bene' Pérgamo ca'*

<sup>12</sup> Na' bzoj ben' choe' xtiža' len bene' ca' chesedop chesežag chesonxen neda' ciuda Pérgamo, yo'one' neda' napa' spada toše' dan' nla chop la'an, na' nedan' chapa'ne' diža' quinga: <sup>13</sup> "Neze nle'eda' ca güenna' chonle. Na' nezda' zoale lo ciuda gan' chnabia'chgua Satanásen', perw zoale chzenagle chia'. Nezda' bi chbejyichjle xtižan' dan' chejle'le na' neca gwlejyichjlen cate' gosote' Antipas ben' be'e xtižan' lo ciuda chelen' gan' že' bene' zan bene' chosozenag che Satanásen'. <sup>14</sup> Perw de to chope da' chonle da' bi chazlaža'. Le nita' balle chzejni'i lježle guac gontezle da' xinj. Ca'cze nac dan' bzejni'i da' Balaam da' rey Balac cani'. Da'n'an' gwsele' no'ole gosego'oyele' bene' Israel ca' cont gosagüe' yela' guagw da' nac che l gua'a lsaca' goseñilaže' bene' zito' ca' na' cont gosone' da' yela' zto' len cuerp chegaue'. <sup>15</sup> Na' lecze nita' balle chzenagle che dan' chgue'eda' dan' chososed chosolo'e bene' ca' zjanzi' nicolaítas. <sup>16</sup> Da'n'an' le yetinje che da' xinjen' chonle. Na' še bi yetinjele xtoła'len', la' yidtia' yedetillena' nole chonle da' xinjen' len spada dan' chchoj choan'. <sup>17</sup> Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', gona' le'e to yela' guagw da' zaca' da' nono na' le'e lo yežlion', to da' zaca'leben ca maná, na' gona' to yej šiš che to tole gan' yoj lale da' naquen to lale da' cobe da' nono nombia', lete le'e gaquen lo na'le gombia'len."

*Da' gože' bene' Tiatira ca'*

<sup>18</sup> Na' bzoj ben' choe' xtiža' len bene' ca' chesedop chesežag chesonxene' neda' lo ciuda Tiatira, na' yo'one' naca' dogualje Xi'in Dios, na' chactit yejlagua' ca to yi' da' chala'nin na' ni'a ca' chesaquen ca bronce da' cheyac ya'alj cate' xoan lo yi'. Yo'one' neda' chapa'ne' diža' quinga: <sup>19</sup> "Neze nle'eda' ca güenna' chonle, nezda' zoale chaquele neda', chejni-laže'lenda', chonchgualé xšinan' na' chchejele bite'teze chac chele, na' nezda' chonchle güen na'a clel can' benle cana'. <sup>20</sup> Perw de to da' chonle da' bi chazlaža', le choe'le latje zoa to no'ole naque' txen len le'e, no'olen' zaca'lebe ca da' reina Jezabel. Že' chsed chlo'ede' xtiža' Diosen' perw len diža' güenlaže' chen' chziye'e bene' cheseñilaže' neda' cont bale' chesone' da' nac da' yela' zto' len cuerp chegaquen' na' lecze chesagüe' yela' guagw da' chesena bene' naquen che l gua'a lsaca' cheseñilaže'. <sup>21</sup> Ba gwleza' cont yetinjde' che yela' zto' dan' chonen', perw bi chaclaže' yetinjen', na' bina' cuejyichje' yela' zton' chonen'. <sup>22</sup> Da'n'an' gona' cont gacšende'



na' gate' lo cam, na' gona' cont bene' ca' cheson yela' zton' txen len le' lecze yesale'chgüede' še bi yesebejyichje' da' ca' chzejni'ide' legaue' yesone'. <sup>23</sup> Nach bi' che' ca', gona' cont yesatbe'. Nach yogo' cuen bene' ca' chesedop chesežag chesonxene' neda' gate'teze yesacbe'ede' nombi'a yogo'te xbab da' yo'o lo' yichjlaždao' benach, na' gona' cont to toe' soe' mbalaz o saca'zi'e con ca nac da' ba bene'. <sup>24</sup> Na' le'e zoale Tiatiran' le'e bi chonle can' chsed chlo'e no'ole güenlažen' na' neca nsedle dan' chesene' chesejni'ide' che Satanásen' dan' nono nombia', bi nia' bichle da' cheyala' gonle. <sup>25</sup> Con soaczle gonle da' güen can' chonle tza tza, cont ne' chonle güen caten' yida' da' yoble. <sup>26</sup> Note'tezle še soele bi cuejyichjle xtižan', na' še soele ne' soatezle gonle can' nona' mandadw cate'ch yida' da' yoble, gona' cont nabia'le nación ca' txen len neda'. <sup>27</sup> Ca Xan' ba bene' cont chnabi'a nación ca', lecze can' gona' cont bene' bi yesebejyichje' xtiža' yesenabi'e txen len neda'. Na' yesenabi'e nación ca' na' žan ca žan bene' nación ca' yosozenague' chegaque', na' bene' ca' bi chosozenag, yosožiyae'e legaue' ca to bene' chzoxj to no yeso' xguague. <sup>28</sup> Na' gwnežjua' legaue' beljw xsilen'. <sup>29</sup> Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze.”

### 3

#### *Dan' gože' bene' Sardis ca'*

<sup>1</sup> Na' lecze bzoj ben' choe' xtiža' len bene' ca' chesedop chesežag chesonxen neda' lo ciuda Sardis, yo'one' napa' Spiritw che Dios dan' nac ca gaže spiritw, na' noxa' beljw ca' gaže, na' neda' chapa'ne' diža' quinga: “Neze nle'eda' yogo'lol dan' chonle. Nezda' nacle ca bene' guat la'czla' chze chele nable yela' mban toli tocañe. <sup>2</sup> Le gon xbab can' chonle na' le šejnilaže'ch neda' na' le gwzenag chia' šlac biña' yeyož cuiayi'le, le dan' chonlen' bi naquen can' chebe Dios ben' chonxena'. <sup>3</sup> Le soa le gon xbab che xtižan' dan' bosozejni'i bene' le'e na' da' bzenagle chen cana'. Le gwzenag chen na'a da' yoble cont yetinjele xtoła'len'. Na' še bi gonle xbab yetinje xtoła'len', žin ža yedexenyala' le'e na' gona' castigw chele ca chzenyal to no bene' gwban cate' chbane'. Bi nezele bi ža bi hor. <sup>4</sup> Bia'cze nita' balle bene' Sardis biña' gonle da' malen' txen len bene' yezica'chle. Na' le'e nac lažda'olen' xilaže' len neda', žin ža gona' lache' šiš chazle na' talenle neda', le zaca'le cont gonle neda' txen. <sup>5</sup> Note'tezle še soele bi cuejyichjle xtižan', žin ža gona' lache' šiš chazle, na' gwbat yoxia' lalen' le'e libr chia' gan' nyoj la yogo' bene' zjanape' yela' mban toli tocañe, na' güe'lena' Xan' diža' na' len bene' zjanac angl che' ca' yapegaca'ne' nacle neda' txen. <sup>6</sup> Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze.”

#### *Da' gože' bene' Filadelfia ca'*

<sup>7</sup> Na' lecze bzoj ben' choe' xtiža' len bene' ca' chesedop chesežag chesonxen neda' lo ciuda Filadelfia, yo'one' naca' bene' laždao' xilaže' juisyw, na' zoateza' chona' can' gwnia' gona'. Napa' xinya che da' rey David. Cate' chsaljua' cont yeso'o bene' gan' zoa Diosen' chnabi'e, nono gac yosejyw, na' cate' chseyjua' cont bi yeso'e, nono gac saljw. Yo'one' neda' chapa'ne' diža' quinga: <sup>8</sup> “Neze nle'eda' ca güenna' chonle. Nach ba gwsaljua' ca to puert che le'e da' nono gac yosejyw. Na' la'czla' bi nac zanle, ba chzenagle xtižan' na' bi gwlejyichjlen caten' bosochi

bososaque' le'e. <sup>9</sup> Baḷ beṇe' Israel že' gan' zoalen' chesene' ba gwlej Diosen' legaue' cont gone' güen len legaue', perw bi gwleje' legaue', le bi chesejnilaže'ne'. Zjanaque' dapa' txen chosozenague' che Satanás dan' chnabia' da' xigüe' ca'. Na' ca nac legaue', gona' cont žin ža yesape' le'e bala'an cate' yesacbe'ede' chacda' le'e. <sup>10</sup> Ba byo bchejle len yogo' dan' gwdi gwxaca'le na' benle can' nona' mandadw, na' da'nan' gona' yechojle güen cate' žin ža saca'zi' yogo' beṇač. Cana' gata'bia' che to to beṇač še yosozenague' chia' o še bi yosozenague'. <sup>11</sup> Ba zoa yida' da' yoble. Le soačhač le šejnilaže'nda' na' gwzenagle chia' cont bibi gwžon soale mbalaz toli tocaṇe. <sup>12</sup> Note'tezle še soele bi cuejyichle xtižan', žin ža gona' gacle ca bdope da' zjanita' lo' yodao' blao che Dios ben' chonxena', le yežinle gan' zoa Diosen' na' yega'anlenle' toli tocaṇe. Na' gwzoja' loxga to tole la Dios ben' chonxena' na' la ciuda che', ciuda Jerusalén da' nac da' cobe da' chi' yaba na' yetjen lo yežlion'. Na' gwzoja' loxga to tole la neda' da' nac da' cobe. <sup>13</sup> Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze."

*Dan' gože' beṇe' Laodicea ca'*

<sup>14</sup> Na' bzoj ben' choe' xtiža' len beṇe' ca' chesedop chesežag chesonxen neda' lo ciuda Laodicea, yo'one' chona' cont chac can' chnalaže' Diosen'. Cho'a diža' li da' nac cayanen' che' Diosen' neda'. Txen len neda' ben Diosen' beṇač na' yogo'lol bichle da' de le'e yaban' na' lo yežlion'. Yo'one' neda' chapa'ne' diža' quinga: <sup>15</sup> "Neze nle'eda' ca chonle, bi nacho chgue'ele neda' na' neca chaquele neda'. Yebechda' šaca' chgue'ele neda' o šaca' chaquele neda'. <sup>16</sup> Na' da' bi chonle cuent gaquele neda', da'nan' ba zoa cuejyichja' le'e bich gona' le'e ca xi'ina'. <sup>17</sup> Le'e žale zoale mbalaz, žale chonle da' güenchgua, žale bibi chyažjele le chebechgüe Diosen' le'e. Na' bi chacbe'ele leca beṇe' zban nacle len Diosen'. Bi chacbe'ele nacle ca to beṇe' bi chle'e o ca to beṇe' laže' ga'alyid da' bi chejni'ile xtižan' neca chzenagle chen. <sup>18</sup> Da'nan' chnia' le'e cheyaḷa' si'le da' goṇa' le'e, le naquen da' zaca'ch ca oro dan' ba bosozeye' cont bega'an da' dogualje. Si'le da' goṇa' le'e cont da' li soale mbalaz. Na' le nab yezi'xena' xtoḷa'le cont gac lažda'olen' xilaže' can' chac xaḷana' beṇe' nyaz to lache' šiš xila'. Gonle ca' cont bich le'eda' le'e ca to beṇe' laže' ga'alyid, beṇe' cheyaḷa' gaque zto'. Na' le güe' latje yocoba' xbab chelen' cont bich gacle ca to beṇe' bi chle'e, beṇe' chyažje rmed che yejlagüe' cont le'ede', san gache'ele da' chaclaže' Diosen' gonle. <sup>19</sup> Note'teze beṇe' chacda', chdiḷa'ne' na' chnežjua'ne' castigw cate' chone' da' xinj. Da'nan' cheyaḷa' cuec yichjle yetinjele xtoḷa'len'. <sup>20</sup> Chnia' to tole ca to beṇe' zecha cho'a yo'o chelen' chnie' na' chsiže' le'e puerten'. Note'tezle še gwzenagle chia' na' še saljwle cont šo'a, yedesoa' len le'e na' gona' cont soale mbalaz txen len neda'. <sup>21</sup> Na' note'tezle še soele bi cuejyichjle xtižan', žin ža gona' cont cue'lenle neda' gan' chi'a chnabi'a. Can' bena' neda', gwzoeda' cont bena' can' gwna Xan' nach chi'lena'ne' chnabi'a'to' txen. <sup>22</sup> Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze."

**4**

*Ben' že' yaban' chesonxene' Diosen'*

<sup>1</sup> Beyož bzoja' da' ca' gwne' neda', ble'edaogüeda' nyaljo to puert yaban'. Nach da' yoble benda' gwne Jesucristw ben' gwne neda' da' nechw zižjehgua cacze zižje chbež to trompeta, gože'nda':

—Gwyep gan' zoa' nga cont gwlo'eda' le' da' ca' za' gag.

<sup>2</sup> Nach la' bente Spiritw che Diosen' cont ble'edaogüeda' yaban' gan' chi' Diosen' chnabi'e. <sup>3</sup> Na' ble'eda' ben' chi' chnabian' chactite' ca chactit yejese, yej da' nzi' jaspe na' da' nzi' cornalina. Na' to da' nac ca to pita' gwyečhjen gan' chi'e chnabi'en, na' chactiten ca chactit to yej da' nzi' esmeralda. <sup>4</sup> Na' cue'ej cuit Diosen' gan' chi'e chnabi'e zjachi' yetapechoa bene' gwlej Diosen' zjanaque' blao, bene' chesenabi'e txen len le'. Zjanyaze' lache' šiš na' zjazoa corona de oro yichj to togaque'. <sup>5</sup> Na' gan' chi' Diosen' chnabi'e chep yes na' chac sšag na' chašjw chtin. Na' lagüen' nita' gaže yi' da' čala'nin. Yi' ca' gaže zjanaquen Spiritw che Diosen', na' Spiritw che Diosen' naquen ca gaže spiritw. <sup>6</sup> Na' doxen lagüe' gan' chi'e chnabi'en nžiljw lo yon' to da' chactit ca vidrw na' nlan' ca to nis nyadi da' nla'xeje.

Na' nita' yetap bene' gan' zoa Diosen'. Tgüejje' nita' cuite' chop la'ate, yetoe' cože' na' yetoe' lagüe', na' zjažia da' zan yejlaogaque', žia da' žia laogaque' na' lente cože'gaque'. <sup>7</sup> Bene' nechw naque' ca to león, na' bene' gwchope ca to go'n, na' bene' gwyone nac cho'alagüe' ca che benach, na' bene' gwdape naque' ca to bsia be ze lo be'. <sup>8</sup> Na' dapte bene' ca' to toe' žia xop güejje xilgaque', na' zjažia zan yejlaogaque' lo xilen' lente cože' xilen'. Na' do ža do yel bi chososane' chesene':

Leca bene' laždao' xilaže' juisyw nac Xancho Diosen' ben' nape la'zelagüe yela' guac xen.

Ba zoacze' cate' za' xe yežlion', na' soacze' toli tocaņe.

<sup>9</sup> Na' yogo' ni'a cate' bene' ca' tap cheso'e diža' catec bene' zaca' nac Dios ben' chi' chnabia', ben' zoacze' toli tocaņe, yogo' ni'a cate' chesonxene' le' cheso'e yela' choxclen che', <sup>10</sup> bene' tapechoa ca' gwlej Diosen' cont zjanaque' blao chosozoa xibe' lao Dios ben' zoa toli tocaņe chesonxene' le' gan' chi'e chnabi'e na' chosonite' corona čhegaquen' xni'en, chesene':

<sup>11</sup> Xanto' Dios, zaco' gonxento' le',  
na' soato' le' bala'aņ na' güe'to' diža' che yela' guac xen chion',  
le len' beno' yogo'lol' da' de,  
na' beno' yogo'loľen con ca gwnalažo'.

## 5

*Jesucristw ben' zaca'lebe ca xila' daon' gosot bene' Israel ca' neče xto'la'gaque'*

<sup>1</sup> Na' ble'eda' Dios ben' chi' chnabia', len ne'e liča noxe' to yiš da' ndobyoyen na' nyoj chop la'aten na' nyeyjon nyišen' gaže seyw. <sup>2</sup> Na' ble'eda' to angl gual gwne' zižje gwne':

—¿Non' zaca' gwzoxj seyw ca' cont šaš yišen'?

<sup>3</sup> Na' nono bžel bene' zaca' gwzaše' yišen' neca yaban' na' ne yežlion' na' neca gan' že' bene' guat ca'. Ne to nono bžel bene' la'č le'ezden' nac naquen. <sup>4</sup> Na' gwčežchgua' da' nono zoa bene' zaca' gwzaše' yišen' gwlaben' na' neca zaque' na'ze' nac naquen. <sup>5</sup> Nach to bene' gwlej Diosen' cont naque' blao gože'nda':

—Bitw cuežo'. Gwna'šc, na' zoa Jesucristw ben' golje lo diaža che da' Judá, naque' rey can' nac da' xozxta'ogüe' David, na' da' nape' yela'

chnabia' xen zaca'lebde' ca to bež be nzi' león. Na' le' zaque' gwzoxje' seyw ca' gaže na' gwzaše' yišen', le ba gwzoede' bene' cont gac n̄itlao xtoła' benachen'.

<sup>6</sup> Nach ble'eda'ne' zeche' gan' chi' ben' chnabian' na' ladjo beñe' ca' tap ben' zjažia x̄il, do gachol beñe' blao ca' tapechoa. Ble'eda'ne' ca to xila' dao' ben' ba gosote', ca xila' be žia gaže lozba' na' gaže yejlaoba'. Na' yejlaoban' gaže zejen zoa Spiritw che Diosen' doxen lo yežlion' chonen can' ža Diosen'. <sup>7</sup> Nach ben' ble'eda' ca to xila' dao' jaxi'e yiš dan' noxe' ben' len ne'e liča gan' chi'e chnabi'en. <sup>8</sup> Na' cate' jaxi'e yišen' beñe' ca' tap lente beñe' blao ca' tapechoa bosozoa xibgaque' lagüen'. Na' to to beñe' blao ca' zjanoxe' to arpa na' to barser de oro gan' chey yal, na' yalen' zejen xtiža' beñe' ca' zjanac lo na' Diosen', dižan' cheso'e'lene' le' caten' chosol güiže'ne'. <sup>9</sup> Nach beñe' ca' gosole' to da' cobe dan' ža:

Zaco' jaxi'o yišen' cont gwzašon' na' gwzoxjo' seyw ca' nyišen',  
le bnežjw cuino' gosote' le'.

Blalj xcheno' cont bn̄itlaguo' xtoła'to',

na' gwxi'o neto' cont nacto' lo na' Dios,

neto' nacto' beñe' to to naciön, to to yež, to to diaža na' chacto' gwde  
gwdele diža' da' de lo yežlion'.

<sup>10</sup> Na' gwlejo' neto' cont nacto' ca rey,

na' zoato' chonxento' Dios cheton' ca b̄xoz,

na' žin ža nabia'to' lo yežlion'.

<sup>11</sup> Nach gw̄na'a na' ble'eda' beñe' zan juisyw angl, neca gwzoeda' gwlabane'. Zjazecha angl ca' cue'ej cuit ben' chi' chnabian' na' gan' že' beñe' ca' tap na' beñe' blao ca' tapechoa. <sup>12</sup> Na' benda' cheso'e dižan' žižje chesene':

Jesucriston' bnežjw cuine' neče xtoła' benachen',

na' da'nan' zaca'lebde' ca xila' daon' gosot beñe' Israel cont gwn̄itlao  
xtoła'gaque'.

Na' Jesucriston' zaca'cze' gonxenchone',

le chnabi'e doxen, na' yo'o lo ne'e yogo'te da' zjade.

Naque' beñe' sina' gual, na' nape' yela' guac xen.

Cheyala' güe'chone' yela' bala'an,

na' güe'cho diža' naque' beñe' zaca' juisyw.

<sup>13</sup> Na' lecze benda' yogo' beñe' že' yaban' na' yežlion' na' beñe' že' latje  
che beñe' guat, na' beñe' zjanita' lo nisdao', cheso'e diža' chesene':

Tołi tocañe chonxencho Dios ben' chi' chnabia'

na' Jesucriston' ben' zaca'lebde' ca xila' daon' gosot beñe' Israel cont  
gwn̄itlao xtoła'gaque'.

Zjanape' yela' bala'an, na' zjanaque' beñe' zaca' juisyw,

na' zjanape' yela' guac xen juisyw tołi tocañe.

Na' benda' lecze can' gosena be chaš yežlion' na' be chaš le'e yaban' na' lo'  
nis, na' len yogo' bichle da' zjade.

<sup>14</sup> Nach beñe' ca' tap ben' zjažia x̄il gosene':

—Ca'šcace gac.

Na' beñe' blao ca' tapechoa bosozoa xibgaque' gosonxene' Dios ben' zoa  
tołi tocañe.

## 6

<sup>1</sup> Ca nac seyw ca' gaže, ble'eda' cate' ben' zaca'lebde' ca xila' daon' be gosot bene' gualaž četo' neče xtoła'gaque' bzoخة' seyw nechon'. Nach bene' ca' tap zjažia xil, toe' gwne' ziže, ca zižen' chašjw chtin yi' gwzio', gwne':

—Da, na' gwna' da' nga.

<sup>2</sup> Na' cate' gwna'a, ble'eda' to cabayw be šiš na' ben' žie' cože'ban' noxe' to arcw. Ba bosozoe' to corona yichje' neče da' ba bene' gan lo gwdile, na' na'a ba zeje' da' yoble cont tillene' nochle bene' chesegue'ede' le' na' gone' gan legaque'.

<sup>3</sup> Na' ben' zaca'lebde' ca xila' dao' be gosot bene' gualaž četo' neče xtoła'gaque', cate' bzoخة' seyw gwchope benda' gwne' yeto ben' žia xil, ben' nac bene' gwchope, gwne':

—Da, na' gwna' da' nga.

<sup>4</sup> Nach bchoj yeto cabayw, na' bena' nacha' be xna. Na' ben' žie' cože'ban' gwyo'o lo ne'e gone' cont bene' že' yežlion' bich yesenite' binlo len lježe' san yesot lježe'. Na' bosonežjue'ne' to spada xen.

<sup>5</sup> Na' cate' ben' zaca'lebde' ca xila' daon' be gosot bene' gualaž četo' neče xtoła'gaque' bzoخة' seyw gwyone, benda' gwne' bene' gwyone ben' žia xil, gwne':

—Da, na' gwna' da' nga.

Nach gwna'a na' ble'eda' to cabayw gasj na' ben' žie' cože'ban' noxe' to xigonž. <sup>6</sup> Na' benda' gwne' to bene' do gan' že' bene' ca' tap ben' zjažia xil, gože' ben' žia cože' cabayw gasja', gwne':

—Gwyej jažiayi' trigw na' cebada cont yesaquen gwbin na' cont chop ya trigw saca' laxjue' da' yesone' gan tža žin na' xop ya cebada saca' laxjue' da' yesone' gan tža žin, perw bi gono' cont cuiayi' set na' vino.

<sup>7</sup> Na' cate' ben' zaca'lebde' ca xila' daon' be gosot bene' gualaž četo' neče xtoła'gaque' bzoخة' seyw gwdape, benda' gwne' bene' gwdape ben' žia xil, gwne':

—Da, na' gwna' da' nga.

<sup>8</sup> Nach gwna'a na' ble'eda' to cabayw be gaše, na' ben' žie' cože'ban' lie' Yela' Got. Na' yeto bene' zej cože', lie' Latje Gan' Že' Bene' Guat. Na' gosac lo na'gaque' bosoxie' gwdile gan' gosat bene' zan, na' gosone' cont gosat yezane' gwbin, na' gosone' cont yezan bene' gosate' len yižgüe', na' gosone' cont be znia gosotba' yezane', na' goc ca' lao to tlaw yežlion' dan' gosac lo ne'e.

<sup>9</sup> Nach cate' ben' zaca'lebde' ca xila' daon' be gosot bene' gualaž četo' neče xtoła'gaque' bzoخة' seyw gayo', ble'eda' mes gan' bene' ca' že' yaban' chosozeye' bi dan' chosozeye' cate' chesonxene' Diosen', na' xni'a mesen' ble'eda' bene' ca' ba gosot yezica'chle bene' legaque' lagüe dan' bosozenague' xtiža' Diosen' na' lagüe dan' goso'e diža' gosene' chesejni-laže' Jesucriston'. <sup>10</sup> Na' bene' guat ca' gosene' ziže gosene':

—Xanto' Dios, le' naco' bene' laždao' xilaže' juisyw na' zoaczo' chono' con ca žo'. ¿Batcan' gono' yela' justis che bene' ca' že' yežlion' ben' gosot neto'? ¿Batcan' gono' cont yezezaca'zi'e da' bosolalje' xchenton'?

<sup>11</sup> Nach Diosen' bnežjue' to to bene' guat ca' tgüje xagaque' da' šiš da' gosaze'. Na' gože' legaque' yesyezi'laže'che' yeto chop ža šlac yeseza' bene' cheyala' yesat can' gosate' lagüe da' chesonxene' Criston', bene' zjanac ca biše' lježe'.

<sup>12</sup> Nach ben' zaca'lebde' ca xila' daon' be gosot beṇe' gualaż cḥeto' neḥe xtoła'gaque', cate' bzoḥje' seyw gwxoḥe, gwṇa'a na' leca gwxo'. Na' gwbižen' beyaquen gasj ca lache' gasj da' chesaz beṇe' chesegüine', na' doxen bion' beyaquen xna ca chen. <sup>13</sup> Na' beljw ca' besejñjen besežinten lo yežlion' can' cḥyñj no yixgüigw da' žia lo xyaguen cate' cḥeḥj to be' gual da' cḥtan len. <sup>14</sup> Nach le'e yaban' benittecczen ca to no yiš da' cḥedoblolen. Na' yogo' ya'a ca' na' no yežlio dao' da' ca' zjachi' lo' nisdaon' bososa' xišnan'. <sup>15</sup> Nach yogo' loḷ beṇe' že' yežlion', yogo' beṇe' ca' chesenabia' lo yežlion', yogo' xan soldadw, yogo' beṇe' blao beṇe' gwṇi'a, yogo' beṇe' cheson xšin beṇe' yoble ca beyixe', na' len yezica'chle beṇe', yogo'cze' bosocuaše' cuingaque' do xan bloj, do ladjo yej xen da' zjažia lo ya'a ca'. <sup>16</sup> Na' gosene':

—Cḥešca bdiñj na' yej quinga na' ya'a quinga yesebiḥen yeseyenen chio' cont bi le'e Diosen' chio', Dios ben' chi' cḥnabia', na' yeseyenen chio' cont Jesucriston' ben' zaca'lebde' ca xila' daon' be gosot beṇe' neḥe xtoła'gaque' bi gone' saca'zi'cho. <sup>17</sup> Le ba bžin ža gac juisyw, na' Diosen' len Jesucriston' leca cheseže'e chio' bi chonxencho legaque', na' nono soe da' yesone' saca'zi'cho.

## 7

### *Beṇe' Israel ca' beṇe' zjanyiše' seyw cḥe Diosen'*

<sup>1</sup> Gwdena' ble'eda' tap angl zjazeche' tap squin cḥe yežlion' bosozague' ben' cont bi gwyeḥjen lo yežlion', lo nisdaon' o gan' ze yag ca'. <sup>2</sup> Na' ble'eda' yeto angl beṇe' za' gan' chla' gwbiž na' noxe' to da' gwḥine' gwḥiše'de' seyw cḥe Dios loxga beṇe' ca' chesonxen le', Dios beṇe' zoa toḷi tocaṇe. Na' anglen' gwṇe' zižje boḷ güiže' angl ca' tap ben' zjanac lo ne'e yesone' gac yela' zi' lo yežlion' len lo nisdaon'. <sup>3</sup> Gože' legaque':

—Bi gwžiai'le yežlion', ne nisdaon', ne yag ca' šlac biṇa' gwḥiša' seyw cḥe Dios cḥeḥo loxga beṇe' ca' chesonxen le'.

<sup>4</sup> Na' benda' gwne' baḷ beṇe' bḥiše' seyon' beṇe' za'ac lo yogo' diaža cḥe beṇe' Israel, na' yogüe' gosac to gayoa tapeyon mile'. <sup>5</sup> Šižinw mile' za'aque' lo diaža cḥe da' Judá, šižinw mile' lo diaža cḥe da' Rubén, šižinw mile' lo diaža cḥe da' Gad, <sup>6</sup> na' šižinw mile' lo diaža cḥe da' Aser, šižinw mile' lo diaža cḥe da' Neftalí, šižinw mile' lo diaža cḥe da' Manasés, <sup>7</sup> na' šižinw mile' lo diaža cḥe da' Simeón, šižinw mile' lo diaža cḥe da' Leví, šižinw mile' lo diaža cḥe da' Isacar, <sup>8</sup> šižinw mile' lo diaža cḥe da' Zabulón, šižinw mile' lo diaža cḥe da' José na' šižinw mile' lo diaža cḥe da' Benjamín.

### *Beṇe' zan zjanyaze' lache' šiš*

<sup>9</sup> Na' gwdena' gwṇa'a da' yoble na' ble'eda' zjaze beṇe' zan lao Diosen' gan' chi'e cḥnabi'e na' lao ben' zaca'lebde' ca xila' daon' be gosot beṇe' Israel neḥe xtoła'gaque'. Na' nono goc yosolab baḷ beṇe' že', le gosaque' beṇe' zan juisyw, beṇe' to to nación, to to yež, to to diaža, na' gosaque' beṇe' chesac gwde gwdele diža' da' de lo yežlion'. Na' yogüe' zjanyaze' lache' šiš na' zjanoxe' zin. <sup>10</sup> Na' chesyebede' bososye'e gosene':

Xanto' Dios ben' chi' cḥnabia' na' Jesucristw ben' zaca'lebde' ca xila' daon' be gosot beṇe' Israel neḥe xtoła'gaque',  
legaque' ba gosone' yela' mban cḥeḥo toḷi tocaṇe.

11 Nach yogo'loł angl ca' zjaze' cue'ej cuite' gan' chi'e chnabi'e, na' bene' blao ca' tapechoa na' bene' ca' tap zjažia xil, yogo'lole' jasechaze' coscho'ale lo yon' gosonxene' Diosen',<sup>12</sup> gosene':

Chac can' cheyala' gac, Dios cheto'.

Zaca'czo' gonxento' le' toli tocane,

le naco' bene' zaca' juisyw,

naco' la'zelagüe bene' sina',

zaco' güe'to' yela' choxclen chio' na' güe'to' yela' bala'an chio' toli tocane, chnabi'o doxen, na' napo' la'zelagüe yela' guac xen.

Can' nacczen.

<sup>13</sup> Nach to bene' blao ben' nac txen len bene' tapechoa ca' gože'nda':

—¿Nezdo' no zjanac bene' quinga zjanyaz lache' šiš na' ga za'aque'?

<sup>14</sup> Na' boži'an goša'ne':

—Le' nezdo' bene' gole, bi nezda' neda'.

Nach gože' neda':

—Bene' quinga ba gosale'de' da' ba gosac chegaque' yežlion'. Na' bach gwnitlao xtola'gaque' na' ba zjanyaze' lache' šiš, le chesejnilaže' Jesucristw ben' blalj xchene' ca xila' dao' be gosot bene' Israel cont bezi'xen Diosen' xtola'gaque'.<sup>15</sup> Da'nan' nite' lao Diosen' gan' chi'e chnabi'en chesonxene' le' do ža do yel. Na' Dios ben' chi' chnabi'e zoe' chape' legaque'.<sup>16</sup> Bich yesebil' yesedone', na' gwbižen' bich gwzeyen legaque', neca yesacde' zeye'.<sup>17</sup> Le Jesucristw ben' zaca'lebde' ca xila' daon' ben' gosot bene' Israel neche xtola'gaque', len' chgüia chne'e legaque'. Ze' lao Diosen' gachol gan' chi'e chnabi'e na' gone' cont nita'chgüe' mbalaz. Gone' cont bich yesebeže' neca yesegüine'de'.

## 8

### *Seyw gažen'*

<sup>1</sup> Gwde gože' neda' ca', nach Jesucristw ben' zaca'lebde' ca xila' daon' be gosot bene' gualaž cheton' bzoxje' seyw gaže da' nyiše' yiša', na' cate' bzoxjen' gocži yaban' do gašj hor. <sup>2</sup> Na' ble'eda' gaže angl ca' zjazeche' lao Diosen', na' bnežjue' legaque' tgüje trompeta. <sup>3</sup> Na' yeto angl bedeseche' cho'a mes de oro da' zoa lao Diosen' gan' chi'e chnabi'e, mesen' gan' bene' ca' že' yaban' chosozeye' bi da' chosozeye' cate' chesonxene' Diosen'. Na' angla' noxe' to barser de oro gan' yo'o da' zcha'o yal na' bžien' lo yi' ya'alj da' žia lo mesen'. Anglen' bene' ca' cont naquen txen len ši'i bene' ca' chesonxene' Diosen' bate'teze chosol güiže'ne'. <sup>4</sup> Nach gwyas žen che yala' noxe' anglen' gwloen lao Diosen' len xtiza' bene' ca' chesonxene' le'. <sup>5</sup> Nach anglen' gwxi'e ya'alj da' žia lo mesen' gwlo'en lo' barseren' na' bzalen' lo yežlion' na' gošj gwtinchgua, na' goc bichle sšag, gwyep yes na' gwxo'.

### *Trompeta ca'*

<sup>6</sup> Nach angl ca' gaže ben' zjanoxe' trompeta ca' bosozooan' cho'agaque' cont yosocuežen'.

<sup>7</sup> Angl nechon' bcuež trompeta chen', na' gwche'chgua yej lo yežlion' na' nchixen yi' na' chen. Na' da' zcha'o yežlion' gwžiyai', yelate'ze ca goc gašje yo da' de lo yežlion' gwyeyen, lente yag da' ze lagüen goseyen, na' lecze yeto ca'ate' yixe' ga' da' de lo yežlion' goseyen.

<sup>8</sup> Nach angl gwchope bcuež trompeta chen', na' to da' nac ca to ya'a xen blažon' lo' nesdaon' chala'ninen. Na' yelate'ze ca goc gašje nesdaon'

beyaquen chen. <sup>9</sup> Na' yelate'ze ca goc gašje be ca' že' lo' nisdaon' gosatba', na' leze yeto ca'te' barcw ca' chaš lo nisen' gosebiayin'.

<sup>10</sup> Nach angl gwyone bcuež trompeta chen' na' to beljw xen blažon' le'e yaba čala'ninen ca to yi' yech. Jago'onen lo da' zan yegw na' da' zan ga chal nis lo yežlion', yelate'ze ca goc gašje yegw ca' na' ga chal nis dan' zjade yežlion' gan' jago'onenna'. <sup>11</sup> Na' beljon' nzin' Da' Zla', na' nisen' gan' jago'onenna' beyaquen zla' na' bene' zan gosat dan' gose'eje' nisen'.

<sup>12</sup> Nach angl gwdape bcuež trompeta chen' na' yelate'ze ca goc gašje gwbižen' gwžiyain', lece yeto ca'te' bion' gwžiyain' na' lece yelate'ze ca goc gašje beljw ca' gosebiayin'. Na' da' ca' gosebiayin' bich bososenin'. Da'n'an' gwdena' goc čhoł yelate'ze ca goc gašj ža gašj yel, na goc ca' yogo' ža yogo' yel.

<sup>13</sup> Nach gwna'a na' ble'eda' chda lo be' to angl do gachol le'e yaban' na' benda' gwne' zižje, gwne':

—iNyaše'chgua yesac che bene' ca' že' yežlion' yeyož yosocuež angl ca' yešone trompeta čhegaquen'!

## 9

<sup>1</sup> Nach angl bene' gayo' bcuež trompeta chen' na' ble'eda' to beljw da' blažon' le'e yaban' jago'onen lo yežlion'. Na' beljon' goquen ca to bene' na' Diosen' bnežjue'ne' xinya cont saljue' yechw zitjwchgua dan' nac lo gabil'. <sup>2</sup> Nach gwsaljue' yechon' na' gwyaschgua žen can' chas žen cate' chesebeque' yi' gual to lo' horn. Na' goc čhoł le'e yaban' can' chac cate' čičhgua žendao', lao gwbižen' len lo be' goquen čhoł catec gwche' ženna'. <sup>3</sup> Gan' gwyas ženna' besežaš biše'zo zan gwyašba' lo yežlion', be yeseyižba' bene' can' cheson bexjoni' be chaš yežlio. <sup>4</sup> Diosen' gože'ba' bibi yesoneba' yixe' ga', ne da' zjanaze' na' neca yag ca' ze yežlion', san yeseyižba' bene' ca' bi nyiše' sey čhe Diosen' loxgagaque'. <sup>5</sup> Na' bi be'e latje yesotba' legaque', san šašba' gayo' bio' yosoči yososaca'ba' bene' ca'. Na' cate' yeseyižba' bene', yesežaglagüe' can' čžaglaochoc cate' chyž bexjonin' chio'. <sup>6</sup> Na' cate' žin za yesomba' ca', bene' že' yežlion' yeseñablaže' yesate', perw bi yesate'; yesaclaže' bich yesenite', perw bi gac can' yesaclažen'.

<sup>7</sup> Ca nac biše'zo ca', ble'eda' zjanacba' ca cabayw be šja'ac lo gwdile. Yičhgacban' zjazoa da' nac ca corona de oro. Cho'alaoban' naquen ca cho'alao beñach. <sup>8</sup> Zjažiaba' yiša' da' nac ca yiša' yičh no'ole. Layban' zjanaquen ca lay bež znia be nzi' león. <sup>9</sup> Na' zjanyazba' to da' nac de ya da' chcue'ejen cuerp čhegacban'. Na' sšag da' chesomba' len xilgacban' chninen ca chniñ cate' chesa'aces cabayw zan zja'acba' lo gwdile zjanxobba' carret. <sup>10</sup> Na' lo xban biše'zo ca' zjazoa liba' zjanaquen ca xban bexjoni' cont yeseyižba' bene', na' goc lo na'gacba' yosoči yososaca'ba' bene' že' yežlion' gayo' bio', yeseyižba' legaque'. <sup>11</sup> Angl ben' beyac da' xigüe' dan' chnabia' gabilen' naquen xan biše'zo ca'. Lenna' nzi' Abadón diža' hebreo na' lece nzin' Apolión diža' griego, na' zejen diža' Da' Čžiyain'.

<sup>12</sup> Ba gwde yela' zi' nechon' na' za' za'ac yečopen.

<sup>13</sup> Nach bcuež angl gwxopen' trompeta chen', na' benda' gwne' to bene' do gan' zoa mes de oro dan' ze lao Diosen', mes da' žia lozen dapte squin, mesen' gan' bene' ca' že' yaban' chosozeye' bi da' chosozeye' cate' chesonxene' Diosen'. <sup>14</sup> Na' bol' güiže' angl gwxop ben' noxe' trompetan', gože'ne':



—Besež dap angl ca' ben' besyeyac bene' mal ben' zjanchej cho'a yegw da' nzi' Eufrates.

<sup>15</sup>Nach beseže' angl ca' tap bene' ca' bnita' Diosen' cont yesaše' lo iz, bio', ža na' horen' nžie' bia' yesote' benach, na' caten' gosaše', yelate'ze ca goc gašje bene' že' yežlion' gosote'. <sup>16</sup>Na' gwnita' chop gayoa millón soldadw čhegaque' zjažie' cože' cabayon'.

<sup>17</sup>Quinga ble'edaogüeda' cabayw ca' na' angl ca' bene' besyeyac bene' mal zjažie' cože'gacba' zjanaque' soldadw. Angl ca' zjanyaze' to de ya da' chcue'ej cho'alcho'gaque' na' yana' chnan' ca color che yi' na' chnan' da' azul na' da' gaše. Na' yichj cabayw ca' zjanaquen ca yichj bež znia be nzi' león, na' chchoj yi' cho'agacba' len žen na' len azufre da' čala'nin. <sup>18</sup>Yelate'ze ca goc gašje bene' že' yežlion' gosat len yi' na' len žen na' len azufre da' bchoj lo cho'agacba'. <sup>19</sup>Na' bosochin cho'agacba' na' len xbangacba' cont gosotba' benach, na' xbangacban' gosaquen ca bel' na' zjansa' yichjen cont goseyi'inen bene'.

<sup>20</sup>Na' bene' ca' besyega'an bi gosat cate' gwyas' cabayw ca' lo yežlion', legaque' bi besyetinjde' che da' mal ca' chesone', neca bososane' da' chesonxene' da' xigüe' ca' na' l' gua'a lsaca' čhegaque' ca' da' zjanac de oro, de plata, de bronce, de yej o de yag, la'czla' l' gua'a lsaca' ca' bi chesele'en, neca chesenen, na' neca chac yesa'aquen. <sup>21</sup>Na' neca besyetinjde' cont yesebejyichje' bichle da' mal da' chesone', ca dan' chesote' bene', da' chesone' txen len no bene' guaža', da' chesone' da' yela' zto' len cuerp čhegaquen', na' da' chesebane' da' de che bene'.

## 10

### *Angl bene' noxe' yiš dao' ndobyoyen*

<sup>1</sup>Nach ble'eda' yeto angl gual gwze'e yaban' betje' lo yežlion'. To bejw nychjen le' na' zoa to pita' yichjen'. Cho'alagüen' chna'titen ca gwbiž, na' yeni'e ca' ble'edan' zjanaquen ca bdope da' čala'nin. <sup>2</sup>Anglen' noxe' to yiš dao' da' ba beyašen. Na' bzoa šla'a ni'e licha lo nisdaon' na' yešla'an bzoe' lo yežlion'. <sup>3</sup>Na' bosye'e zižje ca zižje chosya'a be nzi' león. Na' cate' bosye'e gwne gwzio' gaž ni'a na' to to gwzion' zoa da' gosenan. <sup>4</sup>Beyož goc ca' na' ba zoa gwzoja' diža' da' benda' šlac gwne gwzion' cate' to bene' zoa yaba gože'nda':

—Bi gwzojo' dižan' bendo' šlac gwne gwzion', san gwdapen lo' yichjlažda'oguo'.

<sup>5</sup>Nach angl ben' zoa šla'a ni'en lo nisdaon' na' yešla'an lo yežlion' gwlis ne'e lican' yabale. <sup>6</sup>Na' gwlo'e da' bałi gac can' ža Dios ben' zoa toli' tocanē, ben' ben' le'e yaba len yogo'te da' chle'echo le'enna', bene' yežlion', benach, beyixe', na' bite'tezechle da' de lo yežlion', na' bene' nisdaon' len be ca' na' da' ca' že' lo'enna'. Gwne':

—Bich cuez Diosen' gone' can' ba nžie' bia' gone'. <sup>7</sup>San cate' žin ža gwcuež angl gažen' trompeta čhen', cana'ch gac da' nžia Diosen' bia' gac, can' ba gože' bene' ca' goso'e xtižen', da' nono gwneze cani'.

<sup>8</sup>Nach da' yoble ben' zoa yaban' ben' ba benczeda' gwnie' neda', gwne':  
—Gwey jaxi' yiš dao' dan' ba beyaš dan' noxe' angl ben' zecha zoa šla'a ni'en lo nisdaon' na' yešla'an lo yežlion'.

<sup>9</sup>Da'nan' gwy'a gan' zoa anglen' janaba' yišen'. Na' anglen' gože'nda':

—Bexon' gwdagon'. Lo' cho'on gacdon' zix' ca šina' beser, perw lo' li'on yeyaquen zla'.

<sup>10</sup> Nach be<sub>xo</sub>a' yi<sub>šen</sub>' no<sub>x</sub>e' anglen' gwdaguan'. Na' lo' cho'an goquen zix ca šina' beser, perw cate' bedaguan' beyaquen zla' lo' li'an. <sup>11</sup> Nach anglen' gože' neda':

—Da' yoble cheyala' go'o xtiža' Diosen' na' nao' can' gac che zan yež, che zan nación, che be<sub>ne</sub>' chesac gwde gwdele diža' da' de yežlion', na' che zan be<sub>ne</sub>' gwnabia'.

## 11

*Chope be<sub>ne</sub>' goso'e xtiža' Diosen'*

<sup>1</sup> Nach anglen' be<sub>ne</sub>' neda' to ya ca nac da' choso<sub>ch</sub>ine' cate' choso<sub>ch</sub>ixe' yo'o, na' gože'nda':

—Gwyej jachixe yodao' blao na' mes gan' chosozeye' bi da' chosozeye' cate' chesonxene' Diosen', na' gwlabo' ba<sub>l</sub> be<sub>ne</sub>' že' chesonxene' le'. <sup>2</sup> Perw bi gwchixo' chyo'on, le ba naquen lo na' be<sub>ne</sub>' bi zjanac be<sub>ne</sub>' Israel be<sub>ne</sub>' bi chesejnilaže' Diosen' cont yesone' nacteze chesac<sub>la</sub>že' lo ciuda che Dios lao chopeyon bio'. <sup>3</sup> Na' se<sub>l</sub>a' chope be<sub>ne</sub>' yeso'e xtiža', na' yesaze' lache' gasj ca to be<sub>ne</sub>' chegüine' na' yeseyixjue'ede' xtižan' lao to mil chop gayoa gayon ža.

<sup>4</sup> Be<sub>ne</sub>' ca' chope zjazaca'lebe' ca yag olivos ca' chope na' ca candeler ca' chope da' zjazoa lao Diosen' ben' nac Xan yežlio. <sup>5</sup> Na' še no chaclaže' gonxi'e lega<sub>que</sub>' choj yi' cho'a be<sub>ne</sub>' ca' yeso'e xtižan' na' gwzeyen be<sub>ne</sub>' chgue'ede' lega<sub>que</sub>'. Can' gac yesat note'teze be<sub>ne</sub>' chende' gonxi'e be<sub>ne</sub>' ca' chope. <sup>6</sup> Na' be<sub>ne</sub>' ca' yeseyixjue'ede' xtižan', gac lo na'ga<sub>que</sub>' yesone' cont bi gac yejw šlac yeso'e xtižan', na' gac lo na'ga<sub>que</sub>' yesone' cont nisen' yeyaquen chen, na' bate'teze yesac<sub>la</sub>že', yesone' gac bite'tezechle da' yesežag<sub>l</sub>ao be<sub>ne</sub>' že' yežlion'. <sup>7</sup> Perw cate' yeyož yeso'e xtižan', nach choj lo' gabi<sub>l</sub> gan' nac yechw zitjwchgua to bež xigüe' nizba' lega<sub>que</sub>' na' gotteba' lega<sub>que</sub>'. <sup>8</sup> Na' be<sub>ne</sub>' ca' že'na' yosyocua'ane' cuerp chegaquen' gan' chesetolen la cay che ciuda blaon' gan' gosote' Xancho Jesucriston'. Ciudadan' zaca'leben ca ciuda Sodoma na' ca nación Egipto. <sup>9</sup> Na' šone ža yo gašje be<sub>ne</sub>' za'ac zan yež na' zan nación, be<sub>ne</sub>' zjanac zan diaža, be<sub>ne</sub>' chesac gwde gwdele diža' da' de lo yežlion', yesene'e be<sub>ne</sub>' guat ca' na' bi yeso'e latje yesegaše'. <sup>10</sup> Be<sub>ne</sub>' ca' že' yežlion' yesyebede' da' gosat be<sub>ne</sub>' ca' chope, na' yosonežjo lježe' bi da' yosonežjo lježe' da' chesyebede' dan' bich nita' be<sub>ne</sub>' ca' yeso'e xtiža' Diosen' len lega<sub>que</sub>', le leca zed chesacden'. <sup>11</sup> Na' ble'edaogüeda' gwde šone ža yogašje Diosen' bosbane' be<sub>ne</sub>' ca' chope na' gosezeche' da' yoble. Na' yogo' be<sub>ne</sub>' besele'e lega<sub>que</sub>' besežebchgüe'. <sup>12</sup> Nach be<sub>ne</sub>' ca' gosoe' xtiža' Diosen' gosende' gož Diosen' lega<sub>que</sub>' zižje:

—Le yeda, le yeyep nga.

Nach be<sub>ne</sub>' ca' chesegue'e lega<sub>que</sub>' besele'ede' besyeyepe' yaban' to lo' bejw. <sup>13</sup> Šlac chesyeyepen' leca gwxo' na' gwžiai' late' ciudadan', na' gaže mil be<sub>ne</sub>' gosat caten' gwxon'. Na' be<sub>ne</sub>' ca' besyega'an besežebchgüe' na' gosonxene' Dios ben' zoa yaba.

<sup>14</sup> Ba gwde yela' zi' gwchopen' na' za' gac da' gwyone.

*Can' goc cate' angl gaže bcueže' trompeta chen'*

<sup>15</sup> Nach angl be<sub>ne</sub>' gažen' bcuež trompeta chen' na' benda' ba<sub>l</sub> be<sub>ne</sub>' ca' že' yaban' gosene' zižje, gosene':

Doxen yela' chnabia' che yežlion'

baçh naquen lo na' Xancho Diosen' na' lo na' Cristo ben' gwleje' cont chnabi'e.

Na' Diosen' zoacze' chnabi'e toli tocañe.

<sup>16</sup> Nach bene' blao ca' tapechoa ben' zjachi' cue'ej cuit Diosen', jasechaze' coscho'ale lo yon' gosonxene' Diosen', <sup>17</sup> gosene':

Chonto' yela' choxclen chio' Xanto',

le naco' Dios ben' nap yela' guac xen.

Ba zoaczo' cate' bina' xe yežlion',

na' soaczo' toli tocañe.

Na' ba gwzolao chnabi'o len yela' guac xen chion' cont gac can' chazlažo' doxen.

<sup>18</sup> Beñe' nación ca' že' yežlion' beseže'e le',

perw ba bžin ža gono' yesezaca'zi'e.

Ba bžin ža choglaguo' che yogo' bene' ca' ba gosat še noe' nap doła'.

Na' gono' cont bene' güen xšino' ca' beñe' ca' goso'e xtižon' yesenite' mbalaz,

len yogo' bene' gwlejo' cont zjanaque' lo nao', bene' gosonxen le'.

Con yogo' bene' gosonxen le' yesenite' mba, bene' gole len bene' xcuide'.

Łecze ba bžin ža yesebiayi' bene' ca' bosožiayi' ljež beñache' yežlion'.

<sup>19</sup> Nach byaljo gan' chesonxene' Diosen' yaban' na' ble'eda' caj gan' že' yej ca' gan' nyoj da' ca' gož Diosen' bene' Israel gualaž cheto' ca' yesone' cont gaclene' legaue'. Na' šlac gwña'a, gwyep yes, gocchgua sšag, gošj gwtin, gwxo' na' gwche'chgua yej.

## 12

### *No'olen' na' beł be zoa gaž yichj*

<sup>1</sup> Na' ble'edaogüeda' to da' yebanchgüecho le'e yaban', ble'eda' to no'ole na' nyaze' gwbižen' ca' xe'. Nleje' lo bion' na' zoa to corona yichje' da' žian šižiñw beljw. <sup>2</sup> No'olen' no'e bdao' na' chosye'e, le chaque' bes che yela' sanña'. <sup>3</sup> Na' ble'eda' yeto da' zaca' yebanecho le'e yaban', ble'eda' Satanás dan' chnabia' da' xigüe' ca', ba naquen ca' to beł be žia gaž yichj, be xen juisyw. Nacha' be xña na' žia ši lozba' na' zoa tgüeje corona to to yichjban'. <sup>4</sup> Na' bta xbamban' cont bchijnjen zan beljw ca' žia le'e yaban' na' beselažon' lo yežlion', yelate'ze ca' goc gašje beljw ca' zjažia le'e yaban' bchijnj xbamban'. Na' gwlezba' xni'a no'olen' ba zoa sanña' cont yebba' bdao' chen' cate' sane'be'. <sup>5</sup> Nach no'olna' gwxxane' to bi' byo bi' nabia' nación ca' na' žan ca' žan yosozenague' chebe'. Nach Diosen' beyo'ebe' gan' chi'e chnabi'e. <sup>6</sup> Nach no'olen' boxonjde' belen', na' gwyeje' to latje daš da' benšagüe' Diosen' che', gan' yeso'ene' da' ye'ej gagüe' lao to mil chop gayoa gayon ža.

<sup>7</sup> Gwde na' goc to gwdile yaban', le angl blao ben' le' Miguel na' soldadw che' ca' gosedillene' beł ben' žia gaž yichj lencze angl che belen' bene' ca' besyeyac da' xigüe'. <sup>8</sup> Na' belen' len da' xigüe' ca' bi gosezoen angl ben' zjanac bene' che Dios, na' bich bi latje gota' che belen' yaba, neca che da' xigüe' ca' zjanac leba' txen. <sup>9</sup> Angl che Diosen' bosozale'ba' lo yežlion'. Na' łecze bosozale' da' xigüe' ca' lo yežlion'. Belnan' ben' zoa ža gwlaste nacha' gwxyie' na' leba' Satanás, na' ne' zoaczba' na'a chziye'ba' yogo' beñach.

<sup>10</sup> Nach benda' to beñe' zoa yaban' gwñe' zižje gwne':

—Baçh bžin ža ben Dios chechon' cont bene' ca' chesejniłaze'ne' zjanite' len le'. Baçh bžin ža nachbia' Dios chechon' nape' yela' guac xen. Ba

bžin ža chnabi'e cont gac con da' cheyała'cze gac. Na' ba bžin ža Criston' ben' gwleje' cont nabi'e bačh chnabia'lene' le'. Gac da' cheyała'cze gac, le Satanás dan' ba gwzoa lao Diosen' do ža do yel bcuišen bene' chesejnilaže' Criston', bačh besyebejen'. <sup>11</sup> Na' bene' gosejnilaže' Criston' na' ba gosate', gosezoede' bi bosozenague' che Satanásen', le gosejle'e Jesucriston' blalj xchene' neche xtola'gaque' na' goso'e diža' chesejnilaže'ne'. Bene' ca' ba gosat gosache'ede' yejni'a yesate' clal ca yesebejyichje' Jesucriston'. <sup>12</sup> Yaban' cheyała' gosya'an yela' chebe chen, na' le'e že'le gan' zoa Diosen' cheyała' yebele, perw nyaše'chgua gac che le'e zoale lo yežlion' na' lo' nisdaon', le Satanás dan' chnabia' da' xigüe' ca' ba betjen gan' zoalen' chaclocchguan, le nezen yešložga de latj chen.

<sup>13</sup> Nach cate' belen' gocbe'eba' bosozale'ba' lo yežlion', blagsesba' no'olen' gwxxan bi' byo daon'. <sup>14</sup> Perw Diosen' bnežjue' chop xile' da' xen ca xil bsiadao' cont gwyeje' latje daš gan' bi goc žin belen', latje gan' benšagüe' che' gan' yeso'ene' da' ye'ej gagüe' šon iz yo gašje. <sup>15</sup> Na' bchoj nis zil cho'a belen' goquen to yegw cont bžinen gan' zoa no'olen' na' guan' le'. <sup>16</sup> Perw Diosen' bene' cont yežlion' goclenen no'olen', byaljon güe'ejen nis dan' bchoj cho'a belen'. <sup>17</sup> Nach belen' blocchguaba' no'olen' na' gwyejba' jatillemba' yezica'chle xi'ine' da' chosozenague' che Diosen', chesone' con da' že' na' zjanita'chache' chesejnilaže' xtiza' Jesucriston'.

## 13

### *Chope bež xigüe' be ble'e Juan*

<sup>1</sup> Na' gwzia' cho'a nisdaon' na' ble'eda' bchoj to bež xigüe' lo' nisdaon'. Bežen' nita' gaž yichjba' na' žia ši lozba' na' žia tgüeje corona lao to to lozban'. Na' to to yichjban' nyoj to laba' da' chlo'en chon cuimba' ca Dios. <sup>2</sup> Ble'eda' bežen' nacha' ca to tigr, perw ni'ana'ban' zjanaquen ca ni'a na' oso na' cho'aban' naquen ca cho'a León. Nach bel ben' žia gaž yichj bnežjwba' bežen' yela' guac na' yela' chnabia' cheban' cont gwnabia'ba' na' cont gosenita' benačh bosozenague' cheba'. <sup>3</sup> Ble'eda' to yichj bežen' nacchguan güe', ca to da' gatlemba', perw beyacba'. Na' yogo'lo' benačh besyebande' dan' beyacban' na' bosozenague' cheba'. <sup>4</sup> Yogo'ze bene' gosonxene' belen' dan' bemba' cont gwnabia' bež xigüen', na' lecze gosonxene' bež xigüen', gosene':

—Nono zoa bene' nap yela' chnabia' xen ca bež nga, na' nono zoa bene' soede' tillene'ba'.

<sup>5</sup> Lecze nono bžon gwna bežen' zaca'chba' ca Dios, na' gwnaba' yela' ya' che Diosen'. Na' goc lo na' bežen' gwnabia'ba' chopeyon bio'. <sup>6</sup> Na' gwnechguaba' yela' ya' che Diosen' na' che yaba gan' zoe' na' len che yezica'chle bene' ca' že' yaban'. <sup>7</sup> Na' gwyo'o lo na' bežen' gwdillemba' bene' ca' gosejnilaže' Diosen' na' bi gosezoede'ba'. Bibi goc yesone' cont yesyechoje' lo na'ba'. Gwnabia'ba' yogo' nación, yogo' yež, yogo' diaža na' bene' chesac gwde gwdele diža' da' de lo yežlion'. <sup>8</sup> Na' yogo' bene' že' yežlion' bene' bi zjanyoj lagaque' le'e libr che Jesucriston', gosonxene' bežen'. Le cate' gwxxete yežlion' Jesucriston' bzoje' le'e libr che' la yogo' bene' nezde' gata' yela' mban chegaque' toli tocañe, Jesucristw ben' zaca'lebde' ca xila' dao' be gosot bene' gualaž cheto' neche xtola'gaque'.

<sup>9</sup> Note'tez le'e žia nagle da' chene, le gwzenag da' nga nia' le'e. <sup>10</sup> Bene' yeseyixjue' ljež benače' ližya, decze de ližya yesata' legaque'. Na' bene' yesot ljež benače' len spada, decze de gac chegaque' ca'. Da'nan'

chonen byen soachach chio' ba gwlej Diosen' cont naccho lo ne'e, gwyo gwcheycho len bi da' gac checho na' soachachcho šejnilaže' chone'.

<sup>11</sup> Gwdena' ble'eda' yeto bež xigüen' be bchoj lo' yo. Na' žia chop lozba' da' nac ca loz xila', perw be'ba' diža' can' choe' beł ben' žia gaž yichjen' diža'. <sup>12</sup> Na' bež nechon' bamba' cont bež gwchopen' gwnabia'ba' par leba' na' bež gwchopen' bamba' cont yogo' bene' že' yežlion' gosonxene' bež nechon' ben' beyaque len güe' dan' naquen ze da' got leba'. <sup>13</sup> Na' bež gwchopen' bamba' zan da' bebanchgüe bene' len yela' guac cheban', na' bamba' cont besele'ede' yi' le'e yaban' na' beselažon' lo yežlion'. <sup>14</sup> Na' da' bamba' da' ca' gan' zoa bež nechon', gwziye'ba' bene' že' yežlion' cont bosozenague' cheba'. Nach bamba' mandadw gosone' to l gua'a lsaca' da' nac ca bež nechon' da' gosonxene', bež ben' goc yichjban' güe' len spada, güe' da' naquen ze da' got leba' perw beyacba'. <sup>15</sup> Na' goc lo na' bež gwchopen' bamba' cont l gua'a lsacan' gwyo'on biš grasyw. Na' goc gwnen, benen mandadw gosote' yogo' bene' bi gosonxenen'. <sup>16</sup> Na' bež gwchopen' lecze bamba' byen gosezoa yogo' bene' señw che bežen' le'e na'gaque' licha o loxgagaque', bene' gole len bi' bixjw, na' bene' gwni'a len bene' yaše', na' bene' cheson xšin bene' yoble ca beyixe' len yezič'chle bene'. <sup>17</sup> Na' note'teze bene' še bi zoe' señw che bežen' o laba' o número da' zejen laba', bi goc bi si'e neca goc bi gote'. <sup>18</sup> Chyážjecho yela' sina' cont šejni'icho da' nga. Bene' chejni'i guac gwlaben' número cheban', le naquen número da' chchin beňach, na' número cheban' naquen xop gayoa gayon xop.

## 14

### *Da' gosol bene' ca' to gayoa tapeyon mil gosonxene' Diosen'*

<sup>1</sup> Na' gwna'a na' ble'eda' Jesucristw ben' zaca'lebde' ca xila' dao' be gosot bene' gualaž cheto' neče xtoła'gaquen', zeche' lo ya'a Sión len to gayoa tapeyon mil bene' yoble. Na' zjanyoj la Jesucriston' len la Xe' Diosen' loxgagaque'. <sup>2</sup> Na' benda' chesol bene' zan bene' že' yaban'. Nenen ca chsiž ga zjadechgua yegw zan na' ca nen cate' chašjw chtin. Na' nenen ca nen cate' bene' zan chosogole' arpan' to ši'ize. <sup>3</sup> Na' gosole' to da' cobe lao Diosen' na' lao bene' ca' tap zjažia xil na' lao bene' blao ca' tapechoa gan' chi' Diosen' chnabi'e. Noch no bene' yoble goc goł len, con bene' ca' to gayoa tapeyon mil na'ze gosac bososed' dan' gosolen' cont gosonxene' Diosen', legacze' bebej Criston' lo na' Satanásen' šlac ne' nite' yežlion'. <sup>4</sup> Bene' ca' gosolen' zjanaque' bene' bi gosata'lene' no'ol bi nac xo'olgaque', na' gosapchgua cuingaque' cont gosac lažda'ogaquen' xilaže' len Diosen'. Na' zja'acteze' len Jesucriston' gate'teze zeje' chosozenague' che', le bebeje' legaque' lo na' Satanásen' cont zjanaque' lo ne'e na' lo na' Diosen'. Da'nan' zjazaca'lebde' ca to tlcw coseš da' bnežjw bene' Israel gualaž cheto' ca' lo na' Diosen'. <sup>5</sup> Gwbat goso'e diža' güenlaže' na' bibi doła' zjanape' lao Diosen' ben' chi'e chnabi'e.

### *Da' gosena šone angl*

<sup>6</sup> Nach ble'eda' yeto angl le'e yaban' chde' lo be'. Na' gwduxjue'ede' diža' güen che Diosen' da' bi te chen len bene' že' yežlion', len bene' zjanac to to nación, to to yež, to to diaža, na' bene' chesac gwde gwdele diža' da' de yežlion'. <sup>7</sup> Gwne' zižje gože' legaque':

—Le žeb Diosen' na' le gonxene', le ba bžin hor gone' yela' justis che beňach. Le gonxen Dios ben' ben yaban', yežlion', nisdao' na' ga chal nis.

<sup>8</sup> Yeto angl za' cožen' gwne':

—Bač bžin ža cuiayi' ciuda Babilonia da' nac da' blao. Bač bžin ža cuiayi' ciuda che bene' ca' bosozoe' Diosen' ca'ale na' gosebede' da' nac yela' zto', le ba gosego'oyele' bene' že' yogo' nación cont chesone' güedenag len Diosen'.

<sup>9</sup> Nach yeto angl zej cože' bene' gwchopa' be'e diža' zižje gwne':

—Note'teze bene' chesonxen bež xigüen' len l gua'a lsaca' cheba' na' cheso'e latje chesezoa señw che beža' loxgagaque' o taca'gaque', <sup>10</sup> Diosen' ba nžie' bia' yesesaca'zi'chgua bene' ca'. Yesezaca'zi'e gan' čala' yi' len azufre lao angl che Diosen' na' lao ben' zaca'lebbe' ca xila' dao' ben' gosot bene' Israel neche xtoła'gaque'. <sup>11</sup> Tołi tocañe čhas žen che yi' gan' yesezaca'zi'en. Na' bene' ca' chesonxen bežen' len l gua'a lsaca' cheban', na' bene' zjazoa señw che bežen' loxgagaque' o taca'gaque', bi gac yesyezi'laže' len da' yesezaca'zi'en ne chel ne lagüe ža. <sup>12</sup> Da'n'an' chonen byen soačhač chio' ba gwlej Diosen' cont naccho lo ne'en, gwyo gwčejcho len bi da' chac checho, chio' chzenagcho che da' non Diosen' mandadw goncho na' bi chbejyichjcho dan' chejniłaže'cho Jesúsen'.

<sup>13</sup> Nach benda' to bene' zoa yaban' gwne':

—Bzoy da' nga: “Mbalaz bene' ca' ne' chesejniłaže' Xancho Jesucriston' žinte ža yesate'. Can' chac na'a na' can' gac bate'teze.”

Na' Spiritw che Diosen' žan:

—Da' li nite' mbalaz, le yesyezi'laže' len xšingaquen', na' gachbia' yogo' da' güen da' ba gosone'.

*Yotob Diosen' bene' bi chosozenague' che' cont yesezaca'zi'e*

<sup>14</sup> Nach gwña'a da' yoble na' ble'eda' to bejw šiš le'e yaban' na' cože' bejon' čhi' to bene' nac ca to beñač. Na' zoa to corona de oro yichjen' na' noxe' to da' nzi' hoz da' nłachgua. <sup>15</sup> Na' yeto angl bchoj lo' gan' chesonxene' Diosen' yaban' na' gwne' zižje gože' ben' čhi' cože' bejon':

—Ba bžin hor yotobo' coseš che uvas dan' de yežlion', le ba golen.

<sup>16</sup> Nach ben' čhi' cože' bejon' noxe' hoz botobe' cosešen'.

<sup>17</sup> Nach bezchoj yeto angl lo' gan' chesonxene' Diosen' yaban' na' lecze noxe' yeto hoz da' nłachgua. <sup>18</sup> Na' lecze bezchoj yetoe' ben' yo'o lo ne'e yi' da' čala' lo mes gan' chesonxene' Diosen'. Na' angl nga gwne' zižje bol güiže' angl gwchopa' ben' lecze noxe' hoz, gože'ne':

—Ba güe uvas da' žia lo yežlion'. Bečoguen len hoz čhion' dan' nłachgua cont yotobchon.

<sup>19</sup> Nach anglen' bečogue' uvas da' žia yežlion' len hoz dan' noxen' na' botoben' bzalen' to lo' ša' xen ga yesesien' cont choj xisen'. Zeje diža', Diosen' botobe' bene' ca' bi bosozenag che' na' gwlo'e legaque' ga yesezaca'zi'e. <sup>20</sup> Na' gan' gosezaca'zi'en naquen cho'a ciudan', na' lo' ša' xen gan' gwlo'e uvasen' belalje chen zil da' nac xčhengaque', bežinen ca sibe to xčhega' cabayw, na' bžiljon šone gayera mil metr.

## 15

*Angl ca' zjajo'o lo na'gaque' gaže yela' zi' da' zelao yesac*

<sup>1</sup> Na' ble'eda' yeto da' leca zaca' yebanecho le'e yaban'. Ble'eda' gaže angl bene' zjanac lo na'gaque' yesone' yegaže yela' zi' cont yeyož gwlo'e Diosen' can' chone' da' chloque' bene' ca' cheson da' xinj.

<sup>2</sup> Lecze ble'eda' to da' nac ca to nisdao' de widrw da' nchixen yi'. Na' cho'a nisdakon' zjazecha bene' ca' gosezoede' bi gosonxene' bežen' na' l

gua'a lsaca' dan' nac ca leba', na' bi goso'e latje yosozoe' legaque' señw  
 cheba' o número da' zejen laba'. Na' zjanoxe' tgüje arpa da' bnežjw  
 Diosen' legaque'. <sup>3</sup> Na' ble'eda' legaque' chesonxene' Diosen' chesole' to da'  
 bside da' Moisésen' bene' Israel gualaž cheto' ca', Moisés ben' ben xšin  
 Diosen' cani'. Lecze chesole' da' naquen to da' bside Jesucriston' legaque',  
 Jesucristw ben' zaca'lebde' ca xila' dao' be gosot bene' gualaž cheto' neche  
 xtola'gaque'. Quinga žan:

Xanto' Dios, yogo' da' ba beno' len yela' guac xen chio'

naquen da' güen juisyw na' da' zaca' yebanecho.

Yogo' da' chono' zejen to licha na' naquen da' zaca'.

Len' chnabi'o nación ca'.

<sup>4</sup> Nono zoa bene' bi cheyala' žebe' le' Xanto', da' choño' castigw che da'  
 malen'.

Nono zoa bene' bi cheyala' gonxene' le'.

Tozo' le' naco' bene' laždao' xilaže' juisyw.

Na' bene' že' yogo' nación yeside' laguon' yesonxene' le',

le ba besele'ede' da' ba beno' na' zjaņezde' zejzen to licha.

<sup>5</sup> Gwde benda' da'na' nach gwna'a da' yoble na' ble'eda' byaljo gan'  
 chesonxene' Diosen' yaban', latje gan' ngo'ošagüe' ley che Dios da' nyoj.

<sup>6</sup> Na' ble'eda' gaž angl ca' zjayo'o lo na'gaque' yesone' gac gaž yela' zi' lo

yežlion', besechoje' gan' chesonxene' Diosen' yaban'. Angl ca' zjanyaze'  
 lache' šagüe' da' nac šiš xila' da' chactiten, na' to toe' nchej cho'alcho'e to

bant de oro. <sup>7</sup> Na' ble'eda' bene' ca' tap zjažia xil ben' nita' lao Diosen', na'

toe' bnežjue' angl ca' gažen' tgüje tas de oro da' zjanža'ten da' zjajožen

da' chon cont chac yela' zi' ca' lo yežlion', na' zejen Diosen' ben' zoa toli

točanē chlocchgüe' da' cheson bene' bi chosozenag che'. <sup>8</sup> Na' doxen

gan' chesonxene' Diosen' yaban' gwche'chguan ca žen che be'ni' da' nsa'  
 Diosen' na' che yela' guac xen che'. Nono goc šo' gan' chacxen Diosen' šlac  
 biņa' yeyož yesac yela' zi' ca' gaž da' zjanac lo na' gaž angl ca'.

## 16

*Tas ca' gaže na' yela' zi' ca' gosac cate' bososcho'en*

<sup>1</sup> Na' benda' gwne Diosen' žižjehgua, zoe' gan' chacxene', gože' angl ca'  
 gaže:

—Le šja'ac le šjalalj dan' yože lo' tas chelen' lo yežlion', da' zejen leca  
 chloca' da' xinj cheson bene' ca' bi chosozenag chia', na' gona' ga  
 yesezaca'zi'chgüe'.

<sup>2</sup> Nach angl nechon' gwyeje' jalalje' da' yože lo' tas chen' lo yežlion' gan'  
 nac yo biž, na' yogo' bene' ca' zjazoa señw che bežen' na' chesonxene' l  
 gua'a lsaca' da' nac ca leba', gosebie' güe' xen güe' zban na' goselachgüe'.

<sup>3</sup> Nach angl gwchopen' jalalje' da' yože lo' tas chen' lo nisaon' na'  
 nisaon' beyaquen chen ca chen che bene' guat, na' gosat yogo' be ca'  
 že' lo' nisen'.

<sup>4</sup> Nach angl gwyonēn' jalalje' dan' yože lo' tas chen' lo yegw ca' na'  
 gate'ze chal nis na' lecze besyeyaquen chen. <sup>5</sup> Nach benda' gwne angl ben'  
 chape' nisen' da' de lo yežlion', gože' Diosen':

—Xanto' Dios, len' naco' bene' laždao' xilaže' juisyw. Ba zoaczo' le' cate'  
 za' xe yežlion'. Zejczto' licha can' ba gwchoglaguo' chac da' quinga, <sup>6</sup> le  
 bene' že' yežlion' ba gosote' bene' ca' goso'e xtizon' na' gosote' nochle bene'

gosac lo nao'. Da'n'an' ba beno' cont yese'eje' chen neche da' bosolalje' xchen bene' ca'. Na' da' chac chegaque' naquen da' cheyala' ce gac.

<sup>7</sup> Nach benda' gwne to bene' do cho'a mes gan' bene' ca' ze' yaban' chosozeye' bi da' chosozeye' cate' chesonxene' Diosen', gwne':

—Xanto' Dios, len' napo' la'zelagüe yela' guac xen, chono' con can' zo' gono', na' chono' da' zej to licha cate' chchogbi'o che bene'.

<sup>8</sup> Nach angl gwdapen' jalalje' dan' yože lo' tas chen' lo gwbižen', na' gwbižen' bzeyen beñach. <sup>9</sup> Yogüe' leca goseye', perw bi besyetenjde' xtoła'gaque' na' bi gosonxene' Diosen', con gosene' yela' ya' che Dios ben' be' latje goc da' ca' chesezaca'zi'e.

<sup>10</sup> Nach angl gayon' jalalje' dan' yože lo' tas chen' gan' chi' bežen' chnabia'ba' na' beyac chol doxen gan' chnabia'ban'. Na' beñachen' gosagwxetje lože'gaquen' catec gosesezaca'zi'e. <sup>11</sup> Na' gosene' yela' ya' che Dios ben' zoa yaban' neche dan' chesezaca'zi'en na' neche güe' xen dan' zjažia lo cuerp chegaquen', perw ne ca' bi besyetenjde' che da' mal dan' gosenen'.

<sup>12</sup> Nach angl gwxopen' jalalje' dan' yože lo' tas chen' lo yegw xen da' nzi' Eufrates, na' bebiž nis yegon' cont beyaquen to nez ga yesede bene' gwnabia' ca' za'ac do gan' chla' gwbiž.

<sup>13</sup> Nach ble'eda' šone da' xigüe' da' zjanac ca blož. Ton bchojen cho'a bel be zoa gaž yichj, yeton bchojen cho'a bež xigüen' na' yeton bchojen cho'a ben' cho'e diža' güenlaže' cont chesonxene' bežen'. <sup>14</sup> Na' da' xigüe' quinga gosonen yela' guac da' besyebane bene', na' jasetoben yogo' bene' gwnabia' ca' ze' gate'teze lo yežlion' cont yesedillene' Dios ben' nap la'zelagüe yela' guac xen cate' žin ža gac ca'. <sup>15</sup> Na' benda' ben' nac Xi'in Dios gwne':

—Le gwzenag da' nga: ba zoa yida' da' yoble, yedexenyala' bene' bi chosozenag chia' can' chzenyal bene' gwban ga chjalane'. Mbalaz zjazoa note'teze bene' nita'teze' chesebeze' neda' cate' yida' na' chesezaquede' bibi da' mal chesone', le yesacde' zto' še bina' yesyetenjde' xtoła'gaquen' caten' yida', na' yogo'ze bene' yesacbe'ede' da' malen' ba gosenen' še ca'.

<sup>16</sup> Nach bezle'eda' da' xigüe' ca' šone bosyotoben yogo' bene' gwnabia' ca' ze' lo' yežlion' to latje ga nzi' Armagedón diža' hebreo.

<sup>17</sup> Na' angl gažen' jalalje' dan' yože lo' tas chen' lo be', na' benda' gwne Diosen' zižje, gan' zoe' chesonxene' le' yaban' gan' lecze chi'e chnabi'e, gwne':

—Bač goc da' cheyala' gac.

<sup>18</sup> Nach gwyep yes, goc sšag, na' gošj gwtin, na' leca gwxo'. Gwxo'ch ca ba goc bate'tezechle šlac ze' beñachen' lo yežlion'. <sup>19</sup> Na' ciuda da' nac la'zelagüe blao lo yežlion' gwžiyain' bchojen šonle, na' lecze gosebiayi' yezica'chle ciuda da' zjachi' lo yežlion'. Diosen' bich gwleze' bene' cont goseyi gosezaca'chgua bene' ze' ciuda Babilonia che da' mal da' ba gosontequa', le blocchgüe' yela' mal chegaquen'. <sup>20</sup> Na' catequen' gwxo' besyennitceze yogo' yež da' zjachi' lo' nisdaon' na' yogo' ya'a ca'. <sup>21</sup> Na' gwche'chgua yej ži'a lo yežlion', yej ži'i da' cha'a do tapa rob güeje beselažon' cože' bene'. Na' bene' ze' yežlion' gosene' yela' ya' che Diosen' neche dan' besežaglaochgüe' len yej dan' gwchen'.

## 17

*Diosen' be'e castigw che ciuda blao da' zaca'lebe ca to no'ole zle'*



<sup>1</sup> Na' ca nac angl gaž ca' gosoxe' tas de oron', toe' bedenie' neda', gože'nda':

—Da, gwlo'eda' le' can' gon Diosen' saca'zi' no'ole blaon' chi' lo nisdao' ca', no'olen' nac no'ol zle'. <sup>2</sup> Yogo' bene' gwnabia' ca' že' yežlion' ba besyebede' bosozenague' che' gualaz che Diosen', na' da'nan' guac nacho zjanaque' xtoe'. Na' bene' že' yežlion' da' besyebechde' le' clel ca Diosen', guac nacho gosezožde' da' ba gose'eje' vino da' bnežjue' legaque'.

<sup>3</sup> Nach šlac ben Spiritw che Diosen' cont ble'edaogüeda' da' quinga, anglen' gwche'e neda' to latje daš. Na' bžina' na' ble'eda' to no'ole žia cože' bež xna be nac gaž yichjba' na' žia ši lozba'. Na' doxen cuerp cheban' nyoj diža' da' chžiaba' yela' ya' che Dios. <sup>4</sup> No'olen' nyaze' lache' da' nac moradw na' xna, na' non cuine' xdan len oro, len yej zaca' na' len perlas. Na' noxe' to tas de oro da' nža'ten yožen vino. Na' vinon' zejen chbede' chone' da' yela' zto' na' bichle da' chgue'e Dios. <sup>5</sup> Na' loxgue' nyoj diža' da' žan naquen' naque', diža' da' bi gosejni'i benach, žan: "Naca' ciuda Babilonia na' nacchgua' blao. Naca' no'ole zle', le chona' cont bene' že' yežlion' bi chesonxene' Diosen', na' chgo'oyela' legaque' cont chesone' da' zan da' chgue'e Diosen'." <sup>6</sup> Na' ble'eda' chzože no'olen', le ba güe'eje' xchen bene' ca' zjanac lo na' Diosen', bene' gošo'e diža' chesejnilaže' Jesúsen', na' da' nacho güe'eje' xchengaque' zeje diža' betue' zane'. Na' cate' ble'eda' no'olen' leca bebanda'. <sup>7</sup> Nach gož anglen' neda':

—Bi yebando'. Gwzejni'ida' le' bi zejen dan' ble'edo' no'olen' žie' cože' bež be gaž yichjen' na' žia ši lozba'. <sup>8</sup> Bežen' ble'edo' gwzoaba' gwnabia'ba' šlož na' bich zoaba' na'a, perw yechojba' lo' yechw zitjwchgua dan' nac lo gabilen' gan' yo'oba' na'a cont soaba' nabia'ba' yežlož, na' techle yeyo'oba' na' saca'zi'ba' toli tocañe. Cate' gwxe yežlion' Diosen' bzoje' la bene' ca' zjanape' yela' mban toli tocañe le'e libr chen'. Na' bene' ca' bi zjanyoj lagaque' le'e libr che Diosen' yesyebande' cate' yesele'ede' bežen' gwzooa, ben' bi zoa na'a perw soaba' da' yoble.

<sup>9</sup> 'Chyažjecho yela' sina' cont šejni'icho da' nga: da' gaž yichj bežen' zjanaquen gaž ya'a gan' chi' no'olen'. <sup>10</sup> Na' lecze zejen gaž bene' gwnabia'. Gayoe' ba gosenite' gosenabi'e na' ba gwnit yela' gwnabia' chegaquen'. Toe' chnabi'e na'a na' ben' yeto bene' bzeben' za' yedenabi'e, na' cate' yide', šložze yedenabi'e. <sup>11</sup> Na' bež ben' gwzooa cana' perw bich zoaba' na'a, zejen yeto bene' gwnabia', bene' xono'. Naque' to bene' ca' gaže gosenabi'e na' nabi'e da' yoble, perw Diosen' gone' cont cuiaye'e na' chi saque' toli tocañe.

<sup>12</sup> 'Na' lozba' ca' ši dan' ble'edo', zejen ši bene' gwnabia' bene' za' za'ac cont yesenabi'e. Na' gac lo na'gaque' yesenabi'e txen len bežen', perw šložze. <sup>13</sup> Na' yogo'te bene' ca' ši, toz ca yesone' yesegüe'e lo na' bežen' yela' gwnabia' chegaquen' na' bichle da' chac chesone' cont bežen' gacchba' blao. <sup>14</sup> Na' yesedillene' Jesucristw ben' zaca'lebbe' ca xila' dao' ben' gosot bene' gualaz cheto' neche xtola'gaque', na' Jesucriston' gone' gan lo gwdilen', le len' naque' Rey ben' chnabi'e yezica'chle rey, na' naque' Xancho ben' chnabi'e yezica'chle bene' gwnabia'. Na' bene' ca' yeson txen len Jesucriston' zjanaque' bene' ca' ba gwlej Diosen' cont zjanaque' xi'ine', bene' ca' nezde' yesenita'chache' yesejnilaže'ne' bite'teže da' gac.

<sup>15</sup> Nach anglen' gože' neda', gwne':

—Nisdao' ca' ble'edo' gan' chi' no'ol zlen' zejen yesenita' bene' zan juisyw, bene' yež zan na' nación zan, bene' chesac gwde gwdele diža'

da' de lo yežlion'. <sup>16</sup> Na' bežen' žia no'olen' cože'ban', ben' žia ši loz, gue'eba' no'olen' na' lecz ca' yeson lozba' ca' ši dan' zejen ši bene' gwnabia'. Na' yesaque' txen yesaque'e da' de che no'olen' na' yosyocua'ane'ne' ga'alyide'. Tena' yesagüe' xpelen' na' yosozeye' bi da' yega'an da' bi yesagüe'. <sup>17</sup> Le Diosen' güe'e latje yesaque' txen yesone' yogo' da' ca' na bežen', na' yesone' yela' chnabia' chegaque' lo na' bežen' cont yeyož gac yogo' dan' ba gwna Diosen'. <sup>18</sup> Na' no'olen' bačh ble'edo', naque' ciuda blaochgua da' chnabian' bene' gwnabia' ca' že' doxen lo yežlion'.

## 18

### *Can' gac cate' cuiayi' ciuda Babilonian'*

<sup>1</sup> Gwdena' ble'eda' yeto angl bene' gwza' yaban' betje' lo yežlion'. Goc lo ne'e yela' gwnabia' xen cont goc con can' gwne', na' gwyeni' lo yežlion' len be'ni' che' da' nse'e. <sup>2</sup> Na' anglen' gwne' zižje, gwne':

—Ba bžin ža cuiayi' ciuda Babilonian' da' nac leca ciuda blao. Ba bžin ža yeyaquen xišna' da' xigüe' ca'. Na' ba bžin ža yeyaquen xišna' yogo'cze be zoa xil be chesegue'e benačh. <sup>3</sup> Cuiayin', le bene' ca' že' ciudan' gosego'oyele' bene' že' yogo' nación cont bosozoe' Diosen' ca'ale bi gosonxene' le'. Na' bene' gwnabia' ca' že' yežlion' ba gosonchgüe' da' mal txen len bene' Babilonia ca' catequen' besyebede' gosone' da' yela' zto', na' bene' güen delgens ca' že' lo yežlion' ba gosaque' bene' gwni'a, le bene' Babilonia ca' gosonditjchgüede' dan' gota' chegaque' gosezi'en.

<sup>4</sup> Nach benda' gwne' yeto bene' zoa yaban', gwne':

—Le'e nacle xi'ina', le yechoj ciuda Babilonian' cont bi gonle da' mal txen len bene' ca' na' cont bi saca'zi'le txen len legaque', <sup>5</sup> le dechgua xtoła' bene' Babilonia ca', na' bich cuz Diosen' gwnežjue' castigw chegaque'. <sup>6</sup> Yesezaca'zi'sque' lagüe dan' bosochi bososaque' bene', na' yesežaglaošque' da' xench ca dan' bosochi bososaque' bene' yoble. Gacšca chegaque' castigw gualech ca da' gosone' che bene'. <sup>7</sup> Con can' gota'chgua da' šagüe' da' güen chegaque' na' gosone' con bi da' žan chegaque', chnablaža' gacchgua chegaque' yela' yaše' yela' zi' cont yesyegüine'chgüede'. Bene' Babilonia ca' ba gosone' xbab lo' yichjlažda'ogaque' gosone': “Gwbat te yela' chnabia' cheton'; gwbat soato' yela' güine', neto' že'to' ciuda blao nga.” <sup>8</sup> Da'nana' lo toze ža gac yogo' da' ca' gosacde' gwbat gac chegaque'. Bene' zan yesat, bene' zan yesegüine'de', na' yesebil yeseđone', na' yeseye' len yi'. Gac ca' che bene' že' ciuda Babilonian', le Xancho Diosen' nape' yela' guac xen cont gone' yesezaca'zi'e neche xtoła'gaque'.

<sup>9</sup> Bene' gwnabia' ca' že' lo yežlion' bene' bosozoenag che bene' Babilonia ca' cont bosozoe' Diosen' ca'ale na' gosone' bichle da' chgue'e Diosen', legaque' yesebeže' na' yesegüine'de' cate' yesele'ede' žen da' chas cate' šey ciudan'. <sup>10</sup> Na' yesyega'ane' zito'le yesene'e can' gac che bene' Babilonia ca', le yesežebchgüe'. Na' yesene':

—iNyaše'chgua chac che ciuda Babilonia nga da' nac blaoch ca yogo' ciuda! Ba chbiayi' ciuda da' gwnabia'ch lo yezica'chle ciuda da' zjachi' yežlion'. Ba bžin ža cuiayin' to ši'ize.

<sup>11</sup> Nach bene' güen delgens ca' že' yežlion' yesebeže' na' yesegüine'de' cate' cuiayi' ciudan', le noch no si' dan' yesoten'. <sup>12</sup> Nono žel bene' si' da' yesote' da' nac de oro, de plata, de yej zaca', na' de perlas. Nono žel bene' si' lache' la'ay da' chesote' de lino, de sed, na' lache' moradw na' lache'

x̄na. Nono žel beñe' si' da' yesote' da' nac de yag da' ch̄la' zix̄ o de bichle yag zaque', de marfil, de ya na' de mármol. <sup>13</sup> Nono žel beñe' si' canel, no set zix̄, no yal, no mirra, no perfume, no vino, no set yela' guagw, no yezi šiš, no trigw, no burr bžina', no xila', no cabayw, no carret, na' no beñach beñe' yesote' ca beyix̄e'. <sup>14</sup> Na' beñe' güen delgens ca' yesene' che ciudan':

—Ba gwde che yogo' da' zix̄ ca' na' yogo' bichle da' ca' gosazlaže' beñe' Babilonia ca' yesezi'e lo yela' gwñi'a chegaquen'. Gwbatech yesezi'e da' ca'.

<sup>15</sup> Na' beñe' güen delgens ca' beñe' gosote' da' ca' gosezi' beñe' Babilonian', ben' gosata' yela' gwñi'a chegaque' neche beñe' Babilonia ca', yeseze' zito'le yesežebchgüe' che dan' chesežagla'o beñe' Babilonian'. Na' yesebeže' na' yesegüine'de', <sup>16</sup> na' zižje yesene':

—iNyaše'chgua ba goc che ciuda nga da' gocch blao ca yezica'chle ciuda ca' zjachi' yežlion'! Beñe' gwže' ciudan' gosazchgüe' lache' šagüe' lache' zaque', no lache' moradw na' no lache' x̄na. Gosonchgua cuingaque' xdan len oro, len yej zaca' da' chesactiten, na' len perlas. <sup>17</sup> Perw ña'a zejzenez gwžiai' yogo' da' šagüe' chegaquen'.

Yogo' x̄an barcw ca', yogo' beñe' ca' chja'ac lo' barcw ca', len beñe' ca' cheson žin lo' barcon' na' nochle beñe' cheson žin lo' nesdaon', yogüe' yeseze' zito'le yesene'e. <sup>18</sup> Na' yesele'ede' chas žen cate' šey ciudan' na' yesene':

—Biña' gata' yeto ciuda yoble doxen lo yežlion' da' žinlaže' ca ciuda nga len yela' gwñi'a yela' šagüe' chen.

<sup>19</sup> Na' yosožia yo bište yichjgaque' da' yesyegüine'de', na' yesebežyaše', yesene':

—iNyaše'chgua ba goc che ciuda nga da' gocch blao ca yezica'chle ciuda ca' zjachi' yežlion'! Neche yela' gwñi'a che beñe' ca' gwže' lo ciudan' yogo' chio' bencho gan xen len žin da' bencho len barcw checho quinga. Na' ña'a zejzenez gwžiai' ciudan'.

<sup>20</sup> Perw le'e že'le yaban', le yebe. Le'e gwsele' Diosen' gogle postlw che', na' le'e gwsele' be'le xtižen', na' yezica'chle le'e zoale lo na' Diosen', le yebe. Le Diosen' ba gwchoglagüe' yesebiayi' beñe' Babilonia ca' neche dan' bosochi bososaque' le'e.

<sup>21</sup> Nach to angl gual bcose' to yej xen ca dan' chon žin gan' chi' molin xen, na' bzalen' lo' nesdaon', gwne':

—Can' gac che ciuda Babilonian', yeniten can' benit yej xen dan' bzala' lo' nesdaon', na' gwbatech le'echon da' yoble. <sup>22</sup> Gwbatech yosogole' arpa lo ciudan'; gwbatech yosocuež güecuež ca' no flauta no trompeta. Gwbatech žel beñe' zjansed cont yesone' no xšinlaže' da' chosochine', neca yenecho sšag che beñe' chesot len molin lo ciudan'. <sup>23</sup> Gwbatech le'echo be'ni' che lámpara, na' gwbatech yenecho beñe' cheson l̄ni' che yela' güešagna'. Yesebiayi' beñe' güen delgens che ciudan' beñe' zjanac beñe' blao lo yežlion', le beñe' Babilonia ca' ba goseziye'e beñe' že' yogo' nación len yela' güaža' chegaquen'.

<sup>24</sup> Beñe' Babilonia ca' gosote' beñe' goso'e xtiža' Diosen' na' nochle beñe' gwlej Diosen' cont gosaque' lo ne'e, na' beñe' ciuda nan' zjanape' doła' che yela' got che yezica'chle beñe' gosot beñe' doxen lo yežlion'.

## 19

<sup>1</sup> Gwdena' benda' beñe' zan juisyw beñe' že' yaban' chesonxene' Diosen', na' nen zižje, chesene':

Beñe' güen juisyw nac Dios chechon'.

Ba bene' cont chio' chejnilaže' chone' zoacho len le'.

Naque' bene' zaca' juisyw, na' nape' yela' guac xen.

<sup>2</sup> Zejczje' to licha na' chone' can' cheyala' cze gac dan' chchoglagüe' yesezaca' zi' bene' bi chosozenag che'.

Ba gwchoglagüe' cuiayi' ciuda xen da' zaca' lebe ca to no' ole zle',

le bene' lo ciudan' gosego' oyele' bene' že' doxen lo yežlion'

cont bosozoe' Diosen' ca' ale bi gosonxene' le'.

Diosen' ba gwchoglagüe' cuiayi' laž bene' Babilonia ca',

le cheyala' cze yesezaca' zi' e da' gosote' bene' ca' gosonxen le'.

<sup>3</sup> Nach da' yoble gosene':

—Beñe' güen juisyw nac Diosen'. To li to cane chas žen gan' šey ciudan'.

<sup>4</sup> Nach bene' blao ca' tapechoa na' bene' ca' tap bene' žia xil jasechaze' coscho' ale lo yon' gosonxene' Diosen' gan' chi' e chnabi' e, gosene':

—Can' cheyala' gac. Beñe' güen juisyw nac Diosen'.

<sup>5</sup> Na' benda' gwne to bene' do gan' chi' Diosen' chnabi' e, gwne':

Yogo' chio' naccho bene' güen xšin Diosen' cheyala' gonxenchone',

chio' chzenagcho che', chio' naccho bene' gole na' chio' naccho bene' xcuide' na' bi' bixjw.

*Yela' güešagna' che ben' zaca' lebde' ca xila' daon' gosot bene' Israel neče xtola' gaque'*

<sup>6</sup> Nach benda' be xne che bene' zan juisyw chesonxene' Diosen'. Na' xtiža' gaquen' nenen ca chac ga chziž yegon' cate' dechguan na' ca nen cate' leca chašjw chtin, chesene':

¡Beñe' güen juisyw Xancho Diosen'!

Len' nape' la' zelagüe yela' guac xen na' len' chnabi' e.

<sup>7</sup> Chebechgüecho na' zoachguacho mbalaz chonxenchone'.

Le ba bžin ža gac yela' güešagna' che ben' zaca' lebde' ca xila' dao' be gosot bene' Israel neče xtola' gaque'.

Ba zoa no' olen' si' e gac xo' ole'.

<sup>8</sup> Ba bnežjue' ne' lache' šagüe' da' nyaze', lache' šiš xila' juisyw.

Na' lache' šagüe' da' šiš xila' nyaze' zejen da' güen da' chon chio' ba gwlej Diosen' cont naccho lo ne' e.

<sup>9</sup> Nach anglen' da' yoble gože' nda':

—Bzoi da' nga: “Mbalaz bene' ca' ba goxe' cont yesenite' cate' gac lni che yela' güešagna' che ben' zaca' lebde' ca xila' dao' be gosot bene' Israel neče xtola' gaquen'.”

Nach anglen' gwne':

—Diosen' gože' neda' dan' ba gwnia', na' naquen da' li.

<sup>10</sup> Nach bzoa xiba' cont gonxena' anglen', perw anglen' bi bene' latje, gwne':

—Bi gono' ca'. Neda' naca' con to bene' güen xšin Diosen' can' naco' le' na' bene' lježo' ca' bene' bi chesebejyichje' xtiža' Jesúsen' da' chesejle' e. Benxen Diosen'.

Na' note' teze bene' cheso' e diža' li che Jesúsen', zoa Spiritw che Diosen' chzejni' in legaque' cont cheso' e xtižen'.

*Beñe' žia cože' cabayw šiš*

<sup>11</sup> Nach ble'eda' yaban' ca to da' nyaljo, na' ble'eda' to cabayw šiš na' žia to bene' cože' ba'. Na' ben' žia cože' ban' zjansi' ene' Ben' Chon Con

Can' Že' na' Cho'e Diža' Ľi. Zejcz'e to ľicha can' chĥoglagü'e saca'zi' bene' bi chosozenag ĥe' na' can' chdillene' da' malen'. <sup>12</sup> Na' ble'eda' yejlagü'e ca' chesactiten ca' to yi' da' ĥala'nin, na' zjazoa zan corona yichje'. Na' ble'eda' nyoj yeto le' loxgüen' da' nombia' toze le'. <sup>13</sup> Ble'eda' nyaze' to lache' da' dope chen, na' le' Xtiža' Dios. <sup>14</sup> Na' ble'eda' bene' zan bene' zjanac soldadw ĥe Diosen' zjana'ogüe'ne', zjanyaze' lache' šagüe' da' nac da' šiš na' da' naquen xilaže', na' to to bene' ca' zjažie' tgüeje cabayw šiš. <sup>15</sup> Cho'a ben' le' Xtiža' Dios chĥoj to spada da' nľachgua da' gwĥine' ĥine' nación ca' bi chosozenag ĥe'. Le nabi'e nación ca' na' žan ca žan yosozenague' ĥe'. Na' gone' yesezaca'zi'ĥgua bene' ba goson da' malen', le Dios ben' nap la'zelagüe yela' guac xen chlocĥgüe' can' ba gosonen'. <sup>16</sup> Na' le'e xcamise' na' le'e xichje' nyoj diža' quinga žan: "Naca' Rey ben' chnabia' yezica'chle rey na' naca' Xan yezica'chle bene' gwnabia'."

<sup>17</sup> Nach ble'eda' to angl bene' zecha lo gwbižen', na' bosye'e boľ güiže' yogo' cuen šod ca' chesaš le'e yaban', gože'ba':

—Le da, le yedobe nga gagwle to xše' xen da' goň Diosen' gagwle. <sup>18</sup> Gata' xpela' bene' gwnabia', xpela' xan soldadw, xpela' no bene' gual. Gata' xpela' cabayw na' xpela' bene' gosebie'ba'. Gata' xpela' yogo' cuen bene', bene' gosac esclavos na' bene' bi gosac esclavos, bene' gosac bene' xcuide' na' bene' gosac bene' gole.

<sup>19</sup> Nach ble'eda' bež xigüe' nechon' len yogo' bene' gwnabia' ca' že' yežlion' na' soldadw ĥegaque' ca'. Ba besedobe' txen cont yesedillene' Jesús ben' žia cože' cabayw šišen' len soldadw ĥe' ca'. <sup>20</sup> Na' bež nechon' goĥba' lo na' Jesúsen'. Na' ľecze ca' goc ĥe bež xigüe' gwĥope ben' choe' diža' güenlaže' na' bemb'a yela' guac cont benachen' bosozenague' ĥe bež nechon', cont gosonxene' ľ gua'a ľsaca' ĥeba' na' cont gosezoe' seňw ĥeba'. Chopteba' gosacba' lo na' Jesúsen', na' ca' zjambamba' bosozale'ba' lo' yi' gabiľ gan' ĥala'nin azufre, yi' xen da' nac ca' to nisdao'. <sup>21</sup> Nach bene' ca' yezica'chle, Jesúsen' ben' žia cože' cabayw šišen' betue' ľegaque' len spada da' chĥoj cho'en', na' yogo' šod ca' gosagwřatba' xpela'gaquen'.

## 20

### *Can' gac lo to mil iz*

<sup>1</sup> Na' ble'eda' to angl bene' zoa yaban' betje' cont gwsaljue' yechw zitjwĥgua dan' nac lo gabilen', na' noxe' to gden xen. <sup>2</sup> Na' anglen' beĥoe' beľ ben' zoa gaž yichj, be bla' da' nechw ža gwlaste. Leba' chnabia'ba' da' xigüe' ca' na' leba' Satanás. Anglen' bĥeje'ba' gdenňa' to mil iz. <sup>3</sup> Nach beyož bĥeje'ba', na' bzale'ba' lo' yechw gabilen' na' la' bseyjwrtie' cho'a yechon' na' bĥišen' to seyw. Bene' ca' cont bich siye'ba' beňaĥ šlac biňa' te to mil iz. Na' cate' ba gwde to mil izen', cana'ch yeseže'ba' gdenňa' cont yechojba' yešlož dao'.

<sup>4</sup> Nach ble'eda' bene' ca' gwlo'o Diosen' lo na'gaque' gosone' yela' justis ĥe beňaĥ zjachi'e gan' chesenabi'e. Na' ľecze ble'eda' bene' bi gosonxene' bež xigüen' len ľ gua'a ľsaca' ĥeba' neca goso'e latje yosozoe' seňw ĥeba' loxgagaque' o taca'gaque'. Gosenita'ĥaĥe' goso'e diža' ĥesejnilaže' Jesúsen' na' goseyixjue'ede' xtiža' Diosen'. Da'n'an' bene' ca' besegue'ede' Diosen' gosote' ľegaque' goseĥogue' yengaque'. Perw Diosen' bene' cont besyebane' ladjo bene' guat ca', na' txen len Criston'

gosenabi'e to mil iz. <sup>5</sup> Cate'ch ba goc to mil iz besyeban bene' ca' gosenita'chach gosejnilaže' Criston', ben' gosac bene' nechw besyebane' ladjo bene' guat ca', cana'ch yosbane' yezica'chle bene' guat. <sup>6</sup> Mbalaz nita' bene' ca' belis bosbane' ladjo bene' guat ca' da' nechw, bene' ba gwlej Diosen' cont zjanaque' lo ne'e. Bi yesac chegaque' can' gac che bene' ca' yesežaglagüe' neche xtola'gaque' toli tocañe, da'nan' žacho yela' got gwchope. San yesenite' yesonxene' Diosen' na' yesonxene' Criston', na' da'nan' guac nacho yesaque' b̄xoz. Legaque' yesenabi'e len Criston' to mil iz.

<sup>7</sup> Na' cate' ba goc to mil izen', Diosen' güe'e latje yechoj Satanás dan' chnabia' da' xigüe' ca' lo' yechw zitjwchgua dan' nac lo gabil gan' bseyjuen'. <sup>8</sup> Na' yechojen na' da' yoble siyen' bene' že' yogo' nación ca' že' lo yežlion'. Na' siyen' bene' ca' zjanzi' Gog na' Magog, gwtoben legaque' cont yesedillene' Criston', na' yesaque' bene' zan juisyw ca yox da' chi' cho'a nisdao' da' nono chac gwlab. <sup>9</sup> Nach ble'edagüe' da' bene' zan juisyw ca', gosa'aque' doxen lo yežlion', ja'aque' gan' chi' ciuda dan' chaque Diosen' gan' že' bene' ca' gwleje' cont zjanaque' lo ne'e. Na' cate' gosechje' ciudan', Diosen' bene' cont bchoj yi' le'e yaban' bzeytecczen legaque'. <sup>10</sup> Na' ca nac Satanás dan' gwziye' bene' ca' že' yežlion', angl che Diosen' bosozalen' lo yi' gabil gan' chala' azufre, yi' xen da' nac ca to nisdao' gan' ba bosozale' bež xigüe' nechon' na' bež xigüe' gwchopen' ben' be' diža' güenlaže' cont gosonxen beñachen' bež nechon'. Na' yesežaglaon do ža do yel toli tocañe.

### *Goc yela' justis che bene' ca' ba gosat*

<sup>11</sup> Nach ble'eda' chi' Diosen' to lo siy xen da' nac da' šiš, chi'e chnabi'e. Na' chna'tie' yežlion' len da' ca' chle'echo le'e yaban' na' besyeniten, noch no besele'e len, na' gach ga gosac xišne'en ga yoble. <sup>12</sup> Na' ble'eda' bene' ba gosat, bene' gole len bene' xcuide' len bi' bixjw, zjazeche' lao Diosen'. Nach Diosen' bzaše' libr ca' gan' zjanyoj yogo' lo' da' goson to toe'. Na' gwdena' bzaše' libr gan' zjanyoj la bene' ca' zjanape' yela' mban toli tocañe. Na' bene' yela' justis chegaque' con ca gosone' šlac gosebane', le yogo' da' gosone' zjanyojen le'e libr ca'. <sup>13</sup> Yogo' bene' gosat lo' nisdan' besyechoje' zjazeche' lao Diosen', na' yogo' bene' gosat ga yoble lecze besyechoje' zjazeche' lagüe' cont bene' yela' justis che to toe' con ca gosone' šlac gosebane'. <sup>14-15</sup> Nach Diosen' bcueze' yela' goten' nombia'cho, na' bene' cont noch no gwže' latje che bene' guat ca' na' bnitlagüen'. Na' bene' bi bosozenag che Dios, yogo' bene' bi nyoj lagaque' le'e libr gan' nyoj la bene' zjanap yela' mban toli tocañe, bosozale' legaque' lo yi' gabil da' nac da' xen ca to nisdao'. Na' dan' goc chegaque', lenna' yela' got gwchope chegaque'.

## 21

### *Yežlion' na' le'e yaban' besyeyaquen da' cobe*

<sup>1</sup> Gwdena' ble'eda' le'e yaban' ba beyaquen da' cobe na' lecze ca' yežlion', le yaba dan' goc da' nechw na' yežlio nechua' besyeniten. Na' lecze bich gota' nisdao'. <sup>2</sup> Neda' Juan ble'eda' ciuda che Diosen', ciuda Jerusalén cobe da' chi' yaban' gan' zoa Diosen', betjen lo yežlion'. Ba nonen' xdan ca to no'ole bene' ba bpa'a cuine' cont naque' xdan cate' gwšagne'e. <sup>3</sup> Na' do gan' chi' Diosen' chnabi'e benda' gwne to bene' zižje, gwne':

—Gwŋa'šc, Diosen' ba betje' zoalene' benach. Soateze' len legaque', le gwleje' legaque' cont zjanaque' yež che', na' yesonxene'ne'. <sup>4</sup> Na' Diosen' gone' cont bich gac da' yesyeyaše'laže'de', da' yesyegüine'de' o da' yesebeže' chen. Nono gat, nono šey la, le ba gwde che yogo' da' ca' gota' lo yežlio nechon'.

<sup>5</sup> Nach Dios ben' chi' chnabi'e gwne':

—Da' li ba chocoba' yogo'lo' da' de.

Lecze gwne':

—Bzoy diža' quinga ba bendo', le naquen diža' li na' gac can' gwnian'.

<sup>6</sup> Nach gože' neda':

—Bač goc da' cheyala' gac. Neda' naca' ben' ben yežlion' len yogo' bichle da' de, na' naca' ben' gon cont te chen. Da'n'an' zaca'lebda' ca letr nechw da' nzi' A na' letr bzebe da' nzi' Z. Note'teze bene' chaclaže' si'e da' gwnežjua'ne', gwnežjua'ne' yela' mban toli tocaŋe da' zaca'lebe ca nis ya'a da' che'ejcho cate' chbi'lecho, na' bi sia' laxjuen. <sup>7</sup> Na' bene' chesejnilaže' neda', še ba gosezoede' bi yesebejyichje' xtižan', gac chegaque' yogo' da' šagüe' da' ba bia' diža' chen, na' yesonxene' neda', na' gwlo'a zjanaque' xi'ina'. <sup>8</sup> Perw ca nac bene' ca' chesežeb yosozenague' chia', bene' bi chesejnilaže' neda', bene' cheson da' ca' chgue'eda, bene' chesot ljež benache', bene' cheson da' nac da' yela' zto' len cuerp chegaque', bene' cheson txen len bite'teze yela' guaža', bene' chesejnilaže' l' gua'a lsaca', na' yogo' bene' cheso'e diža' güenlaže', yogo' bene' ca' yezazaca'zi'e toli tocaŋe lo yi' xen da' nac ca to nisdao', yi' gabil gan' čala' azufren'. Na' da' gac chegaquen', lenna' žacho yela' got gwchope.

### *Ciuda Jerusalén da' nac da' cobe*

<sup>9</sup> Na' bezle'eda' to angl gažen' ben' gosoxe' tas ca' gaže dan' zjanža'te da' zjajožen da' bosolalje' cont gosac yela' zi' ca' la'zelagüe lo yežlion'. Gwbigue' gan' zoan' na' gože' neda':

—Da len neda' cont gwlo'eda' le' bene' ca' zjazaca'lebde' ca to no'ole za' gwšagna'. Na' Jesucristw ben' zaca'lebde' ca xila' dao' ben' gosot bene' Israel neche xtola'gaque', guac nacho le' si'e no'olen'.

<sup>10</sup> Nach Spiritw che Diosen' benen cont gwy'alena' anglen' to lo ya'a xen da' nac sibe, na' blo'ede' neda' ciuda Jerusalén da' nac ciuda che Dios. Ble'eda' gwzoan yaba gan' zoa Diosen' na' chetjen lo yežlion'. <sup>11</sup> Na' ciudan' gochtichguan len be'ni' da' nsa' Diosen', na' ble'eda' chactiten ca to yej da' zaca'chgua, ca yej da' nzi' jaspe da' chle'echo ca vidrw. <sup>12</sup> To ze'e xen da' nac sibe nyechjen ciudan', na' nita' šižinw puert chen, na' to to cho'a puerten' zecha tgüeje angl. Na' le'e puert ca' zjanyoj la šižinw bene' ca' bosoxie' šižinw cuen diaža che neto' nacto' bene' Israel. <sup>13</sup> Na' le'e ze'e dan' zoa šla'a ciudan' gan' chla' gwbiž nita' šone puert, na' šla'a gan' chxo'a gwbiž yešonen, na' šla'a zej yichjelen yešonen, na' šla'a zej xanelen yešonen. <sup>14</sup> Na' ze'e dan' nyechje ciudan', lenenna' naquen de šižinw yej xen, na' zjanyoj le'e yej ca' la šižinw neto' nacto' postlw che Jesucristw ben' zaca'lebde' ca xila' dao' ben' gosot bene' gualaž četo' neche xtola'gaquen'.

<sup>15</sup> Na' angl ben' be'len neda' diža' noxe' to ya da' nac de oro da' bchine' gwxi'e medidw ciudan', che ze'e chen na' che puert ca'. <sup>16</sup> Ciudan' naquen da' cuadradw, toze ca naquen zlaga' len ton. Anglen' bchixe' ciudan' len ya' chen' na' goquen čhope mil čhope gayoa kilómetros to to šla'an, ca'te' ndonen, ca'te' zlagan' na' ca'te' siben'. <sup>17</sup> Nach bchixe' ze'e dan'

nyechj ciudan' na' goquen gayontap metr yela' sib chen, metr da' nombia' benach, le lenna' bchin anglen' gwxi'e medidon'.

<sup>18</sup> Ze'e da' nyechj ciudan' naquen de yej da' zaca' da' nzi' jaspe, na' doxen ciudan' naquen de oro na' nlan' ca to vidrw da' nac xilaže'. <sup>19</sup> Na' ze'e da' nyechj ciudan', zjanone' lenen xdan len yogo' cuen yej da' zaca' da' de da' zjanac beya color na' chesactiten. Da' nechon' naquen de jaspe; da' gwchope de zafiro; da' gwyone de ágata; da' gwdape de esmeralda; <sup>20</sup> da' gayo' de ónice; da' gwxope de cornalina; da' gaže de crisólito; da' xono' de berilo; da' ga de topacio; da' ši de crisoprasa; da' šnej de jacinto; na' da' šižinw de amatista. <sup>21</sup> Na' puert ca' šižinw zjanaquen šižinw perlas, to ton zjanonen' de toze perla. Na' nez yo da' de lo ciudan' naquen de oro na' zjanlan' ca vidrw da' nac xilaže'.

<sup>22</sup> Bibi yodao' ble'eda' lo ciudan', le bene' ca' že' ciudan' zjanite' lao Xancho Dios ben' nap la'zelagüe yela' guac xen na' lao Jesucristw ben' zaca'lebde' ca xila' dao' ben' gosot bene' gualaž cheto' neche xtola'gaque'. Legaque' chesonxen bene' lo ciudan'. <sup>23</sup> Bene' ca' že' ciudan' bi cheseyažde' gwbižen' ne bion' yososenin' lo ciudan', le be'ni' da' nyechj Diosen' chsenin' len legaque' na' lecz ca' be'ni' da' nsa' Jesucriston'. <sup>24</sup> Na' be'ni' che Diosen' gwsenin' len bene' za'ac yogo' nación bene' chesejnilaže' Diosen', na' bene' gwnabia' ca' že' yežlion' yesonxene' Diosen' yosonežjue'ne' bi da' zaca' da' šagüe' da' de chegaque', len no yela' bala'an da' de chegaque'. <sup>25</sup> Bitw šeyjw puert ca' zjanita' ciudan' lagüe' ža, na' gwbat gac šeže'le. <sup>26</sup> Can' ba gwnia', yela' zaca' yela' xdan da' zjade yogo' nación len yela' bala'an da' zjade che bene' gwnabia' che nación ca', yosonežjuen' Diosen' lo ciudan'. <sup>27</sup> Lo ciudan' gwbat gac šo' bene' chon da' zban. Bi gac šo' bene' chon bite'tez da' chgue'e Diosen' o bene' choe' diža' güenlaže'. Con bene' zjanyoj lagaque' le'e libr che Jesucriston' gan' zjanyoj la bene' zjanape' yela' mban toli tocaņe, legacze' gac yeso'e na'.

## 22

<sup>1</sup> Nach anglen' blo'ede' neda' yegw gan' yože nis da' chnežjon benachen' yela' mban toli tocaņe. Nisen' nacten ca vidrw le nyadichguan. Yegwna' chchojen do gan' chi' Diosen' chnabi'e txen len Jesucriston' ben' zaca'lebde' ca xila' dao' ben' gosot bene' gualaž cheto' neche xtola'gaquen'. <sup>2</sup> Na' gachoł nez yo xen che ciudan' na' chop la'a cho'a yegon' ze yag da' chnežjon benachen' yela' mban toli tocaņe. Na' yogo' bio' chesebian frut, šižinw ni'a chesebian lao tgüiz, na' bene' nación ca' yosochine' xlaguenna' ca rmed cont yesenite' güen. <sup>3</sup> Gwbat gata' bi da' chgue'e Diosen' lo ciudan', le ciudan'an' cui'e nabi'e txen len Jesucristw ben' zaca'lebde' ca xila' dao' ben' gosot bene' gualaž cheto' neche xtola'gaque', na' yogo' bene' že' ciudan' yesonxene' le'. <sup>4</sup> Yesenite' yesele'ede' cho'alao Diosen', na' yoj la Diosen' loxgagaque'. <sup>5</sup> Gwbatech gac šeže'le lo ciudan'. Na' bene' že' lo ciudan' bi yeseyažde' be'ni' che no lámpara o che gwbiž, le be'ni' da' nyechj Xancho Diosen' gwsenin' len legaque'. Na' yesenabi'e len le' toli tocaņe.

*Ba zoa yid Jesucriston' da' yoble*

<sup>6</sup> Nach anglen' gože' neda':

—Yogo' diža' quinga ba bendo' zjanaquen da' li na' gac con can' ba gwnato'. Xancho Diosen' chbeje' bene' cheso'e xtižen' na' chzejni'ide'



legaque' bin' yesene', na' len' ba gwsele' neda' chzejni'ida' le' len bene' lježo' ca' chesonxene' Diosen' cont gacbe'ele da' ca' za' gac.

<sup>7</sup> Nach gwna Jesúsen':

—Da' li ba zoa yida' da' yoble. Na' mbalaz bene' chosozenag che da' ca' ba bzojo' le'e libr chio' choen' diža' che da' ca' za' gac.

<sup>8</sup> Neda' Juan benda' na' ble'eda' da' quinga ba bzoja' nga, na' beyož bendan' na' ble'edan' jazoa xiba' xni'a angl ben' blo'e neda' da' ca', godca' gonxena'ne'. <sup>9</sup> Perw anglen' bi bene' latje, gwne':

—Bi gono' ca', le naca' con to bene' güen xšin Diosen' can' naco' le', can' zjanac bene' lježo' ca' ba gwleje' cheso'e xtižen', na' can' zjanac yogo' bene' yosozenag che da' ca' ba bzojo' le'e libr chion'. San benxen Dios.

<sup>10</sup> Lecze gože' neda':

—Bi gwcuša' diža' ca' ba bzojo', le ba zoa gac da' ca' bzojon'. <sup>11</sup> Na' bene' cheson da' mal, yesonchcze' da' malen' chesonen'. Na' bene' cheson da' yela' zto', yesonchcze' da' yela' zton' chesonen'. Na' bene' cheson da' chazlaže' Diosen', yesonchcze' da' güenna' dan' chesonen'. Na' bene' ba gwlej Diosen' cont zjanaque' lo ne'e, lo ne'en yesyega'ancze'.

<sup>12</sup> Nach Jesúsen' gozne':

—Da' li ba zoa yida' da' yoble, na' yedeyena' gac güen che to to beňach o saca'zi'e con can' ba ben to toe'. <sup>13</sup> Neda' naca' ben' ben yežlion' len yogo' bichle da' de, na' naca' ben' gon cont te chen. Da'n'an' zaca'lebda' ca' letr nechw da' nzi' A na' letr bzebe da' nzi' Z. Ba zoa' cate' gwxe yežlion' na' soacza' cate' te chen.

<sup>14</sup> Mbalaz bene' ca' nita'teze' chesenabe' yeca'a xtoła'gaque' cont yesaque' txen len bene' ca' ba ble'edo' ben' ba besyeyach xalana'gaque'. Legaque' gac yesagüe' frut dan' chbia yag yela' mban toli tocaňe, na' gac yeso'e cho'a puert che ciudan'. <sup>15</sup> Perw ca' nac bene' ca' cheson da' nac da' zban, bene' ca' cheson txen len no yela' guaža', bene' cheson da' nac da' yela' zto' len cuerp chegaque', bene' chesot ljež benache', bene' chesejnilaže' l gua'a lsaca' o bi da' ca' ben Diosen', na' yogo' bene' cheso'e diža' güenlaže' o chesyebede' chosozenague' dan' zjanac ca', yogo' bene' ca' bi gac yeso'e lo ciuda' chian'.

<sup>16</sup> —Neda' Jesús ba gwseła' angl chian' cont ba bzende' le' yogo' da' ca' ba bzojon'. Na' cheyala' gwnežjon' bene' ca' chesedop chesežag chesonxene' neda'. Neda' naca' xi'in diaža che da' rey David na' naca' ben' gwseła' Diosen' yežlion' lo diaža che'. Na' zaca'leba' ca' beljw xsil.

<sup>17</sup> Spiritw che Diosen' na' lecze ca' chio' chonxencho Jesúsen' chnablaže'cho yob yidšca Jesúsen' da' yoble, chio' zaca'lebcho ca' to no'ole si'e. Na' yogo' bene' yesene diža' quinga lecze yesenablaže'šque' yide' da' yoble.

Na' note'teze bene' chaclaže' si'e da' gwnežjw Jesúsen' le', cheyala' yedenaben', na' gwnežjue'ne' yela' mban toli tocaňe da' zaca'lebe ca' nis ya'a da' che'ejcho cate' chbilecho, na' bi si'e laxjuen.

<sup>18</sup> Na' chosnisda' le'e chzenagle can' ža libr nga che da' ca' za' gac, note'tezle še gwzanchle ca' dan' ža libr nga, Diosen' gone' gac chele yogo' yela' zi' dan' zjanyoj le'e libr nga. <sup>19</sup> Na' note'tezle še žale bi gac yogo' da' qui zjanyoj le'e libr nga, Diosen' yoxie' lale le'e libr chen' gan' nyoj la bene' ca' zjanape' yela' mban toli tocaňe na' gone' cont bi gac šo'le lo ciuda' chen', neca' gac chele yogo' da' güen da' zjanyoj le'e libr nga.

<sup>20</sup> Nach Jesús, ben' bzejni'ide' neda' yogo' da' ca' ba bzoja', že':

—Da' li ba zoa yida' da' yoble.

Na' neda' chapa'ne':

—Ca' gacšca. Yob yidšco', Xana' Jesús.

<sup>21</sup>Xancho Jesucriston' soacze' gaclenščacze' yogo'le. Da' na'zen' chzoja'.